



Теодор  
Драйзер

# Америка фожиаси

Иккинчи қисм



«КАМОЛОТ»  
КУТУЗОНАСИ

Теодор  
Драйзер

# Америка фожиаси

Иккинчи қисм



ЯНГИ АСР АВЛОДИ  
ТОШКЕНТ  
2016

**УЎК: 821.111-3**

**КБК: 84(7)**

**Д – 76**

**Драйзер, Теодор**

Америка фожиаси: роман. Иккинчи қисм. Теодор Драйзер / Русчадан Ўқтам Усмонов таржимаси. – Тошкент: Янги аср авлоди, 2016. – 688 б.

ISBN 978-9943-27-715-1

Азиз китобхон! Биринчи китоб орқали сиз асарнинг асосий қаҳрамонлари билан танишдингиз. Табиийки, иккинчи китоб воқеаларга, ҳаяжонли фурсатларга яна-да бой. Бойлик кетидан қувган, шундай ҳаётни умри давомида орзу қилган, аммо бундай тўқис ҳаётга меҳнат ва машаққатсиз эришишни орзу қилган қаҳрамоннинг бу хом хаёли уни мудҳиши жиноятга етаклайди. Ўқувчи ўз қаҳрамонининг руҳий ҳолати билан танишаркан, бундай тақдирга аслида унинг ўзи эмас, уни тарбиялаган оиласи мұхит, уни тарбиялаган жамият сабабчи эканлигини тушунади.

Клайд Грифитснинг электр курсида ўлдирилиши унинг тақдирни билан қанчалик боғлиқлиги, севги-муҳаббат риштасининг бундай шафқатсиз ҳаёт таъсирида ҳеч қандай аҳамият касб этмаслиги, инсоний туйғулар ўрнини эгаллаган қабоҳат ўқувчи қалбини ларзага солади.

**УЎК: 821.111-3**

**КБК: 84(7)**

Русчадан  
**ЎҚТАМ УСМОНОВ**  
таржимаси

ISBN 978-9943-27-715-1

© Теодор Драйзер, «Америка фожиаси». Faafur Fулом номидаги Адабиёт ва санъат нашриёти, 1976 йил.

© Теодор Драйзер, «Америка фожиаси». «Янги аср авлоди», 2016 йил.

## ИККИНЧИ КИТОБ

### XXXIX БОБ

Укки кишининг интилиши бир-бирига зид келиб қолса ва бунинг устига бу қиин аҳволдан қутулишга уларнинг иккалови ҳам ношудлик қиласалар, унда қандайдир фавқулод кутқармаса, ишқал баттар мушкуллашиб, фожиага айланиши турган гап. Аммо бундай фавқулод юз бермади. Клайд хавф солиб келаётган баҳтсизликни унутишга қанчалик уринса ҳам, Робертанинг фабрикадалиги бунга сира йўл қўймасди. Агар, уни ҳадеб кўз ўнгига хира бўлавермай, қаёққадир кетишга, бошқа бирор жойдан иш топишга кўнди-ролганда эди-я, унда Клайд бамайлихотир кейинги режаларини пишираверарди. Бироқ ҳозир Роберта индамаган тақдирда ҳам, шундоқ юриш-туришнинг ўзи Клайдга: хўш, нима чора топмоқчисан, деб савол бераётгандек бўлар, шу сабабли Клайднинг боши ғовлаб қолган эди. Робертага нисбатан ҳозирги совуқ муносабати бечоранинг қисматига у жавобгар эканлигини ҳам унуттириб юбора бошлади. У Сондрани ниҳоятда севиб қолган, шу боисдан гангиги, нима қиларини билмасди.

Зиммасида турган муаммо қанчалик мушкул бўлишига қарамай, Клайд ҳамон Сондра ҳақида ширин хаёл сурар, Роберта билан боғлиқ оғир ташвишлари эса назарида ана шу ширин хаёлларини тўсиб турган соя, булатга ўхшаб туюларди баъзан. У Роберта билан ҳали орани бутунлай узмаган, шу сабабли ундан қутулган пайтларида, кечалари тез-

тез кибор таниш-билишлари орасида бўлишга интиларди. Омади юришганини қарангки, уни goҳ Гарриэт ёки Тэйлорникига зиёфатга чақиришса, goҳ Финчли ёки Крэнстонларникига базм кечасига таклиф этишар, Клайд ана шундай пайтларда Сондрага ҳамроҳ бўлиб юрар ёки ақалли у билан учрашиш иштиёқида ич-ичидан қувонганча йўлга тушар эди. Сондра ҳам Клайдга қизиқиб қолганини энди илгаригидек ҳийлакорлик ва мугомбирлик қилиб яшириб ўтирмас, кўпинча одамлар орасида Клайдга очиқчасига парвона бўлаверар эди. Лекин бундай учрашувлар Сондрунинг одатдаги тенгдошлари орасида, ёшлар йигинида бўлгани учун, ўз-ўзидан маълумки, катталар бунга унчалик аҳамият беришмасди.

Тўғри, таниш-билиш орттириш масаласида ниҳоятда димоғдор ва фаросатли аёл бўлган миссис Финчлига қизи ва ўртоқларининг Клайдга бунчалик илтифот қилишлари аввалига унчаям ёқинқирамади. Аммо Клайдни бошқа хонадонларда, Сондрунинг деярли ҳамма таниш-билишлари-никида ҳам борган сари бажонидил қабул қилаётганларини кўргач, миссис Финчли охири Клайд тўғрисида бошқача ўйлай бошлиди, ҳарқалай, Клайднинг киборлар даврасида тутган ўрни унга айтганларидан кўра тузукроқ бўлса керак, деган қарорга келди. У ўғли ва ҳатто Сондрадан Клайдни сўраб-суриштирмоқчи ҳам бўлди.

Бироқ Сондра, башарти у Гил ва Белла Грифитсларнинг амакиваччаси экан, ёқимтойлиги туфайли ҳатто чўнтаги қуруқ бўлган тақдирда ҳам уни ҳамма жойда қабул қилишаётган экан, хўш, нима учун биз ҳам Стюарт билан уни меҳмонга чақиролмаймиз, деди-ю, гапни чалфитиб қўя қолди. Миссис Финчлининг шу билан кўнгли жойига тушгандай бўлди, аммо қизига: Клайд иккаланг зинҳор

апоқ-чапоқ бўлиб кетманглар тагин, деб насиҳат қилди, Сондра бир томондан онасининг ҳақдиги-ни тушунарди-ю, аммо Клайдга ниҳоятда ўрганиб қолганлиги учун онасини ҳам алдашга жазм этди – ахир, у Клайд билан ҳар қандай шароитда ҳам ўзи хоҳлаганча бемалол пинҳона ўйнаб-кулиб юравериши мумкин-ку. Аслида ҳам шундай эди, уларнинг учрашувларидан воқиф бўлган ҳар бир киши Сондра билан Клайд ўртасидаги яқинлик тобора қучайиб бораётганини фаҳмлар, мабодо Сондранинг ота-онаси бундан хабар топганларида, шубҳа-сиз, хавотирга тушиб қолган бўлур эдилар. Клайднинг бутун хаёли у билан бандлиги у ёқда турсин, ҳатто Сондранинг ўзи ҳам энди сирли, охири вой муҳаббатнинг энг ҳалокатли ҳангомаларига бориб тақалувчи фикр ва кайфиятлар оғушида юради. Чиндан ҳам улар ёт кўзлардан холимиз деб ўйлаган пайтларида қўл сиқиб кўришишар, ўпишишар ва бир-бирларига интиқ бўлиб тикилиб қолишарди, бундан ташқари, хаёлларига келажак тўгрисида алланечук хира, аммо ўжар орзу-тилаклар тўхтовсиз ёпирилиб келаверар, гўё бу орзу-тилаклар уларни бир-бирлари билан қовуштириши лозимдай эди, лекин буни Клайд ҳам, Сондра ҳам аниқ тасаввур қилолмас эдилар.

Ёз кунлари келди дегунча – бунга ҳам бир оз вақт қолди – иккалови Ўн иккинчи кўлда байдаркада сузиб сайр қилишади... Соҳилдаги дараҳтларнинг узун кўланкалари кумушранг сув бетига тушган, ойнадек силлиқ сув сатҳини шабада мавжлантираётган бўлади, Клайд эринибгина эшкак эшади, Сондра бўлса қайиқнинг қўйруқ томонида ёнбошлиб олганча келажакдаги ҳаётларига шама қилиб уни ўртайди. Крэнстон ва Фэнтларнинг чорбоғидан жануби-гарбий томонга қараб кетган, Финчлилар ерининг шундоққина ёнгинасидан ўтган

ўрмон сўқмоғи майин ўт-алафлар билан қопланиб, ола-тароқ қуёш нурлари тушиб туради, худди шу сўқмоқдан улар июнь ва июль ойларида от миниб ўтиб, гўзал Илҳом бурунига (чамаси гарбга қараб етти миль юрилиши керак) йўл олишади... Сондра лўйилар либосига ўралиб, Шейрондаги хайр-эҳсон бозоридаги аллақайси бир дўконни бошқаради ёки башанг суворий кийимида чиқиб, чавандозлик санъатини намойиш этади – чинакам романтика бўлади ўшандада... Сайр-томушалар, кундузги ва ой шуъласидаги танцалар пайтида Сондра Клайднинг кўксига бош қўйиб, хуморланиб роҳат қиласади, Клайднинг кўзларига тўйиб-тўйиб тикилади.

Харж-харажатлар хусусида эса бош қотириб ҳам ўтирмайди. Эҳтимол, ота-онаси койиши ҳам мумкин, лекин ҳечқиси йўқ. Фақат ишқ лаззати-ю, роҳат-фароғатли ёз фасли, лиммо-лим баҳт ато этувчи висол онига интилиш, бутун қаршиликлардан чўчимай, охири иккаловини бир-бири билан абадий жипслаштирувчи оташин муҳаббатга этишиш...

Шу асно орадан узундан-узоқ, диққинафас ва даҳшатли икки ой ҳам ўтди, аммо Роберта Клайдни ҳалокатга йўлиқтириши мумкин бўлган йўлни тутишга ҳамон ботинолмасди. Гарчи у, Клайднинг уйланишни хаёлига ҳам келтирмай, жавобгарликдан қочиш йўлини қидираётганини тушуниб турсада, Клайд сингари, у ҳам қатъий ҳаракат қилишдан қўрқиб, оқим измида сузиб кетмоқда эди. Чунки у Клайдга никоҳдан ўтиш зарурлигини айтган ўша суҳбатдан сўнг, Клайд бир неча бор мужмал жавоб қайтарган, ҳатто амакимга айтсанг ҳам бари бир мен сенга уйланмайман, майда-чуйдаларимни йиғиштираману, бошим оққан томонинг кетаман-қоламан, деб дўқ аралаш шама ҳам қилган эди.

Клайд, Ликургдаги ҳозирги мавқеимга бирор халал берса, унда сенга уйланолмайман, буниси ҳам ҳолва ҳали, айни сен ёрдамга муҳтож пайтингда күмаклашолмай қолишимни айтмайсанми, демоқчи бўлар эди. Шу шамадан кейин Роберта Клайднинг табиатида ҳозиргача маълум бўлмаган анча-мунча бағритошлиқ борлигини ўйлаб қолди; ваҳоланки, у тузукроқ бош қотирганда, Клайднинг бу нуқсонини анча илгарироқ, ётоқхонангга кириласан, деб биринчи бор оёғини тираб олган ўша пайтдаёқ сезган бўлар эди.

Лекин Клайд Робертанинг лом-мим демай юрганини кўриб ва ҳарқалай, ким билади, сиримни очиб қўймасин тағин, деб ҳайиққанидан муносабатини бирмунча ўзгартирди: Роберта пўписа қилгunga қадар Клайд унга мутлақо эътиборсиз қараган бўлса, энди қалбакилик қилиб унга ўзини меҳрибон ва хайриҳоқ қўрсатиб, дўстона илтифот билдира бошлади. Аҳволи анчагина хавфли ва ҳалокатли бўлгани сабабли, Клайдда унга хос бўлмаган уддабуролик хислати кучая бошлади. Бунинг устига Клайд Робертани эритиб, ўзимга ром қилиб оламан, деган хом хаёлда эди: ўзини гўё унинг аҳволидан ташвишга тушиб қолгандай кўрсатавериши кепрак, жуда иш чаппасига кетиб иложсиз қолинган тақдирда эса, борингки, уйланишга ҳам тайёрман, дейиш қочмайди (ўзига қўйса-ю, Клайдни ўлганда ҳам ҳеч бир одам бу фикрга кўндиrolмаган бўлур эди). Ана шунда Роберта унга нимадир бир чорасини топасан, деб қисталанг қилавермайди, Клайд бўлса, ёлғон-яшиқни ишлатса ҳам, вақтдан ютиб, бир амаллаб никоҳдан қутулиб қолади ва айни пайтда Ликургни ҳам ташлаб қочмайди.

Тўсатдан юз берган бу ўзгаришнинг сабабини Роберта тушунар, аммо у шу даражада ҳимоясиз ва боши қотиб қолганлигидан Клайднинг чин са-

мимиятдан маҳрум сохта меҳрибонлигига, шу йў-  
синдаги фикр ва маслаҳатларига ҳам жон-жон деб  
қулоқ соларди. Хуллас, Клайд уни яна бир оз сабр  
қилишга кўндириди. Шу вақт ичида у пул жамға-  
ришидан ташқари, ҳатто фабрикадаги ишларини  
ҳам саранжомлаб қўяди-да, Ликургдан жуда бўл-  
маганда маълум вақтга чиқиб кетиб, қайсиdir  
бир жойда никоҳдан ўтишади. Кейин у Робертани  
боласи билан бошқа бир шаҳарга жойлаштириб  
қўяди, Роберта эрли аёллардек тинчгина яшайве-  
ради, Клайднинг ўзи эса, гарчи бу ҳакда у ҳозир оғиз  
очмаган бўлса-да, Ликургга қайтиб келади ва Робер-  
тага топганича пул юбориб туради. Лекин шуларп-  
нинг ҳаммаси, турган гап, фақат бир шарт билан:  
Роберта уни эрим ва боламнинг отаси, деб зинҳор  
айтмаган тақдирдагина қилиниши мумкин, чунки  
Клайднинг ҳозирча бундан бошқа иложи йўқ. Яна  
Роберта ҳеч бўлмаганда, эрим ташлаб кетди, деган  
баҳона билан ажралишга уриниб кўриши ҳам на-  
зарда тутилди, буни жуда чўзизб ўтирмай тез орада,  
бу ердагилардан пинҳон тутиш учун қаердадир Ли-  
кургдан олисроқда қилса ҳам бўлади, деган қарорга  
келинди (Роберта эса майли, фақат менга уйланса  
бас, деб ўзига қайта-қайта таъкидлар эди). Аммо  
Клайд иш битиб, эшак лойдан ўтгандан сўнг Робер-  
танинг шундай қилишига сира кўзи етмасди.

Албатта, Робертага бу ваъдаларни берәётганида  
Клайд авваламбор, ўзи самимий бўлмагани учун  
Робертанинг самимиийлиги ёки носамимиийлиги би-  
лан ҳам унчалик иши йўқ эди. Агар ўз хоҳишига  
қўйса-ю, Робертани мусибатдан қутқариш учун  
ҳатто сал вақтга бўлса ҳам Ликургдан кетишга у  
мутлақо кўнмасди. Бу – Сондра билан ажралиш  
деган сўз, бу айрилиқ унинг режаларини бутунлай  
бузизб юбориши мумкин-ку, ахир. Шунинг учун  
ҳам, у ҳамон лоқайдлик қилар, айрим пайтларда

эса тентак бир қизни тузоққа илинтирган сохта рұхоний ва сохта гувоқлар ҳақида ҳикоя қилувчи аллақандай фожиали фильмни эслаб кетар, ўша фильмдагига ўхшаш қалбаки, ёлғондакам түй ўт-казсаммикин, деб хом хаёл сурарди; аммо-лекин Роберта унақа бўшанг қизлардан эмас эди, бунинг устига ёлғондакам түй ўтказиш учун ҳам қанча вақт, қанча пул, журъат ва эпчиллик керак, ахир, шу боисдан Клайд бир оз ўйланиб турди-ю, бу иш қўлидан келмаслигига қўзи етди.

Яқин орада муқаррар рўй берадиган ҳалокатга томон юзма-юз кетаётгани, бу ҳалокатдан қандайдир оёқ остидан чиққан фавқулодгина қутқариб қолмаса, бошқа илож йўқдигини у яхши тушунар эди. Мабодо Робертани турли найранглар билан ҳам алдаб бўлмайдиган ўша машъум соат келиб, Роберта уни фош этадиган бўлса, ҳамма нарсадан тониб қўя қоламан, деб ният қиласарди баъсан Клайд: бу қиз билан зигирча ҳам алоқам йўқ, уни фақат бўлимимдаги бир ишчи сифатида танийман, холос! Менга нисбатан фирт товламачилик қилишяпти, дейди-қўяди ўшандা.

Роберта май ойининг бошларига келганда ўзини ёмон ҳис қила бошлагани ва аҳволини атрофдагилар сезиб қолишидан хавфсирагани учун қатъий туриб Клайдга ўз ҳукмини ўтказа бошлади, агар тишини-тишига қўйиб чидаганда ҳам фабрикада биринчи июндан нари қололмаслиги: ундан ўтса қизлар иккиқатлигини сезиб қолиши, Роберта эса бунга ўлганда ҳам чидай олмаслигини айта бошлади. Худди аксига олгандай, шу пайтда Сондра Клайдга ўзи, онаси ва бир неча хизматкорлари билан ҳақиқий мавсум бошлангунга қадар тузукроқ ўрнашиб олиш мақсадида бешинчи июндан кечикмаёқ Ўн иккинчи кўлдаги янги чорбогларига кетаётгандарини хабарлаб қолди. Кейин ўн сакки-

зинчилардан қолмай у ерга Крэнстон, Гарриэт ва яна бошқа аллакимлар күчіб ўтишгач (балки Белла ва Майралар ҳам меҳмонга бориб қолишлари мумкин), Клайд шанба ва душанба кунларига Крэнстонлардан таклифнома кутаверса ҳам бўлади – буни Сондра Бертина орқали боплаб ўрнига қўяди. Кейин сўзсиз, (шароит ўз-ўзидан шунга олиб келади) Гарриэт, Фэнтлардан, Ўн иккинчи кўлда истиқомат қилювчи бошқа хонадонлардан, ҳа айтгандай, Ўрмонзорда турувчи Грифитслардан ҳам таклифномалар келиши мумкин, Грифитсларникига у Белла туфайли шундоқ бемалол бораверса ҳам бўлади. Июль ойидаги икки ҳафталик таътил пайтида эса Клайд Қарағайзор бурунидаги «Казино»да туриши мумкин; агар Сондранинг маслаҳатига қўнишса, Крэнстонлар ёки Гарриэтлар уни ҳатто ўзлариникига таклиф қилиб қолишлари ҳам эҳтимолдан узоқ эмас. Ҳарқалай, Клайд, унчалик серхарж бўлмасдан туриб ҳам кўллар бўйидаги чорбоғларда яшаш лаззатини бир тотиб кўриши мумкинлигини тушунди, ахир у маҳаллий газеталарда чорбоғлар тўғрисида шу қадар кўп хабар ўқиган эдик (бунинг учун ҳозирданоқ нафсни сал тийиб бориш керак), яна тез-тез Сондра билан ҳали у чорбоғда, ҳали бу чорбоғда учрашиб туришини айтмайсизми, тағин шуниси яхшики, бошқа чорбоғларнинг хўжайинлари Клайдга Сондранинг ота-онасига ўхшаб ёмон кўз билан қарашмайди.

Сондра энди Клайдга биринчи бора унинг узлуксиз ва очиқчасига хушомадлар қилаётгани онаси билан отасига ёқмаётгани ва улар Европа бўйлаб узоқ саёҳатга жўнаш ҳақида гапиришиб қолишганини айтди: эҳтимол, онаси Сондра билан Стюартни ҳам бирга олиб кетар, чет элда эса улар камида икки йил яшашлари мумкин. Бу янгиликдан ҳам афт-ангори, ҳам кайфияти бузилган Клайдга қараб

туриб Сондра ҳам хафа бўлиб кетди ва ўша заҳотиёқ бу гапни зинҳор кўнглига олмаслиги кераклигини қўшимча қилиб қўйди. Ҳали ҳаммаси жойида бўлади, Сондранинг бунга ишончи комил. Унгача орада анча вақт бор, агар онаси Клайдга эҳтирос билан берилиб кетганидан тегишли хулоса чиқармаса, унда у қувлик йўлига ўтади, бари бир онасига фикрини ўтказади, Клайдга бўлган муносабатини ўзгартириб юборади... Ўшанда ҳам айтгани чиқмаса – онасини алдаса-алдайдики, аммо ўз билганича иш тутади, зарур чораларни кўриб қўяди. Сондра қандай чора кўражагини ҳозирча айтгиси келмаса ҳам, Клайд бари бир ширин хаёллар оғушида сузарди, гўё у Сондра билан қочиб кетиб, пинҳона никоҳдан ўтгану, кейин Сондранинг ота-онаси уни ҳар қанча ёқтиргмаганлари билан орадаги никоҳни бузиш қўлларидан келмаётгандай эди. Дарҳақиқат, гарчи ҳали жуда ноаниқ, ожизгина бўлса-да, Сондра кўнглида ҳам худди шу фикрлар кезиб юрарди. Гап шундаки, деб уқтиради у Клайдга, ойим мени киборлардан бўлган бир йигитга бермоқчилиги кўриниб турибди, у йигит ўтган иили ҳам менга хушомад қилиб юрган эди. Лекин энди, сени севиб қолганимдан кейин мени кўндириш ўлимдан ҳам қийин! – деди Сондра шўхлик қилиб.

– Ҳамма бало ҳали балоғатга етмаганимда, – деб дадиллик билан ва бепарда тушунтира кетди Сондра. – Шу важдан мен уларга қарамман. Лекин октябрда ўн саккизга тўламан, ана шунда – билиб қўйинг, минг дод-вой дейишгани билан қўлларидан ҳеч нарса келмайди. Ана ўшанда хоҳлаган кишишмга эрга тегаман. Мабодо, бу ерда, Ликургда қилолмасам буни, хўш, нима бўпти, бунақа ишнинг йўл-йўриғи кўп.

Бу фикр Клайдга алланечук тотли ва йўлдан оздирувчи афюндек таъсир қилди. Ичини ловулла-

тиб, ақлидан оздириб қүяёзди. Қани энди... қани энди орада Роберта бўлмагандами! Даҳшатли ва деярли чорасиз муаммо бу. Агар Роберта билан ҳозир Сондра енгиб ўтишни ният қилаётган ота-оналарининг қаршилигини айтмаганда, Клайдни жангнат ҳузур-ҳаловати кутаётган эмасми, ахир?! Сондра дейсизми, Ўн иккинчи кўл, киборлар давраси, бойлик-ҳашамат, севги ва тароват дейсизми. Шуларни ўйлаётуб Клайднинг нақ боши айланиб кетди. Агар Сондра иккаласи турмуш қуриб олишса, ота-оналарининг қўлидан нима ҳам келарди, хўш? Тақдирга тан бериб, уларни Ликургдаги ҳашаматли уйларининг кўркам хоналарига чақириб олишади ёки қандайдир бошқача йўл билан таъминлаб туришади. Клайд эса бориб-бориб Финчлиларнинг «Электр чангюткичлари компанияси»да албатта қандайдир катта бир жойга эга чиқади. Ана шунда у ҳатто Гилберт Грифитс билан, аввалига Ликургда уни майна қилганларнинг ҳаммаси билан бир қаторда туради (борди-ю, улардан ўтиб кетмаса агар!): Финчлиларнинг бутун мол-дунёсига Стюарт иккалови teng шерик меросхўр бўлишади! Ҳозир эса бу барча ҳашаматларнинг марказида, ҳаммасидан ҳам юксакликда худди «Минг бир кеча»да тасвиrlанган кишини лол қолдирувчи афсонавий бебаҳо дурга ўхшаб Сондра турибди.

Шунинг учун ҳам Клайд октябргача бирон бир ноўрин қадам босиб қўйишдан ўзини сақдаши лозим. Айниқса, шу кунларда оёғини тираганча менга уйланасан, деб туриб олган Роберта масаласида эҳтиёт бўлиши керак. Қандай бўлмасин ундан қутулишим зарур, деб ўйлади Клайд. Лекин шунга қарамай, у умрида ҳали ҳеч қачон бунақсанги оғир баҳтсизлик ёқасига келиб қолмаганини дард ва алам билан эслади. Эҳтимол, бошига тушган мусибатдан қутулишида Робертага ёрдам бериш

— Клайднинг бирдан-бир бурчи ҳисобланар (одамларнинг фикри ҳам шу, ҳойнаҳой, агар билганда онаси ҳам шуни истаган бўларди). Аммо Эстага ҳеч ким ёрдам бермаган эди-ку?! Ё хуштори келганими? Қаёқда, ҳатто виждони ҳам қилт этмай, Эстани ташлаганча дом-дараксиз йўқолган эди, Эста ҳам бундан ўлиб қолгани йўқ-ку. Роберта ҳам ҳозир худди бир пайтлардаги опасининг аҳволида, хўш, шу билан осмон узилиб ерга тушибдими. Демак, шундай экан, нега энди Роберта уни ҳалок қилмоқчи? Нега у Клайдни ижтимоий, эстетик ва ҳиссий маънода ўз-ўзини ўлдириш билан teng бўлган хатти-ҳаракатлар қилишга мажбур этяпти? Қайтага Клайдни Роберта ҳозир мана шу ташвишлардан халос этганда-ю, у охири бориб Робертага кўпроқ ёрдам бера олар эди... шубҳасиз, Сондранинг пуллари билан, албатта. Йўқ, Клайд Робертанинг бунчалик тошмехрлик қилишига йўл кўйлмайди, унда нақ умри поймол бўлади.

## ХЛ БОБ

Шу орада юз берган иккита арзимаган воқеадан кейин Роберта билан Клайднинг оралари баттар бузилиб кетди.

Нимадир бўлди-ю, Роберта бир кун кечқурун Клайдни Сентрал авенюда кўриб қолди: у почта биноси олдидаги йўлка четида Арабелла Старк деган қиз билан гаплашиб туради, Арабелла эса каттакон, ваҳимали автомобилда ўтирганча отасини кутаётган эди. Мавсумга мослаштириб, ўз тенгиларига ўхшаб танноз дидига яраша сўнгги модада кийиниб олган мисс Старк фақат Клайдгагина эмас, ўтган-кетганларга ҳам ўзини кўз-кўз қилиш мақсадида нозу карашма билан рулда ўтиради. Роберта ўзи бу пайтда Клайднинг тепса-тебран-

маслигидан сабр косаси тўлиб, уни қандай қилиб ўзига кўмаклашишга мажбур этолмай юрган вақти эди, шу сабабли мисс Старк унинг кўзига бегамлик, дабдаба ва енгилтаклиқ тимсоли бўлиб кўриниб кетди. Клайднинг эс-хүшини ҳам аслида худди шу нарсалар маҳлиё этиб, уни ҳардамхәёл қилиб қўйган, шу боисдан у Робертанинг аянчли аҳволини қўра-била туриб, пинагини ҳам бузмасди. Агар ҳақиқатига кўчиладиган бўлса-ю, Робертада ҳукуқ кўп, аммо гапнинг бошқа томони ҳам бор-да, борингки, у Клайдни ўз айтганларига юргизиб, дабдабали ҳаётдан воз кечтирди ҳам дейлик, хўш, кейин эвазига унга нима ҳам бера олади у? Ҳеч нарса... Бу фикрдан Робертанинг кўнгли чўкди.

Шу дақиқада Роберта, узоқча бормай, ўзининг фариб ва жирканч қисматини мана шу мисс Старк қисматига солиштириб кўрганида вужудини шу қадар алам-ҳасрат ва душманлик ҳисси қамраб олдики, илгарилари бундай ҳолатни сира бошидан кечирмаган эди. Ахир, шу ҳам ҳаётми, бу бир янгилишмовчилик,adolatsizlik-ку! Клайд билан иккалови охирги марта келишиб олганларидан кейин ҳам орадан неча ҳафталар ўтиб кетди, Клайд шу вақт ичida фабрикада Роберта билан деярли гаплашмади, ҳар галги саволларига жавоб беришдан қочиб, ҳатто уйига ҳам келмай қўйди. Энди Роберта ўзига Клайд фақат бепарвогина эмас, балки нафрат билан қараётганини ҳам ҳис эта бошлади.

Аммо шунга қарамай, Роберта мана шу арзимас, бироқ кўп нарсаларни ойдинлаштириб бेरувчи воқеанинг гувоҳи бўлгани ҳолда уйига қайтаётганида вужудини fazabdan кўра кўпроқ қайту-ҳасрат ҳислари қамраб олган эди, чунки унинг ишқقا йўғрилган, осойишта умри тугаган эди, ҳарқалай, энди у ҳеч қачон... ҳеч қачон... ҳеч қачон қайтиб келмайдиганга ўхшарди. Бундан ҳам ортиқ даҳшат борми ўзи... ўлим-ку бу!

Аксига олгандай, деярли шу вақтнинг ўзида Клайд ҳам бошқа бир қизиқ воқеанинг шоҳиди бўлдики, худди ёвуз тақдир мазах қилаётгандай, у ҳам Робертага алоқадор эди. Сондранинг таклифига биноан бир гуруҳ ёшлар дам олиш кунини баҳор ҳавосида ўтказиш мақсадида кейинги шанбада автомобилга тушиб, Камон кўлидаги (Ликургнинг шимолида) Трамбаллар чорбоғига қараб йўлга чиқишиди. Бильцгача тўппа-тўғри бораверилар эди-ю, аммо бир жойда айланма йўлдан юришиди-да, салдан кейин Олденлар фермасига этиб келишгач, Роберта туғилиб-ўсган уй олдида икки тарафга қараб кетган айри йўлга дуч келиб қолишиди. Шу пайт машина рулида ўтирган Трейси Трамбал автомобилдагилардан кимдир фермага бориб, Бильцга қайси йўл олиб боришини сўраб келишни таклиф этди. Четда ўтирган Клайд лип этиб машинадан тушди. Клайд чорраҳадаги почта қутисига қаради-ю, унинг шундоқ тепаликда қўнқайган кўхна ярим хароба уйга тегишли эканини дарров пайқади ва почта қутисига ёзилган Тайтус Олден деган исмни ўқий туриб ҳайратидан ёқасини ушлади, чунки Тайтус Олден Робертанинг отаси эди. Клайд Робертанинг, ота-оналарим Бильц яқинида яшашади, деган сўзларини эслади, демак, Робертанинг уйи шу экан-да. Клайд уйга киришини ҳам, кирмаслигини ҳам билмай бир зум эсанкираб қолди: қачонлардир у Робертага кичкинагина бир расмини берган эди, Роберта бу ердагиларга ўша расмни кўрсатган бўлиши ҳам эҳтимол. Устига устак мана шу ташландиқ, хароб кулба Робертага, демак, айни пайтда унинг ўзига ҳам тегишли эканлигини эслаши биланоқ Клайднинг ҳафсаласи пир бўлиб кетди ва шарт орқасига бурилиб, жуфтакни рослашни ҳам мўлжаллаб кўрди.

Аммо автомобилда Клайд билан ёнма-ён ўтирган Сондра унинг иккиланиб турганини кўрди-ю:

– Клайд, нима бўлди? – деб қичқирди. – Итдан қўрқяпсизми? Вов-вов, тишлаб олади!

Клайд шоша-пиша одинга жилмаса, шерикларининг диққатини жалб қилиб қўйишини сезди-ю, йўлкадан тез-тез юриб уй томонга кетди. У энди кулбага тузукроқ разм солиб қарай бошлаган эди, ўша заҳотиёқ миясини ташвишли ва қайғули фикрлар эгаллаб олди. Шу ҳам уй бўлди-ю! Ҳатто мана шундай серқуёш баҳор кунида ҳам етимчадек сўппайиб, шип-шийдам ҳолича турибди. Томлари чириб, чўкиб кетган. Бир мўрисининг қувури қулаб тушган, тагида фишт парчалари уюлиб ётибди; иккинчиси ҳам қулай-қулай деяпти-ю, тиргувуч кучи билан зўрга турибди. Клайд ҳозир юқорига кўтарилиб бораётган, манави бошдан-охир ажриқ босиб кетган ифлос йўлкани айтмайсизми! Кираверишга, эшик бўсағасига зинапоя ўрнида ётқизилган қийшиқ-қинғир синиқ тошларни кўриб, Клайднинг энсаси қотиб кетди. Манави бўёқ кўрмаган ёғоч иморатларни қаранг.

Э, қойил-е! Шу Робертанинг уйими-а?! Аҳволи шу экан-ку, Клайд бутун орзу-умидларини Сондра ва унинг муҳитига боғлаб турган бир пайтда яна менга уйланасан, деб талаб қилгани қизиқ! Ана, Сондра гарчи бу гаплардан хабарсиз бўлса ҳам... автомобилда ўтирганча, ҳаммасини кўриб-билиб турибди. Ночорлик ҳам шунчалик бўладими-а! Қаёққа қарама, бари бир бўғилиб кетасан! Клайднинг ҳаёти ҳам шундай бошланган эди, яхшиямки ҳаммаси тушдек ўтди-кетди!

Клайд эшикка яқинлашиб борганида аъзойи бадани қақшаб, худди бирордан туртки егандек биқини санчди. Шу пайт, худди Клайдни иложи борича яна баттарроқ хафа қилиш кўзда тутилгандай – эшикни Тайтус Олденнинг ўзи очди, у ранги унниқиб, енглари йиртилиб кетган куртка, қопга

ўхшаш титилиб кетган шолвор, қўпол, исқирт ва ниҳоятда полоплаган қишлоқи кавуш кийиб олган эди. У Клайдга сўроқ назари билан тикилиб қолди. Кийим-бошларининг хароблиги ва унинг Роберта-га ниҳоятда ўхшашлигидан (айниқса, кўзлари ва оғиз бичими қуиб қўйгандек худди ўзгинаси эди) ҳайратланган Клайд шоша-пиша ундан, шу ердан ўтган йўл Бильцгача борадими, шу йўлдан юриб шимолий шоссегача чиқиш мумкинми, деб сўради. Клайд «ҳа» деган бир оғизгина жавобни олиб, шарт изига қайтиб кетишини истар эди-ю, аммо Тайтус эринмай у билан ҳовлига тушди, кейин қўлларини силкиб эзмаланганча, агар равон йўлга чиқиб олишни истасаларинг, шу кўчадан яна салкам икки милча йўл босишларинг керак, сўнгра фарб томонга бурилишларинг лозим, деб тушунтира кетди. Тайтус гапини тугатар-тугатмас Клайд орқасига бурилиб, тез-тез нарилаб кетди.

Роберта айни ҳозир Клайд, ўзига Ликург ҳадя этиши мумкин бўлган барча лаззатлардан (Сондрадан, эшик қоқиб келаётган баҳор ва ёздан, севги ва ҳаловатдан, ўйин-кулгидан, обрўли мавқедан, мол-дунёдан... ҳамма-ҳаммасидан!) воз кечиб, мен билан бирга кетади ва менга уйланади, деб ишонаётган бўлса керак! – Клайд кўнгли чўккан бир кайфиятда шуларни ўйлай бошлади. Кавакка кириб ётадими кейин! Ахир, бу даҳшат-ку! Ҳали она сути оғзидан кетмагану, болани бошига урадими у! Эҳ, Клайд, шу қадар аҳмоқ, онгсиз бир маҳлук бўлмассанг, тақдирингни келиб-келиб шу қиз билан боғлайсанми-а? Бор-йўғи бир-икки танҳолик кечаларини деб шунча маломатларга қолиб ўтирибсан-а! Истиқболингда шундай бир янгича олам юз очар экан, нега сабр қилмадинг, нега?! Қани энди сабр қилиш қўлингдан келганда эди!

Энди у, Робертадан тезда бир амаллаб қутулиб кетмаса – ҳойнаҳой, бу ҳашаматларининг ҳаммаси-

дан ажралиши турган гап. Ана ўшандың үзи бино бўлган қашшоқ дунё яна қўрқинчли, ожиз қўлларини чўзиб, уни ушлаб олади, ахир Клайд аввал бошданоқ ночор оиласи туфайлигина мана шундай йўқлик исканжасига тушиб, ҳалок бўлиб кетишига сал қолган эди-ку. Роберта икковларининг ижтимоий келиб чиқишлари деярли бир хиллигига қарамай, аввалига улар бир-бирларини ниҳоятда севиб қолганларини... энди Клайд ҳайрон бўлиб эслай бошлади. Бунинг боиси нимада? Ҳаёт кўп қизиқ-да! Лекин Клайдни: нима бўлмасин, бари бир бирор чора топиш керак, деган муаммо кўпроқ азобга соларди. Шу дақиқадан бошлаб миясини бутун йўл давомида қандай бўлмасин чорасини топиш керак, деган фикр чулғаб олди. Худо кўрсатмасин-е, Робертами ё унинг ота-онасими Клайднинг амакиси ёки Гилбертга бир оғиз шикоят қилиб қолишиша борми – тамом, у ҳалок бўлади!

Бу фикр Клайдни шу даражада ташвишга солганидан машинага қайтиши билан ҳозиргина ҳамма қатори бўлар-бўлмас нарсаларга ҳазил-хузул қилиб гап сотиб келаётган одам энди оғзига сўк солгандай жим бўлди-қўйди. Унинг ёнида ўтирганча ўзининг ёзги режаларини аста-секин гапириб келаётган Сондра ҳам энди гапини давом эттириш ўрнига, Клайдга қараб туриб:

– Вой, миттижонимга нима бўлди? – деб шивирлади. (Клайд сал хомушланиб қолса, Сондра уни гўдакдек эркалашни яхши кўрар, Сондранинг болаларча чулдираши эса Клайдга бамисоли электр токидек таъсир қиларди: шунда у ҳам ҳузурланар, ҳам азоб чекар эди. У гоҳида Сондрани «менинг бижилдоғим» деб ҳам қўярди). – Афти ангорига қарасанг, жудаям хафа. Ҳозиргина ҳаммамиз қаҳқаҳа уриб кулаётган эдик. Қани, қани, менинг

кичкінтоім бир шодлансын-чи... Сондрага бир кулиб қарасын-чи... Қани, қани, Клайд бир эркалик қилиб, Сондранинг құлини кафтига олсин-чи!

Сондра ўтирилиб, болаларча эрка қилиғи Клайд-га қандай таъсир қылғанини билиш мақсадида унинг күзига тикилди, Клайд эса, турган гап, ўзини құвноқ күрсатишига уринди. Лекин унга ҳозир Сондранинг назокат тұла оройиши ҳам татимасди, чунки Робертанинг шарпаси, унинг ҳозирги оғир ахволи-ю, яқындан бери күнглиға маъқұл қылған ўша қарори доимо рўпарасида күндаланг бўлиб турар, энди унга эргашиб қаёққадир кетишдан бўлак бирор-бир бошқа тузукроқ чора йўқ эди...

Шундайқу-я, аммо... арзимаган нарсага... ишни чигаллаштириб ўтириш шартмиカン, қайтага (ҳатто бир умрга Сондрадан айрилган тақдирда ҳам) бу ердагилардан ному нишонсиз кетиши учун жуфтакни ростлаб қолғани маъқұлмасми, Канзас-Ситида ҳам анави бола... ўлғандан кейин худди шундай қылған эди-ку. Лекин Сондрадан, бу ерда ўлай деб зўрга орттирган таниш-билишларидан, амакисидан, қолаверса ҳамма нарсадан айрилиб қолаверадими! Ҳаммасидан айрилиб-а! Яна ўзгалар муруватидан паноҳ излаб, дарбадар юришдан ҳам ортиқроқ баҳтсизлик борми ўзи! Бунинг устига бир кунмас бир кун онасига кимдир бу ердан хат жўнатиб, аччиқ ҳақиқатни очиқ-ойдин тўкиб солиши ҳам мумкин, ўшанда у қочоқлигини ва унинг сабабларини тушунтириб тағин онасига хат ёзиши керакми? Ота-онаси нима деб ўйлади ўшанда уни? Охирги пайтларда у онасига ишларим юришиб кетди, деб ёзган эди. Пешонаси мунча ҳам шўр бўлмаса-я унинг, нега ҳар доим иши чаппасига кетгани-кетган?! Наҳотки, бутун умри шу кўйда ўтади? Бугун ундан, эртага бундан қочиб, қаердадир бегона жойларда ҳамма ишни яна қайтадан

бошлаш... шу ҳам ҳаётми... Эҳтимол, кейинроқ бориб ўша янги жойдан ҳам янада хунукроқ бир иши учун тағин қочиб кетишига тўғри келар. Йўқ, энди у кетмайди. Бахтсизликка тикка бориб, қандайдир бир чорасини топиши керак у. Керак!

Эй, худо-е!

## XLI БОБ

Бешинчи июнь ҳам етиб келди, Финчлилар Сондра огоҳлантирганидек жўнаб кетишиди, аммо Сондра жўнашидан аввал Клайдга иккинчи ёки учинчи якшанба кунлари (анигини кейинроқ ха-барлади) Крэнстоnlарникига боришга тайёр бўлиб туришни қайта-қайта тайинлаб кетди. Гарчи Роберта билан ўрталаридағи чалкаш муносабатлари Клайднинг бошини ғовлатиб турган бўлса-да, Сондранинг кетиши унга ёмон таъсир қилди, усиз ўзини қўйишга жой тополмай қолди. Аксига олиб, худди шу пайтда Робертанинг вассваси кучайиб, у шунақанги қаттиқ талаблар қўя бошладики, энди яна бир оз кутиш керак, унга ёрдам бериш учун Клайд тезда қўлидан келган ҳамма ишни қилади, деган юпатишлир билан уни тинчлантириб бўлмай қолди. Клайд қанча гапирмасин, Роберта бари бир аҳволнинг чатоқлигини тушунар ва бу билан ўйнашмаслик керак, деб ўйларди у. Роберта: афт-ангорми бутунлай ўзгариб кетган (бу кўнглини босган кучли фулгула туфайли туғилган эди, албатта), иккиқатлигимни энди яшиrolмайман, фабрикада бирга ишлайдиган қизлар бугунми-эртами буни пайқаб қолишлири мумкин, деб зорланар эди. Хуллас, у энди на ишлай олади-ю, на уйқусида ҳаловат бўлади, у энди бошқа бу ерда қоломайди. У ҳалитдан баданида оғриқ сезяпти (бу ваҳм босган тасаввур самараси, фирт хаёлнинг ўзи). Аввал ке-

лишиб олғанларига күра: Клайд унга уйланиши, вақтни бой бермай Роберта билан, узоқми, яқинми, қай гүрга деса ҳам майли, вақтингчага бўлса ҳам мана шу даҳшатли хавф эсдан чиққунча жўнашлари керак. Ҳатто Роберта рози, Клайд уни бола туғилиши биланоқ ташлаб кета қолсин, рост, кейин ҳеч қачон бошқа илтимос қилмайди... ҳеч қачон! Аммо Клайд ҳозир йигит лафзида туриши, мана шу ҳафтанинг ўзидаёқ, нари борса ўн бешинчидан кечикмай ҳамма ишни тўғрилаши, вақт ғаниматлигида у ҳақда қайғуриши лозим.

Демак, Клайд Ўн иккинчи кўлга бориб Сондрани кўришга улгурмасидан, уни яна бошқа бирон марта ҳам кўролмай, Роберта билан бошлишиб кетавериши керак экан-да. Бундан ташқари, Роберта зўрлаётган қалтис ишга қўл уришидан олдин анча-мунча маблағ кераклигини ҳам у яхши билади, Клайд эса ҳозирча шунга яраша пул йифолмаган. Роберта Клайдга ўзининг юз доллардан ошиқроқ пул жамғарив қўйганини рўкач қилиб ўтирмаса ҳам бўлади, чунки бу пуллар тўйдан кейин ёки Ликургдан жўнаб кетишларида икковларининг кори-ҳолларига асқатиши мумкин. Айни пайтда, Клайд фақат бир нарсани аниқ тушуниб, аниқ тасаввур этар эди: агар у шундай йўл тутса, ҳамма нарсадан айрилиши турган гап эди. У Роберта билан шу атрофдаги қайсиdir бир жойга кетиши керак, бечораҳолгина кун ўтказишлари учун эса, у дуч келган ишга қўл уравериши лозим бўларди. Дунёning чаппа айланиб кетишини қаранг-а! Тотли, бегубор орзуларнинг ҳалокати-ку, бу ахир! Клайд ҳар қанча зўр бериб бош қотирса ҳам, Роберта ни ишни ташлаб, вақтингчага уйига, ота-онаси-нинг олдига кетишига кўндиришдан бўлак бирорта тузукроқ фикр тополмади; у бу янгича ҳаётларига ўзи кўнниккунича тағин камида бир-икки ҳафта за-

рурлигини Робертага исбот этишга уринарди (яна буни жуда усталик билан қиляпман, деб ҳам ўйлаб қўядри ўзича). Мен ўзимни ҳар қанча ўтга-чўқقا урсам ҳам, кўнглимдаги пулни йифолмадим, ҳамма гап мана шунда, деб таъкиддарди у ёлғончилик қилиб. Мўлжаллаб қўйишган сафарларига етадиган маблағ йиғиши учун эса яна унга камида уч ёки тўрт ҳафта муҳлат керак. Ахир, икковларига йўқ, деганда юз эллик ёки икки юз доллар, Робертанинг назарида бу анча катта пул эди, зарурлигини Робертанинг ўзи айтган эди-ку. Клайдда бўлса, ҳафталик маошидан ташқари атиги қирқ доллар йиғилган, шу пулни ва бундан кейин йигадиган ҳамма жамғармаларини Ўн иккинчи кўлга сафарга чиқишганда майда-чуйда чиқимларга ишлатиш орзусида юрибди.

Қисқа вақтга бўлса ҳам уйига бориб туриши ҳақида Робертага айтган таклифи ишончлироқ чиқиши учун, Клайд: ҳойнаҳой, ўзинг ҳам бир оз кўнглингни тинчтиб қайтишни истаётгандирсан, деб қўшиб ҳам қўиди. Ахир, тўй ўрнига ўтадиган, янги таниш-билишлар орттирадиган бу сафарга чиқишдан аввал Роберта кийим-кечакларини бир сидра тузатиб олиши ҳам керак-ку. Майли, у ўзи йикқан пулини ёки бир қисмини кийим-кечакка ишлатсин... Аҳволи ниҳоятда танглигидан Клайд шунақсанги маслаҳатлар беришдан ҳам тап тортмасди. Роберта эртанги кунидан сира умиди йўқлиги сабабли шу пайтгача ўзи учун ва туғилажак чақалоги учун бирон нарса тикитириш ёки сотиб олишга юраги дов бермай келарди, энди эса Клайд берган маслаҳатларнинг асл маъноси қандайлигидан қатъи назар, у аввал ҳам бир неча бор маслаҳатлар бериб, сўнгра доим ишни пайсалга солиб юрганини ҳам писанд қилиб ўтиrmай, ўзига битта ёки иккита тузукроқ кўйлак тикитириб олиши керак, бунинг учун Роберта икки-уч ҳафта оворагарчиликни бўйнига олиб,

ора-сира синглисига кўмаклашиб юрадиган қўли эпчил, арzon-гаров анави бичиқчига учрашиши лозим. Кўйлакни гулдор кулранг шойидан тикириши ҳам мумкин – шунақасини у кинода кўрган эди. Агар Клайд гапида туриб унга уйланса, никоҳ пайтида шу кўйлакни кияди.

Бу жудаям хушбичим сарпо бўлади; Роберта унга қўшимча қилиб, ҳаммага расм бўлган энсиз, ҳошияли (ҳошиясининг бир ерига пуштиранг ва қип-қизил олуча қадалган) кулранг шойи шляпача ва яна ҳаворанг астарлик матодан тикилган оддийгина йўлбоп костюм олишни ҳам ният қилди; шундан кейин кулранг туфли билан кулранг шляпа кийиб олса, ҳаммаси бирга қўшилиб, қарабсизки, Роберта манаман деган келиндан ҳам қолишмайдиган кўҳлик жувонга айланади-қолади.

Бу нарсалар ўз-ўзидан бўлмайди, анча-мунча вақт ва ортиқча харж-харажатлар керак. Жуда зўр келса, Клайд унга уйланмаслиги ҳам мумкин, бунинг устига бўлажак никоҳ ҳар иккалалари учун қандайдир ўта совуқ ва қайгули ўтадиганга ўхшайди; лекин бари бир, булар Робертанинг никоҳ тўғрисидаги тасаввурини ўзгартиrolмасди, у никоҳни аллақандай гўзаллик ва нафосатга йўғрилган сирли, тенгсиз бир тортиқ деб тушунар, унинг бу сифатларини ҳатто баҳтсизлик рўй берган мана шунақанги оғир дамларда ҳам ундан ажратиб бўлмайди, деб ўйларди у. Қизизи шундаки, Клайд билан оралари совуб кетгани ва муносабатларининг зўрма-зўракилигига қарамай, Роберта уни ҳамон худди илгаригидек ёқтиарди. Ахир, энг аввало унинг Грифитслигини унутмаслик керак, гарчи у унчалик бадавлат бўлмаса ҳам чинакам киборлар оиласидан чиқсан йигитча, Роберта тоифасидаги ҳамма қизлар, ҳатто қанча-қанча ундан устунроқлари ҳам, мабодо Клайдга эрга теккудек

бўлсалар, ўзларини баҳтиёр ҳисоблардилар. Майли, Клайд Робертага уйланишни истамаса истамай қўя қолсин, шундаям бари бир, у – обрўйи зўр одам. Аммо Робертани у ақалли жиндай севгандами, Роберта фақат у билангина умрбод баҳтли бўла оларди. Ҳарқалай бир вақтлари Клайд Робертани севарди. Айтишларича, эркаклар, ҳеч бўлмагандан айримлари фарзанд кўргач, кўпинча хотинларига мутлақо бошқача, ўзгача меҳрибонлик билан қарай бошлар эканлар (буни у ўз онасидан ва таниш-билишларидан ҳам эшитган эди). Нима бўлса ҳам ишқилиб, агар ўйлаган ниятлари амалга ошса, бир оз вақтга, атиги бир оз вақтга бўлса ҳам, ҳарқалай улар қовушишади, мушкул аҳволдан чиқиб олишида Клайд Робертага кўмаклашади, боласига ўзи исм қўяди, Роберта янгидан бирор-бир жойга мустақил ўрнашгунга қадар уни қўллаб-қувватлаб туради.

Шундай қилиб, Робертани гарчи қўрқинчли кўнгил фашлик ва шубҳа-гумонлар азобга солса-да (негаки, у Клайднинг ўзига нисбатан совуганини сезиб туради), шунда ҳам у бояги фикрлари билан ўзича овунгандек бўларди.

Орадан беш кун ўтгач, Роберта мана шундай кайфиятда уйига жўнади, кетишидан олдин отаонасига хат ёзиб, битта ёки иккита кўйлак тикитирмоқчилиги ва ўзини бир оз ёмон ҳис қилаётгани сабабли хийла дам олмоқ мақсадидага камида икки ҳафтага бораётганини хабарлади; Клайд уни Фондагача кузатиб қўйди. Миясига аслида аниқ ва маъқулроқ бир фикр келмагани учун, Клайднинг назарида фақат сукут, ҳа, ҳа, фақат сукутгина жонига оро кирадигандек туюларди. Уни ҳеч бир кимса бирон бир иш қилишга мажбур этолмаслиги, Роберта тўғрисидаги фикр эса ҳар дақиқада унга азоб бермаслиги учун Клайд яқинлашиб келаётган баҳтсизлик тифи ваҳимаси остида яна, яна

ва яна қайта бош қотириб күрмоги даркор: ким билади, балки Роберта аччиқ устидами, умидсизликка тушибми, жазаваси тутибми (агар Роберта нажот күзи билан қараган бирон бир фикрни Клайд рад этгудек бўлса), оғзидан гуллаб юбориши ёки бирор ишқал чиқариб қўйиши мумкин, унда Клайднинг Сондрага умид боғлаб тузган режалари чиппакка чиқади-кетади.

Сондра эса бу пайтда Ўн иккинчи кўлдаги чор-боғидан туриб, яқин орада Клайд келгудек бўлса, уни нималар кутаётганини ҳикоя қилувчи шўх-кувноқ мактублар ёзар эди. Кўм-кўк сув... оқ еланли қайиқчалар... теннис... голъф... от пойгаси... автомобиль сайри... Сондра ҳамма нарсани Бертина билан аллақачоноқ келишиб қўйган. Бўсалар, бўсалар ва яна бўсалар...

## XLII БОБ

Бир вақтнинг ўзида олган икки хати Клайднинг аҳволини янада чигаллаштириб юборди.

«Қарагайзор буруни, 10 июнь

Клайдчик, миттижон!

Менинг ушоқинамнинг аҳволлари қалай? Ҳамма ишлари жойидами? Бу ерлар шунчалик кўркам ва зебоки. Одам кўп жуда, кун сайин гавжум бўлиб боряпти яна. «Казино» ресторани билан голъф ўйини майдончаси аллақачоноқ очилди, одам уймалашгани-уймалашган у ерларда. Ҳозир Стюарт билан Грэнт қайиқчаларида кўлга чиқиб кетишмоқчи, шундоққина мотор овозини эшитиб турибман. Жоним, вақтни чўзманг, тезроқ келинг. Бу жойлар шунчалик гўзалки, тасвирлашга тилим ожиз. От миниб, ям-яшил ўрмон сўқмоқдарини кезяпмиз, чўмиляпмиз, ҳар куни соат тўртдан бошлаб «Ка-

зино»да танца тушамиз. Дикки деган отимда ҳозиргина маза қилиб айланиб келдим, нонуштадан кейин уни яна минаману, чоптириб бориб почтага хатни ташлаб қайтаман. Бертина бугун ё эртага Сизга хат ёзиб, мана шу якшанба ёки хоҳлаган бошқа кунга таклиф қилажагини айтди, бундан күнглингиз түқ бўлаверсин. Сондра «келинг» деб ёздими, вассалом, Сиз ўша заҳотиёқ етиб келасиз, тушундингизми? Акс ҳолда, Сонда Сиз – ярамас, ширин болакайни жазолаб қўяди.

Болакайим ўша исқирт фабрикада тиним билмай ишлаб юрган бўлса керак? Сонда эса уни бу ерда бўлишини истайди... От минардик, автомобилда сайр этардик, ҳам чўмилардик, ҳам танца тушардик... Теннис ракеткангиз билан голъф таёқчангизни олиб келишни унутиб юрманг тағин. «Казино»нинг антиқа бир майдончаси бор.

Бугун эрталаб, Диккини миниб юрганимда нақ туёфининг остидан қандайдир бир қушча патиллаб учиб қолса бўладими. Дикки ҳуркиб, олиб қочган эди, Сондангиз шох-шаббалардан росаям озор чекди. Бечора Сондасининг аҳволига Клайд-нинг жони ачимаётганмикин? Бугун Сонда мактуб ёзиш билан овора нуқул. Нонуштадан кейин шу хатларни жўнатишга кетади у, сўнгра Бертина ва Нина учаласи «Казино»га боришади. Клайд биз билан бирга боришни истамаяптимикин? Ўшанда «Тодди»га танца тушар эдик. Бу қўшиқни Сонда жудаям яхши кўради. Майли, энди етар, у кийиниши керак. Эртага яна ёзаман, ярамас бола. Сизга Бертина хат юбориши билан дарров жавоб қайтаринг. Қофознинг мана бу ерини кўряпсизми, кетма-кет нуқталар қўйганман-а? Булар – бўсалар. Ҳам катта, ҳам кичик нуқталар. Шуларнинг бари ярамас бола учун. Сондага канда қилмай хат ёзинг, у ҳам ҳар куни ёзади.

Сизни қайта-қайта ўпид қоламан».

Бу хатни олиши билан Клайд ҳам тұлиб-тошиб худди шундай күтариинки кайфиятда жавоб ёзди. Аммо деярли ўша почтада ёки нари борса ўша куни келган бопшқа бир мактуб эса Робертадан эди:

«Бильц, 10 июнь

Азизим Клайд!

Энди ётай деб турған жойимда ухлашдан аввал сенга бир-икки қатор дуои салом ёзишни құнглым тусаб қолди. Сафарим шунақанги оғир бўлдики, мана энди ҳозир деярли бетобман. Ўзингга маълум, аввал-бошданоқ бир ўзим кетишни унчалик истамаган эдим. Авзойим шундай ёмонки, ҳамма ишларимиз энди ҳал бўлгани ва ваъдангга биноан мени олиб кетиш учун келишинг ҳақида гарчи ўзимга ўзим гапириб, далда берсам ҳам, бари бир бўлган-бўлмаган нарсаларни ўйлаб, юрагим қисилади».

(Клайд хатнинг шу ерига келганда Бильц яқинидаги ғарибона қишлоқ чеккасини ижирғаниб эсига олди; бахтга қарши Роберта ўша дунёда яшайди, шу сабабли айрим вақтларда бўлганидек, Клайднинг бирдан Робертага жони ачиб кетди, виждони азобланди. Ахир, аҳволи ночор бўлса, бу Робертнинг айби эмас-ку. Ҳаётида у боёқиши нимага ҳам умид қилиши мумкин? Фақат ишу амал-тақал кун ўтказиш. Талай вақтлардан бери Клайд биринчи бор танҳо ўтириб, чинакамига, адолат юзасидан ўйлай бошлади-ю, гарчи чорасизгина бўлса-да, аммо чин қўнглидан Робертага ачинди. Кейин у хатнинг давомини ўқий бошлади.)

«Аммо бу ерлар ҳозир жудаям чиройли бўлган. Дараҳтлар шунақанги ям-яшил, ҳамма ёқ гуллаган. Деразага яқин келсанг, бодға учиб юрган аслариларнинг визиллаган овозини эшитасан. Бу ерга келаётганимда, тўппа-тўғри уйга қараб юр-

май, йўл-йўлакай Гомерда тўхтаб, синглим билан қуёвимни кўриб ўтмоқчи бўлдим. Ахир биз қачон кўришамиз ва умуман бошқа кўришамизми-йўқми, номаълум-ку, мен эса улар билан фақатномусли аёл сифатидагина учрашишни истайман – акс ҳолда улар бир умр кўрмаганлари яхши мени. Тағин ўйлама, бу билан мен қандайдир ноҳуш ёки ёқимсиз гап айтмоқчи бўлаётганим йўқ. Шунчаки омадсизлигимдан куяман, холос. Уларнинг уйи шу даражада шинамки, чиройли мебеллари граммофонлари, нима десанг, ҳамма нарсалари бор, Агнесса эса Фред билан бениҳоя баҳтли! Ўйлайманки, у бутун умрга баҳтли бўлади. Мен шунда беихтиёр: агар орзуларим рўёбга чиққанда, биз иккаламиз ҳам бирам ширин турмуш қураг эдик, деб ўйлаб кетдим. Уларнида турган пайтимда Фред ҳадеб тегажаклик қилиб, нега эрга тегмайсан, деб сўрайверди. Охири чидамай:

– Қаёқдан биласан, балки бугун-эрта эрга тегиб кетарман. Сабрли одамга баҳт ўзи эргашиб келади, – дедим.

– Гапинг тўғри, аммо кўзингни оч, умринг кутиши билан ўтиб кетмасин тағин, – деб жавоб қилди у.

Мен онамни яна кўрганимдан ниҳоятда хурсандман, Клайд. У шунчалик меҳрибон, сабр-бардошлики, мени деса жонини беришга ҳам тайёр. Дунёдаги энг дилкаш, энг тенгсиз она шу бўлса керак. Мен бирор-бир хатти-ҳаракатим билан унинг кўнглига озор етказишни мутлақо истамасдим. Том ҳам, Эмилия ҳам бирам ёқимтойки. Бу ерга келганимдан бери ҳар кечада уларнинг дўстлари, дугоналари йигилишяпти, улар мени ҳам ўз давраларига чақиришади, аммо уларга қўшилиб кўнгил очишга, қарта ва турли хил ўйинлар ўйнашга, танца тушишга эса менда сира мадор йўқ».

(Клайд ушбу сатрларни ўқиётиб, беихтиёр Роберта оиласининг аянчли аҳволини, яқинда ўз кўзи билди)

лан күрган ярим хароба уй ва бошқа ҳамма тафсилотларни яна бир бошдан аниқ тасаввур этгандек бўлди! Қийшайиб ётган мўриларни айтинг! Робертанинг сўхтаси совуқ отаси-чи... Тағин бу хатнинг Сондра мактубидан осмону ерча фарқ қилиши-чи!)

«Отам, онам, Том ва Эмилия атрофимда ўралашиб, ҳадеб кўнглимни овламоқчи бўлишади. Шу сабабли бошимга тушган баҳтсизликни мабодо улар билишганда, қанчалик тушкунликка тушишларини ўйлаб, виждоним азобланади. Мен ўзимни фабрика ишларидан чарчаганлигимдан мана шунақаман, бўшашибган ва хафаман, деб кўрсатишга уриняпман, албатта. Онам бўлса лаби лабига тегмай, уйда узоқроқ қолишимни ёки тузукроқ дам олиб, ўзимга келишим учун ишни бутунлай ташлашимни маслаҳат беради-ю, аммо у бечоранинг ҳеч нарсадан хабари йўқ-да. Агар у билганда эди! Бу фикр мени баъзан қанчалик азобга солишини сенга айтиб беролмайман, Клайд! Фақат худога ялинаман!

Лекин мен кўпам қисилавермаслигим керак. Бундай қилиш зарур ҳам келгани йўқ, ўзингга айтган эдим-ку; фақат иккаламиз шартлашганимиздек, сен келиб мени олиб кетсанг бас. Ҳозиргидек жонингга тегавермайман, Клайд. Ахир, бошқа пайтда бунақа эмасдим-ку. Жўнаб кетишимизга тайёрланяпман, бичув-тикув ишларимни қўлга олдим. Майда-чуйдалари билан яна уч ҳафта вақтни олади, шу орада бўлар-бўлмас нарсаларга миямни ғовлатиб ўтирмасликка ҳаракат қиласман. Лекин сен, азизим, мени олиб кетишига келасан-а, шундайми? Сен мени энди алдамайсан ва ҳозиргидек қийнаб, қон-зардблар юттирмайсан, тўғрими? Э худо, нима гуноҳим бор эдики, бунча азобга қолмасам – рождество байрамига уйимга келганимдан бери аҳволим шу! Сен, ахир илгари менга бошқача муносабатда бўлар эдинг. Сенга зифирдек ҳам оғирлигимни туширмасликка сўз бераман: мени

энди сен севмайсан, буни биламан, лекин охири нима бўлса бўлаверсину, аммо бошимга тушган баҳтсизлиқдан ҳозир қутулсан гўрга эди... Лекин онт ичаман: сенга менинг оғирлигим тушмайди.

Азизим, бу доғ учун жаҳлинг чиқмасин. Афтидан, мен илгариғидек ўзимни қўлга олиб туролмайдиган бўлиб қолдим шекилли.

Энди бу ердаги ишларимдан гапирай. Уйимдагилар мени кўйлакларни Ликургда ўтказиладиган кечалари учун тиктиряпти, деб ўйлаб, роса кўнгила очсанг керак, дейишяпти. Майли, начора, бошқа ташвищдан кўра шундай деб ўйлаб қўя қолганлари маъқул. Эҳтимол, бичиқчи Энс хонимни юборолмасам, баъзи нарсаларни сотиб олиш учун ўзим Фондага тушишимга тўғри келар. Агар мен Фондага тушсам, сен бу ерга келгунингга қадар мени кўришни истасанг (гарчи бунга унчалик ишонмасам ҳам), биз ўша ерда кўришишимиз мумкин. Агар кўнсанг, мен сен билан жон-жон деб учрашардим, жўнаб кетишимиздан оддин бир гаплашиб олардик. Ҳаммаси ғалати туюлади менга: майдада чуйдаларимни тикияпману хаёлим сенда, бир кўрсам дейман, сен бўлсанг парвойинг фалак, мен буни яхши биламан. Ўйлайманки, мени уйимга кетишга кўндираганингдан хурсандирсан, энди ўзинг айтганингдек, Ликургда роҳат қилиб вақт ўтказаверишинг мумкин. Наҳотки, чиндан ҳам ўша ўтган йилги ёз, иккаламиз кўлларни ва бошқа қанча-қанча жойларни кезганимиздагидан кўра бу йил вақтингни ширинроқ ўтказаётган бўлсанг? Лекин шунда ҳам, Клайд, ваъдангнинг устидан чиқишингга қурбинг етади, албатта. Бу гапларимни унчалик кўнглингга олма тағин. Сенга бундай қилиш жудаям оғир, буни биламан, аммо эсингдан чиқмасин, агар мен бошқаларга ўҳшаганимда эди, шунаңги шартлар қўядримки. Лекин сенга аввал ҳам айтганман: мен бошқалардақа эмасман, бунақа иш ҳеч қачон қў-

лимдан келмайди. Агар мен билан бўлишни хоҳдамас экансан, унда оғир аҳволдан чиқариб қўйганингдан кейин кетаверишинг мумкин.

Илтимос, Клайд, ҳатто агар хоҳдамаган тақдирингда ҳам менга узун, қувноқ бир мактуб ёзгину кетганимдан бери мени бирор марта эсламаганинг, мени қўмсаб қиттай бўлса ҳам соғинмаганинг (илгарилари, ахир, менсиз туролмаган вақтларинг ҳам бўлар эди), қайтиб боришимни истамаётганинг, мана шу шанбадан ҳисоблагандা икки ҳафтадан олдинроқ келолмаслигинг (ҳали келишни ўйлаётган бўлсанг агар), шулар ҳақида бир чеккадан ҳикоя қилиб ёзгин.

Азизим, ҳозир мен ўзим ёзаётган совуқ гапларни аслида тасаввур ҳам қиломайман. Лекин мен шунчалик чарчаганманки, шунчалик паришон ва сўққабошманки, гоҳи пайтларда ўзимни тутолмай қоламан. Мен ким биландир гаплашиб юрагимни ёргим келади, бу ерда эса ҳеч ким йўқ; улар нима бўлаётганини тушунишмайди, мен ҳам бирон кимсага ичимдагини ёриб айтолмайман.

Ана, кўряпсанми, соғинмайман, умидсизланмайман ва аччиқданмайман деб айтган эдим-а, шунга қарамай, ҳозир бундай қилиш қўлимдан келмай турибди, тўғрими? Аммо янаги гал – эртами ё индинми, ўзимни яхши тутишга онт ичаман, чунки сенга хат ёзганимдан сўнг руҳим анча енгил тортади, Клайд. Илтимос, хафа бўлма, менга далда бериш учун бир оғиз бўлса ҳам хат ёз. Мен кутаман, агар мен учун хат қанчалар азизлигини билсанг эди! Ўзинг, албатта, келасан. Мен ўшанда шунақанги бахтиёр ва миннатдор бўлиб, қўлимдан келганча жонингга тегмасликка ҳаракат қиласман.

*Сенинг гарибу ёлгиз Бертанг».*

Бу икки хат ўртасидаги кескин фарқ Клайдни қатъий бир йўлни танлашга мажбур этди: у

энди ҳеч қачон Робертага уйланмайди. Ҳеч қачон! Бильцга, унинг уйига ҳам бормайди, агар иложини топса, Робертанинг Ликургга қайтиб келишига ҳам йўл қўймайди. Клайд Робертаникига борса ёки у бу ерга қайтиб келса, яқиндагина Сондра туфайли эришган бутун қувончларидан айрилади-қолади-ку, ахир! Унда у мана шу ёзда Сондра билан Ўн иккинчи кўлда бирга бўлолмайди, қувлашиб кўнгил ёзолмайди, унга уйланолмайди ҳам. Э худо, наҳотки, бир чораси топилмаса? Наҳотки, пешонаси тақ этиб теккан бу даҳшатли говдан қутулишининг бирор-бир иложини қилолмаса?

Иккала мактубни ўқиб тугатгач (бу пайт жазира-ма июнь кечаларининг бири бўлиб, Клайд эндинигина ишдан қайтиб келиб турган вақти эди), умидсизликдан жазаваси тутиб, ўзини ўринга ташлади-ю, инграб юборди. Қандайин баҳтсизлик бу! Даҳшатли, деярли чорасиз муаммо-ку бу! Наҳотки, Робертани анча вақтга... қаёққадир... жўнаб кетишга кўнди-ролмаса... ёки, у, яххиси, ҳозирча уйида тураверсин, Клайд унга бутун маошининг роппа-роса ярми-ни – ҳафтасига ўн, ҳатто ўн икки доллардан юбориб туришга ҳам рози. Ёки майли, у қўшни шаҳарлар-нинг бирига: Фондагами, Гловерсвилгами, Скенэк-тедигами бориб жойлашсиган; ҳозирча у ўзини ўзи уddeлай олади, ижарага битта хона топиб, доктор ёки доя хотин керак бўлгунга қадар бамайлихотир ўтириб, машъум дақиқани кутиши мумкин. Агар Роберта унинг номини тилга олмасликка сўз берса, вақт-соати етган пайтда Клайд унга ҳамшира то-пишда кўмаклашиб юбориши ҳам мумкин.

Роберта бўлса нуқул мана шу икки ҳафта ичида, шундан кечикмай, унинг Бильцга келишини ёки яна қаердадир у билан учрашишини талаб қилиб ётибди. Йўқ, Клайд буни истамайди, у бормайди! Агар Роберта мажбурлайдиган бўлса, Клайд ҳеч кимнинг ақдига келмаган ишни қиласди-ю... бу ердан бош

олади-кетади... ёки, эҳтимол, уни Роберта Бильцида кутиб ўтирган вақтида у Ўн иккинчи кўлга қараб жўнайди, гарчи Сондра ўн саккиз ёшга тўлмаса-да, уни ўзи билан бирга қочиб кетиб, никоҳдан ўтишга (аммо бу таваккалнинг оқибати нақадар даҳшатли ва бемаъни!) кўндиришга уриниб кўради. Ана ўшандада... ўшандада... улар эру хотин бўлиб олишгандан сўнг Сондранинг оиласи уларни ажратса олармиди, кейин Роберта ҳам уни тополмайди, фақат ундан шикоят қилиши мумкинdir. Шикоят қилса ундан нарига, наҳотки ҳаммасидан тониб кетиш Клайднинг қўлидан келмаса? У, бу ёлғон, Роберта билан орамизда бўлган гап бўлим бошлигининг ўз ишчисига нисбатан муносабатидан бошқа нарса эмас, вассалом, дейди-кўяди. Ахир, уни Гилпинлар бирон марта ҳам кўришмаган, Гловерсвил яқинидаги Глен доктор уйига ҳам Робертанинг бир ўзи кириб, унинг номинитилга олмаганини ўша вақтдаёқ айтиб берган эди.

Лекин шуларнинг барини инкор этиш учун қанчалар бардош керак!

Қанчалар жасорат керак!

Робертанинг кўзларига боқиши учун қанчалар журъат керак, ахир у, Робертанинг таънага тўла, даҳшатдан саросимага тушган бегуноҳ мовий кўзларининг тик қарашларига чидаш – дунёдаги ҳамма нарсадан ҳам оғирлигини яхши биларди! У бунга чидаш бера олармикан? Унинг бардоши етармикан? Етган тақдирда ҳам бирор-бир тузук натижага чиқармикин бундан? Бу гапларни эшитгандан сўнг Сондра унга ишонармикин?..

Аммо шунга қарамай, Клайд ўзининг бу баразали макрини охири амалга оширадими ёки йўқми – бари бир, ҳатто Ўн иккинчи кўлга борган тақдирида ҳам, сафарга отланаётганини Сондрага албатта ёзиши керак. У ўша заҳотиёқ жўшиб-тошиб, эҳтирос билан мактуб ёзди. Айни пайтда у Робертага мутлақо ёзмасликка қарор қилди. Балки у сим қоқар:

Роберта қўшнилариникида телефон борлиги, мабодо Клайдга нимадир зарур бўлиб қолса, уни телефонга чақириши мумкинлигини айтган эди. Клайд Робертага ораларидаги ишлар ҳақида гарчи эҳтиёткорлик билан ёзган тақдирда ҳам, унга тўғридан-тўғри ўзини тутиб берган бўлади (айниқса ҳозир, Робертага уйланмайман, деб қатъий қарор қилиб турган бир вақтида), аслида энди Робертага худди шу нарса керак-ку ўзи. Буларнинг ҳаммаси учига чиққан фирромлик асли! Бу – пасткашлик ва разиллик, албатта. Лекин Роберта унга муомаласида бир оз ўзини бамаъни тутгандা, Клайд ҳеч қачон бунчалик пасткашликка бориб, бундай шум режаларни тузиб юрмас эди. Аммо Сондра-чи?! Сондра! Бунинг устига Финчлиларнинг Ўн иккинчи кўлнинг чап қирғогида ястаниб ётган поёнсиз мулк»лари-чи... Сондра у жойлар тўғрисида шунчалик кўп ёзадики... чиндан ҳам у ерлар гўзалликда танҳо бўлса керак! Йўқ, Клайд бошқача йўл тутолмайди! У фақат шундай ўйлаб, шундай ҳаракат қилиши зарур! Ҳа, шундай!

Клайд Сондрага хат жўнатмоқчи бўлиб ўрнидан турди-да, ташқарига чиқди. Йўл-йўлакай Олбэнида нашр этиладиган кечки газетадан бирини сотиб олди; у ўзи билган кишилар ҳақида ўқиб, хаёлини бир оз чалғитмоқчи бўлган эди, бирдан биринчи саҳифадаги қўйидаги хабарга кўзи тушиб қолди:

ПАССА КЎЛИДАГИ ҚЎШ ФОЖИА.  
ТЎНКАРИЛИБ ҚОЛГАН ҚАЙИҚ ВА СУВДАГИ  
ИККИТА ШЛЯПА ПИТСФИЛД ЯҚИНИДА  
ИККИ КИШИ ҲАЛОК БЎЛГАН, ДЕГАН  
ФИКРГА ОЛИБ КЕЛАДИ.  
ҚИЗНИНГ МУРДАСИ ТОПИЛГАН. АММО  
КИМЛИГИ ҲОЗИРЧА АНИҚ ЭМАС.  
ҲАМРОҲИНИНГ МУРДАСИ ҲАЛИ ТОПИЛМАДИ.

Клайд сув спорти турларига қизиққаны ва ўзи байдаркани яхши бошқаргани, сузиш ва шүнғишига уста бўлгани учун хабарни синчковлик билан ўқиб чиқди:

«Пэнкост, Массачусетс, 7 июнь. Учинчи куни Пасс қўлининг шаҳримиз шимолидан ўн тўрт чақирим ичкарисида, чамаси Питсфилддан келган номаълум бир эркак билан бир аёл сайр қилиб юрган қайиқ ағдарилиб кетган.

Сешанба куни эрталаб соат ўнларга яқин ўша йигит билан қиз бу ердаги кичик ресторанча ва қайиқ пристанининг эгаси Том Лукасга биз Питсфилддан келганмиз, деб айтишган, кейин митти бир қайиқчани ижарага олишган ва саватчаларини кўтариб, ҳойнаҳой, унга нонушталари солинган бўлса керак, кўлнинг шимол томонига қараб кетишган. Улар кеч соат еттида ҳам қайтиб келавермаганларидан сўнг, мистер Лукас ўғли Жеффри билан моторли қайиқقا тушиб кўлни айланиб чиққан ва қайиқни шимолий соҳилдаги саёз бир жойда тўнкарилиб ётган ҳолида топган, аммо сайрга чиққанлардан асар ҳам йўқ эди. Ўша пайтда Лукас уларни ижара ҳақини тўлашдан бош тортиб, қочиб қолишган бўлса керак, деб ўйлаган-да, қайиқни пристанига олиб келган.

Лекин эртасига мистер Лукас балки бу ерда баҳтсиз ҳодиса рўй бергандир, деб ўйлаб, ўғли Жеффри ва ёрдамчиси Фред Уолш билан бирга кўлнинг шимолий қисмини иккинчи марта айланиб чиқади ва ниҳоят соҳил яқинидаги қамишзордан эркак ва аёлга тегишли иккита шляпа топиб олади. Ўша заҳотиёқ узун дастали чангаклар ёрдамида қидирув бошланади, ахири, вақт тушдан оққан пайтларда номаълум қизнинг мурдаси топилади, аммо у ҳамроҳи билан биргаликда қайиқ олганидан бошқа бирон маълумот йўқ. Мурда ҳокимият

кишиларига топширилди. Эркакнинг танаси эса ҳанузгача топилмади. Ҳарқалай, ўша баҳтсизлик рўй берган жойнинг баъзи ерларида чуқурлик ўттиз фут<sup>1</sup>дан ҳам ортиб кетиши сабабли иккинчи мурданинг топилишига унчалик ишонч йўқ. Шу жойларда бундан ўн беш йилча бурун шунга ўхшаш баҳтсизлик юз берганда ҳам қанча изламасинлар – мурдалар топилмаган эди.

Қиз эгнидаги камзулнинг астарида питсфилдлик баққолнинг белгиси бор экан. Ичидаги тамғасига қараганда, туфлиси ҳам ўша шаҳарда харид қилинган. Ҳалок бўлган аёлнинг кимлигини билдирадиган бошқа бирор-бир белгиси йўқ. Тахмин қилишиларича, сумкаси, агар аслида бор бўлса, кўл тубида қолиб кетган.

Қизнинг ҳамроҳи, уни кўрганларнинг айтишига қараганда, ўттиз беш ёшлардаги қораҷадан келган барваста киши экан; эгнида оч яшил ранг kostюм, бошига оқ ва ҳаворанг bogичli похол шляпа кийиб олган. Қизнинг ёши эса йигирма бешлардан ошмайди; бўйи – беш футу беш дюйм, оғирлиги – юз ўттиз фунт<sup>2</sup>ча келади. Сочлари узун, қуюқ қўнғир рангда, ўриб-ўриб бошига чамбарак қилиб қўйилган. Чап қўлининг ўрта бармоғига бинафша тош кўзли ингичка тилла узук тақилган. Питсфилд ва шу атрофдаги шаҳарларнинг полицияси воқеадан хабардор қилинди, аммо шу пайтгача қизнинг кимлигини аниқлаб бўлмаяпти».

Одатдаги бу хабар – ёзда бунақанги баҳтсиз ҳодисалар тез-тез бўлиб туради – Клайдни унчалик қизиқтирумади. Қиз билан ҳамроҳининг куппа-кундузи шу бир кичик кўлда ҳалокатга учраши унга анча эриш туюлди, албатта. На қизни, на йигитни

<sup>1</sup> Фут – 30,479 сантиметрга баравар келадиган ўлчов. (Таржимон.)

<sup>2</sup> Фунт – қадоқ (409,5 граммга баравар). (Таржимон.)

хеч ким танимагани ҳам ғалати. Лекин чиндан ҳам шундай эди. Эркак шу кетганча зим-зиёй иўқолган. Клайд бундан пинагини ҳам бузмади-да, газетани четга итқитди, миясини эса мутлақо бошқа фикрлар эгаллади... Олдида, ахир, жиддий муаммо турибди: бундан буён нима қилиши керак у? Сўнгра чироқни ўчириб, ҳаётининг чалкаш томонларини ўйлаган кўйи энди ўрнига ётмоқчи бўлиб турганида миясига тўсатдан бир фикр урилди (ё тавба, шайтон авраягтими ўзи? Иблис йўлдан оздиряпти шекилли?): фараз қиласайлик, Клайд билан Роберта – йўқ, масалан дейлик, Сондра иккаласи (йўқ, Сондра сузишга уста, ўзи ҳам уста), шундай қилиб, Клайд билан Роберта қайиқда сузиб боришаётганда қайиқ тўнкарилиб кетади... айни ҳозирги пайтда, ишқал муаммолар васвасаси Клайдни тинимсиз азобга солаётган бир вақтда шу ҳодиса рўй берса-я. Бундан зўрроқ йўли топилмайди-ку, ахир! Чорасиз, ростакам ҳалокатли муаммонинг осонгина ечилишини қаранг-а! Лекин... тўхта!.. Шошма! Одам боласи ўз виждонига хиёнат қилмаса, чиндан ҳам даҳшатли, ёвуз жиноят йўлига кирмаса, ҳар қандай мушқул муаммони, ҳаттоки хаёлан шу тарзда ҳал этишга ҳам журъат этмайди-ку? Йўқ, бу ҳақда ақалли ўйлашнинг ўзи ҳам гуноҳ. Бу бемаънилик... ўта бемаънилик, даҳшат! Аммо боринг ана, бахтсиз ҳодиса натижасида муқаррар, шундай фалокат юз берди, дейлик. Унда Роберта туфайли туғилган барча ташвишларидан халос бўларди у... Кейин ундан қўрқиб ҳам ўтирмасди. Сондрани ўйлаганда юраги ўйнаб, ваҳимага ҳам тушмасди. Ҳозирги бутун азблари тинчгина, хамирдан қил суғургандек, шовқинсиз, жанжалсиз ҳал бўларди-қоларди, олдинда эса фақат шодлик, умрбод шодлик унинг ҳамроҳига айланарди! Бехос оёқ остидан шу фалокат чиққандек бўларди-ю, кейин ёрқин истиқбол Клайдга қучоқ очарди.

Лекин бу ҳақда ва Роберта ҳақида ўйлашнинг ўзи (нега Клайднинг мияси буни нуқул Робертага боғлаётганикин?), шу фикрнинг ўзи даҳшат, Клайд буни дилига яқинлаштирмаслиги керак, мутлақо яқинлаштирмаслиги керак. Ҳеч қачон, ҳеч қачон, ҳеч қачон! Яқинлаштирмаслиги керак! Бу қабиҳлик! Даҳшат! Ахир, бу қотилликни ўйлаш деган сўзку! Қотилликни ўйлаш?! Лекин у Роберта хатидан ва унга бутунлай зид мазмундаги Сондра хатидан шу қадар саросимага тушган эдики... Сондра ўзи ва унинг ҳаётини шу қадар мафтункор ва жозибали бўёқларда тасвирлаган эдики, Клайд ўлим даҳшатини сезса ҳам бутун азобларидан осонгина ва енг ичидаги кутултирувчи бу фикрга қаттиқ ёпишиб олди. Қани энди шундай ҳодиса Роберта иккаласи билан юз берса эди. Очигини айтганда, у жиноят қилишни ўйлаётгани йўқ-ку, ахир. У шунчаки, мабодо шунақсанги баҳтсиз ҳодиса рўй берса, унда нима бўлар эди, деб ўйлаяпти, холос... Ҳа, мабодо шундай ҳодиса рўй берганда эди!

Бу – ёвууз, машъум фикр, уни ўзига яқин йўлатмаслиги керак, сира яқин йўлатмаслиги керак. Йўлатмаслиги керак. Аммо шунга қарамай... шунга қарамай... У сузишга жуда ҳам уста, у, оралиқ ҳар қанча кенг бўлганда ҳам, сўзсиз, соҳилга сузиги чиқа олади. Роберта бўлса, Клайд буни билади (ўтган ёзда улар кўлма-кўл юриб, чўмилишган эди), сузолмайди. Демак, унда... унда... Ҳа, унда, агар у Робертага ёрдам бермаса...

У соат тўққиз ярим билан ўн орасида, ўз хонасида, қоронғида ўтирганча шу ҳақда бош қотирап экан, уни ғалати, беҳаловат бир ҳиссиёт қамраб олган эди, бутун вужуди, соч толаларидан тортиб бармоғининг учигача жимиirlab-жимиirlab кетарди. Ҳайратта солувчи ва даҳшатли фикр! Уни, келиб-келиб яна мана бу газета эсига согани қизиқ. Тавба, ажабланарли эмасми, ахир? Бунинг устига

Сондраны излаб борадиган жойларида, унинг ёзишича, ҳамма ёқ күллардан иборат эмиш, жуда кўп, ўнлаб кўллар бор эмиш... Роберта бўлса олис сафарларни, гарчи ўзи сузишни билмаса ҳам, сузишни билмаса ҳам... сузишни билмаса ҳам... қайиқда сайдишина яхши кўради. Хулласи калом, улар, жуда бўлмагандан Клайднинг ўзи ўша ёққа, кўллар томонга жўнайди... Улар биргалашиб – у билан Роберта иккаки – кетишлари ҳам мумкин, хўш, бунинг нимаси ёмон? Нимаси ёмон? Ахир, жўнаб кетишга қатъий қарор қилган пайтларида тўртинчи июль<sup>1</sup> куни қаёққадир шаҳар ташқарисига томошага чиқиши ҳақида ҳам гаплашган эдилар-ку.

Йўқ, йўқ! У Робертадан қутулишни ҳар қанча истаган тақдирда ҳам унинг ўлими ҳақида ўйлашининг ўзи қанчалар разил, даҳшатли ва тубанлиkdir! Йўқ, у бундай фикрларни бир дақиқага бўлса ҳам дилига яқинлаштирмаслиги керак. Бу ҳаддан ташқари ярамаслик, ҳаддан ташқари пасткашлик, ҳаддан ташқари тошбагирлик-ку! Ёвуз фикр бу! Миясига қай гўрдан кела қолди ўзи, шуниси қизик! Тағин айни ҳозир, ҳозир, Роберта ўзи билан бирга кетишни ундан талаб қилаётган бир пайтда-я.

Ўлим!

Қотиллик!

Робертанинг ўлими!

Аммо Робертадан, бемаъничилик, қайсарлик, ўжарлик билан айтилаётган ўша талаблардан қандай бўлмасин қутулиши ҳам керак-ку. Шу ҳақда ўйлашининг ўзидаёқ Клайднинг бутун вужуди музлаб, терга ботиб кетди. Келиб-келиб, яна, ҳозир-а... ҳозир... Лекин бундай фикрни у бошидан чиқариб ташлаши керак! Бунинг устига – туғилмаган боланинг ҳам қотили бўлиш!

<sup>1</sup> 4 июль – Қўшма Штатлар мустақиллиги эълон қилинганлиги шарафига ўтказиладиган байрам куни (1776 й.).

Аммо бундай бўлишини олдиндан ким билибди, ахир?! Бироқ шунда ҳам... ёз пайтида озмунча одам сувга чўкмайдими... йигитлар, қизлар... эркаклар, аёллар... ҳали у ерда, ҳали бу ерда... ҳамма жойда. Бундай воқеа Роберта билан рўй беришини у хаёлига ҳам келтирмаяпти, албатта. Айниқса, ҳозир.

Ҳар қанча ёмон бўлганда ҳам, у бунчалик тубанликка бормайди. Йўқ. Йўқ. Бунчалик эмас у. Шу фикрни ўйлашининг ўзидаёқ юзи ва қўлларини совуқ тер босди. Бунчалик эмас у. Инсофли, оқил одамлар бундай ваҳшийликни ҳатто хаёлларига ҳам келтиришмайди. Энди у ҳам шундай қиласди... мана шу дақиқадан бошлабоқ...

Миясини шундай қўрқинчли фикрлар эгаллаганидан ўзидан-ўзи жуда ранжиб кетди, ўрнидан туриб чироқни ёқди ва қўлидан келганча хотиржам бўлишга уриниб, газетадаги мақолани яна қайта ўқиб чиқди, гўё шу билан газета эсига солған фикрни бутунлай қораламоқчидай ва рад этмоқчидай бўлар эди. Кейин кийинди-да, ташқарига йўл олди: у Уикиги авеню ва Сентрал авеню бўйлаб, сўнгра Эманзор бўйлаб сайр этиб чиқди ва айланма йўл орқали яна Сентрал авенюга ўтди ва шу пайтда худди туну кун уни хавотирга солаётган вассаса ва босириқлардан қочиб бораётгандай ҳис қиласди у ўзини. Орадан сал вақт ўтгач, Клайд бардамроқ, хотиржамроқ, эс-хушлироқ, одамийроқ қиёфага киргандек бўлди-да – буни ўзи шу қадар истардики! – маккор ва даҳшатли вассасадан чиндан ҳам қутулдим, деган туйғуда уйга кириб, ўрнига ётди. Энди у ҳеч қачон бу нарсаларни ўйламаслиги керак! У энди бу нарсаларни ўйламаслиги керак. Ҳеч қачон, ҳеч қачон, ҳеч қачон бу нарсаларни ўйламаслиги керак... ҳеч қачон...

Сал ўтмаёқ Клайдни нотинч, беҳаловат уйқу ўз оғушига олди, тушида қора бир қутурган итни кўр-

ди, ит ҳадеб уни қопмоқчи бўлаётган эмиш. Клайд махлуқнинг айри тишларидан қутуламан деганча талвасага тушиб уйғониб кетди, кейин яна кўзи илинди. Бу гал у ё қалин ўрмондами, ё фор ичидами, ё тевараги баланд-баланд тоғлар билан ўралган чуқур, тор даранинг тубидами – ишқилиб, ўзини аллақандай фалати бир зимистон жойда кўрди; шу ердан тепага қараб бир сўқмоқ кетган эмиш, аввалига яққол кўриниб турган бу сўқмоқ қанча узоқлашган сари шунча ингичкалашиб, аниқ билинмай, ниҳоят бутунлай кўздан йўқолибди. Шунда Клайд келган йўлидан изига қайтмоқчи бўлиб, орқасига ўтирилган экан, баҳайбат илон уясига кўзи тушибди; биринчи қараганда у кўпроқ бир уюм хашак тўпига ўхшармиш, аммо устида йигирматача илон бош чайқатиб, кўш найзали тилларини чиқарганча ва кўзларини чақнатганча даҳшат солиб турган эмиш. Шунда Клайд жонҳолатда яна орқасига бурилган экан, шоҳли бир махлуқ йўлини тўсиб чиқибди, унинг оғирлигидан ҳар қадам ташлаганда буталар қарсилаб синар эмиш; Клайд ҳаддан ташқари ташвишли бир овоз билан қичқириб юборганча даҳшат ичидা уйғониб кетди-ю, эрталабгача бошқа ухлаёлмади.

### **XLIII БОБ**

Клайд гангид қолгани устига кўлда бўлган воқеа тўғрисидаги фикр тобора миясига қаттиқ ўрнашиб борар, уни қанчалик унтишга урингани билан, бари бир, бу иш қўлидан келмасди. Унинг хийла бекарор фаҳму фаросати шахсий ташвишлари туфайли ларзага келди ва сал бўлмаса ишдан чиқаёзди, у тасодифан ўзининг шу ташвишларини икки кишининг Пасс кўлида қандайдир беозорги на йўқ бўлиб кетиши билан таққослаганида, айни

шу пайтда миясида юқоридаги фикрлар туғилди. Қизнинг мурдаси топилибди-ю – қандайдир ғалати күч уни доим шу ҳақда ўйлашга мажбур этарди, – аммо әркак кишиники йўқ. Бу қизиқ тафсилотда гўё қандайдир бир сирли маъно яшириңгандай эди; беихтиёр Клайд, әркак киши балки сувга чўкмагандир, деб ўйларди. Ўзига ёқмайдиган кишиларни йўқ қилиш ниятида кетига тушадиган жоҳил одамлар камми ахир, эҳтимол, ўша йигит ҳам қиздан қутулмоқчи бўлиб уни кўлга бошлиб боргандир? Бу – шайтон йўлдан оздирган одамнинг иши албатта, лекин ҳарқалай, ўшанда ҳаммаси худди хамирдан қил суғургандек бажарилган.

Бироқ Клайд ҳам шу ёвуз режага лақقا тушиб, Робертани шундай қилиши керакми... асло! Лекин унинг аҳволи соат сайин мушқуллашиб, боши берк кўчага кириб бораётган эди: деярли ҳар куни ё Робертадан мактуб, ё Сондрадан қисқагина хат келар, улар орасидаги бойлик ва қашшоқлик, ўйин-кулги ва афсус-надомат ҳамда умидсизлик ўртасидаги зидлик Клайдни яна ва яна ҳайратга солаётган эди.

Робертага у хат ёзмасликка қарор қилди, аммо ора-сира телефонда гаплашиб турар, шунда ҳам арзимаган бир-икки оғиз луқмадан нари ўтмас эди. Хўш, у қандай кун кечиряпти? Робертанинг ўз уйида, қишлоқда яшаётганидан Клайд ниҳоятда хурсанд, ҳозирги об-ҳавода фабрикада юргандан кўра қишлоқда бўлиш анча дурустроқдир. Ликургда ҳамма ишлар жойида, худди бурунгидай кетаётган эди-ю, бирдан буюртмалар кўпайди-қўйди, натижада кейинги икки кун ичида жуда кўп ишлашга тўғри келди. Клайднинг хаёли эрта-ю кеч ўша мўлжалланган, Робертанинг ўзи ҳам биладиган пулни йиғиша, бошқа сира ташвиши йўқ, шунинг учун у ҳам ташвиш тортмаслиги кепрак. Иши бошидан ошиб ётганлиги туфайли Клайд

Робертага хат ёзолмади, бундан кейин ҳам ёзолмаса керак, чунки майда-чуйда юмушлардан құли тегмаяпти. Лекин у Робертани үз жойида күрмай соғиняпти, яқин үрталарда яна дийдорлашишдан умидвор. Агарда Роберта ўзи маъқул қилиб айттаётгандек, Клайдни күрмоқчи бўлса, марҳамат, келиши мумкин. Аммо атайлаб ҳозир кўришиш шартми? Клайднинг бош қашишга ҳам вақти йўқ, Роберта билан хийла кейинроқ учрашишини мўлжаллаб қўйган эди.

Аммо шу пайтнинг ўзида у Сондрага, янаги шанбага бориб қолиши мумкинлигини, ўн саккизинчида эса, албатта етиб бориши ва у билан кўришишини баён қилиб хат ёзди.

У Сондрага нисбатан қўзғалган ҳирсини тизгинлай олмас, гап Робертага келиб тақалганды эса ҳақиқатга тик қараёлмас, шу йўсинда ўзини ўзи алдар ва ўзига ўзи чап берарди; натижада у ўзи орзиқиб кутган Сондра висолига ҳам етишди, бунинг устига у шундай бир ҳолатда етишдики, буни етти ухлаб тушида ҳам кўрмаган эди.

Клайд ўн иккинчи кўлдаги меҳмонхона айвонига туташиб кетган Шейрон бандаргоҳига етиб келганды, уни Бертина акаси билан ва Сондра кутиб олишди: улар бу ерга Клайдни олиб кетиш учун Чейн дарёси орқали Грэнтнинг моторли қайиғига тушиб келишибди. Дарёда кўм-кўк зилол сув қалқир эди. Қорамтири, учи найза баланд арчалар қирғоқ бўйлаб худди қоровуллардек саф тортган. Фарбий соҳил ёқалаб сувда чўзилган қорамтири соялар лашкарининг ҳам кети кўринмайди; дараҳтларнинг акси худди ойнадагидек аниқ. Қаёққа қарасанг, чорбоғларда катта ва кичик, оппоқ, пушти ранг, яшил ва долчин ранг уйлар, қайиқ шийпончалари, шундоққина сувга туташиб кетган чўмилиш жойлари. Баъзи ерларда, масалан,

Крэнстонлар ёки Финчлиларни кига ўхшаш ҳашаматли чорбоғлар олдида эса нафис бандаргоҳдар ҳам бор. Яшил ва ҳаворанг байдаркалар, моторли қайиқдар. Қарағайзор бурунидаги ўйин-кулги аримайдиган ёруғ меҳмонхона ва чўмилиш жойида эса шаҳардан барвақт чиққан тўп-тўп башанг кишилар йиғилишган. Шундан кейин Крэнстонлар чорбоғидаги қайиқ шийпончаси ва бандаргоҳ кўзга ташланди. Иккита овчарка – Бертина нинг янги эрмаклари – қирғоқда гиёҳ устида ётганча, ҳойнаҳой, эгасининг қайтиб келишини кутаётган бўлса керак. Крэнстонлар чорбоққа олиб келган олти хизматкорнинг бири Жон фақат Клайднинг қўлидан биттагина жомадони, теннис ракеткаси ва голф таёқчасини олиш учунгина шу ерда кутиб тураг эди. Номукаммал, аммо нафис меъморчилик услубида қурилган баҳайбат уй, унга олиб борувчи қип-қизил ёронгулларга бурканган йўлка, шундоққина кўлга қараб чирой очган, тўқима мебеллар билан жиҳозланган каттакон пешайвон, автомобиллар ва пешайвонда дам олаётган ёки боғда сайр қилиб юрган спорт кийими даги саноқсиз меҳмонларни кўрганда, айниқса, Клайднинг оғзи очилиб қолди.

Бертина нинг буйругига биноан Жон Клайдни деразалари кўлга қараган каттакон хонага бошлаб кирди, у Сондра, Бертина ва Грэнтлар билан теннис ўйнаши учун энди душда чўмилиб, кийимларини алмаштириб олиши мумкин. Фақат Клайдни деб Крэнстонларни кига келган Сондра, тушдан кейин сиз Бертина ва Грэнт билан «Казино»га боринг, ўшанда бу ерлик ҳамма дўстларимизга таништирамиз, деб тушунтира бошлади Клайдга. У ерда танца бўлади. Агар Клайд истаса, эртага эрталаб барвақт, биринчи нонуштагача Сондра, Бертина ва Стюарт билан бирга, от миниб, ажойиб ўрмон сўқмоғидан юриб, Илҳом бурунига боришлари

мумкин, күл энг зўр кўринадиган ер ҳам ўша жой. Бир-иккита шу сингари сўқмоқдан бўлак яқин қирқ миль атрофида ўрмонда биронта ҳам йўл йўқдигини Клайдга айтиб беришди. Комpassиз ёки йўл кўрсатувчисиз юрилса, адашиб қолиш, ҳатто ўлиб кетиш ҳам мумкин, бу ўрмонни билмаган одамга қаёққа қараб бориш ўтакетган амри маҳол иш. Нонуштадан ва чўмилишдан кейин эса у, Бертина ва Нина Темпллар Клайдга ўзларининг янги санъатларини – Сондранинг аквапланида учишни намойиш қиласидилар. Кейин иккинчи нонуштага ўтиришади, теннис ёки гольфдан сўнг «Казино»га бориб чой ичишади. Тушдан кейин эса Утигадаги Брукшоулар чорбогида танца бўлади...

Клайд келганига бир соат бўлгандан кейин бу ерда шанба ва якшанба кунлари бўш вақти бўлмаслигини кўрди. Лекин у, айни пайтда, Сондра билан фақат саноқди дақиқалардагина эмас, балки соатлаб бирга бўла олишини ҳам биларди, мана шу дилрабо кунларда у Сондра табиатининг ҳали ўзи билмаган янги қирраларини кўриб, синааб олиши мумкин! Роберта ҳақидаги дилни кемирувчи оғир фикрларига қарама-қарши ўлароқ – жуда бўлмаса шу кунларда уларни эсламасликка ҳақи бор-ку, ахир! – у ўзини худди жаннатга тушиб қолгандай ҳис этди.

Чиндан ҳам илгари Клайдга Сондра ҳеч қачон Крэнстонлар теннис майдончасидагидек қувноқ, соҳибжамол ва бахтиёр кўринмаган эди, Сондра ҳозир оппоқ қалта кўйлакча ва қалта юпкада – теннис костюмида, соchlарини эса сариқ ва яшил ранг хол-хол гулли шохи дуррача билан ўраб олган эди. Оҳ, унинг табассумлари! Клайдга бирдан нигоҳ ташлаб қолганда кулиб турган кўзларининг ўйноқлаши олам-олам нарсаларни ваъда қиласиди! У ракеткани баланд кўтарганча бошини орқага ташлаб, тўхтовсиз кулиб, бамисоли қушдай, оёқдари

ерга тегар-тегмас, у ёқдан-бу ёқقا учарди. «Үн беш – love», «Үттиз – love», «Қирқ – love» деб қычқырганда эса у ҳар гал атайлаб «love»<sup>1</sup> сүзини маънодор қилиб айтар, ана шунда Клайднинг юраги баҳт ва ғамдан баттар безиллаб кетарди: чунки у эркин бўлганда эди, Сондра ўзиники бўларди, эҳтимол. Аммо улар орасида Клайд қазиган тубсиз чоҳ ётарди!

Баланд арчалар билан кумуш рангда жилвала-наётган кўл суви оралиғидаги ям-яшил ўтлоққа ча-рақлаган қуёш билур нурларини тўкмоқда. Кўлнинг ҳамма ерида кўзни қамаштирувчи оқ елканли қа-йиқлар сузиб юрап, қуёш нурларида товланаётган оқ, яшил, сариқ дофлар – байдаркаларда эса жуфт бўлиб олган ошиқ-маъшуқлар сайр қилишарди. Ёз фасли, бекорчилик, ҳарорат, гўзал манзаралар, осо-йишталик, нафосат, севги – Клайд ўтган ёзда бир ўзи якка мохов бўлиб юрган пайтида орзу қилган тилакла-рининг ҳаммаси мана ҳозир муҳайё бўлган эди.

Баъзи дақиқаларда Клайднинг назарида се-винчдан, гўё, кўзи тиниб кетаётгандек бўларди: худди бутун истаклари бир йўла ушалаётгандай, ҳаммасини қўлида нақд ушлаб тургандай... Айрим дақиқаларда эса (Роберта тўғрисидаги фикрлар тўсатдан аччиқ изгириндек бутун вужудини қақ-шатиб ўтарди) гўзаллик, севги ва баҳт ҳақидаги орзулари учун ҳозир унга таҳдид солаётган хавф-дан кўра ҳам аламлироқ, даҳшатлироқ, фалокат-лироқ нарса йўқдигини тушунарди. Кўл ва чўкиб кетган икки одам хусусидаги юракни орзиқтириб юборувчи газета хабари-чи... Ўзининг аҳмоқона ёвуз ниятини бир четга йигишириб қўйганда, бирор-ик-ки ҳафталардан сўнг, нари борса уч ҳафта ўтгач, у эҳтимол ҳамма нарсадан умрбод воз кечар... У бир-дан ўзига келиб, коптокни ўтказиб юборгани, жуда

<sup>1</sup> Сўз ўйини: «love» – муҳаббат; теннис ўйини ҳисобида эса «ноль» дегани.

ёмон ўйнаётганини сезар, шу сабабли Бертина, Сондра ёки Грэнт унга: «Клайд, нимани ўйлаяпсиз?» деб қичқиришарди. Ўзига эрк берганда-ю, у қалбининг энг чуқур зимиstonидан туриб: «Роберта ҳақида ўйлаяпман», деб жавоб берган бўларди.

Кейин, кечқурун Брукшоуларникида Сондра, Бертиналарнинг дўстлари ва шу сингари башанг кийинган ёш-яланглар тўпланишди. Клайд танца майдончасида Сондра билан яна қайта кўришиди; Сондра йигилганларнинг барчасига, айниқса ўз ота-онасига тўхтовсиз жилмайиб боқар, худди Клайдни ҳали кўрмагандек, ҳатто келганидан бехабардек тутарди ўзини.

– Вой, сиз шу ердамисиз? Жуда соз-ку! Крэнстонларникидамисиз? Бирам яхшики, шундоқ ёнгинамиизда экансиз. Демак, тез-тез учрашиб турарканмиз-да, шундайми? Эртага эрталаб, соат еттиларда отда сайр қилишни истамайсизми? Биз Бертина иккаламиз деярли ҳар куни от чопамиз. Агар бирор нарса ҳалақит бермаса, эртага боғ сайрига борамиз, байдарка ва моторли қайиқларда томошага чиқамиз. От чопишни унчалик билмаслигингиздан куйинманг, ҳечқиси йўқ, Бертина га айтаман, сизга Жеррини беришади: у қўйдек ювощ от. Энгил-бош хусусида ҳам қайғурманг: Грэнтнинг бисотида жуда кўп ҳар балоси бор. Биринчи икки танцани бошқалар билан тушман, учинчи танца пайтида, агар истасангиз, ташқарига чиқиб гаплашиб ўтирамиз, балконда ажойиб бир хилват жой бор.

Сондра маъноли кўз қараш билан: «Биз бир-бirimизни тушунамиз...» деди-ю, нари кетди.

Кейин Сондра ўша қоронги хилват жойда, ўзга кўзлардан пинҳона тарзда Клайднинг бошини ўз бағрига босди-ю, бутун вужуди билан берилиб лабидан ўпди. Кеча тугашидан аввал улар билинтири-майгина ташқарига чиқиб кетишиди ва ой нурида

соҳил четидаги ёлғизоёқ йўлда бир-бирларини қушиб олганларича айланиб юришиди.

Клайднинг шу ердалигидан Сондра шунақанги хурсандки! Сондра шунақанги соғинган эдики!

Сондра Клайднинг соchlарини силар, у бўлса Сондрани тўхтovсиз ўпарди, шу он бирдан ораларини бузиб турган мудҳиш соя Клайднинг ёдига тушиб кетди-ю, Сондрани жон-жаҳди билан қушиб, маҳкам бағрига босди.

– Менинг жонгинам, ширин қизалофим, – деб хитоб қилди у, гўзалларнинг гўзали, менинг Сондрагинам! Қани энди сизни қандай севишимни билсангиз эди, агар билсангиз эди! Сизга ҳаммасини гапириб беришни шунчалар истардимки! Шунчалар истардимки...

Лекин у на ҳозир, на кейин, ҳеч қачон гапириб беролмас эди. Ахир, қандай қилиб Сондрага ораларида турган мудҳиш тўсиқ ҳақида оғиз очсин? Сондра олган тарбия, унинг севги ва никоҳ тўғрисида ўзи маъқул деб ҳисоблаган тушунчалари шундай эдики, у Клайдни ҳеч қачон тушунолмас, уни дилдан севишидан қатъи назар, севгига бунчалик кўп қурбон берилишига сира рози бўлолмас эди. У, кўзларида мислсиз даҳшат акс этганча, ўша заҳотиёқ Клайддан юз ўтириб, уни ташлаб кетган бўларди!

Аммо ҳозир, Клайд уни ўз бағрига маҳкам босиб турган бир пайтда, Сондра унинг кўзларига, – ой нурида улар бир чақнаб кетди – рангсиз, серташвиш юзига тикилган кўйи, хитоб қилди:

– Сондрани Клайд шунчалик севадими-а? Ёқимтой болакайим! Сондра ҳам уни севади, жуда-ям, жудаям севади! – Клайднинг бошини кафтлари орасига олди-да, кетма-кет ва берилиб ўпа бошлиди. – Сондра ҳам ўз Клайдидан ҳеч қачон юз ўтirmайди. Ҳеч қачон. Ҳали шошмай туринг, кўрасиз. Бундан бўёнига агар осмон узилиб ерга тушганда ҳам – бари бир! Балки қийин бўлар, лекин Сондра

Клайдни ташламайды! – Кейин бирдан ишбилар-мон оҳангда, бу айни Сондрага хос хусусият эди, мурожаат этди: – Энди-чи, биз ҳозироқ жўнашимиз керак. Йўқ, бошқа битта ҳам ўпич берилимайди. Йўқ, йўқ! Сондра йўқ дедими, вассалом. Кўлга тушиб қолишимиз мумкин.

У соchlарини тузатиб олгач, Клайднинг қўлидан ушлади-да, орқага – уйга қараб чопа кетди, айни вақтида қайтишган экан, рўпарадан Сондрани қидириб юрган Палмер Тэрстонга дуч келиб қолишиди.

Янаги кун эрталаб соат еттиларда, Сондра ваъда қилганидек, Илҳом бурунига сафарга чиқилди. Бертина билан Сондра чавандозларга ўхшаб қип-қизил рангли калта кўйлак, оқ шолвор ва амиркон этик кийиб олишган, соchlари шамолда тўзғиб-тўзғиб борар эди; улар ҳар замон-ҳар замонда от чоптириб, узоққа кетиб қолишар, кейин яна Клайднинг оддига қайтишарди ёки Сондра ўзух овози билан Клайдга: қани қувиб етинг-чи, деб қичқиради; ёки Бертина иккови қаҳқаҳа отиб, важир-вужур гаплашиб, Клайд кўрмаслиги учун олис-олисларга, олдинга кетиб қолишар, худди ўрмон қасрининг пинҳона бир манзилгоҳига яширингандай дараҳтлар орасига беркиниб олишарди. Бертина шу кунларда Сондранинг ақду ҳуши Клайд бўлиб қолганини пайқаб, агар оиласиий жанжаллар халақит бермаса, бу иш тўй билан тугайди, деб ўйлай бошлади, шу сабабли қувончи ичига сифмаганидан оғзи қулоғида эди; у сиполик билан Клайдни ўзлариникида бутун ёз бўйи қолишга ундар, мен сизларга ҳомийлик қиласман, шунда ҳеч ким ўчакишолмайди, деб ваъда ҳам берарди. Клайд бўлса бундан гоҳ ҳаяжонга тушиб энтикар, гоҳ беихтиёр газета хабари эсига соглан фикрни хотирлаб, бирдан хомушланиб қолар, бу фикрдан мутлақо қутулмоқ мақсадида ўзи билан ўзи олишарди.

Бир ерга келганда Сондра тикка сўқмоқقا бурилди-ю, йўсин ва тошлар орасидан қайнаб чиққан булоққа томон туша бошлиди.

– Клайд, бу ёққа! – деб чақирди у. – Жерри йўлни билади, мункимайди. Сув ичинг! Айтишларича, кимки шу булоқдан сув ичса, яна шу ерга қайтиб келармиш.

Клайд эгардан сакраб тушганда:

– Мен сизга бир нарсани айтмоқчиман, – деди Сондра. – Кеча кечқурун сиз шу ердалигингиизни эшитганда, ойимнинг ранги қув ўчиб кетганини бир кўрсангиз эди! Сизни таклиф этишни мен илтимос қилганимдан, ҳойнаҳой, у бехабар, албатта, у сизни Бертина яхши кўриб қолгандир, деб ўйлаяпти. Мен шундай, деб ишонтирдим ойимни. Лекин шунга қарамай, сезишимча, мени ҳам бу ишга аралашган, деб шубҳаланяпти, бу эса унга сиräям ёқмайди. Аммо у бошқа ҳеч нарса демади. Мен ҳозир Бертина билан гаплашдим, у қўлидан келганча менга ёрдам бермоқчи. Лекин биз эҳтиёт бўлишимиз керак, чунки ойимнинг шубҳаси қўпаяверса, билмадим, нима машмаша кўрсатиб юбориши мумкин у... сиз билан учраштирмаслик учун, балки ўша куниёқ бу ердан кетамиз, деб қоллар. Биласизми, ойим ўзига ёқмаган одамни яхши кўриб қолишим мумкинлигини ҳатто хаёлига ҳам келтирмайди. Сиз ойимни билмайсиз ҳали. У Стюартни ҳам худди шундай тутади. Лекин сиз эҳтиёт бўлинг, ўзингизни менга нисбатан гўё парвойи фалак кўрсатаверинг, айниқса атрофимизда бизга яқин одамлар турган пайтда, ана шунда, менимча, ойим ҳеч нарса қилмаса керак, жуда бўлмаганда, ҳозирча. Кейин, кузда Ликургга қайтиб борганимизда ҳаммаси бошқача бўлади. Мен унда балогатга етаман, ана ўшанда кўрамиз! Мен шу пайтгача ҳечам севмагандим, аммо сизни севаман

ва сиздан сира воз кечмайман, гап шу, вассалом. Кечишни истамайман. Улар ҳар қанча уринганла-рида ҳам мени мажбур қилишолмайди!

Сондра ер тепинди. Отлар ювошлик билан атрофга бефарқ мұлтайиб туришарди. Сондранинг иккінчи марта үз түйғуларини бу даражада ошкора изҳор этганидан қойил қолган ва таажжубға тушган Клайд бу ердан қочиши ва никоҳдан ўтиш, демакки, иккалаларига хавф solaёттан ҳалокатдан қутулишни Сондрага таклиф этиш пайти келди, деган фикрдан ичи қизиб, унга хавотир ва умид билан тикилиб қолди. Эхтимол, Сондра Клайднинг бу томдан тараша тушгандек таклифидан үзини йүқотиб, күнмаслиги, бирдан түнини тескари кийиб олиши ҳам мүмкін. Бундан ташқари, Клайднинг пули йўқ, мабодо Сондра кўнган тақдирда ҳам қаёққа қараб кетишларини у аниқ билмайди. Лекин, балки Сондрадан бирор-бир маслаҳат чиқар? Борди-ю, у кўнадиган бўлса, хўш, Клайдга ёрдам берса нима қилибди? Бошқача бўлиши ҳам мүмкін эмас-ку, ахир. Ҳар қандай шароитда ҳам Клайд гапириши шарт, кейин нима бўлса – омадидан! Клайд гап бошлади:

– Сондра, азизим, шу оннинг ўзидаёқ мен билан кетсангиз нима қиласди-а? Ҳали кузгача ким бору, ким йўқ, мен сизни жонимдан севаман! Келинг, кетайлик? Бари бир, ойингиз ҳечам сизни менга бермайди. Агар иккаламиз ҳозир кетсакми, унда қўлидан ҳеч нарса келмайди. Кейин, уч-тўрт ойдан сўнг ойингизга хат ёзасиз, у гуноҳингиздан кечиб юборади. Кета қолайлик, Сондра?

Ялинин-ёлворганидан унинг овози қалтирар, кўзлари эса, агар илтимосимни рад этса, кейин нима қиласман, деган маънода жавдираф, саросимага тушган эди.

Чуқур ҳаяжон оқибатида туғилган ундаги титроқ Сондрага ҳам ўтди, шу сабабли у ҳадеганда жавоб

беравермади; уни Клайднинг таклифи хафа қилиши у ёқда турсин, қайтага – у ўзи Клайдда шунчалик бетоқат ва бебошвоқ иштиёқ уйфота олганини ўйлаб, чинакамига ҳаяжонга тушди ва мамнун бўлиб қўйди. Клайд Сондра ёқсан, лекин Сондранинг ўзи уччалик ҳис этолмаган оловда шунчалик куйиб-ёнар, шунчалик талпинар эдики... У ҳали ҳеч вақт бунчалик оташин севгига дуч келмаганди. Ахир, у билан... махфий тарзда... Канадагами, Нью-Йоркками ёки Бостонгами – майли, қаёққадир қочиб кетиш мўъжиза эмасми! Агар қочиб кетса, бу ерда, Ликургда, Олбенида, Утикада росаям машмаша кўтарилади-да! Сондранинг уйида, қолаверса, ҳамма ерда қанча-қанча миш-миш, қанча-қанча оҳ-воҳлар авжга чиққан бўларди! Хоҳласа-хоҳламаса Гилберт ҳам, Сондранинг онаси билан отаси қойил қолиб юрадиган бутун Грифитслар ҳам унга қариндош-уруг бўлишарди-қўйишарди.

Сондрани бир дақиқа Клайднинг илтимосини бажо келтириб: у билан бирга қочиб кетиш, ўзининг ўтли, чинакам муҳаббатини кўнгилочар эрмакка айлантириш истаги ва ҳатто қатъий қарори қамраб олди, унинг кўзларидан айни шу маънони уқиши мумкин эди. Агар иккови турмуш курса, ота-онаси нима қила оларди, хўш? Наҳотки, Клайд унга ва оиласига муносиб бўлмаса? Гарчи ҳамма таниш-билишлари Клайдни Финчлиларники сингари пули йўқлиги сабаблигина йўлини тополмай юрган бир лапашанг, деб ўйласалар ҳам, бари бир Клайд унга муносиб. Боши омон бўлса, пул ҳам топпади ҳали... Унга уйланса бас, Гил Грифитс ўз отаси фабрикасида яхши лавозимни эгаллаганидек, Клайд ҳам отасининг корхонасида сердаромад бирор жойга эга чиқади.

Лекин орадан бир дақиқа ўтгач, бу ердаги турмуш шу алпозда кетаверса, ёз мавсумининг боши-

даноқ ота-онасини оғир аҳволга солиб қўйиши ва натижада бутун режаларининг бузилиб кетиши ҳамда онасининг ниҳоятда ғазабнок бўлишини ўйлаб (балки, у қизининг ҳали балофатга етмаганини баҳона қилиб, никоҳни бузишни ҳам талаб қилар), Сондранинг ақди ҳуши ўзига келди ва қўзларидағи шўх жилва ўрнини одатдаги жиҳдий иш билар монлиги эгаллади. Ҳуш, аслида, яна уч-тўрт ой сабр қилинса, нима бўлибди! Ана ўшандა қайтага Клайд Сондрадан айрилмайди, қочиб кетиш эса уларни умрбод ҳижрон азобига дучор этиши мумкин.

Шу сабабли Сондра эркаланганинамо, аммо қатъият билан бош чайқади ва Клайд ўзининг мағлубиятга учраганини – чидаб бўлмас, тузалиб бўлмас даражада фоят оғир мағлубиятга учраганини тушунди. Сондра у билан кетмайди! Демак, у тамом бўлди... тамом... эҳтимол, у Сондрани бутун умрга йўқотгандир. Э, парвардигор! Сондранинг нигоҳида эса меҳрибонлик балқиди, ваҳоланки, у ҳар қанча изтироб ва ҳаяжонга тушган онларида ҳам бунчалик меҳрибон бўломас эди.

– Азизим, бу ишни қилмаслигимиз керак, деб ўйламаганимда гапингга кўнармидим, – деди у. – Ўтакетган шошма-шошарлик бўлади бу. Ойим ҳозирча ҳеч нарса демаяпти, буни биламан. Бундан ташқари, унинг режалари шунчалик қўпки, ёзни нуқул меҳмон кутиш билан ўтказмоқчи – шуларнинг ҳаммаси мен учун. Ойим анавинга... илтифотли бўлишимни истайди, ким ҳақда гапираётганимни сиз биласиз. Ҳечқиси йўқ, истаса истайверсин, лекин бу бизга зифирча ҳам халал бермайди; мен ойимни ташвиш-шубҳага соладиган бирор нарса қилмайман, – Сондра унга далда берганси-мон жилмайиб қўйди. – Лекин сиз тез-тез, истаган вақтингизда келаверишингиз мумкин бу ерга, ойимда ҳам, бошқа бирон кишида ҳам асло шубҳа

туғилмайды, чунки сиз бизнинг меҳмонимиз бўлмайсиз-ку, ахир, тушуняпсизми? Мен ҳаммасини Бертина билан келишиб олдим. Хуллас, биз бутун ёз бўйи, хоҳлаганимизча кўришишимиз мумкин, тушуняпсизми? Кузда Ликургга қайтаман, агар ўшандада ойимни сизга мойил қилолмасам, биз унаштирилганмиз дейман, бу гапга ҳам ишонтиролмасам, унда, аниқ сиз билан қочаман-кетаман. Ҳа, азизим, қочиб кетаман, чин лафзим шу!

Жоним! Кузда!..

Сондра жим бўлиб қолди, икковлари олдида турган турмуш қаттиқчиликларини Сондра аниқ тасаввур этаётгани шундоқ нигоҳидан сезилиб турарди. У Клайднинг қўлидан ушлаб, юзига тикилди. Кейин шиддат билан бўйнидан қучоқлаб ўпди.

– Наҳотки, сиз шуни тушунмасангиз, азизим? Илтимос, жоним, бунчалик фамгин боқманг. Сондра ўз Клайдини жудаям севади! У Клайд бахтиёр бўлиши учун осмондаги ойни олиб беришга ҳам тайёр! Тайёр! Ҳали ҳаммаси яхши бўлиб кетади. Сабр қилинг – кўрасиз. Сондра ўз Клайдини ҳеч қачон, ҳеч қачон ташламайди!

Сондрани кўндириш учун бирор-бир далил-асоси йўқдигини, ўзининг қандайдир фалати ва шубҳали, хавотирли тоқатсизлигини Сондра сезишига туртки бўла оладиган далил-асоси йўқлигини Клайд тушунарди, бунинг устига Роберта талаб қўйиб турган бир пайтда (мабодо, агар... мабодо, агар... масалан, дейлик, Роберта унга қаттиқ ёпишиб оладиган бўлса) Сондранинг ҳозирги рад жавоби Клайд учун ҳалокат деган сўз бўлади. Шу сабабли у маъюс, ҳатто умидсиз бир қиёфада Сондранинг юзига тикилди. Бунчалар ҳам соҳибжамол бўлмаса бу қиз. У яшаётган муҳитнинг гўззалиги-чи! Клайднинг пешонасига эса шу соҳибжамол қиз ҳам, унинг муҳити ҳам насиб этмаган

экан, умрбод насиб этмайди ҳам! Шуларнинг ҳаммасига Роберта, унинг талаблари ва Клайд берган ваъдалар сабабчи. Бу бахтсизликдан фақат қочиб қутулмасанг – бошқа иложи йўқ. Эй, худойим-ей!

Унинг кўз қарашлари кескинлашиб, деярли телбанамо тус олди – қорачиқларида қандайдир гайритабиий куч пайдо бўлди, унинг қарашлари ақлдан озай деб турган кишининг қарашларинн эслатарди; Клайд бутун умри давомида ҳеч қачон бундай ҳолатга тушмаган эди ва Сондра ҳам унинг кўзларида ёнаётган ғалати бир ўтни сезгандай бўлди. Шунда Клайд унга шу даражада хаста, тушкун ва ҳаддан ташқари умидсиз бир қиёфада кўриниб кетдики, Сондра:

– Сизга нима бўлди, Клайд, азизим?! – деб хитоб қилиб юборди. – Кўзларингиз аллақандай... ҳатто қандайлигини ҳам билмайман... аллақандай бахтсизми ё... Клайд мени ҳали шунчалик севадими-а? У наҳотки уч ёки тўрт ой кута олмайди? Йўқ-йўқ, у, сўзсиз кутади! Бу – у ўйлаганча мушкул иш эмас. Клайдим, менинг ёқимтой болажоним бу орада деярли ҳузуримдан кетмайди. Бу ерда бўлмаган пайтида эса Сондра унга кунин, кунин хат ёзади!

– Аммо, Сондра, Сондра, қани энди ҳаммасини айтиб бера олганимда эди! Мен учун бу қанчалик муҳимлигини билганингизда эди!

Клайд шу аснода Сондра кўзларида: нима учун у билан, албатта, ҳозир қочиб кетишум керак экан, деган зийрак ва ишбилармонларча бир маънони кўрди-ю, дудуқланиб қолди. Сондрага ўз муҳитининг нақадар кучли таъсири борлигини Клайд ўша заҳотиёқ тушунди... шу муҳитга у қанчалар сингиб кетган... Ҳозир атиги арзимаган қайсарлиги туфайли уни бирдан гумонсиратиб қўйиши, ўзи билан дон олишиб юргани беадаблик эмасмикан, деган фикрга олиб бориши... Бу таваккалдан, ях-

шиси, воз кечиш керак. Акс ҳолда Сондра албатта сўраб-суриштиради, охири бориб кўнгли шунчалик совиб кетиши мумкинки, унда куз масаласида ҳатто гапиришга ҳам ўрин қолмайди...

Шу боисдан Сондранинг фикри ўзи учун нақадар муҳимлигини тушунтириб ўтириш ўрнига у гапни бошқа ёққа буриб қўя қолди:

– Буларнинг сабаби нимада, азизим, чунки мен сизсиз яшолмайман, доимо ёнимда бўлишингизни истайман. Ниятим шу, вассалом. Гоҳи пайтларда сиздан йироқда бир дақиқа ҳам яшолмайдигандек бўлиб туюлади назаримда. Мен сизга шунчалик муштоқман!

Сондра Клайднинг ўтли туйгуларига қисман хайриҳоҳ бўлиб, бу туйгулардан зриб ўтирган бўлса-да, аммо шунда ҳам фақат аввалгидек жавоб бериб қўя қолди, холос. Улар кутишлари керак. Куз келиши билан ҳаммаси жойига тушиб кетади. Ўз муваффақиятсизлигидан бутунлай гангигиб қолган Клайд ҳозир ҳам Сондра билан баҳтли эканлигини тан олишдан бошқа иложи қолмади; у қўлидан келганча кайфиятини билдирумасликка уринарди... балки, бирор-бир чораси топилар... бирор-бир чораси... эҳтимол, анави қайиқ ҳақидағи фикр... ёки яна бирор бошқа фикр чиқар... у ўйларди, ўйларди, тўхтовсиз ўйларди...

Лекин қандай фикр?

Йўқ, йўқ, йўқ – анави фикрни асло кўнглига йўлатмайди! Клайд қотил эмас ва ҳеч қачон қотиллик қилмайди. Қотиллик қилмайди, ҳеч қачон... ҳеч қачон... ҳеч қачон...

Демак – ҳамма нарсадан айрилса майлими?

Муқаррар фожиа юз беришига розими?

Муқаррар фожиа юз беришига розими?

Бу фожиадан қандай қутулиб, Сондрага қандай етишиш мумкин?

Қандай, қандай, қандай?

## XLIV БОБ

Якшанба куни Клайд эрталаб барвақт Ликургга қайтгач, Робертадан келган қүйидаги хатни топди:  
«Азизим Клайд!

Мен кўпинча: «Камбағални туюнинг устида ит қопади» деган мақолни эшитардиму, аммо унинг асл маъносини фақат энди тушундим. Бугун эрталаб биринчи бўлиб кўрган кишим, ҳойнаҳой, қўшнимиз мистер Уилкокс бўлди шекилли. У бугун миссис Энсдан умид қилиб ўтирмаслигимни айтишга келган экан, чунки у Бильцда миссис Динуидди учун нима балолар ҳам тикиши керак эмиш, ваҳоланки, кеча у деярли ҳамма нарсани таппа-тахт қилиб кетган эди: мен бугун фақат ишни тезлаштириш учун тикиш-чатишда унга бир оз ёрдамлашиб юборишим лозим эди. Энди у фақат эртага келармиш. Кейин ойимнинг опаси, миссис Николснинг оғир бетоблиги ҳақида хабар келди-ю, ойим Бейкерс-Пондга – холамникуга кетишга мажбур бўлди (деярли ўн икки миль олисда бу ердан у жой). Том гарчи отамга кўмаклашиб туриши зарур бўлса ҳам, ахир, фермада иш бошдан ошиб ётибди, ойимни олиб кетди. Ойим якшанбагача қайтиб келадими-йўқми, билмай ўтирибман. Агар ўзимни тузукроқ сезганимда ва тикиш-чатишлар билан бунчалик банд бўлмаганимда, эҳтимол, ойимнинг: боришингдан наф йўқ, деб уқтиришига ҳам қарамай, унга қўшилиб мен ҳам жўнармидим.

Устига-устак, Эмилия билан Том менинг ишларим беш ва мен қувнаб-яйрашим мумкин, деб ўйлаб, бугун кечқурунга тўрт қиз, тўрт йигитчани таклиф қилишган эди: ойдинли тунда қандайдир ёзги базм кечаси уюштиromoқчи бўлишди шекилли улар. Эмилия, агар ойим билан иккаламиз қарашиб юборсак, музқаймоқ ва пирог тайёрламоқчи ҳам бўлган эди.

Энди у бечорага мистер Уиллоксдан тортиб, ҳали унга-ҳали бунга құнғироқ қилиб, кеча янаги ҳафтага қолдирғанини айтишга түгри келяпти. У хафа бўлиб, қовоқ-тумшуғи осилиб кетган, албатта.

Мендан аҳвол сўрасанг, ҳар қанча жоним қийналғанда ҳам ўзимни қўлга олишга ҳаракат қиляпман. Лекин, жоним, очиғини айтсан, бу жуда ҳам оғир. Ахир, мен шу пайтгача сен билан фақат уч мартагина телефон орқали гаплашиб, мўлжалдаги пулни бешинчи июлгача ҳам йифмасам керак, деган гапингни эшиздим, холос. Бунинг устига ойим билан отам Гамильтонга, Чарли амакимниги боришни ўйлаётган эканлар, буни келиб-келиб бугун билиб қолдим; улар амакимнигидан то ўн бешинчигача меҳмон бўлишармиш, агар Лиургга қайтмасам, мени ҳам ўзлари билан бирга олиб кетишмоқчи. Том билан Эмилия бўлса, Гомерга, опамниги жўнашади. Лекин, ўзинг биласан, мен ахир ҳеч ёққа боролмайман-ку. Ҳаддан ташқари мадорим қуриб, эзилиб қолдим. Кеча тунда бамисоли ичим узилгундай бўлиб қайт қилдим, бугун кун бўйи оёқ босишга ҳам ҳолим йўқ, даҳшатдан худди жинни бўлиб қолаётганга ўхшайман.

Жоним, нима қиласиз энди? Мени олиб кетиш учун балки учинчигача кела оларсан? Улар Гамильтонга учинчидан жўнашади, сен ҳам менга албатта келишинг зарур, улар билан бирга боролмайман-ку, ахир. Бунинг учун эллик миль йўл босиб ўтиш керак. Агар улар кетгунга қадар сенинг келишинг аниқ бўлганда эди, унда улар билан бирга боришга кўнишим ҳам мумкин эди. Аммо келишингни мен аниқ билишим керак, аниқ!

Клайд, шу ерда яшаётганимдан бери кучим етгани фақат йифи. Агар сен ёнимда турганингда, менга бунчалик оғир тушмасди. Жоним, мен бардошли бўлишга интиляпману, аммо гоҳи пайларда, балки сен бутунлай келмасанг-а, деб ўйлаб

кетаман беихтиёр. Ахир, сен шу ердалигимдан бери бир қатор ҳам хат ёзмадинг, атиги уч марта телефонда гаплашдинг, холос. Лекин мен, ҳарқалай, сен унчалик пасткашлик қиласанг керак, деб ўзимга-ўзим далда берганим-берган, бунинг устига лафзинг бор-ку, ахир... Сен келасан, шундайми? Негадир мени энди ҳамма нарса ваҳимага соляпти, Клайд, ҳамма нарсадан қўрқяпман, жоним. Мен ўтган йилги ва бу йилги ёзни, олам-олам орзу-тилакларимни ўйлаяпман... Жоним, ахир, сен уч-тўрт кун олдин келсанг ҳам бўлади-ку, фарқи нима? Майли, ҳечқиси йўқ, пулимиз бир оз камроқ бўла қолар. Қўрқма, шундоқ ҳам яшаб кетишимизга инонаман. Борини аяб, тежаб-тергаш қўлимдан келади. Ўша вақтгача қўйлакларимни битиришга уриниб қўраман, агар битиролмасам, унда эскилари ҳам кунимга яраб тураг, янгиларини кейинроқ битиарман. Жоним, мен албатта бардам, мардона бўлишга, ҳадеб жонингга тегавермасликка ҳаракат қиласман, фақат ўзинг келсанг бас. Биласан-ку, Клайд, келишинг қанчалар зарурлигини! Акс ҳолда, гарчи сен учун бошқа бирор йўл топишни истаган тақдиримда ҳам, бари бир бўлмайди.

Илтимос, Клайд, ўзинг айтган муҳлат тугашига албатта шу ерда бўлишингни хабарлаб хат ёз, илтимос қиласман. Мен шунчалик хавотирдаманки, шунчалик ёлғиз ва фарибманки, агар вақтида етиб келмасанг, сени кўриш учун ўша заҳотиёқ Ликуррга жўнайман. Бу гапларимдан ранжийсан, буни биламан, лекин, Клайд, мен бу ерда энди қололмайман, гап шу – вассалом. Отам ва ойим билан ҳам бирга кетолмайман, демак, атиги битта йўл бор. Ҳойнаҳой, бугун тун бўйи мижжа қоқмай чиқсам керак. Сенга ёлвориб илтижо қиласман, келиш-келмаслигингни ўйлаб хавотирда ўтирмаслигим учун қайта-қайта ишонтириб менга хат ёз, Жоним, агар бугун ёки шу ҳафтанинг охирига келганингда эди,

бунчалик азобга тушмас эдим. Яна салкам икки ҳафта кутиш, эх-хе!.. Ҳозир уйимизда ҳамма ухлаб қолган, энди мен ҳам ётмоқчиман.

Илтимос, жоним, ушбу хатни олишинг биланоқ менга жавоб ёз ёки хат ёзолмасанг, эртага аzonда албатта қўнғироқ қил, чунки сендан ақалли жин-дай бўлса-да хабар топмагунимча бир дақиқа ҳам қўнглим жойига тушмайди.

Сенинг баҳти қаро Робертанг.

P.S. Хат жудаям ёмон чиқди, аммо ҳар қанча уринсам ҳам бундан тузукроқ ёзолмадим. Шунчалик адойи тамом бўлганман».

Аммо бу хат Ликуррга етиб келган куни Клайд бу ерда йўқ эди, шу сабабли у тезда жавоб ёза олмади. Бундан Роберта чуқур қайфуга тушиб, асабийлашиб қўнглининг бир четида: ҳойнаҳой, Клайд менга бир оғиз айтмай қаёққадир олисроқ жойга кетгандир, деб ўйлаб, шанбада унга яна хат ёзди – тўғрироғи, бу хат эмас, аллақандай васваса, додвой аралаш қалб нидосини эслатарди:

«Бильц, шанба, 14 июнь

Азизим Клайд!

Сени огоҳлантириб қўйяпман, мен Ликуррга қайтаяпман. Бу ерда энди бошқа қолишга тоқатим етмади. Ойим ҳам ташвишда, нега бунчалик кўп йиглаётганимни тушунмай жони ҳалак. Энди мен ўзимни бутунлай хаста сезяпман. Биламан, йигирма бешинчи ёки йигирма олтинчигача шу ерда туришга ваъда берган эдим, аммо сен ҳам, ахир, хат ёзиб тураман деб ваъда қилган эдинг-ку, қани ёзганинг, фақат ҳар замонда телефонда бир-икки оғиз гап гапирасан, холос, мен бўлсан ақддан озай деяпман. Бутун эрталаб уйғондиму йиглашга тушдим – ўзимни ҳеч босиб туролмадим, мана энди бошимнинг лақи́ллаб оғришига сира чидаб бўлмаяпти.

Келгинг келмаётганидан шунчалик қўрқяпманки, даҳшат босяпти мени, жоним! Сенга ялиниб-ёлвораман, келиб, мени қаёққа бўлса ҳам майли, истаган жойингга олиб кет, фақат шу ердан қорам ўчса-ю шу азобдан қутулсам бўлгани. Ҳозир, аҳволим бунақалигида дадам билан ойим мени бутун ўтган-кетган воқеаларни сўйлаб беришга мажбур қилишадими ёки ҳаммасини ўзлари сезиб қолишадими, деб жуда қўрқяпман.

Клайд, менинг аҳволимни сен сира-сира тушунмайсан. Сен келаман деган эдинг, мен бунга баъзан ишонаман. Айрим пайтларда эса, айниқса, сен хат ёзмай, қўнфироқ қилмай қўйганингда миямни мутлақо бошқача фикрлар эгаллаб олади, ана шунда сени яна кўрармиканман ўзи, деб иккиланиб қоламан. Агар сен келишингни аниқ қилиб ёзганингда эди, яна бир оз туришим мумкин бўларди. Ушбу мактубни олишинг биланоқ менга хат ёз ва келадиган кунингни аниқ кўрсат. Лекин, илтимос, биринчидан кечикма, ортиқ чидай олмайман. Биринчидан кейин мен бу ердан кетаман. Клайд, дунёдаги энг бахти қаро қиз – менман, шуларнинг бари сен туфайли. Йўқ, жоним, мен бундай демоқчи эмасдим. Бир пайтлари сен менга меҳрибон эдинг, ҳозир ҳам шундай, ахир олиб кетишга келаман, деб ваъда бергансан-ку. Агар тезроқ кела қолсанг, мен сендан шунчалар миннатдор бўлардимки! Бу хатни ўқиётганингда, эҳтимол, мени енгилтак бўлиб қолганми, деб ўйлашинг мумкин, лекин, илтимос, жаҳлинг чиқмасин, Клайд! Фақат кулфат ва нотинчликдан ақлдан озай деяётганимни, боши берк кўчага кириб, қандай йўл топишни билмай қолганимни тушунсанг бас. Ялиниб-ёлвораман. Клайд, менга хат ёз! Бир оғиз сўзингга қанчалар муштоқлигимни агар билсанг эди!

*Роберта».*

Клайдни ҳам худди Робертанинг аҳволига тушириш учун шу бир хат билан Лиқургга қайтиб келиш хусусидаги дўқнинг ўзиёқ кифоя қилди-қўйди. Қаранг-а, Клайд Робертани бу хилда кескин ва охирги шарт қўйишга ҳали шошилмаслик керак, деб кўндираман деса, бирор-бир тузукроқ баҳонаси ҳам қолмабди. У жон-жаҳди билан ўйлай бошлади. Робертага узундан-узун, бир қун келиб ўзини қўлга тушириб берадиган хат ёзиб ўтириши шарт эмас: модомики, унга уйланмасликка аҳд қилдими, унақангি хат ёзиши – тўғридан-тўғри аҳмоқлик бўлур эди. Бунинг устига у ҳали ҳам Сондра оғуши ва ўпичларининг хумори билан маст юрарди. Шундай кайфиятда, у, агар ўзи хоҳласа ҳам Робертага хат ёзолмасди.

Лекин шунга қарамай, Клайд Робертанинг авзойи ёмонлиги, шу боисдан нимадир қилиб бўлса ҳам уни тинчтиб қўйиш зарурлигини биларди. Иккинчи хатни ўқиб тургатгандан сўнг орадан ўн дақиқа ўтгач, у Робертани телефонга чақира бошлиди. Ярим соатлар чамаси бетоқат бўлиб урина-урина ахийри у билан уланди ва Робертанинг ожиз, назарида аччиқдангансимон овозини эшитди (аслида эса овоз ёмон эштилгани учун шундай тувлган эди).

– Алло, Клайд, алло! Қўнфироқ қилганингдан бошим нақ осмонга етди! Жудаям хавотирланаётгандим. Ёзган хатларимни олдингми? Эрталабданоқ кетишга ҳозирланаётган эдим, яхшиям қўнфироқ қилиб қолдинг. Сен жим бўлиб кетсанг, нима қилишимни билмай гангигб қоламан. Жонгинам, қаерда эдинг? Ота-оналарим ҳақида ёзганимни ўқидингми? Улар кетишяпти. Клайд, нега хат ёзмайсан, жуда бўлмаса тез-тез қўнфироқ қилиб ҳам турмайсан? Ойнинг учинчи куни тўғрисида сенга ёзган эдим, хўш, бунга қандай қарайсан? Келасанми, ишонаверайми? Ёки сени бошқа бирор-бир

жойда кутайми? Кейинги уч-түрт кун ичида шунчалик ич-этимни еб қўйдимки, лекин ҳозир яна сен билан гаплашганимдан сўнг, эҳтимол, ҳову-римдан тушарман. Майли, бир оғизгина бўлса ҳам ҳар икки-уч кунда ёзиг тур, албатта ёз! Нега йўқ дейсан, Клайд? Шу ерда турганимдан бери бирон марта ҳам ёзмадинг. Қай ахволдалигимни сенга айтиб беришга ожизман. Ўзимни қўлга олиш ҳам шу қадар оғир бўляптики менга.

Робертанинг сўзларига қараганда, у ниҳоятда эзилган ва ҳаяжонланган эди. Клайднинг назарида эса Роберта; гарчи у гапираётган уй ҳозир бўмбўш бўлишига қарамай, ниҳоятда эҳтиётсизлик билан гап сотаётганга ўхшарди. Роберта уйда бир ўзи ёлғизлиги ва уни ҳеч ким эшитмаслигини айтса ҳам, Клайдни бу нарса унчалик қаноатлантири-масди. У ўз номининг тилга олинишини ва унга Роберта ёзган хатлар тўғрисида гапириб ўтирилишини ҳам истамас эди.

Клайд чалакам-чатти гапиришга ҳаракат қилиб, Робертага ўзининг ниҳоятда бандлиги ва унга, у қисталанг қилаётганидек ҳадеб хат ёза-вериш қўлидан келмаслигини шама қилиб ўтди. Ахир, айтган-ку, агар иложини топсам, йигирма саккизларга ёки ўша атрофларда бориб қоламан, деб. Иложини топганда-ю, албатта бораарди, бироқ шу боришини ҳам яна бир ҳафтага, ҳатто ундан кўпроққа: еттинчи ёки саккизинчи июлгача чўзишга тўғри келадиганга ўхшайдн. Шунда у яна эллик доллар йиққан бўлади, бу пуллар унга жуда ҳам зарур, шунга яраша ниятлари бор унинг. Аслида эса (Клайднинг пинҳона нияти ҳам шу эди-ки), келгуси ҳафтанинг охирида – ўзи орзиқиб кутаётгани – Сондрани яна бир бориб кўришга ҳам улгуарди ўшандা. Мана шу орада Робертанинг оёқ тираб тургани-чи! Бир-икки ҳафтага отонаси билан кетишининг иложи йўқмикан, кейин

Клайд уни олиб келишга бориши ёки Робертанинг ўзи қайтиши ҳам мумкин бўларди? Ўшанда Клайд ҳам вақтдан қийналмасди...

Аммо Роберта жавоб ўрнига шунчалик аччиқ гина-ҳасратларини тўкиб солдики, агар гап шундай экан, демак, келишни истамаётган экансан, унда жўнаб кетишга ҳозирланиб, бекордан-бекор сени кутишга вақт кетказиб ўтирумайман-да, ҳозироқ албатта Лиургга, Гилпинларникига жўнайман, деди гапни чўрт кесиб... Шу пайт Клайд бирдан, майли, учинчига борсам бора қолай, деб ваъда бераверсам ҳам бўлади-ку, деган қарорга келди; мабодо у бормаган тақдирда ҳам, жуда зўр келганда Роберта билан бирор жойда учрашишни келишиб олишади-ку. Сирасини айтганда, ҳозир ҳам у нима қилишини билмай боши гаранг эди. Сал ақдини жойига қўйиб олиш учун бир оз вақт керак...

Шу боисдан у мутлақо бошқача оҳангда гапира кетди:

– Берта, қулоқ сол менга! Ўтинаман, мендан хафа бўлма. Гапларингга қарасам, гўё мен кетишимиз ҳақида зигирча ҳам қайфурмаётганга ўхшайман. Бундай қадам олиш мен учун қанчалар қимматга тушишини сен билмайсан. Ҳаммасини бир зарб билан йўқотиб бўлмайди-ку, ахир, бу нарсалар пинагингни ҳам бузмайди, шекилли. Биламан, сенга қийин, жуда қийин, хўш, менга-чи, менга осонми? Қўлимдан келган ишнинг ҳаммасини қиляпман; мен ҳаммасини ўйлаб, тарозида тортиб кўришим керак. Наҳотки, сен шу арзимаган учинчигача сабр қилолмасанг? Ўтинаман, сабр қил. Мен сенга хат ёзиб туришга сўз бераман, агар ёзолмасам, унда кун ора қўнғироқ қилиб тураман. Хўпми? Аммо минг зарур бўлганда ҳам номимни тилга олиб гапиришингни сира-сира истамай-

ман. Бу охири бориб күнгилсиз оқибатларга олиб келиши мумкин. Илтимос, шундай қилма. Янаги гал сенга құнғироқ қилаётганимда мистер Бейкер сүраяпти сени, деб қүя қоламан шунчаки, тушунарлыми? Кейин сен: танишларимдан бири экан, дейишиңг ҳам мумкин. Агар ишимиз үнг келмай, айни үша учинчидә жұнашимизга нимадир халақит берадиган бўлса, у пайтда, хоҳласанг бу ерга, хоҳласанг Ликургга яқин бирор-бир жойга келишиңг мумкин, кейин имконият бўлди дегунча икковимиз йўлга равона бўламиз-қўямиз.

У шунчалик юмшоқлик билан, ёлвориб гапирадики (бошқа чораси йўқдигидан шундай қилаётган эди у), овозида бир пайлари Робертани бутунлай ром этиб олган үша аввалги меҳрибонлиги; бамисоли заифлиги акс этарди ва бу Робертада ҳатто ҳозир ҳам бир фалати, мутлақо асоссиз миннатдорчилик туйғуларини уйғотар эди. Шу сабабли у маинлик, ҳатто шириңсуханлик билан дарров жавоб бериб қўя қолди:

– Йўқ, йўқ, азизим, энди мен чидайман. Ўзинг биласан-ку, мен сени безовта қилишни истамайман. Фақат ҳозир шундай бўлиб қодди, чунки пи-чиқ устихонимга қадалиб, ўзимни ўзим идора қиломай қолгандим. Буни ўзинг ҳам тушунасан-ку, Клайд, шундай эмасми? Мен сенинг севгингиз туролмайман. Афтидан, бутун умрга севсам керак сени. Шунинг учун сени ранжитиш у ёқда турсин, ҳатто буни хаёлимга ҳам келтиролмайман, жоним, ишонасанми шунга! Мен энди ҳечам бундай қиласликка уриниб кўраман!

Клайд Робертанинг овозида самимий шафқат оҳангини севиб, Роберта янгитдан фақат ҳеч гапсиз-сўзсиз мени олиб кетасан деб тихирлик қилавермаса, яна ўзини ошиқдек кўрсатиб, унинг устидан бурунгидай ҳукм ўтказа олишини ҳис этди. Гарчи мен Робертани энди севмасам ҳам, –

дерди Клайд ўзига ўзи, – ва унга уйланишни ха-  
ёлимга келтирмаётган бўлсам ҳам, анави бошқа  
соҳибжамол туфайли, ўз орзу-ниятларим туфайли,  
ҳеч бўлмагандага Робертага меҳрибончилик қилиб  
туришим мумкин, шундай эмасми, ахир? Тилимни  
ширин қилишим керак!» Хуллас, бу гап янги бити-  
шув асосидаги ўзаро ярашув билан якунланди.

Куни кеча (ҳозиргина у қайтиб келган кўллар-  
даги қайнот ҳаёт хийла сўнган эди ўша куни)  
Клайд, Сондра, Стюарт ва Нина Темпл ҳамда Тэрс-  
тонларникига меҳмон бўлиб келган Харлей Бэгот  
исмли йигитча билан Бертина автомобилда авва-  
лига Учинчи миль Кўрфазига (бу – Ўн иккинчи кўл  
шимилида, тахминан йигирма беш милча олисда  
жойлашган шинам бир истироҳат маскани эди), у  
ердан эса, икки томони баҳайбат арчазорлар ора-  
лаб ўтиб, Катта мушгир кўлига ва Трайн кўлининг  
шимилий қисмида ястаниб ётган қадам етмас қа-  
рагайзор ўрмонлардаги бошқа кичик кўлчаларга  
ҳам боришган эди. Клайд бу олис, деярли кимса-  
сиз жойлар ўзида қандайдир фалати бир таассурот  
қолдирганини ҳозир эслади. У ерлар чиндан ҳам  
одамзот қадами етмайдиган жойлар эди. Баҳай-  
бат, унсиз ва шўппайган дарахтлар ҳамда мотам  
гулчамбарига ўхшаш бир-бирига чирмавиб кет-  
ган ер бағирлаб ўсадиган заҳарли ўсимликлар ора-  
лаб ўтувчи тор, ёмғир ювавериб ишдан чиқсан,  
ифлос, илонизи кўчалар; ўрмон шу кетганча кета-  
верар, охири йўқقا ўхшарди гўё. Йўлларнинг чети-  
да эса ваҳимали, сирли, ўтиб бўлмас ботқоқликлар  
ва кўлобликлар кўзга ташланарди; бу ботқоқлик ва  
кўлобликларнинг айрим жойлари худди жанг май-  
донига ўхшаб дарахт – мурдалар билан қопланган  
эди, намни шимаверганидан чириб битган дарахт  
таналари баъзан бир-бирларининг устига тўрт-  
беш қаватдан бўлиб қулаганча қўкиш балчиқка

ботиб ётарди. Усти темиратки ёки йўсин қоплаб кетган тўнкалар ва сувда чириб ётган шох-шабалар орасидан июнь қуёши тафтида жимфина исинаётган қурбақаларнинг кўзлари ва елкалари ялтираб кўринар; ҳавода майда чивинлар гужгон ўйнар; ҳар замон-ҳар замонда эса бехосдан пайдо бўлган машинадан чўчиб кетиб, ўзини заҳарли ўтлар ва сув ўсимликлари фужанак ўсган жойга ураётган илоннинг думи кўзга чалиниб қоларди.

Шу ботқоқликлардан бирини кўрганда Клайд негадир Пасс кўлидаги баҳтсиз ҳодисани эслади. У беихтиёр, ўзи ҳам англамаган ҳолда бу чет жойларнинг ниҳоятда кимсасизлигини ўйлаб кетди: вақти келганда фойдаси ҳам тегиб қолиши мумкин, деган хуносага келди. Шу пайт тўсатдан аллақандай сувхўрак бир қуш хунук қичқирганча шундоқ ёнгинасидан учиб ўтди-ю, қоронги ўрмонзор ичиди яширинди. Унинг қичқириғидан Клайд асабийлашиб, бир сесканиб кетди ва автомобилда ўтирган жойида қўзгалиб қаради: у умрида қушнинг бунчалик хунук қичқиришини сира эшитмаган эди.

– Бу нима? – деб сўради у ёнида ўтирган Харлэй Бэготдан.

– Нимани сўраяпсиз?

– Қуш шекилли... ҳув анави ёқقا, орқага бир нарса учиб ўтгандай бўлди...

– Мен ҳеч қандай қуш овозини эшитмадим.

– Ие, наҳотки! Жуда фалати овоз эшитилди-ку...

**Баданим нақ музлаб кетгандек бўлди!**

Клайдни, деярли кимсасиз бу жойлардаги сонсаноқсиз, пастқам кўллар айниқса таажжубга соларди, у илгари бундай кўллар борлигини мутлақо эшитмаган эди. Юриб бўлмас даражада лойга ботган бу йўллардан улар кўлдан келганча тез-тез ўтиб боришарди, теварак-атрофдаги қалин нинабаргли ўрмонлар ичини эса бутунлай кўллар эгаллаб ётар-

ди. Фақат ахён-ахёнда учраб, қорамтириң даражтлар ичига кириб йүқолаётган билинар-билинмас сўқмоққа ёки қумли ё ўнқир-чүнқир йўлга қараб туриб, озми-кўпми ҳаёт изларини пайқаш мумкин эди. Бу олис кўлларнинг соҳилларида деярли одам турмас эди, сув сатҳидан юқорироқда аллақандай ўзига хос рангдаги арчалар қуршовида кўриниб қолган якка-ёлғиз кулба ёки узоқдаги кичик бир уй ҳамманинг диққат-эътиборини ўзига тортар эди.

Аммо ўша Массачусетсдаги кўл нима учун Клайднинг миясидан сира нари кетмаяпти-а! Ўша қайиқ ҳам! Қизнинг мурдасини топишибди-ю, ҳамроҳиникини эса – йўқ... Нима бўлганда ҳам жуда даҳшатли воқеа бу!

Роберта билан гаплашгандан сўнг Клайд ўз хонасида ўтирганча, яна бир қанча миль юрилгандан сўнг охири машина узун, тор кўлнинг шимолий қисмидаги очиқ кенгликка чиққанини эслади. Оролчами ёки ўртага туртиб чиққан бурунми – ишқилиб, кўлнинг жанубий қисмини ажратиб турар, ундан у ёғига эса кўл қинғир-қийшиқ бурилиш-суримишлар билан яна узоқ-узоқларгача давом этадиганга ўхшарди, аммо бу автомобиль тўхтаган жойдан кўзга ташланмас эди. Оролчанинг ҳув аваби бурчидаги шинамгина меҳмонхона билан қайиқлар тўхтайдиган саройни ҳисобга олмагандা, келган ерлари бутунлай кимсасиздек кўринарди. Улар ўша пайтда кўлда на биронта байдаркани ва на қайиқни учратдилар. Ўзлари ёнидан ўтган барча кўлларнинг соҳиллари, ҳатто сувигача Ликургдаги деразаси остида ўсган дараҳтлардақа баланд-баланд, ям-яшил, учли ва сершоҳ арчалар билан қопланган эди. Жануби-фарбда эса зангори Адирондак тоғларининг ўркачсимон нафис қирралари олис-олислардан кўзга ташланарди. Қуёш нурида товланиб турган кўл суви енгил шабададан жимиirlар, аллақандай қуюқ, деярли қорамтири,

ложувард тусга кирган эди; шинам меҳмонхонанинг пастгина пешайвонида бекор ўтирган йўл кўрсатувчи: қорамтирилигининг сабаби – бу ернинг фоятда чуқурлигида, деб тушунтирди кейин.

– Бу ернинг чуқурлиги етмиш футча чиқса керак, бу ёини суриштирангиз бандаргоҳдан атиги юз футлар чамаси беридамиз, холос.

Харлей Бэгот бўлса бу жой балиқ овлашга дурустмикан деган масала билан қизиқиб қолди (чунки унинг отаси хийла вақтдан сўнг шу ерларга келишни мўлжаллаб қўйган эди) ва у, ўзини автомобилда ўтирганларга қарамаётгандек тутаётган йўл кўрсатувчидан:

- Кўлнинг узунлиги қанча? – деб сўради.
- Етти милга яқин.
- Балиқ кўпми?

– Қармоқ ташлаб кўринг, биласиз. Агар қора олабуға овлайман десангиз, бутун округда ҳам бундан зўр жой тополмайсиз. Ҳув анави оролчанинг нарёғида, жануб томонда кичкина бир қўлтиқча бор, шу қўлтиқча бу атрофдаги барча кўллар орасида балиқ овлашга келганда энг зўр жой ҳисобланади. Мен бир марта икки соат ичида икки кишининг етмиш бешта балиқмисан балиқ овлаганини кўрганман. Кўлимизни буткул қуп-қуруқ, хонавайрон қилиб кетишни истамаган ҳар бир кишига бемалол балиқ етиб-ортади.

Йўл кўрсатувчи баланд бўйли, чўзинчоқ, каллади, юзларини ажин босган ориқ киши эди, у кичкина-кичкина, аммо ўткир мовий кўзларини ўйнатганча йўловчиларга разм солиб, совуқдан-совуқ ҳеҳелаб кулди.

- Бугун бир омадингизни синааб кўрмоқчимисиз?
- Йўқ, мен ўзимни назарда тутиб сўраётганим йўқ... Янаги ҳафтага балки бу ерга отам келиши мумкин. Мен, шу ердан тузукроқ жой топилармикан, деб сўраётганим.

– Кулайлик масаласида бу ер Рэкет кўли билан беллашолмайди, албатта, аммо-лекин у ерда биздагидақа балиқ ҳам йўқда, бу ёғи ҳам бор.

У айёrona, маънодор жилмайиб қўйди.

Клайд шу вақтгача ҳали ҳеч қачон бунақа одами учратмаган эди. Ўзига хос ғалатиликлари ва зиддиятлари билан на Клайд шу пайтгача кўриб келган шаҳар ҳаётига ва на унинг теварагидаги Крэнстонлар ва уларнинг дўстларини ўраган экзотик дабдабага ўхшамайдиган бу хилват дунёнинг ҳаммаси уни қизиқтириб қолди. Нақадар ҳувиллаган ва гаройиб овлоқ эди бу, агар жанубга қараб юз миldан камроқ юрилганда ур-тўполонли Ликург бошланар, аммо орада осмон билан ерча фарқ бор эди.

– Юрагимни сиқиб юборди-ку бу ерлар, – деди Стюарт Финчли.

– Шундоқ ёнгинамизда экану, фарқини қаранглар! Ўзиям ҳеч ким яшамайдиганга ўхшайди бу жойларда.

– Гапингиз тўппа-тўғри, – деб маъқуллади йўл кўрсатувчи – Фақат унда-мунда ёзги лагерлар учрайди, холос, ундан кейин кузда кийик ва буғу овига келадиган битта-яримтасини айтмаса, биринчи сентябрдан сўнг бу ерларда бирорни учратиш қийин. Мен шу жойларда қопқон қўяман, йўл кўрсатувчи бўлиб хизмат қилаётганимга ҳам мана, ўн етти йил бўлибди, лекин фақат ёз фаслида Ўн иккинчи кўлдагига ўхшаб одам кўпайиб кетганини айтмаса, ҳаммаси ўша-ўша, илгариgidай. Агар катта йўллардан бирор ёқقا бурилмоқчи бўлсангиз, бу жойларнинг баланд-пастини беш қўлдай билишингиз даркор. Тўғри, фарброқقا қараб беш миль юрилса, темир йўл ўтганди. Қуролсоз бекати бор. Ёзда бизнинг меҳмонхонадан ўша ёқقا автобус қатнайди. Яна Кулранг кўлга ва Учинчи миль Кўрфазига олиб борадиган ёмон,

үнқир-чүнқир йўллар ҳам бор. Сизлар, кўриниб турибди, ўша йўлдан келибсизлар: фақат шу йўл билангина бизга келиш мумкин. Айтишларича, Ўн иккинчи қўлга олиб борадиган янги катта йўл солинармиш, лекин ҳозирча булар қуруқ гап, холос. Бу ердаги кўпгина кўлларга эса, автомобилда бораман десангиз, мутлақо йўл йўқ. Қаёққа қарасангиз – ёлғизоёқ сўқмоғу тузукроқ лагеръ-пагерни ҳам учратолмайсиз. Биз Бад Эллис билан ўтган йили Қуролсоз кўлига пиёда борган эдик, бу ердан ўттиз миль нарида, қарабисизки, шунча масофани битта-битта қадамлаб босиб ўтишга тўғри келди денг, яна елкамиздаги юкимизнинг зиллиги-чи. Лекин шу қийналганларимиз эвазига балиқ ва ёввойи паррандаларни айтсангиз – тўлиб-тошиб ётибди! Кийиклар билан буғулар эса сув ичгани келар экан денг. Уларни, анави қирғоқда турган тўнкани кўраётгандек шундоқ, яқингинадан кўрганман ўшанда.

Шундай қилиб Клайд у ердан қайтишаётганда ўзи ва ҳамроҳларини бутунлай қамраб олган ўша ҳиссиётларин хотирлади: улар бирор-бир жойда яна бу қадар сирли ва аллақандай жозибага тўла кимсасиз маскан топилармикан, деб ўйлашган эди ўшанда. Яна қизиги шундаки, у жойлар Ликургнинг шундоққина биқинида: шосседан юрилса, арзимаган юз миль, поездда борилса, салкам етмиш миль йўл босилади, холос, буни Клайд фавқу-лодда эшитиб қолган эди.

Ҳозир, Ликургда, Роберта билан гаплашиб олганидан сўнг ўз хонасига қайтгач, ёзув столи устида турган Пасс кўли фожиаси ҳақидаги мақола бо силган ўша газетага тағин кўзи тушди-ю, хавотирланганча, аммо дадиллик билан, барча маънодор тафсилот ва гумонларига эътибор бергани ҳолда, қайта бошдан бир сўзини ҳам қўймай ўқиб чиқ-

ди. Ўша йигит билан қизнинг тўппа-тўғри, бемалол бандаргоҳга келишганини айтмайсизми; ҳар кунги қоида бўйича бирорда шубҳа ҳам туғдирмай, сайд қилиш учун ижарага қайиқ олишади ва кўлнинг шимол қисмида кўздан гойиб бўлишади; шундан кейин – тўнкарилиб қолган қайиқ, қирғоқ яқинида сузиб юрган эшкак ва шляпа... Ҳали қош қорайиб улгурмаган; у газетани дераза олдида тик турган ҳолда ўқир эди. Дераза ташқарисида эса қорамтирип арча шохлари қулоч ёйган, бу шохларни у боягина бир эслаб ўтган эди; чунки бу шохлар энди нуқул Катта мушгир кўли соҳилидаги арчаларни хотирига колаётган эди.

Аммо – оҳ, буюк парвардигор! – нима қилганинг бу, ахир? У нималар ҳақда ўйлаяпти ўзи? Кимсан Клайд Грифитс-а! Сэмюэл Грифитснинг жияни-я! Дилига нима яшириниб олган ўзи? Қотиллик! Мана, нима яширинган унинг дилига! Анави қўрқинчли газета-чи... нуқул кўзига рўпара бўлгани-бўлган ёки бу ёвуз қисмат тақозосимикан? Даҳшатли жиноят, агар фош этишса – электр курсига ўтқазишади. Бундан ташқари, бирорни ўлдиришга – яна келиб-келиб Робертани ўлдиришга унинг кўли қандай кўтарилади. Йўқ, йўқ! Ораларида ўтган шунча ишдан кейин, йўқ, ақлга сифмайди бу... Шундайку-я, аммо, жаннат сингари анави дунё-чи... Сондра-чи... агар у ҳозироқ бир амалини қилмаса, сўзсиз, ҳаммасидан айрилади-қолади.

Клайднинг қўллари титраб, қовоқлари учиб, кейин бутун вужудини қалтироқ босди-ю, борлиғидан совуқ асабий изтироб тўлқини югуриб ўтди. Уни ўлдириш! Ёки жуда бўлмаганда чуқур жойга олиб бориб қайиқни ағдариб юбориш, буни худди Пасс кўлидагига ўхшатиб, хоҳлаган ерда, кутилмаган воқеа юз бергандай бемалол қилиши мумкин. Роберта бўлса сузолмайди. Клайд буни билади. Ле-

кин Роберта бир амаллаб қутулиб қолса-чи... қичкүриши... қайиққа ёпишиб олиши мумкин... унда... шу атрофда юрган биронтаси унинг овозини эшитиб қолиб... кейин Роберта гапириб беради!.. Клайднинг пешонасини совуқ тер босди, лаблари титраб, бирдан томоги қуриб қолди. Воқеа шундай бўлиб чиқмаслиги учун у одини олиши... одини олиши... э, йўқ... Клайд унақалардан эмас. У бу номаъкул ишни қилолмайди... кимнидир уриш... қиз болани... Робертани... келиб-келиб у чўкиб кетаётганда, жонҳолатда қутулмоқчи бўлаётганида урса-я... йўқ, йўқ... Бошқа нима қиласа қиласи-ю, лекин бу иш қўлидан келмайди! Бу ақдга сифмайди!

У похол шляпасини қўлига олди-да, ваҳимали, қўрқинчли ўйларини (у ичида буни шундай деб атади), биронтаси эшитиб қолмасин деб кўчага чиқди. У бу ҳақда ортиқ ўйлай олмас, ўйлашни ҳам истамасди. У унақа одам эмас... Аммо шунга қарамай... шунга қарамай, бу фикрлар... Масалани бундай ҳал қилиш... Агар масалани ҳал қилишни истаётгани умуман рост бўлса... Бу, шу ерда қолиш... кетмаслик, Сондрага уйланишнинг... Робертадан ва барча ишкаллардан... барча ишкаллардан қутулишнинг йўли – фақат бир озгина дадил, ботир бўлса, бас... Э, йўқ!

Клайд шаҳар четидаги кўримсиз, пастқам жойлардан ўтиб, жануби-шарқий томонга қараб кетадиган шосседан юрганча ҳамон марказдан узоқлашганча узоқлашарди; бу ерда у танҳо ўзи бўлгани учун фикрларига ҳеч ким қулоқ солмаётгандек туюларди унга, шу сабабли у bemalol ўйлайвериши мумкин эди.

Қош қорайиб, хонадонларда бирин-кетин чироқлар ёна бошлади. Далалар ва йўл ёқаларидағи дарахт шарпалари бамисоли дудсимон ноаниқ, гира-шира тусга кирди. Гарчи ҳали ҳам кун ис-

сиқ, ҳаво ҳаракатсиз ва жонсиз бўлса-да, Клайд терга пишганча илдам қадам босиб, ҳамон ўйлаб борарди, у бамисоли ўзида қандайдир ички «мен»-ни алдамоқчи, ёқалаб ўтиб кетмоқчи, унинг овозини ўчирмоқчи бўлар, «мен» эса қўзғалмасликни, ўйлашни афзал кўрарди...

Кўриниши совуқ, хилват кўл!

Унинг жанубий қисмидаги ўша оролча!

Ким кўрарди?

Ким эшитарди?

Қуролсоз бекати, у ердан кўлга ёз вақтида автобус қатнайди... (Хатто шуни ҳам ўйлашгача бориб етдими-а? Уҳ, шайтон!) Даҳшатли жойи шунда эдики, бекатни у анави фикрлар туфайлигина эсига олди. Аммо умуман бундай нарсаларни ўйлаганда, обдан ҳаммасини тарозига солиб кўриш керак – шундай қиласман деб ўйлаётганингни ўзинг бўйнингга олишинг ёки бу гапларни бутунлай, бир умр... бир умр миянгдан чиқариб ташлашинг зарур. Лекин Сондра-чи! Роберта-чи! Агар Клайдни ушлаб олишса – электр курсига ўтқазишади! Тўғри-ю, аммо ҳозирги аҳволи ҳам беш баттар эмасми! Ҳал қилиб бўлмайдиган мушкулот-ку, бу! Сондрадан айрилиш жафоси-чи! Ҳар қанча бўлганда ҳам одам ўлдириш...

У ҳаяжондан қизиб тер босган юзларини артди-да, тўхтади, майдон ўргасидаги бир тўп оғочларга кўз ташлади – улар нимаси биландир анави... кўл ёқасидаги... дараҳтларни эслатарди, кетаётган йўлидан ҳам Клайднинг ҳафсаласи пир бўлди. Аллақандай зим-зиё кўча эди. Яхшиси, шаҳарга қайтиш керак. Аммо жанубга, Учинчи миль Кўрфазига ёки Шимолий кўлга олиб борадиган анави йўл... У билан Шейронгача, кейин Крэнстонлар виласигача бориш мумкин. Клайд анави ишдан сўнг... шу йўл орқали кетса ҳам бўлади. Худовандо, ўзинг асрар! Катта мушгир кўли... қо-

ронғида қирғоқдаги дарахтлар ҳам худди мана бу – оғочлардек ноаниқ ва зим-зиё пардага ўралади. Анави иш албатта кечқурунга бориб қилиниши керак. Ана шунда ҳамма гафлатда қолади... хуллас... фақат тентак одамгина бундай ишни... эрталаб, ҳамма ёқ ёруғлигиде... қилиши мумкин. Лекин қоронғида, худди мана шундай гира-шира пайтда ёки яна ҳам кечроқ... Э, йўқ, шайтон урсин-е, бу фикрларга алданмаслиги керак у! Аммо-лекин... у ерда Клайдни ҳам, Робертани ҳам ҳеч ким кўрмайди-ку. Бу оппа-осон иш – кўлга, мана масалан, Катта мушгир кўлигаёқ дейлик... никоҳдан кейинги ўйин-кулги баҳонаси билан боришади... масалан, тўртинчи июлдами... ёки кечроқ – бешинчидан сўнгми, чунки ўша пайтда у ерда одам кам бўлади. Яна, из қолдирмаслик учун асл фамилияси ўрнига... бошқа фамилияни ёздириб қолдириши ҳам мумкин... Шундан кейин ярим тунда ёки эҳтимол эртаси куни эрталаб ҳеч нарсани билмагандай Шейронга, Крэнстонлар чорбогига қайтади-да, соат ўнларда келадиган эрталабки поезддан тушдим, дейдикўяди... Ундан кейин...

Шайтон ақддан оздиряпти шекилли! Нега бу фикр унинг миясидан бир қадам ҳам нари жилмаяпти? Наҳотки, шу ўйлаган нарсасини қила олади у? Э, йўғ-е! Бу иш қўлидан келмайдн! Ахир, Клайд Грифитс буларни, шунчаки эрмак учун ўйлаяпти-ку. Бу ақлга сифмайди. Йўқ, у бу ишни қилолмайди. Бу ақлга сифмайди, ўтакетган мурдорлик бу, келиб-келиб унинг, Клайд Грифитсдек одамнинг шундай разилликка боришини ҳатто тасаввур қилиш ҳам қийин. Аммо бари бир...

Ўша заҳотиёқ у бундай ёвуз жиноят қилишга ўзининг ожиз ҳамда ношуд эканлигини алам билан ўйлаб, руҳи тушиб кетди. Азбаройи ҳеч бўлмаса одамлар ичida юришни истаганлигидан Ликургга қайтишга аҳд қилди.

## XLV БОБ

Иңжиқ, нозиктабиат ва хаёлпарат одамлар, агар бунинг устига уларга ақл-фаросатдан камроқ ато қылган бўлса, қийинчилик ва оғир муаммоларга дуч келганда шундай дақиқалар юз бериши ҳам мумкини, ҳали тахтидан улоқтирилмаган идрок ноилож мувозанатини йўқотиб, худди ўтда қовурилгандек ўзини қўйишга жой топмайди, одам ларзага тушган ва ақл-идроки шу қадар лат еган бўладики ҳеч бўлмаганда маълум вақтгача – телбалик ёки саросима, гумроҳлик ёки хато ундаги қолган барча хусусиятлардан устун келиши турган гап. Бундай пайтларда ирода ва журъат жиддий қийинчиликларга юз тутиб, на унга дош беролмай, на уни енгиб ўтолмай, қандайдир чекиниш, шоша-пиша ундан нари қочиши пайига тушади-ю, ўз ўрнида эса таҳлика ва муваққат телбаликни қолдириб кетади, холос.

Клайднинг ақлинни ҳам душман олдида қочиб бораётган кичик бир пароканда армияга ўхшатиш мумкин эди; у гоҳо жонҳолатда қочиб бораётиб, бир дақиқа тўхтайди-да, қай йўл билан бутунлай тор-мор бўлишдан қутулишни ўйлади, шу даражада таҳлика ва қўркувга тушганидан яқинлашиб келаётган муқаррар ҳалокатдан омон қолишининг энг машъум, энг хатарли йўлларига ёпишади. Клайднинг кўз қарашлари борган сари кескинлашиб, баъзан телбанамо тусга кираарди, у дақиқа сайин, соат сайин яна ўша фикр ва кирдикорларини ўйлар, уларнинг қалтис оқибатларини чамалаб кўрарди. Аммо чап беришга ҳеч қаердан зигирдак ҳам нажот йўқ эди. Шу сабабли яна ўша қарори ёдига тушар, бу қарорни Клайдга гўё газета хабари эслатгандек туюлса-да, лекин аслида бирор йўлинни топаман, деб чеккан азоб-уқубатлари, ҳаяжонли, бенаф уринишлари оқибатида унда

шундай руҳий ҳолат туғилган эди, шу боисдан ҳам бу фикр унинг миясидан сира нари кетмасди.

Чиндан ҳам, мавжудлигини Клайд умрида хаёлига ҳам келтирмаган ва ичкарисига у бирон марта разм сололмаган аллақандай қуи ёки юксак олам гўшаларидан, тириклик ва ўлимдан ташқарида турган, Клайдга мутлақо ўхшамас жонзодлар билан тўлган ўша дунё қаъридан – худди Оловуддин чироғига бехосдан тегиб кетилганда пайдо бўлган жиндек, балиқчи тўрига тушиб қолган кўзачадан бурқсиб чиққан тутунсимон иблисдек, Клайд қаршисида бирдан ўз дилида пинҳон ётган ўша маккор, манфур нияти бош кўтарди: қабиҳ – аммо қудратли, маккор – аммо жозибали, самимий – аммо шафқатсиз бу ният Клайдга даҳшатли хавф солаётган ёвузлик билан (гарчи у бутун кучини ишга солиб унга қаршилик кўрсатаётган бўлса-да) яна бир бошқа ёвузлик ўртасида иккаловидан бирини танлашга мажбур этаётган эди уни, бу ёвузлик қалбини жирканч ва тенгсиз қўрқувга солиб ҳаприқтирса-да, бироқ истиқболда унга эрк, омад ва севги ваъда қилаётган эди.

Шу пайтда унинг миясини тақа-тақ беркитиб қўйилган унсиз хонага ўхшатиш мумкин эди, Клайд ўз иродасига қарши бориб, бу хонада танҳо қолганича ўзининг қандайдир қоронги ибтидоий қисми бўлмиш «мен»нинг сирли ва даҳшатли истаклари ҳамда маслаҳатлари хусусида фикр юритар, ундан на воз кеча олар, на қоча олар ва на бирор иш қилишга ўзида жасорат топа олар эди.

Чунки энди унинг энг ёмон ва энг заиф «мен» и тилга кирган эди. У шундай дер эди: «Роберта-нинг шу пайт, шу дақиқагача сенга қўйиб келаётган, иложсиздай бўлиб туюлган талабларидан қутулишни истайсанми? Унда қулоқ сол! Мен сенга йўл Пасс кўли орқали ўтади.

Сен ўйлайсанки, ҳув анави газета бекордан-бекорга қўлингга тушиб қолдими? Катта мушгир кўлини, кўкиштоб-қорамтири сувни, жанубдаги оролчани, Учинчи миль Кўрфазига олиб борадиган кимсасиз йўлни бир хотирингта келтир. Бундан ортиқ яна сенга нима керак. Бунақа кўлда қайиқ ёки байдарка ағдарилса – Роберта бир умрга ҳаётингдан ўчади-кетади. У сузишни билмайди-ку, ахир! Кўл... ўзинг кўрган, мен кўрсатган... ўша кўл... бу ишга ундан ҳам қулайроқ жой борми, гапирсанг-чи? Хилват ер бўлса, одам кам боради, шунга қарамай унчалик олис ҳам эмас, бу ердан ораси бор-йўғи юз милга етар-етмас. Роберта билан у ёқقا жўнашингларга ҳам баҳона тайёр, ўзларингиз келишиб олганингиздек, аслида таг-туги йўқ тўй одидан саёҳатга чиққандек бўласизлар-қўясизлар. Фақат сен битта иш қилишинг керак – ўзингнинг ва Робертанинг фамилиясини ўзгартиришинг лозим... ёки бундай қилмасанг ҳам бўлади. Майли, Роберта ўзиникини, сен ўз фамилиянгни ёздириб қўяверасизлар. Чунки сен ҳеч қачон унга ўзинг ҳақида, орадаги муносабатларингиз ҳақида гапиришига йўл қўймагансан, Роберта буларни ҳеч кимга айтмаган. Сен унга фақат расмий номаларгина ёзгансан, холос. Шу сабабли ўзларинг келишиб, қаердадир бир ерда учрашсанглар – ким кўриб ўтирибди сизларни, сен Робертани Катта мушгир кўлигами ёки шу атрофдаги бошқа бирор жойгами, худди у билан илгари Фондага борганинглар сингари, индамай олиб кетаверасан».

«Аммо уч-тўрт одам ит ҳасратда зўрға сифадиган хароб бир кулбани айтмаса, Катта мушгир кўлида меҳмонхона йўқ-ку», – деб тўғрилади Клайд ўша заҳоти.

«Айни муддао бу. Демак, у ерда одам кам бўлади».

«Аммо, бизни йўлда, поездда кўриб қолишлари мумкин. Кейин мени Робертанинг ҳамроҳи деб таниб олишади».

«Ахир, сизларни Фонда ёки Гловерсвилда танишдими? Ҳар гал иккаловингиз бошқа-бошқа вагон ва купега тушдингиз, яна шундай қиласизлар-қўясилизар-да, бирор йўқ дермиди? Мўлжалла-рингизга қараганда – махфий равишда никоҳдан ўтмоқчисизлар, хўш, шундай экан, нима учун никоҳдан сўнгги биринчи ойни ҳам пинҳона ўтка-зиш мумкин эмас?»

«Тўғри... тўғри».

«Ҳамма ишлар жойига тушиб кетиб, сизлар Катта мушгир кўлигами ёки яна бошқа бирорта-сигами – бунақа кўллар бу атрофда сон-саноқсиз – борганингизда, bemalol қайиқ олиб, сайр қилишингиз мумкин! Нима, бирор кимсан деб савол берармиди. Сенинг фамилиянг ёки Робертанинг фамилияси остига бир сўз ҳам ёзилмайди. Қайиқни бир соатга, ё ярим кунга ёки бир кунга ижарага оласан-қўясан. Хўяни ҳувиллаган кўлнинг паст томонидаги оролчани кўрган эдинг-ку. Хуштабиат орол эди, тўғрими? Уни томоша қилса жудаям арзиди. Хўш, нима учун тўй олдидан шунақанги маза саёҳатга чиқиши мумкин эмас? Робертанинг боши осмонга етади-ку, қайтага... у шунчалик чарчаб ҳолдан тойганки, қарабисизки, бу ерда, – шаҳар четида шоҳона сайр-тomoша... янги ҳаёт синовлари олдидан мириқиб дам олиш. Қанчалик бамаъни иш эмасми, ахир бу? Шундай бўладики, икковингиз ҳам қайтиб келмайсизлар. Икковингиз ҳам сувга чўкиб кетасизлар, шундай масми, ахир? Сизларни ким кўриб ўтирибди? Фақат бир-икки йўл кўрсатувчи-ю, ҳожатингизни чиқарган қайиқчи билан меҳмонхона хўжайини, холос. Ахир, улар сен киму, Роберта кимлигини қаёқдан билиб ўтиришибди. У кўлнинг қанчалик чуқурлигини эшитган эдинг-ку ўзинг?»

«Лекин мен Робертани қандай ўлдираман, унга қандай қўл кўтараман. Тирноғимни ҳам теккизиш-

ни истамайман унга. Агар у мен билан орани очиқ қилиб, индамай ўз йўлига кетаверишга қўнгандা, ишим шу қадар юришиб кетардики, уни бошқа кўрмасликдан шу қадар баҳтиёр бўлардимки».

«Агар Робертани ташлайдиган бўлсанг ҳам у сени қўйиб бўпти, ўз йўли билан кетади деганингни қара. Агар Робертадан қочиб қутулмоқчи бўлсанг, унда Сондрани, у билан боғлиқ барча нарсаларни ва маза қилиб юрган бутун роҳат-фарогатларингни: амакинг ва унинг дўстлари олдидаги обрўингни, уларнинг автомобилларини, танцалар ва чорбоглардаги сайр томошаларни йўқотасан-қўясан. Ундан кейин нима бўлади? Яна хароб бир жойга борасан! Арзимаган чойчақага итдай ишлайсан! Яна Канзас-Ситидаги баҳтсиз воқеадан кейингига ўхшаш дарбадарликларинг бошланади. Ҳозирги бу баҳт қуши кейин ҳеч қачон ва ҳеч ерда пешонангга қўнмайди. Шундай бўлишини ҳали сен ўзинг истаяпсанми?»

«Ахир, бу ерда ҳам худди Канзас-Ситидагига ўхшаб, бутун орзу-ниятларимни... келажагимни барбод қиласиган, кутилмаган баҳтсиз ҳодиса юз бериши мумкин-ку?»

«Баҳтсиз ҳодиса? Тўғри, юз бериши мумкин... аммо унчалик бўлмайди бари бир. Ҳозир ҳаммаси қўлингда... Сен барини ўзинг истаганча хамирдан қил суургандек ими-жимида қилишинг мумкин. Бемалол қўлингдан келади! Ҳар ёзда қанча-қанча қайиқлар ағдарилиб кетяпти... сайр қилиб юрганлар эса ҳалок бўлишади, чунки кўплари сузишни билишмайди. Ахир, Роберта Олден билан кўлда бирга бўлган кимсанинг сузишни билган билмаганини қайси бир инсон суриштириб ўтирибди? Аслида барча ўлимлар ичida энг осони ҳам шу, сувга чўкиб ўлиш... шов-шувсиз... дод-войсиз... балки кутилмаганда эшкак тегиб кетар ёки тасодифан

қайиқ қиррасини босар... Кейин түя күрдингми – йүк! Үзинг хон, күланканг майдон... Мурда эса сирам топилмайды. Борди-ю, уни топиб, таниб қолишган тақдирда ҳам, наҳотки Клайд ўзини билмасликка олиб (сал бош қотирса-ку, битта баҳона чиқади-қўяди-я, мен бошқа жойда эдим, Ўн иккинчига борищдан аввал бошқа фалон кўлда эдим, деёлмайдими? Нимаси ёмон шундай дейининг? Ишонмайдиган жойи йўқ-ку?»

«Аммо, майли, қайиқни ағдариб юбордим ҳам дейлик, Роберта чўкмай қолса-чи, унда нима бўлади? У қайиққа ёпишиб олганча дод-вой солади, уни қутқариб қолишади ва у Клайднинг... ниятини айтиб беради... Йўқ, мен бундай қилолмайман... истамайман ҳам. Мен уни туртиб юбормайман. Бу даҳшатли, ўта қабиҳ иш...»

«Лекин астагина уриш мумкин-ку... бундай пайтда хиёл туртиб юборилса бас, ҳушидан кетади, шу билан қутуласан-қўясан. Бу аслида ноинсофлик, албатта, аммо Роберта ўз йўлича кетавериши мумкин эди-ку, шундай эмасми, ахир? У бўлса буни хоҳламаяпти, устига-устак, сени ҳам ўз ҳолингга қўймаяпти. Начора, аҳвол шу бўлгандан кейин... буни ноинсофлик дейиш ҳам қийин, шундаймасми? Эсингни йифишириб ол, сени Сондра... сарвқомат Сондра кутяпти... Ликургда у билан давру даврон суриш... бадавлат умр кечириш, эл-юрт орасида юксак мартаба ортириш, бунақа нарсаларга, ўйлама, сен бошқа пайтда ҳеч қачон етишолмайсан... ҳеч қачон... ҳеч қачон! Севги ва баҳт... Ликургдаги истаган юқори табақа кишиларингга teng бўласан-қўясан... Ҳатто амакиваччанг Гилбертдан ўзиб ҳам кетасан».

Бояги овоз аллақандай фирға-ширалиқ... танҳолик... орзу-хәёллар қаърида бир дақиқа тингандек бўлди.

Аммо Клайд ҳозиргина эшитганларини ўйлай туриб, бунга ишонгиси келмасди бари бир. Баҳай-

бат залдан эшитилган бу овоз кучини ё шубҳали васвасми ёки инсофли туйгуларми, ишқилиб, биттаси босиб кетди. Бироқ Клайд Сондрани, унинг рухсорини ёдга солувчи белгиларни, кейин эса Робертани ўйлади дегунча, сирли аллаким яна келиб қолар, қайтага бу гал у баттар айёрроқ ва қувноқ қиёфага кирган бўларди.

«Ҳалиям шуни ўйлаб ўтирибсанми? Чорасини тополмаяпсанми, топмайсан ҳам. Мен сенга ягона тўғри йўлни, нажот йўлини айтдим... бирдан-бир йўли: ўша кўл. Сайр қилиб юриб, қандайдир бир хилват жойни, жануброқ томондаги чуқур, кўздан йироқ қўлтиқчани топиш шунчалик қийинми, ахир? У ердан кейин ўрмон орқали Учинчи миль Кўрфазига ёки Кулранг кўлга ўтиш арзимаган ишқу! Сўнгра у жойдан Крэнстонларникига ўтасан. Ўзинг биласан-ку, у ёқقا кемача қатнайди. Ола, қўрқиб ўтирганингни қара! Журъатсизлик ҳам шунча бўладими. Ўлиб-тирилиб излаётган нарсаларинг: гўзаллик, бойлик, эл-юрт орасидаги мартаба... шуларга эга бўлишинг, бутун моддий, маънавий хоҳишларингни қондиришинг мумкин-ку, ахир. Акс ҳолда – қашшоқлик, дилхасталик, ит азоби меҳнатдан бошинг чиқмайди...

Истаганингни танла! Кейин, шунга қараб ишингни қиласверасан. Танлашинг керак! Керак! Керак!»

Ҳайҳотдек хонанинг қоронги бурчагидан эшигиллаётган шивир-шивир овоз шу билан тинди.

Клайд бу овозни аввалига даҳшатга тушиб, ижирғаниб тинглади-ю, кейин эса, ҳар қанча ёмон ният ва кирдикори бўлмасин, баҳтсизликдан кутулишда инсоннинг ҳатто энг ёвуз, энг мушкул режаларни тузишга ҳам ҳақ-хуқуқи бор, деган қабилда донишманларча эҳтиrossиз фикр юритадиган вазмин кишилардек хотиржам ўтириб тинглай бошлиди. Клайд маънавий ва жисмоний жиҳатдан

майшатга, қуруқ хаёлга мойиллиги ва ўзидаги бу хоҳишни жиловлай билмаслиги оқибатида охири шу даражада гангиб қолдикি, назарида ўша йўл билан Робертадан қутулиш осондек туюла бошлиди. Хўш, шундай қилиш нега мумкин бўлмас экан? Ахир, ўша овоз айтганидек, бирдан-бир оқилона, уддаласа бўладиган йўл ҳам шу-ку... фақат бир марта ёвузлик қиласи-ю, кейин бутун истаклари, хаёллари рўёбга чиқади. Аммо Клайднинг салга ўз-гарадиган, ўта бекарор иродаси, устига-устак фоят ожиз бўлганлиги учун мушкул муаммони бундай йўл билан ечишга... ўша пайтда ҳам, кейинги ўн кун ичида ҳам унинг қурби етмади.

Аслини олганда, ўзи билан ўзи овора бўлиб қолган Клайд бундай қадам босишига ботина олмасди ва ботинмас эди ҳам. У ҳар галдагидек то уни мажбурлашмагунча қимирламай кутиб ўтираверарди. Ёки бундай ваҳший қут учиралигиган фикрдан воз кечиши керак бўларди. Аммо худди шу пайтда унга анча-мунча номалар келди, еттитаси Робертадан, бештаси Сондрадан, биринчилари фам-андуҳга тўла, Сондра юборгандар эса ҳаяжон ва қувончлардан иборат эди ва бу номалар гўё Клайд олдида турган ваҳимали жумбоқнинг икки зид томонини яқъол кўрсатиб турганга ўхшар эди. Робертанинг ёлворишилари қанчалик самимий ва пўписа аралаш бўлишига қарамай, Клайд ҳатто телефонда жавоб беришни ҳам ўзига ортиқча биларди; унинг фикрича, агар жавоб берса – Пасс кўлидаги баҳтсиз ҳодисага ўхшаш хунук оқибат, яъни Робертанинг ўлими тобора тезлашиб кетаёт-гандек туюларди.

Айни пайтда у Сондрага ёзган қатор-қатор хатларида ўзининг ўтли иқрорларини қайта-қайта баён этарди...

Унинг қадрли, унинг ажойиб маъшуқаси!.. Ўн тўртинчи июлда эрталаб Ўн иккинчи кўлга бориш-

ни шунчалар орзу қилдики... У телбаларча Сондранинг васлига муштоқ! Лекин афсуски, деб ёзар эди у (Клайд шу қадар эсанкираб қолганлигидан ҳатто ҳозир ҳам нима қиласини билмасди), иши билан боғлиқ баъзи сабаблар уни яна бир ёки икки-уч қунга ушлаб қолиши мумкин, ҳозирча у анигини билмайди, бироқ иккинчи июлдан кечикмай, ҳаммаси аниқ бўлиши билан дарров хат ёзади. Шу сўзларни ёзаётиб, Клайд ўзича: нима сабаблигини Сондра билганда эди!.. Қани энди у билганда эди!.. – деб қўйди. Аммо бу хатни туттагандан сўнг ҳам – айни вақтда у Робертанинг ялиниб ёзган охирги мактубини жавобсиз қолдирса-да – бари бир: бу – ҳали Роберта билан бирга кетишдан умидворман деган сўз эмас, борди-ю, бирга кетган тақдирда ҳам, уни ўлдираман деган сўз эмас ахир, деб ўзига ўзи таъкидлашда давом этарди. Шу қадар машъум жиноят қилишни мўлжаллаётганини ақалли бирон марта у вижданан – ёки тўгрисини айтганда, очикдан-очиқ, дадил туриб, вазминлик билан бўйнига олмаган эди. Аксинча, ўша қатъий қарори кўнглида қанчалик ўрнаша борган сари, бу фикр унга шу қадар жирканч ва мудҳиш кўринар, жирканч ва деярли иложсиз кўринган сари уни қачонлардир амалга ошириш сира ақдига сифмайдигандек туюларди. Тўгри, баъзи дақиқаларда, одати бўйича ўзи билан ўзи баҳслалиб, ахлоқ ва адолат қўллаши мумкин бўлган хилма-хил жазолардан ҳайиққанидан бутун вужуди ларзага тушганча, қисталанг ва дўқлари билан уни обдан безор қилиб юборган Робертани Катта мушгир кўлига тинчлантириш учун олиб борсам ҳам бўлади, деб ўйлаб кетарди (яна ўзига ўзи баҳона, важ, ҳийла-найранг ишлатмоқчи бўлар), бундан бўён нима қилишни яхшилаб пишитиб олмоқ учун яна бир оз муҳлат ундиришни кўзларди.

*Нажомт ийли күл орқали ўтади.*

*Нажомт ийли күл орқали ўтади.*

Аммо күлга боргандан сүнг – ўша ўзи ўйлагандек иш тутгани маъқулми ёки йўқми... буни айтиш амри маҳол. Эҳтимол у Робертанинг фикрларини ўзгартириб юбора олар. Ҳарқалай, нима бўлганда ҳам, Роберта жудаadolatcizlik қилияпти, у Клайдни ҳаддан ташқари кўп қийнаяпти. Сондра ҳақидаги қалтис хаёлларга бутунлай шўнғиб кетганидан, у, Робертани бекордан-бекорга арзимаган нарсадан пашшадан фил ясагандек катта бир фожиа чиқаряпти, деб ҳисоблар эди. Очифини айтганда Роберта ҳам худди Эстанинг аҳволига тушган, холос. Аммо Эста менга уйланасан, деб бирорни зўрлагани йўқ-ку. Хўш, Клайднинг ота-оналари бўлмиш қашшоқ ваъзгўйлардан, Оденлар – қашшоқ фермерларнинг қай ери ортиқ? Робертанинг ота-онаси нима дер экан, деб нега мунча хавотирга тушишмаса, ахир, Эста ота-онамга нима бўларкин, деб ҳатто хаёлига ҳам келтирмаган эди-ку?

Роберта унга ҳар қанча айб қўйган тақдирда ҳам, унинг ўзида айб йўқми сира? Тўғри, Клайд сўзсиз уни ўзига шайдо қилишга, йўлдан уришга интилди, истаса-истамаса – бор гап шу, аммо бу билан Робертанинг айби ювилиб кетармиди? Агар у шунчалик ахлоқли экан, нега унда Клайдга қаршилик кўрсатмади? Йўқ, у бундай қилмади. Клайд туфайли бошига тушган баҳтсизликни айтадиган бўлса, хўш, у Робертани қутқариш учун қўлидан келганча ҳамма ҳаракатини қилди-ку, ахир? Бунинг устига топишининг мазаси йўқ. Аҳволи эса ундан беш баттар. Йўқ, Робертағаям худди Клайд сингари қанча дашном берилса арзийди. Аммо шунга қарамай, Роберта Клайдни яланг чатоқ йўлга ниқтагани-ниқтаган, уйланасан деб оёғини ти-

раб олгани-чи, ваҳоланки, у ўз йўли билан кетаверишга кўнса-ю, дарвоқе, Клайд ёрдамида шундай қилишга уриниб кўрса нима қипти. Клайдни ҳам, ўзини ҳам бу азоблардан қутқарган бўларди-я.

Йўқ, бунга кўниш қаёқда, ҳе, унда Клайд ҳам уйланишни истамайди, гап шу – вассалом! Клайдни мажбур қиласман, деб хом хаёллик қиляпти у. Йўқ, йўқ, овора бўлади бари бир!

Баъзан кайфияти шундай қўтарилган пайтларда у ўзини ҳамма нарсага қодирдек ҳис этар, Робертани ҳам осонлик билан чўктириб юбора оламан, бунга унинг ўзи айбдор бўлади, деб ўйлар эди.

Кейинроқ эса, билиб қолишса – эл-юрт нима деркин, қандай чора кўришаркин, умрим давомида виждоним сўроғига ўзим нима дейман, қабилидаги даҳшатли фикрлар яна миясига қайтиб келаверар эди. Шунда Клайд Ликургда қолишни ўзи қанчалар истаса ҳам, аммо қўлидан бирон иш келмаслигига, демак бу ердан қочиши кераклиги-га ишонч ҳосил қилди.

Шу алпозда якшанбада Роберта хатини олганидан бери ҳам орадан сешанба, чоршанба ва пайшанба кунлари ўтиб кетди. Пайшанба куни кечқурнга бориб (бутун кун бўйи хавотирли фикрлар унга ҳам, Робертага ҳам азоб бериб тинчитмади) Клайд ушбу номани олди:

«Бильц, чоршанба, 30 июнь.

Азизим Клайд!

Сени огоҳлантириб қўйяпман, агар менга жума куни тушгача телефон қоқмасанг ёки ўшангача хатингни олмасам, унда Ликургга ўша оқшомдаётк етиб бораман ва мени қай аҳволга согланингни одамлар бир билиб қўйисин. Мен энди бир соат ҳам кутиб туролмайман ва бошқа азобга чидолмайман. Минг афсуски, шундай қилишга мажбурман, чун-

ки худди сувга тушгандек жим бўлдинг-кетдинг, шанба куни – учинчи июль, мен эсам мақсад ва режаларинг қандай, мутлақо бехабарман. Гулдай умрим хазон бўлди, сеники ҳам нуқсонсизлигича қолавермас, деб ўйлайман, аммо бунга фақатгина мен айбдор эмасман. Сенинг заҳматингни енгиллатиш учун қўлимдан келган ҳамма ишни қилдим, ота-онам ва дўстларимнинг, сенга қадрли бўлган ҳар бир кишининг ҳам диалини оғритиш менга жудаям қийин, албаттa. Аммо мен энди бир соат ҳам кутмайман ва азоб чекмайман.

*Роберта».*

Клайд хатни қўлида ушлаганча, энди ҳаракатимни қилмасам тамом, деган фикрдан довдираб қолди. Робертанинг келиши аниқ! Агар Клайд уни кўндириб, бир амаллаб ўша ерда ушлаб туролмаса, эртага иккинчи – Роберта Ликургда бўлади... Бироқ Клайд иккинчидаги ҳам, учинчидаги ҳам у билан бирга кетолмайди, фақат тўртинчи июлдан кейингина бирга кетиши мумкин. Байрам кунлари қаёққа қарасанг – лиқ-лиқ одам, ахир, икковларини кўриб, таниб қолишса-чи... Ваҳоланки, бу ерда ипидан игнасигача ҳаммасини пинҳон тутиш зарур. Тайёргарлик кўриш учун Клайдга тағин бир оз муҳлат ҳам керак. Энди у тезлик билан ҳаммасини ўйлаб чиқиб, кейин ҳаракатини қилавериши даркор. Эй, худо-ей! Тайёрланиш керак. Балки Робертага телефон орқали: бетоб эдим ёки пул топиш дардида сарсон бўлиб юрган эдим, дейдими ёки шунга ўхшаш бирон важ-корсон айтиб, мактуб ёзолмаганимнинг боиси шу эди, дейдими... бунинг устига худди аксига олгандек, амаким мени айни шу тўртинчига Ўрмонга таклиф этиб қолди-я, дейдими. Амакиси! Амакиси! Намунча ҳадеб уни рўкач қилавермаса. Амакиси билан у яна

күришадими-йўқми, бунинг Клайдга ёки Робертага нима аҳамияти бор. Ахир, Клайд Ликургдан бутунлай кетмоқчи-ку, у Робертага шундай деган. Энг яххиси – Робертага: амакимнинг ҳузурига бориб, кетаётганимга нимадир баҳона кўрсатаман, балки орадан бир йиллар ўтгач, яна қайтиб келарман, деб айтаман, дегани маъқул. Роберта бунга ишонади. Ҳар қандай шароитда ҳам у Робертага нимадир дейиши зарурки, у тинчлансин ва жуда бўлмаганда бешинчигача, Клайд қатъий бир қарорга келгунча Бильцда тура турсин... Ҳозирча, ҳадеб икки қайиқнинг бошини ушлайвермасдан, ё у йўлни ёки бу йўлни танлашга ҳозирлик кўриши керак. Ё у йўлни ёки бунисини...

Клайд бошқа ўйлаб ўтирамай, ўша заҳотиёқ шу орадаги яқин телефонга югурди, бу ердан уни деярли ҳеч ким эшитмас эди. У Робертани чақириди-ю, бу сафар узундан-узоқ авраб, чалфитиб, тил-ёғламалик қилиб гап уқтира кетди; у қаттиқ касал бўлиб, шамоллаб қолдим, уйдан бир қадам ҳам жиломмадим, шу сабабли телефонга боролмадим, деб Робертани ишонтиришга тушди... кейин қачонлардир бу ерга қайтиб кела олиши учун амакисига ҳам бирор важ кўрсатмоқчи эканини айтди... У ялиниб-ёлвориб, деярли эркалаётган оҳангда гапирап, Робертадан шу кунларда қай аҳволга тушганимни тушунгин, деб илтимос қиласарди, хуллас, у сусткашлиги ва дом-дараксиз кетганининг аллақандай сабаблари борлигига охири Робертани ишонтирибгина қолмай, балки унга ўзининг янги режаларини ҳам баён этиб берди. Роберта яна олтинчигача бир амаллаб чидаши керак, ўшанда, албатта, қаерда деса ҳам майли, Гомердами, Фондадами, Ликургдами, Литл-Фолздами... хоҳлаган жойида уни Клайд кутиб олиши аниқ. Аммо ҳаммасини улар агар сир тутмоқчи бўлишса, унда Клайд Робертага олтинчи куни эрталаб Фондага етиб

келишини маслаҳат беради, ана шунда кундузги поезд билан Утикага кетиш мумкин. У ерда эҳти-мол тунаб қолишар, – телефонда режа тузиб, гапни бир ердан чиқариш амри-маҳол, албатта, – ўшанда маслаҳатлашиб олганларидек иш тутавериша-ди. Бундан ташқари у, нима қилишлари тўғриси-да ўзи қандай фикрдалигини ўша учрашувда ба-фуржа ўтириб гапириб бериши мумкин. Клайдда ҳозир бир ният туғиляпти – никоҳдан олдинми ёки кейинми, бу майли, Робертанинг ихтиёрида, кичик бир саёҳатга чиқишича қалай бўларкин... аммо-ле-кин... бир ёзилиб, маза қилиб келишар эди... (Шу сўзларни айтаётганда Клайднинг овози титраб, тиззлари ва қўллари қалтирай бошлади, бироқ Роберта унинг тўсатдан бундай саросимага тушиб қолганини телефонда била олмас эди.) Роберта уни ҳозир ортиқча сўроққа тутавермаслиги керак. У дилида йиғилиб қолган гапларини телефонда ай-толмайди бари бир. Лекин олтинчи куни тушга яқин у Фонда вокзалида, албатта бўлади, Роберта уни кўриши биланоқ Утикагача чипта олиши, кей-ин қўшни вагонга чиқиб ўтириши лозим. Роберта агар уни поезд жўнагунча бекат саҳнида кўрмаса, унда Клайд шу ердалигини билдириш учун у туш-ган вагонга кириб ўтиб кетади, шу билан гап та-мом: аммо Роберта у билан зинҳор гаплашмаслиги керак. Утикада Роберта жомадонини юк сақлаш хонасига топширади. Клайд эса орқасидан хилват бир муйилишгача эргашиб боради; кейин Робер-танинг буюмини олиб келади-ю, сўнгра биргала-шиб қайсиdir бир кўздан чет меҳмонхонага қа-раб жўнашади, қолган нарсаларнинг барини эса Клайднинг ўзи тўғрилайди.

Ҳаммасини у Клайд айтгандек қилиши керак. Ахир, озми-кўпми унга ҳали ишончи бордир! Унда Клайд эртага – учинчида, кейин эса олтинчи куни эрталаб, албатта, қўнфироқ қиласди; ана шунда

ишлиар жойидалиги: яъни Робертанинг жўнаётгани ва Клайд ҳам ўзи айтган ерида бўлишинн бир-бирларига хабарлашади. Нима? Кичик бир сандиқча олмоқчиман дейсанми? Кичкинагина? Марҳамат, зарур бўлгандан кейин оласан-да Аммо мен сенинг ўрнингда бўлсам, юкни кўпайтириб ўтирмас эдим ҳозир. Бирор-бир жойга ўрнашиб олганимиздан сўнг майда-чўйдаларингни сўраттиришинг мумкин-ку, ахир.

Клайд шуларнинг ҳаммасини кичкина чет бир дорихонадаги телефон будкасидан туриб гапирав (доричи эса орқа хонада ўтириб, банка ва шиша-лари орасида кўмилганча аллақандай бемаъни бир романни ўқишига тушиб кетган эди), гўё шу топда эсанкираб, довдираб, даҳшатта тушган Клайднинг ўзи эмас, баҳайбат бир жин Клайднинг хотиржамгина турган миясига кириб олиб, кейин яна унинг елкаси ортига туриб, чинакамига Клайднинг тиллари билан гапираётгандай туюларди.

«Сондра икковинг бирга бўлган ўша кўлга бор!

«Ликург» меҳмонхонасиданми ёки вокзалданми у жойларнинг йўл кўрсаткич китобчасини топ.

Кўлнинг жанубий томонига сузиб боргин-да, кейин у ердан жанубга қараб юр.

Крам кўлида ва шу атрофдаги бошқа кўлларда ўзинг кўрган, салга афдарилиб кетадиган, таги юмaloқроқ қайиқлардан бирини танла.

Кейин таниб қолмасликлари учун бошқа янги шляпа сотиб ол, сўнгра уни сувга ташлаб кет. Қаердан харид қилинганилигини билдирумаслик учун ҳатто астаридаги белгисини юлиб олишинг ҳам мумкин.

Ҳамма буюмларингни сандиқчага жойлагину, лекин уйингда қолдир; мабодо ишинг чатоқлашса, бу ерга қайта солиб уни оласану яширинасан-кетасан.

Бутунлай кетишни мўлжаллаб эмас, фақат чорбоқча, Ўн иккинчи кўлга боргандা зарур бўладиган нарсаларингнигина олиб кет; агар сени Ўн ик-

кинчи күлдә күлгә туширишса, сен бошқа бирон ёқقا эмас, фақат ўша томонга отлангандек бўлиб кўринасан.

Робертага, мана шу саёҳатдан қайтиб келгани-миздан сўнг сенга уйланмоқчиман, аммо ундан олдин уйланолмайман, деб уқтири.

Агар керак бўлса, фақатгина ҳушидан кетка-зиш учун, салгина... сувга тушганда қийналмай чўкиб кетиши учун секин бир ур.

Кўрқма!

Унчалик кўнгилчан бўлма!

Сени фақат Шейронда ёки Учинчи миль Кўрфа-зизда кўришлари учун ва сен ўзинг Рэкет ёки Узун кўлидан, ё Ликургдан келдим дея олишинг учун ўрмонни кундузи эмас, тунда кесиб ўт.

Ўзингни бошқа ном билан ата, қўлингдан келганча дастхатингни ўзгартири.

Ишингнинг муваффақиятли чиқишидан кўнглингни тўқ тут.

Роберта билан оҳиста, жудаям оҳиста – ипак-дек бўлиб, эркалаб туриб, ҳатто уни суюб гаплаш. Робертани ўз ихтиёрингга бўйсундираман десанг, шундай қилишинг керак».

Клайднинг иккинчи ёвуз вужуди шу тахлитда фикр юритарди.

## XLVI БОБ

Мана, сешанба – 6 июль ҳам етиб келди, тушпайти, Утика билан Фондани бир-бирига уловчи темир йўл станциясидаги саҳн; Клайдни шу ерда кутиб туриш мақсадида Роберта Бильц поездидан тушди, икковлари Утиага жўнайдиган поезд эса яна ярим соатдан сўнг келиши керак. Орадан чорак соат вақт ўтгач, Клайд ҳам жануб тарафдаги ён кўчаларнинг биридан чиқиб, станцияга томон кела бошлади, уни Роберта кўролмас эди, Клайд

бўлса вокзалнинг фарбий муйилишини айланиб ўтди-да, уюлиб ётган саватлар панасида тўхтаб, уни кузата бошлади. Қанчалик озиб-тўзиб кетибди у! Устидаги эгни ҳам бир ҳолатда, Сондраникининг акси: ҳаворанг сафар костюми-ю, шу учрашувга мўлжаллаб атайлаб сотиб олинган қулранг шляпа, буни кўрган Клайд, ўзига Сондра таклиф этаётган ҳаётдан кўра, бу – мутлақо бошқача, ночор ва оғир ҳаёт эканлигини дарров сезди. Роберта ўз хаёлида Клайдга тегаман дебоқ, уни Сондрадан воз кечишига мажбурламоқчи бўляпти, бу никоҳ тузогидан эса Клайд Сондра ва уни эсга солувчи барча назокатларни унугандагина қутулиши мумкин, шунда ҳам омади келса агар. Бу икки қизнинг Клайдга нисбатан шунчалар бир-бирига ёт икки хил муносабатда бўлишаётгани қизиқ: Сондрада нима истасанг бор, у ҳаммасини ҳадя этмоқчи-ю, аммо эвазига ҳеч нарса сўрамаяпти; Роберта бўлса – ҳеч балоси йўғу, бироқ талаб катта.

Уни галати бир аламнок ранжиш туйгулари қамраб олди-ю, Пасс кўлидаги анави кишини аллақандай меҳр ва майл билан эслади, юрагининг бир бурчида унга муваффақиятлар тилади. Балки у ҳам худди шу ахволга тушгандир. Балки у, охирги ноиложликдан шундай қилгандир, шу боисдан ҳам уни топишолмаган. Клайднинг бутун асабияти таранглашди. Кўз қарашлари фамгин, қаҳрли ва кўпроқ хавотирли тус олди. Бу гал ҳам иш ўнгайгина кўчармикан?

Мана у Роберта билан бир перронда турибди (бу – Робертанинг бетиним, мантиқсиз талабларининг оқибати), энди у тўрт кун давомида – Роберта иккаласи телефонда гаплашган вақтдан бери (агар очишини айтса – кейинги ўн кунлардан бери) ўйлаб юрган ўз режасини қандай қилиб дадил, тезда амалга ошириш ҳақида бош қотирмоги лозим.

У бир қарорга келдими, энди бунга ҳеч нарса түсиқ бўлолмаслиги керак. У ҳаракат қилмоғи зарур! Юраксизлиги оқибатида ўйлаган режаси барбод бўлиши мумкин, йўқ, у бунга йўл қўёлмайди.

У Робертага кўриниш учун олдинга юрди ва унга гўё дўстона тарзда «Мана кўрдингми, мен шу ердаман», деяётгандай маънодор қараб қўйди. Аммо бу нигоҳ остида нималар яширинмаган эди! Агар Роберта бу филоф замирига чуқурроқ разм сололганда ва Клайднинг маъюс, кўрқинчли кайфиятини сеза билганда эди, унда у шоша-пиша жўнаб қолган бўларди. Лекин ҳозир, Клайднинг чиндан ҳам келганини кўргач, кўзларига яширинган фамгин шарпа йўқолди, осилиб тушган лаблари асли ҳолига келди; ўзини танимаганга солса ҳам бутунлай чиройи очилиб кетди, Клайд тайинлаганидек Утикагача чипта олиш учун ўша заҳоти кассага қараб юрди.

Ниҳоят, ниҳоят Клайд келди-я, деб ўйлар эди Роберта. Энди у Робертани олиб кетади. Шу боисдан унинг қалби миннатдорчилик туйгулари билан тўлиб-тошаётган эди. Ахир, улар кам деганда энди етти ёки саккиз ой бирга яшашади. Муросай мадора қилиш учун одоб ва сабр-тўзим керак ҳали унга, лекин ҳарқалай бу иш унинг қўлидан келади. Бундан буён у бутун вужуди билан эҳтиёткор бўлмоғи – Клайднинг ақалли хиёл жаҳлини чиқара迪ган бирор-бир гап айтмаслиги, ножӯя ишларга йўл қўймаслиги керак, ахир, ҳозир унинг кайфияти ёмон бўлиши табиий-ку. Лекин, ҳарқалай, Клайд бир оз ўзгаргандек кўриняпти... эҳтимол унинг Робертага энди меҳрибончилиги ошар, кўпроқ раҳми келар, ниҳоят, у тақдирга чин дилдан ўз хоҳиши билан бўйсунгандга ўхшаб турибди-ку. Яна, айни пайтда унинг эгнидаги оч кулранг костюми, янги похол шляпаси, ялтираб турган ботинкаси ва қора чарм жомадонини, Клайд шу ерда ғалати пари-

шонхотирлик ва калтафаҳмликка йўл қўйган эди, тасма билан яқиндагина сотиб олган фотография аппаратининг таглик уч оёғини каноп матоли ги-лофга солинган теннис ракеткасига қўшиб (асосан, «К. Г.» деган ўз исми шарифини яшириш учун) жомадонига боғлаб қўйганини кўрганда, Роберта Клайдга нисбатан илгаригидек назокат ва интиқлик сезди ўзида. Унинг ташқи қўриниши ҳам, табиати ҳам Робертага ёқар эди. Ўзига нисбатан ҳозирги бепарволигидан қатъи назар, у ҳарқалай Робертанинг Клайди эди.

Роберта чипта олгач, буни кўрган Клайд ҳам ўз навбатида кассага борди, кейин яна Роберта томонга маънодор қилиб қараб қўйди, гўё шу қараши билан ҳаммаси жойида демоқчи бўлаётгандай эди, сўнгра саҳннинг нариги бурчига қайтиб борди; Роберта ҳам боя турган жойига қайтди.

(Эски қишлик жигар ранг костюм ва қалпоқ кийиб жигар ранг қофозга қуш қафасини ўраб олган анави чол нега Клайдга бунақа қарайптийкин? Наҳотки, у бирон нарсани сезган бўлса? Наҳотки, у Клайдни таниса? Балки у Ликургда ишлагандир ва уни илгари кўргандир?)

Бугун Утикандан бошқа похол шляпа сотиб олиш зарур – ишқилиб, шу эсидан чиқмасин-да – астарига ўша ердаги магазиннинг белгиси туширилган похол шляпа бўлиши керак; уни ҳозирги бошидагисига алмаштириб кийиб олади. Роберта унга қарамай турган пайтда эскисини шарт олади-ю, жомадонидаги лаш-лушлари орасига яширади. Бунинг учун Утикага етиб боришганда, қаердадир, эҳтимол, вокзалдами, кутубхонадами... Робертани бир оз вақтга якка қолдирса бас, у дастлаб шундай режа тузди, кейин уни қайсицир бир кўримсиз меҳмонхонага олиб боради-да, мистер Карл Грэхем ўз рафиқаси билан, ё Клифорд Голден ёки Геринг (фабрикада шундай фа-

милияли бир қиз бор эди) деб ёздиради. Ана шунда уларнинг изига тушишган тақдирда ҳам, ҳа, фалон исмли киши билан кетган экан, деб тахмин қилишади-кўйишиади.

(Узоқдан паровоз чинқириги эшишилди. Ҳадемай поезд етиб келиши керак. Клайд соатига қарди, ўн иккидан йигирма етти дақиқа ўтибди.)

Утикада Робертага: самимий, эркала муюмала қилсинми ёки совуқ бир вазиятда тураверсинми, Клайд мана шуни ўйлаб олиши керак. Тўғри, телефонда Роберта билан жуда майин, дўстона оҳангда гаплашди, бошқа иложи ҳам йўқ эди. Яхиси, муюмаласини ўшандай давом эттиравергани маъқул, акс ҳолда Роберта жаҳали чиқиб, шубҳага тушиши, ўжарлик қилиши мумкин – унда Клайдга жуда қийин, мушкул бўлади.

*(Бу поезди қургур намунча имилламаса-я?)*

Аммо-лекин Клайд хушмуомала бўламан деб роса қийналса ҳам керак, чунки, сирасини айтганда, Роберта ҳозир унга бўйруқ беряпти, айтганимни бажарасан, деб талаб қўйяпти, шундай экан, Клайд унга қандай қилиб яхши муюмалада бўла олсин! Э, лаънати-е! Тўғри-ю, аммо Клайд дуруст муюмала қилмаса-чи?.. Унда Роберта тўсатдан ниятини пайқаб қолиб, у билан бирга сайрга чиқишдан бош тортиши ва бор режаларини йўқقا чиқариб юбориши мумкин...

*(Тизза ва қўллари нега бунча титрамаса-я!)*

Э, бўлмаган гап, ҳали ўша нияти амалга ошадими-йўқми, буни ўзи ҳам тузукроқ билмайди-ю, Роберта қандай қилиб шубҳага тушиши мумкин, хўш? Унинг қарори қатъий: Роберта билан ҳеч қаёқقا кетмайди, ҳаммаси шу ерда ҳал бўлиши керак. Эҳтимол кечагина ўйлаб қўйганидай, қайиқни афдариб юбормаслиги ҳам мумкин, аммо у бари бир Роберта билан кетмайди.

Мана, поезд ҳам етиб келди. Роберта жомадонини қўлига олди. Ҳозирги аҳволда унга жомадони оғирлик қилмасмикин? Ҳойнаҳой, оғирдир. Ҳа, уят бўлди жуда. Бунинг устига бугун кун росаям иссиқ. Ҳарқалай, кўздан чет жойга чиқиб олишгандан сўнг Клайд унга кўмаклашиб боради. Роберта Клайд томонга қарайпти – унинг кетаётганига ишонч ҳосил қилмоқчи шекилли; бу чиндан ҳам Робертага хос одат эди, кейинги кунларда у Клайдга шубҳа билан, гумонсираб қарай бошлади. Ана, вагон тўрида, соя томонда бўш жой бор экан. Ёмон эмас, ўтиrsa бўлади. Клайд ўша жойга ўрнашиб олади-да, деразадан томоша қилиб кетади. Фонданинг орқарогида, атиги икки милча нарида Ликургдан, фабрика ёнидан ўтадиган Могаук дарёси бор. Ўтган йили тахминан шу пайтларда улар Роберта иккаласи ўша дарё соҳилларида сайр этишган эди. Лекин бу хотирот ҳозир унга ёқимсиз туюлгани учун ҳалигина сотиб олган газетасига кўз югуртирди, худди юзига қалқон қилгандек газета ортига яширинди-да, ақди ҳушини ҳозир эгаллаб турган нарса – Катта мушгир кўли атрофидаги жойларни бутун икир-чикирлари билан яна қайта кўз олдига келтира бошлади: Роберта билан ўшанда телефон орқали ора очди бўлиб қатъий гаплашиб олганларидан сўнг, бу ерлар уни дунёдаги бошқа ҳамма географик жойлардан ҳам кўра кўпроқ қизиқтира бошлаган эди.

Жума куни, ўша гапдан кейин у «Ликург» меҳмонхонасига кирди-да, Катта мушгир ва Узун кўллари атрофидаги пастқам ерларда жойлашган меҳмонхоналар, чорбовлар, мусофирихоналарни ва шунга ўхшаш жойларни таърифловчи учта ҳар хил йўл кўрсаткич китобчалардан олди. (Қани энди амал-тақал қилиб Катта мушгир кўлидаги ҳу анави йўл кўрсатувчи киши айтган бутунлай кимса-

сиз кўлларнинг биронтасига етиб борилса... Фақат, ҳойнаҳой унақа кўллардан қайиқ деган нарсанинг уруғи ҳам топилмаса керак!) Кейин шанба куни у вокзалда яна тўртта йўл кўрсаткич китобчаси-ни олди (улар ҳозир ҳам чўнтағида турибди). Шу китобчаларнинг ҳаммаси шимолга, Катта мушгир тарафга олиб борадиган худди мана шу темир йўл ёқаларида сон-саноқсиз кичик кўллар ва меҳмонхоналар борлигини тасдиқлар, агар Роберта истаса, Катта мушгир ёки Ўтлоқзор кўлига боришдан аввал шу меҳмонхоналарнинг биронтасида бир-икки кун ёки жуда бўлмаса бир кечага қолишлари мумкин эди. Клайд, айниқса, Ўтлоқзор кўлига қўпроқ диққат билан қарай бошлади – китобчада айтилишича, у ниҳоятда чиройли ва бекатнинг шундоқ яқингинасида эди; у ерда бир эмас, учта ўртамиёна мусофирихона бўлиб, икки киши учун бир ҳафта турилса, атиги йигирма доллар ҳақ тўланарди. Демак, агар иккалови бир кеча тунашса, беш доллардан ошиқ сарфлашмайди. Шундай қилиб, у кейинги кунларда калласида пишитиб юрган: бегона жойларга кетишдан олдин албатта бир оз дам олишинг лозим, деган гапини айтади Робертага; агар Утикага келганларидан сўнг биринчи куни кечқурун ёки эртасига эрталаб. Ўтлоқзор кўлига бориб, ўша ерда тунашса, у ҳолда китобчада ёзилишича, жуда арzonга тушишлари – йўл харжи-ю ва бошқа майда-чуйда харажатларни қўшиб ҳисоблагандა ўн беш долларча сарфлашларини ҳам айтади. У буни ширингина бир саёҳатча, никоҳдан олдинги ўзига хос тўй сайр-томушаси, деб тушунтиради Мабодо Роберта аввал никоҳдан ўтайлик, дейдиган бўлса, бунга сира ҳам бўш келмаслик керак, чунки, бундай қилиш мумкин эмас.

*(Ҳув ана, тепалик этагида кўзга чалинаётган дарахтзорга қараб бешта қўш учиб кетяпти...)*

Фақат кўлда сайр этиш учун, бир кунга, етмиш миль йўл босиб, Утикадан нақ Катта мушгирга бо-риб келиш шарт эмас, албатта. Бу Робертага ҳам, бошқа ҳар қандай кишига ҳам эриш туюлади. Бу ҳатто унда шубҳа туғдириши ҳам мумкин. Балки, яхшиси, ҳали у бари бир шляпа сотиб олиш учун Утикада бир оз вақтга Робертани ёлғиз қолдиришга мажбур бўлади, биринчи кечани худди шу Утикада, қайсиdir оддийгина, арzon-гаров меҳмонхонада ўтказишгани маъқул кўриняпти, у шундан кейин Ўтлоқзор кўлига боришни таклиф қилса ҳам бўлади. У ердан эса эртасига эрталаб Катта мушгир кўлига қараб жўнашади. Клайд Катта мушгир чиройлироқ... ёки Учинчи миль Кўрфазига (аслида у оддийгина бир қишлоқ) борамиз, ўша ерда ни-коҳдан ўтиб, йўл-йўлакай томоша қилиш учун Катта мушгирга ҳам бир бош суқиб ўтамиз, дейиши мумкин. У, сенга кўлни кўрсатмоқчиман, сўнгра сени ва ўзимни бир-икки расмга туширмоқчиман, деб айтади. У аппаратни аслида шу мақсадда... кейинчалик Сондрани ҳам расмга тушириш учун атайлаб олган.

**Қанчалик қора ният бу!**

*(Ана, ям-яшил адир ён бағрида тўйққизта оқ ва қора сигир ўтлаб юрибди!)*

Жомадонининг сиртига аппарат оёғи ва филофли теннис ракеткасини боғлаб олишганини кўриб йўловчилар, агар борди-ю икковлари изсиз йўқолишган тақдирда ҳам... у билан Робертани олис бир ердан келаётган ўткинчи саёҳатчилар бўлишса керак, деб ўйлашади... хўш, нима бўлти, улар чиндан ҳам бу ерлик эмас-ку... Ахир, йўл кўрсатувчи ҳам айтмаганмиди, бу кўлнинг чукурлиги Пасс кўлига ўхшаб етмиш беш фут келади, деб? Ҳа, ростдан Робертанинг жомадони-чи... уни нима қилиш керак? Шу пайтгача бу нарса сира хаёлига келмаган экан.

*(Ана, учта автомобиль поезд билан баб-бара-вар тезликда гизиллаб боряпти.)*

Шундай қилиб, улар йүлоқзор күлида тунаб чиқишиади-да, кейин яна йўлга тушишади. Клайд Робертага: Куранг кўлдаги Учинчи миль Кўрфа-зидаги таниш бир руҳоний бор, ўша ерда никоҳдан ўтамиз, деб айтади; у Робертани Қуролсоз бекатида жомадонини қолдириб кетишга кўндиради, у ердан Катта яйловга улар автобусда жўнашади, – ўзининг жомадонини эса бирга олиб кетади. У биринчи дуч келган кишиига ёқ, масалан, қайиқчигами ёки автобус ҳайдовчисигами, жомадонимда фотография аппаратим бор, дейди гўё бепарво оҳангда ва бу ерда чиройли жойлар кўпми, деб сўраб ҳам кўяди. Ёки жомадонга нонуштаси солинган бўлади. Ҳойнаҳой, шу фикр дурустга ўхшайди: у нонуштасини ола кетса, бу билан Робертани ҳам, ҳайдовчининг ҳам кўзини бўяган бўлади. Бунга аслида унча-мунча одамнинг ақли етавермайди, шундай эмасми? Кўлга борганда аппаратини жомадонига солиб оладиганлар сон мингта-ку. Нима бўлганда ҳам у жомадонини, албатта, ўзи билан бирга олиб кетиши зарур. Акс ҳолда шунча режадан оролга сузиб бориб, у ердан ўрмон оралаб жанубга қараб кетишдан нима фойда, хўш?

*(Қанчалик ярамас, даҳшатли режа! Наҳотки, у шуни амалга оиирса?)*

Лекин Катта мушгир кўлидаги анави қуш жуда ҳам ғалати қичқирган эди-я! Клайд ўша овозни яна қайта эшитмагани ёки ўша йўл кўрсатувчига дуч келмагани маъқул: йўл кўрсатувчи уни дарров таниб қолиши мумкин. Тўғри, Клайд у билан бир оғиз ҳам гаплашмаган, фақат ойнадан қараганини айтмаса... ҳатто автомобильдан тушмаган ҳам эди, эс-эс эслашига қараганда, йўл кўрсатувчи унга ҳатто бирон марта қайрилиб ҳам қарамаган эди, машинадан чиқиб уни сўроққа тутган Грэнт Крэн-

стон ва Харлей Бэгот билан гаплашган эди нуқул. Мабодо ўша одам ўша ерда бўлса ва уни таниб қолса-чи? Э-э, бундай бўлмас-ов, ахир, у Клайдни тузукроқ кўрмагану? Йўқ, ҳойнаҳой, у одам Клайдни эслай олмайди, эҳтимол, Катта мушгирида у мутлақо йўқдир... Лекин нима учун Клайднинг қўллари-ю, юзлари доим муздай, жиқ-жиқ терга ботиб, тиззалири қалтирагани-қалтираган?

*(Поезд дарёning илон изи бурилишиларини айланниб ўтятти... Роберта иккаласи ўтган иили ёзда... Кераги йўқ...)*

Утикага етиб боришлири биланоқ Клайд бир иш қилиши керак (у буни сира эсидан чиқармаслиги, ҳар қандай шароитда ҳам ўзини йўқотиб қўймаслиги керак. Довдираф қолишга ҳақи йўқ, унинг... ҳақи йўқ...) Кўчада Робертани олдинга ўтказиб, бирон кимса: ҳа, уни кузатиб бораётган экан, демаслиги учун орқасидан, масалан, юз қадамларча берида бориши лозим. Охири бир ерда улар ёлғиз ўзлари қолишгач, Клайд унга ётиб олади ва барча режаларини тушунтириб беради... устига-устак Робертага нисбатан азалий севгиси ўчмагандек атрофида нуқул парвона бўлади... Робертанинг гапга унашини агар чиндан ҳам истаса, шундай қилиши шарт. Кейин-чи... кейин... ҳа-ҳа, эсига тушди... қаердадир Роберта уни кутиб туради. У бориб анави... анави иккинчи шляпани сотиб олиб келади... шляпани, эҳтимол, кейин сувда қолдира... эшкакларни ҳам албатта. Робертанинг шляпасини ҳам... кейин...

*(Бу поезди қўрмагур намунча узундан-узоқ, гамгин ҳұштак чалмаса-я. Э, лаънат-е! У энди асабийлаша бошлиади.)*

Аммо меҳмонхонага боришдан олдин вокзалга қайтиб, янги шляпани жомадонга жойлаб олишга тўғри келади; яхиси, маъқулроқ бир меҳмонхона топилмагунча жомадонни бирга кўтариб юриш керак-да, янги шляпани ана ўшанда – Робертани

чақириб келишдан аввал сотиб олиб, буюмлари ичига яширгани тузук. Кейин у Робертани меҳмонхонагача кузатиб боради, Роберта эса Клайд жомадонларни олиб келгунига қадар уни кираверишда кутиб туради. Агар яқин-атрофда ҳеч ким бўлмаса, улар меҳмонхонага бирга киришади, албатта; фақат Клайд меҳмонлар дафтарига ёзилиб бўлгунча Роберта жуда бўлмаса аёллар хонасида ўтириб туради... Клайд бу гал, масалан, Чарльз Голден деб ёздириши мумкин ўзини. Агар қулайроқ поезд бўлса (буни ҳали Клайд аниқлайди) эртабадан, мабодо Роберта кўнса шу бугуннинг ўзида-ёқ икковлари йтлоқзор кўлига қараб жўнашлари мумкин, улар ақалли Ўн иккинчи кўлдан ва Шейрондан ўтиб олгуналарича яна бошқа-бошқа вагонларга тушиб кетишлари керак.

(У ёқда – Крэнстонларнинг ажойиб чорбоглари бор... Сондра ҳам.)

Кейин-чи... кейин...

(Ана, баҳайбат қизгиши омборхона ва унинг ёнгинасида митти бир оппоқ уйча кўзга ташланяпти. Шамол тегирмони ҳам турибди. Клайд Иллинойс ва Миссурида ҳам худди шунача омборхона ва уйчаларни кўрган эди. Чикагода ҳам.)

Бу пайтда Роберта қўшни вагонда ўтирганча, Клайднинг кайфияти ҳарқалай унчалик ёмонга ўхшамайди-ку, деб ўйламоқда эди. Ахир, хоҳлаганича майшат қилиши мумкин бўлган Ликург шаҳридан мана шу алпозда, худди ёв қувгандек кетавериши унга қийин, албатта. Лекин иккинчи томондан ўйлаб қараганда, Роберта ҳам нима қилсин... Бошқа сира иложи йўқ эди. Энди у қувноқ ва хушфеъл бўлиши, арзимаган хархашалари билан ҳадеб Клайднинг жонига тегавермаслиги керак. Аммо ҳаддан ташқари кўнгилчанлик ва майинлик ҳам кемайди бу ерда, сирасини айтганда, унинг бошига тушган ҳамма ишларга Клайд

айбдор-ку. Ҳозир у нима яхшилик қилаётган бўлса, адолат юзасидан қиляпти, аслида бу ҳам кам. Ҳали у фарзанд кўради, олдинда уни жуда кўп фам, ташвишлар кутиб турибди. Бундан ташқари, у яна бу сирли воқеаларни, ўзининг ана шу бирдан йўқолиб қолишини ва никоҳни (ҳали агар Клайд унга чиндан ҳам уйланадиган бўлса) ота-онасига тушунириб бериши керак. Лекин Роберта уни бари бир никоҳдан ўтишга мажбур этиши керак... иложи бўлса тезроқ... балки, Утиканинг ўзидаёқ..., никоҳдан ўтишлари лозим, никоҳ гувоҳномасидан бир нусхасини эса Роберта ўзи ва боласининг манфаати йўлида сақлаб қўйиши зарур. Клайд кейин истамаса, ажралиб кетиши ҳам мумкин. Аммо шунга қарамай, Роберта миссис Грифитслигича қолаверади. Уларнинг фарзанди ҳам Грифитс номини олади. Бу ҳазилакам эмас-ку, ахир.

*(Намунча чиройли бўлмаса-я анави дарё. У Робертага Могаукни ва Клайд билан эндинигина танишигандаги ўтган йилги сайд томошаларини эслатарди. Эҳ, ўша ажаб ёз ҳадя этган мурувватлар! Қанисиз энди!..)*

Улар қаергадир жойлашишади... эҳтимол, бир хона ёки икки хонаними ижарага олишар. Лекин бу қаерда-ю, қайси шаҳарда бўлади? Роберта шуни билишни истарди. Ликург ёки Бильцдан олисадами? Гарчи Роберта шубҳасиз, тезда отаси ва онаси билан яна дийдор кўришишни ва буларнинг ҳаммаси тезроқ орқада қолишини истаётган бўлса ҳам Бильцдан қанча узоқлашишса, шунча яхши, деб ўйларди, ахир улар икковлашиб жўнашяптику, у эрга теккан бўлади, шундай бўлгач, бунинг аҳамияти йўқ.

Ҳаво ранг костюми билан жигар ранг шляпасига Клайд аҳамият бердимикин? Борди-ю, Клайд уни ўзи доим вақтини бирга ўтказаётган ўша бойвучча

қызларига солиширигән тақдирда ҳам, эхтимол, күзига Роберта ғоят сулуу қўрингандир У ўзини ниҳоятда назокатли тутиши... хиёл бўлса ҳам Клайднинг жаҳдини чиқармаслиги керак... Аммо... Клайд уни агар... агар салгина... қиттайгина севганидами, унда улар қанчалик баҳтли яшар эдилар...

Мана Утикага ҳам келишди, кимсасиз кўчада Клайд Робертага етиб олди. Клайд чехрасида соддадил қувноқлик ва хайриҳоҳлик ташвиш ва асабийлик билан аралаш-куралаш бўлиб кетган эди; аслида эса бу ўз ниятидан, ўйлаган нарсасини ўзи бажара олмаса ва омади келмай қолса қисмати нима кечишини ўйлаб даҳшатга тушаётганини яширувчи филоф-парда эди.

## XLVII БОБ

Кечқурун келишиб олинганига биноан улар эртаси куни эрталаб (яна бошқа-бошқа вагонда) Ўтлоқзор кўлига қараб жўнашди. Лекин манзилга етиб боришгач, Клайд кўл қирғоқдари ўзи ўйлагандан кўра гавжумроқ эканлигига ишонч ҳосил қилди. Бу ерда ҳукм сураётган жонланиш ҳафсаласини пир қилиб юборди, уни даҳшатга солди: у эса бу кўл ҳам Катта мушгирга ўҳшаб кимсасиз бўлса керак, деб ўйлаб юрибди. Аслида бу жой Пенсильваниядаги майда бир диний мазҳаб тўпланадиган ер бўлиб, унинг ёзги манзилгоҳи ҳам шу жой эди: бекат рўпарасидағи кўл соҳилида чоғроқ ибодатхона ва сон-саноқсиз шийпончалар кўзга ташланиб турарди.

Роберта бирдан тўлқинланиб кетди:

– Жудаям соз-ку! Биз шу ернинг руҳонийсига кириб, никоҳ ўқитиб олсак ҳам бўлади, тўғрими?

Кутимаган бу чалкашлиқдан довдираб қолган Клайд:

– Ҳа, бўлади, албаттa... – деди шоша-пиша қўниб.  
– Мен у ерга сал кейин бориб, билиб қайтаман...

Аммо хаёлида эса Робертани қандай қилиб алдаш йўлларини ўйлар эди. Меҳмонхонага ўрнашганларидан сўнг у Робертани қайиққа солиб сайрга олиб чиқади, кўлда атайлаб уни узокроқ ушлаб туради. Эҳтимол, бирор-бир пастқам, кўздан холи жой ҳам топилиб қолар... Э, йўғ-э, бу ерда одам фужгон ўйнаб ётибди-ку. Кўл унчалик катта эмас, ҳойнаҳой, у қадар чуқур бўлмаса ҳам керак. Суви худди қатрондек тим қора, шарқий ва шимолий соҳилларида эса баланд-баланд қорамтири арчалар гўё соқчиладек зич саф тортиб туришибди. Клайд шу қадар умидсизлик ва шубҳа ботқоғига ботган, хаёли шу даражада безовта бўлган эдики, ўша арчалар нақ найза ушлаган афсонавий одамхўрларни эслатувчи зийрак девларга ўхшаб гавдаланарди унинг назарида. Бунинг устига теварак-атрофда ҳали одам кўп, кўлда ҳам кам деганда ўнта қайиқ сузиб юрибди.

Қанчалар мудҳиш буларнинг бари!

Қанчалар мушкул!

Бирдан шивир-шивир овоз эшитилди:

«Бу ердан ўрмон оралаб юрганда Учинчи миль Кўрфазига сира ҳам етиб бўлмайди. Йўқ, йўқ. У ергача орада роппа-роса ўттиз миль масофа бор. Устига-устак бу кўл анча-мунча гавжум, ҳойнаҳой, анави мазҳабпарастлар ҳам доим ундан кўз-қулоқ бўлиб туришгандир». Йўқ, йўқ... У Робертага айтиши зарур... айтади ҳам... аммо нимани ҳам айтарди унга? Мен сўрадим, одамларнинг гапича, бу ерда никоҳга рухсат этилмас экан, дейдими? Ё руҳоний ҳозир аллақаёққа кетибди ёки у менда йўқ хужжатларни талаб қиляпти, десинми? Ёки... ёки... Эҳ, нима бўлса ҳам эртагача, Катта мушгир ва Шейронга борадиган поезд шу ердан жўнаб кетгунча Робертанинг овозини ўчириб турга олса – марра уники, у ерда эса улар албатта никоҳдан ўтишади!

Нимага Роберта бунчалик талаб қўяверади-я? У бир тоғни қайириб беряптиимики (айтганимдан қайтмайман, деб оёқ тираб олишини агар унинг ҳақли, қатъий талаби деб тушунган тақдирда ҳам), Клайд унинг орқасидан ҳали у ёқса, ҳали бу ёқса тентираб юраверса? Аслида Клайдни соат сайин, дақиқа сайин эзаётган ситам шу-ку, ўта шафқатсиз ва чегарасиз қалб азобику бу, ваҳоланки у Робертадан қутула олганда эдими... Оҳ, Сондра, Сондра, қани сен бир илтифот қилсангу, ўз юксаклигингдан тушиб, менга мадад берсанг! Мен бошқа алдамасам! Бошқа азоб чекмасам! Камситишу аламларни зинҳор билмасам!

Аммо буларнинг ўрнига яна қаллоблик. Узундан-узоқ, бенаф, жонга тегадиган бир тарзда сув нилуфарларини излаб юриш. Клайднинг бунчалик безовта ва асабийлигидан сайд-томоша Робертага ҳам татимади, сал ўтмаёқ Клайддан баттар унинг ҳам юраги сиқилиб кетди. Нима учун Клайд ни-коҳдан ўтиш масаласига бунчалик совуққонлик билан қарайпти, деб сўрарди у ўзи ўзидан. Буни анча олдин қилса ҳам бўларди, ана ўшандা бу томошалар Робертага ўз ниятларининг ушалаётгани бўлиб туюларди... агар... агар Клайд Роберта истаганидек ҳаммасини олдиндан, Утикадаёқ бир ёқлик қилиб қўйганда шундай бўларди, албатта. Энди яна кутиш, унга-бунга чалғиши... Клайд одатига хос доимий бетайинлик ва мужмалликка чидаш. Роберта яна иккилана бошлади, Клайднинг унга уйланмоқчи бўлаётгани ростмикан ўзи, лафзизда турармикан? Аммо эртага ёки кеч деганда индинга ҳаммаси равшан бўлади-қўяди. Шунинг учун ҳозир ташвиш тортиб ўтириш ўринсиз.

Эртаси куни Клайд туш пайтида Қуролсоз бекати ва Катта мушгирда вагондан тушди-ю, Робертани йўловчиларни пойлаб турган автобус томонга бо-

шлади. Қайтишда ҳам шу йўл билан келганимиздан сўнг жомадонингни шу жойда қолдирсанг, қулай бўларди, деб Робертага уқтира бошлиди йўл-йўлакай Клайд эса жомадонини ўзи билан олиб кетади, чунки ичидা фотография аппарати ва аввалдан тайёрлаб кўйган нонушта ҳам бор, ахир, нонуштани улар кўлда қилишмоқчи-ку!.. Аммо автобусга етиб келиб, ўша ўзи Катта мушгир кўлида учратган йўл кўрсатувчи автобус ҳайдовчиси эканини кўрганда Клайднинг нақ ўтакаси ёрилиб кетай деди. Энди у одам уни илгари кўрганини тўсатдан эслаб қолса-я! Ахир, Финчлиларнинг чиройли автомобилини, олдинги ўриндиқда ўтирган Бертина ва Стюарт, орқадаги Клайд ва Сондрани, у билан гаплашмоқчи бўлиб машинадан тушган Грэнт ва Харлей Бэготни эслаш унга унчалик қийинмас-ку?!

Кейинги пайтларда, ҳаяжон ва ваҳимага тушган онларида доим бўлгани каби, бир дақиқанинг ўзидаёқ юзи ва қўлларини совуқ тер босди. Илгари, ахир, у нимани ўйлаган эди? Режа деганини ҳам шунчалик хом тузадими? Ҳаммасини шунақсанги пала-партиш ўйлаган экан, хўш, бу ишнинг уддасидан чиқишига қандай умид қиласа бўлади? Шу хомлиги сабабли йўлда, Ликургдан Утикага келгунча шапка кийиб олиш ёки ақалли бўлмаса похол шляпа харид қилгунга қадар жомадонидаги шапкасини кийиб туриш ҳам хаёлига келмабди, умуман шляпани илгарироқ сотиб олиши керак эди.

Аммо худо бир асрари уни, йўл кўрсатувчи танимади! Аксинча, у мутлақо нотаниш одамга муружаат этгандай синчковлик билан:

– Катта мушгирга борасизларми? – деб сўради. – Бу ерда биринчи марта бўлишингларми?

Клайд ўзини гўё елкасидан тог афдарилгандай ҳис этди-ю, аммо ич-ичидан қалтироғи босилмай:

– Ҳа, – деб жавоб берди, кейин безовта бир асабийлик билан сўради: – У ёқда бугун одам қўпми?

Охирги сўзини айтиб улгурмасидан ўзи берган саволи ўзига ниҳоятда бемаъни туюлиб кетди. Нима учун, нима учун, қайси шайтон йўлдан урмаса, шундай савол беради-а? Бунақангни аҳмоқона, хатарли довдирашларининг наҳотки чеки бўлмаса? У шунчалик эзилиб кетдики, йўл кўрсатувчининг жавобини ҳам деярли эшитмади, унинг овози гўё аллақайлардан, олис бир жойдан келаётгандек бўлиб туюлди.

– Унчалик кўп эмас. Етти-саккизта одам эди, шекилли. Тўртинчи куни бизда ўттизтacha одам бўлди, бироқ ҳаммаси кеча кетди.

Улар бораётган ёпишқоқ тупроқди йўл атрофида саф тортган дараҳтлар унсизгина қаққайиб турибди; ҳаво салқин ва теварак жимжит; ҳатто ҳозир, қоқ туш пайтида ҳам ўрмон ичкарилари зими斯顿 ва хилват, қоп-қоронги бўлиб кўринарди. Агар шу ўрмон ичига тундами, кундузими кириб кетсанг бас, тирик жонни учратиб бўпсан! Чакалакзорлар орасидан бойўглиниинг хунук овози зшитилади; кумуш ранг зулмат қаърини олисларда жарангдор сайраётган тўргай қўшиғи босиб кетади. Усти ёпиқ оғир автобус шалдираб оқаётган ариқчалар устига солинган ғадир-будир гўла кўприклардан ўтаётганда Роберта зилол сувга қараб туриб ўзида йўқ ҳаяжонга тушарди. «Бу ернинг сўлимлиги ни қара, Клайд! Ариқчаларниңг чулдираётганини эшитяпсанми? Тоза ҳавоси-чи!»

Шунга қарамай, Робертанинг ажали етиб турибди!

Э, парвардигор!

Аммо, фараз қилайлик, Катта мушгир меҳмонхонасида ҳам, бандаргоҳда ҳам одам гавжум, дейлик. Эҳтимол, кўлни балиқ шинавандалари эгаллаб, ҳали у ерда-ҳали бу ерда битта-биттадан ўтириб олишгандир, натижада биронта хилват, тинч жой қолмагандир. Клайд бу ҳақда бош қотириб кўрмагани қизик! Ҳойнаҳой, бу кўл ҳам Клайд ўйлагандек у қадар

кимсасизга ўхшамайды, қайтага шу бугун Ўтлоқзор күлидагидан кам одам йиғилмайдиган күринади бу ерда ҳам. Унда нима бўлади?

Нима бўларди, унда ҳайё-ҳув деб жўнаб қолади... жўнаб қолади... кейин осмон узилиб ерга тушмайдими. Бунақангি азобларга у чидомайди... Жин урсин-е!.. Бу ташвишлар сўзсиз ёш жонига завол бўлади. Мана шундай ёвуз ва шафқатсиз ният – қотиллик йўли билан баҳтга эришиш, кейин қочиб кетиш... тўғрироғи уни ўлдиришга ўлдириб, яна ўзини сувга чўккан қилиб ҳам кўрсатиши... ваҳоланки, у – қотил даври давронини суриб юрган бўлади, ахир қайси вижданни билан у шуларни ўйлаяпти-а. Оламда бундан ҳам жирканчлироқ режа бўлармикан ўзи! Бироқ, начора, бошқа нима ҳам қила оларди? Нима ҳам қила оларди? У, ахир худди шунга тайёрланмаганмиди, хўш? Наҳотки, энди аҳдидан қайтса?

Ёнида ўтирган Робертанинг хаёли эса бошқа ёқда, гўё уни кечи билан эртага эрталаб чинакам тўй кутаётгандай эди. Ҳозирча у Клайд мақтаган хушманзара кўлни томоша қилиб, юрагини ёзиши керак, ахир, Клайд бу саёҳатни худди икковлари ҳаётидаги энг унутилмас, катта воқеадай осмонга кўтариб мақтаган эди-ку.

Йўл кўрсатувчи Клайдга мурожаат қилиб яна гап бошлади:

– Сизлар бу ерда узоқ турмайсизлар шекилли? Хонимчанинг буюмларини бекатда қолдирганларингга кўзим тушиб қолувди.

У бекат томонга имо қилиб қўйди.

– Йўқ, биз бугун кечқурун, саккизу ўндаги поездда кетамиз. Ўша пайтда сиз одамларни олиб бориб қўярсиз-а?

– Ҳа, албатта.

– Менга Ўтлоқзор кўлида шундай дейишган эди.

Тавба, нега у Ўтлоқзор кўлини тилга олиб валдираяпти-а? Шу сўзи билан у Роберта иккаласи бу ерга келишларидан аввал Ўтлоқзорда бўлганликларини билдириб қўйди-ку, ахир. Анави аҳмоқ ҳам «хонимчанинг буюмлари» бекатда қолдирилганини келиб-келиб шу ерда эслатиб ўтирганини қаранг! Шайтон ургур-ей! Нега бироннинг ишига бурнини суқади-а? Нега у Роберта иккаласини ҳатто эр-хотин ўрнида ҳам кўрмаяпти? Ёки бу гап бутунлай хаёлига келмаганмикан? Ҳарқалай, уларда иккита жомадон бору, шунда ҳам нега у бундай савол бердийкин? Айнан Робертанинг жомадони қолганини у қаёқдан билади? Қизиқ! Бу сурлиги нимаси! У қандай билганикин, қандай ақдига келганикин... Бироқ эр-хотинми улар ёки йўқми – бари бир эмасми? Агар Робертани топишолмаса, у эрга текканми ёки тегмаганми – бунинг бир мирилик ҳам аҳамияти қолмайди. Борди-ю, топиб олиб, эрга тегмаганини аниқлашса, бу унинг кўлга фақат ким биландир келганини исботлайди холос, лекин Клайд биланми, бошқа биланми келганини исботлай олмайди, шундай эмасми? Демак, бу ҳақда ҳозир ташвиш тортиб ўтириш ўринсиз.

– У ёқда биз қўнадиган жойдан бўлак турса бўладиган уйлар ёки меҳмонхоналар ҳам борми? – деб сўради Роберта йўл кўрсатувчиidan.

– Йўқ, хоним, бошқа биронта ҳам жой йўқ, фақат бизники. Кеча бу ерда тўда-тўда ёш-яланг йигит-қизлар юришувди, улар шарқий қирғоқча, биздан тахминан бир милча нарига лагерь қуриб олишган эди. Улар ҳалиям ўша жойдами ёки кетищдими, билмайман. Бугун улардан биронтасини ҳам кўрмадим.

Тўда-тўда ёш-яланг йигит-қизлар эмиш! Ўзи шуниси етмай турган эди! Эҳтимол, уларнинг бари ҳозир кўлда... қайиқларда сайр қилишаётгандир... У бўлса Роберта билан бошлишиб юрибди! Балки, ким билади, уларнинг орасида Ўн иккин-

чи кўлдан келганлар ҳам бордир, ахир, Клайднинг ўзи, Сондра, Гарриэт, Стюарт ва Бертиналар ҳам бундан икки ҳафта бурун шу ерга келишган эди-ку... Эҳтимол, улар Крэнстон, Гарриэт ва Финчлиларнинг боф сайрига келган ёр-биродарларири, улар Клайдни дарров танишади. Яна айтгандай, кўлнинг шарқ томонига туташган аллақандай йўл ҳам бор, дейишган эди. Ана шу ёш-яланглар кетишишмаган бўлса, қарабсизки, Клайд бу ерга қуруқдан-қуруқ келиб кетаверган бўлади. Бунчалик ҳам аҳмоқона режа тузмаса у! Ўйлаётганда сал ақдини ишлатганмиди ўзи... Ипидан игнасигача олдиндан пишитиб олиши, янайм олисроқ кўлни танлаши керак эди... лекин у кейинги кунларда шу қадар азоб чекканидан нимани ўйлаганини ҳам тузукроқ билмайди ўзи. Энди бўлар иш бўлди, фақат бориб, ўз кўзи билан кўришдан бўлак иложи йўқ. Борди-ю, у ерда одам кўп бўлган тақдирда ҳам, у қандай бўлмасин бирор ҳақиқий хилват жойни, кимсасиз овлоқни топиши керак... ёки Ўтлоқзор кўлига қайтсинми... ёки бўлмасам яна боши оққан томонга қараб кетаверсинми? Эй, худо-е, у ерда одам кўп бўлса, нима қилса бўларкин?

Лекин шу пайт дарахтлар сийраклашиб – автобус ўтиб бораётган узундан-узун ўрмон йўлаги ту-гагандек бўлди – Клайд ям-яшил ўтлоқчани, Катта мушгир кўлини ва айвони кўлнинг тўқ мовий суви томонга қараган шинам меҳмонхонани таниди. Ҳув ана, ўнг томонда, нақ сувнинг ёнгинасида қайиқ сақланадиган пастаккина сарой, унинг томи қизғишилгини Клайд ўтган гал эслаб қолган эди. Роберта қувончи ичига сифмай:

– Оҳ, қандай жозибали! Қандай гўзал! – деб юборди. Клайд олисдаги унчалик баланд бўлмаган қорамтири оролчага кўзи тушиб, теварагида одам сийраклиги, оролчанинг ўзида эса ҳеч зоф йўқлигини кўрди-ю, шоша-пиша:

– Нимасини айтасан, жудаям гўзал! – деди, аммо нақ бўлмаса нафаси ичига тушиб кетаёзди.

Уларга меҳмонхона хўжайинининг ўзи – ўрта бўй, елкалари кенг, юзи қип-қизил киши пешвоз чиқди-ю, синчковлик билан:

– Уч-тўрт кун бўласизларми бу ерда? – деб сўради.

Навбатдаги бу чалкашликдан жаҳли чиққан Клайд йўл кўрсатувчига бир доллар узата туриб:

– Йўқ, йўқ. Биз бутун кечқурун кетамиз, – деди гапни чўрт кесиб.

– Ундай бўлса, бизда овқатланиб кетарсизлар балки? Поезд саккиздан ўн бешта ўтгандагина жўнайди.

– Ҳа, унда албатта... Ҳа, яхши, овқатланамиз.

Шуниси ҳам ўз-ўзидан равшанки, Роберта ўз асал ойида, тўйи ҳамда шундай саёҳати чофида катта зиёфат берилишидан умидвор. Анави қизил башара чорпаҳил галварс эса шундай бир пайтда гапириб қолганини қаранг!

– Майли, унда жомадонларингни мен хонага олиб кириб қўяман, сизлар эса келиб кетувчилар рўйхатидан ўтинглар. Рафиқангиз, балки, бир оз тараниб олишни истар?

У жомадонларни кўтарганича зипиллаб жўнади, Клайд эса нақ қўлидан юлиб олгундек бўлиб гижинганча қолаверди. У бу жойда бутунлай рўйхатдан ўтишни ҳам, жомадонни қолдиришни ҳам истамасди. Қолдириб бўпти! У ҳозироқ қайтариб олади-да, ижарага қайиқ сўрайди. Аммо ҳар қанча қувлик қилмасин – хўжайнинг «шунчаки расмиятчилик» деб атаганидек – дафтарчага: Клифорд Голден рафиқаси билан, деб ёзилишга мажбур бўлди, шундан кейингина у буюмларини қайтариб олди.

Клайд ҳали шу хавфли кўл сайрига чиқиб ултургунча яна қанча синоатлар ва кишиларга дуч келишини ваҳимага тушиб ўйлаб турган бир пайтда Роберта бирдан унинг асабини баттар қўзғаб,

уни саросимага солмоқчи бўлгандай, кун иссиқлиги ва тушликка қайтиб келишларини рўкач қилиб, шляпам билан пальтоимни шу ерда қолдириб кетаман, деса бўладими; Клайд унинг шляпасида Ликургдаги Браунштейн фабрикаси тамгасини кўрди-ю, қолдиргани тузукми ёки олиб кетганими, шу ҳақда бош қотира бошлади. Лекин афтидан иш битгандан кейин... кейин... агар у чиндан ҳам ўша ишни қила олса... у ҳолда шляпасида фабрика тамгаси бормиди-йўқмиди – бунинг сариқ чақалик ҳам қиммати қолмайди. Борди-ю топиб олишса, тамгасиз ҳам уни бари бир танишади-ку? Агар топишолмаса, минг дод-вой қилишганда ҳам унинг кимлигини қаёқдан билишсин.

Клайд шунчалик ҳаяжонга тушиб, калаваси-нинг учини шу қадар йўқотиб қўйганидан ўзининг нима қилаётганини ҳам билмай, мияси ғовлаб, жомадонини қўлига олди-ю, бандаргоҳга қараб жўнади. Кейин жомадонини қайиққа ташлади-да, бу ерда чиройли жойлар кўпми, расмга олмоқчиман, деб сўради қайиқчидан. Аллақандай кераксиз ту-шунтиришларни эшитиб бўлгач, ниҳоят, Роберта-га кўмаклашди (энди Роберта Клайднинг назарида деярли нақ тасаввурдагина кўринувчан, аслида эса ўзи йўқ бўлган кўлда хаёлдаги қайиққа чиқаётган жисмсиз – танасиз соядай кўринарди), кейин ўзи ҳам сакраб ўтди, ўртадаги ўриндиққа ўтириб, эшкакларни қўлига олди.

Камалакдай ранг-баранг жилоли жимжит кўлнинг юзи сувдан кўра кўпроқ нефтга ўхшар эди; гўё кўлнинг энг тубида яширинган ер қатлами устида шиша эритмаси мисласиз қуюқ ва оғир жисм бўлиб ётгандек туюларди. Енгил, тоза, ёқимли шабада кўл сатҳини билинар-билинмас мавжлантиради. Соҳил бўйлаб қаёққа қараманг, қалин, сербар арчалар, баланд-баланд учи найзага ўхшаш арча да-

рахтлари. Уларнинг ортида эса – қорамтири, олис Адирондак тоғларининг ўркачсимон елкалари. Кўлда биронта ҳам қайиқ кўринмасди. Қирғоқларда на бир уй бор, на бир кулба. Клайд олазарак бўлиб, йўл кўрсатувчи айтган лагерни қидира бошлади, аммо ҳеч нарса кўрмади. Шу яқин ўргалардан овоз келмасмикин, деб қулоқ солиб ҳам кўрди. Ўз қўлидаги эшкакларнинг оҳиста шипиллаши-ю, икки юз... уч юз... беш юз... минг фут нарида суҳбатлашиб турган қайиқчи билан йўл кўрсатувчининг фўнғир-фўнғир овозини айтмаганда, бошқа чурқ этган товуш ҳам эшитилмасди.

– Қандай осуда ва жимжит жой экан, тўғрими? – бу Робертанинг овози эди. Ҳамма ёқ худди сув қўйгандек! Менимча, бу ерни анави одинги кўлга солиштириб бўлмайди, бу ер анча чиройлига ўхшайди. Даражтларнинг баландлиги! Тоғлар-чи, тоғлар! Бу ёққа келаётганимизда, гарчи йўли бир оз ўйдим-чукур бўлса ҳам, лекин шу қадар салқин ва холи жойлар эканки, деб ўйлаб келдим.

– Сен меҳмонхонада бирон киши билан гаплашмадингми бу ерда?

– Йўқ, ҳеч ким билан гаплашмадим. Нега бундай деяпсан?

– Эҳтимол, бирон таниш-билишингни учратиб қолдингми, деб ўйловдим. Ҳа, ростдан, бугун бу ерда одам камга ўхшайди.

– Тўғри айтасан, кўлда ҳам ҳеч ким кўринмаяпти. Меҳмонхонада эса фақат бильярд ўйнаётган икки эркак билан аёллар хонасида бир қизни учратдим, холос, – у қайиқ четидан қўлини осилтириб, Клайд эшкаклари остида ҳаловатини йўқотган кўкиш-қорамтири сувга билагини солди, – вуй, совуқ экан!

– Совуқ дейсанми? Мен қўл тиқиб кўрмадим!

Клайд эшкакни тўхтатиб, қўлини сувга солди-ю, ўйланиб қолди. Жанубдаги анави оролчага ҳозир-

даноқ бирдан сузиб боришмагани тузук. Чунки у анча олис... бунинг устига вақт ҳам ҳали эрта... бу Робертага ғалати туюлиши мумкин. Яхшиси, бир оз сабр қылгани маъқул. Яна миясида бир сидра пиштиб олиши... у ёқ-бу ёққа разм солиб ҳам кўриши лозим. Роберта нонуштасини қиласиган бўлса (ҳа, унинг нонуштаси!), ҳу, ана, тахминан бир милча нарида хушманзара бурун кўриниб турибди. Ўша ерда тўхтаб, аввал нонушта қилиб олиш мумкин... яъни у, Роберта нонушта қиласи, Клайд бугун туз ҳам тотмайди. Шундан кейин... кейин...

Роберта ҳам ўша бурунга кўз ташлади: баланд-баланд арча дарахтларига бурканган ёйсизмон ер парчаси кўл ўртасини анча жойгача ёриб кириб, жанубга томон қайрилиб кетган эди.

– Жоним, – деди Роберта, – бирор жойда тўхтаб тамадди қилиб олишимизга жой танламаганмидинг? Хиёл қорним очди, сеники-чи?

(Дақиқа сайин уни «жоним» деявермасачи-а!)

Шинам меҳмонхона билан шимолий қирғоқдаги қайик турадиган сарой борган сари кичкина бўлиб кўрина бошлиди; энди улар Клайдга Крам кўлидаги чўмилиш жойи ва бандаргоҳни, Клайд биринчи бор қайикда сайр этган ўша кунини эслатди, Клайдда ўша куни Адирондак тоғлари яқинидаги мана шу кўлга ўхшаш жойларни кўриш истаги пайдо бўлган эди, у мана шунаقا кўлга боришни... Робертадақа қиз билан танишишни орзу қиласиган эди... Крам кўлидаги ўша даҳшатли кундагидек момиқ булувлар, ана, ҳозир ҳам боши узра сузиб юрибди.

Қанчалар даҳшатли ва машаққатли шуларнинг ҳаммаси!

Вақт ўтказиш учун бугун улар бу ердан сув ни-луфарларини излашлари мумкин... вақт ўтказиш... гумдон қилишдан аввал... (эй, худойим-ей!..) Агар у охири шу ишни қилиши аниқ бўлса, унда бу

ҳақда ўйламаслиги керак. Ақалли ҳозир шу ҳақда бош қотириб ўтириш – бутунлай ўринсиз.

Клайд қайиқни Роберта ёқтирган жой – зигирдаккина кўрфазчанинг асалдай сап-сариқ қумликдан иборат қирғоғига олиб бориб тўхтатди; шимол ва шарқ томонда қирғоқнинг ёйга ўхшаб бурилиб кетиши уларни синчков кўзлардан пана қилиб туради. Улар қайиқдан тушишди. Клайд эҳтиёткорлик билан нонуштани жомадонидан олди-да, то уни Роберта қум устига ёзилган газетага битта-битта териб бўлгунча, қирғоқ бўйлаб у ёқдан-бу ёқса юриб турди, манзаранинг чиройлигини, арчаларнинг яхшилигини, кўрфазчанинг сувувлигини (зўр бериб хаёлидан бир-бир ўтказди...), айни пайтда у кўл четидаги оролчани ҳам ўйлар... оролчанинг нариги ёнида ҳам шунаقا қўлтиқча бормикин, деб хаёл сўрарди... у тобора шашти тушиб бораётган бўлса-да, худди ўша жойда аввалдан пишишиб юрган ёвуз, даҳшатли ниятини албатта амалга ошириши кераклигини... агар... агар у чиндан ҳам қочиб кетишни... ўзи жон-жаҳди билан интилаётган нарсасидан бир умрга жудо бўлишни истамаётган бўлса, унда қанча оворагарчиликлар эвазига атайлаб зўрга қўлга киритилган бу имкониятни асло бой бермаслиги кераклигини ўйларди.

Аммо бу нақадар даҳшатли ва хавфли иш эди... энди буларнинг барига жуда озгина вақт қолди... хиёл бўлса ҳам хатога йўл қўйилса – тамом деган сўз... Бирдан, масалан, у қайиқни ўзи ўйлагандек ағдаролмай қолса... ёки... буни қилолмаса... қилолмаса... э, худо-е! Кейин эса, балки у... унинг... қотиллиги фош бўлар! Уни қамоққа олишади. Суд қилишади. (Йўқ, йўқ, йўқ, бу иш унинг қўлидан келмайди, у буни қилмайди!)

Роберта бўлса унинг ёнида, қумда хотиржам бир тарзда, афтидан севинчи ичига сифмай ўти-

парди. У ниманидир хиргойи қилди-қилдида, сўнгра кейинги турмуш икир-чикирларига оид турли мулоҳазаларини, моддий аҳволлари бундан буён қандай бўлиши, бу ердан қайси йўл билан ва қаёқса қараб кетишлари (ҳойнаҳой, энг яхшиси Сирақузага борган маъқулдир, бунга ҳарқалай Клайд ҳам қарши эмасди-ку!) ва у жойда нима юмуш қилишлари ҳакида ўз фикрларини баён эта бошлиди. Роберта поччаси Фред Гейблдан Сирақузада кўйлак ёқа тайёрлайдиган янги фабрика очилишини эшитган эди. Балки, Клайд вақтингчага бўлса ҳам ўша фабрикада ишлаб турар. Кейинроқ ҳамма ташвишлардан қутулиб олишгандан сўнг, Роберта ҳам ўша ерга ёки бирор-бир бошқа корхонага ишга киради. Ҳозирча пуллари камлиги учун бирор-бир оиласа қарашли биттагина хонани ёки Клайдга бу ёқмаса (улар ҳозир бурунгидай апоқ-чапоқ эмаслар-ку ахир), балки иккита хонани ижарага олишлари мумкиндир. Гап шунда эдики, Клайднинг ҳаддан ташқари мулозамати ва ширин такаллуфи замираida Роберта, ҳарқалай унинг қатъий норозилигини ҳам сезиб турарди.

Клайд ҳамон ўй сурарди. Ахир, бу гапларнинг энди бир тийиналик ҳам аҳамияти йўқ-ку! У кўнди нима-ю, кўнмади нима, бари бир эмасми? Клайд Роберта билан гўё эртага ҳам у шу ерда бўладигандай гаплашяпти. Роберта эса бўлмайди. Ахир, Клайдни ҳам, Робертани ҳам мутлақо бошқа-бошқа қисмат кутяпти-ку. Э, парвардигори олам!

Тавба, Клайднинг тиззалари намунча титрамаса-я? Яна қўллари, юзлари, бутун баданини қоплаган совуқ тер-чи...

Кейин улар кўлнинг фарбий қирғонига, ўша орол томонга сузиб кетишди, Клайд чор атрофга хавотирли ва ҳорғин назар ташлаб, соҳилда ҳам, сувда ҳам – ҳеч қаерда бирон тирик жон йўқдигига ишонч

ҳосил қилди. Ҳеч зоф йўқ! Худонинг раҳми келгани шумикан, ҳамма ёқ жимжит, кимсасиз эди. Агар қурби етса... мана шу жойда ёки шу яқин атрофда ўша ишини қилиши мумкин, аммо ҳозирча бунга сира қўли бормай турибди... Роберта кафтини яна сувга солди-да, бу жойлардан сув нилуфарлари ёки соҳилга чиқиб ёввойи гул термаймизми, деб сўраб қолди. Сув нилуфарлари эмиш! Ёввойи гул эмиш! Бу пайтда Клайд шу баланд-баланд, саф тортган қалин арчазорлар орасида тириклик белгиси бўлмиш – на бирон йўл, на бирон сўқмоқ, на бирон кулба-ю, на бирон чодир йўқдигига, шу ажойиб кунда ажойиб кўлниңг поёнсиз кенгликларида биронта қайиқ сузиб юрганлигига яна бир карра ишонч ҳосил қилди. Аммо аллақандай якка-ёлғиз овчими, йўл кўрсатувчи ё балиқчими ўрмонда ёки соҳилда беркиниб турган бўлса-чи? Ҳўш, шундай бўлиши мумкин эмасми? Ҳув анави жойларда кимдир яшириниб олиб, уларни кузатиб турган бўлса-я?

Пешонасидагини кўради!

Ҳалокат!

Ўлим!

Лекин атрофда на бирон товуш, на бирон шарпа сезиларди. Фақат, фақатгина анави баланд, учи найза ям-яшил арчаларгина қовоғи уюлгандай чурқ этмай туришибди, холос, ҳар ер-ҳар ерда уларнинг орасида – жазирама офтобда куйган кўкиш-кулранг дараҳт таналари учраб қолар, уларнинг ингичка қуриган шохлари эса худди пўписа қилаётган кўлдек тепага кўтарилган эди.

Ўлим!

Қалин чакалакзорда ўрмон тўрғайининг қулоқни тешиб юборгудек ўткир овози янгради, ёлғиз бир қизилиштон нариги оламдан эшитилаётгандай ажиб «туқ-туқ-туқ»ини бошлади; ора-сира худ-

ди қызғишиң қақмоққа ўхшаб аллақандай бир қүш учыб ўтар ёки майнанинг қора-сағишиң қанотлары йилт этиб қоларди.

*О, қанчалар қуёш чарақлар,  
Кентуккидә – менинг үйимда!*

Роберта қорамтирилген сувга қўлини согланча яйраб ашула айта бошлади.

Салдан кейин у: «Истасанг, келайин якшанба куни» деган бошқа бир машхур қўшиқни айтди.

Сайр-томуша, фамгин ўй суриш, қўшиқ айтиш, хушманзара жойлар ва нилуфарлар ўсган осуда қўлтиқчаларни излаш билан яна бир соат ўтиб кетди, Роберта: вақтга ҳам қараб-қараб туриш кепрак, бунча кўп қолиб кетмайлик бу ерда, деб ҳам кўрди... ана, ниҳоят, оролнинг жанубидаги ўша қўлтиқча: чиройли, аммо хомуш, қирғоқлар ҳалқасида қисилган, арчаларнинг мотам чорбурчаги – ичкари кичик бир кўлга ўхшайди; асосий кўл билан уни торгина бўғозча боғлар, лекин шунга қарамай бари бир у хийлагина катта эди: ҳажми салкам йигирма акр<sup>1</sup>ча келар ва деярли думалоқ шаклда эди. Оролни қуруқликдан ажратиб турган торгина бўғозни ҳисобламагандан кўлчани ҳар тарафдан дарахт деворлари ўраб олган эди. Қаёққа қарама, соҳил яқинида қамишлар ва нилуфарлар. Мана шу кўл, мана шу сокин ҳалқоб гўё ҳаётдан ва азоб-уқубатлардан чарчаганлар учун атайлаб яратилгандек эди, буни бир қарашдаёқ киши сезарди, кимки агар турмуш ташвишлари-ю ҳаёт ғавфларидан бир умрга бош олиб кетишни истаса: бу ерда у донишмандона ва маъюс бир қиёфада ўзининг чинакам жойини топадигандек кўринарди.

<sup>1</sup> Акр – Англия ва Америкада 4047 квадрат метрга тенг бўлган ер ўлчови. (Таржимон.)

Қайиқ құлтиқчага зипиллаб кириши билан қорайиб кетган сокин сувлар Клайднинг бутун диққатини үзига ром этди-қўйди: унинг кайфияти ҳали ҳеч қачон, ҳеч нарсадан бу қадар тез ўзгармаган эди. Гўё Клайдни бу жойлар йўлдан оздириб, авраб олиб келгандек эди, Клайд құлтиқчанинг сокин қирғоқларини айланиб ўтди, уни худди сирли манзиллар... ҳамма нарсадан ... машъум ниятлару машъум режалардан... кўндаланг туриб қолган иложсиз муаммолару.., яна бошқа аллақанча тўсиқлардан холи... бўлган поёнсиз бўшлиқдар авраб чақиргандай бўлди. Бу құлтиқча қурғурнинг хоинона латофатини айтмайсизми! У, чор тарафи сулув, майин арчалар билан ўралган мана шу белгисиз қора ҳалқоб... гўё Клайднинг жигига тегмоқчи бўлаётгандек туюларди. Ҳалқобнинг ўзи эса каттакон бир қора инжуга ўхшар эди: гўё кимдир газаби қўзғаган онидами ёки инжиқлиги тутибми, ё шунчаки эрмак учунми, азамат қўллари билан уни мана шу ерга, ям-яшил барқут водий сийнасига келтириб ташлагандек эди... Клайд сувга яхшироқ тикилган эди, туби йўқдек кўринди.

Ҳарқалай у Клайдни нимагадир ундаяпти шекилли? Қотилликка! Қотилликка! Қотилликка! У буни ҳеч қачон ҳозиргидек аниқ тасаввур қилмаган эди. Ўлим! Ўлим бўлганда ҳам ўз танланишига кўра ёки кимнингдир авраши туфайли ёхуд сира ифодалаб бўлмайдиган чарчоқ натижасида киши хурсандчилик ва миннатдорчилик билан рози бўладиган ҳаловатли, тинч ва ихтиёрий ўлим... Шу қадар ювош... шу қадар хотиржам... шу қадар тинч... Ҳатто Роберта ҳайратидан қийқириб ҳам юборди. Клайд эса биринчи бор ўзга кишининг бақувват, аммо дўстона қўллари ўз елкасида турганини ҳис этди. У қўллардан чексиз бир далда, қанча-қанча меҳрибонлик ва бекиёс куч-куват чиқаётгандай эди! Улар Клайдни

овутарди, күнглини күтәрарди, шу сабабли бу құллар Клайд учун қадрли эди. Фақат улар Клайдни ташлаб кетмаса гүрга эди! Фақат улар – бу дүстона құллар у билан абадий бирга бўлса эди! Ахир, Клайд умрида бирор-бир марта овуниш ва ҳатто меҳрибонлик түйгусини шу қадар ҳис этганмиди, қачон? Ҳеч қаерда ва ҳеч қачон ҳис этмаган... мана энди у хотиржам гўё борлиқдан сирғалиб чиқиб кетаётгандай эди.

Тўғри, ёнида Роберта турибди, лекин у ҳозиртирик жонга эмас, фақат сўнган сояга, фира-шира сиймога ва кўпроқ тасаввур самарасига ўхшар эди. Майли, унинг ҳаққоний ҳаётни эслатувчи қандайдир ранг-рўйи, афт-ангори бўлсин, аммо у ҳарқалай танасиз, бутунлай хаёлий бир шарпа эди... бирдан Клайд ўзини яна алланечук ғариб ҳис этди: дўстона, бақувват құллар гойиб бўлган эдилар. Клайд яна танҳо қолиб, бу хафагазак, ажойиб-гаройиб оламда нима қиласини билмай, ёлғизлиқдан азоб чекарди, гўё уни бу оламга кимлардир ҳайдаб келиб, атайлаб ташлаб кетишганга ўхшарди. У бехосдан бутун гавдаси билан дағ-дағ титрай бошлади: бу фалати манзаранинг жозибаси уни яхдек музлатиб юборган эди.

Хўш, нима учун у бу ерга келди ўзи?

Нима қилиши керак у?

Робертани ўлдириши керакми? Йўқ, йўқ!

У яна бошини эгди, кўм-кўк, кумушдек товланаётган ҳалқобнинг мафтункор ва маккор қаъридан кўзларини узолмай қолди, унинг назарида ҳалқоб ўз шаклини ўзгартириб, улкан билур соққага айланиб бораётгандага ўхшарди. Аммо, қизиқ, соққа ичида нима қимиrlаяпти? Қандайдир бир тирик жон... ана, у яқинлашиб келяпти, аниқроқ кўриняпти... у охири Робертани таниди: Роберта оппоқ, нозик құлларини жон ҳолатда сувда тапиллатганча Клайдга узатмоқчи бўляпти. Э, худо, даҳшат-ку бу!

Робертани мутлақо таниб бўлмайди! Қайси виждан билан у шундай хаёлга боряпти? Ўлим! Қотиллик!

Шу пайт Клайд бирдан иродаси сусаяётганини пайқади-ю (ваҳоланки, у доимо иродасига суюниб келаётган эди), ўша заҳотиёқ яна дадил бўлишга беҳуда уринган кўйи иродасининг зўри билан ўз «мен»лигининг илдиз-илдизларига қаради.

*Қит-қит-қит... қра-а-а-а!  
Қит-қит-қит... қра-а-а-а!  
Қит-қит-қит... қра-а-а-а!*

(Яна ўша номаълум қушнинг галати, машъум... қандайдир совуқ, шанги овози! Гўё Клайдни унинг жони учиб юрган хаёл оламидан мана шу мавжуд ёки шубҳали, бироқ машаққатли, тезлик билан амалда ҳал этишини талаб қиласидиган масалага қайтарди.)

У ўйлаганини қилиши керак! Қилиши керак!

*Қит-қит-қит... қра-а-а-а!  
Қит-қит-қит... қра-а-а-а!*

Қизиқ, бу қичқириқда қандай маъно бор: огоҳлантиришми... норозиликми... ҳукмми? Мана шу қушнинг қичқириғи билан Клайднинг миясида туғилаётган машъум ниятлар қайд қилинди. Ҳув ана, қуриган дарахтда турибди ўша баттол қуш... Энди эса сал нарига, ўрмон ичкарироғидаги бошиб-қа дарахт (у ҳам қуриган ва жонсиз эди) тарафга учди... Учиб бора туриб, қичқираётир... Э, худо!..

У яна – ўз иродасига қарши бориб – қайиқни соҳилга бурди. Жомадонини нимага олиб келди, ахир, беш-олтита расм оламан деган эди-ку – шунинг учун энди Робертани расмга тушишга таклиф этиши керак, эҳтимол, қирғоқдами ё сувдами, ўзи ҳам тушар.

Гапнинг қисқаси, Роберта яна қайиққа ўтирганда Клайднинг жомадони шикастланмай, қуп-куруққина соҳилда қолаверади. Клайд қирғоққа ўтиб, иложи борича хушманзара жойларни қидираётгандай кўрсата бошлади ўзини, аслида эса қайтиб келгунимча жомадонимни аниқроқ қайси бир дарахт остига ташлаб кетсан экан, деб жони ҳалак эди. Энди у тезда изига қайтиб келади... тезда... Лекин иккалови қирғоққа бошлашиб тушишмайди энди. Ҳеч қачон! Ҳеч қачон! Робертанинг чарчадим, кетамиз, деб туришига ҳам қарамай, у вақтни чўзяпти, ваҳоланки, унинг ўзи ҳам тезда қайтсак керак, деб ўйлаган эди. Ҳозир, ҳойнаҳой, бешдан ошди шекилли. Клайд қайиқда туриб, мана бу ажойиб дарахтлар, оролча ва қорамтири сув сатҳини акс эттирадиган яна бир-иккита расм оламизу, кейин изимизга қайтамиз, деб кўндиради Робертани.

Нега унинг қўллари бунчалик терга ботиб қалтираяпти-я!

Қоп-қора, намиққан, чақчайган кўзлари дуч келган ёққа олазарак бўларди-ю, аммо фақат Робертага қаролмасди...

Мана, яна улар сувда, қирғоқдан беш юз футча нарида туришибди; қайиқ қўлтиқчанинг деярли қоқ ўртасида, Клайд бўлса қўлидаги ихчам, лекин оғир фотография аппаратини мақсадсиз равишда айлантириб ўйнаяпти; у бирдан даҳшатга тушиб атрофга қарай бошлади. Энди... энди... қачондан бери ўзи орқага суриб келаётган ўша мудҳиши дақиқа энди унинг иродасига ҳамла қила бошлади... Қирғоқда эса – тиқ этган овоз ҳам, товуш ҳам эшитилмайди, биронта одамнинг қораси ҳам кўринмайди... на бир йўл, на кулба, на бирон шарпа кўзга ташланади. Мана, Клайднинг ўзи яратган ёки унинг иродаси-

дан ташқари қандайдир йўл билан яратилган ўша дақиқа тақдирини ҳал этадиган мушкул дақиқа етиб келди; ҳаракат қилиш они! Энди у фақат битта иш қилиши: шахт билан бир зумда қайиқни ўнг ёки чап томонга ағдариши... қайиқнинг чап ёки ўнг биқинини бир силташда сувга киритиб юбориши; агар унда ҳам бўлмаса, бор кучи билан чайқалтириши керак. Мабодо Роберта жазаваси тутиб дод-вой соладиган бўлса, фотография аппарати ёки анави қайиқда ётган эшкакларнинг бири билан бир уриш керак. Агар юраги дов бериб, иродаси етса... бемалол шундай қилиш мумкин... қўз очиб юмгунча, шов-шувсиз қиласа ҳам бўлади. Кейин дарров бошқа ёқقا сузиб кетиши керак... ундан у ёғига эса – эркинлик... омад... Сондра-ку, сўзсиз уники бўлади, баҳт-икబол... бутунлай бошқача, сурурли, қувончли, сирли ҳаёт бошланади.

Шундай экан, нега у чўзяпти?

Унга нима бўлди ўзи?

Нега у чўзяпти?

Мана шу мушкул дақиқада, қатъий ҳаракат қилишдан бўлак бирон чораси қолмаган бир пайтда тўсатдан унинг иродаси-ю жасорати, нафрат ва заби фалаж бўлгандай қотди-қўйди, ваҳоланки, буларсиз қандай ҳаракат қилиш мумкин ўзи, Роберта эса қайиқ қўйруғида ўтирганча унинг ҳаяжонланиб, бирдан буришиб кетган, аммо айни пайтда қатъиятсиз, ҳатто саросимали юзига тикилиб қолди... Тўсатдан Клайд қиёфасидаги қаҳр-ғазаб, жаҳл, йиরтқичларча шиддат ўрнини тортинчоқдик эгаллади, унинг нигоҳи деярли маъносиз тус олди. Унга қараб туриб, қўрқув билан (ўлим ёки ўлимга олиб борувчи ваҳшиёна тошбагирликни ўйлаш туфайли туғиладиган ҳиссиёт) ҳаракат – ҳаракат – ҳаракат иштиёқи ўртасида, шу беҳад, тинимсиз, аммо, ҳарқалай ношуд иштиёқ ўртасида кураш

бораётганини сезиши мүмкін еди. Бу бир зумлик саросима бўлиб, икки қудратли интилиш, яъни ҳаракат ва ҳаракатсизлик ўртасидаги мувозанат тенг келиб қолган дақиқани ифодалар еди. Клайднинг кўз гавҳарлари кенгайиб, баттар қорайди; юз ва қўллари, бутун гавдаси худди томир тортишгандек фужанак бўлди; бир ерда қотиб туриши ва руҳий васвасаси борган сари кучайиб ваҳшиёна бир тусга кирди, аммо бу, аслида қотилликдан ҳам қайтмайдиган шафқатсиз, дадил иродат кучи бўлмай, балки фақат фалажлик ёки қоқшолликнинг ўзгинаси еди.

Роберта Клайднинг теварак-атрофдаги барча нарсаларга фалати бир тарзда ва малол келадиган даражада зид бўлган бу ўз-ўзи билан зўр бериб олишувини, қип-қизил телбалик жазавасига ўхшаш фалати аҳволини кўриб, бирдан ваҳм босиб қичқириб юборди:

– Клайд, Клайд, эсингни едингми? Сенга нима бўлди? Юзингда юз қолмади-ку... сен қандайдир... қандайдир фалати бўлиб кетдинг. Мен сени ҳеч қачон бу алпозда кўрмаганман. Нима бўлди сенга?

Роберта ўрнидан турди-да, қайиқни чайқалтириб юбормаслик учун энгашганча, эҳтиёткорлик билан битта-битта босиб Клайднинг олдига кела бошлиди, назарида ҳозир Клайд қайиқ тубига ёки ташқарига муккаси билан ағарилиб тушадигандай еди. Клайд ўзининг беҳад муваффақиятсизлиги, қўрқоқлиги ва шундай қулай имкониятдан фойдаланолмай ношудлик қилиб турганини ўша лаҳзадаёқ тушуниб етди, уни Роберта ёки қисматнинг ўзи шу даражада оёқ-қўлини боғлаб, азобга солаётгани учун тўсатдан фақат ўзигагина эмас, балки Робертага нисбатан ҳам қалбида нафрат бўрони жўш урди. Лекин шунда ҳам у ҳаракат қилишдан қўрқар эди... у бундай бўлишини истамасди... У Робертага, ҳеч қачон сенга уйланмайман, ҳеч қа-

чон... ҳеч қачон, ҳатто мени чаққан тақдирингда ҳам, сен билан никоҳдан ўтиш учун Ликургдан кетмайман, демоқчи эди... У Сондрани севади, фақат Сондранинг ўзини севади! Лекин Клайднинг гапиришга мажоли йўқ эди. У фақат дарғазаб ва саросимада қолган эди; Робертага худди қутургандек ўқрайиб қараб турарди. Роберта ёнига келиб, унинг қўлини ўз қўлига олмоқчи ва аппаратини қайиқ тубига қўймоқчи бўлганида Клайд уни шиддат билан итариб юборди, аммо шунда ҳам Клайднинг ёмон нияти йўқ эди, фақат Роберта-дан, унинг суйканишларидан, гина ва меҳрибон-чиликларидан... доим хира бўлиб туришларидан қутулишни истарди, холос... Э, худо-е!

Аммо у шу қадар қаттиқ куч билан отилдики, Робертанинг лаблари, бурни, даҳани аралаш аппарат билан ургани ҳам майли-я (у онгсиз ра-вишда ҳали ҳам аппаратни қўлида маҳкам ушлаб турарди), унинг ўзини ҳам қайиқнинг чап биқунига итқитиб ташлади, қайиқ эса қийшайиб сувга ботиб кетай деди. Роберта қора қонга бўялган юзининг оғриғидан ва қайиқ қийшайиб кетганидан даҳшатга тушиб қулоқни тешиб юборгудек даражада чинқириб юборди. Бу чинқириқдан довдираб қолган Клайд сапчиб ўрнидан турди-ю, бир кўнгли унга кўмаклашиб, ушлаб қолиш, бир кўнгли бехосдан уриб юборганига кечирим сўраш ниятида Робертага томон интилди-ю, шу ҳаракати билан қайиқни бутунлай афдариб юборди: Роберта ҳам, Клайд ҳам бирдан сувга тушиб кетишли. Тўнкарилаётган қайиқнинг чап биқуни Роберта сувга бир кўмилиб кетиб, яна қалқиб юзага чиққан пайтида унинг нақ бошига тегди, Клайд ўз рўпарасида Робертанинг телбаларча буришган юзини кўрди. У бир зумда ўзига келди. Роберта эса эс-хушини йўқотиб, юраги чиқиб кетган, оғриқ ҳамда фоят

даҳшатли, васвасали қўрқув зўридан нима содир бўлаётганини билмасди: сув даҳшатли эди, фарқ бўлиш даҳшатли эди, Клайднинг бехосдан, деярли ўйламай туширган бу зарблари даҳшат эди...

- Ёрдам беринглар! Ёрдам беринглар!..
- Ё худо, мен чўкяпман! Чўкяпман! Ёрдам беринглар!..
- Клайд! Клайд!

Бирдан Клайднинг қулоқлари остида бир овоз эшитиди: «Ахир, бу... бу... Эртаю кеч ақлингни банд этган, ноилож аҳволга тушганларингда ёлвориб тилаган нарсанг шу эмасмиди, ахир? Мана ўйлаганинг! Минг ваҳимага тушганинг, қўрқоқлик қилганинг билан, бари бир, у юз берди-ку. Қасддан эмас, бехосдан туширган зарбанг ва бу баҳтсиз ҳодиса сен ўзинг бутун вужудинг билан хоҳлаб юрган, аммо қилишга юрагинг бетламаётган ўша дардисар муаммодан сени халос этди-ку! Наҳотки, энди сен ҳеч нарсадан ҳеч нарса йўқ – бу, ахир, одатдаги баҳтсиз ҳодиса-ку – Робертага ёрдам қилсанг, демак, яна боши берк кўчага тушиб, азоб чекишни истар экансан-да, аслида-ку, худди шу нарса сени обдан тамом қилмаганмиди, энди ундан қутулдинг-ку, ахир? Сен уни қутқариб қолишинг мумкин. Лекин қутқармаслигинг ҳам мумкин! Ана, қара, қанчалик типирчиляяпти, жон ширин-да. Сен ургандаёқ бўлар иш бўлган эди. Энди ўзига қўйса қутуло майди, мабодо унга яқинлашсанг борми, жон талвасасида сени ҳам фарқ қилиб юбориши мумкин. Ахир, сен яшашни истайсан-ку! Агар у тирик бўлса, сенинг ҳаётингда бир чақалик ҳам маъно қолмайди. Салгина, атиги бир неча лаҳзагина ўзингни босиб тур! Кут, кут, ёрдам сўраб ёлвораётганига зътибор берма! Шунда... шунда... Ҳа, ана қара. Ҳаммаси тамом бўлди. У чўкиб кетди. Сен уни ҳеч қачон, ҳеч қачон тирик кўрмай-

сан, ҳеч қачон. Ҳа, ана, шляпанг ўзинг ўйлагандек сувда ётибди. Қайиқда эса Робертанинг ўртиги эшкак ҳалқасига илинганча қолибди. Уларга тегма. Ахир, шулар бу жойда бахтсиз ҳодиса рўй берганига асос бўлолмайдими?»

Шу билан тамом... сув юзи салгина мавжланяпти... теварак атроф ҳайрон қоларли даражада осойишта ва тантанавор. Яна ўша мудҳиш, сирли қушнинг этни жунжитувчи, мазахли қичқириги:

*Қим-қим-қим... қра-а-а-а!*

*Қим-қим-қим... қра-а-а-а!*

*Қим-қим-қим... қра-а-а-а!*

Қоқ-қуруқ дараҳт устида турган хосиятсиз қушнинг қичқириги. Қанот силкишлари.

Клайд вазмин, тумшайиб, хафагазак аҳволда қирғоққа сузиб чиқа бошлади. Робертанинг қичқириғи ҳали ҳам қулоги остида жаранглар, сўниб бораётган кўзларининг телбаларча, ёлворгансимон сўнгти боқишини ҳамон кўриб турарди. Кейин, ҳайрият мен ўлдирмадим, деган фикр миясига келди. Йўқ, йўқ. Худога минг қатла шукур! У қилмади буни. Аммо, ҳарқалай (у қирғоққа чиқиб кийимларини силкий бошлади) у ўлдирди шекилли? Ёки у эмасми? Ахир, Робертага кўмаклашмади-ку, истаса қутқарипши ҳам мумкин эди. Гарчи у бехосдан уриб юборган бўлса ҳам, Робертанинг сувга йиқилишига аслида у айбдор. Лекин тўғри-ку... тўғри-ку...

Сўнаётган куннинг фира-шираси ва сокинлиги. Ўзимиз билган ўша меҳмондўст ўрмонларнинг қоронфи бурчаклари, баданигача жиққа ҳўл бўлган Клайд қуп-қуруқ жомадони олдида турган кўйи қоронфи тушгунча кийимларини қуритиб олмоқчи бўляпти. Ҳозирча у жомадонидан ишлатилмай қолган фотоаппарат оёқчаларини ечди-да, ўрмон ичкари-

роғида ағанаб ётган, ҳадеганда кўз тушмайдиган бир қуруқ гўлани топди-ю, оёқчаларни ўшанинг остига яшириб қўйди. Ишқилиб, ҳеч ким кўрмадимикин?

Бирор қараб турган бўлса-я? Кейин у жойига қайтиб келди-ю қайси томонга юрсамикин, деб ўйланиб қолди. У фарб тарафга, кейин жанубга қараб йўл олиши керак. У зинҳор адашиб кетмаслиги лозим. Тавба, яна бояги қушнинг асабга тегувчи шанғи овози эшитиляпти. Сўнгра атрофга зимистонлик чўкди, ёзги юлдузлар эса зулматни ёритолмади. Йигитча қоронғи, кимсасиз ўрмонни кесиб боряпти; бошида қуруқ похол шляпа, қўлида жомадон, у тез-тез, аммо эҳтиёткорлик билан жанубга... жанубга... қараб кетяпти.

## УЧИНЧИ КИТОБ

### I БОБ

**К**атараки округи Учинчи миль Кўрфази номи билан аталган қишлоқ чеккасидан бошланиб, бўйи шимолга қараб Канада чегараларида бошланиб, шарққа қараб, Қояли ва Скарф дарёларигача ўттиз миль келади. Бу бўшлиқнинг каттагина қисми одам оёғи етмаган ўрмонлар ва кўллардан иборат бўлиб, ҳар жой-ҳар жойда Кунц, Грасс-Лейк, Шимолий Уоллес, Браун-Лейк сингари қишлоқ ва посёлкалар қад кўтариб туради; бош шаҳар ҳисобланган Брижбургда округга қарашли ўн беш минг аҳолининг икки мингга яқини яшайди. Шаҳарнинг марказий майдонида кўхна, аммо баҳайбат соатли минора билан безатилган тузуккина суд биноси жойлашган, минора устида эса доимо беш-ўнта капитар; шаҳарнинг асосий тўртта кўчаси мана шу майдонга келиб туташарди.

Тўққизинчи июль, жума; Фред Хейт исмли терговчи суд биносидаги ўз кабинетида ўтирибди, ўзи бўйдор, елкадор киши бўлиб, мош-гуруч соқолига ҳатто мормоналар оқсоқолининг ҳам ҳаваси келиши турган гап эди. Кенг юзи, катта-катта қўл-оёқлари чорпаҳил жуссасига монанд.

Бизнинг ҳикоямиз бошланаётган, соат иккилардан ошган туш пайтида, Хейт хотинининг илтимосига кўра ёзib олдирган каталог-китобни эрин-чиқдик билан варақлаб, харид қилинган нарсаларни почта орқали юборадиган дўконлар тўғрисида маълумот тўплаб ўтиради. У берсанг ейман, ур-

санг ўламан деб турган бешта боласига бошмоқ, камзул, шапка ва шапкачалар олиш дардида нарх-наволарни кўздан кечираётib, ўзига лойиқ қишилик пальто борлигини билиб қолди, кенг-мўл қилиб тикилган, ёқаси энли, кенг белбогли ва йирик-йирик чиройли тутгмалари бу пальтога қараб туриб, кўнгли ўксинганча ўй суриб кетди; йилига атиги уч минг доллар тушадиган ҳамёни бу қишида бунақанги ортиқча харажатни сира кўтаролмас, бунинг устига хотини Элла ҳам мўйна пўстин олиш дардида юрганига мана, салкам уч йил бўляпти.

Лекин у бу хусусда ҳар қанча бош қотирмасин, тўсатдан жиринглаган телефон хаёlinи бўлди.

– Ҳа, мистер Хейт эшитяпти.. Катта мушгир кўлидан Уоллес Айхэм гапиряпти дейсизми? Ҳа, Уоллес, қулоғим сизда... бир йигит билан бир қиз чўкиб кетибди? Ҳа, яхши, бир дақиқа сабр қилинг...

У, яқиндагина «терговчи секретари» лавозимида давлат хизматига кирган эпчил йигитчага юзланди.

– Эрл, маълумотларни ёзиб боринг, – кейин телефонга қараб гапирди: – Яхши, Уоллес, энди менга барча далил-тафсилотларни айтинг, ҳа, ҳа. Аёлнинг мурдаси топилган, эриники эса йўқ... хўш-хўш... Қайиқ жануб томондаги соҳил яқинида тўнкарилиб ётган экан... хўш. Астари йўқ похол шляпа... хўш-хўш. Аёлнинг оғзи ва кўз атрофлари лат еган... Пальтоси билан шляпаси меҳмонхонада... хўш-хўш... Пальтосининг битта чўнтағидан хат чиқди... кимга ёзилган экан? Миссис Олденга, Бильц, Маймико округига? Хўш... Эрининг мурдасини ҳали ҳам қидиришяптими? Хў-ўш... Ҳозирча ҳеч қандай натижа йўқ денг?.. Тушунарли... Ҳа, майли, яхши... Уоллес, энди гап бундоқ: пальтоси билан шляпаси жойида қолаверсин. Тўхтанг, ўйлаб олай... ҳозир икки ярим, мен тўртдаги поезд билан етиб бораман. Поездга меҳмонхонадан автобус юборишади, шекилли? Хўп, ўша автобусда

бораман, аниқ... Ҳа, ростдан Уоллес, мурдани то-пишганда тепасида бўлган одамларнинг барини ёзib олинг. Яна нима? Чуқурлиги ўн саккиз фут, ундан кам эмас денг-а? Хўш... Эшкак ҳалқасига ўртиги илиниб қолган... хўш..., Жигар ранг ўртик... Шуми ҳаммаси?.. Хўш... Хўп, сиз қандай қиёфа-да топган бўлсангиз, ўшандай қолдиришга буйруқ қилинг. Мен ҳозироқ йўлга чиқаман. Ҳа. Миннатдорман сиздан, Уоллес... кўришгунча хайр.

Мистер Хейт шошмасдан трубкани илди, худди шундай шошмасдан ёнғоқ ёғочидан ясалган кенг креслосидан турди-ю, қалин соқолини силаб, котиби Эрл Ньюкомга қаради (мистер Хейтнинг котиб-машинкачиси ҳам, клерки<sup>1</sup> ҳам, қўйинг-чи, югурдаги ҳам шу битта Эрл эди).

– Ҳаммасини ёзib олдингизми, Эрл?

– Ҳа, сэр.

– Унда пальто билан шляпани кийинг, кетдик. Биз учу ўндаги поездга улгуришимиз керак. Айрим гувоҳларга поезддаёқ чақирув қофози тўлдиришингиз мумкин. Ҳар эҳтимолга қарши ўзингиз билан ўн беш-йигирматача бланка олиб олинг: ўша ерда учратган гувоҳларнинг номларини ёзib олишга тўғри келади. Ҳа, илтимос, миссис Хейтга телефон қилинг-да, айтинг, бугун кечки овқатга ҳам, ҳатто охирги поездга ҳам улгуrolмасам керак. У ерда биз эртагача қолиб кетишимиз ҳам эҳтимол. Бунақа пайларда иш кутилмаганда чаппасига айланиб кетиши мумкин, билиб бўлмайди, шунинг учун ҳамма нарсага шай туриш керак.

Хейт алмисоқдан қолган зах хонанинг бурчагида турган кийим-кечак шкафига яқин борди-да, ундан сават панамасини олди. Кенг ҳошиялари пастга қараган панама унинг чақчайган, аслида эса мулоийм укки кўзли, қуюқ соқолли юзини хий-

<sup>1</sup> Клерк – Фарбий европа мамлакатлари ва АҚШда идора ходими. (Таржимон.)

ла олимистерроқ күрсата бошлади. У ёқ-бу ёғини тұғрилаб олганидан сүнг, секретариға:

– Эрл, мен бир дақиқага шериф<sup>1</sup>га кириб чиқмоқчиман, – деди. – Сиз «Республикачи»ға ҳам, «Демократ»ға ҳам құнғироқ қилинг-да, воқеани гапириб беринг; тағин газеталар биздан бирон нарсани бекитишпәти, деб үйлаб юришмасин. Вокзалда учрашамиз.

Хейт битта-битта қадам ташлаб хонадан чиқди.

Үн түккіз ёшлардаги соchlары ҳұрпайған, үзи жудаым жиддий, аммо гоҳи пайтларда парищенхотир юрадиган, новча, ориқдан келган Эрл Ньюком үша заҳотиёқ судға чақириш бланкаларидан бир тахини олди-да, чүнтагига тиқа туриб, миссис Хейтта телефон қоқа бошлади. Кейин у газета таҳрирятларига құнғироқ қилиб, Катта мушгир қўлидаги баҳтсиз ҳодиса ҳақида хабар берди-ю, шоша-пиша ҳаво ранг тасмали похол шляпасини олганча (шляпа унга анчагина катта эди) пастта отилди; бу атрофларда машхұр, үзи ҳам анча-мунча уддабуро прокурор Орвил Мейсон кабинетининг очиқ эшиги олдида Зилла Саундерсга урилиб кетди. Зилла эрга тегмаган қари қызы бўлиб, прокурорнинг бирдан-бир стенографисткаси ҳам шу эди. У аудитор<sup>2</sup> идорасига бормоқчи бўлиб турган эди, аммо, одатда ҳадеганда хамири ачимайдиган мистер Ньюкомнинг ҳозир шошиб кетаётгани ва ташвишли кўринишидан ажабланди-ю, орқасидан чақирди:

– Хэлло, Эрл! Нима бўлди үзи? Қаёққа бунчалик ошиқяпсиз?

– Баҳтсиз ҳодиса. Катта мушгир қўлида икки киши чўкиб кетибди. Тагида бошқа гап борга ўхшайди. Мистер Хейт үша ёққа кетяпти, мен ҳам

<sup>1</sup> Шериф – Англия ва АҚШда маъмурний ва суд амалдорларидан бири.

<sup>2</sup> Аудитор – юрист амалдор. (Таржимон.)

бирга бораман. Биз учу үндаги поездга улгуриши-  
миз керак.

– Қаердан билдинглар? Улар шу ерлик эканми?

– Ҳозирча билмайман, менимча, бу ерлик бўлиш-  
маса керак. Қизнинг чўнтағидан Маймико округига,  
Бильцга, аллақандай миссис Олден номига ёзилган  
хат чиқибди. Қайтиб келганимиздан сўнг ҳаммаси-  
ни гапириб бераман ёки қўнфироқ қиласман.

– Э, худо-ей, агар бу жиноят бўлса, унда, ҳой-  
наҳой мистер Мейсон ҳам қизиқса керак.

– Албатта-да. Мен унга телефон қоқаман ёки  
мистер Хейтнинг ўзи қўнфироқ қиласди. Агар Бада  
Паркер ёки Кэрел Бэднелни кўрсангиз, шаҳардан  
ташқарига кетганимни айтиб қўйинг. Кейин, Зил-  
ла, сиздан илтимос, ойимга телефон қоқиб, уни  
ҳам огоҳлантиринг, майлими? Ўзим телефон қи-  
ломайдиганга ўхшайман.

– Қўнфироқ қиласман, ташвиш тортманг.

– Раҳмат.

Бошлигининг ҳар қунги бир тахлитдаги тирик-  
чилигини алғов-далғов қилиб юборган бу воқеадан  
манфаатдор бўлган Ньюком икки зинани бир сак-  
раб босганча округ суди пиллапоясидан қувноқдик  
ва эпчиллик билан чопиб туша бошлади. Миссис  
Саундерс эса, бошлиги республикачи партия-  
нинг бўлажак округ конференциясига оид айрим  
масалалар билан кетганини билгани учун, унинг  
кабинетида янгиликни ўртоқлашадиган ҳеч ким  
йўқлиги сабабли аудитор идорасига қараб юрди:  
ҳарқалай, у ерда учраган одамга кўлда содир бўл-  
ган фожиа хақида ўзи билганларини ҳикоя қилиб  
бериши мумкин-ку, ахир.

## II БОБ

Терговчи Хейт ва унинг ёрдамчиси йиққан маълумотлар сирли ва хавотирли хусусиятга эга эди. Кўринишидан бахтли, бир-бирига муносиб жуфти ҳалол саёҳатчилар тушган ўша қайиқ йўқолган куннинг эртасига эрталаб меҳмонхона хўжайинининг ташаббуси билан қидирув ишлари бошланган, натижада оролчанинг нарёғидаги Ҳилол қўлтиғидан тўнкарилиб ётган қайиқ, шляпа ва ўртиқ топиб олинган. Ўша заҳотиёқ меҳмонхонанинг ҳамма хизматчилари, йўл қўрсатувчилар ва меҳмонлар орасидан бу ишга кимни кўндириб ёллашса – ўшалар қўлга шўнғиб, чўкиб кетганларнинг мурдасини топиб чиқариш мақсадида учи чангак узун ходалар билан сув тубини кавлаштира бошлашган. Йўл қўрсатувчи Сим Шуп, меҳмонхона хўжайини ва қайиқлар қароргоҳини изярага олган кишининг гапига қараганда, ўлган аёл жуда ёш ва хушбичим бўлиб, ҳамроҳи эса – ҳойнаҳой, бадавлат оиласардан бирининг фарзанди эди, шунинг учун ҳам бу ерда яшайдиган бармоқ билан санарли кишилар – дарахт кесувчилар ва меҳмонхона хизматчилари бу ҳодисага қизиқибгина эмас, балки ачиниб ҳам қарай бошладилар. Бунинг устига тиқ этган шамолсиз очиқ бир кунда бунақсанги сирли фожиа юз бериши ҳеч бирининг ақлига сифмас эди.

Туш пайтига борганда чангак билан иш кўраётган дарахт кесувчилардан бири Жон Поль беш-ўн марта уриниб, кейин Робертани кўйлагидан илганча сув остидан кўтарганда одамларнинг ҳаяжони баттар авжга чиқди; унинг юзида – оғзи, бурни, ўнг қовоғи ва кўзининг остида зарбдан қолган кўкиш доғлар яққол кўриниб туради, йифилгандарга бу ўша заҳотиёқ шубҳали бўлиб туюлди. Жон Поль қайиқни бошқараётган шериги Жо Райнер

билин бирга Робертани сувдан чиқарди-да, юзига тикилиб туриб:

– Вой, шўринг қурфур-а! – деб хитоб қилиб юборди. – Қушдай енгил экан-а! Ҳатто қандай чўкиб кетганига ҳам ақлим етмайди.

У ўтирган жойида эгилди-да, бақувват қўллари билан жиққа ҳўл, жонсиз ётган Робертани даст кўтариб қайиққа одди; бу пайтда шериклари бошқа қайиқларга ишора қилишган эди, улар тезда шу томонга сузид кела бошлишди.

Жон Поль (қизнинг сувда ёйилиб, юзини тўсиб олган) узун, йўғон қўнғир сочларини бир томонга суроётниб:

– Вой-бў, роса азобланибди-ку! – деб қўшиб кўйди, – Жо, бир қарагин! Бу бечора гўдакни бир нарса билан боплаб туширишганга ўхшайди назаримда. Қара, қарагин!

Сал ўтмай дарахт кесувчилар ва меҳмонхонада истиқомат қилувчиларнинг бари қайиқларини шу ёққа ҳайдаб келиб, Робертанинг юзидағи моматалоқларни кўра бошлидилар. Унинг жасадини юқорига, қайиқ қароргоҳига олиб кетишлари ва ҳамроҳининг мурдасини яна қидира бошлишлари биланоқ турли-туман гумонлар айтила бошланди: «Бу ерда бошқа бир гап борга ўхшайди... Кўк доғлар... ва умуман... Шунақанг осойишта кунда қайиқ қандай қилиб ағдарилиб кетиши мумкин?» «Ҳозир кўрамиз: сув тубида яна одам бормикин ёки йўқми...» Бир неча соат давомида қидира-қидира, охири ҳеч қандай натижага чиқаришолмагандан сўнг ҳамма йифилганлар: сувда ҳойнаҳой эркакнинг жасади бўлмаса керак ва аввалданоқ бўлмаган, деган қарорга келишди, бу даҳшатли, ташвишли фикр эди...

Шундан кейин Клайд ва Робертани бекатдан олиб келган йўл кўрсатувчи ҳамда Катта мушгир кўли ва Ўтлоқзордаги меҳмонхона хўжайинлари билан суҳбатлашилгандан сўнг қуйидагилар

аниқланди: 1) чўккан қиз жомадонини Қуролсоз бекатида қолдиргани ҳолда, Клифорд Голден жомадонини ўзи билан олиб кетган; 2) Ўтлоқзор кўли ва Катта мушгир меҳмонхоналаридаги рўйхатларда шубҳали қарама-қаршилик мавжуд: бир жойда – Карл Грэхем, бошқасида эса – Клифорд Голден деб ёзилган, ваҳоланки, ташқи қиёфасига қараганда иккови ҳам сўзсиз битта одам бўлган (меҳмонхоналарнинг иккала хўжайини муфассал муҳокамадан кейин, шундай қатъий хуносага келишидди) ва ўзини Клифорд Голден ёки Карл Грэхем деб атаган ўша кимса Катта мушгир кўлига олиб келаётган йўл кўрсатувчидан: бугун одам қўпми у ерда, деб суриштирган. Шу гаплардан кейин ноаниқ гумонлар бу ишда ҳаром қўллик бор, деган қатъий ишончга айлана борди. Энди бунга ҳеч кимда шубҳа қолмади.

Шимолий ўрмонларда яшовчи кишилар бу воқеадан чуқур ташвишга тушганлари ва ўзларининг гумонлари сўзсиз ҳақ чиқишини терговчи Хейт келиши биланоқ унга шама қилиб айтиб ҳам қўйишидди. Уларнинг фикрича, Клифорд Голден ёки Карл Грэхемнинг жасади қўл тубида аввал бошданоқ, умуман бўлмаган. Хейт қайиқ қароргоҳидаги уйчада турган каравотга авайлаб ётқизиб қўйилган номаълум қизнинг мурдасини қўздан кечириб чиқди-ю, унинг ёшлиги ва гўзаллигини кўриб, фақат хушбичимлигидан эмас, балки уни ўраб олган сирли гумонлардан таъсиранганидан кўнгли бир хил бўлиб кетди. Бунинг устига меҳмонхона идорасига қайтиб келиб, Роберта пальтосининг чўнтағидан топилган хатни ўқиб чиққандан сўнг, уни энг мудҳиш шубҳалар қамраб олди, чунки у ўқиган хат тубандагича эди:

«Ўтлоқзор кўли, Нью-Йорк штати, 8 июль

### Қадрли ойижон!

Биз энди шу ерда никоҳдан ўтмоқчимиз, лекин буларни фақат сиз учун ёзяпман. Илтимос, мактубимни дадамга ва умуман ҳеч кимга қўрсатманг, чунки бу ҳозирча сир. Мен сизга рождество куни учини чиқариб айтган эдим-ку, шунинг учун ташвиш тортиб ўтируманг, мендан ҳеч нарса сўраманг ва мен ҳақимда ҳеч кимга гапирманг. Фақат мендан хат олганингиз ва менинг қаердалигини билишингизни айтсангиз кифоя. Қўрқманг, ҳаммаси жойида бўлади. Сизни қучоқлаб, иккала юзингиздан ўпиб қоламан, ойижон. Хавотир олманг, дадамга ишларим жойидалигини тушунтиришга ҳаракат қилинг, лекин на дадамга, на Эмилияга, на Том, на Гифордга бирон нарса дея кўрманг, хўпми? Сизни қайта-қайта ўпиб қоламан.

*Сизни жонидан афзал кўрувчи Берта.*

P.S. Буларнинг ҳаммаси ҳозирча сир, шунинг учун фақат иккаламиз билганимиз маъқул, ўртада бир оз вақт ўтгач сирлиги ҳам қолмайди, ана ўшандага сизга хат ёзиб, тушунтириб бераман».

Варақнинг юқори ўнг бурчига конвертдагига ўхшаш «Ўтлоқзор кўли» меҳмонхонаси, Нью-Йорк штати, Жек Эванс мулки» деган тамфа босилган эди. Афтидан, бу хат улар мистер ва миссис Грэхем номи билан меҳмонхонада тунаб чиқсан кунларининг эртасига эрталаб ёзилган бўлса керак.

Вой, бу ёш қизларнинг енгилтаклиги!

Икковлари никоҳсиз бўлсалар ҳам меҳмонхонада худди эр-хотиндек туришгани хатдан шундоқ маълум эди. Мистер Хейт мактубни ўқий туриб бутун аъзойи баданини қалтироқ босди, чунки унинг ҳам қизлари бор, у қизларини ниҳоятда севарди. Аммо шу пайт миясига бир фикр келди. Округда ҳадемай сайловлар бошланади; ноябрда

барча маҳаллий ҳокимият, шу жумладан, терговчи ҳам кейинги уч йилга қайта сайланиши лозим; бунга қўшимча равища шу йилнинг ўзида округ суддарига ҳам сайловлар бўлади (уларнинг ваколат муддати олти йил). Августда, яъни тахминан бир ярим ойлардан сўнг республикачи ва демократик партияларнинг округ конференциялари бўлиши керак, ана ўшанда тегишли мансабларга номзодлар кўрсатилади. Лекин ҳозирги прокурор айни пайтда округ судьяси даражасидан юқори бирорта бошқа мансабга умид қила олмас эди, негаки у прокурорлик ўрнини икки галдан бери сурункасига эгаллаб келаётган эди. Бунга у ўзининг маҳаллий сиёсий нотиқдик истеъоди туфайлигина эмас, балки юқори суд амалдори сифатида ўз дўстларига бера олган хилма-хил ёрдамлари туфайли ҳам эришган эди. Аммо энди у борди-ю, агар номзод бўлиш баҳтига эришмаса ва округ судьялигига сайланмай қолса, шу билан унинг сиёсий мартабаси ҳам тугаган ҳисоб эди. Яна бир чатоқ жойи – бутун ваколати давомида бирон марта ҳам унинг довругини ёядиган мундоқ тузукроқ суд муҳокамаси бўлмаган, шу боисдан у келгусида сайловчиларнинг ҳурмат ва эътиборидан тўла умидвор бўла олмас эди. Бироқ ҳозир...

Катта мушгир кўлидаги воқеа, деб ўйларди узоқни кўрадиган терговчи, энди росаям қўл келиши, аҳолининг дикқат-эътибори ва хайриҳоҳлигини ўша кишига – ҳозирги прокурорга, унинг, Хейтнинг энг яқин ва нафи тегиб турадиган дўстига оғдириб юбориши турган гап. Бу Хейтнинг ҳам қўлини узун қилиб обрўига, оқибатда эса ўз партияси номзодлари рўйхатига самарали таъсир кўрсатиши, демак, бўлажак сайловда уларнинг бари бирор-бир мартабага эга бўлиб қолишлари аниқ эди. Ҳозирги прокурор фақат ўз номзодини кўрсатишларига эришибгина қолмай, ҳатто ноябрдаги сайловда олти йиллик муддатга судья қилиб сай-

лашларига ҳам эришарди. Сиёсат оламида ахир, бундан ҳам галатироқ воқеалар юз берган-ку...

Хейт ўша заҳотиёқ Роберта чүнтагидан топилган хат түғрисида лом-мим демасликка қарор қылди, чунки агар чиндан ҳам жиноят юз берган бўлса, бу хат айбдорнинг сирини тезда фош этиб берадигандек, ҳозирги сиёсий вазиятда эса шу муаммони ечишга алоқадор бўлган ҳар бир кишига довруқ ва ҳурмат-эҳтиром ваъда қилаётгандек туюлди унга.

У бир йўла Ньюкомга ва Роберта билан Клайдни Катта мушгир кўлига олиб келган йўл кўрсатувчига Қуролсоз бекатига бориб, у ерда қолдирилган жомадонни Хейтнинг ўзидан ёки прокурор юборган одамдан бўлак бирорта кишига бермасликни тайинлаб келишни буюрди. Кейин у Бильцга қўнғироқ қилиб, Берта ёки Альберта исмли қизи бор Олденлар оиласи у ерда яшайдими-йўқми, шуни билмоқчи эди, аммо (назарида худди худонинг хоҳишига кўра юз бергандек) орадан лоп этиб бошқа иш чиқиб қолди: у турган хонага шу ерлик овчилар икки эркак билан бир бола, кўлдаги воқеадан хабардор бўлган кишиларни эргаштириб, бамисоли ўқдай отилиб кириб келишди. Бизда жуда муҳим гап бор, деб мурожаат қилишди улар, кейин бири олиб, бири қўйиб, бирини бири тўғрилаб кўрганларини гапира кетишди. Улар ўша Роберта чўккан куни кечки соат бешларда кўл бўйида ов овлаш ва балиқ тутиш мақсадида Учинчи миль Кўрфазидан (Катта мушгирнинг жанубидан деярли ўн икки милча наридан) йўлга чиқишибди. Шундай қилиб, улар куни кечқурун соат тўққизларга яқин Катта мушгирнинг жанубий соҳилига этиб келишгандами ёки ҳали уч милча наридаликларида, ишқилиб, бир йигитчага дуч келишибди, улар уни Катта мушгир меҳмонхонасидан Учинчи миль Кўрфази посёлкасига бораётган саёҳатчи бўлса керак, деб ўйлашибди. У жуда пўрим, олифта кийинган бўйи

либ, бу ердагиларга мутлақо ўхшамас экан. Бошида похол шляпта, күлида эса жомадони бор экан, у эрталаб поездда Учинчи миль Кўрфазига бор-йўғи бир соатда бора олиши мумкин бўлгани ҳолда, келиб-келиб мана шундай бемаҳалда пиёда кетаётгани уларни ҳайратга солибди ўшандা. Яна учрашиб қолишганда кўрқиб кетгани ҳам қизиқ туюлибди уларга. Овчиларнинг сўзига қараганда, ўрмонда дуч келиб қолишганда у худди жон ҳолатда қочишни мўлжаллагандек даҳшат ва саросимага тушибди. Тўғри, ойдин кеча бўлгани учун овчилардан бири кўтариб олган фонуснинг пилиги жуда пасайтириб қўйилган, уларнинг ўзи ҳам ўрмон йиртқичи изидан бораётган одамлардек аста-аста қадам ташлаб кетишаётган экан. Аммо у жойлар ниҳоятда хавфсиз, ахир, у ерда фақат уларнинг ўзи сингари тўғри одамларгина учрайди, шунинг учун ўша йигитчанинг ўзини панага олиб, буталар орасига яширинмоқчи бўлгани ноўрин эди. Ҳа, айтгандай, фонусли йигитча – Бад Брюнинг пиликни сал кўтарганида бояги йўловчи бир оз ўзига келиб, овчиларнинг саломига алик қайтарибди, кейин Учинчи миль Кўрфази ҳали олисми, деб сўрабди. Улар: етти милча масофа бор, дейишгандан сўнг у яна йўлида давом этибди, овчилар ҳам бу фалати учрашувни муҳокама қила-қила ўз йўлларига равона бўлишибди.

Мана энди ўша одамнинг белгилари Клайдни Куролсоз бекатидан олиб келган йўл кўрсатувчнинг ҳамда Катта мушгир кўли ва Ўтлоқзордаги меҳмонхона хўжайнларининг таърифига бошдан-охир мос бўлиб тушгандан кейин чўкиб ўлган номаълум қизни қайиққа солиб кетган йигит ўша йўловчи эканлигига зифирча ҳам шубҳа қолмади.

Эрл Ньюком шу заҳотиёқ ўз бошлиғидан Учинчи миль Кўрфазидаги яккаю ягона меҳмонхона хўжайнинг телефон қоқиб, ўша сирли кимса у ерда тўхтаганми-йўқми – аниқ билишга рухсат сўради. Су-

риштирса, у түхтамаган экан. Ҳойнаҳой, мана шу учта овчидан ташқари уни ҳеч ким, ҳеч ерда кўрмагандир ҳам. Гарчи ўша куни кечкурун, ўша одамга ўхшаш, қўлида жомадон, аммо похол шляпа эмас, шапка кийиб олган бир йигитчани ўрмонда учратган кунларининг эртасига эрталаб Шейронда ҳам қўришгани аниқланган бўлса ҳам (у, Учинчи миль Кўрфази билан Шейрон ўртасида қатнайдиган «Оққуш» номли кўл пароходчасига тушган экан), уни бари бир ер ютгандек эди. Унинг изига тушиш қийинлашди. Шейронда ҳозиргача ҳеч ким ўшандай одам келиб-кетганини эслай олмас эди. Ҳатто капитаннинг ўзи ҳам, кейинчалик эътироф этишига қараганда, ўша йўловчи қандай тушиб қолганини сезмабди: ўша куни пароходда ўн бешта одам бўлиб, капитан уларнинг биронтасини ҳам эслаб қолмаган екан.

Аммо Катта мушгирда истиқомат қилувчи бутун аҳоли аста-секин, ўша кимса ким бўлишидан қатъи назар – ашаддий, совуққон қотил, деган қатъий фикрга кела бошлади. Шунинг учун ҳам ҳамма унинг ушланиши ва қамоққа олинишини жуда-жуда, ўн карра, юз карра истамоқда эди. Аблаҳ Қотил! Кўлда юз берган бу ҳаяжонли фожиа бир зумдаёқ оғиздан-оғизга ўтиб, телефон ва телеграфлар орқали, Олбенида чиқадиган «Аргус» ва «Таймс Юнион» ёки Ликургда чиқадиган «Стар» сингари маҳаллий газеталар орқали ҳамма ёқقا ёйилди-қўйди; гапирган одамлар бу воқеанинг остида қандайдир даҳшатли жиноят бўлса керак, деб имо-ишора қилиб қўйишарди.

### III БОВ

Терговчи Хейт хизмат бурчини ўтаб, изига қайтар экан, қиласидиган ишларини режалаб ола бошлади. Бу қайгули ишда унинг навбатдаги қадами қандай бўлиши керак? Жўнашидан олдин яна бир

марта Робертани күрмөң мақсадида у ётган хона-га кирди-ю, ич-ичидан чуқур ҳаяжонга тушди: Роберта фоят норасида, пок ва ёқимтой күриниб кетди күзига. Астарбоп матодан тикилган одмигина ҳаво ранг күйлагининг жиққа ҳўл бурмалари гав-дасига ёпишиб турибди; жажжи қўллари кўкси-да, йигирма тўрт соат сув остида ётганидан ҳали қуриб улгурмаган сарғиш-қўнфир соchlари нимаси биландир кишида, у чаққон ва эҳтиросли бўлган, деган фикр туғдирарди, шуларнинг бари жиноят-га яқин йўламайдиган майин бир жозиба тўғриси-да сўйлаётгандай туюларди.

Лекин бу ниҳоятда қайгули ишнинг шахсан унга, терговчига алоқадор бўлган бошқа томони ҳам бор эди. У Бильцга, хат эгаси миссис Олден ҳузурига бориб, унга қизининг ўлими тўғрисидаги шум хабарни айтсинми, бир йўла бечора қизнинг ҳамроҳи ким бўлганлиги ва ҳозир унинг қаердали-гини ҳам суриштиrsинми? Ёки у аввалига Бриж-бургда прокурор Мейсонга учрашиб, юз берган воқеани унга ипидан-игнасигача гапириб бергани маъқулми, ана ўшанда мистер Мейсон зиммасига, ҳойнаҳой, эътиборли бир оиласа қақшатқич зарба беришдек нохуш вазифа юклатилган бўлар эдими, балки? Бу ўринда сиёсий вазиятни ҳисобга олиш зарур эди. Гарчи терговчи мустақил ҳаракат қилиб, шу иш баҳонасида ўзини кўрсатиб қолиши мумкин бўлса ҳам, аммо партияning умумий тар-тибиға риоя қилиш лозим эди: партия рўйхати-нинг бошида сўзсиз, кучли одам туриши ва кузги сайловларда партияning мавқеини мустаҳкамлаши даркор эди, кўлдаги фожиа эса айни муддао эди. Демак, иккинчи йўл энг оқилона йўл бўлиб, Хейт-нинг прокурор дўсти учун ажойиб имконият яратиб берарди! Хейт шу фикрларни ўйлаган кўйи Бриж-бургга келди-ю, прокурор Орвил Мейсон кабинетига гердайганча кириб борди, прокурор эса терговчи-

нинг хатти-ҳаракатидан нимадир муҳим бир воқеа борлигини сезди ва ўша заҳотиёқ зийрак тортди.

Мейсон ўрта бўй, яғриндор ва жисмоний жуда бақувват киши эди; лекин у ёшлигига бехосдан, баҳтга қарши, бурнини пачоқ қилиб олганидан сўнг ёқимтой, ҳатто кўҳдиккина юзи хунуклашиб, деярли қўрқинчли бир қиёфага кирган эди. Аммо Мейсон унча-мунчага бўш келиб ўтирадиган анойилардан эмасди, у қайтага нозик табиат ва хаёлпараст одам эди. Болалигида у йўқчилик ва хўрликларни кўп кўргани учун кейинчалик, бир оз омади юришган кезларда пешонаси ярқироқ кишиларга тақдир арзандалари деб қарайдиган бўлди. Камбағал фермердан тул қолган онаси бир амаллаб рўзгор тебратиб тураг, шу боисдан у онасига ёрдам бериш мақсадида ўн икки ёшиданоқ болалик шўхликлари ва ҳузур-ҳаловатларидан деярли бутунлай воз кечган эди. Ўн тўрт ёшида эса конькида учиб кетаётуб йиқилиб тушган ва афти башарасини бир умрга ногирон қилиб олган эди. Шу сабабли у йигитлик йилларида қиз талашишда доимо енгилиб келарди: қанча-қанча умид боғлаган қизлари бошқаларга насиб қилганидан сўнг аста-секин у ўзининг майиблигини салга кўнглига оладиган бўлиб қолган эди. Охири бориб, у одатда фрейдистлар<sup>\*</sup> руҳий-شاҳвоний маиблик деб атайдиган аҳволга тушган эди.

Лекин ўн етти ёшга чиққанда у Брижбургда босиладиган «Республикачи» газетаси ношири-нинг эътиборини қозонди-ю, газетанинг доимий қисқа хабарчисига айланди. Кейинчалик Орвил-нинг мақолалари Олбэнидаги «Таймс Юнион», Утигадаги «Стар» сингари газеталарда ҳам босила бошлиди, ўн тўққизга қадам ташлаганда эса у собиқ Брижбург судьяси Дэвис Ричофер маҳка-

<sup>1</sup> Фрейдизм – психологияк ва социологияк маълумот. Унинг асосчи австриялик психиатр врач З. Фрейд бўлган. (Таржимон.)

масида ҳуқуқ фанлари мажмуасини ўрганиш имкониятига эга бўлди. Орадан йиллар ўтгач, адвокатлик иши билан шуғулланиш ҳуқуқини олди; у баъзи бир маҳаллий сиёсатдоnlар ва савдогарларнинг хайриҳоҳлигини қозонди, улар эса Мейсонни штат қонун чиқариш мажлисининг қуий палатасига ўтказиб юбориши; у ерда қаторасига олти йил мажлисбозлик қилди ва камсукумлиги, аммо узоқни кўра билиши, шуҳратпастларча буйруқ бажаришга тайёр туриши оқибатида пойттахт каттаконларининг мурувватига эришди, айни пайтда у ўз қадрдан шаҳридаги ҳомийларининг ҳам кўнглини қолдирмади. Унда нотикдик истеъдодидан ҳам хийлагина бор эди. Брижбургга қайтгандан сўнг аввалига прокурор ёрдамчиси вазифасида ишлаб турди-да, кейин, орадан тўрт йил ўтгач, аудиторликка сайланди ва ниҳоят, сурункасига икки марта тўрт йилдан прокурор бўлди. Жамоат орасида баланд мартабага эришиб олгач, ўзига тўқ маҳаллий дорихона хўжайинининг қизига уйланди-ю, ҳадемай икки боланинг отаси ҳам бўлди.

Мисс Саундерс Катта мушгир кўлида юз берган ҳодиса тўғрисида ўзи билганларини Мейсона га оқизмай-томизмай гапириб берган ва Мейсон ҳам худди терговчии Хейтга ўхшаб, бу жиноят теварагида сўзсиз кўтариладиган шов-шувлар ўзига жуда қўл келишини дарров тушунган эди. Бу анча бўшашиб қолган сиёсий мавқенини мустаҳкамлаш имконини берар, ҳатто, афтидан, унинг бутун келажаги масаласини ҳам ҳал этиши мумкин эди. Қандай бўлишидан қатъи назар, у бу масалага ниҳоятда қизиқиб қолди. Ҳозир Хейтнинг олдида, бу ишдан ўзининг бағоят манфаатдор эканлигини яшириб ўтиrmади.

- Ишлар қалай, Хейт?
- Гап бундай, Орвил, мен ҳозиргина Катта мушгирдан қайтиб келдим. Мен сизбоп зўр бир иш

топганга ўхшайман, бу иш сизнинг озгина вақтингизни олади.

Хейтнинг йирик, бақа кўзлари шу аснода юқоридаги қуруқ сўзларидан кўра кўпроқ маънони ифодаламоқда эди.

– Сиз кўлдаги баҳтсиз ҳодисани назарда тутяпсизми?

– Ҳа, сэр, худди ўшани.

– Бу ерда бошқа бир гап бор, деб ўйлашга асосингиз етарлимми?

– Биласизми, Орвил, бу қотиллик эканлигига зифирча ҳам шубҳа қилмайман. – Хейтнинг хўмрайган кўзлари фамгин бир тарзда чақнаб кетди.

– Авваламбор, бу масалада эҳтиёт бўлиш керак, албатта, бу гаплар фақат иккаламизнинг орамизда ҳозирча. Тўғрисини айтганда, кўл тубидан йигитнинг жасади чиқмаслигига ҳали узил-кесил ишонмайман. Лекин шуларнинг ҳаммаси, менимча, анча-мунча шубҳали, Орвил. Салкам ўн бешга яқин одам кечса, бугун куни билан чангак ушлаб кўлнинг жанубий қисмини тит-пит қилиб чиқишиди. Мен уч-тўрт йигитга ҳар жой-ҳар жойда чуқурликни ўлчаб кўришни буюрдим – ҳамма ерда ҳам йигирма беш футдан ошмайди. Хуллас, шу пайтгача эркак зотидан асар ҳам йўқ. Қизни эса сувдан кечса, соат бирга яқин чиқаришган, у осонгина топилган-қўйган. Шундай чиройли қизки, Орвил, жудаям ёш, ўн саккиз-йигирмаларда, ундан катта эмас. Лекин орада бир қатор ниҳоятда шубҳали гумонлар бор, шу боисдан мен йигитнинг жасади у ерда бўлмаса керак, деб ўйлаяпман. Очифини айтсан, бунчалик жуда оғир жиноятга ўхшайдиган воқеани ҳали умримда сира учратмаганман.

У шуларни гапира туриб, кийилаверганидан бир ҳолатга келиб, қопга ўхшаб осилиб қолган камзулининг ўнг чўнтагини кавлай бошлади-да, охири Робертанинг хатини олди, уни дўстига узатди-ю,

ўзи ҳам стулини суриб яқинроқ ўтирди; прокурор эса хатни ўқий бошлади.

– Ҳа, бу анча-мунча шубҳали кўринади, – деди у. – Демак, гапингизга қараганда, ҳозирча топилмаган... Ҳа, бу аёлни ўзингиз кўрдингиз, шундайми? – деб сўради Мейсон хатни ўқиб бўлгач. – У нималарни билар экан бу ҳақда?

– Йўқ, Орвил, мен уни кўрмадим, – деди Хейт шошмасдан, ўйга ботган кўйи, – сизга сабабини ҳам айтаман. Мен кечаёқ, бу масалада бирор-бир иш бошлашдан один сиз билан маслаҳатлашган маъқул, деган қарорга келган эдим. Ҳозир сиёсий аҳволимиз қандайлигини ўзингиз биласиз. Агар бу иш усталик билан олиб борилсами, кузга бориб жамоатчиликнинг фикрини анча-мунча ўзгартириб қўйган бўлардик. Мен сиёсатни бунақангি жиноятга аралаштиришимиз керак, деяётганим йўқ, албатта, аммо-лекин ишни шундай олиб борайликки, у кўзга ташлансин, хўш, шундай қилсак айбими? Шунинг учун ҳам аввало сиз билан гаплашиб олишни раво кўрдим. Агар истасангиз, у ёқقا ҳам бориб келаман. Лекин, менимча, яхшиси ўзингиз бориб, у йигит киму, насл-насаби қандай, шахсан билиб келганингиз маъқул. Агар шу ишни охирига етказсак, сиёсий жиҳатдан қанчалик зўр аҳамиятга эга бўлишини ўзингиз ҳам биласиз. Бу ишни қотириб қўйиш қўлингиздан келади, Орвил, мен буни биламан.

– Раҳмат, Фред, раҳмат, – деди Мейсон тантанавор оҳангда, у дўстига кўз қирини ташлаганча хатни столга уриб-уриб қўйди. – Мен ҳақимда бунчалик яхши фикрда бўлганингиз учун сиздан миннатдорман. Ўйлайманки, сиз энг тўғри йўлни танлагансиз. Бу хатни сиздан бўлак биронта ҳам киши кўрмаганига ишончингиз комилми?

– Фақат конвертини кўрди. Уни ҳам бор-йўғи бир киши – меҳмонхона хўжайини мистер Хаббард

күрди, холос. У менга ҳатни қизнинг пальтоси чүн-тагидан топганини, бирор кор-ҳол юз бериб йўқолиб қолиши ёки мен боргунимча уни очиб қўйишлари-дан қўрқиб, ўзида сақлаганини айтди. Бахтсизликни эшитишм биланоқ орада бир гап борлигини сездим, деди у. Унинг сўзига қараганда, йигит жуда асабийлашиб, ўзини қандайдир ғалати тутибди.

– Жуда яхши, Фред. Ҳозирча бу иш тўғрисида ҳеч кимга оғиз оча кўрманг, хўпми? Мен шу онда-ёқ ўша ёққа жўнайман. Лекин, эҳтимол, сиз яна бошқа нарсаларни ҳам биларсиз?

Мистер Мейсон руҳи кўтарилиб, ғайрати жўшиб кетганидан кетма-кет савол берар, ҳатто ўзининг эски қадрдони билан ҳам энди буйруқ оҳангига гаплашмоқда эди.

– Ҳа, кўп нарсаларни билиб олдим, – деб жавоб қилди терговчи донишмандларча виқор билан. – Қизнинг юзида одамни шубҳага соладиган кўкарган ва ёрилган жойлари бор, Орвил: ўнг қўзининг ости ва сўл чаккасининг остида, яна лаби ва бурнида; бечорани бир нарса билан – тошми ёки ёфоми ёки эҳтимол, эшкакларнинг бири биланми уришганга ўхшайди; улар шундоқ яқингинада, сувда қалқиб юрган экан. Кўринишидан ҳали фирт гўдак дейсиз, шунақанги ёшки, Орвил, биласизми, бирам яхшигина қизки... Бироқ ўзига маҳкам турмаган экан-да. Сизга ҳозир ҳаммасини айтиб бераман. – Терговчи бирдан жим бўлди-ю, чўнта-гидан каттакон дастрўмолини чиқарди, қаттиқ аксириб, кейин ихлос билан соқолини силаб текислади. – У ерда врач топиб ўтиришга вақтим бўлмади, бундан ташқари, душанбада ўликни ёриб, хулоса чиқаришни мўлжаллаяпман. Тайинлаб қўйганман: aka-ука Луцлар бугун мурдани шу ерга олиб келишади. Лекин ҳаммасидан ҳам Учинчи миль Кўрфа-зida яшовчи бир бола билан икки овчининг гапи, айниқса, одамни шубҳага солади: улар сешанба

куни кечқурун ов қилиш ва балиқ тутиш мақсадида Катта мушгирга келишаётган экан. Мен Эрлга уларнинг исмларини ёзиб олиб, кейин қоғоз жўнатиб, душанбада сўроққа чақиришни буюрганман.

Шундан сўнг Клайдга фавқулодда йўлиқиб қолган овчиларнинг баёнотини терговчи бирма-бир сўзлаб берди.

– Хўш, хўш! – деб хитоб қилиб турди прокурор ора-сира, бу воқеага астойдил қизиққанидан.

– Яна бир гап бор, Орвил, – сўзида давом этди терговчи. – Мен Эрлга телефон орқали Учинчи миль Кўрфази билан боғланиб, меҳмонхона хўжайини, почта мудири ва маҳаллий полиция бошлиғидан маълумот олишни топширган эдим, лекин ҳозирча у йигитни фақат бир киши кўргангага ўхшаб турибди. У ҳам бўлса, Учинчи миль Кўрфази билан Шейрон ўртасида қатнайдиган пароходчанинг капитани – капитан Муни, сиз, эҳтимол, уни танирсиз. Эрлга уни ҳам чақиришни буюрганман. Капитаннинг гапига қараганда, жума куни эрталаб соат саккиз яримларда, айни унинг «Оққуш» и биринчи рейс билан Шейронга қараб кетаётганда ўша йигитча ёки таърифидан ўшанга жуда ҳам ўхшайдиган бир йигит пароходга чиққану Шейронгача чипта олган. Қўлида жомадони, бошида шапкаси, аммо анави уч овчи ўрмонда учратганда эса у похол шляпада экан. Капитан уни фоят хушқомат бола деяпти. Бичими келишган, кийими башанг, кўринишидан олий табақага мансублиги шундоқ билиниб турган эмиш. Ўзини катта олиб, ҳеч кимга қўшилмай кетибди.

– Хўш, хўш, – деди Мейсон.

– Мен Шейронга телефон қоқиб, дуч келган одамлардан шундай ўткинчини кўрмадингизми, деб сўраб билишни Эрлга топширганман. Очиги ни айтсан, уни ҳеч ким эслайлмаяпти – ҳар ҳолда кеча кечқурунгача аҳвол шу эди, мен келаётга-

нимда сира маълумот йўқ эди. Лекин Эрлга унинг ташқи белгиларини телеграф орқали шу атрофдаги меҳмонхоналар, чорбогли жойлар ва темир йўл бекатларига хабарлаб қўйишни буюрганман, хотиржам бўлаверинг, агар шу ўрталарда юрган бўлса, тезда изини топишади. Қилган ишим сизга ёқса керак, деб ўйладим. Энди менга ордер берсангиз, Қуролсоз бекатидаги жомадонни олиб келардим сизга. Унда биз билишимиз зарур бўлган нарсалар ҳам бордир, ахир. Олиб келишга ўзим бoramан. Кейин шу бугуноқ Ўтлоқзор кўлига, Учинчи миль Кўрфази ва улгуrolсам, Шейронга ҳам боришни мўлжаллаяпман У ерда яна нималарни аниқлаш мумкин, бир кўриб келардим. Лекин, Орвил, бу ишда қотиллик борлиги яққол кўриниб турибди, деб қўрқяпман. Буни қарангки, у аввал қизни Ўтлоқзордаги меҳмонхонага, сўнгра Катта мушгирга олиб борган-да, номини ҳар хил ёзdirган! Қизнинг жомадонини бекатда қолдириб, ўзиникини кўтариб кетган! – Хейт шу ерга келганда маънодор қилиб бош силкиб қўйди. – Ўзингиз тушунасиз-ку, Орвил, тузук одамлар бунаقا қилмайди. Фақат бир нарсага ҳайронман: қандай қилиб унинг ота-онаси аввал унинг кимлигини билмай туриб, қизларининг у билан кетишига йўл қўйдилар экан.

– Тўғри айтасиз, – деди Мейсон хушмуомалалик билан, дўстининг фикрига қўшилиб.

У қизнинг анча-мунча ичидан пишганлиги, қилган иши унчалик одобдан эмаслигини ўйлар ва бунга жуда қизиқиб қолган эди. Аллақайлардан, жанубдан келган бадавлат шаҳарлик бир йигит билан унинг қонунсиз дон олишиб юргани! Шу воқеа муносабати билан у, Мейсон, роса донг таратиб, катта мавқега эга бўлиб олиши ҳам мумкин! У файрати қистаб кетганини сезиб, шарт ўрнидан турди. Қани энди ўша жиноятчи олчоқни қўлга туширсами! Бу ёвуз ўлим, қаҳр-ғазаб бўронини кўтаради, сўзсиз. Қарабсизки,

бу ёғи август конференциялари, номзод күрсатишлар! Нариёғи эса кузги сайловлар!

– Мени осиб юборишмайдими! – деб хитоб қилди у; тақводор ва вазмин киши бўлган Хейтнинг олдида бундан ҳам қаттиқроқ сўкиниб юборишдан у ўзини зўрга тийди. – Фред биз фоят жиддий бир нарсанинг изига тушганмизми, дейман. Мен бунга аниқ ишониб турибман. Бу ерда машъум воқеа – разил жиноят борга ўхшайди, назаримда. Биринчи галда, менимча, телефон орқали Бильц билан боғланиб, у ерда Олденлар оиласи борми, агар бўлса – Бильцнинг қаерида яшашини аниқлаш керак. Бильцга автомобилда тўғри борилса, бор-йўғи эллик миль, ҳатто ундан ҳам кам. Тўғри, йўли ёмон жуда, – деб қўшимча қилди у. – Бечора она-я! У билан учрашишга юрагим сира бетламаяпти. Бу фоят оғир мусибат, албатта...

У Зиллани чақирди-да, Бильц яқинида Тайтус Олден деган одам яшайми, агар яшаса, уникига қандай борилади, шуни аниқлашни илтимос қилди. Кейин яна гапида давом этди:

– Лекин, даставвал бу ерга Бэртонни чақиринг (Мейсоннинг ёрдамчиси Бэртон Бэрлей шанбаякшанба қилиб шаҳардан ташқарига чиқиб кетган эди). Агар ёзма амр беришми ёки шунга ўхшаш у-бу ишингизми чиқиб қолгудек бўлса, Фред, сизга унинг фойдаси тегади, мен анави баҳти қаро аёл ҳузурига борай. Эрлни эса жомадонга юборсангиз, сиздан бағоят миннатдор бўлардим. Қизнинг кимлигини аниқлаш учун отасини шу ерга олиб келмоқчиман. Аммо мен қайтмагунимча, на хат тўғрисида, на Бильцга кетганим тўғрисида ҳеч кимга оғиз оча кўрманг, тушундингизми? – У ошнасининг қўлинин қисиб қўйди. – Ҳозир эса, – Мейсон гапини дабдаба билан давом эттирди, у бўлажак улуф воқеалар гирдобида ўзи олдинги ўринни эгаллаб туришидан ҳалитданоқ лаззатлана бошлаган эди, – мен сизга мин-

натдорчилик билдиришим керак, Фред. Мен сиздан умрбод қарздорман, яхшилигингизни асло унутмайман, ишонинг. – У қадрдон дўстининг кўзларига тик боқди. – Буларнинг ҳаммаси ўйлаганимиздан ҳам зиёдроқ наф келтириб қолиши мумкин бизга. Менимча, бутун хизматим давомидаги энг катта, энг жиддий ишм ҳам шу бўладиганга ўхшайди, агар биз кузги воқеаларга қадар уни тезда муваффақиятли ҳал қила олсак, бу ҳаммамизнинг ҳам обрўйимизга обрў қўшади, шундай эмасми?

– Тўгри, Орвил, жуда тўгри, – Хейт ҳам маъқуллади. – Мен сизга: менимча, бунаقا воқеаларга сиёсатни аралаштирмаслик керак, деб айтдим, лекин начора, ўз-ўзидан уланиб кетгандан кейин... – Хейт шундай деди-ю, ўйга ботиб, жим бўлиб қолди.

– Ҳозирча, – деб давом этди прокурор, – Эрлга буюринг беш-олти хил расм олсин: қайиқни, эшкак, шляпани қаердан топишганини, чўккан қизни чиқариб олишган жойни аниқ туширсин. Иложи борича гувоҳдарни кўпроқ чақиринг. Ҳамма харажатларингизни қоплашни аудитор билан келишиб қўяман. Мен эртага ёки душанба куни шу ерда бўламан, кейин ишга ўзим киришаман.

У Хейтнинг кўлинини қисиб, елкасига қоқиб қўйди. Хейт эса бу эътибордан боши осмонга етган кўйи, демакки, келажакка катта умид боғлаганча бесўнақай похол шляпасини кийиб, кенг пальтосининг тугмаларини қадади-ю, содиқ хизматкори Эрлни шаҳар телефони орқали чақириб, унга топшириқ бериш ва жиноят содир бўлган жойга унинг ўзи – Хейс яна бораётганини хабарлаб қўйиш учун идорага қайтди.

#### IV БОБ

Орвил Мейсоннинг Олденларга бирдан раҳми келиб кетди, чунки у бир қараашдаёқ қисмат зар-

блари, камситув ва хўрликлар худди ўзи сингари бу оиласа ҳам ошно эканини тушунди-қўйди. Хизмат автомобилида шанба куни соат тўртларга яқин Брижбургдан келиб, тепалик этагидаги гариб, чириб битган эски бир кулбага кўзи тушганда, молхона эшигида енги калта кўйлак ва камзул кийиб алган Тайтус Олденнинг ўзи турарди; унинг афт-ангори, жуссаси, бутун қиёфаси ўз уринишларининг фойдасизлигини яхши тушунадиган омадсиз киши эканлигини айтиб турарди. Шу сабабли Мейсон Брижбургдан жўнашидан олдин телефон қоқмаганига ҳозир ачинди: бунаقا одамлар учун қизининг ўлими тўғрисидаги хабар қанчалик даҳшатли зарба бўлишини у тушунарди. Айни пайтда Тайтус ўзига қараб келаётган Мейсонни кўриб, йўл сўрамоқчилик-да, бегона киши шекилли, деб ўйлади-ю, очиқ чехра билан унга пешвуз чиқди.

- Мистер Тайтус Олден сиз бўласизми?
- Ҳа, сэр, менман.
- Мистер Олден, менинг фамилиям Мейсон, Брижбургданман, Катараки округининг прокурориман.

Тайтус: қизиқ, шунча Олис округдан келган прокурорнинг менда нима иши бор экан-а, деб ҳайрон бўлганча:

- Хўш, сэр, – деб жавоб қилди.
- Мейсон эса гапни нимадан бошлишни билмай Тайтусга тикилиб қолди. Ўзи топиб келган фожиали шум хабар бунағанги ожиз, ҳимоясиз одамнинг, ҳойнаҳой, ўтакасини ҳам ёриб юбориши ҳеч гап эмас эди. Улар иккови уй олдидаги қорамтири баланд арчалардан бирининг остида туришарди. Шамол унинг игна баргларини ўйнаб, ўзининг шу оламга монанд азалий ашуласини шивир-шивир такрорламоқда эди.

- Мистер Олден, – деб гап бошлади Мейсон ўз табиатига номуносиб бўлган жиҳдият ва майинлик

билан. – Сизнинг Берта ёки эҳтимол, Альберта исмли қизингиз борми? Мен отини аниқ билмайман.

– Роберта, – деб тўғрилади Тайтус Олден, у ноҳуш бир нарсани олдиндан сезгандай бутун вужуди ларзага тушди.

Мейсон эса, менга зарур бўлган нарсаларни бу одам кейин тузукроқ гапириб беролмайди, деб хавфсираб, шоша-пиша:

– Ҳа, дарвоқе, бу ерда сиз Клифорд Голден деган йигитни танимайсизми? – деб сўради.

– Эслашимча, бунақасини сира эшитмаганман, – деб суст жавоб ҳилди Тайтус.

– Ёки Карл Грэхемни-чи?

– Йўқ, сэр. Бунақа исмли кишини эслолмаяпман.

– Ўзим ҳам шундай бўлса керак, деб ўйлаган эдим, – хитоб ҳилди Мейсон, бу гапни у Тайтусдан кўра кўпроқ ўзига қаратса айтиётгандек туюлди, кейин жиддий ва қатъий қилиб давом этди: – Ҳа, ростдан, қизингиз ҳозир қаерда?

– Ҳозир Ликургда. У ўша ёқда ишлайди. Лекин сиз нега савол беряпсиз? Наҳотки, у бирор ёмонлик қилган бўлса... ёки бирор нарса сўрадими сиздан?

У ёлғондака, зўраки жилмайиш қилди, аммо кулранг мовий кўзларида саросима ва хавотирли савол маъноси акс этиб турагди.

– Бир дақиқа сабр қилинг, мистер Олден, – дея давом этди Мейсон майнин, лекин айни пайтда кескин оҳанг билан. – Ҳозир ҳаммасини сизга тушунириб бераман. Бироқ аввал сизга икки-уч савол беришим керак. – Кейин у Тайтусга жиддий ва ачинган бир қиёфада кўз ташлади. – Сиз қизингизни охирги марта қачон кўрган эдингиз?

– Ҳа, ҳа, бу ердан у ўтган сешанба куни эрталаб кетган эди, Ликургга қайтиб бориши зарур эди. У ўша ерда Грифитсларнинг кўйлак ёқа фабрикасида ишлайди. Аммо...

– Яна бир дақиқа сабр, – деб такрорлади прокурор гапни чұрт кесиб, – ҳаммасини ҳозир айти бераман. Ҳойнақой, қизингиз уйға ҳафтанинг охидирида келган бўлса керак? Шундайми?

– У изн пайтида келиб, бизникида салкам бир ойча турди, – Тайтус бир бошдан салмоқланиб гапириб бера бошлади: – Қизим ўзини бир оз ёмон ҳис қилган экан, уйда хиёл дам оламанми, деб келибди. Аммо у кетаётганда соппа-соғ эди. Умид қиласманки, мистер Мейсон, унга бирор нарса бўлди, демоқчи эмассиз, шундаймасми? – У довдираб қолган бир қиёфада офтобда қорайган узун қўлларини иягига қўйди. – Нима бўлди ўзи, ҳеч ақдимга сифмаяпти... – У эсанкираб оқарган сийрак сочларини силай бошлади.

– Қизингиз кетгандан бери у ҳақда ҳеч қандай хабар олмадингизми? – деб давом этди Мейсон босиқлик билан, у Тайтусга оғир зарба туширишдан аввал иложи борича ундан кўпроқ маълумот олиб қолишга тиришмоқда эди. – У Ликургга емас, қаёққадир бошқа ёққа кетаётганини айтмаганмиди?

– Йўқ, сэр, биз ҳеч қандай хат-хабар олмадик. Лекин, айтинг, ўнинг бошига бирон кулфат тушмадими ишқилиб? ё у-бу қилиб қўйдими... Йўқ, йўқ, бундай бўлиши мумкин эмас! Лекин саволларингиз қизиқ... Гапларингиз қизиқ...

У билинар-билинмас титраб, онгсиз равишида юпқа, қонсиз лабларига қўлларини теккиза бошлади. Аммо прокурор жавоб қайтариш ўрнига чўнтағидан Робертанинг онасига ёзган хатини олди-ю, чолга фақат конверт устидаги ёзувни кўрсатди-да:

– Қизингизнинг дастхати шуми? – деб сўради.

– Ҳа, сэр, шу қизимнинг дастхати, – деб жавоб берди Тайтус хиёл овозини баландлатиб. – Аммо нима гап ўзи, мистер прокурор? Бу хат қандай қилиб сизга тушиб қолди? Нима ёзилган унда? – У Мейсоннинг кўзларидан аллақандай даҳшатли

фалокат рўй берганини уқди-ю, титраб-қақшаб муштумини қисди. – Нима ўзи бу? Унда нима ёзилган?.. Қизим нима деб ёзибди бу хатида? Қизимга нима бўлди ўзи, сиз менга айтишингиз керак!

У гўё уйга югуриб бориб, одамларни ёрдамга чақирмоқчи ва юрагидаги ваҳимасини хотини билан ўртоқдашмоқчи бўлгандай ҳаяжонга тушиб, атрофига олазарак қаради... Мейсон эса шўри қуриган чол бечорани қай аҳволга согганини кўриб, унинг қўлини маҳкам, аммо дўстона бир тарзда ушлаб олди.

– Мистер Олден, – деб гап бошлади у, – ҳар биримизнинг ҳаётимизда ҳам кулфатли дамлар бўлади, шунда биз бутун иродамизни бир ерга жамлашимиз зарур. Юз берган воқеани сизга айтишга тилим бормаяпти, чунки мен ўзим ҳам ҳаётда не-не кўргиликларни бошдан кечирганим учун ҳам қанчалик азоб чекишингизни биламан.

– Ярадор бўлдими! Ё ўлдими? – Тайтус кўзлари ола-кула бўлиб прокурорга қараганча қулоқни тешгудек чинқириб юборди.

Орвил Мейсон бошини лиқиллатди.

– Роберта! Болагинам! Оҳ, парвардигор! – Тайтус худди зарба еган кишидек энгашиб қолди, қулав тушмаслик учун дарахтга суюнди. – Аммо нима қилиб ўлди? Қаерда? Фабрикада машина ўраб кетдими уни? Ё марҳаматли тангрим!

У уйига, хотинининг олдига бормоқчи бўлиб, орқасига қайрилди, лекин юзи бадбуруш, бақувват қўлли прокурор уни ушлаб қолди:

– Бир дақиқа сабр қилинг, мистер Олден, бир дақиқа! Сиз дарровданоқ хотинингизнинг олдига бора кўрманг. Биламан, жуда оғир, жуда даҳшатли бу, лекин рухсатингиз билан сизга аввал тушунтириб берай. Ўлган жойи Ликург ҳам эмас, машина ҳам ўраб кетмаган қизингизни, йўқ. У чўкиб ўлган. Кўлда. У пайшанба куни шаҳардан ташқа-

рига чиққан экан, тушуняпсизми? Эшитяпсизми, пайшанба куни. У Катта мушгир күлида пайшанба куни қайикда сайр этиб юриб, чўкибди. Қайик ағдарилиб кетибди.

Тайтуснинг аянчли аҳволи, сўз ва хатти-ҳаракатлари прокурорни шу даражада ҳаяжонга солдики, у ҳар қанча ўзини босаман деса ҳам, бари бир, воқеа қандай бўлганини (агар буни ҳатто баҳтсиз ҳодисага йўйишган тақдирда ҳам) мундоқ тузукроқ тушунтириб беролмади. Мейсон оғзидан Робертага қаратса айтилган «ўлим» сўзини эшитгани ҳамон Олден ларзага тушиб, ақлдан озишига сал қолди. У аввалига бўкирганча бир-икки савол берган бўлди-ю, кейин аллақандай йиртқичларга хос овоз чиқариб инграй бошлади, гё ўнга ҳаво етишмаётгандек эди. Худди оғриқнинг зўридан тиришиб қолгандек қадди букилди, сўнгра қўлини қўлига уриб, кафтлари билан чакка томирларини сиқиб одди.

– Менинг Робертагинам ўлибди! Менинг қизалоққинам! Йўқ, йўқ! Роберта! Э, худо! У чўкмаган! Бу бўлмаган гап! Онаси атиги бир соат олдин уни гапирган эди. Бу хабарни эшитса, у турган жойида жон беради. Мени ҳам ўлдиради бу. Ҳа, ўлдиради. Менинг баҳти қаро, жигаргўша қизалофим! Болагинам! Мен бунга чида буролмайман, мистер прокурор! .

У бутун вужуди зил кетиб, ҳоргин бир қиёфа-да Мейсонга суюниб қолди, Мейсон ҳам қўлидан келганча уни тик тутиб туришга ҳаракат қиласарди. Орадан бир неча дақиқа ўтгач, чол телбаларча паришон, эсанкираган нигоҳи билан уйи ва дарвозасига кўз ташлади.

– Онасига ким айтади? – деб сўради у. – Кимнинг юраги бетлайди айтишга?

– Мистер Олден, қулоқ солинг менга, – деб гап уқтиярарди Мейсон, – сизни ўйлаб, хотинингизни ўйлаб бир нарсани илтимос қиласман: ўзингизни бо-

синг, бу ишнинг чигалини очища менга ёрдам беринг, гап бамисоли бегона қиз тўғрисида бораётган-дек босиқдик ва пухталик билан ёрдам беринг менга. Ҳали мен сизга ҳаммасини гапириб беролганим йўқ. Лекин аввал сиз ўзингизни босиб олинг. Акс ҳолда мен ҳам тузукроқ тушунтириб беролмайман. Бу даҳшат, албатта, шунинг учун чин кўнгилдан сизга ҳамдардман. Биламан, сизга ниҳоятда оғир. Лекин орада ҳали шунақсанги машъум, аламли гаплар ҳам борки, уларни сиз албатта билишингиз керак. Кулоқ солсангиз-чи, ахир! Кулоқ солинг!

Мейсон Тайтуснинг қўлини қўйиб юбормай, Робертанинг ўлими билан боғлиқ бўлган хилма-хил маълумот ва гумонларни иложи борича тез-тез ва ишонарли тарзда гапира кетди, кейин унга бояги хатни ўқитди-ю, охирида:

– Бу ерда жиноят бор! – деб хитоб қилди. – Мистер Олден, бу гирт жиноят! Брижбургда биз шундай фикрга тўхталяпмиз, жуда бўлмагандан шундай деб хавфсираяпмиз, шаксиз-шубҳасиз қотиллик, мистер Олден, агар шундай шафқатсиз, со-вук таъбир жоиз бўлса... – У жим бўлди, Олден эса жиноят сўзини эшитиши биланоқ ўзини йўқотиб, худди унга гапираётганларини унчалик тушунмайтгандай Мейсонга маънисиз тикилиб қолди.

– Кўнглингизга ҳозир қил ҳам сифмаслигини тушуниб турсам ҳам, – дея яна гап бошлади Мейсон, – аммо округимда қонунчиликнинг бош мутасаддиси сифатида мен шу бугуноқ ҳузурингизга келаверишга қарор қилдим, мақсадим қизингизни йўлдан уриб бу кимсасиз кўлга олиб кетган Клифорд Голденми ёки Карл Грэхемми ёхуд яна бошқа бир кимсами, ўшандан сизнинг хабарингиз борми-йўқлигини аниқлаш, холос. Тушунаман, мистер Олден, бошингизга ҳозир фоят оғир кулфат тушган. Аммо шунга қарамай, бу калаванинг учни топишда жон-дилингиз билан менга ёрдам бе-

риш сизнинг бурчингиздир, деб таъкидлаб ўтмокчиман, аслида бу бирдан-бир хоҳишингиз ҳам бўлиши даркор. Мана бу хатга қарагандা, хотинингиз ўша йигит тўғрисида у-бу нарсаларни – ақалли унинг исмини биладиганга ўхшайди.

У маънодор бир тарзда хатни чертиб қўйди.

Қизи, ҳойнаҳой, кимнингдир ёвуз зўравонлигининг қурбони бўлганини Одден англаши биланоқ қўнглидаги аччиқ жудолик туйгуси устига аллақандай ҳайвоний забткорлик билан онадан овчи туғилган кишиларнинг синчковалигию ғазаби ва қизиқонлиги қўшилди-кетди ва натижада Тайтус ўзини қўлга олиб, энди прокурорнинг гапларини қовоғи уюлганча индамай эшита бошлади. Демак, қизи ўз ажали билан гарқ бўлмагти-да, уни ўлдиришган экан-да хатдан маълум бўлишича, ўша ўзи турмушга чиқаман деган йигит ўлдирибди-да Робертани! Наҳотки, у, Тайтус, ота бўла туриб, қизининг дилида бегона одам яшаганидан бехабар қолган бўлса! Қизиқ, хотини биларкану, у эса гафлатда ётаверган экан. Демак, Робертанинг ўзи отам билмасин, депти-да.

Одденга сингиб кетган диний эътиқод ва расмrusmlar, унинг шаҳарга ва шаҳардаги бошдан-охир шошқалоқ, очкўз ҳаётга нисбатан шубҳали кўз билан қарааш сингари қишлоқиларга хос одати ўша заҳотиёқ миясида бир фикр пайдо қилди: ҳарқалай, Робертага Ликургда бузук, ёлғончи бир бадавлат шаҳарлик йигит йўлиқиб қолгану уйланаман, деб роса бошини айлантирган, кейин турган гап – лафзидан қайтган. Қизига қарши бунчалик разил жиноят қилган одамга нисбатан Одденнинг юрагида бир лаҳзадаёқ шафқатсиз, ҳадсиз интиқом истаги аланга одди. Олчоқ! Зўравон! Қотил!

У ҳам, хотини ҳам Роберта Ликургда ўзи танлаган машаққатли, ҳалол йўлдан покизалик ва баҳтиёрлик билан, тинчгина кетяпти, ўзини боқиши

ва қартайиб қолган ота-онасининг жонига бир оз бўлса ҳам оро кириш мақсадида ишляяпти, деб ўйлашар эди. Ваҳоланки, пайшанбадан то жума куни эрталабгача Робертанинг жасади кўл тубида ётган. Улар эса тентираб, гаплашиб, юмшоқ кўрпа-тўшакларда ухлаб, жигаргўшаларининг бу даҳшатли қисматидан бехабар қолишган. Мана, энди у қандайдир бегона бир уйда, эҳтимол, ўликхонадами ётган бўлса керак, туғишганлари, меҳрибонлари эса тепасида ҳам туришолмади, дунёни сув босса тўпигига чиқмайдиган, қаҳри қаттиқ, хизматчилар эртага уни Брижбургга олиб кетишиади.

— Яратган эгамнинг борлиги рост бўлса, — деб хитоб қилди Олден ҳаяжонини босолмай, — бундай ярамаснинг албатта жазосини беради! Ҳа, жазосини беради!. «Мен ҳали тақводорнинг болалари қаровсиз, — дея бирдан ёдаки дуо ўқий бошлади у, — насллари ушоқ нонга зор бўлиб юрганларини ҳам кўраман». — У тўсатдан гайрати жўшиб кетиб, кўшимча қилди: — Мен энди ҳаммасини хотинимга айтишим керак. Ҳа, ҳа, ҳозироқ бориб айтишим керак! Йўқ, сиз шу ерда тура туринг. Аввалига унга ҳаммасини ўзим айтишим керак. Ҳозироқ қайтиб келаман. Ҳозироқ. Мени шу ерда кутиб туринг. Биламан, бу шум хабар хотинимни ўлдириб қўйиши ҳам мумкин. Лекин шунда ҳам бари бир у ҳаммасини билиши эзур. Балки ўша ярамаснинг кимлигини айтиб берар, ўшандা олисга қочиб улгурмасидан уни қўлга туширамиз... Ҳа, шўринг қурғур қизгинам-а! Бечора Робертагинам-а! Менинг меҳрибон, раҳмдил, ҳалол-покиза қизгинам-а!

Шундай қилиб, у кўриниши телбанамо, эзилган бир қиёфага кириб, маънисиз алжираганча орқасига қайрилди-да, худди автоматга ўхшаб бесўнақай, қўпол одим ташлаган кўйи номи ошхона-ю, ўзи эса эски иморатларга тиркаштириб қурилган каталакка қараб юрди: у ерда хотини

эртанги – якшанба кунги нонушта учун алоҳида таомлар тайёрлаётганини билар эди. Аммо остоная борганда ичкарига киришга юраги дов бермай тўхтаб қолди. У ақд бовар қилмайдиган, сўнгги ва шафқатсиз ҳаёт кучлари олдида фожиали тарзда тиз чўккан инсоннинг жонли бир тимсоли эди.

Миссис Олден орқасига ўгирилиб, эрининг мутлақо ўзгариб кетган афт-ангорига қўзи тушгач, ҳолсизланганидан қўлларини осилтирганча қолди; Тайтуснинг ҳолатидан нимадир бир ёмон иш рўй бергани яқъол сезилиб турарди, шу сабабли миссис Олден юзидаги ҳорғин, осойишта, соддадил ювошлик бир зумда ғойиб бўлди.

– Тайтус, худо хайнингни берсин! Нима бўлди ўзи?

Тайтуснинг қўллари осмонга кўтарилиган, лаблари яrim очиқ, ваҳимага тушган кўзлари эса беихтиёр ғалати бир тарзда торайиб, яна кенгайиб кетмоқда эди, у охири фақат бир сўз:

– Роберта! – дея олди, холос.

– Нима бўпти унга? Нима бўпти, Тайтус? Нима бўпти?

Тайтус миқ этмасди. Яна асабдан лаблари, кўзлари, қўллари уча бошлади...

– Ўлибди! У... у чўкиб ўлибди! – Олден шундай деди-ю, мутлақо ҳолдан тойиб, шундоқ ёнида, эшик олдида турган курсига ўтириб қолди.

Миссис Олден нима бўлганига тушунмай бир дақиқа унга қараб турди, кейин тушунди-ю, ломмим демай, ерга гурсиллаб ийқилди. Тайтус эса унга қараб туриб, бошини чайқар, гўё шу билан: «Ана, ана, айтмадимми. Шундай бўлиши аниқ эди. Қайтага қутулди, бунағанги жафолардан», деяётганга ўхшар эди. У шошмай ўрнидан турди-да, хотинига яқин бориб, ерга чўккалаб уни кўтаришга уринди. Кейин яна шу тахлит қаддини ростлади-ю, ошхонадан чиқиб, уйни айланиб ўтди ва Орвил Мейсон ўтирган яrim хароба зинапоя томонга

қараб юрди, Мейсон эса ботаётган қүёшга тикилганча бу бечора, омадсиз фермер ҳозир хотинини қанчалик азобга солиб қўйганикин, деб ўйламоқда эди. Гарчи Роберта фожиаси ўзига фойда келтираса ҳам у бир дақиқа: қани энди ҳаммаси тушга айланиб, бу воқеа мутлақо юз бермагандами, қандай соз бўлар эди, деб ўйлади.

Лекин фермернинг қоқ суяқ жуссасига қўзи тушиши биланоқ иргиб ўрнидан турди, уни ортда қолдириб, ошхона томонга шошилди. Қизи сингари жимитгина ва нозиккина миссис Олденнинг ерда унсиз, хушсиз ётганини кўрди-ю, бақувват қўллари билан уни даст кўтарди ва ошхонадан катта хонага олиб ўтдида, у ерда лиқиллаб турган юмшоқ узун курсига ётқизиб қўйди. Кейин томирини ушлаб кўриб, югра солиб сувга кетди. Айни пайтда у шу яқин ўртада ўғлими, қизими, қўшини-пўшнисими, кимдир бирор бормикин, деган мақсадда чор атрофга аланглади, ҳеч ким кўринмагандан кейин шоша-пиша миссис Олденнинг тепасига қайтиб юзи ва қўлларига сув сепди. Хотинининг ёнида тиз чўкиб қолган Тайтусга қараб:

– Бу яқин атрофда доктор борми? – деб мурожаат қилди.

– Бильцда бор... Крейн доктор.

– Ўйингизда ёки қўшнингизницида телефон йўқми?

– Мистер Уилкоксницида бор. – Тайтус қўлинни силтаб, Уилкокснинг уйи томонга ишора қилди, яқингинада Роберта шу телефондан фойдаланган эди.

– Сиз қараб туринг. Мен ҳозир келаман.

Крейн ёки учраган бошқа врачни чақириш мақсадида Мейсон телефонга қараб чопди ва дарҳол миссис Уилкокс ва унинг қизи билан бошлишиб қайтиб келди. Кейин қўни-қўшнилар йифилгунча ва ниҳоят доктор Крейн етиб келгунча кутавериб қўзи тўрт бўлди; Мейсон доктор Крейн билан маслаҳатлашиб, мени бу ерга олиб келган муҳим,

махфий бир иш хусусида миссис Олден билан шу бугуннинг ўзидаёқ гаплашсам бўладими, деб сўради. Мистер Мейсоннинг сипо, расмий муомаласи доктор Крейнга кучли таъсир қилди ва бу миссис Олденга яхши бўлар балки, деган хulosага келди.

Дори-дармон кучи билан, шунингдек, атрофдагилар чин юракдан насиҳат қиласавериб, таъзия билдиравериб, охири миссис Олденни ўзига келтиришди, унга ҳамон далда беришар, кўнглини кўтаришар, миссис Олден ҳам энди нима гап бўлганини бафуржга тинглаб, Роберта хатида эслатиб ўтилган сирли кимса ҳақида Мейсон берган саволларга жавоб қайтара оладиган бир ҳолатга келган эди. У, Роберта ўзига фақат биргина киши алоҳида эътибор билан қарашини, ҳа, яна у ҳақда атиги бир мартагина ўтган рождество куни гапирганини эслади. У йигит ликурглик бадавлат фабрикант Сэмюэл Грифитснинг жияни, Роберта ишлайдиган бўлимнинг мудири Клайд Грифитс эди.

Лекин бу – шундай обрў-эътиборли одамнинг жияни Робертани ўлдиришда айбланади, деган сўз эмас эди, албатта, буни Мейсон ҳам, Олден ҳам дарров тушунишди. Бойлик! Мавқе! Бундай айбни қўйишдан олдин Мейсоннинг арқонни узун ташлаб, обдан ўйлаб олишга интилаётганида ҳам жон бор эди. Унинг фикрича, Клайд Грифитс билан чўкиб ўлган қизнинг ижтимоий мавқеи ўртасида осмону ерча фарқ мавжуд эди. Аммо ҳар ҳолда боягидай бўлиши ҳам мумкин. Хўш, нима учун бўлмасин? Қайтага бошқаларга қараганда айнан шунаقا юксак мартабали йигитча шунчаки, йўл-йўлакай Роберта сингари қиз билан яширинча кўнгилхушликка бош урмайдими, ахир Хейт ҳам: қиз foят гўзал экан, деб айтган эди-ку. Роберта Клайднинг амакисининг фабрикасида ишлаган ва ўзи камбағал бўлган. Бунинг устига, Фред Хейт маълум қилганидек, Роберта, бу ким

бўлишига қарамай, ўз ўлими олдидан никоҳдан ўтгунга қадар у билан эр-хотиндек бирга туришга ботинган. Ахлоқи бузук бойвачча йигитчалар қашшоқ қизларга нисбатан доимо шундай муносабатда бўлишмайдими, ахир? Мейсон ёшлигига не-не зарбаларни, хор-зорликларни бошидан кечириб, бунаقا бойваччаларни жуда кўп кўргани учун ҳам бу фикри ўзига жуда ишонарли кўринди. Инсофиз бойлар! Бағритош бойлар! Робертанинг отонаси эса ўз қизларини сутдан ҳам оқ, сувдан ҳам тиниқлигига қатъий ишониб юришган, албатта.

Кейинги савол-жавоблардан маълум бўлишича, миссис Олден у йигитни умрида ҳеч кўрмаган, лекин бошқа бирортасининг ҳам номини асло эшитмаган экан. У билан эри фақат яна шуни қўшимча қилишдики, Роберта уйга охирги гал бир ойга келган пайтида ўзини анча ёмон ҳис этган, ҳадеса ётавериб, бўшашиб, ўлганининг кунидан гимирлаб юрган экан. Яна у тез-тез хат ёзиб, почтачига топширап ёки чорраҳадаги қутига ўзи бориб ташлаб келар экан. Бу хатларнинг кимга юборилаётганини на мистер ва на миссис Олден билишар экан, лекин Мейсон шу ондаёқ буни, ҳойнаҳой, почтачи билса керак, деб хаёлидан ўтказди. Хўш, тағин нимани гапириш мумкин, Роберта бир ой ичида ўзига анчагина, ҳа, ростдан тўртта шекилли, кўйлак тикирибди. Кейинги кунларда уни аллақандай мистер Бейкер деган кимса бир неча марта телефонга чақирибди, Тайтус буни мистер Уилкоксдан эшитган экан. Жўнаётганида фақат ўзи билан олиб келган нарсаларинигина: ихчам бир сандиқча-ю жомадонини кўтариб кетибди, холос. Сандиқчасини ўзи бекатда юкхонага топширибди, лекин уни Ликургга жўнатганми ёки бошқа бирон ёққами, бундан Тайтуснинг хабари йўқ экан.

Мейсон, Бейкер тўғрисидаги ўз назарида анчагина муҳим бўлган янги маълумотни ўйлаб кўр-

ди-ю, шу пайт бирдан: «Клифорд Голден – Карл Грэхем – Клайд Грифитс!» – деган сўзлар лоп этиб миясига келди. Ислам-фамилияларнинг бир хил ҳарф билан бошланиши ва бир-бирига уйқаш эшитилишидан у ҳайратта тушди. Агар, борди-ю ўша Клайд Грифитс жиноятга мутлақо алоқасиз бўлган тақдирда ҳам номларнинг бунчалик ўхшашлиги эшитган одамни ҳайрон қолдириши аниқ эди! Мейсон почтачини топиб, уни сўроқ қилишга ошиқа бошлади.

Тайтус Олден фақат Робертанинг жасадини танийдиган ва Куролсоз бекатида қолдириб кетилган жомадондаги нарсалар унга тегишлими ёки йўқлигини аниқлаб берадиган гувоҳ сифатидагина эмас, балки почтачини очиқ гапиришга мажбур эта оладиган одам сифатида ҳам Мейсонга ниҳоятда зарур эди, шу сабабли у чолдан кийиниб, ўзи билан бирга юришни илтимос қилди ва эртагаёқ уйингизга жавоб бериб юбораман, деб ишонтириди

У, бу гаплардан ҳеч кимга оғиз оча кўрманг, деб миссис Олденни огоҳлантириди-ю, почтачини сўроқ қилиш мақсадида ўша ёқса жўнади.

Почтачини топишиб, Олденнинг олдида сўроқ қилишди. Олден бу пайтда прокурорнинг ёнида худди мурдадек қотиб турарди.

Почтачи Роберта кейинти келган пайтида унга анча-мунча – ўн иккитами ёки ҳаммаси бўлиб ўн бешта шекилли, хат берганини эслади, ҳатто уларнинг ҳаммаси бир жойга, Ликургга, аллакимга ҳам эди-я... ҳаҳ, тилининг учida турибди... Ҳа, эсига тушди – Клайд Грифитсга, йўқлаб олинадиган хат тариқасида жўнатилган эди. Мейсон ўша заҳотиёқ почтачини маҳаллий нотариусга олиб борди, у почтачининг гапларини бутун қонун-қоидага биноан ҳужжатлаштириб берди. Кейин прокурор ўз маҳкамасига қўнфироқ қилиб, Робертанинг жасадини Брижбургга олиб келишганини билди-ю, ўша ёқса қараб машинасини охирги кучи қолгунча

ванғиллатиб ҳайдаб кетди. Кечқурун соат ўнга бориб, «Ака-ука Луцларнинг дағн бюроси» қабулхонасида жасад тепасида Бэртон Бэрлей, Хейт, Эрл Ньюкомлар йиғилиши; Тайтус қизининг юзига қаради-ю, бирдан ҳушидан айрилай деди. Шу аснода Мейсон, биринчидан, унинг Роберта Олденлигига ишонч ҳосил қилган бўлса, иккинчидан, ўзича бошқа бир муаммони ҳам ҳал этиб олди: Ўтлоқзор кўли меҳмонхонасидағи ёзувга ишониб, Робертани салга ўзини унутиб, ёмон йўлга юриб кетадиган енгилтабиат қизлардан деса бўладими? Йўқ, деган қарорга келди у. Роберта ундай қизлардан эмас. Орага айёрлик, ёвуз ният – ахлоқсизлик ва қотиллик аралашгани яққол кўриниб турарди! Уҳ, абллаҳ! Яна у шу пайтгача озодликда юрибди-я! Бу ишнинг сиёсий аҳамияти Мейсоннинг назарида гўё ўз қимматини йўқотиб, унинг ўрнини эса барча бадавлат кишиларга нисбатан чексиз газаб ва нафрат эгаллагандай бўлди.

Аммо марҳума ҳузуридаги бу дақиқалар, қизи рўпарасида тиз чўкканча унинг музлаб ётган жажжи қўлчаларини суюб-суюб лабига босаётган, узун қўнғир соchlари орасидан кўриниб турган сап-сариқ юзига тўхтовсиз жонсарак бир ҳолда, газабнок бўлиб тикилиб қолган Тайтус Олденнинг аҳволи – шуларнинг ҳаммаси жамоатчиликни бу ишга расмий ва бефарқдик билан қарамасликка мажбур этиши аниқ эди. Бутун йиғилган одамларнинг кўзлари жиқ-жиқ ёш эди.

Бунинг устига Тайтус Олден ҳам ярага баттар туз сепиб юборди. Ака-ука Луцлар ва уларнинг уч нафар таниши – шундоқ ёнбошдаги автомобиль устахонасининг эгалари ҳамда «Республикачи» газетасининг вакили Эверет Бикер ва «Демократ» газетасининг муҳаррири Сэм Тэксонлар остоңда турганларича, аллақандай сипогарчилик ва даҳшат билан бир-бирларининг бошлари оша ич-

карига мўралашаётган бир пайтда Тайтус Олден бирдан ўрнидан сапчиб турди-ю, шиддат билан Мейсонга отилиб қичқира бошлади:

– Бу ишда айбдор бўлган ўша аblaҳни топиб беринг, мистер прокурор! Менинг меҳрибон, бокира қизгинамни қандай қийнаган бўлса, уни ҳам шундай қийнашсин. Қизимни ўлдиришгани аниқ, гап шу! Фақат қонхўр маҳлуққина қиз болани кўлга олиб бориб, мана шундай уриши мумкин, у қизимни урган, буни ҳаммаям кўриб турибди! – Тайтус ўлик қизининг юзига ишора қилди. – У аblaҳ билан судлашиб юришга менинг пулим йўқ, лекин мен ишлайман... Фермамни сотаман...

Унинг овози чиқмай қолди. У Робертага яна ўғирилиб қараганида сал бўлмаса гангиги йиқилиб кетаёзди. Шунда бебаҳт отани забт этган фусса ва интиқом тўлғоги Орвил Мейсонга ҳам кўчди-ю, у олдинга чиқиб хитоб қилди:

– Юринг, бу ердан кетайлик, мистер Олден. Биз энди бу жасад сизнинг қизингиз эканини биламиз. Ҳой, яхшилар, жасаднинг эгаси топилди, ҳаммангизни гувоҳликка даъват этаман. Мистер Олден, агар бечора қизингизни кимдир ўлдирганлиги ҳақидаги гумонимиз тасдиқданса, прокурор сифатида мен сизга тантанали суратда ваъда бераманки: у аblaҳни қидириб топиб, маъмурлар қўлига топширмагунимча вақтимни ҳам, пулимни ҳам, кучимни ҳам аямайман. Агар Катараки округидаги одил суд юксак даражада турса – бунга менинг ишончим комил – сиз маҳаллий судимиз танлаган маслаҳатчиларга бемалол ишонсангиз бўлаверади. Кейин сиз фермангизни ҳам сотмайсиз!

Мейсон гарчи тўсатдан бўлса-да, чин юракдан ҳаяжонлангани, ларзага тушган тингловчиларни кўриб тургани учун нотиқлик истеъдоди бирам очилиб кетдики, асти қўяверасиз.

Шу пайт ака-ука Луцларнинг бири – дафн этиш бюросининг бехос ва гайритабиий ўлимлар билан боғлиқ барча юмушларини бажарувчи хизматчиси Эд тўлқинланиб кетганидан:

– Тўгри айтасиз, Орвил! Бизга айни шунаقا прокурор керак! – деб юборди.

Эверет Бикер бўлса:

– Ишингизга ривож тилаймиз, мистер Мейсон! – деб қичқирди. – Ўрни келганда биз ҳаммамиз сизни бир тану бир жон бўлиб қувватлаб чиқамиз.

Фред Хейт билан унинг ёрдамчиси, Мейсоннинг бу қизгин нутқи ва ўзига ярашиб турган мардона қоматидан завқданиб кетишиди-ю, унга яқинроқ боришиди. Хейт дўстининг қўлини олиб сиқди. Эрл бўлса тўлқинланиб гап бошлади:

– Муваффақият тилайман, мистер Мейсон! Биз қўлимииздан келган ҳамма ишни қиласиз, кўнглингиз хотиржам бўлсин. Ҳа, ростдан, марҳума Куролсоз бекатида қолдириб кетган жомадонни унутманг. У маҳкамангизда турибди. Мен икки соат бурун уни Бертонга берган эдим.

– Ҳа, тўғри. Сал бўлмаса унугаёзган эканман, – деди Мейсон хотиржамлик ва ишбилармонлик билан. Бир неча дақиқа илгариги сўзамоллиги ва кўнгилчанлигидан энди асар ҳам қолмаган эди. Энди Мейсон ёқимли мақтоллар оғушида маст эди: у ўз хизмат фаолияти йилларида ҳали ҳеч қачон бунақсанги ҳаловатни бошидан кечирмаган эди.

## V БОБ

Мистер Мейсон Олден ва мансабдор кишилар ҳамроҳлигига ўз маҳкамасига қараб борар экан, бундай қабиҳ жиноят қандай қилиб юз берганикин, деб ўзига-ўзи савол берарди. У ёшлигига хотин-қизлар илтифотидан бегона бўлиб, кўп азоб чеккан, шунинг учун унда мана шунақсанги хаёл-

парастликка мойиллик кучли эди. У бир томондан Робертанинг гўзаллиги ва жозибадорлиги, иккинчи томондан эса унинг қашшоқлиги-ю, жиддий ахлоқий ва диний тарбияси ҳақида бош қотириб, охири шундай хуносага келдики, барча далилларга қараганда, ўша йигит ёки бирор-бир тирранча бола уни йўлдан оздиргану кейин жонига теккандан сўнг, ўшандай ҳийла ўйлаб топган, ундан қутулиш учун хиёнаткорона тарзда кўлга ёлғондакам «тўй сафари»га олиб чиққан. У ўз қалбида ўша кимсага нисбатан бекиёс нафрат ўти пайдо бўлганини ҳис этди. Разил бойлар! Текинхўр бойлар! Ахлоқсиз, ёвуз бекорчилар! Клад Грифитс ҳам худди ўшаларнинг насл-насабидан тарқаган бир итвачча! Қани энди уни тезроқ қўлга туширса эди!

Айни пайтда у тўсатдан: алоҳида шарт-шароитлар тақозосига кўра (қизнинг ўша одам билан эр-хотин-дек яшагани аниқ эди), Роберта, ҳойнаҳой, иккиқат бўлса ҳам керак, деб ўйлади. Шу фаразнинг ўзиёқ оқибати ёмон тугаган бу ишқ савдосига уни астойдил қизиқтирибгина қолмай, балки ўз гумонини синаб кўришдек бетоқат бир истак ҳам уйғотди. Шу сабабли Мейсон мурдани очиш учун агар Брижбургдан бўлмаса, у ҳолда Утиқаданми ёки Олбэниданми тузукроқ бир врач топиш зарурлиги, шунингдек, бу гумондан Хейтни ҳам хабардор қилиб қўйиши, ниҳоят, Робертанинг юзида кўкиши из қолдирган зарбларнинг ўзига хос томонларини аниқлаш лозимиги хусусида бош қотира бошлади.

Аммо Мейсон биринчи галда жомадон ва унинг ичидаги нарсаларни кўриб чиқиши лозим эди, буни қарангки, омади келиб, ундан фоят муҳим яна бир далилни топиб олди. Унда Робертанинг кўйлаклари ва шляпаси, ички кийимлари, бир жуфт резинкали қизил шойи тасмасидан ташқари (улар ликурглик Браунштейнлардан қандай сотиб олинган бўлса, ўшандай тахи бузилмаганча туарп-

ди) рождество байрамида Клайд унга совфа қилган пардоз қутича ҳам бор экан. Қутича филофининг бир четига, кулранг шойи бурма астари тагига кичкинагина оддий қофозча яшириб қўйилган бўлиб, унга: «Бертага Клайддан. Рождество байрами билан қутлайман!» деган сўзлар ёзилган эди. Лекин фамилияси йўқ эди. Бу сўзлар шоша-пиша, ажи-бужи ёзилганлиги билиниб турар, чунки буни ёзган пайтда Клайд Роберта қошига эмас, мутлақо бошқа ёққа шошилаётган эди.

Мейсонни бу нарса ҳайратга солди: наҳотки қотил пардоз қутича билан бояги қофозчанинг жомадондалигини билмаган?.. Агар била туриб, қофозчага тегмаган бўлса-чи, унда ўша Клайд қотил бўлиши мумкинми? Ахир, бироннинг жонига қасд қилган одам ўз қўли билан ёзилган хатни наҳотки мана шундай ташлаб кетаверса? Тавба, шунақаям ёвуз нияти, ғалати қотил бўладими? Шунда прокурорнинг хаёлига шундай фикр келди: «Қофозчанинг борлигини, яхшиси, судгача билдиримай тургани маъқул эмасмикин, борди-ю, жиноятчи бу қиз билан мутлақо алоқам йўқ ёки унга пардоз қутича совфа қилмаганман, деб туриб олса, ўшандан кутилмаганда шарт ўртага қўйгани дуруст эмасми?» У қофозчани олди-ю, чўнтаига урди, аммо аввалига Эрл Ньюком уни обдан кўриб чиқди-да:

– Менинг унчалик ишончим комил эмасу, мистер Мейсон, аммо назаримда бу, Катта мушгир меҳмонхонасидаги дастхатта жудаям ўхшаш, – деди.

Мейсон:

– Ҳа, буни биз тез аниқлаймиз, – деб жавоб берди.

У Хейтни имо билан қўшни хонага чақирди, бу ер кўздан холи бўлгани учун бемалол гаплашиш мумкин эди. Мейсон шундай деди:

– Ҳа, Фред, ҳаммаси худди сиз ўйлагандек бўлиб чиқяпти. Онаси қизининг кетганини билар экан (у Бильцдан туриб телефон орқали Хейтга айтган

гапи гумон қилинган жиноятчи хусусида миссис Олдендан маълумот олдим, деган сўзини назарда тутаётган эди). Аммо, агар унинг кимлигини айтмасам, сиз минг йил ўйласангиз ҳам тополмайсиз.

Кейин у Хейтга тикилиб қараб қолди.

– Гапингиз мутлақо тўғри, Орвил. Ўйлаб ўйимга етолмаяпман.

– Сиз Ликургдаги «Грифитс ва компания» фирмасини биласизми?

– Ия, ҳа, анави ёқа тикадиган фирмами?

– Ҳа, худди ўша.

– Ҳарқалай, ўғли эмасдир?

Фред Хейтнинг кўзлари олайиб пахтаси чиқиб кетаёди, у анча вақтлардан бери ҳали ҳеч кимга бу қадар бақрайиб қарамаган эди. Қорайган катта қўллари эса узун соқолини тутамлаганча қолди.

– Йўқ, ўғли эмас. Жияни.

– Сэмюэл Грифитснинг жияни?! Бўлмаган гап!

Тақводор, ахлоқقا қаттиқ риоя қилиб, сиёsat ва савдогарчиллик билан қизиқадиган кекса терговчи соқолини юлқиганча эсанкираб Мейсонга қаради.

– Ҳозирча ҳамма калаванинг уни ўшанга бориб тақаляпти, Фред. Ҳар ҳолда мен бугун кечқурун Ликургга жўнайман, ўйлайманки, эртага бундан ҳам кўпроқ нарсаларни билиб олсам керак. Лекин қаранг-да, анави фермер Олден ниҳоятда қашшоқ бир бечора экан, қизи эса Ликургдаги Грифитслар фабрикасида ишлар экан; анави жияни, Клайд Грифитс эса, ҳойнаҳой, қиз ишлаган бўлимни бошқарса керак.

– Хўш, хўш, хўш, – деди терговчи.

– Саёҳатгача, яъни сешанбага довур қиз бир ой давомида уйида ўтирибди, бетоб экан (у бу сўзга урғу берди). Шу вақт ичидаги у йигитга кам деганда ўн марта, афтидан ундан ҳам кўпроқ хат ёзибди. Буни ўша ерлик почтацидан биллиб олдим. У бутун қонун-қоидага биноан қасам ичиб гувоҳликка

ўтди, мана унинг гувоҳлиги! – Мейсон камзулининг чўнтағини уриб қўйди. – Хатларнинг бари Ликуррга, Клайд Грифитсга йўлланган. Мен ҳатто унинг уй номерини ҳам биламан. Қиз яшаган оиланинг фамилияси ҳам аниқ. Мен Бильцдан туриб ўша хонадонга қўнғироқ қилдим. Бугун Ликуррга ўзим билан бирга чолни ҳам олиб кетмоқчиман: эҳтимол, у биладиган яна бошқа нарсалар ҳам чиқиб қолиши мумкин орадан.

– Хўш, хўш, Орвил. Тушуняпман... тушуняпман... Лекин ҳазилакам гапми: Грифитс-а!.. – Хейт томогини қириб қўйди.

– Энг муҳими, мен сиз билан медицина экспертизаси хусусида гаплашиб олмоғим даркор, – деб давом этди Мейсон шоша-пиша, гапни кесиб-кесиб. – Биласизми, у қизга уйлангиси келмагани учун ўлдиришга аҳд қилган, деёлмайман. Менимча, бу ишонарсиз гап.

Шундан сўнг Мейсон Роберта иккиқат бўлган деган хулосага олиб келган асосий мулоҳазасини Хейтга маълум қилди.

Хейт ўша заҳотиёқ унинг фикрларига қўшилди.

– У эмас-бу эмас, мурдани очиб, – деди Мейсон, – яралари ва майиб жойларининг хусусиятлари тўғрисида медицина хулосасини чиқариш керак. Қизни аввал ўлдириб, кейин қайиқдан отиб юборганми ёки уни бир нарса билан уриб, ҳушсиз ҳолда ташлаб кетганми, ё қайиқ афдарилганми – Фред, биз мана шуларнинг барини жасадни бу ердан олиб кетгунларига қадар худди беш қўлдай аниқ билишимиз лозим. Иш учун бунинг аҳамияти катталигини ўзингиз яхши тушунасиз-ку. Агар биз шуларнинг ҳаммасини аниқ билмасак, ишимиз асло ўнгидан келмайди. Аммо бу ердаги врачлар билан қандай бўларкин-а? Шу ишларнинг барини, сизнингча, уларнинг қайсииниси бир мундоқ тузук-

роқ, судда ҳеч ким хulosага қарши оғиз очолмайдын қилиб эплай оларкин?

Мейсон миясида айбнома режаларини тузәётгани учун, ҳаяжонга туша бошлади.

– Билмайман, Орвил, – деб жавоб қилди Хейт салмоқданиб, – аниқ айтолмайман. Буни мендан күра ўзингиз яхши биласиз. Мен доктор Митчелдан эртага кириб, қизни бир күришни илтимос қилдим. Бетсни ҳам чақирса бўлади. Агар сиз яна бирор-бир бошқасини десангиз... Бевоними ёки Линкольнними... Бево ҳақида фикрингиз қандай?

– Яххиси, Утикадан Уэбстерни ё Бимисни ёки икковини бирдан чақирган маъқул, – деди Мейсон. – Бунақа ишда тўрт-беш эксперт ҳам ортиқчалик қилмайди.

Хейт ўз гарданига юклатилган жавобгарликнинг нақадар оғирлигини сезгани ҳолда:

– Менимча, сиз ҳақсиз, Орвил, – деди қўшимча қилиб. – Ҳойнаҳой бир-икки ақддан кўра тўрт-бештаси яхшидир. Лекин бу деган сўз: яна бир ёки икки қунга, барча врачларни йифмагунимизча гувоҳдик ишларини қолдириб турамиз, дегани бўлади.

– Тўғри, тўғри, – деб тасдиқлади Мейсон. – Бу қайтага яхши. Мен шу аснода Ликургга бориб келаман, эҳтимол, бошқа янгиликларни ҳам билиб қайтарман. Ахир, қўп нарсани олдиндан айтиш қийин-ку. Балки у ерда уни қўлга тушириб қолишим ҳам мумкин. Яхши ният ярим мол, дейдилар. Ёки жуда йўқ деганда, бутун ишга, майли, қиттайгина бўлса-да, ойдинлик киритадиган бирор-бир янгилик топиб келишим мумкин... Фред, бу фоят катта ишга айланишини шундоқ сезиб турибман. Менинг фаолиятимда, қолаверса, сизникоша ҳам бу ниҳоятда оғир иш бўлиши турган гап, шунинг учун ҳар бир қадамимизни ўлчаб босишимиз кепрак. Бундай масалада қанча эҳтиёт бўлсанг, шунча яхши. У, чамаси, бадавлат одамга ўхшайди,

демак, у курашади. Бундан ташқари, унга қариндош-уруглари суюнчиқ бўлишади.

Асабийлашганидан унинг қалин соchlари худди тиккайиб кеттандек кўринди.

– Ҳечқиси йўқ, менимча, эпласак керак, – деб давом этди у. – Биринчи навбатда Утикадан Бимис билан Уэбстерни чақириш зарур, балки бутун унга телеграмма юборасизми-а ёки телефонда гаплаша қолинг. Олбэнидан Спранлани ҳам чақириш лозим. Ичимииздан ёв чиқмаслиги учун ўзимизнинг Линкольн ва Бетсни ҳам унутмаслигимиз керак. Ҳа, ростдан, Бевони ҳам. – Шу ерга келганда у хиёл кулимсираб қўйди. – Мана шунаقا гаплар, Фред, мен бўлсан ҳозирча йўлга ҳозирлик кўрай. Шундай қилингларки, улар бу ерга эртага эмас, душанба ёки сесланбада келадиган бўлишсин. Ўша пайтгача, эҳтимол, мен ҳам қайтиб улгуарман, унда ҳаммасида ўзим қатнашаман. Агар иложи бўлса, яхшиси, душанбада йифила қолишин... қанча тез бўлса, шунча яхши! Кўрамиз, нима гап чиқаркин ўшанда.

У шкафдан яна бир даста бланка олди-да, кейин қабулхонага чиқиб, Олденга: иккаламиз бирга Ликургга борадиган бўлдик, деб огоҳдантирди, сўнgra Барлейдан миссис Мейсонни телефонга чақириб, унга шошилинч иш билан олис бир жойга кетаётгани ва душанба кунидан олдин келомаслигини айтиб қўйишни топширди.

Орвил Мейсон Утикага бора-боргунча уч соат, Ликург поездини кутиб бир соат ва яна ўша поезднинг вагонида бир соату йигирма дақиқа (улар Ликургга эрталаб соат еттиларга яқин кириб келишди) замдан эзилиб соб бўлган бечора Тайтусни гапга солиб келди, Тайтус эса ўзи ва Робертанинг оддийгина ўтмишини, қизининг сахийлиги, мўмин-қобиллигини, хулқ-одоби, унинг меҳрибон ва назокатли қалби, аввал қаерда ишлаб, қанча маош олгани ва уни нималарга сарфлаганини чалакам-

чатти сўйлаб берар, чолнинг бу аянчли ҳикояси Мейсонни чуқур изтиробга солар эди.

Тайтус билан Ликургга келгач, Мейсон ўша заҳотиёқ «Ликург» меҳмонхонасига борди ва битта номерни ижарага олиб, чол дам олсин деб, уни ўша ерда қолдирди. Меҳмонхонадан чиқиб маҳаллий прокурор ҳузурига шошилди, чунки бу территорияда иш қўриши учун Мейсон ундан рухсат олиши лозим эди. Айрим юмушларини бажариши учун Мейсонга гражданча кийиниб олган барваста бир изқувар полициячини қўшиб беришди, у ҳам Клайдни қандай бўлмасин уйида қўлга туширишдан умид тутиб, унинг Тэйлор-стритдаги кулбасига қараб жўнади. Аммо уларга пешвоз чиққан миссис Пейтон, ҳа, аслида Клайд шу ерда яшайди-ю, лекин ҳозир уйида йўқ (у сесланба куни кетган эди, ҳойнаҳой, Ўн иккинчи кўлдаги дўстлариникида бўлса керак), деб жавоб берди. Шундан сўнг Мейсон бир оз ноқулай бўлса ҳам, биринчидан, ўзининг Катараки округининг прокурори эканлиги ва иккинчидан, Катта мушгир кўлида чўкиб кетган бир қиз ҳалокатига алоқадор баъзи бир шубҳалар борлиги сабабли (ўша қизга афтидан Клайд ҳамроҳ бўлиб борган) прокурор сифатида ҳозир Клайднинг хонасини тинтув қиласхагини тушунтирди. Бу гап миссис Пейтонни шу даражада ларзага солдики, юзида чексиз ҳайрат, даҳшат ва шубҳа акс этиб, орқага тисарилиб кетди.

– Нима, мистер Клайд Грифитс-а?.. Э, йўғ-е, бу ақлга сифмайди! У Сэмюэл Грифитснинг жияни-ку, уни бу ерда ҳамма танийди. Агар у ҳақда сизларга бирор-бир маълумот керак бўлса, унинг қариндошлирига боринглар: улар сизларга албатта ҳаммасини айтиб беришади. Э, тавба, шундай бўлиши... йўқ, бўлмағур гап бу!

Кейин миссис Пейтон Мейсонга ва аллақачоноқ нишонини кўрсатиб улгурган маҳаллий изқуварга

шундай назар билан тикилиб қолдики, гүё уларнинг ҳалоллиги-ю ваколатларига ҳам шубҳа қилаётгандек эди у.

Изқувар бунақанги воқеаларни кўравериб пишиб кетганидан шу орада лип этиб миссис Пейтоннинг орқасига ўтди-ю, юқори қаватга олиб чиқадиган зина тагига туриб олди. Мейсон бўлса ҳар эҳтимолга қарши аввалдан тайёрлаб қўйилган тинтуб ўтказиш тўғрисидаги ордерни чўнтағидан чиқарди.

– Таассуфки, хоним, аммо бизга унинг хонасини кўрсатишингизни илтимос қилишга мажбурман. Мана, тинтуб ўтказиш ҳуқуқини берувчи ордер, бу киши эса менинг ихтиёrimдаги полиция агенти.

Миссис Пейтон қонун билан олишишнинг беҳудалигини дарров тушунди-ю, қўллари дир-дир титраб Клайднинг хонасини кўрсатди, бироқ шунда ҳам у, ҳойнаҳой, қандайдир бемаъни, мутлақо ноҳақ ва иззат-нафсни ҳақорат этувчи англашилмовчиллик юз берган бу ерда, деб ўйлай бошлиди.

Мейсон билан изқувар эса Клайднинг хонасига кириб келиб уни кўздан кечира бошлиди. Бирдан икковларининг назари қулфланган ҳолда бурчакда турган нимжонгина сандиқчага тушди, изқувар мистер Фаунс ўша заҳотиёқ унинг оғирлигини аниқдамоқчи бўлди шекилли, хиёл кўтариб кўрди, Мейсон эса хонадаги барча яшик ва кутичалардаги буюмларнинг барини, шунингдек, кийим-бош киссаларини ҳам битта қолдирмай бир чеккадан кўздан кечириб чиқа бошлиди. Шифонъер тортмасидаги эски-туски кўйлак-иштонлар ва Трамбаллар, Старклар, Грифитслар ва Гарриэтлардан келган эски таклифномалар орасидан у бир энлик блокнот варагини топиб олди, унга Клайд эсидан чиқармаслик учун ўзининг қаерга таклиф этилганини қайд этиб қўйган эди: «20 февраль, чоршанба. Старкларникида тушки зиёфат», пастрогида эса: «Жума, 22. Трамбаллар» деб ёзил-

ган эди. Мейсон бу дастхатни чўнтағидаги расмчанинг ёзувига солиштириб кўрди-ю, бир-бирига ўхшашлигидан, ўзи чиндан ҳам айни излаб юрган одамининг хонасида эканлигига ўша заҳотиёқ қаноат ҳосил қилди. У қофозни чўнтағига яширди-да, бурчак томонга, қулфлоголиқ сандиқчани диққат билан кўриб чиқаётган из-қуварга қаради.

– Хўжайин, буни нима қиласиз? Олиб кетамизми ёки шу ернинг ўзида очамизми?

– Менимча, – деди Мейсон савлат тўкиб, – шу ерда очганимиз маъқул, Фаунс. Кейинроқ олиб кетишига одам юбораман, бироқ ичида нима борлигини мен ҳозироқ кўришни истардим.

Изқувар дарҳол чўнтағидан зилдай исканасини чиқарди-ю, атрофда болға йўқмикан, деб у ёқ-бу ёққа қаради.

– Анча бўш сандиқ экан, – деди у, – агар истасангиз, синдириб очиб беришим ҳам мумкин.

Аммо гап шу ерга келганда чексиз ҳайратга ботиб ўтирган миссис Пейтон бунчалик бўлишини кутмагани учунми, охири чидолмади, қўпол ҳаратнинг олдини олиш умидида гапга аралашибди:

– Агар истасаларинг, болға топиб беришим ҳам мумкин, – деди у, – лекин, наҳотки чилангартга одам юбориш шунчалик амри маҳол иш бўлса? Умрим бино бўлиб бунаقا бемазаликни кўрмаганман ҳали!

Шунга қарамай, изқувар болға топди-да, қулфни бир уриб туширди. Сандиқнинг чоғроққина устки бўлмасида майдачуйда турли хил либос-анжомлар: пайпоқ, ёқачалар, галстуклар, ипак шарф, шимга тақиладиган тасма, эски жемпер, бир жуфт баланд пошнали одмигина қишилик этик, муштук, ялтироқ қизил кулдан ва коньки бор экан. Лекин шуларнинг орасида, бурчакда бир боғлам Роберта-нинг Бильдан туриб ёзган ўн бешта сўнгги хати ҳамда бултур совға қилган кичикроқ портрети ётарди. Сондранинг Қарағайзор бурунига кетма-

сидан олдин Клайдга ёзган барча хатчалари ва таклифномалари йигилган бошқа бир даста эса, шундоқ ёнида эди. Қарағайзор бурунида ёзилган бу хатларни Клайд ўзи билан биргә күкрак чүн-тагида, нақ юрагининг устида сақлаб юрар эди. Клайдни баттар фош этадиган яна бошқа бир даста хат ҳам чиқиб қолди – булар онасидан кел-ган ўн битта мактуб бўлиб, устига-устак дастлабки ёзилган иккитаси Чикагога, Гарри Тенет номига сўраб олинадиган мактуб сифатида ёзилган эди, бу ҳол кишида дарров шубҳа туғдирарди, қолган хатлар эса Клайд Грифитс номига аввал Чикагога, кейин Ликургга юборилган эди.

Прокурор сандиқда яна нима бор-йўқлиги-ни текшириб ўтирамай, тўгридан-тўгри хатларни ўқишига тутинди: аввалига Робертанинг дастлаб ёзган учта хатини ўқиб чиқди-ю, шундан сўнг унинг Бильдга кетиш сабабини ҳам аниқ-равшан билиб олди; кейин ниҳоятда оддий ва арzon қофозга битилган онасидан келган биринчи учта хатни кўздан кечириб чиқди: уларда онаси Клайднинг Канзас-Ситида қилган бемаънгарчиликлари, ўша баҳтсиз ҳодисани деб ўз юртидан бош олиб кетишга мажбур бўлганига шама қилиб ўтар, шунда ҳам қатъий сўзида туриб, меҳрибонлик билан уни келажакда энди сира йўлдан адашмасликка ундар эди. Мейсон аслида одамови мижоз бўлгани ҳамда кишилар ва инсоний муносабатларни чуқур билмаганлиги учун унда, Клайд болаликданоқ беқарор хулқи, енгилтаклиги ва ахлоқсизлиги билан ном қозонган экан, деган тасаввур пайдо бўлди.

Айни пайтда Мейсон, гарчи Клайд бу ерда бадавлат амакисининг мурувватидан баҳра олиб юрган бўлса-да, аммо ўзи Грифитслар аждодининг камбағал, бунинг устига художўй уруғига мансублигини билганда чинакамига ҳайрон қолди. Бошқа пайт бўлганда-ю, бу қайтага Клайдга

нисбатан унинг муносабатини анча юмшатган ҳам бўларди. Аммо ҳозир, Сондра ёзган номалар, Робертанинг даҳшатли мактублари ва Канзас-Ситида Клайд аввал ҳам қилган аллақандай жиноят тўғрисида онаси эслатган гаплар Мейсонга шунчалик таъсир этдики, у, Клайд шу хулқи билан яна янги жиноятни мўлжаллаши у ёқда турсин, ҳатто бадани қилт этмай бемалол ёвузлик қила олишга ҳам қодир кимса экан, деб ўйлай бошлади. Қизиқ, Канзас-Ситида нима бўлган экан? Ўша ернинг прокурорига албатта телеграмма юбориб, тафсилотларини сўраш керак.

У шу ҳақда ўйлай туриб, Сондранинг хилма-хил мактуб ва таклифномалари ҳамда севги иқрорларини шоشا-пиша, бироқ айни пайтда синчковлик билан, танқидий назар билан кўриб чиқа бошлади. Ҳамма хатлардан хушбўй атир ҳиди анқир, улар исм ва фамилиялари жимжимадор қилиб ёзилган ялтироқ қофозларга битилган бўлиб, борган сари ширинроқ ва самимиyroқ маъно касб этар эди, охиригина пайтда юборилган хатлар эса доимо: «Митти Клайди» ёки «менинг ёқимтой қора кўзгинам» ёхуд «менинг ёқимтой миттигинам» деган сўзлар билан бошланар, тагига эса болаларча «Сонда» деб ёки «Сизнинг Сондрангиз» деб имзо чекилган эди... Улардан айримлари яқингинада: ўнинчи, ўн бешинчи, йигирма олтинчи май кунлари ёзилган эди, худди шу кунларда Робертадан ниҳоятда умидсиз мактублар кела бошлаган, деган фикр Мейсоннинг миясига ялат этиб урилди.

Энди ҳаммаси равshan эди. У бир қизни пинҳона йўлдан ургану бу билан чекланмай, уятсизларча яна бошқаси билан ҳам дон олишган – бу гал у, шу ерлик олий табақа оиласарига мансуб қизни қўлга туширган.

Ҳайратга тушса тушгудек бу воқеага ўралашиб, шошилиб қолган Мейсон айни пайтда ҳозир қуруқ

хаёл суриб ўтирадиган вақт эмаслигини ҳам яхши билар эди. Йўқ, беҳудага ўй суришдан фойда чиқмайдн, ҳозир. Сандиқчани тезликда «Ликург» меҳмонхонасига жўнатиш зарур. Кейин у, агар иложи бўлса, ўша кимса қаердалигини аниқдаши ва уни қўлга олиши лозим... Мейсон изқуварга полиция маҳкамасига қўнфироқ қилишни ва сандиқни номерига элтиб қўйишларига бош-қош бўлишни буюрди-ди, ўзи Сэмюэл Грифитснинг дангиlluma ҳовлисига қараб шошилди, лекин бориб билса, оила аъзоларининг ҳаммаси шаҳардан ташқарида, Ўрмонзор қўлида эканлар.

Телефон орқали Ўрмонзордан сўраб-суриштирган эди, у ердан: Клайд Грифитс Шейрон яқинидаги Ўн иккинчи кўлда Финчлилар мулки ёнидаги Крэнстонлар чорбоғида бўлса керак, деган хабарни беришди. Финчли деган фамилия ҳам, Шейрон деган шаҳарча ҳам Мейсоннинг миясида Клайд билан аллақачоноқ, боғланиб кетган эди, шу сабабли у, агар Клайд олис ерларга жуфтакни рост slab қолмаган бўлса, у ҳолда ҳойнаҳой шу атрофда, эҳтимол, анави ҳамма мактуб ва таклифномаларни ёзган қиз, Сондра Финчлиниң чорбоғидадир, деган қарорга келди. Ахир, «Оққуш» капитанининг гапига қараганда ҳам, Учинчи миль Кўрфазидан келаётган йигитча Шейронда тушиб қолган-ку. Омади келиб турибди шекилли ўзи! Энди уни аниқ қўлга туширди!

Мейсон бундан бу ёғига қандай ҳаракат қилиш режасини ҳар томонлама ўйлаб олди-да, Шейрон ва Қарагайзор бурунига шахсан ўзи борадиган бўлди. Шу орада у Клайднинг ташқи қиёфасини аниқ суриштириб билгач, бу белгилар ва Клайднинг қотилликда гумон қилиниб, изланаётганлиги масаласини фақат Ликург прокурори ва полиция бошлиғигагина хабарлаб қолмай, шунингдек, Брижбург шерифи Ньютон Слэк, Хейт ва ўз ёрдамчисига ҳам етказиб, учовларини тезликда

Шейронга етиб келинглар, шу ерда учрашамиз, деб таклиф этди.

Шундан кейин, гүё миссис Пейтоннинг топшириғига биноан иш күраётган киши бўлиб, шаҳарларо телефон орқали Қарагайзор бурунидаги Крэнстонлар чорбоги билан боғланди-да, бош хизматкордан, мабодо мистер Клайд Грифитс сизларникида эмасми, деб сўради. «Ҳа, сэр, у шу ерда, сэр, лекин ҳозир бу яқин ўртада кўринмаяпти, сэр. Кўлга сайр қилишга чиқиб кетган бўлиши керак, сэр. Нима деб қўяй, сэр?» Бош хизматкор кейинги саволларга тузукроқ жавоб қайтаролмади: улфатларнинг ҳаммаси Айик кўлига қараб кетди чамаси, у бу ердан ўттиз милча нарида; қачон қайтиб келишларини у билмайди, бир-икки кун ўтгандан кейин, ҳарқалай ундан олдин келишмас. Аммо бир нарса – Клайднинг ўша улфатлар билан кетгани аниқ-равшан эди.

Мейсон ўша заҳотиёқ Брижбург шерифини иккинчи марта телефонга чақирди-да, ўзи билан тўрт ёки беш нафар изқувар олиб келишга кўрсатма берди, чунки бу таъқибчилар Шейронда гурӯҳларга бўлиниб, Клайдни, агар у ернинг тагига кириб кетган тақдирда ҳам, албатта топишлари ва Брижбург турмасига қамашлари керак эди. Кейин у ёғига Клайд қонун белгилаган расм-русмларга биноан ҳозирги кунгача уни Роберта Олденнинг қотили қилиб кўрсатаётган, бир қарашда рад этиб бўлмас фалати гумонларни ечиб бераверади.

## VI БОБ

Кўл сувлари Робертани ўз қаърига ютгандан сўнг, Клайд қирғоқча сузиб чиқиб, кейин кийими ни алмаштириб, Шейронга ва ундан сўнг Крэнстонлар чорбогига етиб олгандан бери узил-ке- сил ақдан озгандек юрар, саросима ва даҳшатга

тушганидан, Робертанинг бевақт ўлимида ўзи гуноҳкорми ёки йўқми – аниқ билмас эди. Лекин айни пайтда бир нарса унга аён эди. У шимол тарафга, Катта мушгир меҳмонхонасига қайрилмасдан, ёт кўзлардан яширинганча жанубга қараб кетаётганини фавқулодда биттаси кўриб, кейин кутилмагандан юз берган анави фалокатни гапириб қолса борми, у ҳолда уни шу қадар раҳмсиз ва тошбағирлиқда айблашадики, ҳар қандай киши ҳам иккиланмай уни қотил, дейди. Бу фикр уни қаттиқ азобга соларди, чунки энди у ўзини ҳақиқатан ҳам гуноҳсиздек ҳисобларди, ахир, охирги дақиқаларга борганда унинг қалбида бутунлай тўнтариш юз бермадими!

Аммо у қайтиб бориб, юз берган воқеани хабарламагандан сўнг энди унга ким ҳам ишонарди? Ҳозир қайтаман деса, кечикди. Кимсан бир фабрика ишчиси билан Клайднинг ўша кўлда бўлгани ва меҳмонхонада уни хотиним, деб ёздирганини мабодо Сондра эшитиб қолса борми... Э, худо-е!

Шундан кейин амакисига ёки совуқ, қаҳри қаттиқ Гилбергга буларнинг ҳаммасини қандай изоҳлаб беради... Ликурѓдаги барча олифта, уятсиз ёшларга нима дейди?.. Йўқ, йўқ! Қилар ишни қилиб қўйди, энди чекинишининг иложи йўқ. Акс ҳолда – фалокат... эҳтимол, ўлим. У иложи борича бу даҳшатли аҳволдан фойдаланиши, шундай ғалати, гўё уни оқловчи натижа билан тугаган ўша ниятидан фойдаланиши зарур.

Аммо бу ўрмонлар! Яқинлашаётган тун! Ҳамма ёқда, ҳар бир нарсада қўрқинчли ёлғизлик ва хавф-хатар! Борди-ю, бирор йўлиқиб қолса, у ўзини қандай тутади-ю, унга нима дейди? Клайд бутунлай гангид қолган, руҳий ва асабий хасталик остонасида эди. Шоҳ қисирлаб синса ҳам худди қуён сингари қочишга тушарди.

Ўшанда у шундай аҳволда қоронфи тушишини кутди-да, кейин ўрмон ичкарисига шўнғиб кетди,

аммо аввал жомадонини топиб, костюмини ўзгартириди ва ҳўл кийимларини сиқиб бир оз қуритмоқчи бўлди, сўнгра уни жомадонига солиб, устига қуруқ шох-шабба ва япроқлардан ташлади-да, фотография аппаратининг таглик оёғини эса йиқилиб ётган дараҳт танаси остига яширди. У ҳамон ўзининг ғалати ва хавфли аҳволи тўғрисида тўхтовсиз бош қотиради. Борди-ю, у Робертани бехосдан уриб юбориб, икковлари сувга ағанаб тушган пайтларида ва Роберта қулоқни тешгудай нола қилиб қичқирган ўша дақиқада кимдир қирғоқда турган бўлса-я? Кундузи бу ерда ўзи кўрган анави кучли, бақувват йигитлардан бирими... ёки бирон бошқа кишими кўриб қолган бўлса, унда нима бўлади... балки мана шу дақиқанинг ўзида кимдир ҳамма ёқقا жар солаётгардир – шу тунда ўнлаб одамлар, эҳтимол, унинг изига тушишар. Тавба, одам одамни овласа-я! Улар Клайдни ушлаб олишса, кейин Робертани бехосдан уриб юборганига ким ҳам ишонади, ахир! Ҳатто қонуний судни кутиб ўтирмай, уни ваҳшийларча ўлдирив юборишлари ҳам мумкин. Ҳеч гап эмас. Бунақа воқеалар илгарилари ҳам бўлган. Осишади. Ёки шу ўрмоннинг ўзидаёқ шартта отишади. Ҳатто, Роберта уни узоқ таъқиб қилгани, қанчалар азоблаганини... гапиришига ҳам йўл қўйишмас балки! Буни ҳеч ким, ҳеч қачон тушунмайди!

У шуларни ўйлаганча тобора қадамини тезлаштириб борарди – тиканакли чайир, қалин буталар, оёқ остида ваҳима билан қарсиллаётган қуруқ шох-шаббалар орасидан иложи борича тез-тез ўтиб, хаёлида эса тинмай: Учинчи миль Кўрфазига олиб борадиган йўл ўнг томонимда, ой чап томондан чиқиши керак, деган фикрни такрорлашдан бўшамасди.

Э, худо, анави нима?

Аллақандай даҳшатли овоз келяпти!

Тун зулмати бағридан бамисоли бир ажинанинг мунгли ва машъум овози келаётганга ўхшайди!

Ана!

Нима у?

У жомадонини қўлидан тушириб юборди, бутун вужудини совуқ тер босиб, сершоҳ, азамат бир дарахт остида қўрқувдан фужанак бўлганча қимир этмай, ерга ўтириб қолди.

Даҳшатли овоз!

Ха, бу бойўғли! Клайд бу овозни бундан бир неча ҳафта бурун, Крэнстондар чорбогида бўлган пайтида эшитганди. Лекин бу ерда-чи? Шу чангалзорда-я! Шу зулмат ичида-я!.. Йўлга тушиш, тезроқ бу ердан даф бўлиш керак, энг тўғриси шу. Бу қўрқинчли, ваҳимали фикрларни миясидан чиқариб ташлаши зарур, акс ҳолда унда қувват ҳам, ирода ҳам бутунлай тугайди.

Аммо Робертанинг нигоҳи! Унинг ўша сўнгги илтижоли боқиши! Эй, худо-е! Унинг кўзлари ҳозир ҳам шундок ўрпарамасида турибди. Жон ҳолатда, даҳшатга тушиб қичқиргани-чи? Клайд бу ердан узоқлашиб кетмагунч... наҳотки, ўша қичқириқ қулоқлари остида бир дақиқа ҳам кетмай тураверса-я?

Робертани уриб юборганида ҳеч қандай ёмон нияти йўқдигини... атиги бир лаҳзалик ғазаби қайнаб, Робертадан норози бўлганини у тушундимикан? Майли, Роберта қаерда бўлмасин – кўл тубидами ёки шу қоронги чангалзорда Клайд билан ёнма-ёнми, бари бир... Клайднинг нияти поклигини пайқармиди? Унинг арвоҳи-чи?.. Йўқ, бу ердан тезроқ олисга... олиста қочиб кетиш керак! Қочиб кетиш керак... аммо сирасини айтганда... бу ер, чангалзорлик унинг учун хавфсиз жой-ку. У ўзини кўлга олиб, зинҳор катта йўлга чиқмаслиги керак. У ерда, эҳтимол, уни қидириб юришгандир!... Аммо, одам ўлгандан кейин ҳам жони яшайди, деган гап тўғримикан? Арвоҳи яшайди, деганлари-чи? Уларнинг ҳамма нарсани кўриб-билиб туришлари-чи, шулар ҳам ростмикан? Унда Клайднинг нияти пок-

лигини Роберта билиши керак... лекин у ҳолда унинг аввалги ниятларини ҳам билади-да. Ҳозир нима деб ўйлаётганикин? Балки у ҳозир қайыу тўла таъналарни ёғдириб, Клайдни бекордан-бекор айбдор ҳисоблаётгандир? Ҳа, янгишиб айблайлётгандир, тўгри, Клайд аввалига уни ўлдирмоқчи ҳам бўлган эди. Ўлдирмоқчи бўлган эди! Шундай нияти бор эди! Бу, албатта, катта гуноҳ. У гарчи Робертани ўлдирмаган бўлса ҳам... Клайднинг ўрнида кимдир шундай қилди. Бор ҳақиқат шу.

Аммо анави шарпа!.. Худо урди энди, сени фош этиш ва жазо бериш учун ўлганларнинг арвоҳи... эрта-кеч орқангдан эргашиб юргани-юрган... ким билади, эҳтимол... Улар одамларни изингга солиб юборишга ҳам уриниб кўтар? Онаси бир марта Клайд, Фрэнк, Эста ва Жулияларга арвоҳга ишонаман, деб бўйнига олдирган ҳам эди-ку, ахир.

Ниҳоят ой ҳам чиқди, шундан сўнг у қоқила-суқила, атрофга қулоқ солиб, тўхтаб, қалтироқ босиб ва баданидан тер қуйиб, шу ҳолда уч соат давомида йўл босди. Атрофда, худога шукур, ҳеч ким кўринмас эди! Олис самода эса Сондра яшаётган Қарағайзор бурунидаги каби йирик ва майин юлдузлар нур сочиб туришарди... Ҳозир унинг сув юзасида шляпаси сузиб юрган ўша кўл ўпқонида ётган Робертадан қочиб бораётганини Сондра бир кўрганда эди! Агар у Робертанинг чинқиригини эшитгандами! Қизик, Сондрани деб – унинг ҳусни жамоли-ю, унга бўлган талпиниши, ҳаётига у қанчалар сингиб кетгани туфайли – у шундай иш қилгани... шундай иш қилгани – аввал севган суюклисини ўлдиришгача бориб етганини... шундай ёвуз ишни қилишга уринганини у ҳеч қачон, ҳеч қачон, ҳеч қачон Сондрага гапириб беролмайди. Бу фикр бутун умр бўйи уни қийноққа солади. У ҳеч қачон, ҳеч қачон, ҳеч қачон бундан қутулолмайди! Аввал у бу ҳақда ўйлаб кўрмаган экан. Бу даҳшат-ку, ахир!

Шу пайт бехосдан тун қоронгисида, кейин эсласа соат ўн бирлар экан ўшанда, чунки сув теккани учун соати түхтаб қолган эди, гарб томонга қараб кетган катта йўлга аллақачоноқ чиқиб олиб, бир ёки икки милча йўл босмаган ҳам эдики, гўё осмондан тушгандай қоронги чангальзор ортидан худди арвоҳга ўхшаб анави уч киши чиқиб қолса бўладими! Клайд аввалига: улар мени Робертани ураётган пайтимда ёки сал кейинроқ кўриб қолишган, энди мени қўлга тушириш учун келишяпти, деб ўйлади. Қанчалар даҳшатли эди ўша дақиқалар! Фонус ушлаган бола эса унинг юзини аниқроқ кўриш учун чирогини кўтарди! Шунда у Клайднинг юзида аллақандай шубҳали қўркув ва эсанкираш аломатларини ҳам кўрган, албатта, чунки Клайд айни ўша пайтда нақ ич-этини еётган эди: сиримни ошкор қилиб қўядиган бирор нарсани эсдан чиқариб қолдирган бўлсам-а, деган васваса миясини тинимсиз кемирмоқда эди. У, булар мени қўлга оладиган одамлар, деб ишонди-да, тисарилиб кетди. Аммо шу пайт олдинда келаётган баланд бўйли озгин киши Клайднинг юраги чиқиб кетаёзганидан гўё завқдангандай, бамайлихотирлик билан: «Салом, йўловчи!» деб қўйди, бола эса пинагини ҳам бузмай, чироқнинг пилигини кўтарганча олдинга қараб кетаверди. Клайд шундагина булар мутлақо унинг изидан тушган отряд эмас, балки шу ерлик деҳқонлар ёки йўл кўрсатувчилар эканлигини англади-да, агар ўзини босиб, улар билан юмшоқ муомала қилса, ҳеч қачон уни қотил деб гумон қиласмасликларига ишонди.

Аммо кейин ўзига ўзи ичида: «Ахир, улар мени эсда олиб қолишади-ку. Шундай бемаҳалда ҳувиллаган йўлда бир ўзим жомадон кўтариб кетаётганимни эслаб қолишади-ку... деб қўйди. Ўша заҳотиёқ шошилиши... шошилиши... ва энди ҳеч кимга йўлиқмаслигим керак, деган қарорга келди.

Орадан бир неча соат ўтгач, ой ботаётганда, ўрмонга ёғилиб турган оч-сариқ заиф нурлардан тун яна ҳам мудҳиш ва хомуш кўринаётган бир паллада Клайд Учинчи миль Кўрфазига етиб келди – бу Ҳинд тоғларининг шимолий тизмаларига ёндашиб тушган, ерлик ҳалқдарнинг бир тўда чор деворлари-ю чорбоғли ҳовлиларидан иборат қишлоқча эди. Йўл муйилишига етганда у баъзи деразаларда ҳали ҳам хира шуъла милтилаб турганини кўрди. Дўконлар. Уйлар. Кўча чироқлари. Бироқ заиф ой нурида бу чироқлар бутунлай хира – хира ва мавҳум кўринарди, Клайд шундай бемаҳалда башанг кийиниб олганча жомадон кўтариб қишлоққа кириб бориши мумкин эмас эди, буни ҳар қандай одам ҳам яхши тушунар эди. Агар унга бировнинг кўзи тушгундай бўлса, кўринишига албатта қизиқсиниб қолиши ва шубҳа қилиши турган гап эди. Мана шу қишлоқ билан Шейрон ўртасида қатнайдиган кемача эса (Клайд Шейрон орқали Қарағайзор бурунига қараб жўнаши керак эди) саккиз ярим бўлгандагина жўнар, демак, унгача қаердадир яшириниб, иложи борича ўзини тартибга келтириши лозим эди.

Шунинг учун у қишлоқнинг қоқ четига туташиб кетган ўрмон ичига яна қайтиб кирди-да, тонггача шу ерда кутиб ўтиromoқчи бўлди; у ердан кичкинагина черковча минорасидаги соатни кузатиб, йўлга чиқиш вақтини ҳам билиб туриши мумкин эди. Ҳозирча у қилаётган иши тўғрими ёки нотўғрими – шуни англашга уринарди. Мабодо уни шу ернинг ўзида биттаси пойлаб турган бўлса-чи? Аナンави уч киши... ёки уни кўрган бошқа бирортаси... Ёки кимдандир хабар топган полиция изқувари турган бўлса-чи?.. Орадан бир оз вақт ўтгач, у: ҳарқалай, қишлоққа тушган маъқул, деган қарорга келди. Ёки кўлнинт гарбий қирғоги бўйлаб, ўрмон оралаб йўлга тушсинми... бунинг устига тунда

юриши керак, чунки кундузи кўриб қолишлари мумкин... агар у ана ўша кемага тушса борми, бир ярим соат, нари борса икки соат деганда Шейронда, Крэнстонларникида бўлади! Яёв кетса, фақат эртага етиб боради – бу жуда бемаъни иш, янада хавфлироқ иш. Бундан ташқари, у Сондра билан Бертина га сесланба куни келаман, деб ваъда бериб қўйган, бугун эса жума. Устига-устак, эртага эҳтимол, шов-шув кўтарилиб, изидан қувишар... ҳар томонга унинг ташқи белгиларини хабарлашар... бугун эрталаб бўлса... наҳотки, Робертани шунчалик тез топа олишса? Йўқ, йўқ. Энг тўғри йўл – шу. Бу ерда уни ахир ким билиб ўтирибди, унинг Карл Грэхемми ёки Клифорд Голденлигини ким ажратиб бера оларди? Яхшиси, Роберта тўғрисида у-бу нарсаларни билиб олгунларича кутиб ўтирмай, шошилиш керак. Ҳа, шундай. Ниҳоят, минора соати саккиздан ўн дақиқа ўтганда у юраги гуп-гуп урганча ўрмондан чиқди.

Қайиқлар қароргоҳига олиб борадиган кўча. Кемача ўша ердан Шейронга қараб жўнайди. Клайд кўрқа-писа одимлаб бора туриб, бирдан Рэкет кўлидан келаётган автобусга кўзи тушиб қолди. Шунда у қароргоҳ ёки палубада бирор-бир танишимни учратиб қолсам, ҳозиргина Рэкет кўлидан келдим, у ерда Сондра ва Бертиналарнинг дўстлари кўп экан, дейишим мумкин, деб ўйлади; агар мабодо ўша дўстлардан бирини учратгудек бўлса, унда уч кундан бери Рэкет кўлида эдим, дейди. Истаган исм ёки чорбог, жуда бўлмаса, бирор номни ёдан айтавериши ҳам мумкин.

Шундай қилиб, у кемачага чиқиб, палубага кўтарилиди-да, кейин Шейронда тушиб қолди – назарида ҳеч ким унга эътибор ҳам бермагандай туюлди. Кемада йўловчилар анча-мунча кўп эди, лекин биронта ҳам таниш учрамади, фақат асли шу яқин ўрталик бўлган ҳаво ранг кўйлакли ва оқ

похол шляпали қизни айтмаганда, Клайдга бошқа бирорта одам ҳатто қайрилиб ҳам қарамади. Бояги қизнинг нигоҳи эса, очифини айтганда, Клайдга суқланиб боқаётганини билдириб турарди. Аммо Клайд шунга ҳам дош беролмади: кўзга камроқ тушишга ҳаракат қилаётгани учун ҳамма йўловчилар кема бурнида туришни афзал кўрса ҳам, у қўйруқ томонга қараб кетди.

Шейронга етиб келгач, кўпчилик йўловчилар эрталабки биринчи поездга улгуриш учун темир йўл бекатига қараб кета бошладилар, буни билган Клайд ҳам уларнинг кетидан тез-тез бораверди-да, кейин изини йўқотиб кетиш мақсадида лип этиб биринчи дуч келган қаҳвахонага кириб олди. Гарчи у Катта мушгирдан келгунча озмунча йўл босмаган, унгача эса яrim кун эшкак эшган ва Роберта билан овқатланаётган пайтида ҳам шунчаки, номига тамадди қилиб ўтиргандай бўлса-да, негадир ҳализгача иштаҳаси йўқ эди. Сўнгра у бекатдан келаётган бир тўда йўловчиларни кўрди-ю – улар орасида ҳам таниш-билишларидан ҳеч ким йўқ эди – ўзини поезддан тушиб, меҳмонхона ва қайиқлар қароргоҳига келаётгандек қилиб кўрсатди-да, уларга қўшилиб кетаверди. Бу поезд ҳойнаҳой жанубдан, Олбэни ва Утикадан келаётган бўлса керак, деб ўйлади у, демак, шу поезддан тушдим, деса гапи ҳар томонлама тўғри чиқади. У ўзини бекатдан чиққандек қилиб кўрсатди-да, аммо йўл-йўлакай телефон қидириб топиб, Бертина билан Сондрага ўзининг шу ердалигини хабарлади, улар моторли қайиқ эмас, автомобиль юборажакларини айтишгач, мен меҳмонхона айвонида кутиб турман, деб огоҳлантирди. Йўл-йўлакай юз берган воқеа хусусида ҳали ҳеч қандай баёнот бўлиши мумкин эмаслигига гарчи кўзи етса ҳам тонгги газета сотиб олди. У эндиғина меҳмонхонага қа-

дам қўйиб, айвонга чиқиб ўтириши билан Крэнстонларнинг машинаси етиб келди.

Крэнстонларнинг анчадан бери таниш бўлиб қолган ҳайдовчиси Клайдга салом бериб, самимий жилмайганда, у ҳам, гарчи қалб тўшаларини ҳанузгача қўрқув азоби тирнаб турса-да, ҳарқалай ясама қувноқлик ила бегам қиёфада кулимсираб боқди. Ўрмонда дуч келган анави уч киши, деб таъкидларди ичида, ҳозир шубҳасиз Катта мушгир кўлига етиб боришган. У ерда энди Роберта билан икковларини сўзсиз қидира бошлашган, балки, ким билади, ағдарилиб ётган қайиқ билан Клайднинг шляпаси-ю, Робертанинг ўртигини ҳам топиб олишгандир. Анави уч киши эса, эҳтимол, жомадон кўтарганча тунда жануб томонга қараб кетаётган бир йигитни кўрдик, деб хабар ҳам боришгандир. Агар шундай бўлса, унда Робертанинг жасади топилиши ёки топилмаслигидан қатъи назар, улар иккови чиндан ҳам чўкиб кетганмикин, деган гумон ҳам пайдо бўлгандир.

Хўш, дейлик, аллақандай кутилмаган фавқулод юз бериб, Робертанинг жасади сув юзасига қалқиб чиққан бўлса-чи? Унда нима бўлади? Балки юзида зарб излари қолгандир, ахир, у қаттиқ урган эдикку. Агар шундай бўлса унда қотиллик бор бу ерда, деб шубҳа қилишади. Йигитнинг жасадини топишолмагач, анави кишилар ўзлари учратган одамнинг ташқи қиёфасини тасвирлаб боришади, унда Клифорд Голден ёки Карл Грэхемни қотил деб ҳи соблашмасмикин?

Лекин Клифорд Голден ёки Карл Грэхем – Клайд Грифитс эмас-ку, ахир. Клайд Грифитс билан Клифорд Голден ёки Карл Грэхемнинг бари битта одамлигини қандай аниқлаб бўлади? Ахир, у бутун эҳтиёт чораларини кўриб қўйган-ку, улар ўтлоқзор кўлига боришганда, Клайднинг илтимосига қўра Роберта тамадди тайёрламоқчи бўлиб ташқарига чиққан пайтида унинг жомадони ва

сумкасини ҳам кавлаб күрган эди. Түгри, Тереза Баузер деган бир қыздан Бильцга, Роберта номига жүннатилган иккита хат бор экан, лекин уларни у жүнашларидан олдиноқ, Қуролсоз бекатида-ёқ йүқ қылган эди. «Уайтли, Ликург» деган белги туширилган пардоз қутичасини йүқотишнинг эса иложи бўлмади, аммо миссис Голден ёки миссис Грэхэмнинг ўзи ўз билгича бу қутичани Уайтлидан олган бўлиши ҳам мумкин-ку, ахир, бунақа нарсадан бирор-бир гумон чиқариш қийин. Турган гап, қийин. Ҳа, яна Робертанинг кўйлаклари бор эди. Лекин ўша кўйлаклар ёрдамида уни таниб қолишиган тақдирда ҳам, Робертанинг ота-онаси бошқалар сингари қизининг Голден ёки Грэхем исмли номаълум бир одам билан саёҳатга чиқиб кетганини ўйлаб кўришмайдими, ахир? Ҳойнаҳой, улар буни эл эшитмай қўя қолсин, деб андиша қилишар. Нима бўлишидан қатъи назар, Клайд умидсизланмасликка, дадил туришга, бу ердагиларда шубҳа туғдирмаслик учун ўзини хотиржам, тетик ва қувноқ тутишга қарор қилди, аслини олганда ҳам Робертани, ахир, у ўлдирмади-ку!

Мана, у ярқиллаган автомобилда кетяпти, Сондра билан Бертина эса уни кутиб туришибди. У, тўппа-тўгри Олбенидан келяпман: у ерга амакимнинг бир топшириги билан борган эдим, ўша иш сешанбадан бери вақтимни олди, дегани маъқул. У энди Сондранинг ҳузурида бўлиб, роҳат-фарогат қиласди, аммо шунга қарамай, у хоҳласа-хоҳламаса, доимо, ҳар доим анави даҳшатларни ўйлашга мажбур... Кутимагандан қандайдир хатога йўл қўйиб, изини сездириб қўядиган барча далил-ашёларни йўқотиб улгуrolмаган бўлса-я... Унда нима бўлади? Сири очилади-кўяди! Қамоқقا тушади! Эҳтимол, бехосдан туширилган зарбалигини тушунтириб беролмаса... қизиқ устида уни ноҳақдан-ноҳақ қоралаб... жазолаб... юборишлари ҳам

мумкин. Унда Сондра билан бояланган... Лукург билан бояланган... барча шириң хаёллари, порлоқ келажак ҳақидағи орзу-умидлари чиппакка чиқади. Лекин у түшүнтириб бера олармиカン? Құлдан келармиカン бу? Э, худо-е!

## VII БОБ

Клайд жума куни эрталабдан бошлаб душанба куни чошгоқ пайтигача илгарилари уни неки шунчалик ҳайраттаға солған ва қувонтирган бўлса, ўшалар оғушида бўлди, аммо бари бир даҳшатли қўрқув ва хавотирлар азобида тинимсиз қийналди. Сондра билан Бертина Клайдни Крэнстонлар чорбоғига кираверишда кутиб олиб, уни ўзига ажратилган алоҳида хонагача кузатиб борган дақиқаларидан бошлабоқ Клайд бу ердаги барча кўнгилхушликлар ва ўзига таҳдид солиб келаётган муқаррар ҳалокат ўртасидаги осмону ерча фарқ тўғрисида тўхтовсиз ўйлади.

Клайд хонага кириши билан Сондра лабларини чўччайтириб, Бертина га эшигтирмасдан аста шивирлади:

— Ярамас! Келишининг иложи бўлса ҳам бир ҳафта давомида ўша ёқда лақиллааб юрибди-я. Сондра бўлса унга ҳамма нарсани таҳт қилиб ўтирибди! Бир-икки тарсаки едириб, адабингизни бериш керак эди ўзи. Мен ҳатто бугун қўнғироқ қилиб, қаердалигингиzinи билмоқчи эдим!

Сондранинг кўзлари Клайдни қаттиқ севиб қолганидан далолат бериб туради.

Миясини оғир хаёллар эгаллаб олганига қарамай, Клайд Сондрага қувноқ жилмайиб боқди, чунки қаршисида Сондра тургани учун Робертанинг ўлими-ю, ўзига таҳдид солиб келаётган хавф ҳам – барча даҳшатлар бир зумда ўз кучини йўқотгандай туюлди унга. Ишқилиб, иши ўнгидан келсину би-

пор нарса баҳона бўлиб сири очилиб қолмасин-да! Олдинда уни саодатли йўл кутиб турибди! Порлоқ келажак кутяпти! Сондранинг ҳусну жамоли! Унинг оташ муҳаббати! Унинг мол-дунёси! Аммо у ўзига ажратилган хонага кириши биланоқ анави костюм эсига тушиб қолди-ю, асабийлаша бошлади, хонага сал олдинроқ унинг жомадонини ҳам киритиб қўйишган эди. Костюми ахир жиққа ҳўл, эзилиб ётибди, уни жуда бўлмаса шкафнинг юқори токчасига яшириб қўйиши керак. Клайд якка ўзи қолиши биланоқ дарров эшикни қулфлади-ю, жомадондан эзилиб кетган, ҳали қуриб улгурмаган, Катта мушгир кўлидаги балчиқда шими лойга булаган ган костюмини олди, лекин ўша заҳоти, яхшиси қоронги тушгунча қулфланган жомадонда туравергани маъқул, деган қарорга келди: чунки ўшанда бирор-бир чорасини ўйлаб топиши ҳам мумкин бўлади. Бироқ ўша куни жомадонда бор бошқа нарсаларнинг ҳаммасини ювишга бериш мақсадида бир тугун қилиб боғлади. Шу ишларни бажара туриб, у ҳаётнинг бутун кўтарикиликлари ва фожеликлари, сир-асори чексизлигини равшан-яққол, даҳшатга тушиб, кўнгли айнар дарражада англаб етди... У шарқий штатларга ўтгандан бери бошига не-не савдолар тушмади, ахир, аслида у ёшлигига нима ҳам кўрди! Очигини айтганда, мана ҳозир ҳам у деярли ҳамма нарсадан маҳрум. Мана шу кенг, ҳашаматли хона – осмон бўлса, Ликургдаги унинг ҳужраси – бамисоли ер. Тавба, кечаги воқеадан кейин бу ерда юрганининг ўзи қизиқ... Дераза остида зилол сувлари ялтираб турган анави кўл қорамтири сувлари Катта мушгирга мутлақо ўхшамайди!.. Кенг айвонли, йўл-йўл соябонлари кўлгача давом этиб борган мана шу ёруф, мустаҳкам, катта бинога туташиб кетган ям-яшил ўтлоқзорда эса Стюарт Финчли, Вайолет Тэйлор, Фрэнк Гарриэт ва Вайнэт Фентлар ўзларига яраш-

ган спорт кийимларида теннис ўйнашарди, Бертина билан Харлей Бэгот эса шиййпон панасида дам олиб ўтиришар эди.

Клайд ҳам ҳаммомга тушиб, кийимини ўзгартириб олгач, гарчи ҳамон асаби таранг ва ваҳимадан изтироб чекаётган бўлса-да, ўзини қувноқ қўрсатганча уйдан чиқди-да, Сондра, Берчард Тэйлор ва Жил Трамбалларга яқин борди: улар кечаги сайр-томуша пайтида моторли қайиқда юз берган бир қизик воқеани гапириб, қаҳ-қаҳ уриб кулишар эди.

Жил Клайдни қувноқ хитоб билан қарши олди:

– Хэлло, Клайд! Қаёқларда гум бўлиб юрибсиз? Мен сизни назаримда юз йилдан бери кўрмагандайман.

Клайд Сондрага маънодор жилмайиб қўйди-ю – у Сондранинг ҳамдардлиги ва севгисига ҳали ҳеч қачон бу қадар муштоқ бўлмаган эди – айвон панжарасига яқин келди-да, иложи борича ўзини хотиржам тутиб, жавоб қилди:

– Сешанбадан бери Олбэннида ишладим. У ёқлар иссиқ! Бугун бу ерга келганимдан ғоятда хурсандман. Кимлар бор?

– Назаримда ҳамма шу ерда, – Жил кулимсиради – Кеча Ренделларникида Вандани кўрдим. Скотт эса Бертинага янаги сешанбада борамай, деб ёзибди. Чамамда, бу йил Ўрмонзорда унчалик одам кўп бўлмайдиганга ўхшайди.

Шундан сўнг: Ўрмонзор нима учун ҳозир илгаригидек гавжум эмас, деган масалада узунданузоқ қизгин баҳс бошланиб кетди. Бир пайт Сондра бехосдан:

– Вой ўлмасам, унутибман! – деди ҳовлиқиб.  
– Бугун Беллага қўнғироқ қилишим керак эди. У янаги ҳафтада Бристолга отлар кўргазмасига борамиз, деб сўз берган эди.

Кейин отлар ва итлар ҳақида гап бошланиб кетди. Клайд диққат билан қулоқ тутганча бор ку-

чини ишга солиб, ўзини ҳамма қатори тутишга уринар, лекин ҳамон ўша даҳшатли фикрлардан қутуолмас эди. Йўлда учраган анави уч киши... Роберта... Балки унинг жасади аллақачон топилгандир... Э, тавба, ўзига ўзи далда берарди у, нега бунча юрагим ўйнамаса-а? У ер ҳазилакам чуқур эмас ахир, эллик футча келади, унақа жойдан жасадни топиш амри маҳол! Кейин унинг Клифорд Голден ва Карл Грэхемлигини қаёқдан билишади? Қандай билишади? Ахир, у ҳаммасини ими-жимида қилди-ку... Фақат анави уч кишини айтмаганда... йўлда учраган ўша уч киши! Клайд эти увишгандай, беихтиёр сесканиб кетди.

Унинг кўнгли нотинчлигини Сондра ҳам билди. Клайд биринчи бор келгандаёқ кийимларининг бир ҳолатдалигини Сондра сезган, шу сабабли кайфияти сустлигининг боиси ҳам аслида қўлининг калталигида, деб ўлади у ҳозир ҳам. У ўз жамғармаларидан етмиш беш долларини олиб, зўрлаб бўлса ҳам албатта Клайдга бермоқчи бўлди, майли, бу гал у шу ердалигида орадан лоп этиб чиқиб турадиган майда-чуйда харажатлардан тортиниб, қимтиниб юрмасин тағин! Сал вақт ўтгач, агар бир дафқир гольф ўйнаса, пана-пана бурчакларда бир лаҳза қучоқдашиб ва бўсалар олиш учун имкон туғилишини ўйлади-ю, Сондра шод овоз билан ўрнидан сакраб турди:

– Ким бир давра гольф ўйнайди? Жил, Клайд, Берч! Келинглар, тўртталамиз ўйнаймиз! Гаров ўйнашим мумкин, икки киши бўлсангиз ҳам, бари бир Клайд иккаламизни енголмайсизлар.

– Бўпти! – деб қичқирди Берчард Тэйлор, ҳаворанг йўл-йўл сариқ жемперини тўғрилаганча ўрнидан туаркан. – Гарчи бугун уйга эрталаб соат тўртда қайтган бўлсан ҳам, ҳечқиси йўқ, ўйнайвараман. Сиз-чи, Жил? Сонни, шартим бор: ютқазган киши ҳаммага зиёфат беради, розимисизлар?

Клайд бир сапчиб тушди-ю, бадани музлаб кетгандай бўлди; у анави даҳшатли саргузаштдан сўнг киссасида қолган арзимаган йигирма беш доллари ни ўйлаб кетди. Тўрт киши клубда овқатланса, камида саккиз ёки ўн доллар кетади! Балки ундан кўпроқ кетиши ҳам мумкин! Аммо Клайднинг эсанкираб турганини Сондра сезди-ю, «Розимиз!» деб хитоб қилди-да, Клайдга яқинроқ бориб, туфлисининг уни билан секингина унинг ботинкасини туртиб қўйди.

– Аммо мен кийимимни ўзгартириб олишим керак. Бирпас сабр қилинглар! Клайд, сиз-чи... сиз унгача Эндрьюни топиб айтинг, голъф таёқчала-рини олиб келсин, майлими? Биз сизнинг қайи-фингизда кетамиз-а, тўғрими, Берчи?

Клайд, агар Сондра иккаламиз ютқазиб қўйсак, зиёфати қанчага тушаркин, деб ўйлаганча югуриб Эндрьюни қидиргани кетди, лекин Сондра унга етиб одди-да, қўлидан ушлади:

– Жоним, шу ерда тўхтаб туриング, мен кираману чиқаман!

У зинапоядан юқорига, ўз хонасига отилди, кейин жажжи қўлларида бир даста пул фижимлаб, кўз очиб юмгунча яна қайтиб чиқди.

– Мана, жоним, тезроқ олинг! – деди у шивирлаб ва пулни шоша-пиша Клайднинг чўнтағига тиқди.

– Жимм... оғиз оча кўрманг! Тезроқ! Бу, агар ютқазиб қўйсак – зиёфатга, яна бошқа нарсалар ҳам бор... уни кейин айтаман. Эҳ, менинг миттигинам, сизни деб ақлу ҳушимдан айрилай деяпман!

У ўзининг эркаловчи қўй кўзлари билан Клайдга еб қўйгудай бир сония термулиб турди-да, кейин яна зинадан чопиб чиқиб кетди ва энди тепадан туриб:

– Э-э, боринг энди, тентаквой! – деб қичқирди.  
– Таёқчаларга боринг! Тезроқ!

Сўнгра у кўздан гойиб бўлди. Клайд эса чўнтағини пайпаслаб кўриб, Сондра, бу ердаги барча харажатлар у ёқда турсин, агар лозим бўлса қо-

чиб қолишига ҳам бемалол етадиган миқдорда күп пул берганини сезди. «Қадрлигим! Жондан азиз қизалоғим!» – дея хитоб қылди у ичида. Фусункор, назокатли, сахий Сондрагинам! У шу қадар чина-камига севадики. Аммо у бир кунмас-бир кун анави воқеани эшитса-чи?.. Э, худо-е! Фақат у билсайди... шуларнинг бари уни деб қилингапти-ку, ахир! Ҳаммаси Сондрани деб қилингапти! Кейин у Эндрьюни излаб топди-да, таёқчаларни олиб, улфатлар ҳузурига қайтиб келди. Ана, Сондра ҳам чиқди. У ўзига қуйиб қўйғандек ярашган, қўлда тўқилган яшил спорт кийимида чопиб келар эди. Хизматкорларга ўхшаб шапкача ва калта оқ қўйлак кийиб олган Жил моторли қайиқ рулида ўтирган Берчард билан нима ҳақдадир ҳазиллашиб, кулар эди. Сондра эса юурганча, Бертина билан Харлей Бэготларга қичқиради:

- Ҳой, дўстлар! Бизлар билан бормайсизларми?
- Қаёқقا?
- «Казино»даги гольф-клубга!
- Йўқ, жудаям узоқ. Нонуштадан кейин соҳилда учрашамиз.

Берчард қайиқни шундай тезликка солдики, у дельфиндек сакраб тушди. Клайд эса атрофидаги барча нарсаларни худди тушида кўраётгандек, гоҳ кайфу сафо ва умидворлик билан, гоҳ қоп-қора даҳшат булути узра кўраётгандек бўлар, шу зулмат ортидан эса, эҳтимол, тўсатдан қамоқقا тушиши-ю, қазоси ҳам яқинлашиб келаётгандек туюлар эди!

Аввалги мулоҳазалари ҳам бир четда қолиб, эрталаб яшириниш ўрнига ўрмондан чиқиб хатога йўл қўйдим, деб ўйлай бошлади. Аммо, ҳарқалай, энг тўғри йўли шу эди – акс ҳолда неча кун давомида ўрмонда ўтириб, тунлари эса соҳил бўйлаб кетган йўлга чиқарди-да, қоқ Шейронгача пиёда боришга мажбур бўларди. Бунинг учун икки ёки уч кун сарфлаш керак бўларди. Клайднинг кечикканидан ҳай-

рон бўлган Сондра эса ташвишга тушиб Ликургга кўнфироқ қилиши, натижада Клайд тўғрисида турли гап-сўз, сўраб-суринтиришлар бошланиб, охири ёмон оқибатларга олиб келиши ҳам мумкин эди...

Аммо бу ерда, чарақдаган мана шу кунда ҳар қандай ташвиш ҳам ортиқчадек туюларди, ҳарқалай, бошқалар бепарво-ку... Клайднинг қалб гўшалари эса муздек, чироқ ёқса ёrimайди... Сондра бўлса Клайд ўз ёнидалигидан завқи ошиб, бирдан ўрнидан сакраб турди-да, – қўлидаги оч рангли шарфини худди байроқчадек ҳилпиратиб, яйраб, шўхлиги тутиб қичқирди:

– Клеопатра денгизлар оша суза-суза, пешвоз чиққан... пешвоз... у денгизларда кимни кутаётган эди?

– Чарли Чаплинни, – дея луқма ташлади Тэйлор ва Сондрани қўрқитмоқчи бўлиб қайиқни шиддат билан лопиллатиб ҳайдай бошлади:

– Тентаклик ҳам эви билан-да! – Сондра шундай жавоб қайтарди-ю, мувозанатини сақлаш учун оёқларини кенг-кенг қўйиб олди.

– Йўқ, Берчи, сиз ҳам билмайсиз, – деб қўшиб қўйди яна у. – Клеопатра.., ҳмм... биласизми, аквапланда физиллаб учиб кетяпти!

У бошини орқага ташлаб, қўлларини ёйиб олди, қайиқ эса ҳамон ҳурккан асов от каби тоҳ үнгга, тоҳ чапга сапчир эди.

– Берчи, бари бир мени йиқитолмайсиз! Мана кўрамиз! – деб қичқирди Сондра, Берчард бўлса қайиқни журъати етганча у ёқдан-бу ёқча отиб, илон изи қилиб ҳайдар эди, шунда Жил қўрқиб кетганидан бақириб юборди;

– Нима қиляпсизлар? Ҳаммамизни чўқтириб юбормоқчимисизлар?

Клайд бир сесканиб кетди-ю, яшин теккандай ранги қув ўчди. Бирдан кўнгли айниб, беҳол бўлиб кетди. У бунчалик қийналиб, азоб чекарман, деб

ўйламаган эди сира. Назарида, ҳаммаси хамирдан қил суғургандек силлиққина ўтиб кетаверадигандай эди. Мана, энди бўлса арзимаган, тасодифий бир сўздан ҳам рангида ранг қолмаяпти. Мабодо, бошига оғирроқ иш тушгудай бўлса, унда нима қиласди... тўсатдан полициячи изқувар бостириб келиб, кеча қаерда эдинг ва Робертанинг ўлими ҳақида нималарни биласан, деб қолса, нима жавоб қиласди?.. Гапидан адашиб, титраб-қақшаб ўтираса, шубҳасиз, оғиз ҳам очолмайди ва сирини ўзи фош этиб қўяди! Йўқ, у ўзини қўлга олиши, ҳеч нарса бўлмагандай ўйнаб-кулиб юравериши керак, жуда бўлмаганда... мана шу бугун, биринчи куни ўшандай қилиши керак.

Яхшиямки, қайиқнинг тез сузаётганига ҳамма маҳлиё бўлиб, ҳаяжонга тушгани туфайли Жилнинг овози Клайдни росмана довдиратиб қўйганини, афтидан, ҳеч ким сезмади, у ахийри секин-секин ўзини қўлга олиб, илгариги хотиржам ҳолича келди. Бу пайтда қайиқ «Казино»га яқинлашгани учун Сондра ҳаммани қойил қолдирадиган бирор-бир ҳунар кўрсатиб саёҳатни якунламоқчи бўлди-да, бир сакраб бандаргоҳ панжарасини ушлаб олди, тирмашиб юқорига қўтарилиди, қайиқ эса шув этиб ўтиб кетди-ю, айлана ясад, кейин бориб тўхтади. Сондра бу орада Клайдга қараб баҳтиёр бир қиёфада жилмайиб қўйди, Клайд эса ўз дилида хуштор, жозибадор, мурувватли, довюрак Сондрага нисбатан шиддатли бир талпиниш сезди, Сондранинг табассумига лойиқ бўлиш учун у ўрнидан сакраб турди-ю, Жилга бандаргоҳ зинасидан қўтарилишга кўмаклашиб юборди, кейин ўзини қувнаб ва қизиб кетганга солиб, тез-тез тирмашганча Сондрадан сўнг иккинчи бўлиб юқорига чиқиб олди. Унинг жонланиши сиртдан қараганда қанчалик табиий кўринса-да, аммо аслида шунчалик ясама ҳам эди.

– Қойил! Сиз чинакам гимнаст экансиз!

Кейин, Сондра ўргатиб турса ҳам Клайд тажрибасизлиги ва күнглидаги оғир ташвиши туфайли голъф майдончасида, ишқилиб, баҳоли-қудрат ўйнай бошлади, Сондра эса иккови яна висол кўришгани ва бирга ўйнаётганларидан қувончи ичига сифмай, ўйин давомида ҳадеб ўпишиш мумкин бўлган серсоя хилватгоҳларга ўтаверар, шу орада Клайдга ўзи, Стюарт, Фрэнк Гарриэт, Вайнет, Фэнт, Берчард ва Вайолет Тэйлорлар, Грэнт ва Бертина Крэнстонлар, Харлей Бэгот, Перли Хейнс ва Жил Трамбаллар биргалашиб азза-базза бир ҳафтага саёҳатга отланаётганларини сўзлаб бера бошлади. Улар эртага кундузи йўлга чиқишиармиш, аввалига кўлда моторли қайиқда ўттиз миль йўл босиб, у ёғига – Айиқ кўли деган жойгача эса қирқ миль автомобилда кетишар экан; Айиқ кўли атрофида чодир қуриб, фақат Харлей билан Фрэнкагина маълум бўлган фоят гўзал, хушманзара жойларни бирин-сирин байдаркаларда бориб томоша қилишар экан. Кунин янги жойда бўлишар эмиш. Йигитлар олмажон овлашармиш, тушлик тамадди учун балиқ тутишармиш. Ойдинда сайр қилишлар-чи! Айтишларича, ўша ерда меҳмонхона ҳам бор экан, унга қайиқда борса ҳам бўларкан. Улар билан икки ёки уч хизматкор, кейин одоб юзасидан катталардан биронтаси ҳам қўшилиб борармиш. Ўрмондаги сайр-томушалар-чи! Байдаркага тушиб кўлда сайр этиш, соатлаб икки киши танҳо қолиш – севишгандар учун бундан ҳам қулайроқ фурSAT топиладими, ахир! Бир ҳафтагача улар ажралишмай, бир-бирларининг дийдорларига тўйишади!

Кейинги кунларда юз берган воқеалар гарчи уни иккиланишга мажбур этган бўлса-да, ҳарқалай Клайд беихтиёр: таваккал, қайтага шулар билан кетганим маъқул эмасми, деб ўйлай бошлади. Сондра, ахир, уни чин юракдан севади, бу тенгсиз

бахт эмасми! Бормаган тақдирида ҳам, хүш, нима қилар эди у? Қайтага бу ердан... бахтсизлик рўй берган мана... шу ердан... шу ердан олислаб кетишига ёрдам беради-ку бу саёҳат. Мабодо, айттайлик, кимдир Клайдга ўхшаш одамни ахтарган вақтида ҳам... уни фалон ердан топамиз ва сўраб-суриштирамиз деб гумон қилишган жойларидан унинг сояси ҳам чиқмайди-ку... Йўлда учраган анави уч киши-чи?

Клайд, кимданdir гумон қилишаётганини аниқ билмагунча бирон ёққа кетиш асло мумкин эмас, деб ўйлади ўша заҳоти. Шу сабабли голъф ўйинидан сўнг, ўзи бир оз танҳо қолган вақтида киоскага бориб газета суриштириди, аммо унга етти-етти яримларгача Утика ва Олбэнидан маҳаллий оқшомги газеталар келмаслигини айтишди. Демак, ўша пайтгача Клайд дунёда нима бўлаётганидан бехабар қолаверади.

Нонуштадан сўнг чўмилишди, танца тушишди, кейин Клайд Харлей Бэгот ва Бертина билан Крэнстонлар чорбогига қайтаб келди, Сондра эса Клайд билан кейинроқ Гарриэтларникида учрашишга ваъдалашди-да, Қарағайзор бурунига қараб жўнади. Аммо Клайд шу орада доим: ишқилиб, салгина қулай фурсат топишим билан дарров бориб газета олишим керак, деб ўйлар эди зўр бериб. Агарда у бугун Крэнстонларникидан Гарриэтларнига бораётганида мана шу ерга кириб, ҳамма газеталардан битта-биттадан ололмаса ёки ақалли бир дона ҳам тополмайдиган бўлса, унда эртага Айиқ кўлига жўнашдан аввал, эрталабданоқ яна шу «Казино»га келиб-кетишининг бирор баҳонасини топиши керак. У албатта газета олиши керак! Чўкиб кетган икки киши хусусида бирор гап бўляптими, – бўлаётган бўлса айнан қандай гаплар бўляпти, қидирув бошландими, у шуларни билиши керак!

Йўлакай, у газета ололмади: ҳали келтиришмабди. Гарриэтларникига кириб боргандা у ерда ҳам биронта газетага кўзи тушмади. Аммо орадан ярим соат ўтгач, айвонда ҳамма қатори ўтирганда ва яйраб гаплашаётганда (лекин бари бир унинг хаёли анави воқеадан ҳамон бўшамас эди) Сондра пайдо бўлди-ю:

– Диққат, дўстлар! – дея гап бошлади. – Мен сизларга бир яхшилик топиб келдим! Ё кеча, ё бугун эрталаб Катта мушгир кўлида қайиқ афдарилиб кетибида-да, икки киши гарқ бўлибди. Менга буни ҳозир Бланш Лок телефон орқали айтди, у бугун Учинчи миль Кўрфазида. Унинг гапига қарангандা, қизни топишибди-ю, аммо шеригини ҳали топишолмабди. Улар кўлнинг аллақайси жануброқ қисмида чўкиб кетишибди.

Клайд бир зумда тош бўлиб қотиб, ранги докадек оқариб кетди. Лаблари гезариб, бир нуқтага тикилиб қолган кўзларига рўпарасидаги нарсалар эмас, балки ўша олис кўл қирғоғи, баланд-баланд арчалар ва Робертани ютиб кетган қорамтири сув кўринаётган эди. Демак, Робертанинг жасадини топишибди. Энди Клайд ўйлаганидек, ўзининг жасади ҳам сув тубидалигига ишонишармикин? Бас, гапга қулоқ солиш керак! У, гарчи боши айланиб кетаётган бўлса ҳам тинглашга мажбур.

– Оғир гап! – деди Берчард Тэйлор мандолинани динғиллатишдан тўхтаб. – Бирорта таниш-паниш эмасмикин?

– Бланш, ҳали ҳамма тафсилотларни билганим йўқ, деяпти.

– Ўзи ўша кўл менга сира ёқмас эди, – дея гапга аралашди Фрэнк Гарриэт. – Жуда ҳувиллаган, кимсасиз. Ўтган йили ёзда биз дадам ва мистер Рэндел билан ўша ерда балиқ овлаганмиз, лекин тезда кетган эдик. Ҳаддан ташқари қоронғи жой. Биз у ерда бундан уч ҳафта олдин бўлган эдик.

Сондра, эсингиздами? – деб қўшимча қилди Харлей Бэгот. – Ўша жой сизга ҳам ёқмаган эди.

– Ҳа, эсимда, – дея жавоб қайтарди Сондра. – Жон асари йўқ, ҳувиллаган жой. Ҳайронман, ўша ёққа боришини ким ва нима учун хоҳлабди экан?

– Ҳарқалай, таниш-билишларимиздан бўлмасин-да, ишқилиб, – деди Берчард хаёлга ботиб. – Акс ҳолда, бу воқеа узоқ вақтгача ҳаммамизнинг таъбимизни хира қилиб юриши мумкин.

Клайд ўзи сезмай қоқ-қуруқ лабларини ялади-да, талвасага тушиб ютинди, чунки томоги қуриб қолган эди. Вайнет Фэнт Сондра гапираётганда аввалига эшитмагани учун:

– Ҳойнаҳой, бу воқеани ҳали ҳеч қайси газета бериб улгурмаган бўлса керак. Ким газета ўқиди? – деб сўради.

– Бирорта ҳам газета йўқ, – деб қўйди Берчард. – Бари бир буни хабарлашга ҳали улгуришолмаган. Бланш Лок ҳозиргина Сондрага телефон орқали айтибди-ку, ахир. Ваҳоланки, у ҳозир ўша ёқларда юрибди.

– Ҳа-я, тўғри.

«Ҳарқалай, Шейронда чиқадиган оқшомги газета – ҳаҳ, нима эди... «Бэннер» эди шекилли?.. Эҳтимол, ўшандада дастлабки маълумотлар бордир? Қани энди бугун биттасини топсам!» – деб ўйлади Клайд.

Шу пайт миясига бошқа бир фикр лоп этиб урилди! Э, худо-е, келиб-келиб энди эсига тушибди-я: изи-чи, изи?.. Қирғоқда лойга изи тушиб қолган бўлса-я? У ўша жойдан тезроқ қочиб кетишга шошилиб, ҳатто орқасига ҳам қайрилиб қарамаган эди. Ахир, изи қолган бўлиши мумкин-ку. Унда шу изидан келаверишади... Анави уч киши учратган одамнинг изи шу, деб келаверишади! Клифорд Голденнинг изи ҳам шу дейишади! Саҳар палласида Клайднинг изфигани... Крэнстонлар автомobiliда келгани... Уларнинг чорбоғида эса ҳўл костюми турибди! Борди-ю, кимдир йўқлигидан

фойдаланиб, унинг хонасига кириб, ҳамма нарса-сини титкилаб, тинтиб, ҳаммадан сўраб-суринтириб чиққан бўлса-чи?.. Балки жомадонини ҳам очиб кўргандир? Қандайдир бир полициячи келган бўлса-я! Э, худо! Костюми жомадонидалигини қаранг-а! Нега уни жомадонга солиб, умуман ўзи билан бирга олиб юрибди-а? Аввал бошданоқ уни яшириб ташлаши... жуда бўлмагандга тош бойлаб кўлга отиб юбориши керак эди. Ана шунда сув туvida қолиб кетарди. Шунақанги мушкул аҳволда юрганида нималарни ўйлаб юрибди ўзи? Яна ки-ярман шу костюмни, деган хаёлга бордими?

Клад ўрнидан турди. У ҳам руҳий, ҳам жисмоний жиҳатдан чинакамига муз-муз бўлиб кетди, Кўзлари бир дақиқа аллақандай маънисиз тус олди. У кетиши керак бу ердан. У ҳозирнинг ўзидаёқ хонасига қайтиб, костюмини бир ёқлик қилиши... кўлга ташлаб юбориши... уй орқасидаги ўрмоннинг бирор жойига яшириб қўйиши керак!.. Аммо фарқ бўлган икки киши тўғрисидаги сафсадан кейин бирданига кетвориши ноқулай, қолганлар нима деб ўйлайди?

Йўқ, деди у ичиди ўша заҳоти. Вазмин бўл... ҳаяжонланганингни зинҳор билдирамасликка урин..., пинагингни бузма... чағитиш учун атайлаб бир-икки оғиз гапириб ҳам қўй.

Ниҳоят, у бор кучини ишга солиб, Сондрага яқин келди-да:

– Оғир гап, шундай эмасми? – деди.

Унинг овози деярли хотиржам эшитилди-ю, бироқ шу асно тиззалари ва қўллари сингари титраб кетиши ҳеч гап эмасди.

– Нимасини айтасиз, – дея жавоб қилди Сондра унга ўгирилар экан. – Шунақа гапларни ўлгудай ёмон кўраман, сиз-чи? Стюарт икковимиз мана ўйнадай кўлма-кўл сандироқлаганимизда доим ойимнинг юраклари ўйнаб туради.

– Ҳа, хавотир оладилар-да.

Клайднинг товуши гўё ўзига итоат этмай бўғилиб чиқди. Бу сўзларни у эштилар-эштилмас, зўрга фулдираниб гапирди Лаблари эса баттар гезарид, бир-бирига янада маҳкам ёпишган, юзида қон асари қолмаган эди,

– Клайд, сизга нима бўлди? – деди Сондра бирдан, унга диққат билан тикила туриб. – Рангингиз учиб кетди! Кўзларингизни қаранг! Нима бўлди? Мазангиз қочдими ёки офтоб таъсир қилдими?

Сондра ўз фикрини синаб кўриш маҳсадида бошқаларга разм солиб чиқди-да, кейин яна Клайдга қаради. Клайд, Сондра айтганидек, ҳозиргидай ранги учиб ўтиrsa, бу яхшиликка олиб бормаслигини тушунди-ю, иложи борича ўзини қўлга олишга ҳаракат қилиб:

– Э, ҳечкиси йўқ, – деб жавоб қайтарди. – Ҳойнаҳой, бу офтобдан бўлса керак. Ҳа, ҳа, бу офтобдан, Мен... мен кеча жуда чарчагандим, мана – оқибати. Ҳарқалай, бугун кечқурун келмасам бўлар экан бу ерга. – Кейин куч билан ўзини мажбурлаб, зўр-базўр, аранг қулимсиради.

Сондра эса унга чинакам раҳми келиб тикиланча:

– Менинг митти Клайдийим кечаги ишдан шунчалик чарчаганми-а? – деб шивирлай бошлади. – Кун бўйи биз билан сакрашмачоқ ўйнаб юргандан кўра болакайим буни менга эрталаб айтиб қўя қолса бўлмасмиди? Агар истасангиз, Фрэнкка айтай, ҳозироқ сизни яна Крэнстонларникига олиб бориб қўйсин... Ё бўлмаса сиз унинг хонасига кўтарилинг-да, бир оз тиниқиб ола қолинг. Тортинманг, у лом-мим демайди. Мен ундан сўрай бўлмаса, хўпми?

Сондра энди Фрэнкка гапирмоқчи бўлиб турган эди, Клайд унинг сўнгги таклифидан нақ юраги чиқаёзгани ва айни пайтда кетишга ҳам бирор-бир

баҳона топишга тайёр турганидан самимий дилдан, лекин ҳарқалай журъатсизгина сўз қотди;

– Йўқ, илтимос, сўраманг, азизим! Мен... мен ётишни истамайман! Ўтиб кетади ҳаммаси. Агар ҳоҳлаб қолсан, кейинроқ тепага кўтарилараман ёки сиз ҳам бу ерда кўп турмай кетсангиз, мен, балки илгарироқ уйга жўнарман, аммо ҳозир эмас. Хиёл мазам йўқрофу, лекин бу ўтиб кетади.

Сондра унинг файритабиий, назарида зарда оҳанги билан гапирганига ҳайрон бўлди-ю, ўша заҳотиёқ кўниб қўя қолди.

– Ҳа, майли, жоним. Ихтиёрингиз. Аммо тобингиз қочаётган бўлса, унда Фрэнкни чақиришимга ижозат этсангиз дуруст бўлар эди, у сизни хонасига олиб чиқиб қўяр эди. Кўрқманг, Фрэнк эътиroz қилмайди. Бир оздан кейин – чамаси ўн яримларда мен ҳам хайрлашаман, сўнг Крэнстоңларникигача икковимиз бирга борамиз. Уйга кетишимдан олдин сизни ўша ерга олиб бориб қўярман, акс ҳолда кимдир кетадиган бўлиб қолса, сиз билан бирга кетишини ҳоҳлаб қолиши мумкин. Наҳотки, кичкинтойимга менинг режам ёқмаса?

Клайд:

– Яхши, лекин мен фақат у-бу ичиб олай, – деб жавоб қилди.

Сўнгра у Гарриэтлар уйининг кенг ваннахоналаридан бирига кириб олди-да, эшикни қулфлади, ўтириб, тўхтовсиз ўйлай бошлади... Роберта-нинг жасади топилгани, юзида эҳтимол зарбадан қолган доғлар борлиги, соҳилдаги нам қум ва балчиқда ўзининг изи муҳрланиб қолган бўлиши мумкинлиги... Крэнстоңлар чорбогида турган ҳўл костюми, анави ўрмонда учраган уч киши, Робертанинг жомадони, шляпаси ва пальтоси, ўзининг сувда қолган, тамфаси юлиб олинган шляпаси... шулар ҳақида ўйлади-ю, энди бу ёғига нима қила-ман, деб ўзига ўзи савол берди. Хўш, у қандай йўл

тутсин? Нима десин? Ҳозир Сондранинг ҳузурига бориб тезда, қаёққадир кетайлик, деб ялинсинми ёки шу ердан ҳеч ёққа жилмай, яна ғам-андуҳларга қайта-қайта дучор бўлаверсинми? Эртанги газеталарда нималарни ёзишаркин-а? Нималарни? Нималарни ёзишаркин? Охири бориб-бориб, бу воқеага Клайднинг ҳам алоқадорлигини гумон қилишиб, уни қидириб қолишадиган, шунга шама қилувчи бирор-бир хабар чиқадиган бўлса, унда эртага мўлжалланаётган саёҳатга жўнаши ақлдан бўлармикин? Балки олис жойларга қочиб қолган маъқулроқдир? Энди унда бир оз пул ҳам бор. У Нью-Йоркка, Бостонга, Янги Орлеанга кетиши ҳам мумкин – Янги Орлеанда Ретерер бор, ахир... йўқ, йўқ, у ёққа ўлса ҳам бормайди, чунки уни бирортаси таниб қолиши мумкин!..

Э, худо-е, наҳотки шу пайтгача тузган барча репжалари шу қадар бемаъни бўлса! Босган ҳар қадамидан хато чиқяпти-я! Бошида ўйлагандаёқ ишни бузмаганмиди ишқилиб? Масалан, шунақсанги чукур жойдан Робертани топиб олишларини у хаёлига ҳам келтирмаган эди-ку? Мана энди қарабисизки, Роберта гўё Клайдга қарши гувоҳдик беришга шошилган-дек, биринчи куннинг ўзидаёқ, шу қадар тез топилди-қўйди! Гарчи у меҳмонхонада бошқа фамилия билан ёзилган бўлса-да, лекин йўлда учраган анави уч киши ва кемачадаги қизнинг гапларига қараб туриб, уни осонгина топиб олишлари мумкин-ку, ахир? Шунинг учун ҳар қанча қийналганда ҳам ўйлаб-ўйлаб, чорасини топиши керак! Анави ҳўл костюми туфайли ҳалокатли бирор кор-ҳол чиқмасидан бурун бу ердан тезроқ жуфтакни ростлаши керак.

Уни бирданига яна ҳам қучлироқ ҳолсизлик ва даҳшат қамраб олди-да, Сондра ҳузурига қайтиб бориб, ўзимни чиндан ҳам ёмон ҳис этяпман, агар эътиroz билдирмасангиз ва бошқаларни кўндирангиз, сиз билан бирга уйга қайтишни истар эдим,

демоқчи бўлди. Шу сабабли зиёфат тугашидан анча олдин, соат ўн яримда Сондра, Берчарддан: негадир мазам қочяпти, шунинг учун мени, Клайд ва Жилни уйга ташлаб кединг, деб илтимос қилди, аммо, келишиб олганимиздек, Айик кўлига жўнаш учун эртага яна ҳаммамиз йигиламиз, деб ҳам қўйди.

Клайд хавотирли фикрларга ботиб, эҳтимол бундай вақтли кетаётганим ҳам бу бебош ва ҳалокатли йўлимдаги ҳар бири бадбаҳт хатоликдан иборат бўлган яна битта одимдир, деган хаёлга борди ва охири моторли қайиқقا ўтириди-ю, сал ўтмаёқ ўзини Крэнстонлар чорбогида кўрди. Қирғоққа тушгач, анча хотиржам оҳангда у Берчард билан Сондрадан узр сўради, кейин хонасига отилиб, костюми илгари қандай қўйилган бўлса, ўшандай жойида турганини кўрди-да, йўқлигига ҳеч ким хонасига кирмаганига ишонч ҳосил қилди. Шунда ҳам у юрагини ваҳима босганча костюмини одди-ю, тугун қилиб боғлади, сўнгра атрофга қулоқ солиб, билинтирмай чиқиб кетиши учун жимлик чўкишини пойлаб бир оз кутиб турди ва уйқудан олдин соф ҳавода хиёл айланмоқчи бўлган кишидай уйдан чиқди. Кўл соҳили бўйлаб тахминан чорак милча нари боргач, оғир бир тошни излаб топди-ю, уни костюмига боғлаб, бор кучи билан қулочкашлаб сувга улоқтирди. Кейин яна жимгина, маъюс ва безовта бир қиёфада хонасига қайтиб келди-да, эртаги кун менга нима олиб келаркин, борди-ю, кимдир келиб, мени сўроқ қилса, нима жавоб бераман... деган чексиз, фамгин, хавотирли хаёлларга шўнгиб кетди.

## VIII БОБ

Клайдни қўрқинчли тушлар (Роберта, уни қамоққа олгани келган кишилар ва шунга ўхшаш нарсалар) билан азобга солган деярли уйқусиз тундан сўнг тонг ҳам отди. Нихоят, у ўрнидан тур-

ди: ҳар бир асаби, қўзлари қақшаб оғрир эди. Бир соатлардан кейин пастга тушди-ю, автомобиллардан бирини ҳайдаб чиқаётган Фредерикни (қайси куни уни шу ерга олиб келган ҳайдовчини) кўриб, унга Олбэни ва Утикада чиқадиган ҳамма кундузги газеталардан олиб келишни топширди. Соат тўққиз яримларга яқин ҳайдовчи қайтгач, Клайд газеталарни кўтариб хонасига кирди-да, эшикни қулфлаб, улардан бирини ёзиб кўрган эди, бирдан-нига ваҳимали сарлавҳага кўзи тушди:

СИРЛИ ТАРЗДА ҲАЛОК БЎЛГАН ҚИЗ.  
КЕЧА УНИНГ ЖАСАДИ АДИРОНДАК  
КЎЛЛАРИНИНГ БИРИДАН ТОПИЛДИ.  
ҲАМРОҲИННИНГ ЖАСАДИ ЙЎҚ.

Юраги ҳовлиққанидан ранги қув ўчиб, дераза одиддаги стулга ўтирди ва ўқий бошлади:

«Бриджбург (Нью-Йорк штати), 9 июль. Кеча тушга яқин Катта мушгир кўлининг жанубий қисмида сувдан номаълум бир ёш жувон чиқариб олинган, тахмин қилишларича, у чоршанбада йўлоқзор кўли меҳмонхонасида ўзини «Карл Грэхем рафиқаси билан», пайшанба куни Катта мушгир кўли меҳмонхонасида эса «Клифорд Голден рафиқаси билан» деб ёзdirган бир йигитнинг хотини экан. Тўнкарилиб ётган қайиқ билан эркакларнинг похол шляпасини Хилол қўлтиги деб номланган жойдан топишган. Шу боисдан кун бўйи у ерда чангак ва тўрлар ёрдамида қидирув олиб борилган. Аммо кеч соат еттигача ҳам эркакнинг жасади чиқмаган, фалокат юз берган жойга соат иккида чақирилган бриджбурглик терговчи Хейтнинг тахминига қараганда, эркакнинг жасадини топишдан умид қилмаса ҳам бўлади. Ўлган жувоннинг юзи ҳамда бошидаги яра ва моматалоқлар, шунингдек, ҳодиса юз берган жойга қидирув давом этаётган пайтда етиб келган уч кишининг гапи,

яъни уларнинг ўтган тунда кўлдан жануброқда, ўрмонда, таърифидан худди ўша Голден ёки Грэхемга ўхшаган бир йигитни учратгандари – кўп кишиларни бу ўринда қотиллик бор ва қотил яширинишга уринмоқда, деб тахмин қилишга мажбур этяпти.

Марҳуманинг чарм жомадони Қуролсоз темир йўл бекатида (Катта мушгир кўлининг шарқ томонида, беш миль нарида) сақлаб қўйиш учун топширилган экан, шляпаси ва пальтоси эса Катта мушгир меҳмонхонасида қолдирилгани ҳолда Грэхем ёки Голден бўлса, айтишларича, жомадонини ўзи билан бирга қайиққа олиб борган. Катта мушгир кўли меҳмонхонаси хўжайинининг маълум қилишибча, ўша йигит ва жувон ўзларини «олбэнилик Клифорд Голден рафиқаси билан», деб ёздиришган. Меҳмонхонада улар бир неча дақиқа бўлишган; кейин Голден шундоқ меҳмонхона ёнидаги қайиқдар қароргоҳига боргану кичик бир қайиқни ижарага олган ва жомадонини кўтариб, ҳамроҳи билан кўл сайрига жўнаган. Шу-шу улар қайтиб келишмаган, кеча эрталаб эса кўлнинг жанубий қисмидаги Ҳилол кўлтиғи деб номланган, чоғроққина бир кўрфазчада таги устига айланиб тўнкарилиб ётган қайиқни топишган; хиёл ўтмай шу ернинг ўзидан навжувоннинг мурдаси ҳам чиққан. Кўлнинг бу томонида сув ости тошлари йўқлиги, марҳуманинг юзида эса кўкарган жойлари аник кўриниб тургани учун ўша заҳотиёқ уни ҳамроҳи нима биландир урган бўлса керак, деган гумон туғилди. Буларга бояги юқорида айтилган уч кишининг гувоҳлиги ҳамда қайиқ яқинидан топилган эркак кишининг похол шляпасидан тамфаси юлиб олингани ва эгаси кимлигини аниқлаш имконини берадиган бошқа биронта белгиси йўқлиги масаласи ҳам қўшилса, агар йигитнинг мурдаси топилмаса, унда мистер Хейт: қотиллик юз берган, деб тахмин қилишга мутлақо ҳақди бўлади.

Ўтлоқзор ва Катта мушгир кўллари меҳмонхоналари хўжайинлари ҳамда ижарабаларининг таърифида қараганда, Голден ёки Грэхем – йигирма тўрт-йигирма бешлар атрофидаги хушқомат, қораҷадан келган, бўйи беш футу саккиз ёки тўққиз дюймдан ошмайдиган йигит экан. У оч кул ранг костюм, жигар ранг ботинка ва похол шляпа кийган, кўлидаги жигар ранг жомадонига соябон ва яна аллақандай бир буюм, эҳтимол ҳассами, боғлаб қўйилган экан.

Ёш жувон меҳмонхонада қолдирган шляпа тўқ жигар рангда, пальтоси оч жигар рангда, кўйлаги эса тўқ ҳаво рангда эди.

Голден ёки Грэхем агар тирик юриб, яширинишни мўлжаллаётган бўлса, уни ушлашлари учун шу атрофидаги барча темир йўл бекатларига унинг изланаётгани тўғрисида хабар юборилди. Фарқ бўлган жувоннинг жасади округнинг бош шаҳри бўлмиш Брижбургга элтилади ва бундан кейин тергов ўша ерда олиб борилади».

Клайд вужуди музлаб, гунг бўлиб ўтирганча ўй ўйлашдан бўшамасди. Яна шундоқ бурунларининг остида бу даражада разил қотиллик қилингани (одамларга шундай туюлса керак), ҳойнаҳой, кишилардаги ҳаяжонни баттар кучайтириши, қўпчилик, ҳатто шу атрофидаги барча халойиқ газетада белгилари эълон қилинган жиноятчини топиш мақсадида энди ҳар бир учраган одам ва ўтган-кетганга ҳам синчковлик билан разм солиб чиқишлири турган гап эди. Аммо, модомики, улар деярли Клайднинг изига тушишган экан, демак, у шу ерлик ёки Катта мушгирдаги маъмурларга мурожаат этиб, ҳаммасини бошдан-оёқ холисанилло сўйлаб бергани маъқул эмасми, ўзи тузган дастлабки режасидан бошлаб, шу оқибатга олиб келган сабаблар тўғрисида дейсизми, ҳарна бўлганда ҳам у Робертани ўлдирмагани, чунки сўнгги дақиқа-

ларда қалбидә кескин ўзгариш юз бергани ва у ўзи ният қылган ишни бажаролмайдын ҳолатта тушиб қолгани дейсизми.., шуларни бир бошдан тушунтириб бергани маъқул эмасми? Йўқ, алҳазар, унда бу, Роберта иккалови ўртасидаги саргузаштларни Сондра ва Грифитсларга бошдан-охир фош этиб қўяди-ку, ахир, устига-устак, у ҳали бу ердан бутунлай умидини узмай туриб шундай қилса ақддан эмас. Ўзи-ку, бир ёқда қочиб юрган бўлса, бир ёқда Робертанинг юзидаги жароҳатларни ҳикоя қилубчи анави маълумот эълон қилинган бўлса, бу вазиятда унинг гапларига ким ҳам ишонарди? У ҳар қанча чираниб, бегуноҳдигини тушунтиргани билан ҳамма нарса уни қотил деб кўрсатиб турибди-ку, ахир.

Эҳтимол, уни кўрган айрим кишилар, гарчи, у ҳозир кулранг костюм ва похол шляпада бўлмаса ҳам, газетада босилган белгиларга қараб туриб таниб қолишлари мумкин. Уни, тўғрироғи у эмас, балки унга ўхшаган Клифорд Годден ёки Карл Грэхемни излашяпти, қотиллигини бўйнига қўйиши учун излашяпти! Аммо Клайд худди Голденнинг ўзгинаси-ку, ахир, тағин лоп этиб анави уч киши келиб қолса-я? Клайдни қалтироқ босди. Бу ҳам етмагандай, тўсатдан яна бир даҳшатли фикр – Годден ва Грэхемларнинг исм-фамилиялари ўзиникига ўхшаш ҳарфлар билан бошланганлиги ёдига тушди (бу фикр шу аснода биринчи бор миясига худди чақиндек урилди). У бунга аввал эътибор ҳам бермаган экан, аммо энди, келиб-келиб шу нарса уни барбод қилиши мумкинлигини англаб етди. Илгари нега у бирон марта ҳам шуни ўйлагман экан-а? Нега? Нега? Эй, худо-е!

Айни шу пайтда уни Сондра телефонга чақириб қолди. Бу – Сондра, деб айтишди унга. Клайд энди ҳар нима бўлганда ҳам амаллаб ўзини қўлга олиши, ақалли мундай бир майинроқ гапира билиши лозим эди.

Хүш, унинг Миттивои эрталаб ўзини қандай ҳис этяпти? Анча тузалиб қолдими? Кеча унга туйқусдан қандай бир ярамас касаллик ёпишиди-а? Ҳозир у энди ўзини қушдай сезаётгандир, шундай эмасми? Ҳамма қатори саёҳатга ҳам бора олса керак? Э, қойил, гап мана бундоқ бўпти! Сондра бўлса шунчалик қўрқиб кетдики, агар Клайд қўрпа-тўшак қилиб ётиб олса, саёҳатга чиқолмай қолади, деб тун бўйи безовталаниб чиқди. Аммо у боради, демак – ишлар яна беш бўлади. Жоним! Жондан азиз кичкинам! Кичкинтой Сондрани севади-а? Жудаямми? Бу саёҳат Клайд учун фоятда фойдали бўлади, деб Сондра қатъий ишонади. Эрталабки вақти бутунлай йўлга отланиш билан банд бўлади, бироқ соат бир ёки бир яримларда «Казино» ёнидаги бандаргоҳда ҳамма тайёр туриши керак. Ана шунда – оҳ, айтишга тил ҳам лол! У ерни бамисоли жаннат дейиш мумкин! Клайд Бертина, Грэнт билан ва Крэнстонлар чорбогидан жўнайдиган бошқа ҳамроҳлар билан бирга келади-ю, бандаргоҳда Стюартнинг моторли қайиғига ўтиб олади. Шубҳасиз, ҳаммамиз роса маза қиласиз, жудаям маза қиласиз, лекин ҳозирча Сондранинг вақти зикроқ! Хайр, кўришгунча хайр!

Кейин у саъва каби йилт этди-ю, ғойиб бўлди.

Аммо кутиши керак: Клайд яна уч соатдан кеинингина бу ердан жўнаб кетиши ва шундай қилиб Клифорд Голден ёки Карл Грэхемни излаб юрган бирортасига дуч келиб қолиш хавфидан қутулиши мумкин! Балки ҳозирча у соҳида айланиб юрсинми, ўрмонга кириб кетсинми? Ёки жомадонини йифиштирганча пастга тушиб ўтириб, шосседан чорбоқقا қараб келадиган илон изи узун йўлдан ким кўринганини ёки кўлдаги қайиқларни кузатиб турсинми? Мабодо, агар сал шубҳали бирон кимса кўринадиган бўлса, ҳали қочиб улгуриши ҳам мумкин... У худди шундай қилди ҳам: авва-

лига бамисоли яраланган йиртқичдек ҳар томонга олазарак қараб, ўрмонга кирди; кейин чорбоқça қайтиб келиб, шу ерда ҳам гоҳ ўтириб, гоҳ олд ва орқага юриб, ҳар дақиқада теваракда нима бўлаётганини хавотир билан кузатиб турди. (Анави киши ким? Хув анави қайиқ кимники бўлди? У қаёқقا кетяпти? Бу ёққа қараб келмаяптимикин? Унда ўтирган кимиийкин? Тағин полиция... изқувари бўлса-я? Унда ҳалиям вақт фаниматлигида... сўзсиз, қочиб қолиш керак.)

Мана, ниҳоят, уч соат ҳам ўтиб кетди ва Клайд Бертина, Грэнт, Харлей ва Вайнетлар билан биргаликда Крэнстоnlарнинг моторли қайигида «Казино» ёнидаги бандаргоҳга қараб йўл олди. Бандаргоҳда уларга саёҳатга отланган бошқа улфатлар ва хизматкорлар ҳам қўшилишди. Шимол томонга қараб ўттиз миль юрилгач, шарқий соҳилдаги Балиқчилар кўрфазида уларни Гарриэтлар, Бэготлар ва яна бошқа аллакимларнинг автомобиллари кутиб олди ва ғамлаб қўйилган барча ашқол-дашқоллар-у байдаркалари билан қирқ миль шарқ томонга – Айиқ кўлига олиб кетишли, бу кўл ҳам хунуклиги ва ҳувиллаганлиги жиҳатидан деярли Катта мушгир кўлига ўхшар эди.

Агар анави воқеа елкасида тоғ бўлиб турмаганида, бу саёҳат Клайдга олам-олам қувонч бахш этиши аниқ эди! Сондранинг нигоҳи қалбидаги оловли муҳаббатини изҳор қилиб турган пайтда унинг ҳузурида бўлиш Клайд учун чинакам баҳт эди. Ёнида Клайд борлигидан Сондра ҳам шу дарражада яйраган ва жонланиб кетган эдики, нақ ўзини қўйишга жой тополмасди. Лекин, ҳар ҳолда Робертанинг жасади топилганини қаранглар-а! Мана энди Клифорд Голден – Карл Грэхемни излашяпти. Телеграф ва газеталар орқали ташқи белгиларини ҳамма ёққа хабарлаб ҳам улгуришибди. Қайиқ ва автомобилларда ўтирган манави ул-

фатлар ҳам ўша белгиларни билишлари эҳтимолдан узоқ эмас. Аммо улар Клайднинг Сондра ва Грифитслар билан муносабатини билганлари учун ундан шубҳа ҳам қилишмаяпти, бояги белгилар эса ҳеч бирининг хаёлига ҳам келмайди. Борди-ю, ўйлаб қолишса-чи? Борди-ю, билиб қолишса нима бўлади? Э-эй даҳшат! Қочоқдиги! Фош этилиши! Полиция! Уларнинг ҳаммаси, эҳтимол, Сондрадан бошқаси биринчи бўлиб ундан юз ўгиришади. Йўқ, Сондра ҳам юз ўгиради. У ҳам даҳшатдан кўзлари чақчайганча... сўзсиз, ундан юз ўгириб кетади...

Ўша оқшомнинг ўзида, кунботар пайти ҳамма улфатлар Айик кўлининг гарб қирғоғидаги худди қайчилангандек теп-текис, кенг майсазорга жойлашдилар; гулхан атрофидаги бешта хилма-хил чодир эса бамисоли ҳинд қишлоқларини эслатар эди; ошпаз ва хизматкорлар турадиган чодирлар сал нарироққа ўрнатилган, кўкатлари ўсиб кетган соҳида ётган олтига байдарка гўё сувдан чиқариб олинган олабуга балиқларига ўхшар эди. Кейин гулхан теварагида ўтириб овқатланишди. Таомдан сўнг бошқалар танца тушишаётган пайтда Бэгот, Гарриэт, Стоарт ва Грэнтлар янгича қўшиқлардан куйлай бошлашди ва охири каттакон керосин чироқнинг пилигини баланд кўтариб, қарта ўйинига тушиб кетишди. Қолганлар эса лагербоп ва студентча шўх қўшиқлардан хиргойи қила бошлашди; Клайд бу қўшиқларнинг биронтасини билмаса ҳам жўр бўлишга уринарди. Аллакимлар қаҳ-қаҳ уриб яйраб-яйраб кулишарди. Айримлар эса: биринчи балиқни ким тутишга, биринчи олмахон ёки какликни ким отишга, биринчи пойгада ким фолиб чиқишга бас бойлашишарди. Ниҳоят, эртанги кун режаси ҳам тантанавор тарзда муҳокама этилди: эртага нонуштадан сўнг лагерни камида яна ўн милча шарқроққа қўчирадиган бўлишди, у ерда жуда ҳам зўр бир пляж бор, ундан беш миль

нарида эса «Дурагай» меҳмонхонаси жойлашган, ўша ерда овқатланиб, ҳолдан тойгунча танца тушишимиз ҳам мумкин, дейишди улар.

Эҳ, ҳаммаданам бу лагернинг тунги, ҳамма уйкуга чўмган пайтдаги осойишталиги ва суувлигини айтмайсизми. Юлдузлар! Қорамтири, сирли товланаётган сув сатҳи сезилар-сезилмас мавж билан қопланган сеҳрли, қорамтири арчалар фирм- фирм шабадада бир-бирлари билан шивирлашади, тунги қушлар ва бойўғиларнинг қичқириқлари ҳам Клайдни борган сари баттарроқ ваҳимага солар ва у тун зулматига оғир андуҳ ила қулоқ тутар эди. Агар... агар уни тобутдан чиққандек мана шу даҳшат, яъни Робертага қилган ёмонлигигина эмас, балки уни қотил, деб айблаётган шафқатсиз қонун қудрати таъқиб остига олмагандами, унда бу жойларнинг хуш табиати Клайд учун қанчалар ажиб ва бамисоли жаннатдек кўринган бўлар эди!.. Бир хиллар ўз ўрнига ётиб, бир хиллар эса қоронфилик қаърига яширинган бир пайтда, Сондра юлдуз живир-живири остида Клайд билан бир-икки оғиз гаплашиб олиш ва ўпишиш мақсадида секингина чодирдан чиқди. Клайд Сондранинг қулогига ўзининг чексиз миннатдорлиги, унинг севгиси ва ишончини қозонолганидан баҳтиёrlигини айтиб шивирлайди ва у бир кун келиб менинг бу дараҷада, ҳозир сиз ўйлаётгандек олимистер эмаслигимни билиб қолсангиз, ўшанда қиттай бўлса ҳам яна мени севасизми... нафратланмайсизми... деб сўрашга ҳам тайёр. Лекин Сондра унинг ҳозирги кайфиятини кечаги аҳволига солиштириб кўришидан (ахир у, кеча кечқурун чинакамига вассасага тушган эди-ку!) ва Клайднинг қалбини кемираётган даҳшатли, ҳалокатли сирдан воқиф бўлиб қолишидан қўрқиб, ўзини гапдан тийди.

Сўнгра у Бэгот, Гарриэт ва Грэнтлар билан бир чодирга кириб, ўз ўрнига чўзилди-ю, шунда ҳам

ваҳимага тушганча, ташқарида тиқ этган товушга соатлаб қулоқ солиб ётди: тағин бу пусиб келаётган бирон кимсанинг қадам товуши бўлмасин... унда... унда бу Клайд учун – адолат суди, ҳибс, фош бўлиш ва ўлим билан баб-баробар эди – э, худо-е! Клайд шу кеча қўрқинчли, гўё жон олғувчи тушлардан икки марта чўчиб уйғониб кетди – назаридা уйқусида қичқиргандек ҳам бўлди (энг ёмони мана шу эди).

Аммо кейин яна тонг жилвалари, кўл узра кўтарилаётган сап-сариқ қуёш соққаси, нариги соҳилдаги кўлтиқчада ёввойи ўрдакларнинг шалоп-шалопи... Бир оздан сўнг Грэнт, Стюарт ва Харлейлар ярим ялангоч ҳолда байдаркаларга ўтириб, қўлларида яроғ, худди эски овчилардек олисдаги ўша ўрдаклардан иккитагинасини отиб келиш умида йўлга тушишди, лекин қуп-қуруқ қайтишгач, қолганлар қийқириқ-сурон қўтариб уларни мазах қилишди. Кейин чўмилганда тақиласиган ялтироқ кийимлари устидан шойи халатларини ташлаб олган йигит ва қизлар шўхлик билан соҳилга югуриб келиб, яна қийқириқ-сурон ила ўзларини сувга отишди. Соат тўққизда нонушта қилинди, шундан сўнг шод-хуррам, ранго-ранг байдаркалар флотилияси гитара, мандолина ва банжо<sup>1</sup> товушлари... ҳамда қўшиқ, ҳазил-мутойиба ва ўйин-кулгилар билан кунчиқар тарафга қараб йўл олди.

– Менинг миттигинамга яна нима бўлди? Жуда қовоқлари солиқ. Наҳотки бу ерда Сондра ва бу ажойиб болалар билан ҳеч яйрай олмаса?

Шундагина Клайд бирдан ўзини қувноқ ва ташвишсиз тутиши лозимлигини пайқаб қолди.

Тушга бориб Бэгот, Грэнт ва Гарриэтлар, ўзлари ҳозир йўл олган олдиндаги сулув қирғоқ – Рамсхорн бурунинг жуда оз масофа қолганини айтишди; у ерда қоя тепасидан бутун кўл худди

<sup>1</sup> Банжо – мусиқа асбоби. (Таржимон.)

кафтдагидек яққол күриниб турар экан, соҳилда эса чодир тиклаш ва саёҳатчиларнинг бошқа ашқол-дашқоллари учун ҳам қулай жойлар кўп экан. Хуллас, бу жазирама, серфайз якшанба кунини ҳам одатдагидек хушнуд ўтказиш мўлжалланган эди: нонушта, чўмилиш, танца, сайдр-томоша, қарта ўйини, мусиқа. Кейин Клайд билан Сондра бошқа жуфтларга ўхшаб, сездирмайгина – Сондра мандолина кўтариб олган эди – лагердан кунчиқар томонга қараб анча олислаб кетишиди-ю, қоя остидаги пастқам бутазорлар орасига киришиди. Гарчи Сондранинг сўзига қараганда, миссис Финчли бундан буён ўз қизининг Клайд билан, масалан, мана шу саёҳат пайтидагига ўхшаш яқин муносабатда бўлишини ёқтирмайроқ гапирган бўлса-да, бари бир улар ҳозир арчалар соясида ётиб олиб – Сондра эса Клайд оғушига кўмилган эди – ўзларича истиқбол режаларини тузишарди. Клайд Грифитсларга қариндош бўлгани билан ниҳоятда камбағал, назардан четда қолган бир одам, Сондра онасининг ўйтларини Клайдга тағинам анча юмшатиброқ гапириб берар экан, охирида кўшиб қўйди:

– Бу кулгили гап, жоним! Сиз буни унчалик кўнглингизга олманг. Мен ҳам бир оғиз гап қайтармай, фақат кулиб қўя қолдим, чунки ойимни ҳозир хафа қилишга юрагим бетламайди. Лекин шунга қарамай, Клайдни саёҳатда ва бошқа жойларда учратиб қолсам, ундан қандай қилиб ўзимни олиб қочаман, деб таъна қилиб ҳам қўйдим, тўғрими, ахир, энди сиз ҳамманинг оғзига тушган одамсиз, сизни ҳамма жон-жон деб меҳмонга таклиф этади. Менинг жоним – шунақангি барно йигитки! Ҳамма шундай дейди, ҳатто йигитлар ҳам.

Бу пайтда прокурор Мейсон, унинг ёрдамчи-си Бэртон Бэрлей, терговчи Хейт, Эрл Ньюком ва серважоҳат шериф Слэк (у семиздан келган одам бўлиб, одатда улфатчилик вақтида ўзини анча

хушчақчақ тутишига қарамай, ҳозир қовоғи со-лиқ әди) ва унинг уч ёрдамчиси – Краус, Сиссел ва Суэнклар Шейрондаги «Кумуш ёғду» меҳмонхона-сининг пешайвонида ўтириб, жиноятчини қандай қилиб тезда, осонгина ва сўзсиз қўлга тушириш хусусида кенгашмоқда әдилар.

– У Айиқ, кўлига кетибди. Биз дарров изидан ту-шиб, қидираётганимиз тўғрисидаги миш-мишлар қулогига бориб етгунча, таппа босишимиз керак.

Улар йўлга чиқишиди. Бэрлей билан Эрл Ньюком бутун Шейронни айланиб, Клайднинг бу ерга ке-лиши ва жума куни Крэнстонлар чорбогига кет-ганлиги ҳақида иложи борича яна янги маълумот-лар тўплашга ҳаракат қилишиди; улар Клайднинг қаёққа қараб жўнаганидан хиёл бўлса-да боҳабар одамларнинг кўпи билан суҳбатлашиб, гувоҳли-гини олишиди ва уларга судга чақирув қофозлари-ни ҳам тақдим этишиди. Хейт ҳам худди шундай топшириқ олди-ю, Учинчи миль Кўрфазига қараб йўлга чиқди: у «Оққуш» капитани Муни ва Клайд-ни ўрмонда учратган уч кишини сўроқ қилиши ло-зим әди, Мейсон эса шериф ва унинг ёрдамчилари ҳамроҳлигига атайлаб ёллаб олинган тезюарар ке-мачага тушиб, яқиндагина саёҳатга жўнаб кетган ёш улфатлар изидан таъқиб эта бошладилар: улар аввалига Балиқчилар кўрфазига боришлари, агар издан чалғимаган бўлсалар, кейин Айиқ кўлига ўтишлари зарур әди.

Душанба куни эрталаб, улфатлар Рамсхорн буру-нида тўхтаган жойларидан қўзғалиб, Шелтер-Бичу томонга (шарққа қараб ўн тўрт миль йўл босилади) силжиган пайтларида Мейсон билан Слэк ва унинг учала ёрдамчиси яқиндагина лагерь кўчиб кетган ўша ерга етиб келишиди. Шу жойда шериф билан Мейсон ўзаро маслаҳатлашиб олдилар-да, отрядни уч гуруҳга бўлишиди: ерлик кишилардан байдарка-лар топишгач, Мейсон ва шерифнинг биринчи ёр-

дамчиси Краут жанубий соҳил бўйлаб, Слэк билан иккинчи ёрдамчи Сиссел шимолий соҳил бўйлаб сузиг кетиши, Суэнк исмли ҳали фўргина йигитча эса жиноятчини шарт тутиб, қўлига кишан солиш иштиёқида ёниб, бир ўзи кўл ўртасини қоқ кесиб шарққа қараб сузиг кета бошлади, у гўё якка юрган овчи ёки балиқчига ўхшаб кўринса-да, аммо шу яқин ўртада, соҳилда сирни ошкор этиб қўювчи тутун-путунми, ёки чодирми ёки дам олиб юрган бекорчи одамларми – ишқилиб биронтаси кўриниб қолмасмикин, деган умидда зийраклик билан теварак-атрофни кузатиб бораарди. Ҳаттоки у хаёлида: «Клайд Грифитс, сиз қонун номи билан қамоққа олиндингиз!» – деганча жиноятчини қўлга туширгандек ҳис этарди ўзини, аммо баҳтига қарши, Мейсон ва Слэк уни шунчаки бир айғоқ-чидек олдинга жўнатишган эди. Шу сабабли у биронта шубҳали нарсани учратгудек бўлса, ўлжани қўрқитиб ва қочириб юбормаслик учун ўша заҳотиёқ орқасига қайтиши, жиноятчи эшитмайдиган жойга келгандан сўнг эса ўзининг саккиз ўқли револьверидан атиги бир мартагина ўқ узиши керак эди. Ана шунда отряднинг шу яқин орадаги гурӯҳи ҳам бир марта ўқ узиб жавоб бериши ва у ерга иложи борича тезроқ этиб келиши лозим эди. Агар Клайдга ўхшаган ўша шубҳали шахс майли, пиёдами ёки қайиқдами, ишқилиб қочиб кетишга уринаётган бўлмаса, унда Суэнк ҳар қандай шароитда ҳам жиноятчини бир ўзи тутишга асло ҳарарат қилмаслиги зарур эди.

Клайд эса айни шу аснода Харлей Бэгот, Бертина ва Сондралар билан бир байдаркада ўтирганча ҳамма улфатлари қатори кунчиқар томонга қараб аста-аста сузиг кетмоқда эди. У ора-сира орқасига олазарак қараб қўяр: мабодо маъмурият одамларидан биронтаси Шейронга этиб келиб, энди изимиздан тушган бўлса-я, деб ўзига-ўзи тўхтовсиз

савол берарди. Агар унинг исмини билиб олишса-ю, унда қаёққа қараб кетганини суриншириб аниқлаш унчалик қийин ҳам эмас, шундай масми?

Бироқ улар исмини билишмайди-да. Буни газетадаги хабарлар ҳам айтиб турибди. Шунинг учун айниқса ҳозир, мана шундай ажойиб бир саёҳат пайтида, Сондра билан ёнма-ён кета туриб, ниҳоят яна у билан висолга эришган бир вақтида бўлар-бўлмасга хавотирланавериши унчалик тўғримас, ахир! Бундан ташқари, у мана шу кимсасиз ўрмон ичидан соҳил ёқалаб шарққа қараб юриб, нариги томондаги анави меҳмонхонагача бориши, кейин қайтиб келмай қўя қолиши ҳам мумкин-ку? У шанба куни кечқуруноқ Харлей Бэгот ва яна бошқа улфатларидан, кўлнинг кунчиқар томонидан жануб ёки шарқ тарафга кетадиган йўл йўқмикин, деб шунчаки сўраб ҳам қўйган эди, ўшанда улар ҳа, бор, деб жавоб беришган эди.

Ниҳоят, байдаркалар тўдаси душанба куни тушга яқин саёҳат мутасаддилари танлаган учинчи тўхташ жойи – хушманзара Шелтер-Бичуга ҳам етиб келди. Клайд чодир қураётганларга кўмаклаша бошлади, атрофидаги қизлар эса шўхлик қилишга ўтишди.

Бу пайтда ёш изқувар Суэнк Рамсхорндаги лагерда ёқилган гулхан кулларига қўзи тушиб қолди-ю, худди из ҳидини олган йиirtқичдай шоша-пиша, ичи қизиб соҳилга чиқди ва улфатлар тўхтаб ўтган жойни кўздан кечиргач, яна зудлик билан қайигини ҳайдаб кетди. Орадан бир соатлар ўтганда теварак-атрофни синчиклаб кузатиб бораётган Мейсон ва Краутлар ҳам шу ерга етиб келишди; аммо улар бир қарашдаёқ ўлжалари бу жойдан ҳам силжиб кетганини дарров пайқашди.

Бироқ Суэнк эшкакка зўр бераверганидан, соат роппа-роса тўртда Шелтер-Бичуга етиб келди. Чўмилайтган олтитача кишини узокдан кўра солиб, шартлашиб олинганича хабар бериш мақсадида

ўша заҳотиёқ орқасига қайтди. Икки милча нарига бориб, ўқ узди. Икки марта жавоб ўқи янгради: чунки Мейсон ҳам, Слэк ҳам Суэнкнинг хабарини эшитиб, энди иккала гуруҳ шитоб билан кунчиқар томонга қараб сузид келишмоқда эди.

Сондра билан ёнма-ён сузид бораётган Клайд ўқ овозларини эшитди-ю, бирдан юрагини ваҳима босди. Биринчи ўқ ванғиллагандар у шунчалар даҳшатга тушдик! Сўнгра яна икки марта ўқ узилди – кейинги овоз қаердандир, олисдан келса ҳам, ҳарқалай, биринчисига жавоб тарзида отилди, шекилли. Шундан сўнг юракни эзувчи оғир жимлик бошланди. Нима бу ўзи? Устига-устак, Харлей Бэгот ярага туз сепгандай:

– Эшитяпсизларми, отишяпти! Ҳозир ов мавсуми эмас! Булар тартиббузарлар! – деб луқма ташлади.

– Ҳой, оғайнилар! – деб қичқирди Грэнт Крэнстон. – Булар менинг ўрдакларим! Уларга тега кўрманглар!

– Грэнт, агар улар сендаقا отаётган бўлишса, хотиржам бўл, ўрдакларга бало ҳам урмайди, – деб узид одди Бертина.

Клайд зўрма-зўраки илжайди-ю, ўқ овози келган томонга аланглаб қаради ва худди қўрага қамалган жонивордек қулоғини динг қилди.

Қандай бир кучки, уни сувдан чиқиб, кийиниб, қочиб қолишга ундаяпти-а, ҳадеб? Шошил! Шошилсанг-чи! Чодирга қараб чоп! Ўрмонга ютур! Тез! Охири у шу овозга қулоқ солди-ю, унга қарамай туришган бир пайтни пойлаб туриб, шоша-пиша ўз чодирига кирди, кейин либосини алмаштириб, одми ҳаво ранг костюмини кийди-да, шапкасини одди, бегона кўз ва қулоқлардан холи жойда ҳаммасини бир бошдан ўйлаб, бир қарорга келиш мақсадида лип этиб лагерь орқасидаги ўрмонга кириб кетди. Нима сабабдан... нима са-

бабдан... йўқ узилганига боши қотиб, ваҳимага тушиб, у тобора соҳидан ичкарироқча кириб борарди, чунки кўлдан туриб биронтаси кўриб колиши мумкин, деб қўрқарди у.

Аммо Сондра-чи! Унинг шанба куни, кечава бутун айтган ширишакар сўзлари-чи... Ахир, Клайд, ўзи чиндан ҳам хавф остидами ёки йўқми – буни аниқ билмай туриб, Сондрани мана шундай ташлаб кетавериши тўғрими? Эҳ, унинг бўсалари-чи! Кишига лаззат бахш этувчи ваъдалари, келажакка аталган режалари-чи! Клайд шу кетганча дом-дараксиз кетса, Сондра, қолаверса, бошқалар ҳам уни нима деб ўйлашади? Ер ютгандек бирдан йўқолиб қолганини Шейрондаги ва шу атрофдаги бошқа газеталар ҳам сўзсиз илиб кетишади, кейин унинг Клифорд Голден ва Карл Грэхемлигини осонгина билишади-қўяди, хўш, шундай бўлмайдими, ахир?

Сўнгра у, бор-йўғи ўрмон ёки кўлда юрган ўткінчи овчиларнинг ўқига инониб, эҳтимол, бекор ваҳимага тушаётгандирман, деб ўйлай бошлади. У, қочиб кетсаммикан ёки қолайми, деган масалада ўзи билан ўзи баҳслалишиб, ўзини ўзи пайсалга сола бошлади. Анави баланд-баланд, азамат дараҳтларнинг улуғвор осойишталигини айтинг, ер бағирлаб ўсган жигар ранг игна баргли дараҳтларнинг гилам-гилам баргларини босганда қадам товушлари мутлақо эшитилмайди, анави қалин бутазорлар орасига кириб яширганча қоронги тушишини бемалол пойлаб ётиши ҳам мумкин! Ундан у ёғига эса – олфа, олфа... Лекин шунга қарамай, у бирор-бир бегона одам келган-келмаганигини билиш мақсадида орқага, лагерь томонга бурилди. (У, бир оз ўрмонни айланмоқчи эдим, адашиб қолдим, деб баҳона қилса ҳам бўлади.)

Тахминан шу пайтнинг ўзида лагердан фарброқда, икки милча нарида Мейсон, Слэк ва бошқа қолганлар ҳам бир ерга тўпланишди-ю, дараҳт-

лар панасига беркинганча ўзаро маслаҳатлашиб олишди. Натижада, Клайд ҳали имирсилаб, ҳатто яна лагерга қайтай деб турганида Мейсон билан Суэнк байдаркаларида соҳилдаги ёшлар томонга сузид боришди, кейин Мейсон бу ерда мистер Клайд Грифитс йўқми, уни кўрсак бўладими, деб сўради.

Ҳаммадан кўра яқинроқда турган Харлей Бэгот:

– Ҳа албатта. У шу ўртада, шу яқин ўртада, – дея жавоб берди.

Стюарт Финчли бўлса:

– Ҳ-ой, Грифитс! – деб қичқирди.

Лекин ҳеч ким жавоб қайтармади.

Клайд қирғоқдан анча оислаб кетган, шунинг учун ҳам Стюартнинг овозини эшитиши мумкин эмасди, лекин у бари бир гарчи секин ва эҳтиёткорлик билан бўлса-да, лагерь томонга қайтаётган эди. Мейсон эса, Клайд шу яқин ўртада ва у, шаксиз, шубҳа ҳам қилмаётир, деган хулосага келиб, бир оз кутишга аҳд қилди. Лекин шунда ҳам у Суэнкка ўрмон ичкарисига кириб, агар у ерда фавқулодда Слэкни ёки изқуварлардан бошқа биронтасини учратиб қолса, бир кишини шарқий соҳилдан, иккинчи кишини эса гарбий соҳилдан жўнатиш зарурлигини айтишни топширди; Суэнкнинг ўзи эса кўлнинг кунчиқар томонида жойлашган меҳмонхонага қайиқда бориб, у ердаги ҳамма одамларни, шу атрофда қотилликда айбланаётган бир кимса юрибди, деб огоҳлантириб қўйиши керак.

Клайд эса бу пайтда улардан атиги уч чақиримча шарқроқда келаётган эди, кўнглида нимадир унга ҳамон: «Қоч, қочсанг-чи, вақтни бой берма!» дея тайинларди-ю, аммо у шунда ҳам пайсалга солиб: «Сондра! Бу роҳат-фарогатли ҳаёт! Наҳотки шуларни ташлаб кетаверсам?» – деб ўйлар эди. Агар кетсам, бу – қолишимдан ҳам кўра баттарроқ хатолик бўлса керак, деди у ўзига ўзи. Борди-ю,

бояги қарсилаган товушлар мутлақо аҳамиятсиз – овчиларнинг шунчаки ёввойи паррандаларга қаратса отган ўқлари бўлса-чи, шуни деб у ҳамма нарсадан ажралиши керакми? Аммо шунга қарамай, у яхшиси ҳозир бормаганим маъқул, ҳарқалай, қоронфи тушгунча кутиб, бу фалати ўқ товушлари нималигини билиб олишим керак, деган фикрни хаёлидан ўтказди-ю, тагин орқасига қайтди.

Кейин яна тўхтаб, атрофга журъатсизгина қулоқ солди: ўрмон қушчалари чирқиллашар эди. У қалин чангальзорликларга хавотир аралаш олазарак қарай бошлади.

Шу пайт бирдан эллик қадамча нарида, атрофи ни қатор азим даражалар қуршаб олган узун йўлдан баланд бўй, чакак соқолли ва ўткир, синовчан нигоҳли қотма бир одам овоз чиқармай, тез-тез Клайд томонга юриб кела бошлади (кўринишидан у чинакам ўрмон кишиларини эслатар эди); бошида жигар ранг намат шляпа, ориқ гавдасида эса оқарив кетганидан ранги қандайлигини ажратиб бўлмайдиган қопдай кенг костюм. У тўсатдан:

– Бир оз сабр қилсинлар, мистер! Ўрнингиздан жилманг! Исми шарифлари мабодо Клайд Грифитс эмасми? – деб қичқиргандан, қичқириқ зўридан даҳшатга тушган Клайднинг бутун вужуди музлаб, турган ерида тошдай қотди-қолди.

Клайд нотаниш кишининг ўткир, қаттиқ нигоҳи ва қўлидаги тўппончасини кўриб, тўхтади; унинг хатти-ҳаракатлари шу даражада қатъий ва дангал эдики, буни кўрган Клайд суюк-суюкларигача музлаб кетгандай сезди ўзини, Наҳотки, у қўлга тушган бўлса? Наҳотки, изидан чиндан ҳам маъмурият одамлари келишган бўлса? Ё, худо! Энди қочиб кетишнинг ҳам ҳеч иложи йўқ! Нега у олдинроқ жўнаб колмади, нега? У бирдан ҳолсизланди-ю, сиримни ошкор қилиб қўймаслик

учун «йўқ» деб жавоб берсаммикин, деган хаёлда бир дамгина иккиланди, кейин ўзини босиб:

– Ҳа, менман, – дея жавоб қайтарди.

– Сиз мана бу ерда лагерь қурган улфатлардан-сиз, шундайми?

– Ҳа, сэр.

– Жуда соз, мистер Грифитс. Тўппонча ўқталаётганим учун кечиринг. Гап шундаки, менга сизни ҳар қандай шароитда ҳам қўлга олиш буюрилган. Исли шарифим Краут, Николас Краут. Катараки округи шерифининг ёрдамчисиман, сизни қамоқقا олиш ҳақида рухсатномам ҳам бор. Гап нимадалигини биларсиз ва мен бошлаган томонга қаршилик кўрсатмай бораверарсиз, деб умид қилсан бўлар?

Мистер Краут шундай деди-ю, қўлидаги оғир, кўриниши хунук қуролини яна ҳам маҳкамроқ қисиб ушлади ва Клайдга шиддатли, қатъиятли бир назар ташлади.

– Лекин... лекин... йўқ, мен билмайман! – деди Клайд зўрба-зўр; у бирдан ранги оқариб, бўшашиб қолди. – Агар қамоқقا олишга рухсатномангиз бўлса, измингизга бўйсунишга мажбурман, албатта... Аммо мен... мен тушунолмай қоидим, – унинг овози хиёл титраб кетди, – нима учун сиз мени қамоқقا олмоқчисиз?

– Ие, ҳали тушунмаяпман денг? Мабодо сиз чоршанба ёки пайшанба кунлари Катта мушгир кўлида ёки Ўтлоқзорда бўлган эмасмидингиз? А?

– Йўқ, сэр, бўлмаганман, – деди Клайд ёлғон сўзлаб.

– Кўринишидан сизга у ерда чўкиб кетган қиз тўғрисида ҳеч нарса маълум эмас шекилли, аммо сиз маълумотларга қараганда, бильцлик Роберта Олден билан бирга бўлгансиз-ку?

– Ё тавба, ўлимдан хабарим бору, бу гаплардан хабарим йўқ! – дея эътиroz билдириди Клайд асабийлашган ва энтиккан ҳолда; Робертанинг аниқ

исми шарифи ва адресини бегона бир одамнинг оғзидан эшитганда... бу уни беҳад ларзага солди. Демак, улар билишибди! Шунчалик тез-а! Калитини топишибди, Клайднинг ҳам, Робертанинг ҳам чинакам исмини билиб олишибди! Ё, парвардигор! – Ҳали мени қотилликда айблашяптими? – дея қўшиб қўйди у эштилар-эштилмас, деярли шивирлаган товуш билан.

– Ўша қиз ўтган пайшанба куни гарқ бўлгани сизга маълум эмасми? Ахир, сиз ўшандада у билан бирга эмасмидингиз?

Мистер Краут ундан совуқдан-совуқ, синчков, шубҳа ёғилиб турган нигоҳини узмас эди. Клайд эса хаёлида фақат бир нарсани, яна тузукроқ важ-баҳона топиб, қандай ҳаракат қилиш зарурлигини ўйлаб олгунча ҳамма нарсани инкор этиб туришни маъқул топди-да:

– Йўқ, мен қаёқдан бирга бўламан, ахир, – дея жавоб берди.

– Сиз пайшанба куни кечқурун соат ўн бирларда Катта мушгир кўлидан Учинчи миль Кўрфазига келаётган пайтингизда уч йўловчини учратмадингизми?

– Йўқ, сэр, учратган бўлсан тил тортмай ўлай. Мен сизга: у ерда бўлмаганман дедим-ку, ахир,

– Жуда соз, мистер Грифитс, сизга айтадиган бошқа гапим йўқ энди. Мендан фақат бир нарса – Роберта Олденнинг қотили деган шубҳа билан сиз, Клайд Грифитсни қўлга олиш талаб этилади, холос. Қани, орқамдан юринг.

Кейин у, асосан ўз қудрати ва нуфузини кўз-кўз қилиш мақсадида қўш ҳалқали пўлат кишан чиқарди: Клайд уни кўрганда тисарилиб кетди-ю, худди бирордан калтак егандай титрай бошлади.

– Менга кишан солиб ўтиришингизнинг ҳожати йўқ, мистер, – деди у ялингансимон оҳангда.

– Илтимос, ундей қилманг. Мен умрим бино бўлиб

бунақа кишанга тушмаганман. Усиз ҳам қаёққа десангиз, боравераман.

У ўрмоннинг бундан сал олдингина беркиниб қутулиб қолиши мумкин бўлган пастқам чангальзорликларига хомуш тортиб, афсус-надомат билан назар ташлади... У ерлар чинакам хавфсиз жойлар эди.

– Нима ҳам дердик, – жавоб қилди важоҳатли мистер Краут, – агар қаршилик қўрсатмай кетсангиз, марҳамат, кишанга солмаслигимиз ҳам мумкин.

Сўнгра у Клайднинг деярли жонсиз қўлларидан ушлаб олди. Йўлга тушишгач, Клайд:

– Сиздан яна бир илтимосим бор, айтсан мумкинми, – деди овозини пасайтириб журъатсизгина. (Сондрани ва қолган бошқа улфатларини ўйлаганда у даҳшатга тушиб, ҳолсизланди. Сондра! Сондра! Уларнинг ҳузурига қўлга тушган қотил сифатида қайтиб бориш! Сондра билан Бертина уни шу ҳолда кўришса, унда нима бўлади? Йўқ, йўқ!) – Сиз... сиз мени яна қайта лагерга олиб бормоқчимисиз?

– Ҳа, сэр, олиб бормоқчиман. Менга шундай буюрилган. У ерда Катараки округининг прокурори билан шерифи турибди.

– Ҳм, тушунарли, тушунарли, – дея хитоб қилди Клайд, деярли бутунлай ўзинн йўқотиб. – Лекин сиз... менга илтифот этиб... мана, жимгина кетяпману... биласизми, у ердагиларнинг бари менинг дўстларим, шу ҳолда борганимдан кўра ўлганим афзал!.. Сиз мени мабодо лагерни четлаб олиб ўтиб кетолмайсизми... майли, қаёққа десангиз ҳам розиман! Бундай дейишимнинг боиси бор, албатта..., яъни... мен... э, худо! Мени лагерга қайта олиб борманг, мистер Краут... сиздан ўтиниб сўрайман!

Энди у Краутнинг кўзига худди ёш боладай жуда ҳам ожиз қўриниб кетди... нозик юзи, гўё бутунлай бегуноҳ кўз қарашлари, эгнидаги пўрим костюми, ўзини боодоб тутиши... бу сифатлари билан у қў-

пол, ваҳший қотилга мутлақо ўхшамасди, ваҳоланки Краут айни ўшанақа одамни учратарман, деб ўйлаган эди. Хуллас у – Краут ҳурмат-эҳтиром билан қарайдиган кишилар тоифасиданлиги шундоққина аниқ эди. Борди-ю, буларни бир чеккага йиғишириб қўйганда ҳам, бу йигитчанинг ург-аймоги ҳам ҳазилакам одамлар бўлмаса кепрак. Краут шу пайтгача эшитган гапларнинг бари бу йигитча Ликургдаги энг баобрў оиласаларнинг бирига мансублигинг исботлаб турибди. Шу сабабли Краут хиёл юмшоқроқ муомалага ўтди.

– Майли, йигитча, – деди у, – сизга унчалик қаттиққўллик қилишни истамайман. Чунки мен, очиғини айтганда, шериф ҳам, прокурор ҳам эмасман, мен фақат сизни қамоққа олишим керак. Сизни нима қилиш кераклигини айтиб берадиган мендан бошқа одамлар ҳам бор. Биз ўшаларнинг олдигача борайлик, сиз улардан илтимос қилинг, балки улар айтишар, сизни лагерга қайтариб олиб бориш эҳтимол шарт эмасdir. Бироқ унда буюмларингизни нима қиласиз? Улар лагерда қолган бўлса керак, тўғрими?

– Ҳа, лекин уларни олиш шарт эмас, – деди Клайд шоша-пиша. – Ҳоҳлаган пайтда олиб кетса ҳам бўлади. Агар мумкин бўлса, ҳозир мен ўша ёққа мутлақо бормасам...

– Майли, кетдик, – дея жавоб қилди мистер Краут.

Мана, улар ибодатхона устунларига ўхшаш: уни фира-ширалиқда улуғвор қад кўтариб турган баланд дараҳтлар орасидан бамисоли черков йўлакларида одимлаётган қавмлардай тантанали сукутга тўлиб кетишаркан, Клайд фарб тарафдаги дараҳтлар панасидан кўзга чалинаётган қирмизи ранг шафаққа безовта ва ҳорғин-ҳорғин назар ташлаб борар эди.

Қотиллиқда айблашяпти! Роберта ўлибди! Энди унинг учун – Сондра ҳам ўлган ҳисоб! Грифит-

слар ҳам! Амакиси ҳам! Онаси ҳам! Анави лагердагилар ҳам!

Э, парвардигор, күнглидаги алланима «қоч» деб уни шоширганида, майли, нималигидан қатъи назар, нима учун қоча қолмади-а?

## IX БОБ

Мистер Мейсон, Клайд йўқлигига унинг ёр-биродарларига мундоқ бир разм солиб кўрган эди, Ликург ва Шейронда миясига келган фикрлари тасдиқланиб, янада қатъийлашгандек бўлди. Шунинг ўзиёқ уни сергаклантириб, қоралов ҳукмини осонгина чиқара оламан, деган аввалги ишончими дарз кетказиб юборди. Кўриниб турибдики, бунақсанги жанжалларни босди-босди қилиб кетишига Клайдда мол-дунё ҳам, истак ҳам етиб-ортадиганга ўхшарди. Бойлик. Дабдаба. Олий зот қариндошлар ва мўътабар таниш-билишлар – буларнинг баридан қутулишнинг бирон йўлини топиш керак, албатта. Бадавлат ва обрў-эътиборли Грифитслар жиянларининг қамоқقا олинганини эшлишишгач, унинг қандай жиноят қилганини ҳам сўраб-суриштириб ўтирумай, ўз шаънларига доғ туширмаслик учунгина энг ишбилармон адвокатни бу ишга жалб этишлари аниқ-ку, ахир! Сўзсиз, шундай қилишади, ишбилармон юрист эса ишни хоҳлаганча орқага суриши мумкин... У ҳолда, токи у жиноятчининг айбини бўйнига қўйиб улургурнунича орадан қанча вақт ўтиб, унинг ўзи ўз-ўзидан айловчилик вазифасидан тушади, кейин ҳозир умид қилаётгани ва унга сув-ҳаводек зарур бўлган судьялик мансабига сайланиши у ёқда турсин, ҳатто судьяликка номзод бўлиб ҳам мўлжалланмайди.

Ялтироқ свитер ва майнин оқ мовутдан шим кийиб олган Харлей Бэгот кўл соҳилида чиройли тизилиб турган чодирлар рўпарасида ўтирган-

ча, ўзининг қармоқ-пармоқларини тартибга солаётган эди. Айрим чодирларнинг олд пардалари кўтариб қўйилгани учун гоҳ-гоҳида пардоз-андоз билан шуғулланаётган Сондра, Бертина ва бошقا қизларга кўзи тушиб қолар эди, улар эндигина чўмилиб чиқишиган эди. Улфатлар чиндан ҳам жуда терилган эди, шу боисдан Мейсон, ўзининг бу ерга нима учун келганини дабдурустдан ошкор айтиши сиёсий ва ижтимоий жиҳатдан тўғри бўлармикан, деб иккиланиб қолди; у ҳозирча индамай туришни афзал кўрди-ю, Роберта Олденнинг ёки шахсан ўзининг ёшлиги билан манави ўспириналарнинг ҳаёти ўртасидаги осмону ерча фарқ ҳақида ўйлаб кетди. Грифитслардек зўр мартабали одам Робертага ўхшаш қизга ҳар қандай пасткашлик ва бағритошликни қилишга қилиб, яна жазодан осонгина қутулиб кетишга ҳам умид боғлаши турган гап, албатта, деди у ичида.

Аммо шунга қарамай, халақит берадиган ҳар қандай ёв кучларни ҳам писанд билмай, ўз айтганини қилмоқчи бўлди-да, охири Бэготнинг ҳузурига келди ва (гарчи ўзи иложи борича мулоим ва дилкаш кўринишга тиришса ҳам) энсаси қотиброқ гап ташлади:

- Жудаям лагербоп жой эканми?
- «Ҳа-а, биз ҳам анойилардан эмасмиз-да, – деди Бэгот гердайиб,
- Сизлар, ҳойнаҳой, ҳаммангиз Шейрон яқинидаги чорбоғлардан бўлсангиз керак?
- Ҳа-а... Асосан жанубий ва гарбий соҳидалиги чорбоғларданмиз.
- Лекин бу ерда мистер Клайддан бошقا Грифитслардан ҳеч ким йўқми?
- Йўқ. Улар, менимча, ҳалиям Ўрмонзор кўлида бўлишса керак.
- Сизнинг ўзингиз мистер Клайд Грифитсни шахсан танийсизми?

– Ҳа, албатта. У бизнинг улфатимиз.  
 – Мабодо, билмайсизми, у анчадан бери шу ердами, яъни демоқчиманки, Крэнстонларникида у анчадан бери турибдими?  
 – Жумадан бери, шекилли. Ҳарқалай, мен уни жума куни эрталаб кўрганман. Аммо ҳозир ўзи келади, керак бўлса ўзидан сўрашингиз мумкин, – деди Бэгот гапни чўрт кесиб, чунки мистер Мейсон майдо-чуйда саволлари билан тобора хира пашшага ўхшаб кетаётган эди, бунинг устига у, Клайд билан ўзларининг доирасидан ташқаридаги одам бўлса.

Шу пайт теннис ракеткасини қўлтиқлаганча Фрэнк Гарриэт келиб қолди.

– Фрэнк, қаёқقا кетяпсан?  
 – Гаррисон бугун майдончани тозалаб қўйган эди, бир ўйнаб келмоқчиман.  
 – Ким билан?  
 – Вайолет, Надина ва Стюартлар билан.  
 – У ерда бошқа майдонча ҳам борми?  
 – Ҳа, бор, у ерда иккита майдонча бор. Бертина, Клайд ва Сондраларни олиб, ҳаммангиз боринглар ўша ёқقا.  
 – Балки манавини бир ёқлик қилиб олганимдан кейин борсам-борарман.

Мейсоннинг хаёлига шу заҳоти: Клайд ва Сондра, Клайд Грифитс ва Сондра Финчли бир-бирига боғлиқ экан-да, деган фикр келди – чўнтағидаги мактублар ва ташрифномалар ҳам худди шу қизники бўлиши керак. Эҳтимол, у Клайд икковини шу ерда кўриб қолар, кейинчалик эса Клайд ҳақида у билан суҳбатлашар?

Шу пайт Сондра, Бертина ва Вайнетлар чодирларидан чиқиб келишди. Бертина:

– Харлей, Надинани кўрмадингизми? – деб қичқирди.

– Йўқ, аммо Фрэнк шу ерда эди. У Надина, Вайолет ва Стюартлар билан ўйнайман, деб теннис майдончасига кетди.

– Э, шундайми! Кетдик, Сондра! Вайнэт, кетдик! Майдончалари қанақайкин, бир күрайлик.

Бертина Сондранинг исмини айтиб туриб, унга ўгирилди-да, қўлидан ушлади, шунда Мейсон кутиб юрган воқеа юз берди – яъни у, Робертани ўзи билмагани ҳолда, фожиали бир тарзда Клайд қалбидан ситиб чиқариб ташлаган ўша қизни ақалли кўз қирини ташлаб бўлса-да, ҳарқалай, кўриб одди. Мейсон Робертага қараганды Сондранинг анчагина хушрўйлигини ва ясан-тусани жойидалигини бир қаращаёқ сезди, анави Роберта эса қачонлардир пешонасига шунақанги либос битишини ҳатто ҳаёлига ҳам келтиролмас эди, албатта. Бу қиз, мана, тирик юрибди-ю, анависи бўлса дунёдан кўз юмиб, Брижбург ўлихонасида ётиби.

Учала қиз бир-бирларининг қўлларини ушлаб олганларича ўзларига тикилиб турган Мейсон ёнидан чопиб ўтиб кетишиди, Сондра югуриб бораётган жойида Харлейга қараб:

– Агар Клайдни кўрсангиз, айтинг, ўша ёққа борсин, майлим? – деб қичқирди.

Харлей жавоб қайтарди:

– Сизнинг соянгизга буни тайинлаб ўтиришнинг ҳожати бор деб ўйлайсизми?

Мейсон кўз олдида рўй берәётган воқеаларнинг ранг-баранглиги ва серқайгулигидан лол бўлиб, диққат ва ҳаяжон билан теварак-атрофидаги нарсаларни кузатмоқда эди. Энди у Клайднинг Робертадан нима учун қутулмоқчи бўлганини ҳам тушуниб етди, энди Клайднинг ҳақиқий, пинҳона нияти ҳам очилди-қўйди. Шу чиройли қиз ва шу дабдабаларнинг бари Клайднинг кўнглидан бошқа ҳис-туйғуларни сиқиб чиқарган эди. Қизифи шундаки, ҳали ўн гулидан бир гули очилмаган ёшгина йигитчанинг шў қадар қабиҳ пасткашликкача юз тубан кетгани кишини ҳайрон қолдирарди! Бунга ақл бовар қилмайди! Устига-устак, анави баҳ-

ти қаро қизнинг ўлимидан сўнг орадан атиги тўрт кун ўтгач, манави ҳурилиқо билан кўнгилхушлик қилиб, Худди Роберта унга тегишдан умидвор бўлганидек, у ҳам Сондрага уйланишдан умид қилиб юрибди. Ақлга сифмайдиган не-не пасткашликлар бўлар экан-да ўзи оламда!

Ҳадеганда Клайд қайтавермагандан кейин Мейсон энди ўзини танитиб, Клайднинг буюмларини тинтиб чиқмоқчи ва олиб қўймоқчи бўлиб турган бир пайтида Эд Суэнк келди-ю, унга бошини силкиб, изимдан юринг, деб имо қилди. Мейсон ўрмонга кириши билан азamat дараҳтларнинг остида, сояда кимни денг, нақ Николас Краутнинг ўзини-ю, унинг ёнида хушқомат, яхши кийинган бир йигитчани кўрди. Ташқи қиёфаси тахминан ўша одамлар айтган белгиларни эслатарди. Ёши ҳам Клайдлигини билдирарди. Қув ўчиб кетган рангидан Мейсон айни шу йигит Клайдлигини дарров пайқади ва бамисоли уяси бузилган қовоғариdek газабланиб ўзини унга отди. Ҳарқалай, у аввал Суэнкдан Клайдни қаерда ва ким тутганини сўраб-сuriштириб олди-да, кейин унга хўмрайганча синовчан назар билан қаттиқ тикилиб турди, аслида ҳам қонун куч-қудрати-ю буюклигининг тимсоли бўлган одамлар худди мана шундай тикилишлари керак.

– Демак, сиз Клайд Грифитссиз?

– Ҳа, сэр.

– Унда эшитиб қўйинг, мистер Грифитс, менинг исмим Орвил Мейсон. Мен Катта мушгир ва йтлоқзор кўллари жойлашган округнинг прокурориман. Ўйлайманки, сиз бу жойлар билан яхши танишсиз, шундай эмасми?

У бир оз жим туриб, айтган пичинги Клайдга қандай таъсир қилганини билмоқчи бўлди. Аммо у кутгандай Клайд ваҳимага тушиб ўзини йўқотиб қўймади, фақат қоп-қора кўзларини Мейсонга

диққат билан тикканча қараб турарди, унинг бу нигоҳи асаблари қақшаб оғриётганидан далолат бермоқда эди.

– Йўқ, сэр, у ерларни яхши биламан, деб айтольмайман.

Клайд Краут ҳамроҳлигида ўрмон оралаб бу ерга келар экан, қанчалик далилу ашёлар зўр бўлишига қарамай, ўзим ҳақимда, Роберта билан алоқамиз ҳамда Катта мушгир ва Ўтлоқзор қўлларига борганимиз ҳақида оғиз оча кўрмаслигим керак, деган қатъий фикр тобора миясига чуқурроқ ўрнаша борган эди. У лом-мим демаслиги керак. Акс ҳолда, айбисиз айбдорга айланиб, йўқ гуноҳни бўйнига осиб олади. Ҳеч бир кимса – Сондра ҳам, Грифитслар ҳам; кибор дўстларидан биронтаси ҳам, Клайднинг шунаقا тубан нияти борлигини билмаслиги керак. Ваҳоланки, уларнинг бари шу атрофда, бир чақирим ерда, тўсатдан келиб қолиб, унинг нега қамоққа олинганини сўрашлари мумкин. Гарчи у юз берган воқеага ўзининг қандайдир алоқадорлиги ва орадаги гаплардан хабардорлигини инкор этиши зарурлигини тушуниб турса-да, айни пайтда анави одамнинг қаршисида туриб юрагини мислсиз қўрқув босди – унинг разабнок ва нафратли нигоҳига дош беролмай қалавасининг учини йўқотиб қўйди. Унинг эгри бурни... еб қўйгудек қадалиб турган ола-кула кўзлари...

Клайд тона бошлагандан сўнг Мейсоннинг жаҳли чиқиб кетди-да, унга худди номаълум, аммо хавфли бир йиртқичга тикилгандек бақрайиб қолди; лекин Клайд ўзини йўқотиб қўйганини кўргач, сўзсиз уни тезда айбига иқрор қиласман, деб ўйлади ва гапида давом этди:

– Мистер Грифитс, сизни нимада айблашаётганидан, ҳойнаҳой, хабарингиз бўлса керак?

– Ҳа, сэр, буни менга ҳозиргина мана бу киши айтди.

– Хўш, ўзингизни айбдор деб ҳисоблайсизми?

– Мутлақо йўқ, сэр! – дея инкор қилди Клайд.

Унинг юпқа, ҳозир гезарип кетган лаблари қаттиқ юмилади, кўзлари эса таърифга сифмас, ўта пинхоний даҳшат билан тўлиб-тошган эди.

– Нима? Бемаънилик ҳам шунчалик бўладими! Йозсизлик ҳам шунчалик бўладими! Сиз ҳали ўтган чоршанба ва пайшанбада Ўтлоқзор кўли ва Катта мушгирда бўлмаганман, дерсиз?

– Ҳа, сэр.

– У ҳолда, – Мейсон разабидан соchlари тикка бўлганча қаддини ростлади, сиз Роберта Олден билан танишилгингизни, қиз бечорани Ўтлоқзор кўлига олиб бориб, кейин икковингиз пайшанба куни Катта мушгир кўлида сайр этишга жўнаганингизни ҳам рад этарсиз, эҳтимол? Бутун йил давомида ўзингиз учрашиб юрган ва миссис Гилгинникида истиқомат қиладиган, Грифитслар фабрикасида сизнинг бўлмингизда ишлайдиган ўша қизни айтяпман. Сиз рождествода пардоз қути ҳадя этганингиз ўша қизни айтяпман? Эҳтимол, сиз: менинг исмим Клайд Грифитс эмас, Тэйлор-стритдаги миссис Пейтонникида турмайман, Роберта Олден ва миссис Финчлидан олган мана бу хат ва номалар ҳам менинг сандиқчамдан чиқмаган, дейишингиз ҳам мумкиндири?

Мейсон шундай дея туриб чўнтағидан бир даста хат ва таклифномаларни олди-да, нақ Клайднинг бурни остида силкита бошлади. Ҳар бир сўзни айтгани сари у ўзининг ялпоқ, қийшиқ бурни ва хунукдан-хунук бақбақасини Клайднинг юзига тобора яқин олиб борар, кўзлари эса жирканч ва разабидан чақнаб кетаётган эди. Клайд бўлса тўхтовсиз орқага тисарилар, курагини қотириб қўйган аллақандай муз юраги ва миясига ўта бошлаган эди. Хатларни топиби-я! Ҳамма нарсани бошдан-оёқ билиб олибди! Ҳў, нарироқдаги Клайднинг чодирида эса жомадонда Сондранинг сўнгги мактублари

турибди, уларда Сондра мана шу келаётган кузакда биргалашиб қочиб кетиш режаларини тузган. Нима учун уларни йўқ қилиб ташламади-я! Энди манави одам ўша хатларни топиб олиши мумкин – сўзсиз топади ҳам – шундан кейин Сондрани ва қолганларнинг барини сўроқ қила бошлади. Клайд гужанак бўлиб олди ва бутун вужуди музлаб кетди. Шу даражада ўйламай, ношудлик билан қилган қилмишининг ҳалокатли оқибати, худди ер шари нимжонгина Атлантнинг елкасини эзид ташлагандек, Клайдни ҳам эзид қўйди.

Лекин нимадир дейиш ва айни пайтда ҳеч нарсани бўйинга олмаслик зарурлигини сезди-ю ноилож жавоб қайтарди:

– Мен Клайд Грифитсман, бу – тўғри, бироқ қолган гапларнинг бари ёлғон. Мен бу ҳақда ҳеч нарса билмайман,

– Э, қўйсангиз-чи, мистер Грифитс! Мени алдашга уринмай қўя қолинг. Бекорга овора бўласиз. Бу қувлигингиз сизга сариқ чақалик ҳам фойда бермайди, менинг эса пачакилашиб ўтиришга вақтим йўқ. Эсингизда бўлсинки, одамларнинг ҳаммаси – гувоҳ, улар ҳали гапларингизни эшитишади. Мен хонангизда бўлдим, мисс Олденни билишингиз, унга севги изҳор қилиб юрганингиз ва ўтган қишида уни йўлдан уриб, орадан бир оз вақт ўтгач, кўкламда у сиздан иккиқат бўлиб қолгандан сўнг эса, аввалига уйига жўнатганингиз, кейин никоҳдан ўтамиз, деб лақиллатиб, мана шу саёҳатни ўйлаб топганингизни очиб ташлайдиган рад этиб бўлмас далиллар – сандиқчангиз билан мисс Олденнинг хатлари ҳозир қўлимда турибди. Ҳа, нима ҳам дердик, сиз уни боплаб никоҳдан ўтказдингиз! Лаҳадга киритдингиз – мана қандай никоҳ! – Катта мушгир ўпқонига юттириб юбордингиз! Мен бўлсам, қўлимда ҳозир исталган далилу ашёларнинг ҳаммаси бор, деб турибману, сиз

бўлсангиз уялмай-нетмай бетимга у қизни билмайман, дейсиз-а! Ё тавба!

Мейсон борган сари қаттикроқ гапирав, Клайд эса унинг овозини лагердагилар эшитиши ва Сондра ҳам эшитиб, бу ерга келиб қолишидан қўрқарди. Мейсон ўртага ташлаётган аёвсиз далилларнинг шиддатли қуюни остида саваланиб, карахт бўлиб қолган Клайд томоги бўғилиб, томири тортишаётгандай сезди ўзини ва худди қўлини синдириб юборар даражада бармоқдарини қисирлата бошлади. Аммо шунга қарамай, Мейсоннинг узун гапига фақатгина:

– Ҳа, сэр, – деб жавоб бериб қўя қолди, холос.

– Ё, тавба! – дея такрорлади Мейсон яна. – Энди мен сиз қиз болани ўлдиришингиз, кейин мана шунаقا жуфтакни ростлаб қолишингиз мумкинлигига ишондим. Яна ҳомиласи билан-а? Сизга ёзган мактубларидан воз кечмоқчи бўляпсизми? Ҳа, ундей бўлса, ҳозир бу ерда йўқман, мен тирик одам эмасман, дейишингиз ҳам мумкин, бемалол! Унда мана бу таклифномалар билан мана бу хатлар-чи, хўш, бунга, нима дейсиз? Турган гап, улар ҳам мисс Финчлидан бўлмаса керак, шундайми? Хўш, қалай? Йўқ, мисс Финчлидан эмас, демоқчи бўласиз-да, а, ҳозир менга?

У хатларни Клайднинг бурни остида силкита бошлади, Клайд Сондранинг шундоққина яқиндалиги, демак, бу мактубларнинг асл моҳияти фош бўлиб қолиши ҳам мумкинлигини ўйлаб:

– Йўқ, бу хатлар Сондраданлигини инкор этмайман, – дея жавоб берди.

– Жуда соз. Унда ўша хонада, ўша сандиқчангизда ётган мана бу хатлар-чи, улар мисс Олдендан эмасми?

Мейсон Робертанинг хатларини шундоқ юзи олдидиа силкитаётганидан беихтиёр кўзлари пирпирраб кетган Клайд:

– Мен бу ҳақда гапиришни истамайман, – деда жавоб қайтарди.

– Ҳе, биласизми? – Мейсон ғазаби қайнаганидан бидиллаб кетди: – Сафсатангизни йифиштиринг! Шунчалик ҳам юзсизлик бўладими? Ҳа, майли, бу ҳақда ҳозирча индамаёқ тура қолайлик. Вақти соати келиб, мен буни худди хамирдан қил суурургандек осонгина исботлаб бераман. Аммо қўлимда далил турса-да, сиз барчасидан тонмоқчи бўлиб ўтирсангиз, мана шунисига ақлим етмаяпти! Унда орқасига ўз дастхатингиз туширилган расмингизга нима дейсиз? Уни мисс Олденнинг жомадонидан олишни унугтансиз. Мисс Олден сизнинг зўрингиз билан ўз жомадонини Қуролсоз бекатида қолдирган, ҳолбуки, сиз ўз жомадонингизни ола кетгансиз, мистер Карл Грэхем – мистер Клифорд Годден – мистер Клайд Грифитс! Ўша расмингизнинг орқасига «Бертага Клайддан. Рождество билан табриклайман!» деб ҳам ёзиб қўйгансиз, эсингиздами? Мана, истасангиз, кўрсатишим мумкин! – Мейсон шундай деб чўнтағидан расмни чиқарди-да, Клайднинг нақ бурни остида силкитди. – Буни ҳам эсдан чиқаргандирсиз-а? Шахсан ўзингизнинг дастхатингиз! – У бир оз жим турди-ю, аммо жавоб кутмай, яна давом этди: – Намунча ўзингизни овсарликка солмасангиз! Сохта номлар остига яширинмоқчи бўлибсизу, бироқ ўз исм-шарифингизнинг бош ҳарфини ўзгартиришга ҳам ақлингиз етмабди-я, сиз ана шунаقا жиноятчисиз, мистер Карл Грэхем – мистер Клифорд Годден.

Мейсон Клайднинг айбини бўйнига қўйиб олиш нақадар муҳимлигини яхши билгани учун буни шу ернинг ўзидаёқ қандай қилиб амалга оширсам экан, деган хаёлда йўл қидира бошлади. Шу пайт бехос Клайднинг даҳшатдан гезарив кетган юзига кўзи тушди-ю, прокурор: у тиldан қолар даражада росаям кўрқиб кетибди-ку, деб ўйлади. Кейин

Мейсон бирдан тусини ўзгартирди, ҳарқалай, овози пасайиб, пешонаси ва оғзининг четидаги хунук ажинлари йўқолгандай бўлди.

— Гап бундай, Грифитс, — дея сўз бошлади у анча-мунча босиқдик билан, жўнроқ гапириб. — Аҳволингиз шундайки, сизга ёлғон ҳам, бемулоҳаза ва бемаъни тонишингиз ҳам ақалли зигирдан бўлса-да, наф бермайди. Қайтага сизга зиён етказади, ишонинг. Эҳтимол, сизнингча, мен бир оз кўполлик қилиб юборгандирман, аммо бунинг сабаби — менда ҳам асаб бор, ахир. Ростини айтсан, мен мутлақо бошқача одамни учратарман, деб ўйлаган эдим. Лекин мана энди сизни, юз берган воқеадан фоят қўрқиб кетганлигингиҳизни ҳам кўриб турибман, шундан кейин, э-э, балки бу ерда айбни енгиллатувчи бошқа бирор-бир... бирор-бир гап борга ўхшайди, деб ўйлаб қолдим, агар сиз ҳаммасини гапириб берсангиз, бўйнингизга тушаётган иш анча-мунча енгиллашади. Мен нима бўлганидан бехабарман, буниси ёлғиз ўзингизга аён, мен фақат сиз билан очиқчасига гаплашмоқчиман, холос. Ўзингизнинг мана бу яққол далил хатларингиздан бошламоқчиман. Кейин, биз Учинчи миль Кўрфазига борамиз, менимча, биз у ерга эртага етиб борсак керак, у ерда Катта мушгирдан келаётган пайтингизда тунда сизга учраб қолган анави учала овчи ҳам бўлади. Фақат улар эмас, Ўтлоқзор кўлидаги меҳмонхонанинг хўжайини ҳам, Катта мушгир меҳмонхонасининг хўжайини ҳам, сизга қайиқ берган қайиқчи ҳам, сизни ва Роберта Олденни Қуролсоз bekatiidan олиб келган ҳайдовчи ҳам... Уларнинг бари сизни танишади. Наҳотки, уларнинг ҳеч бири сизни танимайди, мисс Олден билан у ерда бўлган-бўлмаганлигингиҳизни айтиб беролмайди, деб ўйласангиз? Балки сиз, вақти келиб, уларга суд маслаҳатчилари ишонолмай қолишади, деб хаёл қилаётгандирсиз?

Клайд худди ичига танга ташлаганда ширкә этиб ишлайдиган автомат сингари шуларнинг барини бир зумда хаёлидан ўтказди-ю, аммо лом-мим демади, фақат қимиirlамай, вужуди музлаб қотган күйи қаёққадир бўшлиққа тикилиб қолди.

– Бу ҳали учи, – дея мулоиймлик билан, айё-рона давом этди Мейсон. – Ҳали миссис Пейтон ҳам бор. У хонангизга кириб, сандиқчангиз ва шифонъерингизнинг юқори тортмасидан мана бу хатларни ва расмингизни олганимни кўрган эди. Хўш, сиз ва мисс Олден ишлаган фабрика қизла-ри-чи? Ўлганини эшитишгач, улар наҳотки сизнинг мисс Олден билан қандай алоқада бўлганингизни эслай олишмайди, деб ўйлайсиз? Бу, ахир, бемаънилик-ку! Ҳар қанча хаёл олиб қочганда ҳам бунақанги оддий воқеаларга аслида ўзингизнинг ақдлингиз етиши керак эди. Шундай қилиб қутулиб кетаман, деб ўйламаёқ қўя қолинг. Демак, сиз бизни аҳмоқ қилмоқчи бўляпсиз. Сал бош қотирсангиз, буни ўзингиз ҳам очиқ-оидин тушуниб етишингиз мумкин.

У Клайд энди айбига иқрор бўлса керак, деган умидда яна индамай турди. Аммо Клайд Роберта ёки Катта мушгир кўлига оид бирон нарсани бўйнига олиш ўзини ҳалок қилишига аниқ кўзи етгани учун илгаригидай миқ этмай тураверди. Мейсон яна гап бошлади:

– Майли, Грифитс, мен тағин шуни ҳам айтиб қўймоқчиманки, ҳатто агар ўғлим ёки укам бўлган тақдирингизда ҳам сизга бундан ортиқроқ маслаҳат беролмас эдим, сиздан мен фақат ҳақиқатни билишни эмас, балки шу билан бирга бу воқеадан сизни қутқариб чиқиб кетишни ҳам истардим. Агар ўз аҳволингизни хиёл бўлса-да енгиллатишни ўйласангиз, унда сиз ҳозиргидек ҳамма нарсани инкор этавермаслигингиз керак. Сиз қайтага ортиқча чалкашликларни юзага келтириб,

жамоат кўзи олдида ўзингизни ўзингиз хароб қиляпсиз. Сиз, мисс Олденни билардим ва у билан кўлга ҳам борган эдик, у мана бу хатларни менга ёзган эди, дейишингиз мумкин-ку, ахир, шу билан қарабсизки, олам гулистон эмасми? Мабодо бундан бошқа воқеаларнинг сизга дахли йўқлигини исбот этмоқчи бўлган тақдирингизда ҳам бари бир бундан кутулолмайсиз-ку. Ақдини салпал ишлатган ҳар бир одам – агар онангиз шу ерда бўлганда, у киши ҳам – сизга албатта шундай деган бўлар эди. Сизнинг хулқингиз анчайин кулили, айбсизлигингизни эмас, айборлигингизни исбот қилиб беряпти. Агар қандайдир юмшатувчи шарт-шароитлар бўлган бўлса, нима учун улардан вақтида фойдаланиб, бу фактларни дарҳол ойдинлаштириш мумкин бўлмасин? Агар сиз ҳозир шундай қилсангиз, унда мен сизга қўлимдан келганча кўмаклашаман, деб сўз беришим мумкин. Қолаверса, бу ерда мен бир одамни ўла-ўлгунча қувғин остига олиб, азоб бериш ёки қилмаган ишини қилдинг, деб бўйнига қўйиш учун юрганим йўқ, мен фақат ҳақиқатни билишни истайман. Мен сизга далил-ашёларим қўлимда ва мен буни исботлайман, деб турсаму, аммо сиз ҳатто ўша қиз билан танишлигингизни ҳам инкор этиб ўтирангиз, унда, энди... – Прокурор чорасизликдан аччиқданганини билдириш мақсадида қўлларини осмонга ўйди.

Аммо Клайд ҳамон аввалгидек ранги бўздай оқариб, гунглигича тураверди. Мейсон сўйлаган бутун гаплар ва унинг ҳозирги, ҳарқалай дўстона, хайриҳоҳона айтган насиҳатларига ҳам қарамай, Роберта билан танишлигимни эътироф этсам, ўзимни ўзим йўқ қиласман, деган ишончи Клайдни ҳамон тинч қўймас эди. Хўш, бу машъум эътирофга анавилар – лагердагилар қандай қарапади! Қарабсизки, Сондра ҳамда ширин айш-ишратли турмуши хусусидаги бутун орзу-

умидлари чиппакка чиқади. Шунинг учун у бошига қилич келган тақдирда ҳам оғзини очмаслиги керак. Мейсон бутунлай ўзини йўқотди-ю, бақириб берди:

– Ҳа, жуда яхши! Демак, оғзингизга сўк согланча туравермоқчисиз? Шундайми, гапиринг?

Клайд тарвузи қўлтиғидан тушган қўйи ҳолсизланиб жавоб қилди:

– Робертанинг ўлимига зифирдай ҳам алоқам йўқ менинг. Айтадиганим фақат шу, бошқа гапим йўқ.

У шундай дея туриб, шу дақиқанинг ўзидаёқ: ҳарқалай, бундай жавоб қилмаслигим керак эди... яхшиси, бошқача жавоб қилганим тузук эди... бироқ қандай жавоб, деб ўйлай бошлади. Робертани чиндан ҳам билиши, ҳатто у билан кўлга бирга боргани... лекин уни ўлдириш эса етти ухлаб тушига ҳам кирмагани... у шунчаки бахтсиз ҳодиса юз бериб, ўзи чўкиб кетганини айтиши керак эди. Мабодо у Робертани урган тақдирауда ҳам фақат бахтсиз бир фавқулод орқасида урган бўлиши мумкин... Аммо, яхшиси, уни урганини мутлақо айтмагани тузук эмасми? У Робертани фотография аппарати билан бехосдан тушириб қолганига ҳозирги аҳволда бирор-бир кишининг ишониши ҳам қийин-ку, ахир. Энг яхшиси, аппарат тўғрисида оғиз очмагани маъқул, бунинг устига унда аппарат бўлганлигини шу пайтгача биронта газета ҳам эслатиб ўтмади-ку.

У шуларни ўйлаб турган пайтида, Мейсон хитоб қилди:

– Хўш, мисс Олденни билишингизни тан оласизми?

– Йўқ, сэр.

– Ҳа, жуда соз. – Мейсон ҳамроҳларига юzlаниб қўшимча қилди:

– Аҳвол шундай экан, энди уни фақат лагерга қайтариб олиб бориб, дўстларидан сўраб-су-

риштиришимиздан бошқа иложимиз йўқ. Эҳтимол, бу бойваччани ҳамтвоқлари билан юзлаштирсак, яна бирор-бир чигални ечиб олармиз. Унинг лаш-лушлари ва жомадони, ҳойнаҳой, биронта чодирда турган бўлса керак ҳозирча. Қани, йигитлар, буни ўша ерга олиб борайлик, бу ҳақда бошқалар нима деркин, бир кўрайлик.

Мейсон лагерга бормоқчи бўлиб, тез ва соvuққонлик билан изига қайрилган эди, ўзи дуч келиши мумкин бўлган воқеадан даҳшатга тушган Клайд жунжикканча:

– Йўқ, илтимос, ундай қилманг! – деди изтиробга тушиб. – Наҳотки, сиз мени ўша ёққа олиб борсангиз? Йўқ, йўқ, илтимос, ундай қилманг!

Бу орада гапга Краут ҳам аралашди.

– Биз у билан бу ёққа келаётганимизда, уни лагерга олиб бормаслигингизни гаплашишимни мендан илтимос қилган эди, – деди у Мейсонга қараб.

– Ия, ҳа, шамол бу ёқдан эсяпти денг! – Мейсон хитоб қилди. – Сиз сиркаси сув кўтармас ҳозирги кўринишингиз билан Ўн иккинчи кўлдан келган анави қиз ва йигитчалар олдига борсангиз, мутлақо ноўрин иш бўлади, аммо сиз ўз қўл остингиздаги бечора бир фабрика қизини танимайман, деб тихирлик қилмоқчисиз, шундайми? Жуда соз! Э, йўқ, оғайним, чучварани хом санаманг, ё сиз ўзингизга маълум ҳамма нарсаларни ошкора айтиб берасиз ёки лагерга олиб бораман. – У ўз гапи Клайдга қандай таъсир этганини билмоқ мақсадида бир дақиқа кутиб турди. – Биз барча таниш-билишларингизни тўплаб, нима гаплигини тушунтириб берамиз. Ўшанда кўрамиз, ҳаммасидан қандай қутулиб чиқаркинсиз. – Кейин Клайд иккилангаётганини сезиб, давом эди: – Йигитлар, олиб боринглар уни!

У қайрилиб, лагерга қараб беш-олти қадам юрди; Краут балан Суэнк ҳам Клайдни икки то-

мондан қўлидан ушлаб, Мейсоннинг изидан йўлга тушмоқчи бўлишганда Клайд қичқириб юборди:

– Йўқ, йўқ, ундан қимманглар! Мистер Мейсон, сиздан ўтинаман, мени у ёқса олиб борманг! Илтимос қиласман! Мен у ерга қайтиб боролмайман! Айбор бўлганим учун эмас. Бор буюмларимни у жойдан менсиз ҳам олиб келса бўлади-ку... у ерга қайтиб боришим мен учун энди ниҳоятда оғир.

Рангиз юзи ва қўлларидан дона-дона тер чиқиб кетди ва аъзойи баданини бутунлай муз қоплади. Мейсон Клайднинг гапини эшитиб тўхтади ва:

– Э, ҳа, боришини истамайсизми? – дея хитоб қилди. – Агар орадаги гапларни дўстларингиз билib қолиша, обрўйингиз тўкилади-да, шундай эмасми? Майли, унда ҳозироқ марҳамат қилиб саволларимга жавоб қайтаринг, тез ва очиқчасига жавоб қайтаринг, акс ҳолда вақтни ўтказмай лагерга борамиз. Хўш, қалай, жавоб қайтарасизми?

Мейсон довдираб, лаблари титраб, кўзлари ола-кула бўлиб кетган Клайднинг устига яна бостириб келди. Шунда Клайд асабийлашиб, ҳаяжонга тушиб гапира кетди:

– Ҳа, албатта, мен уни билардим. Билардим, албатта. Сўзсиз! Билишим хатлардан ҳам маълум. Хўш, нима бўпти? Мен уни ўлдирганим йўқ. У билан ўша ёқса отланган пайтимда ҳам уни ўлдирмоқни мутлақо ният қилган эмасман. Мен буни мутлақо истамаганман. Эшиятисизми, истамаганман! Бу бир баҳтсиз ҳодисадай бўлди ўзи. Мен ҳатто у билан бирон ёқса боришини ҳам истамагандим. Буни Роберта илтимос қилган эди... уни қаёққадир олиб кетиб... чунки... чунки... буни ўзингиз ҳам биласиз, хатлардан ўқигансиз. Мен фақат уни бирон ёқса якка ўзи кетиб, мени тинч қўйишига кўндиримоқчи бўлган эдим, чунки мен унга уйланишни хоҳламас эдим. Бор гап шу. Ўша ёқса мен уни ўлдириш учун эмас, асло, кўндиришга уриниб кўрмоқчи бў-

либ олиб борган эдим, бор гап шу. Қайиқни ҳам мен ағдариб юборганим ийк, ҳарқалай, шундай бўлишини истамагандим... Шамол шляпамни учирив кетган эди, уни ушламоқчи бўлиб иккаламиз бирдан ўрнимиздан турдигу қайиқ ағдарилиб кетди, бор гап шу. Кейин қайиқнинг қирраси бошига тегди. Мен буни кўрдим, аммо у сувда жонҳолатда талвасага тушганидан қўрқиб кетдим... агар яқинига сузиб борсам, мени ҳам чўқтириб юборади, деб қўрқдим. Кейин у чўкиб кетди. Мен бўлсам қирғоқча сузиб чиқдим. Худо ҳақи, бор гап шу!

У гапиради-ю, аммо юзи, ҳатто қўлларигача қизариб кетган эди. Унинг азобдан киртайган, даҳшатдан чақчайган кўзларини эса бутунлай умидсизлик белгилари қоплаб олган эди. «Борди-ю, ўша куни мутлақо шамол эсмаган бўлса-я, шуни эслаб қолишса-чи?» – деб ўйлади у. Қулаб ётган дараҳт остига беркитилган фотоаппарат оёқчаси-чи? Агар уни топиб олишган бўлса, айни шу нарса билан Робертани урган, деб ўйлашлари мумкин. У терга ботиб, бутун вужуди титрамоқда эди.

Бу орада Мейсон унга яна бошқа савол берди:

– Хўш. Бир оз гапингизни бўламан. Сиз уни ўша ёқقا ҳеч қандай ёмон ниятсиз олиб боргандман деяпсиз, шундайми?

– Ҳа, сэр.

– Яхши, унда сиз нега Катта мушгир кўлида бошқа фамилияда, Ўтлоқзорда эса яна бошқа фамилияда ёзилгансиз?

– Шунчаки, ўша ерда у билан бирга бўлганимни биронтаси билиб ўтирмасин, деб шундай қилган эдим.

– Ҳа, тушунарли! Оғироёқ бўлгани учун ўзингизга ортиқча favro орттиришни истамагансиз?

– Ийк, сэр. Э, кечирасиз, тўғри, сэр.

– Кейинроқ уни топиб олишса, қиз боланинг шаънига катта доф тушишини ўйламадингизми?

— Ахир, мен унинг чўкиб кетишини хаёлимга ҳам келтирмаганман, — деди Клайд устамонлик билан, вақтида чап беришга уриниб.

— Лекин сиз меҳмонхонага қайтиб бормаслигингизни сўзсиз билгансиз?.. Буни аниқ билгансиз, шундайми?

— Ие, бу нима деганингиз, сэр, йўқ ердаги гапларни гапирасиз-а! Қайтиб бораман, деб ўйлаганман.

Мейсон: «Қойил, қойил!» — деб хаёлидан ўтказди-ю, бироқ буни ичида айтди, кейин шоша-пиша давом этди:

— Ҳойнаҳой, сиз қайтиб бормаслигингиз учун қулай ва осон бўлсин деб жомадонингизни ўзингиз билан олиб, мисс Олденникини эса бекатда қолдирив кетгансиз, шундайми? Бу одобсизлик эмасми? Қани, бунга нима дейсиз?

— Мен жомадонимни шундан-шунақасига тўғри жўнаб қолиш мақсадида олиб юрганман. Биз унга нонушталикни солмоқчи бўлган эдик.

— «Биз» деганингиз ким ёки ўзингизми?

— Биз иккаламиз.

— Демак, зифирдаккина нонушта тамаддини деб мана шундай катта жомадонни қўтариб юришингиз лозим эди, шундайми? Наҳотки, сиз уни қофозга ўраб ёки мисс Олденнинг сумкасига солиб олишингиз мумкин бўлмаса?

— Биласизми, унинг сумкаси лиқ тўла эди, кейин мен тугунчак қўтариб юришни ёқтирамайман.

— Ҳа, тушунарли. Сиз ҳаддан ташқари мағрур, ноziktaъб одамсиз, тўғрими? Аммо-лекин мана шу фуруингиз қоп-қора тунда, орада ўн икки милча йўл босиб, зил-замбидай жомадонни Учинчи миль Кўрфазигача қўтариб боришингизга халақит бермабди-ку, биронтаси кўриб қолишидан ҳам кўрқмабсиз?

— Бу оддий нарса, у чўкиб кетгандан сўнг, бирга бўлганимни ҳеч ким билмай қўя қолсин дедиму, қочишидан бошқа илож тополмадим...

У индамай қолди, Мейсон бўлса унга тикилганча, яна ўзининг қанчадан-қанча саволлар бериш истаги борлигини... яна кўплаб, жуда кўплаб саволларига – ишончи комил – Клайд аниқ жавоб қайтаролмаслигини ўйлар эди. Бироқ кеч кириб бораётган эди, Клайднинг буюмлари эса ҳалигача лагерда турибди, жомадони ва эҳтимол, Катта мушгир кўлидалиги пайтида кийган, одамлар айтган ўша кулранг костюми ҳам ўша ердадир, ҳозир эса у бошқа костюмда юрибди. Агар сўроқни давом эттирса, тағин қўп нарсаларни билиб олиши аниқ, аммо қоронғи тушиб келаётган бир пайтда шу ерда шундай қилиши шартми? Ҳали қайтиб боргунча орада қанча йўл бор, шунда хоҳлаганча савол-жавоб қилиб олса ҳам бўлади.

Шу сабабдан, айни ҳозир Мейсон суҳбатни бўлишга унчалик рўйхушлик билдирамса-да, сўзини якунлаб шундай деди:

– Гап бундай, Грифитс, майли, бир оз нафасингизни ростлаб олинг. Эҳтимол, ҳаммаси сиз айтганчадир, билмадим. Сизга ачинганим шунчаликки, гапларингизнинг бари тўғри чиқишига чин юракдан тилақдошман. Қандай бўлишидан қатъи назар, бари бир ҳозир сиз мистер Краут билан бирга кетасиз, қаерга боришингизни у айтади.

Кейин у Суэнк билан Краутга ўгирилди:

– Хулласи калом, оғайнилар, энди биз мана бундай қиласиз. Кеч кириб қоляпти, мабодо шу бугун бирор-бир бошпанада ётишдан умидимиз бўлса, шошилишимиз керак. Мистер Краут, сиз бу йигитчани анави иккита қайиқ турган жойга олиб борасиз-да, кутасиз. Йўл-йўлакай шериф билдирасиз. Биз бўлсан, ишимиз битган ҳамоно Суэнк билан икковлашиб сизларнинг олдингизга бошқа қайиқда етиб борамиз.

Қош қорая бошлаган пайтда Мейсон билан Суэнк лагерь томонга, Краут ва Клайд эса гарбга қараб йўл олишди; Краут то шериф билан унинг ёрдамчиси жавоб қайтаргунча уларга садо бериб, астойдил ҳой-ҳойлаб борди.

## **Х БОБ**

Мейсон иккинчи марта лагерга келиб, аввал Фрэнк Гарриэтга, кейин Харлей Бэгот билан Грэнт Крэнстонга Клайднинг қамоққа олингани ва гарчи у Робертани ўлдирмаганман, деса ҳам, аммо ўзи Катта мушгири қўлида Роберта билан бирга бўлганини тан олганини маълум қилди; Мейсон Суэнк иккалови Клайдга қарашли буюмларнинг барини олиб кетажакларини ҳам қўшиб қўйди.

Бу хабар мароқди саёҳатнинг бутун ҳузур-ҳаловатини бир зумда йўққа чиқариб юборди. Тўғри, у ҳаммани таажжубга ҳам солди, шубҳа туғдириб, бир оз ҳовлиқтириб ҳам қўйди, лекин уларнинг қаршисида нақ Мейсоннинг ўзи турарди, у Клайднинг буюмлари қаердалигини қўрсатишни талаб қилиб, фақат Клайд ялингани учунгина унга илтифот билдириб, уни бу ерга олиб келмадик, акс ҳолда буюмларини ўзи топиб берарди, деб уқтираср эди.

Улфатлар ичида иш билармонроғи ҳисобланган Фрэнк Гарриэт Мейсоннинг сўзларидағи чин ҳақиқатни биринчи бўлиб тушуниб етди-ю, ўша заҳотиёқ уни Клайднинг чодирига бошлаб борди, Мейсон эса Клайднинг жомадони ва кийимларини текшириб қўра бошлади, бу орада Грэнт Крэнстон билан Бэгот Сондранинг хушторлигидан хабардор бўлганликлари учун аввалига Стюартни, кейин Бертина ва охири Сондрани чақиришди-да, юз берган воқеани одамлардан холи жойда айтиш учун уни четроққа олиб ўтишди. Сондра ўзи эшит-

ган гапларининг мағзига тушунар-тушунмас ранги қув ўчди-ю, ҳушидан кетиб, Грэнтнинг қўлига шилқ этиб тушди. Уни чодирга олиб киришди-да, ўзига келтиришди, Сондра бўлса, дод-войга ўтди:

– Битта ҳам сўзига ишонмайман! Бу бўҳтон! Бундай бўлиши мумкин эмас! Оҳ, баҳти қаро болагина-я! Клайд! Клайд! Қани сен? Уни қаёққа олиб кетишди?

Сал нарсага ловилламайдиган, анча-мунча пиҳи қайрилиб қолган Стюарт билан Грэнт Сондрага эҳтиёт бўлишни, тишни-тишга қўйиб индамай туришни маслаҳат беришди. Эҳтимол, ҳаммаси ростдир. Хўш, унда нима бўлади? Унда ҳамманинг қулогига бориб етади. Агар бўҳтон бўлса, Клайд тезда ўзининг бегуноҳдигини исбот этади-ю, уни қўйиб юборишади, шундаймасми, ахир? Хуллас, ҳар қанча бўлганда ҳам шов-шув кўтармаслик керак.

Шу пайт Сондранинг ўзи ҳам ўйланиб қолди: борди-ю, ҳаммаси рост чиқиб... Катта мушгирдаги ўша қизни Клайд ўлдирган бўлса-я... уни ҳибсга тушириб, олиб кетишибди... энди барча одамлар – йўқ деганда шу дўст-ёронларининг бари у билан қандай дон олишиб юрганини билишади... шу гапларнинг ҳаммаси ота-онасининг қулогига ҳам етиб бориши, балки бутун халойиққа ёйилиб кетиши ҳам мумкин...

Э, йўқ, Клайднинг фариштадек поклигига шак келтириб бўлмайди! Бу гапларнинг бари фирт янгиш, холос. Кейин бирдан Сондра ўша чўкиб кетган қиз ҳақидаги хабарни биринчи бор Гарриэтларнида телефон орқали эшитганини эслаб қолди, сўнгра Клайднинг ранги қув ўчиб кетганини ҳам эслади... у бетоб эди ўшанда... ҳушини йўқотишига сал қолган эди... Йўқ, йўқ! Бундай бўлиши мумкин эмас! Лекин у Ликургдан негадир кечикиб, фақат жума куни келган эди. У ердан Сондрага хат ҳам ёзмаган эди... Юз берган воқеанинг бутун даҳшатини яна бир бор ҳис этган Сондра бехосдан тагин ҳушини йўқотди. У чодирда жонсиз одамдай

ранги қув ўчиб, ҳаракатсиз ётар эди, бу орада Грэнт ва бошқа улфатлар ўзаро кенгашиб, энг тўғриси, ҳозирнинг ўзидаёқ ёки жуда бўлмагандага эртага азонда лагерни йифиштириб, изимизга – Шейронга қараб жўнаганимиз маъқул, деган қарорга келишди.

Бир оз вақтдан сўнг Сондра ўзига келди ва кўз ўшлари шашқатор бўлганча, бу ердан ҳозироқ кетажаги, бу мудҳиш жойда энди ортиқча туролмаслиги, Бертина ва бошқалардан ҳушини йўқотгани ва йифлаганини ҳеч кимга айтмасликларини, уни ёлғиз қолдирмасликларини ялиниб-ёлвориб сўради, негаки, бу ортиқча гап-сўзларга сабаб бўлиши мумкин эди. Кейин у – бу гапларнинг бари рост чиқса – унда Клайдга ёзган хатларимни қандай йўл билан қайтариб олсан экан, деб узлуксиз бош қотира бошлади. Э, худо-ей, қанчалик даҳшат-а! Борди-ю, энди хатлари полициянинг қўлига тушиб қолса ёки уларни газеталарда эълон қилиб юборишса, унда нима бўлади! Ҳарқалай, Сондра Клайдни севар эди, шу сабабли ҳаётида биринчи марта шафқатсиз, аччиқ ҳаёт ҳақиқати унинг қувноқ, ҳавойи, тор дунёсини бузди, унга аёвсиз зарба берди.

Шундай қилиб, Сондра Стюарт, Бертина ва Грэнт билан биргаликда кўлнинг шарқий қирғоидаги «Дурагай» меҳмонхонасига жўнайди, деган шошилинч қарорга келишди, у ердан улар, Бэготнинг айтишича, айланада йўл билан Шейронга етиб боришлиари мумкин экан.

Бу орада Мейсон Клайднинг бутун лаш-лушларини ўзи билан бирга олиб, шоша-пиша гарбга – Балиқчилар қўлтифи ва Учинчи миль Кўрфазига қараб жўнади; йўлда учраган бир фермада биринчи тунни ўтказиш учунгина у орада фақат бир марта тўхтади ва мўлжалланган жойга сесланба куни кечқурун анча кеч етиб келди. Аввалдан ўйлаб қўйганидек, йўлда кета туриб Клайдни сўроқ қилишда да-

вом этди, асосан у гувоҳларнинг гапига қарагандা, Клайд Катта мушгир қўлига борганда кийиб юрган анави кулранг костюмнинг лагердаги буюмлари ичida нима учун йўқлигини сўраб-суриштирди.

Клайд оёғи остидан чиққан яна бир чалкашликдан хавотирга тушганча, эгнида кулранг костюм бўлганини инкор этиб, ўшанда ҳам устимда мана шу ҳозирги костюмим эди, деб туриб олди.

– Ахир, у жиққа ҳўл бўлиб кетмаганмиди?

– Ҳа.

– Кейин сизга уни қаерда дарров тозалаб, дазмоллаб бериша қолди?

– Шейронда.

– Шейронда?

– Ҳа, сэр.

– Ўша ердаги бичиқчи тозалаб бердими?

– Ҳа, сэр.

– Қайси бичиқчи?

Афсуски, Клайд уни эслаёлмай қолди.

– Демак, Катта мушгирдан то Шейронгача сиз ҳўл, фижим костюмда келибсиз-да, а?

– Ҳа, сэр.

– Сўзсиз, буни ҳеч ким кўрмагандир?

– Агар янгишмасам, ҳеч ким кўрмади.

– Ўҳӯ, янгишмасам денг-а! Ҳа, майли, ҳали ҳаммасини текшириб кўрамиз.

Мейсон ўзича Робертани сўзсиз Клайд ўлдирган – бунинг устига қасдан ўлдирган, деган фикрга келди, шу сабабли охири бориб костюмини қаерга беркитганини ёки кимга тозалашга берганини ҳам айтишга мажбур қиласиз, деб ўйлади.

Бундан ташқари, кўлдан топиб олинган похол шляпа ҳам бор. Хўш, у ҳақда нима дея олади? Шляпамни шамол учириб кетди деб-ку, Клайд ўзини ўзи тутиб берди, гарчи у сувдан топилган шляпани киймаган бўлганда ҳам, лекин бари бир

күлгә шляпада борганини тан олиб қўйди. Мана энди Мейсон зўр бериб гувоҳлар борида ўша то-пилган шляпа Клайдга тегишилигини ва у кейин-роқ кийиб юрган иккинчи шляпа ҳам мавжудли-гини аниқлаб олишга уриняпти,

– Сиз шляпамни шамол учирив кетди, деган эдингиз. Хўш, унда у сувда қолганмиди? Уни ола-ман деб уриниб кўрмаганмидингиз?

– Йўқ, сэр.

– Ҳойнаҳой, ҳаяжонга тушганингиздан бу ҳақда ўйламаган бўлсангиз керак?

– Ҳа, сэр.

– Бироқ сиз ўрмонда келаётган пайтингизда бошингизда бошқа шляпа бор эди. Уни қаердан олган эдингиз?

Икки ўт орасида қолган Клайд қўлга тушаётга-нини сезиб, бир дақиқа гунг бўлиб турди, ҳозир бошидагиси – ўша ўрмонда келаётганида кийган иккинчи шляпаси эканлигини, сувда қолган би-ринчи шляпасини эса Утикадан сотиб олганини билиб қолишимасмикан, дея даҳшатга тушиб хаво-тирлана бошлади. Кейин у алдамоқчи бўлди:

– Кечирасиз, бошқа похол шляпам йўқ эди.

Мейсон Клайднинг бу гапига эътибор бермай, қўлини чўзиб, унинг бошидаги похол шляпасини олди ва астаридаги фабрика белгисини кўра бошлади – «Старк ва К°, Ликург».

– Демак, бу шляпангизнинг астари бор экан. Ликургдан сотиб олганмисиз?

– Ҳа, сэр.

– Қачон?

– Анча бўлган, июнда.

– Тунда, ўрмондан ўтиб келаётган пайтингизда кийган шляпангиз шу эмасми, мабодо, аниқ биласизми?

– Бу эмас, сэр.

– Унда ўша шляпангиз қаерда?

Клайд қопқонга тушганини сезиб, яна жим бўлиб қолди. «Э, худо-е, энди қандай тушунтирсам экан? – дея ўйлай бошлади у. – Нима учун кўлдаги шляпани меники деб бўйнимга олдим-а?» Аммо ўша заҳотиёқ: бўйнига олса-олмаса, ўшанда бошида похол шляпаси борлигини эслайдиган одамлар Ўтлоқзор кўлидан ҳам, Катта мушгиридан ҳам, сўзсиз, топилишини англади.

– Ўша шляпангиз қаерда эди? – деб яна суриштириди Мейсон.

Охири Клайд:

– Аввалги гал чорбоқقا шу шляпамда келган эдим, – деди, – ёдимдан чиқариб шу ерда қолдирив кетибман. Бу гал, мана, топиб олдим.

– Э-ҳа, тушунарли! Очигини айтсам, омадингиз бор экан!

Мейсон ўзича анча-мунча қув, уddабуро одамга дуч келганга ўхшайман, деб ўйлай бошлади... шу боисдан яна ҳам нозикроқ тузоқ қўйишга тўғри келади! Айни пайтда у Крэнстонлар ва Айиқ кўлига саёҳатга чиққан бошқа улфатларлар ҳам: жума куни Клайд уларнига келганда бошида похол шляпаси бормиди, олдинги келганида мабодо шляпасини қолдирив кетмаганмиди, шуни ҳеч ким эслаёлмайдими, деб сўрашни ҳам кўнглига туғиб қўйди. Клайднинг алдаётгани аниқ эди, шунинг учун уни қўлга тушириш керак эди.

Шу сабабдан то Брижбургга, кейин маҳаллий округ турмасига боргунга қадар Клайдда бир дақиқа ҳам тинчлик бўлмади. У жавоб беришдан ҳар қанча бўйин товласа ҳам, Мейсон унга қайта-қайта қуидагича саволларни ёғдирап эди: «Боринг, ана сиз чиндан ҳам қирғоқقا чиқиб, фақат овқатланмоқчи бўлган экансиз, унда нега шунчалик олисга – кўлнинг жанубий бурчигача сузиб бордингиз, у кўрфазнинг бошқа ерлардан мундоқ устунроқ жойи ҳам йўқ-ку?» ёки: «Ўша куни қол-

ган вақтингизни қаерда ўтказдингиз? Ҳарқалай, фожиа юз берган ерда ўтирганадирсиз, албатта?» Кейин у бирдан гапни жомадондан чиққан Сондранинг хатларига буриб юборди, Клайд у билан анчадан бери танишми? Сиртдан қараганда, Сондра уни қаттиқ севадиганга ўхшайди, Клайд ҳам шундайми? Нега у мисс Олденни ўлдириш ниятига тушди, Сондра унга кузда тегмоқчи бўлгани учун эмасми, ишқилиб?

Клайд охириги айбномага чидаб туролмай қизишиб рад этди, қолган вақтда эса, киртайган, нурсиз қўзларини умидсизлик билан олдинга тикканча деярли миқ этмай ўтираверган эди.

Кейин кўлнинг ғарбий томонидаги аллақайси бир ферма чордогида шундокқина полга солинган похол тўшакларда ётиб, амал-тақал қилиб, ит азобида тонг оттиришди; Сиссел, Суэнк ва Краутлар галма-гал қўлларида тўппонча ушлаб уни қўриқдаб чиқишидди. Мейсон, шериф ва бошқалар эса пастда, биринчи қаватда ухлашди, Дарвоҷе, ҳар хил миш-мишлар тарқаб улгургани учун ерли кишилардан бир тўдаси аzonданоқ тўпланиб: «Катта мушгирдаги анави қизни ўлдирган йигитча шу ерда сизлар билан эмиш, тўғрими?» – деб сўроқقا тута бошлашди. Кейин уни қўриш учун то кун ёйилгунча, яъни маҳбус ва унинг ҳамроҳлари Мейсон топган автомашиналарда жўнаб кетмагунларича шу ерда кутиб туришди.

Балиқчилар қўлтиғи билан Учинчи миль Кўрфазида ҳам тўп-тўп ҳалойиқ – фермерлар, чорбоғларда истиҳомат қилувчилар, дўкондорлар, ўрмон кесувчилар, болалар йиғилиб улгуришган эди: афтидан, аввалдан қўнғироқ қилиб, жиноятчини олиб, келаётгандарини хабарлаб қўйишганга ўхшар эди. Бэрлэй, Хейт ва Ньюкомлар ҳам Учинчи миль Кўрфазида кутиб туришган экан; улар телефон орқали огоҳлантирилган эдилар, шу сабабли Клайднинг

кимлигини узил-кесил аниқлаш мақсадида Катта мушгиридан чақырилган барча гувоҳларни озғин, серзарда ва этчили судья Габриэл Грэг ўтирган камерага таклиф этишди. Қарабисизки, Мейсон маҳаллий судья қаршисида туриб, Клайдни Робертанинг қотили сифатида айблаб, бутун тартиб-қоидага биноан: у шубҳа остига олинган шахс сифатида Брижбург округ турмасига қамалсин, деган қонуний қарор чиқартириб олди. Кейин у Бэртон ва шериф билан биргаликда Клайдни Брижбургга олиб борди-да, ўша заҳотиёқ уни қамаб, устидан қулф солишиди.

Клайд камерага кириб, ўзини темир каравотга отди-ю, нажотсиз бир ҳолатда талвасага тушиб бошини ушлади. Кундузги соат учлар эди-ю, лекин улар турмага етиб келишганда бу ерда кам деганда беш юзга яқин одам тўпланган бўлиб, улар шовқин-сурон кўтарганча газабланиб, дағдага солиб туришарди. Аллақачоноқ миш-мишлар тарқалиб кетган эди, гўё Клайд бадавлат қизга уйланман деб, ёшгина, гўзал бир хизматчи қизнинг умрига завол етказиб, ваҳшиёна тарзда ўлдирган эмиш, қиз бечоранинг айби эса – фақат уни жон-дилидан севгани экан. Дўқ-пўписа, дағал қичқириқлар ҳам эшитила бошлади:

– Ўша ифлос, пасткаш кимса мана шу экан! Ҳали шошмай тур, иблис, сиртмоқда осилиб ўласан! – Бу Суэнкка ўхшаш раҳмсиз, дийдаси қаттиқ ёш ўрмончи бир йигитнинг дарғазаб қичқириғи эди.

Устига-устак, халойиқ орасидан кўринишига қараганда шаҳар харобаларида яшовчи, чит кўйлакли, ликиллаган бир қизча отилиб чиқди-да:

– Сенмидинг ўша заҳар илон? – деб шанғиллади. – Қотил! Қочиб кетмоқчи бўлгандингми, тузоқقا илинибсан-ку?

Клайд шериф Слэкнинг пинжига тиқилганча ўйлай бошлади. «Булар мени чиндан ҳам Робер-

тани ўлдирган дейишипти, шекилли? Ҳатто мени тошбўрон қилиб юборишлари ҳам мумкин!» Клайд қайтага ҳолдан тойиб, кути ўчиб, сўкиш-ҳақоратлар остида ит азобда қолгани учун турманинг темир дарвозалари очилиб, ичкарига кираётганида чинакамига енгил тортди-ю, бир хўрсинди, чунки бу дарвозалар ортида у ҳарқалай тинч эди.

Аммо у камерага киргач, бир дақиқа ҳам мижжа қоқмай, умрбод айрилган юпанчлари ҳақида ўйлаб, бутун тун бўйи ўз фикрларидан азобланиб чиқди. Сондра! Грифитслар! Бертина! Ликургдаги бошқа таниш-билишлар, улар эрталабданоқ энди ҳаммасини эшитишади. Ие, бу ёқда онаси ва қариндош-уруғлари-чи... Сондра ҳозир қаерларда юрганин? Мейсон унинг буюмларини олмоқчи бўлиб лагерга қайтиб борганда, ҳойнаҳой, Сондрага ва бошқа улфатларига ҳам бор гапни оқизмай-томизмай етказган бўлса керак, албатта. Энди унинг чиндан ҳам жиноятчи ва қотиллигини ҳамма билади! Бироқ бу ишларнинг бари қай тарзда юз берганини қани энди, қани энди биронтаси билса! Қани энди Сондра ёки онасими, ё бирор-бир бошқа кимсами, Клайднинг дилини тушунса!

Иш шунчаликка бориб етар экан, қайтага аввал бошдаёқ, анави Мейсонга воқеа қандай юз берганини ипидан игнасигача айтиб бергани маъқулмиди, эҳтимол. Ие, унда ўзининг шум нияти-ю, дастлаб ўйлаган мақсади, фотография аппарати, Робертага ёрдам бериш ўрнига ундан нари қочгани – шуларнинг барини очиқдан-очиқ гапириб бериши керак эди-да. Кейин бехосдан уриб юборгани (ахир, ким ишонади унга?), иши битгач, аппарат оёқчаларини яшириб қўйганини ҳам айтишиб зарур эди. Бунинг устига, мабодо шу гаплар ошкор бўлганда – унда Клайд Сондра учун ҳам, Грифитслар учун ҳам, умуман, ҳамма учун ҳам ўлган одам ҳисобланар эди. Бари бир уни қотил-

ликда айблаб, ўлдириб юборишлари аниқça ўхшайди. Э, худо-е, қотиллик-а! Уни Робертани ўлдирган ёвуз кимса сифатида суд қилишади ва бу даҳшатли жиноят унинг бўйнига қўйилади. Ана шунда уни, сўзсиз, ўлдиришади, электр курсига ўтқазишади! У мана шу шубҳа (ўлим... қотиллик учун ўлим ҳукми!) ваҳимасида ҳадсиз эзилганидан каравотида қаққайғанча қотди-қолди. Ўлим! Э, худо! Қани энди у Робертадан ва онасидан келган хатларни миссис Пейтонникидаги хонасида қолдирмагандა эди! Бу ёқقا жўнашдан олдин сандиқчасини бошқа бирор-бир хонага олиб чиқиб қўйганда эдими, нима учун аввал ўйламади буни? Лекин шу пайтнинг ўзидаёқ миясига: ўшанда ҳам хато бўлар эди, чунки шубҳа туғдирар эди, деган фикр келди, Аммо унинг қаерданлиги-ю, исми шарифи нималигини қандай қилиб билишди экан-а? Беихтиёр у яна сандиққа солиб қўйилган хатларни ўйлади. У онаси ёзган мактубларининг бирида Канзас-Ситидаги анави воқеани эслатиб ўтганини эндигина хотирлади, демак, ўша воқеани Мейсон ҳам билиши керак. Нима учун Робертадан олган, онасидан олган, умуман ҳамма хатларини, нима учун йўқ қилиб ташламади-а?! Нима учун? Нима учунлигига ҳозир ўзи жавоб беролмас эди, ҳарқалай, дуч келган майда-чуйдани ҳам, ҳар бир кўрсатилган илтифоту, яхшилик ва меҳрибонлик белгисини ҳам асраб қўяверишдек бемаъни одати борлиги учун шундай қилган бўлса керак... Агар у иккинчи похол шляпани киймагандা... анави учвишини ўрмонда учратмагандা-ю, олам гулистон эди! Э, парвардигор! Ҳар қанча бўлганда ҳам у бир амаллаб изига тушишлари мумкинлигини аввалдан билиши лозим эди. Агар жомадони ва Сондранинг хатларини олиб, Айиқ қўлидаги лагердан чиқиб, тўппа-тўғри ўзини ўрмонга урганда, созишиш бўларди! Ким билади, шунда у Бостондами ёки

Нью-Йоркдами ёки яна бошқа бирор-бир жойда-ми яшириниб кетарди, эҳтимол.

Азобда қолганидан у ҳолдан тойиб ухломади ва тўхтовсиз у ёқдан-бу ёқقا юриб ёки ўзига эриш ту-юлган тошдай қаттиқ каравотнинг четига омонатгина ўтириб, нуқул ўйлагани ўйлаган эди... Тонг от-ганда эса эскириб кетган қопсимон ҳаво ранг форма кийган, бод касалидан эзилган, озғин, кекса турма хизматчиси қора темир патнисда унга бир кружка қаҳва, бир бурда нон ва бир парча тухум солиб қову-рилган чўчқа гўшти олиб келди. Чол патнисни темир панжарали туйнукдан ичкарига узатар экан, Клайд-га синчковлик билан, лекин айни пайтда аллақандай бепарвогина бир назар ташлаб қўйди. Аммо Клайд-нинг кўнглига ҳозир овқат сифмас эди.

Кейин бирин-кетин Краут, Сиссел ва Суэнк, охирида эса шерифнинг ўзи ҳам келиб, навбат-ма-навбат камерага мўралаб қарашибди-да: «Хўш, Грифитс, бугун қандай сезяпсиз ўзингизни?» ёки: «Хэлло, мабодо бирон нарса керак эмасми?» деб сўрашибди. Нигоҳларидан эса ҳайрат, жирканч, шубҳа ва даҳшат акс этиб турарди: негаки, Клайд, ахир – қотил-ку! Бироқ шунга қарамай, Клайднинг шу ерда ўтириши уларда аллақандай ўзгача туйфу, ҳатто хийлагина ифтихор ҳиссини ҳам уйғотмоқда эди. Чунки Грифитс, ҳарқалай, ҳазилакам одам эмас, жанубдаги шу катта шаҳарнинг машҳур дои-раларига мансуб йигит. Яна бунинг устига Клайд улар учун ҳам, фоят безовталангандек жамоатчилик учун ҳам худди қопқонга тушган бир йиртқич-дек гап, ўша йиртқич уларнинг тенгсиз санъатла-ри туфайли, мана, адолат тузофига илиниб ўтирибди, Клайд бамисоли уларнинг истеъдодига жонли бир тимсолдек ярашиб турибди! Газеталарда-ю, одамлар орасида-ю, бу нарса ҳали сўзсиз, оғиз-дан-оғизга ўтади, уларнинг номи тилларда достон бўлади! Клайднинг расми ёнида уларнинг расмла-

ри ҳам берилади, номлари эса Клайд билан бирга қайд этилади!

Клайд бўлса уларга темир панжара ортидан жавдираб қараганча ўзини илтифотли тутишга уринарди: чунки у энди ўшаларнинг қўлида эди, нимани хоҳлашса, шуни қилишлари мумкин эди.

## ХІ БОВ

Ўликни ёриб қўриш натижалари Мейсон учун ҳарқалай бир қадам орқага кетиш бўлди, чунки беш врач қўл қўйган ҳужжатда қўйидагилар ёзилган эди: «Оғзи ва бурнининг атрофи лат еган; бурнининг учи, афтидан, салгина эзилган, лаблари шишган, олдинги битта тиши хиёл ўрнидан қўзғалган; лабининг ички томонидаги шиллиқ пардада тимдаланганд жойлари бор», – аммо врачларнинг яқдиллик билан таъкидлашларича, буларнинг ҳаммаси ҳаёт учун унчалик хавф туғдирмайдиган жароҳатлар эди. Энг жиддий жароҳат бош суягida эди: афтидан марҳуманинг калласига «қандайдир тўмтоқ асбоб» билан қаттиқ урилган бўлса керак, агар буни тўнтарилиб кетган қайиқнинг зарбидан кўрилса (Клайд биринчи эътирофида худди шуни гапирган эди), унда «қандайдир тўмтоқ асбоб» деган ибора сира ўрнига тушмаган, «ёрилган ва ички қон кетиш рўй берган, бу – ўлимга олиб келган бўлиши мумкин» эди.

Лекин ўпкаси текшириб кўрилганда ичи тўла лиқ-лиқ сув эканлиги аниқланди ва бу, Роберта сувга қулаб тушган пайтида ҳали тирик бўлган, деган фикрни, ҳеч шубҳасиз, исботлаб берар эди, у Клайд айтганидек, тириклигида сувга ағанаб тушгану, кейин гарқ бўлиб ўлган эди. Бундан бошқа бирор-бир зўрлик ёки олишув аломатларини топиш жуда қийин эди, тўғри, қўли ва панжала-рининг ҳолатига қараб ҳукм чиқарилса, Робер-

танинг нимагадир интилгани, ниманидир ушлаб қолмоқчи бўлгани сезилиб турарди. Қайиқнинг четинимикин? Шундай бўлиши мумкинми ўзи? Балки Клайднинг айтганларида озми-кўпми жон бордир? Албатта, бу далилларнинг кўпи ҳозирча қисман унинг фойдасига қараб боряпти. Бироқ Мейсон ва бошқалар қатъий туриб: борди-ю, Клайд уни аввалига, сувга ташламасидан оддин ўлдирмаган тақдирда ҳам, ҳарқалай, уни ургани, сўнгра – балки у ҳушидан кетган бўлса – қайикдан итқитиб юборганини ҳозирги маълумотлар яққол кўрсатиб турибди, деб ҳисобламоқда эдилар.

Аммо уни нима билан урган? Қани энди Клайдни шуни айтишга мажбур эта олишса!

Бирдан Мейсоннинг миясига бир фикр келди: у Клайдни Катта мушгирга олиб боради! Қонун айбланувчиларни ҳар қандай зўрлашлардан ҳимоя қиласди-ю, лекин шунда ҳам у Клайдни бари бир ўша жиноят юз берган ерлардан қадам-бақадам яна қайтадан юриб ўтишга мажбур этади. Эҳтимол, ҳаммасини билиб ололмаслиги ҳам мумкин, лекин, ҳарқалай, Клайд тағин ўша жойга бориб, жиноят содир бўлган вазиятга тушгач, беихтиёр бирор-бир ҳаракати билан ақалли костюми ёки Робертани урган қурули қаердалигини сездириб қўйиши мумкин.

Шундай қилиб, учинчи куни Краут, Хейт, Мейсон, Бэртон Бэрлей, Эрл Ньюком, шериф Слэк ва унинг ёрдамчилари ҳамроҳлигига Катта мушгир кўлига йўл олишди-ю, ўша хосиятсиз кунда Клайд ўтган жойларнинг барини шошмасдан, синчиклаб текшира бошлишди. Краут эса Мейсоннинг топшириғига биноан Клайдга «илашиб», ўзини унга яқин қилиб кўрсатишга ва сирини билиб олишга уринарди. У далилларнинг етарли даражада ишончли эканини исботламоқчи бўлар эди: «уни ўлдирмадим, деганингиз билан суд маслаҳатчилари ишо-

нишармиди сизга, ҳечам ишонишмайди», лекин «Мейсонга очиғини айтадиган бұлсанғиз, у судья ёки губернатор билан гаплашиб күради. Сизга у бошқа ҳар қандай одамдан күра күпроқ яхшилик қилиши мүмкін, сизни қутқарыб ҳам қола олади – унда умрбод қамоқ жазосига ёки йигирма йилга кесилишингиз мүмкін... бироқ ҳозиргидек ҳамма нарсадан бўйин товлайверадиган бўлсанғиз, турган гап, электр курсидан қутулоғмайсиз».

Аммо Клайд Айиқ кўлида қандай кўрқса, ҳозир ҳам худди шундай ваҳимадалиги учун ҳамон чурқ этмас эди. Модомики, Робертани урмаган экан, нега энди урдим дейиши керак, бу ёғини суриштиrsa, ҳарқалай, у қасдан урмаган-ку? Бунинг устига, нима билан урганини ҳам айтиши лозим-ку? Ахир, шу пайтгача фотография аппарати ҳақида ҳеч ким гапирмади-ку?

Лекин Роберта чўкиб кетган жой билан Клайд қирғоқча чиққан жой ўртасидаги масофани округ танобчиси аниқ ўлчаб бўлган ҳам эдики, кутилмаганда Эрл Ньюком Мейсон ҳузурига келиб, муҳим бир янгилик борлигини хабарлади. Клайд тўхтаб, кийимини алмаштирган ердан сал нарироқда, қулавб ётган дараҳт гўласи остидан Клайд беркитган фотография аппаратининг оёқчалари топилибди, у бир оз занглаған ва намиққан бўлиб, Мейсон ва бошқалар: анчагина оғир экан, Клайд ҳойнаҳой Робертани шу нарса билан уриб ҳушидан кетказгану, кейин қайиқقا солиб, охири сувга ташлаб юборган, деб ўйлай бошлашди.

Бу топилмага кўзи тушиши билан Клайд баттар оқариб кетди, бироқ ўзида фотография аппарати ва унинг оёқчалари бўлганини қатъий инкор этди. Мейсон дарров барча гувоҳлардан: балки бирор-тандиз Клайдда аппарат ёки аппарат оёқчасини кўрганингиз бордир, эслай олмайсизларми, деб сўрамоқчи бўлди.

Ўша куннинг охирига борибоқ Клайд билан Робертани бекатдан олиб келган ҳайдовчи ҳам, Клайд ўз жомадонини қайиққа итқитиб юборганини кўрган қайиқчи ҳам, Роберта билая Клайднинг эрталаб темир йўл бекатига қараб жўнаётганларини ўз кўзи билан кўрган қизча – Ўтлоқзор кўли меҳмонхонасининг хизматчиси ҳам – ҳаммалари Клайднинг жомадонига боғлаб қўйилган «қандайдир сариқ таёқчалар»ни унтишмаган эди: бу, ҳойнаҳой, ўша аппарат оёқчалари бўлса керак.

Бэртон Бэрлей кейинроқ бориб, афтидан, аппарат оёқчалари билан эмас, балки анча-мунча оғирроқ бўлган аппаратнинг ўзи билан урилгандан сўнг юзида жароҳат қолган, деган қарорда тўхтади: қирраси бош суюгига, ясси томони эса юзига теккан бўлиши керак. Бу хуросадан сўнг Мейсон маҳаллий одамлардан беш-олтитасини чақириб, Клайддан мутлақо сир тутгани ҳолда, Роберта топилган ернинг атрофларини – кўлнинг тубини яна қидиртира бошлади. Қидирув ишлари кун бўйи давом этди, эвазига анчагина катта мукофот ваъда қилингани учун Жек Богарт деган киши қидира-қидира, охири қайиқ ағдарилиб қетганда Клайд тушириб юборган ўша аппаратни қўлида ушлаганча, сув остидан шўнғиб олиб чиқди. Бунинг устига аппаратдан бир ғалтак плёнка ҳам топиб олинди, уни расм қилиб чиқариш учун мутахассисга беришди-да, кейин билишса, у Робертанинг қирғоқда туриб олдирган бир неча сурати бўлиб чиқди: бир суратда Робертанинг ағанаб ётган дараҳт устида ўтиргани, бошқасида эса, соҳилда қайиқ ёнида тургани, яна бирида унинг дараҳт шохини ушламоқчи бўлаётгани акс эттирилган эди. Ҳамма расмлар хира, сувда. бузилганига қарамай, ҳарқалай, уларни ажратиш мумкин эди. Аппаратнинг энг энлик сирти билан Роберта юзидаги жароҳатнинг узунлиги ҳамда кенглиги

мутлақо бир хил чиққани сабабли, энди Клайд урган асбобнинг топилгани ҳам шубҳасиздай бўлиб туюла бошлади.

Аммо аппаратнинг ўзида ҳам, Брижбургга текшириш учун жўнатилган қайиқнинг четлари-ю тагларида ҳам, унга солиб қўйилган гиламчаларда ҳам қон излари сира учрамади.

Шунда Бэртон Бэрлей: агар ишончли далил керак бўлиб қолса, у, яъни Бэртон ёки бошқа бирон киши бемалол бармогини қирқиб, қайиқ ичидами ёки гиламчадами, ё фотография аппаратидами икки-уч томчи қон юқи қолдириши мумкинлигини ўйлай бошлади. Бэртон Бэрлей ҳам ўзига етгунча муғомбир йигит эди, бунақалар бу ўрмон хилватгоҳларида анча-мунча сероб эди. Ёки, айтайлик, Робертанинг бошидан икки-уч тола соч олиб, аппарат сиртига ёки марҳуманинг ўртиги илиниб қолган эшкак ҳалқасига ўраб қўйиш ҳам мумкин. Шундай қилиб, у бу ҳақда ўзича жиддий бош қотириб кўрди-да, ака-ука Луцларнинг ўликхонасига бориб, Робертанинг бошидан икки-уч тола сочини юлиб олишни мўлжаллаб қўйди. Ахир, Клайд тошмехрлик билан ўша қизни ўлдириб юборганига унинг ишончи комил. Наҳотки, энди арзимаган бир-иккита далил етишмайди деб, бу индамас, ўзига обдан бино қўйган, муттаҳам йигитга билганингни қиласавер, дегандай бутунлай йўл очиб берилса? Йўқ, ундан кўра Бэрлейнинг ўзи Роберта соchlарини эшкак ҳалқасига ўраб ёки аппаратга тиқиб қўяди-да, кейин илгари сезилмай қолган бу тафсилотга Мейсоннинг диққатини жалб этади.

– Ўша куниёқ, Хейт билан Мейсон қизнинг юзи ва бошидаги жароҳатларни яна бир бор шахсан ўлчаб кўришаётган пайтда Бэрлей билинтирмай туриб, аппарат қопқоғи билан объективи орасига Робертанинг бир неча тола сочини тиқиб қўйди. Орадан сал ўтмай, Мейсон билан Хейт бирдан соч

толаларини кўриб қолишиди-ю, гарчи аввал қандай қилиб кўрмаганларига ажабланишса ҳам, аммо бундан қатъи назар, демак, Клайд чиндан ҳам айбдор экан, деган ишончли холосага келишиди. Шу боисдан Мейсон: мен прокурор сифатида иш охирига етди деб ҳисоблайман, дея эълон қилди. У чиндан ҳам жиноятчининг ҳар бир қадамини синчилаб чиқкан эди, агар зарур бўлса, эртагаёқ суд олдида гапиришга ҳам тайёр эди.

Лекин бошқа далилларнинг ўзиёқ етарли бўлгани учун маълум вақтгача аппарат хусусида ҳеч гапирмасликка – агар иложини топса, бу сирни билганларни ҳам яхшилаб пишиқлаб қўйишга аҳд қилди. Борди-ю, Клайд ҳозиргига ўхшаб, аппаратим йўқ эди, деб ўжарлик қилиб тураверса, адвокати ҳам бу ёқда бунағанги далиллар борлигинн ҳатто хаёлига келтирмайди... ана шунда судда манави аппарат, Робертанинг Клайд ўзи олган анави расмлари, аппарат катталиги билан марҳума юзидаги жароҳат изларининг бутунлай тўғри келиши – шуларнинг бари ҳудди тепадан яшин ургандай ҳаммани довдиратиб қўяди! Ахир, бундан ҳам ишончлироқ далил бўлиши мумкинми?!

Бутун гувоҳликлар ва далилу ашёларни шахсан Мейсоннинг ўзи тўплагани учун бу ҳақда мендан кўра тузукроқ ахборот берадиган одам йўқ, деган хаёлда, бутун гапларни губернаторга ўзи етказишишга ва суд маслаҳатчилари маҳаллий кенгаши нинг маҳсус сессияси иштирокида шу округ ишини кўриб чиқиши учун Олий суднинг фавқулодда сессиясини чақиришга рухсатнома олишга жазм қилди, ана унда Мейсон суд маслаҳатчилари кенгашини истаган вақтида чақира олади. Шу рухсатномани ололса, суд маслаҳатчилари кенгаши ҳайъатини ҳам танлаб, агар Клайдни судга беришга қарор қилишса, бир-бир ярим ойлардан сўнг суд муҳокамасини бошлаб юбориш ҳам мумкин

бўлади. Мейсон бу иш ўзи учун айни муддао эканлигини танҳо дилидагина тан олар, чунки бўлажак ноябрь сайловларидан унинг умиди катта бўлиб, кўнглининг бир чеккасида номзодаар рўйхатига кириб қолиш орзуси ҳам йўқ эмас эди. Агар фавқулодда сессия чақирилмаса, унда бу иш фақат январда – Олий суднинг навбатдаги сессиясидагина кўрилади, у пайтда унинг прокурорлик ваколати ҳам тугайди, ҳатто судья лавозимига сайланган тақдирда ҳам бари бир бу ишни ўзи охирига етказа олмайди. Ваҳоланки, ҳозир округ аҳолиси Клайдга нисбатан ниҳоятда душманлик кайфиятида турибди, бу яқин атрофларда шошилинич суд чақирилаётганини тўғри деб топмайдиган ҳатто биронта одамни ҳам учратиш амри маҳол бўлса керак. Шундай экан, нега энди орқага сурилади? Нега энди шунақангি жиноятчига яна муҳлатни чўзиб, нажот йўлини топишига имконият бериб қўйилади? Устига-устак, бу ишни олиб боришининг ўзи унга, Мейсонга бутун мамлакат олдида ҳуқуқий, ижтимоий ва сиёсий шуҳрат орттириб бериши шубҳасиз-ку.

## XII БОБ

Шундай қилиб, шимолий ўрмонлардан жуда катта жиноий шов-шув кўтарилди. Кишини гиж-гижловчи барча гаройиб, аммо диний-ахлоқий жиҳатдан даҳшатли бўлмиш муҳаббат, сурур, бойлик, қашшоқлик, ўлим сингари нарсалар бу ерда аралаш-қуралаш эди. Бунақангি жиноятларнинг умуммиллий аҳамиятини ва уларга бўлган қизиқиши дарров фаҳмлаб етадиган эпчил носирлар ўша заҳотиёқ телеграф орқали буюриб, Ликургда Клайд кимникида ва қандай яшагани, кимлар билан дўст тутингани, қандай қилиб бир қиз билан алоқасини яширгани ҳолда, айни пайтда бошқасини олиб қочиб кетиш режасини туз-

гани – шулар түғрисида хилма-хил хабарлар боса бошладилар. Шахсан Мейсоннинг ўзига ёки «Ассошиэйтед пресс», ё «Юнайтед пресс»нинг маҳаллий вакилларига Нью-Йорк, Чикаго, Филадельфия, Бостон, Сан-Франциско ва Шарқ ҳамда Фарбдаги бошқа йирик Америка шаҳарларидан тұхтосыз телеграммалар оқиб келар, уларда жиноятнинг кейинги тафсилотларини сўраб-суринтиришар эди. Миш-мишларга қараганда, Грифитс ошиқ бўлиб қолган анави гўзал ва бадавлат қиз ким ўзи? У қаерда яшайди? Клайд билан алоқалари қай дара-жа бўлган? Аммо Мейсон Финчли ва Грифитслар-нинг бойлигига ихлос ва ҳурмат билан қарагани учун Сондранинг номини айтишни истамас эди, фақатгина ликурглик жуда бадавлат фабрикант-нинг қизи, деб қўя қолар эди (айнан кимлигини айтишни лозим кўрмасди); бироқ у, Клайд эрин-май лента билан боғлаб қўйган бир ўрам хатни ик-киланмай кўрсатаверар эди.

Аммо Робертанинг хатлари эса тўла ва атрофича шарҳланар, энг ҳаяжонли ва ғамгин жойла-ридан олинган парчалар газеталарда эълон қилиш учун бериб юбориларди, чунки Робертанинг хоти-расини авайлайдиган кими ҳам бор эди, дейсиз... Хатдан олинган парчаларнинг матбуотда ёритили-ши Клайдга нисбатан ғазаб ва нафрат ўтини, Ро-бертага нисбатан эса ачиниш ҳиссини тобора ку-чайтирар эди: қашшоқ, камсуқум, ёлғиз бир бечо-ра қизнинг Клайддан бошқа бирон суюнадиган ки-шиси ҳам йўқ эди, ваҳоланки, Клайд жуда бағри-тош, хиёнаткор жаллод экан. Агар уни дорга осиб ўлдиришгандა ҳам, енгил жазо топган бўларди! Гап шундаки, Мейсон Айиқ кўлига боргунча, сўнг ундан қайтиб келишда ва қолган ҳамма кейинги кунларда ўша хатларни ўқиши билан банд бўлди. Робертанинг уйдаги туриш-турмушки, қайғу-ҳасра-ти ва эртанги куни ҳақида ўйлаб хавотирда яша-

ши, унинг ёлғизлиги ва руҳан эзилиб ҳолдан тойгани тұғрисидаги айрим ўта таъсирли сатрларни ўқыганда Мейсон ниҳоятда изтиробга тушди; у ўз ҳолатини бошқаларга – хотини, Хейт ва маҳаллий газета ходимларига ҳам юқтириди-күйди, шундан сўнг газета ходимлари Брижбургдан юборган хабарларида Клайднинг қайсарлик билан айбини бўйнига олмаётганини, одамови ва бағритошлигини гарчи бир оз бўрттириб бўлсада, анча-мунча жонли бир тарзда тасвиirlаб ёза бошладилар.

Утигадаги «Стар» газетасининг аллаким деган бир хаёлпарат ёшгина мухбири Олденлар фермасига бориб, азоб-уқубатда қолган, баҳтсизликдан соб бўлган миссис Олденнинг аҳволини ўша заҳотиёқ деярли ҳаққоний акс эттириб берди: она шўрликни обдан ҳасрат еб қўйганидан у на ғазаб ва на зорланишни билар, содда ва жўнгина қилиб мухбирга: қизининг ота-онага қанчалик меҳрибонлиги, қанчалик қобил ва ҳимматлилиги, художўй бўлгани, мазҳаб черковининг маҳаллий руҳонийси бир марта уни шу пайтгача ўзи кўрган барча қизларнинг ичида энг доноси, энг меҳрибони ва энг гўзали деб атагани; уйдан кетгунга қадар у онасининг чинакам қувват-мадори бўлгани – шуларни сўйлабди, она бечора. Ликургда у оғир аҳволда, ёлғиз ўзи яшагани учун ҳам анави ярамас сенга уйланаман, деб ваъда бергану, илондай авраб уни аддаган, кейин беҳаё ишларга бошлаган (ҳарқалай, шу ишни Роберта қилганига сира-сира ишонгиси келмайди) мана энди ёмоннинг касофатига қолиб, ёш умри хазон бўлиб кетди. Ахир, у бутун умри давомида соф, ҳалол, мўмин-қобил, меҳрибон бир қиз эди. «Шундай қиз энди йўғ-а! Ўлсам ҳам бунга ишонгим келмайди».

Онасининг ҳикояси қўйидагича берилган эди:

«У мана шу ўтган душанбадагина шу ерда эди. Назаримда бир оз маъюс кўринса-да, лекин ку-

лимсираб турарди. Кечаси ҳам, кундузи ҳам, ферманы айланиб, учраган ҳар бир нарсага тикилиб қарашига, ҳадеб гул тераверишига ажабланган эдим ўшанда. Кейин у келиб, мени қучоқлади ва: «Биласизми, ойижон, мен қайтадан чақалоқ бўлиб қолишни, сиз яна қўлингизда кўтариб, алла айтишингизни истаяпман, худди илгариги пайтдагидай», деди. Мен унга: «Сенга нима бўлди, Роберта? Нега бугун жудаем маъюссан?» дедим. У бўлса: «Йўқ, шунчаки ўзим. Биласиз-ку, эртага эрталаб жўнайман. Шундан бугун негадир кўнглим фаш», деб жавоб берди. Буни қарангки, мана шу саёҳатни ўйлаб, ажали етиб турган экан ўзи! Назаримда ишлари ўнгидан келмаслигини кўнгли олдиндан сезган экан. Буни қарангки, умрида пашшага зиёни тегмаган қизгинамни урибди-я!»

Гап шу ерга келганда миссис Олден ўзини тутолмай, унсизгина йиғлай бошлади, нарироқда эса дард-ҳасратдан мункайган Тайтус турарди.

Лекин Грифитслар ва бошқа маҳаллий кибор доираларнинг вакиллари бўлаётган бу воқеаларни назар-писанд қилмагандай, лом-мим демай сукут сақлашар эди. Сэмюэл Грифитсга келсак, у аввалига Клайднинг шу қадар даҳшатли ишга қодирлигини тушунолмай, бунга асло ишонинқирамай турди. Тавба, тавба?! Шундай хушмуомали, хийла тортинчоқ, боодоб йигитча қотилликда айбланса-я? Сэмюэл бу пайтда Ликургдан анча олисда – Юқори Саранакида юргани учун Гилберт у ёқقا зўр-базўр сим қоққанида, кутилмаган бу воқеадан эсанкираб, нима қилиш кераклигини айтиш у ёқда турсин, ҳатто эшитганларини мундай бир тузукроқ тушунолмай, гаранг бўлиб қолди. Э, йўқ, бўлмағур гап! Бу ерда қандайдир хатолик ўтганга ўхшайди. Афтидан, Клайдни ким биландир янгишишган шекилли.

Шунга қарамай, Гилберт: бу гапларнинг ҳаммаси рост, чунки ўша қиз Клайд бошқарган бўлимда

ишлар экан, Брижбург прокурорида (Гилберт у билан ҳам сұхбатлашиб күрди) ўша марҳума қизнинг Клайдга ёзган хатлари бор экан, Клайд уларни рад этмабди, деб тушунтира бошлади.

– Ҳа, яхши! – деди Сэмюэл. – Лекин ўйламай туриб бирор-бир иш қила кўрма, айниқса, мен қайтиб боргунимча бу гапни Смилли ёки Готбойдан бошқа ҳеч кимга айтма. Брукхарт қаерда? (У «Грифитс ва К°» фирмасининг ҳуқуқ кенгашчиси Дарра Брукхарт ҳақида гапираётган эди.)

– Ҳозир у Бостонда, – деб жавоб берди Гилберт.  
– Душанбами ёки сешанбадами келмоқчи бўлгандай эди, лекин ундан олдин келмас-ов.

– Телеграмма жўнат, тезда етиб келсин. Ҳа, ростдан, Смиллига айт, «Стар» ва «Бикон» газеталарининг муҳаррирлари билан гаплашиб кўрсин, мен боргунимча тағин бирор-бир шарҳ бериб ўтиришмасин. Мен эртага эрталаб етиб бораман. Яна Смиллига айтгинки, машина олиб, иложи бўлса шу бугуноқ ўша ёққа жўнасин (у Брижбургни назарда тутаётган эди). Мен нима гаплигини ўша жойнинг ўзидан анифини билмоқчиман. Агар иложини топса, Клайд билан ҳам учрашсин, анави прокурорга ҳам йўлиқиб, қўлидан келганча кўпроқ суриштириб билсин. Кейин ҳамма газеталардан битта-биттадан олсин. Матбуотда нималарни ёзиб ултуришганини ўз кўзим билан кўриб чиқмоқчиман.

Тахминан худди шу пайтнинг ўзида, Ўн иккинчи кўлдаги чорбоғларида икки кечаю икки кундуз давомида Клайд тўғрисидаги ўзининг бутун қизлик орзу-ҳавасларини барбод этган шу кутилмаган фожиани ўйлаб, ҳолдан тояр даражада аччиқ хаёлларга ботиб ўтирган Сондра, охири, ҳамма гапни отасига ошкора айтишга қарор қилди, чунки у онасидан кўра отасини кўпроқ яхши кўрар эди. Шу хаёlda у кабинетга кирди, одатда отаси овқатдан сўнг вақтини шу ерда ўтказиб, у-бу нарсалар-

ни ўқиши ёки ўз юмушларини режалаш билан банд бўларди. Лекин отасининг олдига етиб бормасданоқ у ҳиқиллаб йиглай бошлади: чунки у чиндан ҳам власасага тушиб қолган эди, барбод бўлган севгиси, ўзи ва оиласи атрофида салга жанжал чиқиб кетай деб тургани унинг баландпарвоз орзу-ниятларига, эл-юрт олдидаги обрўйига путур етказиши мумкин эди. Неча мартараб уни тергаб, огоҳлантирган ойиси энди нима деркин? Отаси-чи? Гилберт Грифитс билан унинг қаллифи-чи? Сондранинг таъсирига берилган Бертинани айтмаганда, қолган ҳамма Крэнстонлар ҳам унинг Клайд билан яқин бўлишини ҳеч қачон маъқулламаган эдилар, хўш, улар нима дейишаркин?

Қизининг ҳиқилаётганини эшитган отаси босини кўтарди-ю, нима гаплигига мутлақо тушунмай ҳайрон бўлиб қолди. Аммо ўша заҳотиёқ қандайдир қўрқинчли бир нарса юз берганинн пайқади-да, шоша-пиша қизини бағрига босиб, уни юпатиш ниятида қулоғига шивирлади:

– Ҳой, секинроқ, секинроқ! Азбаройи худо, қизимга нима бўлди ўзи? Ким уни ранжитди? Нима қилиб? Қандай қилиб?

Кейин у орада нималар бўлиб ўтгани ҳақидаги қизининг бутун дил иқорини: Клайд билан илк бор танишгани, уни ёқтириб қолгани, Грифитсларнинг Клайдга нисбаган bemexrliklari, унга ўзи ёзган мактублар, Клайдни севиши... ва ниҳоят, унинг мана бу даҳшатли гуноҳда айбланиб, қамоққа олиниши – мистер Финчли шуларни бутунлай ўзини йўқотган кўйи тинглаб ўтирди. Тўсатдан ҳаммаси рост чиқса-я! Энди уни ва дадажонини дуч келган жойда чайнашади! Сондра нақ юраги ёрилгудай яна ўкириб йиглаб юборди... Лекин отаси қанчалик жаҳли чиқиб, хафа бўлмасин, бари бир охири бориб унга раҳми келиши ва айбини кечиришини у жуда яхши билар эди.

Үз уйида осойишталиқ, тартиб-интизом, одоб ва тұғрилик ҳукм суришига құнишиб қолған мистер Финчли қызига гарчи ичи ачишиб турса-да, аммо қовори осилғанча унга ҳайрон бўлиб тикилди-да, хитоб қилди:

— Ана холос, жуда расво бўлибди-ку! Э, алҳазар, алҳазар! Азизим, мен ҳайрон қоляпман! Ўзимга келомаяпман ҳеч. Очигини айтсам, сира қуюшқонга сифмайдиган иш бўпти. Қотиллиқда айбланаётган эмиш! Сен ёзган хатлар унда эмиш! Гапингга қараганда, ҳатто унда ҳам эмас, аллақачоноқ прокурорнинг қўлига тушган эмиш. Ана холос, ана холос! Жудаям хунук иш бўлибди, Сондра, э, тавба, шунчалик хунукки! Мен буни бир неча ой олдин ойингдан эшитган эдим, ўшанда ундан кўра ҳам кўпроқ сенга ишонган эдим. Мана, энди қара, оқибати қандай бўлиб чиқди! Нега сен менга ҳеч нарса айтмаган эдинг? Нега ойингнинг гапига қулоқ, солмадинг? Охири иш бориб мана шундай шармандаликка тақалгунча кутиб ўтирмай, мен билан ҳаммасини маслаҳатлашсанг бўларди-ку. Мен курфур, икковимиз бир-биримизни ҳурмат қиласиз, тушунамиз, деб юрибман-а. Ойинг билан мен сендан жонимизни ҳам аямаслигимизни ўзинг ҳам биласан. Бунинг устига, очигини айтсам, сени анча-мунча ақллисан, деб ўйлаб юрибман. Қотиллик тўғрисидаги ишга аралашиб қолишингни эса, етти ухлаб тушимда ҳам кўрмаганман! Ё, парвардигор!

Мистер Финчли шиддат билан ўрнидан турди-да – у чиройли костюм кийиб олган,mall соч, хушрой киши эди – бармоқларини асабий қисирлатганча у ёқдан-бу ёққа юра бошлиди, Сондранинг эса йифиси босилмасди. Мистер Финчли бирдан тўхтаб, яна гапида давом этди:

— Ҳа, бўлди, бўлди! Йифидан нима фойда! Кўз ёши тўkkанинг билан қайтиб ўрнига келмайди. Бир амаллаб чидармиз, майли. Ҳайронман, ҳай-

ронман... бу нарса қанчалик сенга зиён етказиши ни тасаввур қилолмайман. Аммо шуниси аниқки: хатларинг масаласида бир чора излашимиз керак.

Сондра ҳамон йиглар, мистер Финчли зса юрт олдиғаги шаънларига қанчалик оғир зарба келиб тушганини тушунтириш мақсадида хотинини чақыртирди; чиндан ҳам миссис Финчлининг хотирасида бу зарба то ўла-ўлгунча унутилмас аламли из қолдирди. Кейин мистер Финчли штат сенатори, республикачилар партияси марказий комитетининг штатдаги раиси, адвокат ва ўзининг доимий ҳуқуқ кенгашчиси Легер Эттербери га қўнфироқ қилди-да, Сондранинг бошига тушган мушкул ишни сўйлаб бериб, энди нима қилиш кераклигини маслаҳатга солди.

– Қани ўйлаб кўрайлик-чи, – дея жавоб берди Эттербери. – Агар мен сизнинг ўрнингизда бўлганимда бунчалик ташвиш тортиб ўтирумасдим, мистер Финчли. Бўлмағур шов-шувлар тарқаб кетгунига қадар бирор-бир чорасини тополсам керак, деб ўйлайман. Бир ўйлаб олишга вақт беринг... Ўша Катаракида ким прокурор экан? Мен шуларни аниқлаб, улар билан гаплашаман-да, кейин сизга қўнфироқ қиласман. Ташвиш тортманг, бирор йўлини топаман, хотиржам бўлинг. Сизга ваъда беришим мумкин, ҳар қанча бўлганда ҳам анави хатлар газетага тушмайди. Балки улар – гарчи бунга унчалик ишонмасам ҳам – судга кўрсатилмай қолиши ҳам мумкин. Лекин қизингизнинг номини тилга олинмаслигининг иложини сўзсиз топамиз, сира ташвиш тортманг.

Кейин Эттербери юридик манзил-тақвимдан Мейсоннинг фамилиясини топди-да, у билан шахсан учрашуви ҳақида келишиб олди. Мейсоннинг фикрича, бу хатлар кўриладиган иш учун ниҳоят даражада муҳим эди, аммо Эттерберининг овози уни гангитиб қўйганидан, у Сондранинг номи ёки

хатларини күпчиликка эълон қилишни мутлақо ҳаёлига ҳам келтирмагани, фақат агар Клайд айбини бўйнига олмай, суд маслаҳатчилари кенгаси томонидан дастлабки муҳокамага киритилишини орқага сурмоқчи бўлган тақдирда бу хатларни яширин муҳокама учунгина сақлаб турганини шоша-пиша тушунтира бошлади.

Эттербери Финчли билан иккинчи бор гаплашиб, унинг қизи ёзган хатлардан қандайдир тарзда фойдаланиши ёки Сондранинг номи тилга олинишига бутунлай қарши эканлигига ишонч ҳосил қилгач, баъзи бир сиёсий ахборот ва режаларимни айтиш учун эртагаёқ ёки индинга шахсан ўзим Брижбургга жўнайман, деб ваъда берди ва бу Сондранинг номини қисман бўлса ҳам тилга олиш-олмаслиги масаласида Мейсонни жиддий ўйлаб кўришга мажбур этади, деди.

Сўнгра оиласи қенгашда яхшилаб муҳокама қилиб олингач, миссис Финчли, Стюарт ва Сондралар зудлик билан, ҳеч қандай изоҳсиз ва хайрлашув зиёфатларисиз, Мэн соҳилларигами ёки яна бошқа бирор-бир жойгами жўнаб кетишлари зарур, деган қарорга келинди. Мистер Финчлига қолса, Ликург ва Олбенига қайтиш керак, деган таклифни айтди. Газета ходимлари ва ёру дўстларнинг хира пашшадай сўраб-суриштиришларидан кутулиш учун энг яхшиси, улар бу ердан жўнаб қолганлари маъқул эди. Кейин Финчлилар оиласи Наррагансетга қараб жуфтакни ростлаб, бир ярим ой давомида Уилсон номи остида яшириниб юришди. Крэнstonлар ҳам худди шу сабабга кўра тезлик билан сон-саноқсиз оролларнинг бирига йўл олишди, уларнинг фикрича, жуда бўлмаса ёзнинг қолган қисмини ўша ерда бир нави ўтказиш мумкин эди. Гарриэт ва Бэготлар эса ўзларини у ҳадар обрўсизланмагандай қилиб кўрса-тишди-ю, Ўн иккинчи кўлда тураверишди. Лекин

ким кўринганнинг бари Клайд ва Сондра тўғрисида, ёвуз жиноят тўғрисида, шу ишларга ўзи билб-билмай беихтиёр аралашиб қолиб, ўз номини булғаган ҳар бир киши умрбод иснодга қолажаги тўғрисида гап сотишарди.

Бу орада Смилли Грифитсларнинг топшириғига биноан Брижбургга жўнади-да, Мейсон билан икки соат сұхбатлашгандан сўнг, турмага кириб, Клайдни кўриш ва камерасида яккама-якка гаплашиб чиқишига ижозат олди. Смилли Грифитслар ҳозирча Клайдни ҳимоя қилишга киришмаётганликларини, шунақанги аҳвол юз бериб турган бир пайтда, умуман уни ҳимоя қилиш мумкинми ё йўқми, фақат шуни билмоқчи эканликларини тушунтириб берди. Мейсон ҳам Смиллига Клайдни иқрор қилинг, деб қатъий маслаҳат берди, чунки унинг айбордлигига зифирдай ҳам шубҳа йўқ, суд муҳокамасининг чўзилиб кетиши эса Клайдга ҳеч қандай наф бермагани ҳолда округга жуда қимматга тушади, деб уқтириди; қайтага у ҳаммасини бўйнига олса, айбини юмшатувчи бирор-бир баҳона-сабаб топилиб қолиши ҳам мумкин, жуда бўлмаганда ваҳима билан газета сахифаларида кўтариладиган мана шундай ижтимоий жанжалнинг олди олинган бўлади-ку, ахир.

Шундай қилиб, Смилли Клайд энди нима қиласам экан, деганча ҳафсаласи тушиб, умидсизланниб ўй суриб ўтирган камерага томон йўл олди. Смилли деган номни эшитишининг ўзидаёқ Клайд худди бирордан зарба егандай сесканиб тушди. Грифитслар – Сэмюэл Грифитс ва Гилберт! Ўшаларнинг шахсий вакили. Хўш, энди унга нима дейиши керак? У Мейсон билан гаплашиб олгандан сўнг, сўзсиз мени айборд ҳисоблайди, деб ўйлай бошлади Клайд. Нима дейман унга? Тўғрисини айтсаммикич ёки йўқми? Клайд бир нарсани ўйлаб, бир қарорда тўхтагунча Смилли эшикдан кириб келди.

Клайд қотиб қолган лабларини ялаб, зўр-базўр:

– Салом, мистер Смилли! – деди.

Смилли ҳам ясама меҳрибончилик билан жавоб қайтарди. – Хэлло, Клайд! Сизни шундай жойга қамаб қўйишган ниҳоятда қайгули ҳол. – Кейин яна гапида давом этди: – Газеталар ва шу ерлик прокурор сиз ҳақингизда шунақсанги олди-қочди гапларни тўкишяптики, асти қўяверасиз, лекин бунчалик бўлмаса керак, деб ўйлайман. Бу ерда, сўзсиз, бир янглишмовчилик ўтган. Мен худди шу нарсани аниқлашга келдим. Амакингиз бугун эрталаб қўнфироқ қилиб, сиз билан учрашишимни ва нима учун сизни бу ерга қамаб қўйишганини суриштириб билишимни топширди. Қариндошларингизга ҳозир қанчалик оғирлигини сиз ўзингиз тушунасиз. Улар менга ҳамма гапни ипидан-игнасигача аниқлашни ва иложи бўлса, бу ишни ёпишни буюришди. Шу сабабли агар сиз бутун тафсилотларни бошдан-охир гапириб берсангиз... тушуняпсизми... мен шуни истардимки...

Смилли тўхтади. Ҳозиргина прокурордан эшитганлари ва Клайднинг ичимдагини топ деб туришидан сўнг, ўзининг гуноҳсизлигини исботлаш учун тузукроқ бир гапи ҳам йўққа ўхшайди, деган фикр келди Смиллига.

Клайд бўлса ёрилиб кетган лабларини яна бир бор ялади-да, гап бошлади:

– Ишларим чатоқ бўладиганга ўхшайди, мистер Смилли. Мен мисс Олден билан учрашганимда, кейин бошимга бунчалик баҳтсизлик тушишини асло ўйламаган эдим. Лекин мен уни ўлдирмадим: тепамда худо бор, бу чин сўзим. Менда ҳеч қачон уни ўлдириш истаги туғилмаган ва уни ўша кўлга олиб боришни ҳам хоҳламагандим. Бу чин гапим, буни мен прокурорга ҳам айтдим. Биламан, прокурорда мисс Олденнинг менга ёзган хатлари бор, аммо уларда менинг мисс Олден билан кетмоқчи

бўлганим эмас, балки унинг мен билан кетмоқчи бўлгани ҳақида гап боради...

Бир оз бўлса-да, Смилли гапимга ишонаётган-микин, деган хаёlda Клайд жимиб қолди. Смилли эса Клайднинг изоҳлари Мейсоннинг гапларига тўппа-тўғри чиқаётганини билиб турса ҳам, уни тинчлантириш мақсадида:

– Ҳа, биламан, ҳозир Мейсон уларни менга кўрсатди, – деди фақат.

– Унинг кўрсатишини билар эдим, – дея секингина давом этди Клайд. – Лекин баъзан қандай бўлиб чиқишини биласизми, мистер Смилли. – Тағин шерифми ёки Краутми қулоқ солиб туришган бўлмасин деган хавотирда овозини яна ҳам пасайтириди. – Агар бошида мутлақо ёмон ният қилмаган тақдирингда ҳам қиз бола билан мана шундай машмашага тушиб қолишинг ҳеч гап эмас экан. Ўзингиз ҳам биласиз-ку буни. Мен аввал Робертани севар эдим, бу рост, кейин у билан алоқада ҳам бўлганман, бу хатларидан ҳам кўриниб турибди. Лекин фабрикадаги тартиб қандайлиги ўзингизга маълум-ку: бўлим мудири ишчи қиз билан сира алоқада бўлмаслиги керак. Назаримда, бутун омадсизликларим худди шундан бошланганга ўжшайди. Тушуняпсизми? Мен ишқилиб бирор билиб қолмасин, деб доим васвасада юрдим.

– Ҳа, тушуняпман.

Шу алпозда Клайд борган сари ҳовурини босиб, ўзини бемалолроқ тутиб (чунки унинг гапларини Смилли ҳамдардлик билан эшитаётгандай туюларди), Роберта икковлари ўртасидаги илгариги яқинликни деярли бошдан-охир гапириб берди ва ўзини оқдашга уринди. Аммо уни тўхтовсиз, фоятда ҳаяжонга солиб келаётган фотография аппарати, иккита шляпа, йўқолган костюм хусусида эса ломмим ҳам демади. Тўғриси ҳам, буларни у қандай

қилиб тушунтириб бера олади? Охири, бу гапларнинг барини Мейсондан билиб олган Смилли:

– Анави иккита шляпа ҳақида нима дейсиз, Клайд? – деб сўради. – Анави Мейсоннинг гапига қараганда, сиз иккита шляпангиз борлигини, яъни: биттаси кўлдан топиб олингани-ю, яна бири эса йўлда келаётган пайтингизда кийган шляпангиз бўлганини тан олибсиз.

Клайд нимадир деб жавоб қайтаришга мажбур бўлиб, аммо нима дейишини билмай:

– Улар янгишяптилар, мистер Смилли, – деди.  
– Мен у ёқдан қайтиб келаётганимда похол шляпа эмас, шапка кийиб олган эдим.

– Тушуняпман. Аммо Мейсон Айиқ кўлида, ҳарқалай, бошингизда похол шляпа бўлган эди, дейяпти.

– Ҳа, бўлган эди, лекин у Крэнстонларникига биринчи гал келганимда кийган шляпамлигини мистер Мейсонга айтиб берган эдим-ку. Мен унга айтганман. Ўшанда шляпамни эсдан чиқариб қолдирган эканман.

– Ҳа, тушунарли. Яна аллақандай костюм – ҳа, кулранг костюм ҳам бўлган, шекилли. Мейсоннинг айтишича, сизни ўша костюмда кўришган экан, аммо уйда уни топишполмаётган эмиш. Сизда ўшанақа костюм бормиди, ўзи?

– Йўқ. Мен ҳаво ранг костюмда, мени бу ёқقا олиб келишган пайтдаги ўша костюмда эдим. Кейин уни ечиб олиб, мана буни беришди.

– Аммо Мейсоннинг гапи бўйича, сиз кулранг костюмингизни Шейронда тозалатишга берганман, деган экансиз-ку, у бўлса у ердан ўша одамни излайвериб, бу гапдан хабардор ҳеч кимни учратолмабди. Жуда қизиқ-ку?! Сиз чиндан ҳам костюмни тозалатишга берган эдингизми?

– Ҳа, сэр.

– Хўш, кимга?

– Ҳа, мен сира эслолмаяпман ҳозир. Лекин ўша ёққа яна борсам, ўша бичиқчини топишим ҳам мумкин. Вокзалга яқын жойда эди.

Шундай дея туриб, у Смиллининг кўзига тик қарапаша ботинолмай ерга тикилди.

Кейин Смилли ҳам аввал Мейсон қилганидек, Клайд қайиққа олиб тушган жомадонни суриштира бошлади, агар Клайд бошмоқ ва костюмлари билан қирғоққача сузаб чиқа олган экан, нега унда Робертанинг ёнига сузаб бориб, тўнкарилиб кетган қайиқни ушлаб олишида унга кўмаклашмади, деб ҳам сўради. Клайд бунга илгари айтганидек, ёпишиб олиб, мени ҳам чўктириб юборишидан қўрқдим, деган важни кўрсатди. Лекин у ҳозир биринчи марта Робертага қайиқни ушлаб ол, дея қичқирдим, деган гапни қўшимича қилди, ваҳланки, аввал у Мейсонга қайиқ биздан узоқлашиб кетди, деган эди, буни Смилли Мейсондан билиб олган эди. Клайднинг шляпасини гўё шамол бошидан учириб кетгани ҳақидаги гапга келганда эса, Мейсон гувоҳдар, шунингдек, давлат метеорология ахборотлари ёрдамида ўша осойишта кунда шамол тутул арзимаган елгин ҳам бўлмаганини исботлаб беришга ўзининг тайёр эканлигини билдириди. Демак, Клайднинг ёлғон гапиргани аниқ эди. Касални яширсанг, иситмаси ошкор қилгани каби, унинг бутун кирдикорлари очиқ-ойдин сезилиб турарди. Бироқ Смилли уни ортиқча хижолат қилмаслик учун нуқул: «Ҳа, тушуняпман» ёки: «Ҳа, албатта» ёки: «Демак, шундай бўлган экан-да!» деб такрорларди, холос.

Ниҳоят, Смилли Робертанинг юзи ва бошидаги зарбадан қолган моматалоқларни сўраб-суриштириди. Чунки Мейсон қайиқнинг қирраси урилганда биратўласи икки жойда жароҳат пайдо бўлмаслигига унинг диққатини жалб этган эди. Клайд эса қайиқ ағдарилиб тушаётганда Робертага фақат

бир марта урилиб кетди, моматалоқ ва жароҳатларнинг бари шундан – бундан бошқа, хўш, нимадан бўлиши мумкин, сира ақдим етмаяпти – деб уқтирар эди. Лекин бу изоҳи қанчалар бемаънилигини унинг ўзи ҳам тушуна бошлади. Смилининг ранжи, хижолат тортиб қарашларидан Клайднинг гапларига у ишонмаганлиги аниқ сезилиб турарди. Клайднинг Робертага ёрдамга келмаганининг ўзини Смили очиқ-ойдин, чинакамига разил кўрқоқлик, деб ҳисоблади. Клайд Робертанинг ўлимига томошабин бўлиб қараб турган – бу ўринда кўрқоқликни важ қилиш билан иш битмайди.

Охири Клайд алдайвериб обдан чарчаганидан, ҳафсаласи пир бўлиб, индамай қолди. Смили эса шу даражада ранжид, авзойи бузилиб кетдики, ҳатто Клайдни яна сўроққа тутиб довдиратиб қўйиш фикридан ҳам бутунлай кўнгли совиди. Студа безовталаниб типирчилаганча нима дейишини билмай ўтириб-ўтириб, ниҳоят:

- Ҳа, Клайд, энди мен кетмасам бўлмас, – деди.
- Бу ердан Шейронгача борадиган йўл ҳаддан ташқари ёмон экан. Шу воқеаларнинг барини ўз оғзингиздан эшитганимдан беҳад хурсандман. Сиз менга айтган гапларнинг ҳаммасини оқизмай-томизмай амакингизга етказаман. Лекин агар сизнинг ўрнингизда мен бўлганимда иложи борича бошқа ҳеч нарсани гапирмас эдим, мендан янги хабар олмагунингизча сабр қилинг. Менга шу ердан сизнинг ишингизни олиб бориши мумкин бўлган бир адвокат топиш вазифаси юклатилган. Лекин кечикканмиз, мистер Брук харт эса – бизнинг бош ҳуқуқ кенгашчимиз – эртага қайтиб келадиган бўлгани учун, яхшиси уни кутиб, у билан гаплашганимиз маъқул, деб ўйлайман. Хуллас, агар маслаҳатимга кўнсангиз, мендан ёки ундан бирор-бир хабар топмагунингизча энди бошқа мутлақо гапирманг. Мистер Брукхарт ё ўзи келади,

ёки биронтасини юборади; ҳузурингизга келадиган одам орқали мен сизга хат жўнатаман ва у бундан бу ёига нима қилишингиз кераклигини ҳам айтади.

Шу насиҳатлардан сўнг Смилли Клайдни ўз хаёллари билан яна ёлғиз қолдирганча хайрлашиб чиқиб кетди. Аммо Клайднинг айбордорлигига шахсан Смиллида ҳам ҳатто зифирдай бўлса-да шубҳа қолмади, айни пайтда у Клайдни бу ҳаққоний оғир қисматдан фақат Грифитсларнинг миллионларигина – агар Грифитслар ўз миллионларини шу ишга сарфлашни истасалар – сақдаб қола олиши мумкинлигини ҳам чуқур ҳис этди.

### XIII БОБ

Эртаси куни эрталаб Сэмюэл Грифитс Уикиги авенюдаги данғиллама уйларининг каттакон меҳмонхонасида ўтирганча, Гилберт иштирокида, Смиллининг Клайд ва Мейсон билан учрашиб келганилиги тўғрисидаги батафсил ахборотини тинглади. Смилли ўзи қўрган ва эшитган нарсаларини ипидан-игнасигача гапириб берди. Шунда Гилберт Грифитс бу ишлардан фоят даражада ҳаяжонга тушиб, фазаби қайнаб кетганидан:

– Уҳ, иблис бола! – дея хитоб қилди. – Газанда! Кўрдингизми, дада, мен сизга айтган эдим-а! Уни бу ёққа яқин йўлатманг, деб огоҳлантирган эдим-а!

Сэмюэл Грифитс аввал бир чуқурроқ фикрламай, Клайдга қўйқисдан меҳр қўйганига теккизиб айтилаётган бу шамани ўйлаб, бир оз жим турди-ю, кейин Гилбертга ранжиганнамо, маъноли бир назар ташлаб қўйди, унинг нигоҳидан: «Биз ўзи бу ерга нима учун йиғилдик, менинг дастлабки, гарчи бемаъни бўлса ҳам беҳуда, аммо олимистер ниятимни муҳокама қилишгами ёки юз берган ташвишли аҳволими, хўш?» деган маънони уқиши мумкин эди. Гилберт эса: «Қонхўр! Анави бад-

бахт мақтанчоқ Сондра Финчли ундан тузук бир одам чиқаришни хаёл қылган эди, аслида менинг жигимга тегмоқчи бўлган эди, ажаб бўпти, ўзига ўзи қора суртибди. Аҳмоқ! Қилмишига яраша жазосини топибди. Ҳали у бу қора додни ювгунча, ўҳ-хў», деб ўйлар эди. Лекин унга ҳам, отасига ҳам, яна бошқа кўпларга ҳам ташвиш дегани етиб ортадиган бўлди. Эҳтимол, бу жанжал ҳаммаларига – Гилбертнинг ўзига ҳам, қайлифига ҳам, Беллага, Майрага ва ота-оналарига ҳам сира ўчмас доф бўлиб тушиши ва ҳойнаҳой, Ликургдаги ўз тенги-тўшлари орасида уларнинг обрўига катта путур етказиши аниққа ўхшаб қолди. Фожиаки, нақ даҳшат! Эҳтимол, Клайд қатл этилар! Келиб-келиб Грифитсларнинг оиласида шу шармандалик юз бериб ўтиrsa-я!

Сэмюэл Грифитс Клайд Ликургга келгандан бери орада ўтган воқеаларнинг барини ўзича бирин-сирин хотирлай бошлади.

Аввалига уни ертўлада ишлашга мажбур этишиди, Грифитслар оиласи эса ақалли унга салгина ҳам эътибор бериб қарамади. Ҳазилакамми, саккиз ой давомида у ўз ёғида ўзи қоврилиб юрди. Ҳозирги даҳшатли воқеаларнинг келиб чиқиш сабабларидан бири ҳам, эҳтимол, шу нарса бўлгантир? Кейин уни йигирма чоғли ёш қизга бошлиқ қилиб қўйишиди! Хўш, бу ҳам хато эмасмиди, ахир? Гарчи Клайд қылган гуноҳни Сэмюэл мутлақо кечиролмаса ҳам, лекин ўшанда ўзи хатога йўл қўйганини ҳозир аниқ тушуниб турибди. Қанчалик паст табиат экан у! Ҳирс олдида шу қадар ўзини тия билмаганини қаранг! Қанчалик бетав-фиқ йиртқичлигини айтмайсизми: анави қизни йўлдан оздиришга оздириб, кейин Сондрани – шу норасида жажжи Сондрагинани қўлга оламан деб, илгаригисидан қутулиш мақсадида уни нобуд этгани-чи? Энди у турмада ётибди, Смиллининг гапига қараганда, кишини таажжубга соладиган бу

даҳшатли аҳволни изоҳлаб беришга ҳатто тузукроқ бир баҳона ҳам тополмабди, фақат: уни ўлдириш ниятим йўқ эди, буни ақалли хаёлимга ҳам келтирмаганман, шляпамни шамол учириб кетди... лекин қуруқ сафсатадан нарига ўтолмагани ҳам қизик! Шу қадар таги бўш гапларки! Иккита шляпа ёки йўқолган костюм ҳақида ҳам, чўкиб кетаётган қизга ўзининг нима учун ёрдамга бормагани ҳақида ҳам хиёл бўлса-да, одам ишонадиган бирор-бир важ-корсон ҳам айтолмабди. Унда қиз юзидағи моматалоқлар-чи – хўш, улар қаердан келиб қолган? Булар уни қўл-оёғидан боғлаб, гуноҳкор – шу деб қўрсатиб беряпти-ку, ахир!

– Ё, алҳазар! – дея хитоб қилди Гилберт. – Наҳотки бошқа бирор-бир ўринлироқ, гап топишга ҳам ақди етмабди-я, бефаҳм!

Смилли: Клайддан билган гапларимнинг бари шу, мистер Мейсон ҳам унинг айбдорлигига, шу даражада қатъий ва бутун вужуди билан ишоняптики, бунга сира шубҳаси ҳам йўқ, деб жавоб қайтарди.

– Даҳшат! Даҳшат! – деб такрорлади Сэмюэл.  
– Мен сира тушунолмаяпман буни, тушунолмаяпман! Қон-қонимга яқин бўлган бу одамнинг қўлидан шу қадар жиноий иш келишини сира ақдимга сифдиролмаяпман!..

У даҳшатга тушиб, шиддат билан ўрнидан турди-да, у ёқдан-бу ёққа юра бошлади. Грифитслар оиласининг шаънига катта доф-ку бу! Гилберт ва унинг келажаги нима бўлади энди! Белла-чи, унинг тантиқ, иззатталаб орзу-хаёллари-чи! Сондра-чи! Финчли-чи!

У қўлинни мушт қилди. Қошларини чимириб, лабини тишлади. Ора-сира у бегуноҳ, олифта Смиллига қараб-қараб қўяр, Смилли эса Грифитснинг ҳаддан ташқари дилтанг бўлаётганини сезиб, у ҳар қарангда бошини сарак-сарак қимирлатиб қўяр эди.

Сэмюэл Грифитс яна бир ярим соатча эринмай, мабодо далилларни бошқача изоҳлашнинг иложи йўқмикан деб, Смиллини савол-жавобга тутиб ўтирди; кейин бир оз жим қолиб, охири:

— Очигини айтсам, ниҳоятда хунук иш бу, — деди. — Лекин сиз айтиб берган ҳамма гапларга ҳам қарамай, бари бир мен уни бутунлай гуноҳкор деб ҳисоблаёлмайман, чунки қўлимдаги далилларим етарли эмас. Эҳтимол, ҳали юзага қалқиб чиқмаган бошқа гаплар ҳам бордир, ахир, ўзингиз ҳам у кўп нарсалар тўғрисида оғиз очмади, деяпсиз-ку... биз билмаган бошқа бирор-бир тафсилотми... гарчи арзимаган бўлса ҳам, бирор-бир оқловчи далилми... акс ҳолда бу энг мудҳиш жиноятга айланиб кетади-ку. Мистер Брукхарт Бостондан кедими?

— Ҳа, сэр, у шу ерда, — дея жавоб берди Гильтерт, — У мистер Смилли билан телефонда гаплашиб олган эди.

— Яхши. Унда бугун соат иккода ҳузуримга келсин. Ўлгудай чарчадим, энди бу ҳақда гапиришга мажолим йўқ. Смилли, менга айтганингизнинг барини унга ҳам гапириб беринг. Соат иккода у билан бирга келинглар. Ҳеч нарса ақлимга сифмати-ю, аммо эҳтимол, у бирор-бир бамаъни гап айтиб қолар. Бироқ бир нарсани тайинлаб қўяй: менимча, Клайд айбдор бўлмаса керак. У айбдорми ёки йўқми — шуни аниқдаш учун қўлимдан келган ҳамма ишни қилмоқчиман. Агар айбсиз бўлиб чиқса — унда қонун йўл қўйган даражада, уни ўз ҳимоямга олмоқчиман. Лекин ортиқча уринмайман, мутлақо. Агар айби бўйнига қўйилса, жияним тугул ундан каттаси бўлганда ҳам, асло, асло, асло, — уни қутқаришга ҳаракат қилмайман. Бу менга тўғри келмайди! Мен унақангидан одамлардан эмасман! Агар, мабодо у бегуноҳ бўлиб, тўғрилигига ҳатто зифирдаккина асос топилса ҳам, майли, нима бўлса бўлар, ҳар қандай хижолатлик, ҳар қандай

шармандалилкка ҳам қарамай, унга қўлимдан келганча ёрдам бераман. Агар айбдор бўлса-чи, унда йўқ! Ҳеч қачон! Бу тирранча чиндан ҳам гуноҳкор бўлсами, унда қилмишига яраша жазосини тортсин. Ҳатто жияним тутул ундан каттаси бўлганда ҳам бундай жиноятчи одамга мен бир долларимни ҳам, бир пенни<sup>1</sup>йимни ҳам ҳаром қилмайман.

Кейин у орқасига ўтирилди-ю, аста-аста, вазмин қадам ташлаб, хона бурчидаги зинага қараб юрди. Смилли эса Сэмюэл изидан кўзлари бақрайганча ҳурмат билан тикилиб қолди. Ироданинг кучлилигини қаранг! Қатъиятни қаранг! Бунақанги мушкул аҳволда шу қадар адолатли бўла билиш! Гилберт ҳам донг қотиб қолганча бўшлиққа кўз тикиб, қимир этмай ўтиради. Ҳа, отаси – чинакам инсон. Уни бироров яна қанча ҳақоратлаган ва ранжитган тақдирингда ҳам, у Гилбертга ўхшаб ўша одамдан қасд оламан деб, майдо гапни кўтариб юрмайди.

Кейин эса мистер Дарра Брукхарт келди: у хушқомат, яхши кийинган, оғир жуссали, миқти ва эҳтиёткор адвокат эди; бир кўзи осилиб тушган қовоғидан хиёл юмилиб турар, анчагина қорин ҳам қўйган эди, мистер Брукхарт шу туришида, гарчи жисман бўлмаса ҳам, лекин хаёлда худди ҳавога учирладиган пуфакка ўхшаб, сийрак ҳавода арзимаган бир юридик воқеалар, шарҳлар ёки қарорлар шабодаси таъсирида ҳам у ёқдан-бу ёққа отилаверадигандай туюларди кишига. Қўшимча далилларнинг йўқлиги мистер Брукхартнинг назарида Клайдни мутлақо айбдорга чиқариб қўяётгандек эди. У шубҳали ва Клайдни фош этувчи барча ҳолатларни Смиллидан дикқат билан эшитиб олгач, борди-ю, Клайд у даражада гуноҳкор бўлмаган тақдирда ҳам, агар шу пайтгача сезилмай келинаётган ва айбланувчига қандайдир нафи тегадиган яна бошқа далиллар топилмас экан, унда бари бир

<sup>1</sup> Пенни – чақа пул. (*Таржимон.*)

Клайдни күнгилдагидек ҳимоя қилиб чиқиш фоят мушкул бўлади, деган қарорга келди. Анави иккита шляпа, жомадон... Клайднинг қочиб кетгани... Кейин анави хатлар... Аммо хатларни шахсан ўзи ўқигани тузук эди. Ҳаммага маълум сабабларга кўра, ҳалойиқ сўзсиз Клайдга қарши, ўлган қизга эса хайриҳоҳ кайфиятда бўлиши турган гап. Қизнинг камбағаллиги, ишчилар синфиға мансублигининг катта аҳамияти бор. Шуларнинг ҳаммасидан кейин Брижбургдек чет бир чакалакзор округда суд маслаҳатчиларининг тузукроқ бир ҳукм чиқаришига ҳам ишониш қийин, Гарчи Клайд ҳам қашшоқ бўлса-да, бироқ у бадавлат одамнинг жијани, шу вақтгача, ҳарқалай, Ликургдаги киборлар доирасида арзигуликина обрў-эътибори бор эди. Бу – албатта, шу ерлик одамларни унга қарши қилиб қўйиши аниқ. Шу сабабли аввалдан пайдо бўлган бунақангি кайфиятлар суд ҳукмига таъсир этмаслиги учун судлов жойини ўзгартиришга уриниб кўриш керак.

Лекин, иккинчи томондан, у аввало, оғир терговларда обдан пишган бир юристни жўнатиши лозим, токи у Клайднинг ҳимоясини ўз бўйнига олиб, ҳаётингиз тўғри жавобингизга боғлиқ, деган важ билан Клайддан барча нарсаларни ўсмоқчилааб сўраб билиб олсин, акс ҳолда бу ишдан бирор умид қилса бўладими ёки йўқми, буни Брукхарт айтиб беролмайди. Ёрдамчилари орасида мистер Кетчумен деган жуда қобилиятли бир одам бор, ўшани шу вазифага юбориб, кейин унинг фикрига қараб туриб, Клайднинг иши юзасидан ўринли бир хуносага келиш ҳам мумкин. Лекин бу ишнинг яна бошқа нозик томонларн ҳам борки, Брукхартнинг назарида бирор-бир қарорга келишдан олдин уларни етти ўлчаб бир кесган маъқул. Жиноий ҳуқуқнинг бутун икир-чикирлари-ю ҳийла-найрангларини сув қилиб ичиб юборган адвокатлар

Утикада ҳам, Нью-Йорк ва Олбэнида ҳам борлигини ҳойнахой, мистер Грифитс ҳам, унинг ўғли ҳам билишса керак (хусусан, Олбэнидаги ака-ука Кэнаванлар Брукхартнинг хотирига келди, улар гарчи анчагина шубҳали шахслар бўлишса ҳам, аммо жуда қобилиятли эдилар). Уларнинг ҳар бири ҳам, бу ишга дастлаб ўзлари қандай муносабатда бўлганларидан қатъи назар, яхшигина чиқим қилинса, сўзсиз, ҳимояни ўз зиммаларига олишлари аниқ эди. Кейин суд муҳокамасини албатта бошқа жойга ўтказиш ва хилма-хил талаб ҳамда нороziйклар билдириш йўли билан ишни чўзиб юборишилари ва охири бориб-бориб, агар олиҳимматли Грифитслар оиласига манзур тушгудек бўлса, ўлим. Ҳукмини хийла юмшоқроқ жазога алмаштира олишлари ҳам мумкин эди. Бошқа жиҳатдан, бу қадар тўйполонли ва жанжалли масаладан сўнг газеталарда ҳам катта шов-шув кўтарилиши турган гап эди, хўш, бу Сэмюэл Грифитсга ёқармикин? Ҳозирги аҳвол шундайки, оғзига кучи етмаган одамлар ноҳақдан-ноҳақ уни ўз бойлигига таяниб, одил судни четлаб ўтмоқчи, деб гап тарқатишлари ҳам мумкин, ҳойнахой. Халойиқ бундай пайтда бадавлат кишиларга нисбатан ниҳоятда нотўғри фикрда бўлади. Ҳозир ҳам, шунга кўра, кейин таъна тошини ёғдириш учун, Грифитсларнинг Клайдни у ёки бу даражада албатта ҳимоя қилиб чиқишиларини кутиб турган бўлса керак.

Демак, мистер Грифитс ва унинг ўғли ўз нижатларини очиқ-ойдин ҳал қилиб олишлари зарур: улар Брукхарт эслатиб ўтган анави Кэнаванларга ўхшаш атоқли юристларни таклиф этишадими ёки мундоқроқ адвокатларни чақиришадими ёки бутунлай уларсиз иш юритишадими? Ахир, сирасини айтганда, диққатни унчалик жалб қилмай туриб ҳам, Клайдни, масалан, одатдаги суд муҳокамаларида оқловчи бўлиб чиқадиган фаҳм-фаролари

сатлигина, эскичагина – масалан, дейлик, Бриджбургда ёшини яшаб, ошини ошаб юрган юристлардан бири билан таъминлаш ҳам мумкин-ку – кейин унга Грифитслар оиласи шаънига айтиладиган ҳай-ҳай суронли, ножўя хуружлар газеталарда иложи борича камроқ босилишини таъминлаш вазифаси ҳам юклатилади.

Хуллас, уч соат давом этган муҳокамадан сўнг, Сэмюэл, мистер Брукхарт ўз ёрдамчиси Кетчумени тезда Бриджбургга жўнатиши керак, деган қарорда тўхтади: майли, у Клайд билан бир гаплашиб кўрсин, кейин у гуноҳкорми ёки йўқми – бу ҳақда мистер Кетчумен қандай фикрга келиш-келмаслигидан қатъи назар, жуда бўлмагандა ҳозирча эпчил маҳаллий юристлардан бир адвокатни топиши керакки, токи у ниҳоятда усталик ва ниҳоятда ҳалоллик билан унинг манфаатларини ҳимоя қилиб тура билсин. Бироқ мистер Кетчумен хизмат эвазига бериладиган мукофотнинг қанчалиги масаласида ҳеч қандай кафиллик олмай, балки қўйиллаётган айб муносабати билан Клайдни ҳақиқатни гапиришга мажбуралишигина зарур эди, холос. Кейин эса шундай оқловчини топиш керакки, у Клайдга ҳақиқий наф келтирадиган далилларнингина, фақат далилларнингина вижданан аниқлашга ҳаракат қилсин: қисқаси, ҳар қанақанги қўринишдаги юридик айёrlигу, ҳийлагарлигу, фирромликларга ҳам, сохтагарчиллик билан гуноҳкорни оқлаш ва оқибатда одил судни алдашга уринишларга ҳам мутлақо чек қўйилиши лозим.

#### XIV БОБ

Лекин мистер Кетчумен Клайддан Мейсон ва Смилли эшитган гаплардан бўлак бир оғиз ҳам ортиқча янгилик ололмади. Кимларнингдир чалкаш жавобларини ўргана туриб, ўша иш ҳақида деярли

түгри хулоса чиқаришга анча-мунча уста бўлган Кетчумен инсон туйгуларини тушуниш масаласига келганда хийла нўноқ эди, ваҳоланки, Клайд билан юз берган воқеада айни шу нарса ғоят зарур эди. У ниҳоятда ҳиссиз, дунёни сув босса тўпифига чиқмайдиган жиддий қонунчи эди. Шунинг учун ҳам у жазирама июль кунида тўрт соат давомида Клайдни обдан қийнагач, бу жиноятчининг, шу пайтгача ўзи кўрган барча фарид ношуудиклару барча ожизликларнинг энг ғалати намунаси эканига ишонч ҳосил қилди-ю, охири уни тинч қўйди.

Ўз вақтида, яъни Смилли жўнаб кетгач, Мейсон Клайдни бирга олиб Катта мушгир кўлига борди-да, фотография аппарати билан унинг оёқчаларини қидириб топишди, бу орада у Клайддан яна анча-мунчагина ёлғон-яшиқларни ҳам эшитди. Энди Мейсон Кетчуменга, гарчи Клайд «фотография аппаратим йўқ эди», дегани билан, лекин у, яъни Мейсон бунинг аксини қўрсатувчи далилларга эга: Клайдда аппарат бўлган ва у Ликургдан чиқишида уни ўзи билан бирга олиб кетган. Аммо Кетчуменнинг сўрофига Клайд мен аппарат олмаганман, анави топилган аппарат оёқчалари эса мутлақо меники эмас, дея жавоб беришдан бошқа тузукроқ бир сўз ҳам тополмади, унинг бу ёлғончилиги Кетчумени ниҳоят даражада ҳайратга солди ва у энди тортишиб ўтирумасликни кўнглига тутиб қўйди.

Лекин Брукхарт Кетчуменга Клайд тўғрисида шахсан у қандай фикрга келишидан қатъи назар, адвокат танлашни топширган эди, чунки бу ерда масала анча қалтис, Грифитсларнинг олимистерлиги, қолаверса, ор-номуси ҳақида гап бораётган эди, нариги Грифитслар эса Брукхарт айтганидай тийинга зор қашшоқ кишилар экан, бунинг устига, умуман, уларни бу ишга аралаштириб юришнинг ўзи ҳам ноқулай. Шу сабабли у оқловчини жўнаб кетгунига қадар топишга аҳд қилди. Кейин

у маҳаллий сиёсий шароитни мутлақо ҳисобга олмагани ҳолда тўппа-тўғри Катараки округи миллий банкининг директори Айра Келлог ҳузурига борди; Келлог (Кетчумен бундан бехабар эди) демократик партия маҳаллий ташкилотининг таниқли арбобларидан бири эди. У Клайдга тўнкалаётган жиноятдан ниҳоятда дарғазаб бўлган эди, чунки унинг диний ва маънавий қарашлари шуни тақозо қиласр эди. Лекин у, иккинчи томондан, бу иш яқинлашиб келаётган сайловларда республикачилар партияси ғалабасига йўл очиб берадиганини яхши тушунар ва у Мейсонга тескари иш олиб бориш имкониятини қўлдан чиқармаслик зарурлигини ҳам аниқ тасаввур этар эди. Клайд қиёфа сида пайдо бўлган бу жанжал ва у қилган жиноят республикачилар партияси машинасига катта қуайлий туғдираётган эди.

Гап шунда эдики, қотиллик аниқлангандан бери Мейсоннинг донғи салкам бутун мамлакатта ёйилиб кетган, ваҳоланки, бу атрофлардаги прокурорларнинг бирортаси ҳам яқин орада бунчалик кенг миқёсда тилга тушмаган эди. Ҳатто Буффало, Рочестер, Чикаго, Нью-Йорк ва Бостондек олиш шаҳарлардан ҳам газеталарнинг мухбирлари, репортёрлар, рассомлар келишиб, Клайд, Мейсон ва Олденлар оиласининг соғ-саломат юрган вакиллари ва бошқа учраган одамлардан ҳам гап сўраш, уларнинг расмларини чизиш ва суратларини олиш билан овора эдилар, шуларнинг барини эса ҳамма кўриб билиб туради. Маҳаллий жамоат орасида бўлса, Мейсоннинг номи оғиздан сира тушмай мақталар, ҳаттоки бутун вилоятдаги демократ- сайловчилар ҳам бу масалада республикачиларга қўшилиб, Мейсон бошига қилич келганда ҳам тўғрисини айтадиган одам, у ўша қотилни қилмишига яраша боплаб жазолаяпти, Грифитслар ва анави бадавлат қиз оиласининг бутун пуллари-ю, бутун

мавқелари ҳам бу халқ жонқуярига бир мирилик таъсир күрсатолмади, дея гап уқтиришар эди. Чинакам прокурор мана бундай бўпти-да! «Ташвишланманглар, у «туя кўрдингми, йўқ»قا юрмайди!»

Дарҳақиқат, Кетчумен келишидан олдин терговчи ва гувоҳлар Мейсон иштироки ва ҳатто раҳбарлигида Роберта ўлимига оид тафсилотларни кўриб чиқишиди-да, мархума қиз Клайд деган кимса томонидан аввалдан ўйланиб амалга оширилган жиноят оқибатида ҳалок бўлган, Клайд Грифитс эса ҳозир Брижбург турмасида қамалиб ётибди, унинг иши яқин вақтлар ичida округ суди маслаҳатчilari кенгаши ихтиёрига топширилиши керак, шунинг учун Клайд кенгаш ҳукмини кутиб ўтиравериши лозим, деган қарорда тўхтадилар. Мейсон барча сўроқ натижалари ва далилларни кўриб чиқиб, Клайдни судга бериш ёки чиқариб юбориш масаласини бир ёқдик қилиш учун губернатордан Олий суднинг фавқулодда сессиясини чақириш, демак, ўз-ўзидан маълумки, зудлик билан округ суд маслаҳатчilari кенгаши сессиясини чақиришни ҳам илтимос қилмоқчи бўлаётганини ҳамма билар эди. Худди шу пайтда бирдан Кетчумен келиб, Клайднинг ҳимоясини ишониб топширса бўладиган тузукроқ бир адвокатни шу ердан тошиш мумкин эмасми, деб сўраб ўтирибди. Келлог Мейсоннинг фаолиятини йўққа чиқариш ниятида ўша заҳотиёғ Элвин Белнеп деган кишини («Белнеп ва Жефсон, адвокатлар») хаёлига келтирди; у икки марта штатнинг сенатори, уч марта Округ кенгашида демократик партиянинг вакили бўлиб улгурган ва кейинги вақтларда қўпгина таниқли демократлар ҳам ўз партиялари округда маъмурий бошқарувни қўлга олишлари биланоқ, уни энг юқори лавозимлардан бирига кўтариш керак, деб ҳисобламоқда эдилар. Чиндан ҳам бундан атиги уч йил муқаддам прокурор лавозими учун курашда

Мейсоннинг демократик рўйхат номзодлари ичи-даги энг хавфли рақиби айни шу Белнеп бўлган эди. Сиёсий жиҳатдан у шунчалик муносаб одам эдики, бу йил Мейсон умид қилаётган ўша округ судьялиги ўрнига унинг номзодини кўрсатишни мўлжаллашаётган эди. Агар орадан Клайд билан боғлиқ мана бу кутилмаган ва ҳаммани ҳайратга солган воқеалар чиқиб қолмагандо-ю, унда жамоат фикрига кўра, Белнеп номзодлар рўйхатига тушгач, албатта судьяликка сайланар эди. Мистер Келлог ҳозирги нозик сиёсий вазиятнинг барча мураккаб томонларини Кетчуменга тушунтириб ўтирумади, аммо Мейсонга қарши мистер Белнепдан бўлак муносаброқ, ундан кўра лойиқроқ одамни топиш қийин, деб қўйди.

Қисқагина маърузадан сўнг, Келлог Кетчуменни шундоққина рўпарадаги «Белнеп ва Жефсон» идорасига шахсан ўзи олиб киражагини биладирди.

Кейин Белнепларнинг эшигини қоқишиди; уларни қирқ саккиз ёшлардаги ўрта бўй, кўриниши жуда ҳам хушқомат бир киши хонага таклиф этди; унинг кул ранг-мовий кўзлари Кетчуменга худди ичкарисидан ниҳоятда зийрак одам тикилиб турган кўзгуга ўхшаб туюлди, аммо, эҳтимол, унинг ақли у қадар кенг ва чуқур бўлмаслиги ҳам мумкин эди.

Белнеп ўзини тута билганидан атрофдагилар уни ҳурмат қилишарди. У университетни тутатган эди. Ёшлиқда, ўз қиёфаси, бойлиги ва ижтимоий мавқеи туфайли (унинг отаси судья ва сенатор бўлган эди), у саргузашт изловчилар ҳаёти деса бўладиган нарсалардан тўйгунича роҳат қилиб олган, бу қўполлик ва чекланганлик, бу эҳтиросли тўлғанишлар ва аёл жинсига мойилликлар, Мейсонни ҳанузгача ҳаяжонга солувчи ва унинг хулқига кўпинча жуда қаттиқ таъсир ўтказувчи нарсалар Белнеп учун аллақачоноқ ўтмиш хотираларига ай-

ланган; унинг руҳий вазминлиги ва чидами ҳаётда унга учраб турадиган маънавий ва ижтимоий чалкаш ҳодисаларни (аммо у даражада мураккаб бўлмаганларини) тузуккина фарқлай олишига имкон берар эди.

Сўзсиз, бундай одам ўз табиатига кўра Клайднинг ишига ўхшаш ишга Мейсондек жазаваси тутмасдан ёндаша оларди. Унинг ўзи ҳам йигирма ёшлик вақтида икки қиз ўртасида қолиб, роса қийналган эди: бири билан у фақат кўнгилхушлик қилиб юарди, иккincinnини эса чинакамига севиб қолган эди. Биринчисини йўлдан уриб, кейин – ё уйланиш ва ё қочиб кетишдек мушкул муаммо унинг рўпарасида кўндаланг бўлиб турганида, у жуфтакни ростлаб қолишни афзал кўрган эди. Лекин у аввалига ҳамма гапни отасига яширмай айтган, отаси эса унга изига кетишни маслаҳат берган эди, кейин бу орада уй докторини ҳам ишга солишиб; ниҳоят, отаси минг доллар сарфлаб ва ҳомиладор қизни Утикага жойлаштириш харажатларини кўтариб, охири ўғлини мушкул аҳволдан қутқарди ва унинг қайтиб келиши ҳамда анави иккincinnи қизга уйланиши учун шароит яратиб берди.

Шу сабабли гарчи Белнеп, қўйилган айбга кўра, Клайднинг бераҳм ва қатъий хатти-ҳаракатлар ёрдамида жавобгарликдан қочмоқчи бўлганини сира маъқулламаётган бўлса ҳам, ҳар ҳолда у, Клайд севгидан ақлини йўқотган ва унинг сеҳрига илинган, деган фикрга мойил эди (Белнеп ўзининг бутун юридик амалиёти йилларида қотил одамнинг руҳий дунёсини ҳеч қачон англаб етолмаган эди). Ахир, Клайднинг ҳозирча номи тилга тушган аллақайси бир бадавлат қиз билан дон олишиб юрганини ҳақида ҳам ҳар хил мишишлар юрибди-ку?! Унинг қашшоқлиги, фурури ва шуҳратга ўчлиги барчага аён-ку, ахир?! Овозаларга қараганда, бу гапларда жон бор, шундай бўлгач, Белнеп округ-

да вужудга келган сиёсий вазиятдан анча-мунча фойдаланиши ва демак, Мейсоннинг ҳафсаласини пир қилиб ҳимояни яхши ташкил қилиши ёки ҳеч бўлмаганда бир қатор адлий тортишувлар уюштириб, муҳлатни қайта-қайта орқага суриши мумкин, шунда Мейсон ўзича ҳозир нақд деб ўйлаб юрган округ судьялиги лавозимига ҳам осонликча эришолмайди. Ҳозир, ахир, дадил юридик усусларни ишга солиб, жамоатнинг даргазаблиги ошаётганига ҳам қарамай ва ҳатто айни шу сабабга кўра, ишни кўриб чиқишни бошқа округга ўтказиш ёки янги гувоҳларни қидириб топиш учун муҳлатни чўзиш тўғрисида таклиф киритиш мумкин эмасми? Ана ўшанда, муҳокама Мейсоннинг прокурорлик ваколати тугаган пайтда бошланади. Белнеп яқинда Вермонт штатидан келган шериги мистер Рубен Жефсон билан икковлашиб шу ҳақда бош қотирмоқда эди.

Шу орада мистер Келлогга эргашиб мистер Кетчумен келиб қолди. Кейин мистер Кетчумен ва мистер Келлог билан суҳбат бошланди, бунинг устига Келлог Белнепга ҳозирги сиёсий вазиятни рўйач қилиб, агар шу ҳимояни ўз зиммангизга олсангиз, ғоят бамаъни иш қилган бўласиз, деб ишонтиришга уринди. Белнепнинг ўзи ҳам бу ишдан ниҳоят даражада манфаатдор бўлгани учун, шериги – бояги йигитча билан маслаҳатлашиб кўрди-ю, дарров кўниб қўя қолди. Майли, халойиқнинг кайфияти ёмонлигидан қатъи назар, ҳар қандай шароитда ҳам Белнепнинг сиёсий мартабасига путур етмайди-ку, ахир.

Кетчумен Белнепга бай пулини ва Клайдга йўлланган тавсияномани бергандан сўнг, Белнеп Жефсондан, Мейсонни телефонга чақиришни ва Сэмюэл Грифитс ўз жиянининг ҳимоясини адвокатлар сифатида «Белнеп ва Жефсон»ларга топширганини айтишни ва ундан, яъни Мейсондан

Клайд Грифитсга қўйилган барча айблар тўғрисида, шунингдек, ҳамма гувоҳларнинг тилхатлари ва далил-ашёлар тўғрисида ёзма ахборот бериши ҳамда уларни мурдани ёриб кўрилгандаги ҳужжатлар ва терговчи маълумотлари билан таништиришини илтимос қилиб, шу хабарни етказишини буюрди. Олий суднинг фавқулодда сессияси чақирилганми ёки йўқми, агар чақирилган бўлса, унда ким судья қилиб белгилангани ва суд маслаҳатчиларининг йигилиши қачон бўлиши ҳам уларни қизиқтирар эди. «Ҳа, айтгандай, биз мисс Оденнинг танаси юртига кўмишга жўнатилибди, деб эшитдик, шу рост бўлса, унда мен ва шеригим Жефсон иккаламиз ҳимоя томонидан таклиф этилган врачлар кўриши учун зудлик билан унинг мурдаси гўридан қазиб олинишига ружсат берилишини ҳам сўраймиз», дея қўшиб қўйди Белнеп. Мистер Мейсон аввалига норозилик бицди-ю, лекин охири бориб Олий суд раисининг тегишли фармойишига бўйсунишини ўйлади-да, ноилож кўнди.

Ҳамма ишлар жойига тушгач, Белнеп: Клайд билан учрашиш учун турмага кетяпман, деди. Кун анча кеч бўлса ҳам ҳали у тушлик қилмаган, энди бирор жойда тамадди қилишининг тайини ҳам йўқ эди-ю, аммо у Кетчуменning сўзига қараганда, тузукроқ бир гап олиш қийин бўлган ўша йигитча билан шахсан ўзи учрашиб, дилидагини билиб олмоқчи бўлди. Мейсон билан беллашиш иштиёқи Белнепнинг ичини қиздирав, у ўзича уддабуро ва зеҳни бўлганим учун Клайдни ҳаммадан ҳам кўра мен яхшироқ тушуниб етаман, деб ишонар эди, шу боисдан адвокатларга хос синчковлиги баттар вужудини ҳаяжонга солаётган эди. Бу жиноятда қанчалар сурур ва қанчалар фожиа мужассамлашган эмасми, ахир! Катта сир тутиб унга гапириб беришган, анави Сондра Финчли деган қиз ким экан ўзи?! Узи Клайдни ҳимоя қилишга жалб

этса бўлмасмикин? Ўша қизнинг номини мутлақо тилга олмасликини Белнепга ҳам тайинлаб улгуришди, бу олий сиёсат манфаатлари билан боғлиқ эмиш. Хуллас, Белнеп ўша айёр, шуҳратпараст ва енгилтабиат йигитча билан гаплашишга шу қадар ошиқардики, гўё учишга қаноти йўқ эди.

Белнеп турмага келиб, шериф Слэкка Кетчумен бе-риб юборган хатни кўрсатди-да, илтифот юзасидан уни Клайд камераси яқинидан, аввало билинтирмай маҳбусни кузатиб кўриш мумкин бўлган бир жойга олиб боришиларини илтимос қилди. Шунинг учун Белнепни иккинчи қаватга олиб чиқишид-ю, Клайд камерасига борадиган йўлак эшигини очишиб, бир ўзини сездирмай киритиб юборишиди. У камера томонга юриб бир неча қадам берида тўхтади, Клайд-нинг шу дақиқада темир каравотга муккаси билан тушганча бошини чанглалаб ётганини кўрди; унинг бутун гавдаси иродасизларча шалвираб қолган эди; ёнгинасида эса патнисда ҳали мутлақо кўл урилмаган таомлар туради. Гап шунда эдики, Кетчумен кеттач, Клайд ўзининг бетайин ва бемаъни ёлғонига бирортасини ишонтиришга иккинчи марта бехуда уриниб кўргач, бутунлай ҳафсаласи пир бўлган эди. У шу даражада тушкунликка берилганидан росмана йиғлар, елкалари унсиз ноладан тўхтовсиз силкинар эди. Белнеп буни кўрганда ўзининг ҳам ёшлик машмашалари ёдига тушиб кетди-ю, унга ниҳоятда раҳми келди. Ёвуз қотил йиғламайди, деб ўйлади у.

Белнеп камера эшигига яқин келди-да, бир озжим турди, кейин:

– Ие, ие, Клайд! – дея гап бошлади. – Йиғлашиниз мутлақо ўринисиз. Бунчалик тушкунликка тушмаслик керак. Ишингиз сиз ўйлаётгандай унчалик чорасиз эмасдир балки. Туриб ўтиринг, адвокатдан яширманг ҳеч нарсани, ҳарқалай, озми-кўпми сизга фойдам тегиб қолса керак, истайсизми шуни? Исмим Белнеп, Элвин Белнеп. Мен шу ерда,

Брижбургда яшайман, сизга мени анави, яқындағина олдингизда бұлған йигит, Кетчуменмиди, ҳа, ўша юборди. У сизга унчалик ёқмаганга ўхшайды шекилли? Менга ҳам ёқмади. Назаримда, таъбимизга унчалик мос тушмайдиган одам күринади у. Лекин у мени сизнинг ҳимоячингиз қилиб тайнинлади, мана унинг хати.

Белнеп құвноқдик билан дадил-дадил сўзлаб, темир панжара орасидан хатни узатди. Клайд эса ҳайратта тушганча журъатсизгина яқынлашиб келди. Белнепнинг овози аллақандай ўта самимий, ўзгача эшитилди, бу овозда худди раҳмдиллик, ҳамдардлик бордек туюлди унга, бу Клайдга журъат берди. У иккиланмай хатни олиб ўқиб чиқди-ю, кейин кулимсираб, қайтариб берди.

– Ана, олам гулистон, ўзим ҳам шундай деб ўйлаган эдим, – давом этди Белнеп далда бериб, у шу тобда ўз шахсининг ёқимтойлиги туфайли шундай таъсирланиш рўй берди, деб ниҳоятда мамнун эди. – Мана бу бошқа гап. Биламанки, икковимизнинг гапимиз бир ердан чиқади. Мен буни сезиб турибман. Сиз менга худди ўз онангиз билан гаплашгандай ишониб бемалол гапираверинг. Сира хавотирланманг, агар истамасангиз, бироннинг қулоғига ҳатто бир оғиз сўэимиз ҳам бориб етмайди, тушуняпсизми? Клайд, агар қўнсангиз, мен ҳимоячингиз бўламан-да, сиз эса менга мижоз бўласиз. Биз икковимиз эртага ёки хоҳлаган пайтингизда бирга ўтиришимиз ва сизнингча, мен нимани билишим зарур бўлса – ўша нарсаларнинг барини гапириб беришингиз, мен ҳам нималарни билишни исташим ва сизга ёрдамлаша оламанми ёки йўқми ана шуларни гапириб беришим мумкин. Менга озми-кўпми кўмак бериш билан ўзингизга кўмак беражагингизни исботлаб ўтиришнинг ҳожати ҳам йўқ. Тушунарлими? Худо урсин, агар мен сизни бу воқеадан соппа-соғ олиб чиқиб

кетишга қўлимдан келганча ҳаракат қилмасам...  
Хўш, бунга нима дейсиз?

У ҳамдардлик билан далда бергансимон, ҳатто дилкаш бир қиёфада жилмайиб қўйди. Клайд шу ердалигидан бери биринчи бор қўрқмай сир айтса бўладиган одам топилганини сезди-ю, балки, яхшиси бу кишига бор гапнинг ҳаммасини бутунлай гапириб берган маъқулмикан, деб ўйлай бошлиди... У нима учун шундай хаёлга борганини айтиб беролмасди-ю, аммо Белнеп унга ёқиб қолган эди. Клайд ўша заҳотиёқ, гарчи умиди у қадар кучли бўлмаса ҳам, бу киши уни тушуниб, ҳатто ҳамма ёки деярли ҳамма гапларни билгач, ўзига ҳамдард бўлиб қараши мумкинлигини англади. Белнеп Клайдга: душмани – Мейсон унинг ҳар қандай шароитда ҳам жазоланишини истаётгани, агар у, яъни Белнеп қулай ҳимоя режасини туза олсагина ишнинг кўрилишини сўzsиз чўзиши мумкинлигини ва у пайтда Мейсоннинг прокурорлик муддати тугаб қолишини тушунтириб берди. Клайд ҳам мистер Белнепга, агар бир кеча ўйлашга ижозат этсангиз, унда эрталабми ёки бошқа хоҳлаган пайтингизда келсангиз, ўшанда ҳаммасини сўйлаб берардим, деган гапни айтди.

Эртаси куни Белнеп Клайднинг рўпарасига қўйилган стулда ўтирганча шоколад еб, унинг гапларини тинглар эди, Клайд эса темир каравотда ўтирган кўйи Ликургга келган пайтидан буёнги бутун ҳаётини – саргузаштларини барча тафсилотлиригача ҳикоя қилишга тушди: у бу ерга нима учун келиб қолгани, Канзас-Ситида ҳалок бўлган бола (аммо анави газета қийқимини олиб сақлаб қўйгани ёдидан қўтарилиб, у ҳақда ҳеч нима демади); Роберта билан учрашгани, эҳтиросга тўлиб-тошиб унга берилиб кетгани, Робертанинг ҳомиладорлиги ва бу баҳтсизликдан қутулишида ўзининг унга қанчалар кўмаклашмоқчи бўлгани, кейин уни фош

этиш ниятида Робертанинг пўписа қилгани, шу орада қўлига газетадаги анави мақола тушиб қолгани ва у охири бекиёс талваса ҳамда даҳшат ичида ўша ишга қўл ургани – шуларнинг барини бирма-бир гапира кетди. Аммо у бундай нарсани ўзича сира ўйлаб тополмаган бўларди, мистер Белнеп буни тушуниши керак. Ахир, у Робертани ўлдирмаган-ку. Йўқ, ўлдирмаган. Мистер Белнеп ҳар қанча хаёлга борганда ҳам, бу масалада унга ишониши керак. У мутлақо Робертани уришни истамаган эди. Йўқ, йўқ, йўқ! Бу бир баҳтсиз тасодиф бўлди. Унда фотография аппарати ва унинг оёқчалари бор эди, Мейсон топған оёқчалар чиндан ҳам уники. Робертани аппарат билан бехосдан уриб юборгани ва аппаратнинг сувга чўкиб кетганини кўрганидан сўнг Клайд оёқчаларни қулаб тушган бир дараҳт остига яшириб қўйди, аппарат, ҳойнаҳой, ҳозир ҳам сув остида ётган бўлса керак, агар плёнкаси ивиб кетмаган бўлса, унда Клайд билан Робертанинг расмлари бор. Лекин у Робертани қасддан урмаган. Йўқ! У бундай бўлишини истамаган ҳам эди. Роберта унга қараб интилганда, у туртиб юборди, аммо бу бутунлай бехосдан бўлди. Қайиқ ағдарилиб кетди... Шундан кейин Клайд қайиқ ағдарилмасдан олдин гўё қоқшол бўлгандай қотиб қолганини иложи борича, аниқроқ тасвирлашга уринди, чунки шу қадар чалкашликка йўл қўйгандан кейин, масалани охиригача очиб ташлай олмас эди.

Клайднинг бу фалати ҳикояси бора-бора Белнепни ҳам чарчатиб, ҳаяжонга солди; у Клайд айтган фикрларнинг барини бу ердаги содда, қишлоқи суд маслаҳатчиларига гапириб беришнинг ўзиёқ мушкул нарса эканлигини билар эди, ваҳоланки, анави ёвуз ва бешафқат режа ҳамда ниятларини-ку, гапириб ўтирмаса ҳам бўлади. Охири у ҳолдан тойиб, довдираб ва эсанкираб ўрнидан турди-ю, Клайднинг елкасига қўлинни қўйди.

– Гап бундай, Клайд, – деди у. – Менимча, бу-гунга етади шу ҳам. Қанчалик нарсаларни бошдан кечирганингиз ва буларнинг бари қандай юз бер-ганини тушуниб, қанчалар чарчаганингизни ҳам кўриб турибман. Сиз менга ҳаммасини очиқ-оий-дин гапириб бера олганингиздан хурсандман, сиз-га бу қанчалар оғир бўлганини ҳам биламан, ал-батта. Лекин энди, менимча, сиз бошқа гапирмас-лигингиж керак. Ҳали орада вақтимиз кўп, ҳозирча мен баъзи ишларимни тўғрилаб кўяй. Икковимиз эртагами ёки индингами бу ишнинг айрим таф-силотларини муҳокама қиласиз. Ҳозирча ухлаш-га ётинг-да, дам олинг. Ҳали сиз билан қиласи-ган ишимиз кўп, ўшанга куч сақлашингиз керак. Энди ҳадеб ташвиш тортаверманг, бари бир фой-даси йўқ, тушунарлими? Мен, тўғрироғи, шеригим билан икковлашиб сизни бу можародан қутқазиб олиб чиқиб кетамиз. Сизга ҳали шеригимни ҳам кўрсатаман. У ҳам сизга маъқул тушади. Аммо мен сизнинг иккита шарт устида йўлаб, ўшанга қатъ-ий амал қилишингизни истар эдим. Биринчидан, ҳеч кимнинг ҳеч қандай пўписасидан қўрқманг, эсингизда бўлсин, мен ёки шеригим кунин, жуда бўлмаганда бир марта сиздан хабар олиб турдамиз, агар нимадир айтмоқчи ёки сўрамоқчи бўлсангиз, бизга хоҳлаган пайтингизда мурожаат этишингиз мумкин. Иккинчидан эса, агар мен лозим топма-сам, ҳеч ким билан – Мейсон билан ҳам, шериф билан ҳам, турма назоратчилари билан ҳам ҳеч нарса ҳақида гаплаша кўрманг. Ҳеч ким билан, эшитяпсизми?! Энг муҳими – энди бошқа йиғла-манг. Чунки, агар сиз фариштадек оқ ёки шай-тоннинг ўзидек гуноҳкор бўлган тақдирингизда ҳам, кимнингдир олдида йиғлашдан кўра ҳам пастроқ хор-зорлик йўқ. Атрофингиздаги одамлар ҳам, турма назоратчилари ҳам бари бир буни ту-шунишмайди; улар кўз ёшини доимо иродасизлик

ёки айбга иқрорлик аломати, деб билишади. Мен сиз сиз ҳақингизда уларнинг бундай ўлашлари ни истамас эдим, айниқса, сизнинг чиндан ҳам гуноҳсизлигинги билганимдан сўнг. Энди булар менга равshan. Бунга ишонаман, тушунарлимиси? Шундай экан, Мейсоннинг олдидами ёки бошқаларнинг олдидами, қовофингизни солиб ўтируманг.

Чиндан ҳам, бундан бу ёғига бир оз кула бошлашингиз ёки жуда бўлмаганда жилмайишингизни истар эдим. Ким билан кўришманг, ўзингизни қувноқроқ тутаверинг. Биласизми, юристларда: ўз гуноҳсизлигини ўлаш – одамга қувват бағишлади, деган эски бир мақол бор. Эсингизда бўлсин, сиз гуноҳкор одаммассиз, ахир, шундай экан, гуноҳкорлардек тикилманг-да. Худди энг охирги дўстидан ҳам айрилган одамга ўхшаб ўтиришингизни қаранг, нима, осмон узилиб ерга тушибдими ўзи. Мен ва шеригим – мистер Жефсон сиз билан биргамиз. Бир-икки кундан сўнг уни ҳам олдингизга бошлаб келаман. Унга ҳам худди менга қилгандек муомала қилаверинг. Унга ишонишингиз мумкин: агар билсангиз, баъзи масалаларда у ҳатто мендан ҳам устароқ қонунчи. Эртага сизга иккитагина китоб, журнал ва газеталар келтириб бераман, ўқийсиз, расмларини кўрасиз. Ана шунда хавотирили фикрларингиз нарироқ кетади.

Клайд зўрга жилмайиб, бош силкиди.

– Ҳа, яна бир гап. Билмадим, сиз диндормисиз, йўқми? Лекин ҳар қандай шароитда ҳам, мабодо сизга таклиф этишса, якшанба кунги тоат-ибодатга астойдил бориб туришингизни маслаҳат бераман. Бу ернинг одамлари диндор халқ, шу сабабли иложи борича яхшироқ таассурот қолдиришингизни истар эдим. Одамлар нима дейишса – деяверишин, қандай қарашса – қарайверишин, менинг айтганимни қилаверинг. Агар анави Мейсонми ёки шу ерлик бошқа биронтасими, яна жонингизга тегиши

са, менга бир энлик хат ёзинг. Хўш, энди мен кетдим бўлмаса, қани хайрлаша туриб қувноқроқ қулиб боқинг-чи, янаги келишимда ҳам агар малоллик келмаса, очиқ чеҳра билан кутиб олинг мени. Кейин оғзингизга эҳтиёт бўлинг, тушундингизми?

У Клайднинг кифтига қоқиб, орқасига уриб-уриб қўйганча камерадан чиқар экан, ичида ўйлай бошлиди: «Бу йигитча ўзи айтганидай, шунчалик бегуноҳмикин? Қизни бехосдан-бехос шунақанги уриб юбориш мумкинми? Кейин нарига сузиб кетгани ҳам қизиқ, чунки ўзининг гапига қараганда, мени ҳам чўктириб юборади, деб қўрқсан эмиш. Бу ёмон гап! Жуда ёмон гап! Бунга ишонадиган ақалли биронта одам топилармикин? Анави жомадон-чи, иккита шляпа-чи, йўқолган костюм-чи? Лекин у қизни бехосдан уриб юбордим, деб онт ичяпти. Хўш, унда ўзи тузган режалар-чи, қонун нуқтаи назаридан қараладиган бўлса, унинг анави нияти ҳазилакамми, ахир? У ҳақиқатни гапиряптими ёки ҳали ҳам, мен-ку мен, ҳатто ўзини ҳам алдашга уриняптими? Анави фотография аппарати-чи... Уни Мейсон топиб, ҳаммага кўрсатгунига қадар бир амаллаб қўлга тушириш керак эди. Анави костюмни ҳам. Мен уни топишим зарур, яшириб қўйилган экан, деган фикрни рад этиш учун, ҳарқалай, учини чиқариб қўйганим маъкул... костюм ҳар доим бизнинг қўлимизда эди... Ликуррга тозалатиш учун юборилган эди... дейиш мумкин. Э, йўқ, йўқ... сабр қилиш керак... буни аввалдан обдан ўйлаб, пишитиб олиш зарур».

Белнеп шу тарзда битта-битталаб... айни пайтда ҳоргин бир аҳволда, Клайднинг ҳикоясидан мутлақо фойдаланмаслик керак шекилли, бу дараҷада ёвуз кўринмайдиган ва қонун кўзи билан қараганда, қотилликка бу қадар яқин турмайдиган бошқа бирор-бир юмшоқроқ нарса тўқиб чиқариш лозимдир-ов, деган хаёлга борди.

## XV БОБ

Мистер Рубен Жефсон Белнепга ҳам, Кетчуменга ҳам, Мейсонга ҳам, Смиллига ҳам, хуллас, шу пайтгача Клайдни күрган ва унинг иши билан қизиқаётганларнинг биронтасига ҳам ўхшамас эди. У баланд бўй, қотма, қорачадан келган йигит эди, у бир сўзли ва оғир, аммо бир хил тепса тебранмас лоқайдлардан эмас эди; унинг иродаси ва қатъияти чинакам пўлатдек эди. Эпчиллик ва эгоизм унинг ақли ва касбига хос характерли хусусият бўлиб, бу нарса уни силовсин ёки сассиқ кўзанга ўхшатар эди. Унинг юзи қорамағиз эди, ўткир, оч мовий кўзлари пўлат рангига ўхшаш эди, катта бурни унинг файратлилиги ва қизиқувчанилигидан далолат бериб туради, қўллари ҳам, гавдаси ҳам бақувват одам эди. Клайднинг ҳимояси ўзларига («Белнеп ва Жефсон» иродасига) топширилиши мумкинлигини билгач, у бир дақиқа ҳам вақтни бой бермай, терговчи томонидан ўтказилган дастлабки сўроқ ҳужжатларини барча майда-чўйдаларигача ва врачларнинг хулосаси-ю, Роберта билан Сондранинг хатларигача ўрганиб чиқди. Мана, энди Белнепдан Клайднинг Робертани ўлдирмоқчи бўлгани тўғрисидаги иқрорини, аммо бу ниятини у амалга ошиrolмагани, чунки ўша танг аҳволга тушган пайтида қоқшол бўлиб қолганини ёки пушаймон бўлгани, натижада уни бехосдан уриб юборгани ҳақидаги гапларини эшитиб, Жефсон фақатгина Белнепга тикилиб қараб қолди ва унинг лабларидағи истеҳзони ҳеч гап-сўзсиз дарров пайқади:

– Қиз билан кўлга қараб йўл олганда у, ҳойнаҳой, қоқшол бўлмагандир?

– Йўқ.

– Нарилаб сузиб кетганда-чи?

– Йўқ.

– Ўрмонда бораётган ва шляпаси билан костюмини алмаштираётган пайтида-чи, аппарат оёқчаларини яшириб қўйганида-чи?

– Йўқ.

Агар биз бу гаплардан фойдаланадиган бўлсак, унда у қонун олдида худди қизни қасддан ургандек айбдор бўлиб қолаверади, кейин судья сўзсиз, бу ҳақда суд маслаҳатчиларини огоҳлантиради, буни биласиз, албатта.

– Ҳа, биламан. Бу ҳақда мен ўйлаб ҳам кўрган эдим.

– Хўш, унда...

– Гап бундай, Жефсон. Бу, шубҳасиз, оғир мажаро. Назаримда, ҳамма дастаклар Мейсоннинг кўлидага ўхшайди. Агар биз шу тирранчани кутқара олсак, бу – кейин хоҳлаган одамни ҳам қутқариб юборишимиш мумкин, дегани бўлади. Фақат, менимча, биз анави қоқшоллик тўғрисида эслатиб ўтиргмаганимиз маъқулми дейман, ундан кўра ақлдан озганлик, ҳаяжондан ўзини йўқотганлик ёки шунга ўхшаш бирор-бир нарсага шама қилган тузукка ўхшайди, хў, эсингиздами, Гарри Той билан шундай бўлган эди-ю?

Белнеп жим бўлиб қолди ва гумонсираганча хиёл оқ тушган чаккасини қашиб қўйди.

– Сиз уни, сўзсиз, айбдор ҳисоблайсиз, шундайми? – деди Жефсон совуққина қилиб.

– Буни қарангки, гарчи эриш тувлса ҳам, уни айбдор деёлмайман! Ҳарқалай, уни айбдор дейишига у қадар ишончим комил эмас. Тўғрисини айтсам, ҳали шу пайтгача бунақанги чалкаш воқеага сира йўлиқмаган эдим. Бу йигит, сиз ўйлаганчалик жудаям бағритош ва совуққон эмас, ўзини тутишига қараганда у қайтага содда дил ва ипакдек майнин йигитчага ўхшайди, ҳали ўзингиз ҳам кўрасиз уни. У эндингина йигирма бир ёшга ёки йигирма иккига кирган. Гарчи у Грифитсларга қарин-

дош бўлгани билан ўзи бориб турган камбағал, аслида оддий бир хизматчи, холос. Фарбда, Денверда эди шекилли, уларнинг қандайдир бир миссия – хонақолари бор экан, ундан аввал Канзас-Ситида эканлар. У уйидан чиқиб кетганига ҳам тўрт йил бўлибди. Гап шундаки, у Канзас-Ситидаги меҳмонхонада дастёрилик қилиб юрган пайтида болаларча аҳмоқона бир жанжалга аралашиб қолган экан-да, кейин қочиб кетишдан бошқа чора то-полмаган экан. Биз Мейсондан эҳтиёт бўлишимиз керак, бу воқеа ҳақида у бирор-бир нарсани билганми ёки йўқми, аниқлашимиз лозим. Афтидан, бир гуруҳ дастёр болалар, шу жумладан Грифитс ҳам, аллақайси бир бадавлат одамнинг автомобилидан эгасидан сўроқсиз фойдаланишгану, кейин ишга кечикиб қолишдан қўрқиб, машинани тез ҳайдашган ва бир қизчани босиб кетиб, ўлдиришган. Биз шуларнинг барини икир-чикирларигача билиб олиб, тайёр туришимиз зарур, чунки Мейсон кўп нарсалардан хабардор, у судда айни биз кутмаган пайтимишни пойлаб туриб, бу можарони шарт ўртага ташлайди.

– Э, йўқ, бу ҳийласи ўтмайди, масалага ойдинлик киритиш учун жуда бўлмаганда менинг ўзимоқ Канзас-Ситига бориб келишим мумкин, – дея эътиroz билдириди Жефсон ва унинг ўткир мовий кўзлари чақнаб кетди.

Белнеп эса Жефсонга ҳозиргача Клайд ҳақида билганларининг барини гапириб бера бошлади: унинг идиш-товоқ ювгандари, ресторанда дастёрилик қилгани, содали сув сотгани, ташкачи бўлгани, Ликуррга келгунига қадар нима иш учраса, ўша ишларнинг барига уннаб кўргани ва доимо қизларга хуштор бўлиб юргани, аввалига Роберта билан, кейин эса Сондра билан танишганигача – ҳеч нарса қолмади. Охири бориб биттасига кўнгли юришмай, иккинчисини эса ақддан озар даража-

да севиб қолгани ва анави биринчисидан қутулмай туриб, иккинчисига етишолмай доғда юрганларини ҳам сўйлаб берди.

– Шунча гап бўлганига қарамай, қизни ўлдирганига ишонмаётганингиз қизик! – дея сўради Жефсон охири.

– Ҳа, мен сизга айтдим-ку, бунга унчалик ишончим комил эмас. Аммо шунисини аниқ биламанки, у ҳали ҳам анави иккинчи қизнинг ҳажрида куйиб юрибди. Клайднинг ўзи ёки мен ўша қизни тилга олиб қолган пайтимиизда, унинг ранги ўзгариб кетди. Масалан, мен Сондра билан яқин алоқада бўлганимисиз, деб сўраганимда – гарчи У Робертани йўлдан уриб, кейин уни ўлдиришда айбланаётган бўлса ҳам – худди мен унга бирор-бир бепардоз сўз айтиб, уни ёки ўша қизни ҳақорат қилгандек, менга ёмон ўқрайиб қаради.

Белнеп шу ерда лабини буриб жилмайди; Жефсон эса узун, қоқ суюк оёқларини олдидаги ёнгоқ дарахтидан ясалган столга тираганча ҳамон пинагини бузмай суҳбатдошига тикилиб ўтиради.

– Э, шунақами, – деди у ниҳоят.

– Энди бу ёгини эшитинг, – дея давом этди Белнеп. – У: «Йўқ, мутлақо, йўқ! У қиз бундай ишга йўл қўймаган бўлар эди, кейин...» – деди-ю, индамай қолди. «Кейин нима, Клайд?» – деб сўрадим. «Ахир, у қизнинг кимлигини унумтманг-да!» «Тушундим», дедим. Кейин, қизиги шундаки, ота-онаси билмаслиги ва ўзининг ҳамда оиласининг обрўйи у даражада тўкилмаслиги учун ўша қизнинг номини авайлашнинг ва унга ўша қиз ёзган хатларни матбуот ва судда айтмасликнинг бирор-бир иложи йўқмикин, дея қизиқсиниб ҳам кўрди.

– Ростдан шундай қилдими? Хўш, анави иккинчи қизни гапирмадими?

– Худди шу масалада яхшилаб бир бош қотириб олмоқчиман. У ўша қизни ўлдиришни ният қилган

бўлиши ҳам мумкин, эҳтимол, чиндан ҳам ўлдирса, ўлдиргандир, лекин шунга қарамай, билишимча, уни аввал йўлдан урган. Аммо, аслида у анави бошқа қизнинг ишқида бамисоли девона бўлиб, тўғридан-тўғри нима қилаётганини ҳам билмай қолган. Тушуняпсизми? Унинг ёшидаги йигитчалар қай тарзда бундай аҳволга тушишини ўзингиз яхши биласиз-ку, қизларга ҳам ва пулга ҳам ўрганмай туриб, катта-катта мартабаларни орзу қилишади.

– Сиз шу масалада у хийла ақддан озган, деб ўйлаяпсизми? – дея гап қистириб қўйди Жефсон.

– Балки, шундайдир-да... у ўзини йўқотиб, хаёлга қул бўлган... хиёлгина ақлидан озган, биласизми, нью-йоркликлар тили билан айтганда, миянинг инқирози бу. Ҳозир ҳам у, шубҳасиз, анави иккинчи қизнинг шайдоси бўлиб ўтирибди. Назаримда, унинг турмада йиглаши ҳам асосан ўша қиз туфайли. Биласизми, мен ҳузурига кириб борганимда у йиглаётган экан, йиглаганда ҳам худди юраги ёрилиб кетаётгандек ҳўнграб, ўкириб йиглар эди. – Белнеп паришонхотирилик билан ўнг қулоғини қашиди. – Йўқ, нима десангиз денгу, аммо бу гапда анча-мунча жон бор: шу машмашаларнинг бари унинг идрокига таъсир этган... Бир томондан, анави Олден менга ўйланасан, деб зўрлаб турса, бу ёқда буниси сенга тегаман, деб ваъдани қуюқ қиласа... Мен биламан буни, ўзим ҳам бир марта тушганман шунақсанги мушкул аҳволга, – Белнеп Жефсонга ўша воқеани гапириб берди. – Ҳа, айтгандай, – дея давом этди у кейин, – Клайднинг гапига қараганда, анави чўкиб кетган қайиқлар ҳақидаги хабарни ўн саккизинчи ёки ўн тўққизинчи июндаги «Таймс Юнион»дан топишимиз мумкин экан.

– Майли, – деди Жефсон, – мен қидириб топаман.

– Эртага сиз мен билан унинг ҳузурига боришинизни истардим, – деб давом этди Белнеп. – Кўрамиз, сизда у қандай таассурот қолдираркин. Биз иккала-

миз бирга борамиз, бошидан ўтганларини сизга ҳам худди менга айтгандай қилиб гапириб берармикин, мен шуни бир синааб кўрмоқчиман. У ҳақда сизнинг фикрингизни билмоқчиман.

– Ҳа, фикримни биласиз, бундан хотиржам бўлинг, – дея гапни чўрт кесди Жефсон.

Янаги куни Белнеп ва Жефсон биргаликда Клайдни бориб кўришди. Жефсон шу учрашувдан сўнг, Клайднинг бу ғалати ҳикояси тўғрисида яна қайтадан бош қотириб кўргандан кейин ҳам унинг Робертани қасддан урмоқчи бўлганликда айби борми-йўқми, бу ҳақда қатъий бир қарорга келолмади, Клайд эса бундай ниятим йўқ эди, деб турибди... Агар шу гапи рост бўлса, унда нега у нарига сузиг кетиб, Робертанинг чўкиб кетишига йўл қўйиб берди? Шу боисдан, у-ку, яъни Жефсон-ку майли-я, аммо суд маслаҳатчиларининг бу гапга ишонишига ҳеч кимнинг кўзи етмайди-да.

Яна Белнепда, Клайд газета мақоласидан ўрганиб тузган ўша режасини амалга оширишга киришган пайтида, эҳтимол, руҳий осойишини йўқотиб, асабий жиҳатдан бир оз айнигандан бўлиши мумкин, деган тахмин ҳам бор эди. Тўғри, буни ҳам инкор этиш қийину, бироқ Жефсоннинг фикрича, ҳозир Клайд етарли даражада ақдли ва эс-хуши жойида эди; тўғри, Клайдни ўзига етгунча тошбафир ва Белнеп ўйламоқчи бўлаётганидан кўра анча-мунча айёр, деб ҳисоблар эди; тўғри, Клайднинг майнин ва ёқимли муомаласи туфайли бу фикр бир оз юмшоқроқ тус олди, чунки унга адоват билан қараашга одамнинг сира қўнгли чопмас эди. Дарвоқе, Клайд Белнеп билан қандай гаплашган бўлса, Жефсон билан ҳам шундай қўнгил очиб, ишониб гаплашгани йўқ, шу боисдан Жефсон аввалига Клайдни унчалик ёқтирумади. Аммо Жефсон ўзини шу даражада қатъий ва жиддий тутдики, Клайд бирпаснинг ўзида: балки бу юрист калбида менга хайриҳоҳ бўлма-

са ҳам, ҳар ҳолда у менинг ишимга ўз касби нуқтаи назаридан қаттиқ қизиқяпти, деган холосага келди. Орадан сал ўтмай, бу ёш адвокатга у Белнепдан ҳам кўра кўпроқ умид қўя бошлади.

– Мисс Олденнинг сизга ёзган хатлари ишни ниҳоятда чигаллашибирини ўзингиз ҳам билсангиз керак, албатта? – деб гап бошлади Жефсон, Клайд унга ўз тарихини қайта сўзлаб бергач.

– Ҳа, сэр.

– Бу ишнинг икир-чикирларидан хабардор бўлмаган одамларга у хатлар фоят ғамгин туюлади, шуниси учун ҳам, эҳтимол, суд маслаҳатчилари сизга қарши тиш қайрашлари мумкин, айниқса, уларни мисс Финчлининг хатларига солиштиришса, шундай бўлиши турган гап.

– Ҳа, тушунаман, – деб жавоб берди Клайд. – Лекин Роберта илгари бундай эмас эди. У бошига мушкул иш тушгандан кейингина шунаقا хатлар ёза бошлади, мен эсам тинч қўйишини истаган эдим.

– Биламан, биламан. Бу ҳақда яна ўйлаб кўриш керак, балки буни биз судда ҳам айтишимиз мумкиндир. Эҳ, қани энди қандайдир йўлини қилиб, бу хатларнинг судда кўрилмаслигининг иложини топганимизда-ю! – дея хитоб қилди Жефсон Белнепга мурожаат этиб, кейин яна Клайдга қаради: – Сизга бир саволим бор: сиз ўша қиз билан салкам бир йилча яқин бўлгансиз, шундайми?

– Ҳа.

– Шу давр ичида ёки ундан олдинми, ўша қиз бошқа бирор йигитча билан дўстона, яқин алоқада бўлмаганмиди? Сиз бу ҳақда ҳеч нарса билмайсизми?

Клайд Жефсоннинг у қадар қўрқоқ ва жizzаки эмаслиги ҳамда ўзига маъқул тушса, қутулиб қолиш учун ҳар қандай фикр-у, ҳар қандай қалбакиликка ундашдан ҳам тоймаслигини тушунди. Лекин Клайд бу шамадан қувониш ўрнига, дил-дилидан нафратланиб кетди. Робертанинг хулқини била ту-

риб, шунчалик сохтагарчиликка бориш чинакам қабиҳлик бўлар эди! У бунақанги адолатсизликка шама қилишларига чидолмас эди ва буни истамас эди ҳам, шу боисдан қуидагича жавоб қайтарди:

– Йўқ, сэр. Унинг яна бошқа бирор кимса билан танишилигини ҳечам эшитмаганман. Бошқа таниши бўлмаган, буни аниқ биламан.

– Жуда соз, унда шундай деб ёзиб қўямыз, – деди Жефсон. – Унинг хатларига қарагандা ҳам гапнинг рост чиқса керак, деб ўйлайман. Аммо биз барча далилу ашёларни билишимиз лозим. Агар орага бошқа биронтаси аралашган бўлганда-ю, ҳаммаси бошқача тус олар эди-я.

Клайд: бу фикрни қандоқ баҳолашимни Жефсон чиндан ҳам синаб кўрмоқчи шекилли, деб иккиланди-да, лекин бундан қатъи назар, бундай гапни ҳатто хаёлга ҳам келтирмаслик керак, деган қарорда тўхтади. Шунга қарамай, у ўзига ўзи: «Фақат мана шу кишигина мени қандай ҳимоя қилиш йўлини билади! У жуда эпчилга ўхшайди», деб қўйди.

– Энди, – дея давом этди Жефсон ўша-ўша жиддий ва синовчан нигоҳ билан (Клайднинг назарида унинг сўзларида зифирдай ҳам хайриҳоҳлик ва ачиниш ҳисси йўқ эди), – мен сиздан сўрамоқчи бўлган яна бир нарса бор: сиз ўша қиз билан танишган пайтингиздан бери, унга яқин бўлгунингизча ёки ундан кейинми – шу орада у сизга бирор марта бемаза, таҳқирловчи ёки пўписа қилувчи хат-пат ёзганмиди, бирор-бир талаб қўйганмиди?

– Йўқ, сэр, эслолмайман, – деб жавоб қилди Клайд. – У ҳеч қачон бундай хат ёзмаган эди. Йўқ... Фақат охирги хатларини айтмаса... фақатгина энг охирги хати.

– Ўзингиз худди унга сира ёзмагандай кўринасиз-а?

– Йўқ, сэр. Мен унга ҳеч қачон, ҳатто бир энлик ҳам хат ёзмаганман.

– Сабаб?

– Биласизми, у шу ерда, фабрикада, шундок ёнгинамда эди. Кейинги пайтларда – отасиникига кетганды эса, унга хат ёзишга құрқдим.

– Ҳа-ҳа, тушунарли...

Бироқ Клайд Робертанинг майинлигидан баъзан асар ҳам қолмаслиги ва у гапга күнмай... ҳаддан ташқари дадил ва ҳатто қайсар бўлиб кетиши ҳақида мутлақо самимий бир тарзда сўйлаб бера бошлиди. Клайд унга: тўй қиласан, деб туриб олишинг эл-юрт ичидаги мавқеимга ва бутун келажагимга путур етказади, ахир мен ишлаб, сенга пулдан қарашиб турман-ку, деса ҳам гапига сира қулоқ солмабди Роберта. Мана энди, Клайднинг сўзларига қараганда, унинг қайсарлиги ўзининг бошига етибди... Айни пайтда эса мисс Финчли Клайдга дунёдаги йўқ нарсаларни ҳам топиб беришга тайёр экан (бу сўзларни айтиётганда Клайднинг товуши майинлашиб, ҳаяжон билан титраб кетганини Жефсон дарров пайқади).

– Сиз мисс Финчлини чиндан ҳам қаттиқ севиб қолганмидингиз?

– Ҳа, сэр.

– Демак, мисс Финчлини учратганингиздан сўнг Роберта билан бошқа бирга бўлолмас эдингиз, шундайми?

– Йўқ, йўқ! Мутлақо бўлолмас эдим!

– Тушунарли, – деди Жефсон бошини маънодор қилиб сарак-сарак қимиirlатганча, айни пайтда у шуларнинг бари суд маслаҳатчиларига айтилса, қанчалар бенаф ва хавфли иш бўлар эди, деб ўйларди. Балки, энг яхшиси, ҳозирги вақтдаги суд ишлари тажрибасига асосланиб туриб, Белнеп айтганидай, ғоят мушкул аҳвол туфайли (Клайднинг назарида шундай эди) келиб чиққан ақддан озишлик ва руҳий мажруҳликка йўйиб қўя қолган тузукка ўхшайди. Жефсон ҳозирча бу масалани

бир четга қўйиб, яна гапида давом этди: – Сиз айтяпсизки, ўша охирги куни у билан бирга қайиққа тушганингизда аллақандай бошқача бўлиб кетибсиз ва уни урган вақтингизда аслида нима қилаётганингизни ўзингиз билмай қолибсиз?..

– Ҳа, сэр, бу рост гап.

Клайд ўша пайтда аҳволи қандай бўлганини яна қайта тушунтиришга урина бошлади.

– Яхши, яхши, мен сизга ишонаман, – деб жавоб берди Жефсон, гёё Клайднинг гапларига ишонаёт-гандай, аслида эса унинг ҳолати қандайлигини тасаввур ҳам қилолмас эди. Лекин, – деди у, – хилма-хил вазиятлар туфайли биронта ҳам суд маслаҳатчиси сизга ишонмаслигини ўзингиз ҳам тушунасиз, албатта. Бу ишда изоҳ талаб қилювчи мужмалликлар шу даражада кўпки, ҳозирги аҳволда буларни кўнгилдагидек тушунтириб беришга бизнинг қурбимиз етмайди. Бу ёғига нима қилишимизни билмадим, – энди у Белнепга юзланди. – Анави иккита шляпа, жомадон... ахир, қандай асос билан биз руҳий хасталик ёки шунга ўхшаш нарсаларни рўкач қила оламиз? Мен бу ишнинг ўнгидан келишига унчалик ишонмаяпман. Сиз билмайсизми, оиласизда ҳеч қачон жинни-пинни бўлган одам йўқмиди? – дея қўшиб қўйди у яна Клайдга мурожаат этиб.

– Йўқ, сэр, мен бундай нарсани билмайман.

– Аллақайси амакингиздами, амакиваччангиз ёки бувангиздами тутқаноқ ё бошқа шунга ўхшаш телбалик белгилари учрамаганми?

– Йўқ, сэр, бунақанги нарсаларни сира эшитмаганман.

– Агар мен ишга киришсам-да, шунга ўхшаш сабабни исботлаб бермоқчи бўлсам, ўйлашимча, Ликургдаги бадавлат қариндошларингизга ҳам бу унчалик ёқмаса керак?

– Улар норози бўлишар, деб қўрқяпман, сэр, – дея жавоб берди Клайд.

– Хўш... бир бош қотириб кўрайлик-чи... – деди Жефсон бир оз жимлиқдан сўнг. – Ҳаммаси ниҳоятда мураккаб. Лекин бундан кўра хиёл тузукроқ бошқа бирор-бир йўлни мен сира кўрмаяпман.

Шу пайт у Белнепга мурожаат этиб, ўз-ўзини ўлдириш уйдирмаси мақсадга мувофиқ эмасми, чунки Робертанинг хатларидан ҳам унинг фам-фуссага мойиллиги кўриниб турибди, бу эса осонгиниа ўз жонига қасд қилишга олиб келиши мумкин-ку, сиз бунга қандай қарайсиз, деб сўради. Роберта Клайд билан кўлда қолгач, менга уйлан, деб ёлвора бошлиган ва Клайд рад этгач, у ўзини сувга отган, деса бўлмасмикин? Клайд эса шу даражада довдирраб ҳаяжонга тушганидан уни қутқариш ҳам хаёлига келмай қолган.

– Унда унинг ўз оғзи билан айтган: шляпамни шамол учириб кетди, уни ушлайман деб қайикни ағдариб юбордим, деган сўзи нима бўлади? – дея эътиroz билдириди Белнеп, у буни шундай бир оҳангда гапирдики, гўё бу ерда Клайд йўқдай эди.

– Ҳа, албатта, бу фикрингиз ҳам тўғри... Борди-ю, Робертани ўзини ўзи ўлдирап даражадаги аҳволга келтиргани учун маънавий жавобгарликдан қўрқиб, унинг ўз жонига қасд қилганлигини ҳам яширган экан, дейилса-чи, бу қандай?

Клайд қалтираб кетди, аммо Белнеп ҳам, Жефсон ҳам энди унга аҳамият беришмас эди. Улар худди бу ерда Клайд мутлақо йўқдай ёки бу ҳақда унинг тайинли бир фикри бўлмайдигандай бемалол гаплашишар эди. Клайд эса бундан ҳайратга тушарди-ю, лекин норозилик билдиrolмас эди – у ўзини шу қадар ожиз сезарди.

– Ҳа, лекин ўзини сохта ном билан ёздиргани-чи?! Иккита шляпа, костюм, жомадон! – деди Белнеп кесиб-кесиб, у шундай бир оҳангда гапирдики, Клайд бундан ўзининг аҳволини Белнеп қанчалар мушкул деб ҳисоблаётганини тушунди.

– Қанақанги назарияни ўйлаб топмайлик, барι бир бу нарсаларни нимадир деб изоҳлаб бериши мизга тўғри келади, – деди Жефсон ўй сурганча.

– Менимча, унинг ақлдан озганилигига ишора қилишимиз лозим, асли ниятлари ҳақида эса зинҳор оғиз очмаслигимиз керак, деб ўйлайман. Бироқ бу ҳақда гапирмасак, унда муқаррар равишда анави далилларга дуч келамиз.

Жефсон худди: «Тавба, нима қилишни билмай обдан бошим қотди-ку!» дегандай, ҳоргин бир тарзда қўлларини уриб қўйди.

– Ҳамма шароитларни ҳисобга олинг-да, – дея тайинлай бошлади Белнеп: – У унга уйланишдан бош тортган, хатлардан эса унинг ваъда бергани кўриниб турибди... бу қайтага унга баттар зиён келтириб, ҳалқни унга баттар гижгижлаб қўяди. Йўқ, бу бўлмайди, – деб якунлади у. – Шунаقا бир нарсани ўйлаб топиш керакки, салгина бўлса ҳам унга одамларнинг кўнгли эрисин.

Улар гўё орада ҳеч гап бўлмагандай яна Клайдга ўғирилишди ва унга: «Оғайни, роса бошимизни қотирдинг-ку!» деган маънода разм солишли.

Кейин Жефсон:

– Ҳа, ростдан, қаердадир Крэнстонлар чорбоги яқинида кўлга ташлаган анави костюмингиз... – деди. – Сиз менга тузукроқ тушунтириб беринг, уни қаерда сувга ташлаган эдингиз, уйдан узоқроқ жойми?

Клайд қийналиб, барча тафсилотларни эслагунча, у кутиб турди.

– Агар мен ўша ерга борсам, эҳтимол, тезда топарман ташлаган жойимни.

– Ҳа, биламан, лекин Мейсонсиз сизни у ёқса юбо-ришмайди, – деб эътиroz билдириди Жефсон. – Ҳатто у билан ҳам қўймасликлари мумкин. Сиз турмада-сиз, шу сабабли штат маъмурларининг рухсатисиз сизни бу ердан олиб чиқиб бўлмайди, тушундингиз-

ми? Бироқ биз ўша костюмни топиб келишимиз керак. – Кейин у Белнепга ўгирилиб, овозини пасайтирганча құшимча қылди: – Уни топиб, тозалатишга бериш керак, сүнгра уни яшириб қўйилмай, балки Грифитснинг ўзи томонидан тозалатишга юборилгандай қилиб қўрсатиш зарур, тушунарлимис?

– Ҳа, тўғри, – деб маъқуллади Белнеп бепарво бир тарзда, Клайд эса ўз фойдасига очиқчасига тўқилаётган бу фирибгарлик ва алдамчилик савдосидан бир оз ажабланганча, қизиқиши билан гапга қулоқ сола бошлади.

– Энди сувга тушиб кетган анави фотография аппарати ҳақида келишиб олайлик, уни ҳам тошишга уриниб қўриш лозим. Менимча, Мейсон уни билса керак ёки ўша ерда деб тахмин қилаётгандир. Ҳарна бўлганда ҳам аввал уни Мейсон топиб олмасидан биз қўлга туширсак, ишимиз ўнгидан келарди. Сиз улар билан бирга борганингизда, қайиқ ағдарилиб кетган жойни тўғри белгилашдими, қандай фикрдасиз?

– Тўғри белгилашди, сэр.

– Майли, кўрамиз, аппаратни топишнинг иложи йўқмикин? – дея давом этди Жефсон Белнепга юзланиб. – Тағин у судда қалқиб чиқиб ўтирумасин, оддини олиш керак. Унда улар қизни аппарат оёқчалари ёки бошқа бирор нарса билан урган, деб айюҳаннос солишади, биз эсак, шунда уларни боплаб таъзирларини берамиз.

– Бу ҳам тўғри, – деб жавоб қылди Белнеп.

– Энди Мейсоннинг қўлидаги жомадон масаласи. Мен ҳали уни кўрмадим, лекин эртага бориб кўрмоқчиман. Сиз, қизиқ, сувдан чиққан пайтингизда анави костюмингизни ҳўл ҳолича жомадонга тиқиб қўйганмидингиз?

– Йўқ, сэр, аввалига мен уни сиқдим – қўлимдан келганча қуритишга ҳаракат қылдим. Кейин илгари нонуштамиз солинган қофозга ўрадим-да,

жомадон тагига қурук барглардан солиб, сүнгра костюм устидан ҳам барг сочиб қўйдим.

– Кейин жомадондан олган пайтингизда тагида нам доғлар қолмаганмиди, қўзингиз тушмадими?

– Йўқ, сэр, қолмаган эди шекилли.

– Лекин аниқ билмайсиз-а?

– Ҳозир сиз сўраётганингиздан сўнг унчалик аниқ билмайдиганга ўхшайман.

– Майли, буни эртага ўзим бориб кўраман. Энди қизнинг юзидағи моматалоқдар масаласига келайлик. Сиз уни бирор-бир нарса билан урганман, деб ҳеч кимга тан олмаганмисиз?

– Йўқ, сэр.

– Бошидаги яралари чиндан ҳам сиз айтгандай қайиқ чети урилиб кетгандан бўлганми?

– Ҳа, сэр.

– Қолган бари яра-чақалари эса, сизнингча, фотография аппаратининг излари, шундайми?

– Ҳа, сэр, шундай бўлса керак, деб ўйлайман.

– Биласизми, нима, – дея Жефсон яна Белнепга мурожаат этди. – Мен ўйлайманки, вақти келганда биз: бу моматалоқ ва жароҳатлаар Клайднинг иши эмас, балки қизни қидириб, кўл тубини хода ва илгаклар билан илма-тешик қилишганда қолган излар, деб дадил айтишимиз мумкин, тушунарлими? Ҳарқалай, мана шу уйдирмани бир ишлатиб кўрса бўлади. Борди-ю, айб хода ва илгакларда эмаслиги аниқданиб қолинса, – деб қўшимча қилди у лоқайд бир оҳангда ва хийла қовоғини уйиб, – унда сўзсиз, мурдани кўлдан бекатгача, кейин эса темир йўлда олиб кетиш пайтларида уринтириб қўйишган бўлади.

– Ҳа, назаримда, жароҳат излари бошқа нарсаданлигини Мейсонга исботлаб бериш ҳам ҳазила-камга тушмайдиганга ўхшайди, – деб жавоб қилди Белнеп.

– Аппарат оёқчаларига келганды эса, мурдани гүридан қазиб олиб, ҳаммасини ўз қўлимиз билан ўлчаб чиқишимиз керак, қайиқ четининг қалинлигини ҳам ўлчаб кўриш лозим. Ана ундан сўнг, охири бориб, Мейсон гарчи аппарат оёқчаларини қўлида тутиб турган бўлса ҳам, уни ўз манфаатлари йўлида ишлатиб бўпти.

Шу сўзларни айтаётганида Жефсоннинг кўзлари торайиб, баттар чақнаб, мовий тус олди. Унинг боши ва озғиндан келган бутун вужуди сассиқкўзаннинг нимасинидир эсга солар эди. Уларни сиполик билан кузатганча, гапларига қулоқ солиб турган Клайд худди мана шу кичик юрист ўзига ёрдам бера оладигандай бўлиб туюлди. У шунчалик зийрак ва ишбилармон, шунчалик дангалчи, вазмин ва бегам эди ва шунга қарамай, бамисоли қувват чиқариб турадиган қудратли машинасимон ўзига катта ишонч уйготиб турар эди.

Ниҳоят, икковлари кетишга отланганларида Клайднинг дили сиёҳ бўлди: чунки улар Клайднинг ёнида туриб, уни қутқаришнинг хилма-хил ҳийла-найранглари ва режаларини тузишаётганда у ўзини анча-мунча хотиржам ва кучли ҳис этиб, ҳали-бери бўлмаса ҳам, қачонлардир, эҳтимол, озодликка чиқишига кўпроқ умид боғлаб, кўпроқ ишонаётган эди.

## XVI БОБ

Анча-мунча музокаралардан сўнг, охири – фақат бунга агар Ликургдаги Грифитслар кўнишса – ҳимояни ақддан озганлик ва телбалик хуружини, ўткинчи руҳий хасталикни баҳона қилган ҳолда тузиш осон ва қулай деб топилди, бу – Клайднинг Сондра Финчлини севиб қолгани ва ўзининг баҳтли келажаги ҳақидаги орзу ва умидларини Роберта бузиб юборишидан қўрққани оқибатида

келиб чиққан, дея талқин этилса ҳам бўлади. Лекин ҳимоячилар Ликургда Кетчумен ва Брукхарт билан, улар эса ўз навбатида Сэмюэл ва Гилберт Грифитслар билан гаплашиб олишгач, бу режа рад этилди. Ақдан озганлик ёки ўткинчи телбаликни айтадиган бўлишса, унда шунақангি гувоҳларни танлашлари зарур эдики, улар Клайднинг ақл-фаросати ҳамма вақт камлиги ва бутун умри давомида тутуруқсиз одам бўлганлигини гапириб беришлари, унинг бетайинлигини жонли мисоллар асосида исботлашлари лозим эди; қариндош-уруглари (шу жумладан, ҳойнаҳой, кимсан Ликургдаги Грифитсларнинг ўзи ҳам) буни қасам ичган ҳодда тасдиқлашлари керак эди. Хуллас, бу ўринда кўпгина гувоҳлар тўғридан-тўғри ёлгонни сув қилиб ичишлиари ва қасамдан қайтиб, имонларини сотишлари керак эди, бунинг устига бутун Грифитслар авлоди бадном бўлиши мумкин эди. Шу сабабли, бундай бўлмағур гапга Сэмюэл ҳам, Гилберт ҳам мутлақо кўнмасликлари турган гап эди. Қарабсизки, охири Брукхарт Белнепга ҳимоянинг бу хил усулидан возкечиш лозимлигини айтишга мажбур бўлди.

Шундай қилиб, Белнеп билан Жефсон яна бир-бирларининг рўпараларига ўтирганларича, ўй суро бошладилар. Негаки, ҳозир бошларига келган ҳар қандай ҳимоя усули уларга бутунлай ишончсиз бўлиб туюлмоқда эди.

– Мен бир нарсани айтмоқчиман, – деди ўжар Жефсон, Роберта билан Сондранинг хатларини яна қайтадан варақдар экан. – Судда биз йўлиқадиган энг жиддий нарса – Олденнинг мактублари. Агар уларни сал қироат билан ўқиб берилса борми, ман-ман деган суд маслаҳатчиси ҳам шубҳасиз, йиглаб юборади, агар шундан кейин анави иккинчи қизнинг мактубини ўқишича, унда тамом, ҳаммаси чиппакка чиқади. Менимча, агар Мейсон иккинчи қизнинг хатлари тўғрисида гапирмайди-

ган бўлса, унда биз ҳам бу ҳақда умуман эслатиб ўтирганимиз маъқул. Шунда Клайд Роберта Олденни, фақат ундан қутулиш учунгина ўлдирган, деган тасаввур пайдо бўлар эди. Тушунишимча, бу Мейсонга ҳам жуда қўй келади шекилли.

Белнеп бу фикрга астойдил қўшилди.

Лекин вақтни бой бермай, қандайдир ҳимоя йўлини ўйлаб топиш зарур эди. Қайта-қайта музокарадан сўнг, охири Жефсон (шу жанжал баҳонаси билан бемалол шуҳрат орттириб қолиш мумкин, деб ҳисоблар эди у) қуидагича холосага келди: Клайд қотилликни мутлақо ўйламаган, деб туриб олинса, энг ишончли ҳимоя ҳам аслида шу бўлади, бунга Клайднинг ғоят шубҳали ва галати хатти-ҳаракатлари ҳам зид келмайди. Аксинча, гарчи жисмониймас, балки маънавий жиҳатдан қўрқоқ бўлганлиги учун (буни ўзи айтиб берган ҳамма воқеалар яққол исботлаб турибди) ўзининг фош этилиши ва Ликургдан ҳамда Сондра муҳаббатидан маҳрум қилинишидан қўрқсан, айни пайтда унинг Сондрани чексиз севиб қолганлигини Роберта билгач (Клайд унга бу ҳақда аввал сира гапирмаган эди), мени тинч қўяр, деб умид қилган бўлиб чиқади. Шу боисдан ҳам у Робертага ҳамма гапни сўйлаб бериш ва орани очиқ қилиб олиш мақсадида наридан-бери, ҳеч бир шум ниятсиз уни ўзи билан бирга шаҳардан ташқаридағи бирор-бир жойга чиқишига унданаган (лекин бунда у атайлаб Ўтлоқзор кўли ёки Катта мушгирни танламаган, албатта); кейин у, шубҳасиз, Робертанинг бундан буёнги ҳаёти қийинлашиши ва қўлидан келганча унга пулдан ёрдам бериб туражагини ҳам айтмоқчи бўлган.

– Ҳаммаси яхши-ку, – деди Белнеп, – бироқ унда у Олденга уйланишдан бош тортган бўлиб чиқади-да, шундайми? Хўш, унда қизни ўлдириш ниятим йўқ эди, дегани билан қайси суд маслаҳатчиси унинг гапига ишонади?

– Тўхтанг, тўхтанг, – дея жавоб қилди Жефсон бир оз жаҳли чиқиб, – гапларингиз тўғри, албатта.

Аммо охиригача эшитинг-да. Мен сизга бир речам бор, деяпман.

– Хўш, хўш, қандай режа экан? – сўради Белнеп қизиқсиниб.

– Ҳозир айтаман. Режам шундан иборатки, ҳамма нарсаларни асли қандай бўлса, ўшандай: Клайд гапириб берганидек ва Мейсон таърифлаганидек қолдиравериш керак, фақат Клайднинг урганигина, турган гап, тилга олинмайди. Бошқа нарсаларнинг барини – хатлару моматалоқ дейсизми, жомадону иккита шляпа дейсизми – ҳамма-ҳаммасини сира инкор этмай тан олавериш керак.

Шу ерда у жим бўлиб қолди ва сепкил босган узун, ингичка кўллари билан сарғиши сочларини силади-да, майдон нарёғидаги Клайд ётган турмага қараб қўйди ва яна Белнепга тикилди.

– Жуда соз, лекин буни қандай қиласиз? – сўради Белнеп.

– Бошқа илож йўқ, гап бу ёқда, – деб давом этди Жефсон, худди ўзига ўзи мурожаат қилаётгандай ва битта кўйлакни ортиқроқ йиртган ҳамкасбини унутиб қўйгандай. – Ўйлайманки, ана шунда бир иш чиқиши мумкин. – У яна деразага ўгирилди, гўё энди у кўчада турган бирор кимса билан гаплашаётганга ўхшар эди. – Тушуняпсизми, у қўрқиб кетганидан ўша ёқقا борган, нимадир бир иложини топиши керак эди, акс ҳолда у фош бўлиши аниқ эди. Шундан у меҳмонхоналарга ўзини бошқа ном билан ёздиради, чунки саёҳатга чиқишгани Ликургда ошкор бўлиб қолишидан қўрқади. Кейин у бошқа қизни яхши кўражагини дангал айтишга чоғланади. Лекин... – Жефсон шу ерда бир оз тин олиб, Белнепга диққат билан тикилиб қолди, – бизнинг яна бир муҳим таянчимиз бор, агар шу таянчимиз ҳам чиппакка чиқса, тамом – унда масаламиз ҳал! Эшитинг! У ўша ерда Роберта билан юраги така-пуга бўлган кўйи унга уйланаман ёки

уни ўлдираман деб эмас, балки мени тинч қўй, деган маънода уни кўндиromoқчи бўлиб олиб боради. Кейин қарасаки, қиз бечора кўзига жуда хаста, эзилган, маъюс кўриниб кетади, ахир, ўзингиздан қолар гап йўқ, у ҳали ҳам Клайдни жонидан севади, шундан сўнг Клайд у билан икки кеча бирга бўлади, тушунарлимис?

– Ҳа, тушунарли, – дея гап қистирди Белнеп қизиқсиниб ва бу гал аввалгидек даражада шубҳага бормади. – Ҳарқалай, бу нарса Клайднинг нима учун Роберта билан бирга икки кеча тунаганини изоҳлаб беради.

– Ҳарқалай дейсизми? Аниқ изоҳлаб беради, десангиз-чи! – Жефсон истеҳзо ва вазминлик билан жавоб қайтарди; унинг оч мовий кўзлари фақатгина совуқ, ўжар ва этчили бир мантиқни ифодалаб турарди, холос, бу кўзларда на озгина ҳаяжон бор эди-ю, на зифирдаккина ачинишдан асар сезилар эди. – Хў-ўш; қиз билан у ўшандай шароитда... яъни ўшанақсанги яқин бир шароитда бирга бўлгач, тушуняпсизми (бу сўзларни айтиётганда Жефсоннинг ақалли бир туки ҳам қимиirlамади), унинг қалбида катта ўзгариш юз беради. Нима демоқчи бўлаёттаганимни сезяпсизми? Клайднинг унга раҳми келади. Ўзи эса виждон азобида қолади, ахир у Роберта олдида гуноҳкор-ку. Бизнинг одамларимизга, мана шу художўй ва сипо қишлоқиларнинг барига бу гаплар кучли таъсир қиласа керак, тўғрими?

– Эҳтимол, – секингина тасдиқлади Белнеп; энди у бу гапга жуда қизиқиб қолди ва муваффақият қозонишларидан озгина умид қила бошлади.

– У Робертага инсофсизлик қилганини ўзи ҳам билади, – дея давом этди Жефсон, худди тўр тўқиётган ўргимчаксимон ўз режасига ўзи маҳлиё бўлиб, – гарчи у анави иккинчи қиз ҳажрида ақлу ҳушини йўқотиб қўйиган бўлса ҳам, лекин ўша мисс Олден олдида ҳам ўз гуноҳини ювмоқчи, чунки

унга ачинади ва ўзи ҳам хижолатда, тушуняпсизми? Утикада ва Ўтлоқзор кўлида ўша қиз билан бирга тунаганининг ўзи эса уни ўлдирмоқчи бўлган, деган айбни пучга чиқаради.

– Аммо у, ҳарқалай, анави иккинчи қизни севади-ку? – дея қайта сўради Белнеп.

– Ҳа, албатта. Очифини айтганда, ўша қизни у ниҳоятда ёқтиради ва умуман, у киборлар доирасига тушиб қолганда бирдан кўзи тиниб, ўзини бошқа одам деб ҳис этиб, бутунлай ўзгариб кетади. Лекин, Клайд гарчи бошқа қизни севишини айтган тақдирида ҳам, агар мисс Олден унга хотин бўлишга кўнса, унда энди у Робертага уйланишга ҳам рози бўлади.

– Тушунарли. Бироқ ҳарқалай қайиқ, жомадон ва шунча ишдан кейин яна тўппа-тўғри ўша Финчлиникига бориши фактини қандай англаш керак? – деб сўради Белнеп.

– Бир дақиқа сабр қилинг, бир дақиқа! Ҳозир сизга мен ҳаммасини тушунтириб бераман, – дея давом этди Жефсон, мовий қўзларини бўшлиқقا гўё кучли проҗектор нурларисимон қаттиқ қадаганча. – Ўз-ўзидан маълумки, у мисс Олден билан бирга қайикда кетган, ўз-ўзидан маълумки, жомадонини ҳам қўлида қўтариб олган, меҳмонхоналарда соxта ном билан ёзилиб, Роберта гарқ бўлиб кетгач эса, ўрмон оралаб иккинчи қизникига қараб йўлга тушган. Хўш, нима учун у шундай қилган? Нима учун? Нима учун шундай қилганини билишни истайсизми? Мен сизга айтиб бераман! Унинг Робертага раҳми келган, тушуняпсизми, унга уйланмоқчи ҳам бўлган ёки жуда йўқ деганда, ўзининг қиз олдидаги гуноҳини сўнгги дақиқаларда ҳам ювишга аҳд қилган. Лекин шу нарса эсингизда бўлсинки, буларнинг бари у мисс Олден билан Утикада ва иккинчи кечани эса Ўтлоқзор кўлида тунаб ўтказгандаридан кейингина юз берган. Аммо, Клайд айтаётганидек,

сира кутилмаганда фалокат чиқиб, Роберта чўкиб кетгач, яна унинг анави иккинчи қизга нисбатан муҳаббати аланга олган. Очифини айтса, у Роберта олдиғаги гуноҳини ювиш учун ўзини унга қурбон бермоқчи бўлган вақтида ҳам иккинчи қизни қаттиқ севар эди. Тушунарлимис?

– Тушунарли.

– Хўш, агар Клайд чиндан ҳам шундай бўлган эди, деб ўз сўзида қаттиқ туриб олса, улар Клайдда шу қадар руҳий ўзгариш юз берганини қандай қилиб инкор эта олишарди?

– Тўғри, лекин бу воқеани у шу даражада ишонарли қилиб гапириб бериши керакки... – деди Белнеп хиёл ташвишланиб. – Унда анави иккита шляпа нима бўлади? Уларга ҳам нимадир важ тошиш лозимдир.

– Ҳозир шляпага ҳам гал келади. Шляпаси бир оз гижимланган эди. Шу сабабли у бошқасини сотиб олишга қарор қилган. Мейсонга, бошимда шапкам бор эди, деганида эса, шунчаки, қўрқиб кетганидан, шундай жавоб берсам тезроқ қутуламанми, деб ўйлаб алдайверган. Албатта, у анави қизга қараб кетгунча, яъни Роберта ҳали тириклик пайтида, Клайднинг ўша қиз билан алоқаси борлиги ва унга уйланмоқчилиги масаласи ҳам қолаверади. Тушуняпсизми, у Робертага ўз ниятини айтган бўлади, шу масалани бир боплаб ўйлаб чиқишмиз керак. Аммо, менимча, бу осон: Клайдда руҳий ўзгариш рўй бергач ва у Робертага нисбатан вижданан иш тутмоққа аҳд қилганидан сўнг, у фақат анави қизга хат ёзиши ёки унинг ҳузурига бориб, Роберта олдида ўзининг нақадар айбдор эканлигини айтиб беришигина қолади, холос.

– Хўш.

– Энди билдим, бу ишда анави қиз ҳақида гапирмасликнинг сира иложи йўқ экан. Уни безовта қиласизми, деб қўрқяпман.

– Керак бўлса, безовта қиласиз-да, – деди Белнеп.

– Биласизми, Роберта, бари бир Клайд менга уйланиши шарт, деб ҳисоблайди; демак, Клайд аввал анави Финчлининг ёнига бориб: мен сизга уйланолмайман, чунки мен Роберта билан қовушгани кетяпман, дейиши керак. Шуларнинг бари агар Роберта ўзини Клайд бир оз вақтга қоддириб кетишига кўнсагина юз бериши мумкин, тушуняпсизми?

– Хўш.

– Агар Роберта бунга кўнмаса, унда Клайд Учинчи миль Кўрфазидами ёки бошқа бирор-бир жойдами, у билан никоҳдан ўтади.

– Хўш.

– Аммо шуни унутмангки, Роберта ҳали тирик экан, Клайд паришон ва маъюслигича юраверади. Фақат Ўтлоқзор кўлидаги иккинчи тундан кейингина Клайд Робертага нисбатан инсофсизлик қилаётганини тушуна бошлайди, маъқулми? Ораларида нимадир бўлиб ўтади. Эҳтимол, Роберта йиглайдими ёки Клайдга: бундан кўра ўлганим ҳам тузук эди, дейдими, ишқилиб, биласизми, анави хатларидаги гапларига ўхшаш фикр юритади.

– Хўш.

– Шунда Клайдда Роберта икковлари бафуржагаплашиб олишлари учун ҳеч ким кўрмайдиган ва эшитмайдиган бирор-бир хилват жойга бориш истаги туғилади.

– Хўш, хўш... Давом этинг.

– Хуллас, у Катта мушгирни эслаб қолади. У қачонлардир аввал ўша ерда бўлган ёки улар ўзлари билмай ўша жойга бориб қолишади. Ундан у ёфи эса Учинчи миль Кўрфазигача бор-йўғи ўн икки миль йўл, агар никоҳдан ўтишга битим қилишса, ўша ерда никоҳдан ўтиб қўя қолишади.

– Тушуняпман.

– Агар бундай битимга келишмаса, Клайднинг тавба-тазарруларини эшитгач, Робертанинг ўзи унга тегишдан воз кечади, шунда Клайд уни яна қайта

мехмонхонага олиб бориб қўяди, тўғрими? Шунда, улардан бири тағин бир оз вақт ўша ерда қолар, иккинчиси эса балки ўша заҳотиёқ жўнаб кетар.

– Хўш, хўш.

– Ҳа, айтгандай, вақтини қизғангани ва меҳмонхонада узоқ туриб қолишни истамаганидан – акс ҳолда, у қимматга тушиб кетиши аниқ эди, биласизки, ўзи у пулдан қисилиброқ юради – нонуштасини жомадонига солиб олади. У ер-бу ерда расм олиш мақсадида фотография аппаратини ҳам олиб кетади. Тушуняпсизми, агар Мейсон шу аппаратга бурнини суқадиган бўлса, унинг борлигини нимадир деб изоҳлаб беришимиз лозим, энг яхшиси, у эмас, биз айтганимиз маъқул, тўғрими?

– Тушуняпман, тушуняпман! – дея хитоб қилди Белнеп; энди у масалага ниҳоятда қизиқиб қолганидан оғзи қулоғига етиб, ҳатто қўлларини арта бошлиди.

– Қарабсизки, улар сайдрга чиқишиади.

– Хўш.

– Кейин кўлни айланиб юришиади.

– Хўш.

– Ниҳоят, улар соҳилда ўтириб, нонушта қилишиади, Клайд бир неча бор расмга олади...

– Хўш.

– Кейин у Робертага бутун ҳақиқатни гапириб беришга аҳд қилди, у шунга тайёр, шуни истайди...

– Тушуняпман.

– Лекин ичидагини айтишдан олдин у Робертани яна қайиқ олдида, соҳилда бир-икки марта расмга туширмоқчи бўлади.

– Хўш.

– Кейин у Робертага ҳамма гапни айтади, тушуняпсизми?

– Ҳа.

– Ҳа, ростдан, улар яна қайтиб, гул термоқчи бўлганлари учун Клайд жомадонини қирғоқда

қолдираверади, тушуняпсизми? Бу гап жомадон воқеасини изоҳлаб беради.

– Хўш.

– Аммо уни қайиқда расмга олишдан аввал у ўзининг бошқа қизни яхши кўриши, шунда ҳам агар Роберта истаса, унинг ўзига уйланиши, анави Сондрага эса хат ёзиб юбориши тўғрисида гапира бошлайди. Лекин, агар Клайднинг бошқа қизни яхши кўришини билгандан сўнг Роберта унга тегишини истамаса...

– Хўш, хўш? У ёфи-чи? – дея қизишиб гапни бўлди Белнеп.

– Ҳа, унда, – давом этди Жефсон, – Роберта ҳақида ўйлаб, унга кўмаклашиб туриш учун Клайд кўлидан келган ҳамма кашни қилади, чунки бадавлат қизга уйлангач, унинг пули ҳам кўп бўлади.

– Хўш.

– Аммо Роберта Клайд ўзига уйланиб, анави Финчлидан воз кечишини истайди.

– Тушуняпман.

– Клайд ҳам шунга кўнади.

– Албаттаги!

– Роберта шу даражада миннатдор бўлганидан ҳаяжонга тушиб ўрнидан сакраб турганча Клайдга қараб отилади, тушуняпсизми?

– Хўш.

– Шу пайт қайиқ бир томонга қийшайиб кетади, Клайд Робертанинг қулаб тушишидан қўрқиб, уни ушлаб қолмоқчи бўлиб иргиб ўрнидан туради, тушуняпсизми?

– Ҳа, ҳа.

– Энди фотография аппарати унинг қўлида қолсинми ёки йўқми, бу ёфи ўз ихтиёrimизда, сизнингча, қандай қилсак қулай бўларкин?

– Энди тушундим мен.

– Хуллас, қўлида аппарат бўладими, ё йўқми, Клайдми ёки эҳтимол, Робертами, қандайдир бир

қалтис ҳаракат қилиб юборишади-ю – аслида Клайд-нинг ўзи ҳам худди шундай гапириб беряпти – ёки иккаласи бирдан туриб кетишганиданми, ҳарқалай, қайиқ ағдарилади-да, у Робертани уриб юборади ёки бунинг акси, бу ерда истаганимизча айтаверишимиз мумкин, борди-ю, урди дейилганда ҳам у бехосдан шундай қилган бўлади.

– Тушуняпман, тушуняпман, оббо жин ургур-ей! – дея хитоб Қилди Белнеп. – Жуда соз, Рубен! Ажойиб! Шунчалик зўрки!

– Робертага қайиқнинг зирхи тегиб кетади, Клайдга ҳам хиёлгина тегади, тушуняпсизми? – давом этди Жефсон, ҳийла-найрангдан иборат ревжаларига ўзи маҳлиё бўлиб, у шеригининг бирдан завқ-шавққа тўлиб кетганига эътибор ҳам бермади. – Ўша зарба Клайдни бир оз гаранг қилиб қўяди.

– Тушуняпман.

– У Робертанинг қичқиригини эшитиб, ўзини ҳам кўради, лекин унинг ўзи бир оз гарангсиб қолган, тушуняпсизми? У ўзига келиб, Робертага ёрдам қиладиган маҳалда эса...

– Роберта йўқ бўлади, – деб якунлади Белнеп пинагини ҳам бузмай. – У чўкиб кетган бўлади. Тушуняпман.

– Бу ёқда эса шубҳали вазият, қалбаки ёзувлар турибди... Роберта эса ҳалок бўлган, Клайд ҳар қанча истаганда ҳам энди унга сира кўмаклаша олмайди... Агар билсангиз, Робертанинг иккиқатлигини ота-онаси сезишгудек бўлишса, қандай аҳволга тушишлари ўз-ўзидан маълум...

– Ҳа, ҳа, тўғри.

– Шунинг учун ҳам Клайд даҳшатга тушиб қочиб қолади. Табиатан олиб қараганда, Клайд асли юраксиз одам – биз буни аввал бошданоқ исботлашга ҳаракат қиласиз. У амакиси билан яхши муносабатини ва эл-юрт ичидаги ўз обрўини сақдаб

қолишга сўзсиз тиришади. Ҳамма нарсага шуни баҳона қилиб кўрсатиш мумкин эмасми, ахир?

– Менимча ҳам бу кўп нарсага тузуккина баҳона бўлади шекилли. Чиндан ҳам, Рубен, ўйлашимча, бу энг қулай изоҳ бўлса керак, табриклайман сизни. Бундан ҳам тузукроқ изоҳ топилишига қўзим етмайди. Агар шунда ҳам у оқланмаса ёки суд маслаҳатчилари ўртасида тортишув келтириб чиқармаса, унда жуда бўлмаганда, Клайд, масалан йигирма йил олиши мумкин, сиз нима дейсиз шунга? – Белнеп ғоят мамнун тарзда ўрнидан турди-да, новча, қотмадан келган ҳамкасбига завқи ошиб тикилди-ю: – Қойил! – деб қўшимча қилди.

Жефсон эса кўзгусимон жимжит ҳалқобни эслатувчи чуқур кўзлари билан унга фақат бефарққина қараб қўйди, холос.

– Аммо сиз, ҳарқалай, бунинг тагидан нима келиб чиқишини тушунсангиз керак? – деди у босиқлик ва майнинлик билан.

– Клайд қасам ичиб туриб, худди гувоҳдек жавоб бериши керак, демоқчисиз-да? Албатта, албатта. Жуда яхши тушуниб турибман. Лекин у фақат шунгагина умид қилиши мумкин.

– Клайд у қадар жиддий ва ўзига ишонадиган гувоҳ бўлмайдиганга ўхшайди, деб қўрқяпман. У ниҳоятда асабий ва сиркаси сув кўтармайди.

– Ҳа, биламан, – деди ўша заҳоти Белнеп. – Уни салга қўрқитиб олиш мумкин. Мейсон эса унга худди қутурган буқадек ҳамла қиласди. Лекин биз уни шунга тайёрлаймиз, обдан суробини тўғриласак ҳам, аммо тайёрлаймиз. Бу – қтулиши учун охирги чора эканлигини, ҳаёт-мамоти шунга боғлиқдигини тушуниб етмагунча қўймаймиз. Кейинги бир-икки ой ичida роса суробини тўғрилаймиз.

– Агар шу айтганларимизни қилолмаса, унда у тамом. Қани энди биз унга қандайдир дадиллик баҳш этиб, ўзини бамайлихотир тутишига кўник-

тира олсак эдик! – аллақаёққадир, бўшлиққа қадалган Жефсоннинг нигоҳи қаршисида, гўё суд зали ва гувоҳдар ўтирадиган жойда Мейсонга қарама-қарши турган Клайд кўрингандай бўлди. Кейин Жефсон Робертанинг хатларини (тўғрироги, Мейсон берган нусхаларни) қўлига олди. – Қани энди мана булар ишни бузмаганда эди! – деди у хатларни қўлида чамалаб кўра туриб, кейин ҳафсаласи пир бўлиб: – Лаънати! Шу ҳам иш бўлди-ю! – деди. – Лекин биз ҳали пачоқданганимизча йўқ, чучварани хом санаб юришибди! Биз ҳали жангга киришганимиз ҳам йўқ! Э, жуда бўлмаганда бу иш орқасидан ном орттириб қоламиз. Ҳа, ростдан, – деб қўшимча қилди у, – менга таниш бир йигитча бутун кечкурун Катта Мушгирида сувга тушиб кетган аппаратни топишга ҳаракат қилиб кўради. Қани, менга омад тиланг-чи.

– Бажонидил, бажонидил! – Белнеп айтган гап фақат шу бўлди.

## XVII БОБ

Ўлим хусусидаги иш қанча-қанча кураш ва ташвиш-ҳаяжонларни келтиришини айтинг! Брукхарт билан Кетчумен Белнеп ва Жефсонга «ҳарқалай, ҳозирги аҳволдан қутулишнинг бирдан-бир тўғри йўли» Жефсоннинг режаси эканлигини айтдилару, лекин шу билан бирга бу ишда иложи борича Грифитсларни баҳона қўлмаслик керак, деб ҳам ўтдилар.

Кейин ўша заҳотиёқ мистер Белнеп ва мистер Жефсон дастлабки маълумотларни матбуотга бериб юборишибди, бу маълумотлар шундай руҳда ёзилган эдики, бундан Клайднинг бегуноҳдигига уларнинг ишончи комиллиги; аслида эса Клайд туҳмат қурбони бўлганлиги, қўйдай ювош шу йигитчани мутлақо нотўғри тушунишаётгани, унинг мисс Олденга нисбатан қилган ният ва хатти-ҳаракатлари

Мейсон түнкаётган айблардан бутунлай, худди оқ билан қорадек фарқ қилиши күринар эди. Бу ерда бошқа бир шама ҳам бор эди, прокурорнинг Олий суднинг фавқулодда сессиясини чақиришни талаб қилиб, ноўрин шошқалоқликка бораётганининг асосий боиси ҳам аслида соф адлия талабларидан кўра, кўпроқ сиёсий мулоҳазалар оқибати бўлиши мумкин. Хўш, акс ҳолда нега бунча шошқалоқлик қилингани? Айниқса, округда сайловлар яқинлашиб келаётган ҳозирги пайтда-я? Дарвоқе, айрим шахслар ёки гурухлар ушбу тергов натижаларидан ўз шахсий сиёсий шуҳратпарамтиклари йўлида фойдаланишга уринаётган бўлмасинлар тағин? Мистер Белнеп билан мистер Жефсон, ҳарқалай, бундай бўлмаса керак, деган умиддалар.

Лекин айрим шахслар ёки гурухдарнинг режалиари, шум ниятлари ёки сиёсий интилишлари ҳар қанча қучли бўлганда ҳам, янгиш тасаввур орқасида (адвокатлар буни исботлаб беришади) фақат республикачилар партиясининг ноябрь сайловларида голиб чиқиши учунгина шошма-шошарлик билан бегуноҳ бир йигитчанинг электр курсига жўнатилишига ҳимоя томони сира йўл кўёлмайди. Бу ғалати ва устига-устак, нотўғри тасаввурларни келтириб чиқарган аҳволни фош этиб беришлари учун ҳимоячиларга анча вақт керак. Шу сабабли улар прокурорнинг штат губернаторидан Олий суднинг фавқулодда сессиясини Олбэнида чақириш ҳақида сўраган илтимоси масаласида расмий равишда эътиroz билдиришга мажбурдирлар. Бунинг устига, бунчалик шошилишнинг ҳожати борми? Ахир, бу хилдаги ишларни кўриб чиқадиган навбатдаги сессия январда йиғилиши керак-ку, бу ишга оид ҳужжатларни тайёрлаш ҳам ҳазилакам вақтни олмайди.

Гарчи бир оз кечиккан бўлса ҳам, аммо бу кескин баёнот матбуот вакиллари томонидан анчагина жиддият билан тингланди, бироқ Мейсон эса

ҳимоянинг сиёсий найранг хусусидаги «юзаки» даъволарини ҳам, шунингдек, Клайднинг бегуноҳлиги тўғрисида айтган олди-қочдиларини ҳам назар-писанд қилмади.

«Наҳотки, мен бутун бир округ фуқаросининг вакили бўлсаму қораланиши лозим бўлган айблари шундоқ қўриниб турмаса, бекордан-бекорга бир одамни айласам ва бир ёқса жўнатсан! Бу менга зарур келибдими? Ахир, унинг қизни ўлдиргани беш қўлдай қўриниб турибди-ку! Бу ишнинг шубҳали томонларини ақалли бир оз бўлса ҳам ойдинлаштирадиган бир оғиз сўз айтдими у ёки бирон нарсани уddaлаб бердими? Йўқ! Ё оғзига сўк солиб олади ёки ёлғон гапиради. Модомики, масаланинг бу жиҳатлари фоят билимдон мистер ҳимоячилар томонидан рад этилмаган экан, мен ўзим бошлаган ишни қатъян давом эттироқчи-ман. Ҳозир қўлимда жиноятчи йигитнинг бутун гуноҳини бўйнига қўя оладиган етарли далилларим бор. Ишни январгача қолдириш эса, бу мистер ҳимоячиларга ҳам маълум, округ учун жуда қўимматга тушиб кетади, чунки бу орада менинг ваколатим тугаб, янги келган одам мен ипидан-игнасигача билган ўша ҳужжатларни яна бир бошдан ўрганиб чиқишига тўғри келади. Ахир, шу иш юзасидан чақирган барча гувоҳларимиз ҳам ҳозир ихтиёримизда, у қадар кўп харж бўлмай, осонгина уларни Брижбургга олиб бориш ҳам мумкин. Январь ёки февралда, айниқса, ҳимоя томони ўлиб-тирилиб уларни тўзитиб юборишга ҳаракат қилгандан сўнг, хўш, унда қаердан топамиз ўша гувоҳларни? Йўқ, мистерлар! Мен бунга қўнолмайман. Лекин улар яқин ўн, ё борингки, ўн беш кун ичida мен қўяётган айбларнинг ҳатто айримларининг ҳатолигига ақалли билосита ишора этувчи бирор-бир ашё-далилларни келтира олишса борми, унда мен жон деб уларга қўшилиб суд раисига бора-

ман, агар улар суд раисига құлға кириттан ёки киритмоқчи бұлағттан далиллари ёки узокдан чақирилиши талаб этиладиган ва мана бу йигитчанинг гуноҳсизлигини тасдиқдайдыган гувоҳлари борлигини маълум қилишса, қайтага бу ажойиб иш бўлади-ку! Унда мен, гарчи шу туфайли суд жараёни менинг ваколатим тутагандан кейин бошланган тақдирда ҳам судьядан Белнеп билан Жефсонга қанча вақт зарур бўлса, ўшанча вақт беришини астойдил туриб илтимос қиласман. Бироқ суд жараёни олдин бошланса, мен шундай бўлишига чин юракдан аминман, унда айборнинг гуноҳини бутунлай очиб ташлашга бор кучим ва қобилиятимни аямайман, буни мен қандайдир давлат мансабини эгаллаш учун эмас, балки ҳозир округ прокурори эканлигим ва бу менинг бурчим эканлиги туфайли шундай қиласман. Сиёсий мартаам масаласига келганда эса, хўш, мистер Белнепнинг ўзи-чи, наҳотки у сиёсий мартаама ортиришга интилмаётган бўласа? Ўтган сайловларда ҳам у мен билан беллашган эди, эшитишмича, яна шундай қилмоқчи экан».

Мейсон шу айтган гапларига тўла мувофиқ равишда, фавқулодда сессия чақириш ва Клайд ишини судга оширишга губернаторни кўндириш мақсадида Олбэнига жўнади. Губернатор Мейсон билан Белнепнинг далил ва асосларини тинглаб кўриб, масалани Мейсон фойдасига ҳал қилди, чунки фавқулодда сессияни чақиришга ижозат бериш, лозим бўлганда суд муҳокамаси тўхтатиб қўйишга халақит бермас эди ва шу сабабли фавқулодда сессиянинг чақирилиши ишни олиб бориш учун ҳимоя томонга зарур бўлган ҳар қанча қўшимча муддатларни олишига тўсқинлик қилолмаслигини ҳозиргача ҳимоя томони пеш қилаётган барча дастаклар мутлақо исботлаб беролмас эди. Бундан ташқари, бунақанги далил ва асосларни кўриб чиқиши – унинг, яъни губернаторнинг иши эмас, балки бунга маҳсус ваколати бўлган Олий

суд аъзосининг ишидир. Шундай қилиб, Олий суднинг фавқулодда сессиясини чақириш ҳақида буйруқ берилди, сессиянинг раиси қилиб Фредерик Оберуолцер деган киши – ўн биринчи округнинг судьяси тайинланди. Мейсон Оберуолцер ҳузурига келиб, суд маслаҳатчилари кенгашининг фавқулодда мажлисини чақириш кунини белгилаб беришни илтимос қилди, Клайд шу мажлис қарори билангина судга оширилиши мумкин эди, бу мажлис бешинчи августта тайинланди.

Кейин, суд маслаҳатчилари кенгаши йифилгач, Клайдни судга бериш тўғрисида қарор чиқаришга Мейсон у қадар ортиқча уриниб ҳам ўтирамади.

Шундан сўнг Белнеп билан Жефсоннинг Оберуолцерга келиб учрашишдан бўлак иложлари қолмади, Оберуолцер демократ эди, у бу мансабга собиқ губернаторнинг хайриҳоҳлиги орқасида тайинлаган эди, шунинг учун ҳимоячилар ундан суд текширишини бошқа округга ўтказдиришни сўрамоқчи бўлдилар. Улар, Катараки округидан Мейсоннинг халойиқ олдиди айтадиган ва хусусий ваъзлари таъсирига берилмайдиган ўн икки кишини топиш амри маҳол, ҳар қанча ўйлаганда ҳам бу ақлга сифмайди, шундай экан, маслаҳатчилар Клайдга нисбатан жудаям ёмон муносабатда бўлиб, олдинданоқ уни гуноҳкор, деб ишонишади, демак у, аслида ҳимоя томони ўз фикрини айтиб улгурмасиданоқ суд маслаҳатчilarининг исталган ҳайъати томонидан ҳукм қилинаверади, деб исбот этишга уриндилар.

Судья Оберуолцер анчагина холис бўлгани учун:

– Хўш, муҳокамани қаёққа ўтказамиз деб ўйлајпизлар? – деб сўради. – Ҳамма ерда ҳам ўша бир хил ҳужжатлар босилди-ку.

– Лекин, муҳтарам мистерлари, бу жиноятни округ прокурори роса ҳафсалা билан шиширяптида... (Мейсон узундан-узоқ, қизишиб эътиroz билдириди.)

– Шунга қарамай, биз, – дея давом этди Белнеп, – халойиқни бекордан-бекор безовта қилиб, түгри йүлдан чалғитдик, деб ҳисоблаймиз. Энди сиз айланувчига холис қарай оладиган ўн икки кишини топиб бўпсиз.

– Қанчалар бўлмагур гап! – дея хитоб қилди Мейсон жаҳли чиқиб. – Қуруқ сафсата бу! Ахир, газеталарнинг ўзиёқ мендан кўра кўпроқ ҳужжат йифиб, эълон қилишди-ку. Мабодо бу ерда нимадир бир нарсага янгиш муносабат билдирилган экан, бу фақат шу иш юзасидан ашёвий ҳужжатларни босиш оқибатидагина юз берган. Мен, олдиндан ишониш ҳоллари бу ерда қандай бўлса, бошқа жойда ҳам шундай, деб тасдиқдайман. Бунинг устига, агар суд олис бир округга кўчириладиган бўлса, кўпчилик гувоҳларимиз шу ерда, ундан округимиз озмунча ортиқча чиқимларга дучор қилинадими, бундай чиқимларни округ ўз бўйнига ололмайди ва бунга зарурат ҳам йўқ.

Судья Оберуолцер ақл-идрокли, ахлоқий томони мустаҳкам, шошмайдиган, эҳтиёткор, ҳамма вақт ва ҳар бир нарсада маълум тартибни афзал кўрадиган киши бўлиб, у кўпроқ Мейсоннинг фикрларига мойилроққа ўхшар эди. Шу сабабли орадан беш кун ўтгач – бу вақт ичида у барча масалаларни шошмасдан ўйлаб олди – ҳимоянинг илтимосини рад этди. Агар у ноҳақ бўлса, ҳимоя томони юқори идораларга норозилик билдириши ҳам мумкин. Ҳозирча эса, ишни кўришни ўн бешинчи октябрга белгилаб (ўша пайтгача ҳимоя томони бемалол тайёрланиб улгуришига вақти етади, деб ўйлади у), ёзнинг қолган қисмини Мовий тоғ кўли яқинидаги чорбоғида ўтказиш учун ўша ёққа жўнади; мабодо унинг шахсий иштирокисиз ечилиши мумкин бўлмаган қандайдир жудаям чигал ва мураккаб масалалар чиқиб қолса, унда қораловчи

ва ҳимоя томонларининг вакиллари уни ҳар доим ўша чорбоғдан топадилар.

Клайднинг ишига мистер Белнеп билан мистер Жефсон аралашганидан сўнг, Мейсон айблов ҳукми иложи борича тезроқ чиқарилишига эришиш учун икки ҳисса куч билан ҳаракат қилиш зарур, деган қарорда тўхтади. У ёш Жефсондан ҳам худди Белнеп сингари хавфсирап эди; шунинг учун Бэрлей ва Ньюкомни ўзи билан бирга эргаштириб, Ликургга яна бир марта бориб келди ва у ерда бошқа нарсалардан ташқари, қуидагиларни ҳам аниқлаб улгурди: 1) Клайд фотография аппаратини айнан қаердан сотиб олганини; 2) нима учун у Катта мушгир кўлига жўнашидан уч кун олдин миссис Пейтонга аппаратини ўзи билан бирга олиб кетмоқчилиги ва унга плёнка харид қилмоқчилиги ҳақида гапирганини; 3) Ликургда Орин Шорт исмли аттор савдогар борлиги, у Клайдни яхши билиши ва Клайд атиги тўрт ой муқаддам бир ишчининг хотини иккиқат бўлиб қолганда унга мурожаат этгани, шунингдек у, яъни Шорт, Клайдга Гловерсвиль яқинида яшовчи Глен деган бир докторни тавсия қилганини (буни Шорт, Бэртон Бэрлей ҳадеб кавлаштиравергандан кейин, мутлақо оғиз очиб бўлмайдиган бир сир сифатида унга ишониб айтди); 4) Глен докторнинг ўзини топиб, унга Клайд ва Робертанинг суратларини кўрсатишганда, у Клайдни эмас, Робертани танигани, унинг қандай кайфиятда кириб келгани-ю, нималар ҳақида гапирганини ҳам эслаганини; бу тафсилот на Клайддан ва на Робертадан ақалли зифирдай бўлса ҳам шубҳаланишга асос бўлолмагани учун Мейсон ҳозирча уни бир четга қўйиб туришга аҳд қилди. Ниҳоят, 5) тиним билмай, тўхтовсиз олиб борилган қидирувлар оқибатида Утиқадаги ўша, Клайдга шляпа сотган савдогар ҳам топилди: у Бэрлей Утиқадалик вақтида берган газета сухбатига бе-

хос дуч келиб қолибди-ю, қараса, Бэрлейнинг сурати ёнида Клайднинг ҳам расми турган эмиш, у Клайдни таниган заҳоти Мейсонни қидиришга тушибди, охири Мейсон унинг ҳам машинкада кўчирилган ва тегишли тартибда тасдиқлатилган гувоҳдигини ўзи билан бирга олиб жўнабди.

Бунга қўшимча равища, «Оққуш» пароходида кетаётиб Клайдга эътибор билан қараган анави қиз ҳам Мейсонга хат ёзиб, Клайдни эслагани ва ўшандада бошида похол шляпаси бўлиб, у Шейронда қирғоққа тушиб қолганини хабарлаган эди. Бу маълумотлардан сўнг «Оққуш» капитанининг гувоҳдиги ҳам бутунлай тасдиқланган эди ва Мейсон пешонаси ярқираб, роса омади келаётганини сеза бошлади. Мейсон учун охирги, аммо энг муҳим маълумот Бедфордда (Пенсильвания штати) яшовчи бир аёлдан олинган хабар бўлди: унинг ёзишича, эри иккови учинчидан то ўнинчи июлгача, бир ҳафта вақтларини Катта мушгирда ўтказишибди – кўлнинг жанубий қисмида, шарқий соҳида чодир қуриб яшшибди. Буни қарангки, саккизинчи июлда, чамаси соат олтилар экан, юракни эзадиган, аянчли бир қичқириқ эшитиб қолибди у, назарида аёл киши ёки қиз бола ёрдам сўраётганга ўхшабди. Қичқириқ худди Кўрфазнинг жануби-гарбий томонидаги улар бир гал балиқ овлаган оролчанинг нарёғидан, жуда ҳам олисдан эшитилгандай бўлибди.

Мейсон бу хабар тўғрисида индамай туришга қарор қилди, у аппарат ва плёнка, Клайднинг Канзас-Ситидаги гуноҳи масаласида ҳам лом-лим демади, у бу далилларни иложини топса нақ суд муҳокамасининг ўзигача яшириб бормоқчи бўлди, ана ўшандада ҳимоя томони буларни бир амаллабрад этиш ёки юмшатишга кучи етмай қолади.

Белнеп билан Жефсон эса бошқа бирон тузукроқ нарса ўйлаб топишолмади: энди фақат Клайдни обдан пишиқлаш керак эди, у Ўтлоқзор

кўлига келганида ўзида юз берган руҳий тушкунликни рўкач қила туриб, ўз гуноҳини бутунлай инкор этиши зарур эди; иккита шляпа ва жомадон хусусида ҳам қандайдир изоҳ бериш лозим эди. Тўғри, Крэнстонлар чорбоги олдида кўлга ташлаб кетилган анави костюм ҳам бор, лекин у ерга қандайдир бир ғоят серҳафсала балиқчи борган эди, шундан сўнг костюм топилиб, тозалатилиб, дазмолланди-ю, энди эса у Белнеп ва Жефсонларнинг идорасида қулфлоглиқ шкафда осилиб турибди. Яна бу ёқда Катта мушгир қўлининг тубига тушиб кетган аппарат ҳам бор эди-ю, аммо уни қидирган билан бирон наф чиқмади, шунда Жефсон, аппаратни ҳойнаҳой Мейсон қўлга туширган бўлса керак, шунинг учун бошиданоқ, сал қулай пайт туғилди дегунча судда уни эслатиб ўтиш зарур, деган хulosада тўхтади. Бироқ Клайд у билан Робертани, майли, бехосдан бўлса-да, урганини эса ҳозирча инкор этиб туришга келишилди, ваҳоланки, мурда иккинчи марта текширувдан ўтказилган вақтда – бунинг учун уни Бильцдаги гўридан чиқариб олишга тўғри келди – марҳуманинг юзида ҳали ҳам жароҳат излари сақланиб қолгани аниқланди, улар аппарат катталиги ва шаклига маълум даражада мос тушар эди.

Масалан, Белнеп билан Жефсоннинг гувоҳ сифатида Клайдга жудаям кам умид боғлаётганларининг ўзини олайлик. Дарҳақиқат, шу воқеалар қандай юз берганини Клайд сўзлаб бера олармикин, очиқчасига, кучли ва эҳтиросли гапириб, Робертани билмай уриб юборганига суд маслаҳатчиларини ишонтира олармикин? Ахир, зарбадан қолган жароҳатлар борми-йўқлигидан қатъи назар, суд маслаҳатчиларининг Клайдга ишониши фақат мана шунга боғлиқ. Агар зарба бехосдан бўлганига ишонишмаса, демак, унда – ҳукм ҳам тайёр.

Шундай қилиб, улар суд мұхокамасыга тайёрлана бошладилар, ҳозирча эса секингина Клайднинг аввалги ҳаётига оид ижобий маълумотларни ва гувоҳликларни түплашта кирищдилар. Лекин Клайднинг Ликургда ўзини баодоб йигитча қилиб күрсатишга уриниб, аслида мутлақо саёқ юргани ва унинг Канзас-Ситидаги хизмат соҳасида бошлаган дастлабки қадамлариёқ жанжал билан тугагани Белнеп ва Жефсонга анчагина халақит бермоқда эди.

Яна орада ниҳоятда жицдий бир чалкашлик ҳам бор эди, буни Белнеп билан Жефсон ҳам, прокурор ҳам билишарди: Клайд қанча вақтдан бери турмада ўтирган бўлса, шунча вақтдан бери оиласидан ёки амакисининг оиласидан бирор киши келиб ёнига тушмади, унинг ўзи ҳам ота-онаси қаерда яшашини фақат Белнеп ва Жефсондан бўлак биронта одамга айтмади. Агар, умуман, Клайдни астойдил ҳимоя қилиш ва оқдашнинг йўли топилса, бунинг учун онасими, ё отасими ёки жуда бўлмаганда синглиси, ё укасими, ўзлигини билдиришиб, Клайд ҳақида бир оғизгина бир нима дейишлари керак эди – бу тўғрида Белнеп билан Жефсон қайта-қайта фикрлашишган эди – бу жуда ҳам муҳим эди! Акс ҳолда, у доимо мана шундай ёмонотлиқ, бир чақага қиммат одам бўлиб юрган, шунинг учун уни билгандарнинг бари энди атайлаб ўзини олиб қочяпти, деган тасаввур туғилиши мумкин эди.

Шунинг учун ҳам улар Дарра Брукхарт билан сухбатлашаётган пайтларида Клайднинг ота-онаси ҳақида ҳам гап очишиди ва ликурглик Грифитслар ўша гарбдаги туғишганларидан биронтасининг бу ишга аралашувига мутлақо қарши эканликларини билиб олишди. Ижтимоий жиҳатдан, деб тушунтирди Брукхарт, Грифитслар авлодининг бу икки пушти ўртасида бамисоли тубсиз жарлик ётибди, шу боисдан ҳам бу тўғрида айтиладиган ҳар бир сўз ликурглик Грифитсларга ниҳоятда кўнгилсиз тую-

лиши аниқ. Бундан ташқари, Клайднинг ота-онаси Ликургга келиб, бебурд матбуот қўлида ўйинчоқ бўлиб қолмаслигининг ҳам кафиллигини олиш қийин. Брукхарт Белнепга, агар Клайд шунга кўнса, унинг ота-онасини яххиси, тинч қўйган маъқул, деган гапни айтди. Сэмюэл ва Гилберт Грифитсларнинг фикри ҳам шундай, аслини олганда уларнинг Клайдга берадиган моддий ёрдамлари ҳам маълум даражада мана шу нарсага боғлиқ, деди у.

Гарчи Клайднинг бўлиб ўтган воқеалар онасига зарба бўлажаги туфайли ўкинаётганини эшитган ва у билан тез-тез гаплашиб турадиган кишилардан биронтаси она-болани қизғин меҳр ришталари боғлаб турганига шубҳа қилмаса ҳам, барι бир у Грифитсларнинг хоҳишига рози эди. Гап шунда эдики, Клайд ҳозир онасига дуч келишдан қўрқар ва уялар эди: у ўзи тушиб қолган ҳозирги аҳволга ахлоқий, тагини суриштирганда ижтимоий юз тубан кетганлигига онаси қандай муносабатда бўлишидан қўрқар эди. Белнеп билан Жефсон тўқиган, гўё у бошидан кечирган маънавий бурилишга онаси ишонармикин? Ҳатто буларни бир четга қўйиб турганда ҳам, онаси шу ерга келганини, бу темир панжаралардан Клайдга – гариб бўлиб ўтирган ўғлига қараашларини, сўнг бу қараашларга дош бериш кераклигини, кунору у билан гаплашишга тўғри келишини ўйлашнинг ўзиёқ жуда оғир эди. Унинг соғ, толиққан, савол назари билан қараган кўзлари! Кейин унда ҳам ўғлининг бегуноҳлигига шубҳа тугилади, ҳатто Белнеп ва Жефсон ҳам, гарчи уни ҳимоя қилиш режаларини тузиб ётганларига қарамай, ўша зарба қасддан урилганмиди ёки бехосданми, деган масалада ҳамон иккиланаётганини Клайд ахир сезиб турибди-ку. Улар бунга унчалик ишонишмаяпти, ҳойнаҳой, онасига ҳам шундай деб айтишади. Унда тақводор, худодан қўрқадиган, ҳар қандай ёвузликдан ҳазар

қиласидиган онаси унга ҳимоячилардан кўра қўпроқ ишона олармикин?..

Шунинг учун Клайддан, сизнингча, ота-онанизни чақирсан бўлармикин, деб яна қайта сўрашганда у, ҳозирча онам билан кўришмаганимиз маъқул, бунинг фойдаси йўқ, икковимиз ҳам қийналамиз, дея жавоб берди.

Бахтимга, деб ўйлар эди у, бошимдан ўтган шунча воқеалар тўғрисида биронта ҳам хабар, ҳарқалай, Денверда яшаётган туғишганларимга ҳали етиб бормаган бўлса керак. Чунки уларнинг диний ва ахлоқий эътиқодларига кўра, дунёвий газеталар фисқу фасод билан тўлиб-тошган бўлиб, шу сабабли газеталар уларнинг уйлари-ю хонақоларига қеч қачон яқин йўлатилмас эди. Ликурглик Грифитслар эса уларга бирор-бир нарсани хабарлашни истамас эдилар.

Аммо бир гал кечқурун (тажминан, Белнеп билан Жефсон Клайднинг ота-онаси келмаётгани ва бу борада бирор-бир чора ўйлаб топиш керакми ёки йўқлигини жиддий туриб муҳокама қилаётган пайтларида) Эста «Роки маунтейн ньюс»да тўсатдан бир мақолани ўқиб қолди. Эста Клайд Ликургга кетгандан сўнг, орадан сал ўтмаёқ эрга теккан ва Денвернинг жануби-шарқий томонида яшар эди. Брижбург суд маслаҳатчилари кенгаши Клайд ишини судга ошириш тўғрисида қарор чиқариши биланоқ босилган ўша мақола эса қуидагича эди;

### **«ИШЧИ ҚИЗНИ ЎЛДИРГАН ҚОТИЛ СУДГА БЕРИЛДИ**

Брижбург, Нью-Йорк штати, 8 август – Клайд Грифитснинг ишини кўриб чиқиш учун губернатор Стайдербек томонидан тайинланган суд маслаҳатчилари кенгашининг шошилинч мажлиси бўлиб ўтди. Клайд Грифитс Ликургдаги (Нью-Йорк штати) ёқа тикадиган бадавлат фабрикантнинг жияни бўлиб, у ҳам худди шундай фамилияга эга. Клайд

Грифитс яқында, шу йилнинг 8 июлида Адирондак тоғларидаги Катта мушгир кўлида бильцлик миссис Роберта Одденни ўлдиришда айбланган эди. Бутун суд маслаҳатчилари кенгаши қасдан қотиллик қилишда айбланган Клайд Грифитс иши юзасидан чиқарилган айбномани тасдиқлади.

Аниқ далил-ашёларга қарамай, назарда тутилаётган қотилликни аслида бахтсиз ҳодиса эди, деб зўр бериб тасдиқлаётган Грифитс, ўша қарорга мувофиқ, ўз адвокатлари Элвин Белнеп ва Рубен Жефсонлар ҳамроҳлигида Олий суд раиси Оберуолцер ҳузурига келди ва менинг айбим йўқ, деб айтди. У судга қадар қамоққа олинди, суд 15 октябрга белгиланди.

Грифитс бор-йўғи 22 ёшда; то қамоққа олингунича Ликургда киборлар доирасининг обрўли аъзоларидан бири бўлган. Тахмин қилишларича, суюклисини – ёшгина ишчи қизни уриб, ҳушидан кетказган-да, сўнгра сувга ташлаб юборган, чунки Грифитс уни аввал ёмон йўлга бошлаб, кейин бадавлат бир қиз туфайли ундан ажралиб кетмоқчи бўлган экан. Бу ишга жалб этилган ҳимоячилар айбланувчининг бой амакиси, ликурглик фабрикант томонидан таклиф этилган, бироқ фабрикант ўзини шу пайтгача четда тутиб турибди. Булардан ташқари, бу ерда айтишларига қараганда, биронта ҳам тувишгани унинг ёнини олиб чиқмаган».

Эста ўша заҳотиёқ онасиникига қараб чопди. Хабар тўппа-тўғри ва очик-ойдин бўлишига қарамай, гап Клайд устида бораётганига у сира ишонгиси келмасди. Аммо воқеа юз берган жой ва исмларнинг айтилишида рад этиб бўлмайдиган дараҷада шум ҳақиқат бор эди: ликурглик бадавлат Грифитслар, ота-онасининг келмаётганлиги.

Трамвайда боришига сарфланган бир неча дақиқалардан кейин у Бидуэл-стритдаги мебелли

хоналари ва «Умид юлдузи» номи билан машхур хонақоларига кириб келди; бу хонақонинг Канзас-Ситидаги хонақодан устунлиги йўқ эди. Тўғри, бу ерда хоналар анча-мунча кўп бўлиб, мусофирилар йигирма беш центга тунда бошпана топишлари мумкин эди (шу тарзда уйнинг солиқдари ҳам қопланиб туради, деб ҳисоблашар эди), бироқ шуларнинг бари кўп меҳнат талаб қилиб, жудаям арзимаган даромад келтиради. Бунинг устига атрофдаги зерикарли ҳаёт Фрэнк билан Жулияниг жонига тегиб кетган, улар ҳам бу ташвишлардан бутунлай қтулиб, хонақодаги бор оғирчиликнинг ҳаммасини отаси ва онасининг елкасига юклашнинг пайида юрар эдилар. Ўн тўққизга чиққан Жулия бир ресторанда паттачи бўлиб хизмат қиласар, Фрэнк эса, у ҳадемай ўн еттига тўлиши керак, яқинда сабзавот-мева магазинидан иш топган эди. Энди кундуzlари уйда фақат бир бола – Эстанинг қонунсиз туғилган жажжигина ўғли Рассел (у олтига қадам қўйяпти) қолар эди; буваси билан бувиси эҳтиёткорлик юзасидан уни Канзас-Ситида боқиб олган етимча ўғлимиз, деб айтишарди. Қоп-қора сочли бу болакай бир оз Клайдга ҳам ўхшаб кетар, шу кичик ёшиданоқ, худди Клайдга ўргатганлариdek, унга ҳам асосий ақидаларни ўргатиб улгуришган эди, болалигига айни шу нарса Клайднинг росаям жигига тегар эди.

Эста кириб келганда (ҳозир у одмигина, сипо бир жувон эди) миссис Грифитс уйни йигиштириш билан овора: супуриб-сидириб, чанг-чунгларни артиб, ўрин-бошларни тартибга солиб юрган экан. Лекин бўзарган, эсанкираган қизи, bemavrid келиб, ўзини нариги бўш хонага имлаб чақираётганини кўриб, бошга кўп савдолар туша-туша, бунақангি нарсаларга хийлагина кўникиб кетган миссис Грифитс ишини йигиштириб қўйди-ю, хунук бир хабарни олдиндан сезиб, бирдан кўз олди

қоронгилашди. Уларга яна қандай бало бостириб келаётганикин-а? Чунки Эстанинг ваҳима тўла кулранг кўзлари ва бутун кўриниши баҳтсизликдан дарак бериб турар эди. У қўлида ушлаб олган газетасини ёзib, онасига меҳр ва ташвиш билан боққан кўйи бояги мақолага ишора қилди. Миссис Грифитс газета сатрларини кўздан кечира бошлиди. Аммо нима бу?

**«ИШЧИ ҚИЗНИ ЎЛДИРГАН ҚОТИЛ СУДГА  
БЕРИЛДИ» «ШУ ЙИЛНИНГ 8 ИЮЛИДА  
АДИРОНДАК ТОҒЛАРИДАГИ КАТТА МУШГИР  
КЎЛИДА... МИСС РОБЕРТА ОЛДЕННИ  
ҮЛДИРИШДА АЙБЛАНГАН».**

**«ҚАСДДАН ҚОТИЛЛИК ҚИЛИШДА АЙБЛАНГАН».  
«АНИҚ ДАЛИЛ-АШЁЛАРГА ҚАРАМАЙ, МЕНИНГ  
АЙБИМ ЙЎҚ, ДЕБ АЙТДИ. «СУДГА ҚАДАР  
ҚАМОҚҚА ОЛИНДИ, СУД 15 ОКТЯБРГА  
БЕЛГИЛАНДИ». «СУЮКЛИСИНИ УРИБ ҲУШИДАН  
КЕТКАЗГАН-ДА, СҮНГРА СУВГА ТАШЛАБ  
ЮБОРГАН». «БИРОНТА ҲАМ ТУФИШГАНИ УНИНГ  
ЁНИНИ ОЛИБ ЧИҚМАГАН».**

Унинг кўзи ва ақли беихтиёр равишда энг муҳим сатрларни териб ўқиётган эди:

**«КЛАЙД ГРИФИТС, ЛИКУРГДАГИ (НЬЮ-ЙОРК  
ШТАТИ) ЁҚА ТИКАДИГАН БАДАВЛАТ ФАБРИ-  
КАНТНИНГ ЖИЯНИ»...**

Клайд, унинг ўғли-я! Тунов куни, – йўқ, шунга ҳам бир ойдан ошибди (улар ҳатто Эйса билан хавотирга тушишайтган ҳам эди, нега у ҳеч...)... Саккизинчи июлда! Бугун эса ўн биринчи август! Демак – тўғри! Йўқ, унинг ўғли эмас бу! Бундай бўлиши мумкин эмас! Клайд ўз суюклиси бўлган қизнинг қотили эмиш! У мутлақо ундей одам эмас! У онасига ишларим юришиб кетди, деб ҳам ёзган эди: у – каттакон фабриканинг бўлим мудири,

ахир унинг келажаги порлоқ. Лекин бирор-бир қиз ҳақида оғиз ҳам очмаган эди! Энди бўлса, тўсатдан! Тўғри, Канзас-Ситидаги анави қизча билан... Оҳ, марҳаматли худойим-ей! Ликургдаги Грифитсларни қаранг-а, эрининг укаси-ю, ҳаммасини била туриб, бир оғиз ҳам ёзишмабди! Шубҳасиз, улар номус қилиб, жирканишган. Ёки совуққонликми бу? Э, йўғ-е, Сэмюэл, икки адвокатни таклиф қилибди-ку, ахир. Аммо қандай даҳшат-а! Эйса! Бошқа болалар-чи? Газеталарда тағин нималарни ёзишаркин! Хонақо-чи? Ҳаммасини ташлаб, яна қайсиdir бир бошқа шаҳарга кетишга тўғри келадими энди. Бироқ у чиндан ҳам гуноҳкормикин ёки йўқми? Уни айблашдан олдин буни билиб олиши керак. Газетада у ўзини гуноҳкор ҳисобламади, деб ёзишибди. Оҳ, Канзас-Ситидаги ўша усти ялтироқ аммо ўзи қабиҳ, ҳаром меҳмонхона-я! Клайднинг анави бузилган дўстлари-чи? Ҳеч ким билмайдиган ерларда дайдиганча, ота-онасига ҳам ёзмай, Гарри Тенет номи билан кун ўтказиб юрган анави икки йили-чи! Нима қилган эди у ўшанда? Нимага ўрганган эди?

У, ҳадсиз азоб ҳамда даҳшатларга кўмилганча қимир этмай турарди, бу азоб ва даҳшатлардан уни шу аснода ҳатто дунёни тушуниб тасалли то-пишга бўлган ишончлари, илоҳий ҳақиқат, илоҳий раҳм-шафқат ва нажот – ўзи ҳар доим тарғиб қилиб келган ўша эътиқодлари ҳам ҳимоя қилолмас эди. Унинг ўғли! Унинг Клайди! Қотилликда айбланиб, турмада ётибди! У телиграммма юбориши, хат ёзиши, эҳтимол ўзи бориши керакдир. Лекин пулни қаёқдан олади? Хўш, у ёққа боргандан кейин нима қилади? Шуларга чидаш учун қаердан куч-қуввату, қаердан далда олади? Яна ўша-ўша бурунгидай: буни Эйса ҳам, Фрэнк ҳам, Жулия ҳам билмасликлари керак. Эйсанинг юраги маҳкам бўлгани билан, бари бир, у қадар иродали эмас,

кўзларининг нури кетган, вужуди заиф... Энди-гина ҳаётга кириб келаётган Фрэнк ва Жулиялар бундай кулфат ва тамғани елкаларида кўтариб юришлари лозимми?

Оҳ, марҳаматли парвардигор! Наҳотки, унинг бебаҳтлигига сира чек бўлмаса-я?!

У юзини ўғирди: меҳнатдан дағаллашиб кетган бесўнақай қўллари билинар-билинмас қалтирар, ушлаб турган газетаси ҳам дир-дир титрар эди. Ёнида эса Эста; у онасига, айниқса кейинги пайтларда кўпроқ ачинадиган бўлиб қолди, чунки гунинг қанчадан-қанча азоб-уқубатларни бошидан кечирганини тушунган эди. Гоҳо-гоҳо онаси унга ҳаддан ташқари толиққандай кўриниб кетарди, энди бўлса аксига олгандай мана бу зарбани айтинг! Аммо онаси оиласаги энг кучли аёллигини Эста билар эди – зуваласи пишиқ, елкадор, журъатли хотин эди у; майли, ўзича баъзан ўжарроқ, қўполроқ кўринса-да, ҳарқалай, оилани тебратиб турадиган заҳматкаш ҳам шу эди.

– Оий, бунинг Клайдлигига сира ишонмайман!  
– дейишгагина кучи етди Эстанинг. – Бундай бўлиши мутлақо мумкин эмас, тўғримасми?

Бироқ миссис Грифитс ҳамон газетанинг ваҳимали сарлавҳасига қараб турарди, сўнгра кулранг мовий кўзлари жавдираганча хонага бир разм солиб чиқди. Кенг юзи гўё ҳаддан ташқари зўр беришдан ва бекиёс аламдан ёришгандай оқариб кетди. Унинг гуноҳкор, гумроҳ ва сўзсиз, бебаҳт ўғли шу қадар иштиёқ билан юқори мартабага эришиш, шуҳрат орттиришни орзу қиласарди, мана, энди унга ўлим чангаль соляпти, қилган жинояти учун, қотиллиги учун уни электр курсисида қатл этишлари мумкин! Газетада айтилишича, у қандайдир бечора бир ишчи қизни ўлдирган эмиш.

– Таш!.. – деб шивирлади у, бармоғини маънодор қилиб лаби устига қўйганча. – У (яъни, Эйса) ҳозирча

билмаслиги керак. Аввалига телеграмма бериб ёки хат ёзib кўрайлик. Сенинг манзилингга юбора қолишсин. Мен сенга пул бераман. Аммо мен энди бир дақиқа ўтириб олай-чи. Бўшашиб кетаётганга ўхшаяпман. Мана бу ерга ўтира қолай. Менга тавротни бер-чи. – Мисис Грифитс оддий темир каравот четига омонатгина ўтириди-ю, курсидан тавротни олиб, бир очищаёқ З ва 4-сураларни топди.

«Э, худо, фанимларим чунонам кўплайдики».

«Сенга нола қилганимда, ўзинг бандам дегин, парвардигор». Кейин у кўринишидан ҳатто хотиржамга ўхшаб, ичida 6, 8, 10, 13, 23, 91-сураларни ҳам ўқиб туширди. Эста эса қайғу-ғамдан боши қотган кўйи миқ этмай ёнида турар эди.

– Оҳ, онажон, мен бунга сира ишонмайман! Бу шундай даҳшатлики!

Лекин миссис Грифитс суро ўқишида давом этарди. У, гўё ҳамма муаммоларни писанд қилмай, қандайдир осойишта хилватгоҳга беркиниб олишга улгургандай, у ерда бу дақиқаларда инсонга хос нарсаларнинг ҳеч бири – ёмонликлар ҳам, гуноҳлар ҳам унга хуруж қилолмайдигандай кўринарди. Ниҳоят, у бутунлай хотиржам бир тарзда китобни ёпди-ю, ўрнидан турди.

– Энди биз телеграммада нима ёзишимизни ва уни кимга юборишимизни ўйлаб олишимиз даркор. Мен Клайдга, албатта, айтмоқчиманки... аниви... нима эди... Брижбург, – дея қўшимча қилди у газетага қараб олиб, сўнгра ўша заҳотиёқ тавротдан бир оятни ёд айтди: «Одилликда ягона, бандам дегин, парвардигор». – Ёки анави икки адвокатга юборамизми, бу ерда уларнинг исмлари ҳам бор. Телеграммани Эйсанинг укасига жўнатишга ҳам кўркяпман, у тўппа-тўғри отангга жавоб қилиши мумкин («Сен – менинг таянчимдурсан ва кучимдурсан. Сенга умид қиладурман»). Бироқ, агар сундъя ёки анави адвокатлар номига юборсак ҳам, те-

леграммани амакингга беришса керак, деб ўйлайман, сен нима дейсан? Йўқ, яхшиси, тўппа-тўғри Клайднинг ўзига жўнатамиз («У мени осойишта оби-ҳаёт манзилига олиб борадур»). Шунчаки, мен сен ҳақингда газетадан ўқидим, лекин меҳрим ўша-ўша – ўзингда, мен сенга ишонаман, аммо сен менга бор ҳақиқатни очиқ айтишинг ва биз нима қилишимиз кераклигини ёзиб юборишинг зарур, деб қўя қолган маъқул. Агар унга пул лозим бўлса, қандай қилиб топишни ҳам ўйлаш керак («У дилимга далда берадур»).

Шу пайт унинг ясама хотиржамлигидан асар ҳам қолмай, дағаллашиб кетган бесўнақай қўлларини яна қисирлатиб ўйнай бошлади.

– Йўқ, ундай бўлиши мумкин эмас. Вой худойим-е! Ахир, У менинг ўглим-ку. Биз ҳаммамиз уни яхши кўрамиз, унга ишонамиз. Биз шуларни гапиришимиз керак. Худо йўлини осон қилсин, ишқилиб. Бардам бўл ва тангрига сифин. Имонингни сақла. Фоний дунёда ўз паноҳида асррагай сени...

У ўзини билмас, нима гапираётганини ҳам зўрбазўр англаётган эди. Эста эса унинг ёнида турганча, ҳадеб такрорларди.

– Ҳа, ойижон! Ҳа, албатта! Ёзаман, телеграмма бераман. Унга, сўзсиз, етиб боради бу!

Лекин айни пайтда у: «Ё тавба! Тавба! Қотилликда айбланяпти-я, бундан ҳам ёмонроқ гап бўлиши мумкинми?! Йўқ, бу, шубҳасиз, янгиш гап. Ундай бўлиши мумкин эмас. Вой, билиб қолса, нима қиламан энди? (У эрини ўйлади.) Бу, яна Рассел воқеасидан кейин-а. Яна Канзас-Ситида Клайд қилган номаъқулчиликлардан кейин-а... Онам шўрлик-а! Намунча бахти қаро бўлмаса...» деб ўйлар эди.

Орадан бир оз вақт ўтгач, улар нариги хонани тозалашга қўмаклашаётган Эйсага ҳеч нарсани билдиримасликка ҳаракат қилиб хонақо залига тушдилар, хонақода осойишталик ҳамда девор-

лардаги сон-саноқсиз суралар парвардигорнинг раҳм-шафқати-ю, донолиги ва умрбод одиллиги-дан ваяз айтар эди.

## XVIII БОБ

Юқоридагича руҳда тузилган телеграмма зудлик билан Белнеп билан Жефсон номига жўнатилгандан сўнг, улар ҳам Клайдга шу заҳотиёқ ҳамма ишларим жойида деб, унинг жуда яхши ҳимоячилари борлиги, пулга ҳам муҳтож эмаслиги, ҳозирча яхшиси, тувишганларидан биронтасининг ҳам бу ерга келмай туришини адвокатлари маслаҳат беришаётгани, чунки унга зарур бўлган ҳамма нарсаларнинг муҳайёлиги тўғрисида жавоб ёзиши маслаҳат беришди... Айни пайтда ҳимоячилар ҳам миссис Грифитсга нома ёзишиб, Клайдга чин юракдан ёрдам бериш истаклари борлигига уни ишонтириб, ҳозирча воқеаларнинг боришига аралашмай турган маъқул, деб тавсия қилишди.

Фарбда яшовчи Грифитсларнинг Шарққа келиб қолиш хавфи шу йўсинда барҳам топди; аммо Клайднинг ота-онасига тегишли айрим маълумотлар, уларнинг касби-кори, яшайдиган жойлари, имон-эътиқодлари ва ўғилларига нисбатан меҳр-муҳаббатлари тўғрисидаги айрим гаплар унда-бунда газеталарга чиқиб туришига Белнеп билан Жефсон уччалик қарши ҳам эмас эдилар, чунки бунга қадар кўпгина газеталар Клайднинг тувишган яқин кишилари уни мутлақо унутиб юборишиган, деб зўр бериб таъкидлаётган эди. Шунинг учун ҳам онасидан Брижбургда олинган телеграмма бу ишга ниҳоятда қизиқиб қараётган шахслар томонидан зудлик билан ўқилиб, мазмуни шошилинч равишда баъзи бир одамларга ва матбуот вакилларига енг ичида етказилиши адвокатлар учун жуда ҳам қўл келди: Денвердаги бутун бошли оила ўша

заҳотиёқ қидириб топилди-ю, улар билан суҳбатлар ўюштирилди. Орадан сал ўтмай, гарбий ва шарқий газеталарнинг барида Клайд оиласининг ҳозирги аҳволи, ота-онасининг хонақо воизлари сифатидаги фаолиятлари, тор ва ҳаддан ташқари чекланган диний эътиқодлари ҳақида қисқа ё муфассал ҳисоботлар ёритила бошланди; ҳатто болалик пайтларида Клайдни ҳам бутун оила билан эргашиб кўчада суро айтиб юришга мажбур этганлари тўғрисида ҳам гаплар бор эди, бу янгилик Ликург ва Ўн иккинчи кўлдаги улфатларда ҳам, шунингдек, Клайднинг ўзида ҳам кўнгилсиз бир фашлик туғдирди.

Миссис Грифитс эса, табиатан ҳалол ва покиза, имони бобида босган ҳар бир қадамида ғоят самимий бўлгани учун, кетма-кет кириб келаётган мухбирларга Денверда ҳамда бошқа ерларда ўзи ва эри олиб борган диний ташвиқот ишларини майда-чуйдаларигача иккиланмай сўзлаб бераверар эди. У на Клайдга ва на ўзининг бошқа жўжаларига болалик қувончлари ва ўйин-кулги насиб бўлмаганини ҳам ҳасрат қиласр эди. Аммо унинг ўғилгинаси, майли, ҳозир нима гуноҳда айблашса айблашаверсин, аслида у қадар аҳмоқ бола эмас эди, шу сабабдан бунақангি жиноят қилишда чиндан ҳам унинг айбдорлигига у ишонмайди. Буларнинг бари – қандайдир бахтсизлик, хунук бир янглишмовчилик бўлса керак, ўғли албатта буни судда айтиб беради. Борди-ю, у чиндан ҳам тентаклик қилган бўлса, буларнинг ҳаммасига бир неча йил бурун Канзас-Ситидаги хонақонинг ишини тўхтатиб қўйган бошқа бир бахтсизлик ҳам сабабчи бўлган, ўшанда бутун оила Денверга кўчиб ўтишга мажбур бўлган эди, Клайднинг ҳолидан эса ҳеч ким хабар олмади. Ўғли Ликургдаги бадавлат амакисига хатни унинг қистови билан ёзган эди, шу баҳонаи сабаб билан у ўша ёққа бориб қолган эди.

Клайд ўз камерасида бу хабарларни ўқир экан, дилни яраловчи хўрлик ва ўқинч туйгусидан азоб чекар эди. Ниҳоят, у онасига норозилигини ёзиб юборди: нима учун у ҳадеб ўтган ишлар, ўзлари шуғулланган ваъзхонлик ҳақида тинимсиз гапираверади. Клайд бутун умр ўша ишларни ёмон кўргани ва қўчакўйда изғиб юришни жини ёқтиргмаганини билади-ку, ахир. Жуда кўп кишилар – хусусан, амакиси ва амакиваччаси ҳам, Клайд танишиб ултурган ва ўз турмушларини бутунлай бошқача қуриб, зебу зийнат, ҳашаматлар ичига қўмилган бадавлат одамларнинг ҳаммаси ҳам воизлик фаолиятини менси-майди. У билан отасидай муқаддас деб билишмайди. Энди Сондра ҳам шуларнинг барини ўқийди, албатта, дер эди у ўзига ўзи, ваҳоланки, буларни у ўлиб-тирилиб яширишга уринган эди.

Лекин шунга қарамай, у онасини фақат ҳурмат ва меҳр-муҳаббат билан эслар, чунки онаси жуда файратли ва самимий эди, Клайдга бўлган меҳри эса доимо бир хил, ўзгармас эди. Ўғлининг хатига жавобан у бечора, агар дилингни оғритиб қўйган ёки соф туйгуларингни таҳқирилаган бўлсан, она бўлмай мен ўла қолай, деб афсусланиб ёзибди. Аммо-лекин, бошга қилич келган тақдирда ҳам ҳар доим ростини гапириш керак эмасми, ахир? Тангрининг марҳамати кенг, тангри, деган одам ҳеч қачон хор бўлмайди. Шу сабабли Клайд ундан ёлғон гапиришни сўрамаёқ, қўя қолсин. Лекин, агар Клайдга ёрдам керак бўлса, бир оғиз сўз кифоя, онаси бажонидил пул топишга уриниб кўради, ёрдамга етиб келади... Ўғлининг ёнида қамоқҳонада ўтириб, қандай қилиб қутулиш йўлларини биргалашиб ўйлашади ва унинг қўлларини ўз кафтлари орасига олиб сийпайди... Бироқ Клайд, онаси тиник мовий кўзларини унга типпа-тик қадаганча, ундан ҳақиқатни айтишни талаб қилишини ҳам яхши билар эди. Ҳозир Клайд бунга чидай олма-

ган бўлур эди. Шунинг учун, у бир оз фикр юритиб олгандан сўнг, онасининг келмай тургани маъқул деган қарорда тўхтади.

Чунки у суд рўпарасида, худди дарғазаб денгиз устида турган вулқонли қоя сингари туар, бу деган сўз – Мейсоннинг ашаддий хужуми-ю, бунга унинг Жефсон ва Белнеп тўқиб берган уйдирмалар билан жавоб қайтариши, деган маънони билдирар эди. Гарчи у, охирги дақиқада Робертани уришга журъатим етмаган эди, деган фикр билан ўз виж-донини овутишга ҳаракат қиласа-да, бироқ шунга қарамай, бу янги сафсатани сўзлаб, шу айтганида қатъий туриши унинг учун ниҳоятда мушкул бир вазифа эди. Буни иккала адвокат ҳам тушунишар эди, шу сабабли Жефсон Клайд камераси остонасида тез-тез пайдо бўлар ва у билан:

– Хўш, бугун ишларимиз қалай? – деган сўзларни айтиб саломлашар эди.

Жефсоннинг қўпол, исқирт, пала-партиш тикилган костюми шу қадар ғалати кўринардики! Кўзигача бостириб кийиб олган, эскириб кетган тўқ жигар ранг юмшоқ шляпасини айтмайсизми! Бақувватлиги шундоқ сезилиб турган, узун, қоқ суяқ, тирсаги чиққан бу қўлларни-чи! Совуқдан-совуқ, кичик-кичик кўк кўзларини айтинг, улар худди одамни тешиб юборадигандай, айёрглик ва тап тортмас қатъиятга тўла эди, Жефсон шу айёрглиги ва қатъиятини Клайдга ҳам ўтказишга уринар эди, бунга у қисман эришган ҳам эди!

– Хўш, бугун яна кимлар келди? Ваъзгўйлар, қишлоқ қизлари ёки Мейсоннинг йигитларидир?

Клайдни шу вақт ичida турли-туман одамлар сира тинч қўймагани учун ҳам Жефсон унга ана шундай саволни берар эди, чиндан ҳам жиноий ва шаҳвоний ваҳималарга ўч одамлар Робертанинг аянчли ўлимни-ю, унинг гўзал ва бадавлат рақибаси борлиги билан ниҳоятда қизиқиб қолган эдилар.

Маҳаллий майдада адвокатлар, врачлар, дүкондорлар, турли мазҳабдаги қишлоқ руҳонийлари келишар эди – уларнинг бари бефаҳм ва дагал кишилар бўлиб, ҳар хил шаҳар амалдорларининг дўстлари ва танишлари эдилар; улар Клайднинг камераси олдида тонг саҳарлаб, кўпинча кутилмаган пайтда пайдо бўлиб қолишар ва синчков ё газабнок ёки даҳшатли назар билан уни кўздан кечиришар, кейин тахминан қуидагича саволларни беришарди: «Ука, сиз худога сифинасизми? Сажда қилишга оғринмайсизми?» (Шунда Клайд ҳар гал отаси билан онасини эслар эди.) Кейин яна саволлар ёғилар эди: хўш, у тангрининг иродасига бўйин эгдимикан? Наҳотки, Роберта Олденни ўлдирганини у ростдан ҳам инкор этса? Қизлар эса мана бундай саволлар беришарди: «Айтишларича, сиз биттасини севиб қолган экансиз. Ўша қизнинг исми нима? Ҳозир қаерда у? Илтимос, бизга шуни айтиб берсангиз! Ҳеч кимга оғиз очмаймиз! Ўша қиз судга келадими?» Клайд бунақангি саволларга аҳамият бермасликка ҳаракат қиласар ёки дудмал, чалғитиброқ, қўлидан келганча ўзини бепарво тутиб жавоб қайтарар эди. Улар обдан Клайднинг фашига тегар эдилару, аммо Белнеп ҳам, Жефсон ҳам унга ўз шахсий фойдаси учун ҳам иложи борича қувноқроқ, тетик ва ёқимтойроқ бўлиб кўриниш зарурлигини тўхтовсиз равища уқтирап эдилар. Кейин рассомлар ёки фотосуратчилар ҳамроҳлигида муҳбир эркаклар ва муҳбир аёллар келишиб, Клайдни гапга тута бошладилар, уни суратга туширдилар, расмини чизиб олдилар. Бироқ Клайд Белнеп ва Жефсоннинг маслаҳатига кўра, бу тоифа одамлар билан одатда гаплашишдан бош тортар ёки аввалдан пишиқлаб қўйилган – ёдлаб олган жавобларини айтар эди.

– Нима оғзингизга келса, гапираверингу, – дея уқтиради Жефсон қувноқлик билан, – фақат тайинли бир сўз айтмасангиз бўлгани. Қовоғингизни

сира уйманг. Юзингиз доимо қулиб турсин, тушунарлыми? Анави қофозингизни ёдлаб олишни унумадингизми? (Жефсон Клайдга машинкада күчирилган, судда албатта берилиши мумкин бўлган узундан-узун саволлар рўйхатини топшириб қўйган эди; ҳар бир саволга у айни шу қофозда ёзилгандек жавоб қайтариши керак эди, борди-ю, бошқа тузукроқ жавоб топаман деса, унда ҳозироқ, ўйлаб, ёдлаб олиши зарур эди. Ҳаммаси Катта мушгир саёҳатига, уни иккинчи шляпани сотиб олишга мажбур этган сабабларга, у бошидан кечирган руҳий бурилиш: қандай, қачон, қаерда? – юз берганига оид саволлар эди.) Сиз учун бу бамисоли бир «Муқаддас китоб»дай гап, тушунарлими? – Кейин у ўзи папирос чекса ҳам, бироқ Клайдга сира таклиф этмас эди: чунки Клайд ўзини тутган, сипо йигит сифатида ном чиқариши учун бу ерда чекмаслиги керак эди.

Жефсон ҳар гал Клайднинг оддига келиб кетганда у ўзини худди адвокат айтгандай тута билишига хийла вақт ишониб ҳам юрап эди: Клайд суд залига шаҳдам ва дадил кириб боради, ҳамманинг бўзрайиб қарашига – ҳатто нақ Мейсоннинг қарашига ҳам мардона туриб чидайди, (ҳатто гувоҳ сифатида жавоб бераётган пайтида ҳам) Мейсондан қўрқишини, ўзи анави кўчирма қофоздаги жавоблар ёрдамида изоҳлаши лозим бўлган Мейсонга маълум ўша воқеаларнинг бутун даҳшатини ҳам унугади... Робертани ва унинг сўнгги қичқириғини ҳам, Сондра ва унинг теварагидаги қувноқ, ажойиб муҳитдан жудо бўлиш оқибатида келиб чиққан қалб азоби ва дард-аламларини ҳам унугади.

Лекин яна қоронги тушди дегунча ёки бутун узун қунни Клайд фақат қотма, серсоқол Краут ё айёр, чаққон Сисси билан ўтказадиган бўлса (улар қачон қараса, шу яқин ўртада ивиришиб юришар, ора-сира камера эшигига келиб: «Хўш, аҳволларимиз қалай?» деб сўрашар ва шаҳардаги ол-

ди-қочдилардан гап очишар ёки шашка, ё шахмат ўйнашга берилишар эди), Клайд борган сари маъюлашиб қолар ва охири бориб, ҳарқалай, бу ишдан сира қутуолмасам керак, деб ўйлай бошлар эди. Ахир, у, адвокатлар, онаси, укаси ва сингилларини ҳисобга олмагандан, бир ўзи ёлғиз-ку! Сондрадан эса садо ҳам чиқмаслиги аниқ. Дастрекки зарба ва даҳшатдан бир оз ўзига келган Сондра ҳам энди Клайд тўғрисида анча-мунча бошқачароқ фикр юрита бошлаган: сирасини айтганда, Клайд Сондрани севгани туфайлигина, эҳтимол, Робертани ўлдирган ва ўзи мискин бир аҳволга тушиб, азобда қолгандир, деб ўйлар эди. Ҳарқалай, эл-юрт Клайдга нисбатан шу қадар душманлик ва шу қадар нафрат билан қарап эдики, Сондра унга бир энлик хат ёзишни ҳам ҳатто хаёлига келтиромас, бунга журъат этолмас эди. Ахир, у – қотил-ку! Бунинг устига шўрлик оиласини айтинг! Газеталарда унинг Farbda яшовчи ота-оналари – бор-йўғи кўча изғиб юрадиган ваъзгўйлар эканлиги, Клайднинг ўзи ҳам болалигига кўчаларда суралаб кун ўтказганини ёзишяпти!

Аммо вақти-вақти билан у яна Клайднинг жўшқин, бемулоҳаза ва ҳойнаҳой, оч – чанқоқ эҳтироси тўғрисида беихтиёр ўйлаб кетар эди. Демак, у шунақангидан даҳшатли ишга қўл урган экан, ҳарқалай, Сондрани қаттиқ севган бўлиши керак! Шу сабабли Сондра, қачонлардир кейинроқ бориб, бу гапларнинг ҳаммаси босди-босди бўлиб кетгач, эҳтиёткорлик билан бир иложини қилиб, тагига исмини ҳам қўймай, Клайдга хат ёзига кўришнинг иложи бўлмасмикан, – деб ўзига ўзи савол берар эди. Сондрани шу қадар қаттиқ севвар экан, уни ҳам ударажада унугиб юбормаганларини, майли, Клайд билиб қўйсин. Лекин ўша заҳотиёқ Сондра бошқача қарорга келди: йўқ, йўқ...ота-оналари... агар улар билиб қолишса ёки гумонсирашса бор-

ми... таниш-билишлар-чи... Сондранинг аввалги дўстлари-чи?.. Йўқ! Нима бўлганда ҳам ҳозир бундай қилиш ярамайди. Эҳтимол, кейин у озод этилгандами ёки... ёки... жазолангандами... шундай қилар, бунга унинг ақли ҳам етмайди. Гарчи Клайд унга эришаман, деб қилган ёвуз жиноят Сондрага шу қадар тубан ва манфур бўлиб туюлса-да, бари бир у бағоят даражада изтироб чекар эди.

Клайд эса бу пайтда камерада у ёқдан-бу ёқча юрар ёки деразадаги темир панжара ортидан қоронги майдонга тикилар ёки газета кўрар ва уларни қайта ўқиб чиқар, ё адвокат келтириб берган журнал ва китоб саҳифаларини асабийлик билан варақлаб ўтирас ёки шашка ва шахмат ўйнар, ё овқатланар эди: Белнеп билан Жефсон турма бошлиқдари билан алоҳида келишиб олган эди (Клайднинг амакиси шу хоҳишни билдирган эди), унга оддий маҳбусларга қараганда бошқачароқ, энг яхши таомлардан берилиши керак эди.

Чамасига кўра, Сондрани бутун умрга, узил-кесил йўқотгани учунми, у деярли бефойда бўлиб тулувчи бу курашни давом эттира оладими-йўқми, шу тўғрида қайта-қайта ўйлар эди.

Бироқ вақт-вақти билан, ярим тунда ёки тонг саҳарда, бутун турма жимжит бўлиб қолган бир пайтда, у туш кўрар... ё электр курсининг шарпаси кўриниб, уни ҳаммадан ҳам кучлироқ даҳшатга солар ва сўнгги иродасидан ҳам маҳрум қилар эди... У бир нуқтага тикилган кўйи кўзлари ола-кула бўлиб салгичиб ўрнидан туриб кетар эди. Юраги шиддат билан дукиллаб тепар, пешонаси ва кафтларини соvuқ тер босар эди. Электр курси қаердадир – анави ёқда, штатнинг бир турмасида турибди. Бир вақтлар Клайд – одамлар унда қандай ўлиши тўғрисида ўқиган ҳам эди. Клайд у ёқдан-бу ёқча юриб ўйлар, фақат ўйлар эди... агар ҳамма иш Жефсон мўлжаллаётгандай бўлиб чиқмаса-чи... агар у, иши янгитдан

судда күрилган тақдирда ҳам қораланса-чи... унда... Бу турмадан бир амаллаб кутулиб чиқиб, қочиб ке-тишнинг иложи бўлмасмикин? Мана бу кўхна фишт деворлар... Қалинлиги қанча экан? Балки, ҳарқалай болғами, тош-пошми... ақалли укаси Фрэнк ёки синглиси Жулия ёки Ретерер, ё Хегландлар олиб келишлари мумкин бўлган бирор асбоб биланми... агар, ўшаларнинг биронтаси билан яширин хат ёзишиб, уларни тузукроқ бирон нарса олиб келишга кўндиrolганда эди-ю... Агар арра топгандами, темир панжарани шарт кесиб ташлар эди! Кейин қочиб қолар эди, орқасига қарамай қочар эди, ҳолбуки бир вақтлар ўша ўрмонлардаёқ жуфтакни ростглаши керак эди-я...

Лекин энди қандай қилиб қочсин? Қаёққа қочсин?

## XIX БОБ

Ўн бешинчн октябрь. Осмон булатли эди. Январь изғиринига ўхшаш аччиқ шамол ҳазонларни бир ерга уом қилиб тўплар эди-да, кейин тўсатдан осмони фалакка учириб кетар эди, улар гиргир айланиб, қушлар сингари ўзларини у ёқдан-бу ёққа уришар эди. Оддинда юз берадиган кураш ва фожиаларни кўплар кўнглидан ўтказиб туришларига, электр курсининг шарпаси хира бўлсада, идрок кўзгусида кўриниб-кўриниб қўйишига ҳам қарамай – қандайдир тантанавор кайфият ҳукм сурар эди: юзлаб фермерлар, ўрмон кесувчилар, савдогарлар форд ва бюик машиналарига тушганча, хотинлари, қиз ва ўғиллари, ҳатто эмизикли чақалоқларигача кўтариб келишар эди. Улар суд очилишидан анча буруноқ майдонга йиғилишиб, белгиланган вақт яқинлашган сари, бир хиллари Клайдни кўриб қолиш мақсадида турма дарвозаси олдида, бир хиллари эса турма рўпарасидаги суд эшиги олдида уймалаша бошлидилар: чунки Клайдни шу эшиклардан олиб ўтишлари аниқ

эди, халойиқ уни шу ерда күргач, кейин суд залига кириши ҳам мумкин эди. Күхна бино томининг бўғотлари ва рахларида юрган кабутарлар эса эринчоқдик билан у ёқдан-бу ёқقا изгишар эди.

Мейсонни унинг яқинлари – Бэртон Бэрлей, Эрл Ньюком, Зилла Саундерс ва Мэниго фамилияли ёшгина, яқинда ўқишини битириб келган брижбурглик юрист ўраб олишди: улар Мейсонга текширув ҳужжатларини тартибга солишда кўмаклашишлари, номи шу кунларда бутун мамлакатга ёйилган прокурор қабулхонасида йиғилишиб улгурган ҳар хил гувоҳларга маслаҳат ва йўлланмалар беришлари керак эди. Кўчада, суд биноси оддида эса чакана савдогарлар: «Ёнғоқقا кеп қолинг!» «Сосиска! Қайноқ сосиска!» «Роберта Олденнинг бутун хатлари-ю, Клайд Грифитснинг тарихини сотиб олинглар! Атиги йигирма беш цент!» – дея қичқиришарди. (Бэртон Бэрлейнинг бир оғайниси Робертанинг Мейсон идорасида турган хатларининг нусхасини ўғирлаб олиб, Бингхэмтондаги суюқ романлар ноширига сотган, у эса бир зумдаёқ бу «даҳшатли жиноят»ни акс эттирган ҳолда, Роберта ва Клайднинг расмларини ҳам бериб, алоҳида китобча чиқариб юборган эди).

Бу пайтда турма қабулхонасида Элвин Белнеп ва Рубен Жеффсон ҳамда улар билан бирга Клайд ҳам ўтиради, у Ўн иккинчи кўл қаърига бутунлай кўмиб кетишини мўлжаллаган ҳу анави костюми-ни кийиб олган эди. Айни вақтда у янги галстук тақиб, янги кўйлак ва янги бошмоқ ҳам кийган эди, буларнинг бари Ликургда у илгари қандай пўрим юрган бўлса, судда ҳам худди ўша қиёфада ҳозир бўлиши учун қилинган эди. Ёнида – новча ва озгин, одатдагидай пала-партиш кийинган, аммо иродаси темирилиги юз бичими-ю, ҳар бир ҳаракати ва ҳар бир қарашидан шундоқ сезиладиган Жеффсон туар эди, Клайд Жеффсоннинг шу хусусиятидан дои-

мо таажжубланиб ёқасини ушлар эди. Белнеп эса Олбэнининг ман-ман деган олифталарини ҳам қочирадиган бўлиб зўр кийиниб олган эди; унинг зиммасида судда ишни биринчи бўлиб изоҳлаб беришдек ва гувоҳдарнинг қайта-қайталаб сўроқ қилинишида иштирок этишдек мушкул бир вазифа турар эди.

– Кўзингизни очинг, ҳеч нарсадан қўрқманг, у ерда нима гапиришса ҳам ва судда нима қилишса ҳам асабийлашаётганингизни билдириманг, эшитяпсизми, Клайд? – дер эди у. – Биз бошидан охиригача сиз билан бирга бўламиз. Сиз ўртамиизда ўтирасиз. Жилмайнинг ёки ўзингизни бепарво кўрсатинг, фақат ваҳимага тушиб ўтируманг. Бироқ ҳаддан ташқари адабсиз ва қувноқ бўлиш ҳам ярамайди, тағин улар сизни ҳамма ишга енгилтаклик билан қарайпти, деб ўйлашмасин. Тушуняпсизми, сиз ҳамма вақт дилкаш ва ёқимли йигитча бўлиб кўринишингиз, ўзингизни ҳам жентельменларча тутишингиз керак. Кейин мутлақо қўрқманг – бу сизга ҳам, бизга ҳам ёмон зиён етказиши мумкин. Ахир, сиз айбдор эмассиз-ку, демак, гарчи сиз юз берган воқеадан қаттиқ азобланингиз керак бўлса ҳам, аммо қўрқишингизга ҳеч қандай асос йўқ. Мен ишонаманки, шуларнинг барини сиз жуда яхши тушуниб етгансиз.

– Ҳа, сэр, гапларингизга тушуняпман, – деб жавоб берди Клайд. – Мен ҳаммасини худди сиз айтгандай қиласман. Кейин уни мен атайлаб урмадим-ку, ахир, бу – чин ҳақиқат, шундай бўлгандан кейин нимадан қўрқай?

Сўнгра у Жефсонга тикилди, чунки у кўнглида Белнепдан кўра кўпроқ унга ишонар эди. Аслида ҳам ҳозир Белнеп айтган ўгитлар Жефсон унга икки ойдан бери тайинлаб келаётган гапларнинг худди ўзгинаси эди. Клайднинг қараётганини сезган Жефсон ҳам унга яқинроқ сурилиб ўтирди ва тешиб

юборгудек, аммо одамга далда берувчи мовий кўзларини Клайдга тик қадаганча, гап бошлади:

– Сиз айбдор эмассиз! Сиз айбдор эмассиз, Клайд, тушунарлими? Буни энди сиз яхши англаб олдингиз, ҳар доим шунга ишониб, шуни ёдда тутишингиз керак, чунки аслида ҳам шундай бўлган-ку, ахир. Сиз уни ураман деб ўйламагансиз, эшитяпсизми? Сиз бу ҳақда қасам ичяпсиз. Белнепга ҳам, менга ҳам қасам ичгансиз, биз бунга ишонамиз. Шароит шундайки, биз бор гапни худди сиз айтгандай изоҳлаб беролмай қолсак, у ҳолда маҳаллий суд маслаҳатчиларининг анчагина қисмини бунга ишонишга ва тушунишга мажбур қилолмаймиз. Бунга йўл қўйиш ярамайди, буни мен сизга айтганман. Энди анависи-чи? Ҳақиқатни сиз ҳам биласиз, биз ҳам. Лекин сизнинг устингиздан адолатли ҳукм чиқаришлари учун биз изоҳни бир, оз бошқачароқ, бузиброқ беришимизга тўғри келади, сиз мисс Олденни билмай уриб юборганингиз аниқ, бироқ буни бошқачароқ тушунтириш лозим: биз суд маслаҳатчилари бу ҳақиқатни қандай бўлса шундайлигича, бўялмаган тусда тушунадилар, деб умид қилолмаймиз. Тушуняпсизми?

Бу одамни ҳамма вақт иззат билан эшитадиган Клайд:

– Ҳа, сэр, – деб жавоб берди.  
 – Худди шунинг учун ҳам, мен сизга қайта-қайта айтганман-ку, биз сизнинг бошингиздан ўтган руҳий бурилиш тўғрисидаги воқеани ўйлаб топганмиз. Бу вақт жиҳатидан унчалик тўғри эмас, аммо сиз кўлда бўлган пайтингизда чиндан ҳам ўзингизда ўзгариш сезгансиз-ку, ахир. Бизнинг важ-далилимиз ҳам худди мана шунда. Бироқ ишнинг жуда кўп ғалати томонлари ҳисобга олинадиган бўлса, суд маслаҳатчилари бунга сира ҳам ишонишмайди, шунинг учун ҳам биз кўнглингизда юз берган руҳий ўзгаришни шунчаки бошқа

вақтга олиб ўтамиз, тушунарлыми? Сиз қайиқда сайр этгунингизча шундай бўлган эди, деб кўрсатамиз. Бу унчалик тўғри эмасу, аммо, сиз уни ургансиз, айнома қўйишаётгани ҳам, ҳарқалай, у қадар тўғримас-ку! Кейин сизни, нотўғри айнома билан электр курсига ўтқазишолмайди, ҳамма қандай қарайди билмайману, аммо бундай бўлишига рози эмасман. – У Клайднинг қўзига тик қарди-да, давом этди:

– Биласизми, Клайд, бу худди картошка ёки костюмга буғдой ёки ловия айирбошлаб олгандай бир гап, чунки ақчангиз бўлгани ҳолда кимдир биттаси ҳеч нарсадан ҳеч нарса йўқ, пули – ясама, деб гап ёйиб юборгану, энди уни ҳеч ким олгиси келмайди. Шу сабабдан буғдой ёки ловия билан қарздан қутулишингизга тўғри келади. Биз эсак, уларга боплаб ловия берамиз. Аммо сиз айбдор бўлмаганингиз учун виждонимиз пок қолаверади бари бир. Сизда айб йўқ! Аввалига ниятингиз қай даражада бўлганидан қатъи назар, охири бориб сиз уни уришни истамаганингиз тўғрисида менга онт ичдингиз. Шунинг ўзиёқ етади менга. Сизда айб йўқ.

Шу ерда Жефсон Клайд костюмини ёқасидан ушлади-да, унинг зўриққан ва асабийлашган қўй кўзларига анча вақт тикилиб турди, кейин қатъият ва ишонч билан қўшимча қилди (бу ишонч Жефсоннинг ўзи учун фақат бир хом хаёл эди, бироқ у Клайдга қандай бўлмасин шу ишончни сингдиришга уринар эди):

– Бўшашиб бораётган ёки асабийлашаётган пайтингизда ёки сиз Мейсоннинг саволларига жавоб бераётганингизда, назарингизда, у устун келаётгандай туюлса, эсингизда тутингки, маҳкам туриб ўзингизга ўзингиз: «Менда айб йўқ! Айб йўқ Мени жазолашга уларнинг ҳақдари йўқ, чунки мен чиндан ҳам айбдор эмасман!» дейишингизни истар эдим. Агар шунда ҳам ўзингизни қўлга оол-

масангиз, унда менга қаранг. Мен ёнингизда бўламан. Сал юрагингиз ҳовлиқдими, ҳозир мен сизга қандай қараётган бўлсам, худди ўшандай тикка кўзимга боқинг. Шунда ўзингизни қўлга олишингизни ва ҳозир айтиб турганимдай ўзингизни тутиб олишингизни истаётганимни биласиз: биз нима тўғрида онт ичгин десак, ўша нарса тўғрисида онт ичасиз, айни пайтда сиз, ҳатто кўнглингизга келган тақдирда ҳам, буни нотўғри бўляпти, деб ўйламаслигингиз керак. Мен сиз қилмаган иш деб ва сизнинг қасам ичиб чин ҳақиқатни тасдиқлашингизга йўл қўймаганлари туфайли сизни қатл этишларига рози бўлмайман. Гап шу, вассалом!

У хурсанд бўлиб, дилкашлик билан Клайднинг елкасига қоқиб қўйди, Клайд эса вужудига ўзгача бир бардамлик юргурганини сезиб, шу аснода у, ўзимни сўзсиз тайнинлаб айтиётганиларидан тута оламан ва айни шундай қиласман, деб ўйлай бошлади.

Кейин Жефсон соатини чиқариб, аввалига Белнепга, сўнгра шундоқ рўпарадаги деразага қаради. Суд биноси олдида ва турма дарвозалари яқинида аллақачоноқ ҳалойиқ тўпланган, бу ерда мухбирлар ва фотосуратчилар бетоқат бўлиб Клайднинг чиқиб келишини пойлашар, уни ва бу ишга алоқаси бор бошқа ҳар қандай кишиларни ҳам йўл-йўлакай расмга олиб қолишнинг пайида эдилар.

– Ҳойнаҳой, вақт бўлди-ёв, – деди совуққонлик билан Жефсон. – Афтидан, бутун Катараки фуқароси суд залига йигилмоқчи, шекилли. Ҳамма ёғимизни одам босиб кетадиган бўлди. – Шу ерда у Клайдга қараб, давом этди: – Сиз уялиб ўтируманг, Клайд. Буларнинг ҳаммаси шаҳарликларнинг ўйин-томушасини кўриб кўнгил очмоқчи бўлган шунчаки қишлоқлар, холос.

Жефсон ҳам, Белнеп ҳам чиқишиди. Уларнинг ўрнига Клайднинг ҳузурига Краут билан Сиссел ки-

ришди; ҳимоячилар ўтлари қовжираб ётган майдон орқали, шивир-шивир гаплашаётган оломон орасидан ўтиб, суд биносига қараб йўл олишди.

Орадан тағин беш дақиқа ўтгач Слэк ва Сиссел ўрнини олган Краут ва Суэнк ҳамроҳлигида, бунинг устига, оломон томонидан кўтарилиши мумкин бўлган тўполон ва сиқасдларга қарши яна қўшимча – ўнг ва чапдан икки кишидан қоровул қўйилганча, Клайднинг ўзи ҳам чиқиб келди. У қўлидан келганча дадил ва бардам туришга ҳаракат қиласар эди; аммо атрофида қўйпол ва ғалати одамлар – бесўнақай мўйна чопонли ва қалпоқли ёки бу ерлардаги фермерларга хос эски, оқариб кетганидан рангини билиб бўлмайдиган кийимларни кийиб олган кишилар ва уларнинг хотинлари, бола-чақалари шу қадар кўп эдики... Уларнинг бари Клайдга совуқ бир зийраклик билан қарап эдилар... У, мана ҳозир кимдир менга тўппончадан ўқ узиб қолади ёки пичоқ кўтариб ҳужум қилади, деб юраги ўйноқлар эди. Қўлларида тўппонча яланғочлаб олган қоровуллар эса унинг хавотирини баттар оширап эдилар. Бироқ у фақат: «Олиб келишяпти! Олиб келишяпти! Ана, у!» «Кўринишидан сира қотил демайсан!» деган овозларнигина эшитар эди.

Фотоаппарат затворлари шарақ-шуруқ қиласар, ҳамроҳлари баттар уни ўртага олиб қисишар, Клайднинг бутун вужуди эса тобора музлаб бораётганга ўхшарди.

Ана, беш пиллапояли жигар ранг тош зина, кўҳна суд биносининг эшиклари, ичкарида эса яна бир зина; бу зина шифти ва деворлари баланд, кенг, узун залга олиб чиқади; шифт ва деворлар қўнғир рангга бўялган, залнинг иккала томонида ва энг охирида, шарқ тарафда, баланд-баланд, ингичкагина, тепаси ёйсимон деразалари бор бўлиб, нур оқими тушиб турибди. Залнинг гарб тарафи эса баландроқ бўлиб, у ерга қорамтири-жигар

рангдаги ўймакор суд курсиси қўйилган; орқасида портрет; залнинг ўнг ва чап ҳамда тўрут томонида ўриндиқлар, қатор-қатор курсилар, ҳар бир қатор олдингисига қараганда бир оз юқорироқ ўрнатилган, уларнинг бари одамга лиқ тўла, ҳатто ўргадаги йўлакда ҳам кишилар тирбанд бўлиб туришибди. Клайд кириши билан улар олдинга чўзилиб, бўйинларини эгиб қарай бошладилар, ўнлаб қаттиқ, синчков кўзлар унга тикилиб қолди, зални фала-ғовур босди. У, фўнфир-ғўнфир товушлар ва шивир-шивирларни эшитганча ўриндиқлар ёнидан ўтиб, залнинг олд томонидаги бўш ерга борди: у ерда стол ортида Белнеп билан Жефсон ўтирибди, уларнинг ўртасида эса Клайдга мўлжалланган бўш курси ҳам турибди. Клайд ўз атрофида бегона кўз ва афт-башаралар тўлиб кетганини бор вужуди билан ҳис этди-ю, уларга қарагиси келмай қолди.

Худди рўпарасида, суд курсиси жойлашган айвончага яқинроқ турган бошқа бир столда эса Мейсон ва яна бир неча киши ўтиришарди; Клайд Эрл Ньюком ва Бэртон Бэрлейни таниди; улар билан бирга тағин бир киши ўтирарди-ю, аммо Клайд уни аввал сира кўрмаган эди. Клайд кириб келган пайтда тўртталови унга юзланиб, диққат билан кўз югуртиб чиқишиди.

Бу гурухни журналистлар ва рассомлар – эркаклар ва аёллар ўраб олишган эди.

Хиёл вақт ўтгач, Клайд Белнепнинг маслаҳатини эслаб, қаддини ростлади, сунъий равишда ўзини бепарво тутиб (бироқ хавотирга ботган қонсиз юзи ва жуरъатсиз нигоҳи бунга бир қадар зид бўлиб тушар эди), ё ўзини томоша қилаётган ёки расмини чизаётган муҳбирлар томонга кўз ташлади. Ҳатто у: «Одам кўп-ку жуда!» деб шивирлаб ҳам қўйди. Шу пайт, у ҳали яна бошқа бирон сўз айтиб улгурмасидан қаердадир икки марта дук-дук овоз, кейин эса: «Тартиб сақдансин! Суд бошланди! Ўр-

нингиздан туришларингизни сўрайман!» деган хитоб эшитилди. Бир зумдаёқ залдаги шивир-шивир ва жонланиш ўрнини пашша учса ҳам сезиладиган даражадаги тинчлик эгаллади. Баланд жойнинг пастки томонидаги эшик очилди-ю, новча, қўриниши хушбичим, яқиндагина соқоли қирилган, юзи яшнаб турган бир киши кенг қора мантия кийганча кириб келди; у суд столи ёнидаги каттакон курси олдига илдам юриб бордида, йигилганларга дикқат билан кўз югуртиб чиқди, аммо биронта кишига ҳам алоҳида эътибор бериб қарамагандай қўринди ва курсига чўқди. Шундан кейингина залдаги одамларнинг ҳаммаси ҳам тирди.

Сўнгра баланд жойнинг рўпарасига, суд столининг чапроқ томонига қўйилган стол ёнидан ушоққина бир мўйсафид қўзғалди-ю:

– Эшиtingлар, эшиtingлар! Нью-Йорк штати, Катараки округи Олий судида иши қўрилиши лозим топилган барча шахслар, берироқ келинглар ва дикқат қилинглар! Суд сессияси очилди! – деб маълум қилди.

Орадан бир неча дақиқа ўтгач, ўша одам яна ўрнидан турди-да:

– Нью-Йорк штати Клайд Грифитсга қарши!.. – деб эълон қилди.

Мейсон ўша заҳотиёқ столдан туриб:

– Халқ тайёр, – деб маълум қилди.

Шундан сўнг Белнеп ўрнидан туриб, ўзига ярашган назокатли таъзим билан:

– Жавобгар тайёр, – деб билдириди.

Кейин яна ўша клерк ўз столи олдида турган қутичага қўлинни тиқди-да, бир варақ қофоз чиқариб, уни баланд овоз билан ўқиди:

– Саймон Динсмор!

Жигар ранг костюмли, қўллари омбирга, қовоқ-тумшуғи сассиқ кўзанга ўхшаш кичкина бир

одам суд маслаҳатчилари курсисигача лўкиллаб бориб ўтириди. Ўша заҳотиёқ унинг олдига Мейсон келди (унинг япасқи бурунли юзи бугун айниқса қаҳрли кўринар, дўриллаган овози эса залнинг исталган жойидан барала эшитилар эди) ва унга кетма-кет савол ёғдира кетди: ёшингиз нечада? Нима иш қиласиз? Ўйланганимисиз? Бола-чақангиз нечта? Ўлим ҳукмини тан оласизми? Охирги савол маслаҳатчининг аччиғини келтирдими, ё қандайдир ортиқча ҳаяжонга солдими, ҳар ҳолда фалати бир туйғу уйғоттанини Клайд дарров пайқади; маслаҳатчи шартта-шартта, яна алоҳида таъкид билан:

– Айрим кишилар учун тан оламан, албатта! – дея жавоб берди.

Бу жавобдан Мейсон хиёл кулимсираб қўйди, Жефсон эса Белнепга ўгирилиб қаради; Белнеп пичинг аралаш минғиллади:

– Бу ерда тағин адолатли суд олиб боришнинг иложи бор эмиш.

Аммо холис фермер ўз кўнглига тугиб олган фикрини баттар таъкидлаб айтиётган эди, буни Мейсон ҳам сезди-ю:

– Суднинг рухсати билан ҳалқ бу маслаҳатчи номзодини четлаштиради, – деди.

Судья савол назари билан қараб турганини Белнеп кўрдї-ю, розиман, дегандай бош силкиди ва фермер бу гал маслаҳатчи вазифасидан четлаштирилди.

Клерк эса қутидан дарров яна бошқа бир қоғоз олди-да:

– Дадлей Ширлайн! – деб эълон қилди.

Ўттиз саккиз-қирқ ёшлардаги башсанг кийинган, бачканароқ ва эҳтиёткор, баланд бўйли, ориқ бир киши келиб, маслаҳатчилар курсисидан жой олди. Мейсон аввалгисига берган саволларни бу одамга ҳам бера бошлади.

Шу аснода Клайд Белнеп ва Жефсоннинг аввалдан тайинлаб қўйган барча ўгитларига зид ўлароқ,

калавасининг учини йўқотиб, тумшайганча, бамисоли жони йўқдай қотиб ўтиради. У бутун халойик ўзига ёв бўлиб ўтирганини сезган эди. Мана Шу одамлар тўдаси ичидаги Робертанинг отаси ва онаси ҳам бўлса керак, эҳтимол, сингиллари ва укалари ҳам бордир, деган фикрдан Клайд сесканниб кетди... улар унга тикилганча, ҳамма айблари учун лойик жазосини топишига (газеталар бу ҳақда бир неча ҳафтадан бери тинимсиз жар солишаётган эди) чин кўнгилларидан ишониб ўтирган бўлсалар керак...

Ликурглик улфатлар орасида ва Ўн иккинчи кўлда у билан учрашиб юрганларнинг биронтаси ҳам Клайдга иложини қилиб бир йўлиқиб қўйишни ҳатто хаёлларига ҳам келтиришмади, ахир, уларнинг бари, уни, ҳойнаҳой, айборд деб ҳисобласа керакда, улардан биронтаси келганмикин бу ерга? Масалан, Гертрудами ёки Трейси Трамбалми? Ёки Вайнэт Фэнт ва унинг акасими? Вайнэт ўша куни уни Айиқ кўлида қамоққа олишганда лагерда эди. Клайд кейинги бир йил ичидаги учрашган ва ҳозир уни мана шундай – бечора, фариб, даҳшатли жиноятда айбланаётган кимсасиз бир одам сифатида кўришлари мумкин бўлган барча ўша кибор танишларини хаёлида эслай бошлади. Бу ердаги ва Фарбдаги бадавлат қариндошлари-ю, ота-онаси тўғрисида обдан гапирган уйдирмаларидан кейин, айниқса, бу жуда оғир эди! Энди уларнинг бари Клайдни ёвуз одам, деб ҳисоблашади. Ахир, улар фақат Клайднинг жиноий ниятинигина билишади, холос, юрагида нима юз бергани билан эса уларнинг неча пуллик ишлари бор... унинг ташвиш ваваҳималари, Роберта туфайли боши берк кўчага кириб қолганлари, Сондрага бўлган муҳаббати-ю, ўзи учун Сондранинг нақадар азизлиги – буларнинг бари уларга ёт эди. Улар буни тушунишмас-

ди, борди-ю, Клайд бу ҳақда гапириб беришни хоҳласа ҳам унга оғиз ҳам очиришмасди.

Аммо шунга қарамай, Белнеп билан Жефсон тайинлаганидай, у түгри ва жилмайиб ўтириши ёки ақалли бўлмаганда, ўзига тикилиб турган нигоҳдарни хотиржам ва қўрқмай қаршилаши лозим эди. Шундай қилиб, у қаддини фоз тутди-ю, бир дақиқа тошдай қотиб турди. Э, худо-е, одамлар намунча бир-бирига ўхшамаса-я! Унинг чап томонидаги ўриндиқда худди Робертанинг тирик расмига ўхшаш бир аёл ёки қиз ўтиради. Сўзсиз, у унинг синглиси Эмилия бўлса керак. Роберта у ҳақда тез-тез гапириб тураги эди... аммо бу нақадар даҳшат-а! Клайднинг юраги тўхтаб қолаётди. Балки у Робертадир? У хаёлий, бироқ айни пайтда жонли, нафрат ва таъна тўла нигоҳи билан Клайднинг бағрини тифлаётган эди. Унинг ёнида – Робертага хиёл ўхшаб кетадиган яна бир қиз, нарёғида эса Робертанинг мўйсафида отаси, ҳу, бир гал Клайд йўлни сўраш мақсадида фермага кирганда кўргани – юзи тўла ажин ўша мўйсафида... Энди у Клайдга азобдан киртайган кулранг кўзлари билан деярли қутургандай ўқрайиб қарап, унинг бу нигоҳи очиқдан-очиқ: «Қотил! Қотил!» деяётгандай эди. Чолнинг ёнида эса эллик ёшлар чамасида пакана, жимитгина, қасалманд бир аёл ўтирибди, бурушган юзи ва ичига чўкиб кетган кўзлари ўртиги остидан ҳам кўриниб турарди; унинг кўзи Клайднинг кўзига тушганда у гўё нафрат билан эмас, балки оғир изтироб чеккандай ерга қаради ва юзини ўтириб олди. Бу, сўзсиз, унинг онаси эди. Қандай даҳшат-а, бу! Ақл бовар қилмас даражада оғир бу! Клайднинг юраги нотекис уриб, қўллари титрай бошлиди.

Бир оз ўзига келиш учун у кўзини ерга қадаб, шундоқ олдида, стол устида турган Белнеп ва Жефсоннинг қўлларига қаради; адвокатлар очиб қўйилган блокнотлар устида қаламларини ўйна-

ганларича Мейсонга ва навбатдаги суд маслаҳатчиси номзодига тикилиб туришарди (бу гал қандайдир бир бақалоқ, кўриниши довдирроқ киши синовдан ўтаётган эди). Тавба, Белнеп билан Жефсоннинг қўллари шу қадар бир-бирига ўхшамас эканки! Бириники майин, оппоқ, миқти бармоқли, иккинчисиники эса, қорамтири, томирлари ййнаган, қоқ суяқ, узун-узун бармоқли эди. Белнеп юмшоққина қилиб, тавозе билан: «Мен бу номзоднинг маслаҳатчилар курсисини бўшатиб қўйишини истар эдим», деса, Мейсон бамисоли ўқдай кесиб: «Озод қилинди!» деб дўриллар ёки Жефсоннинг: «Элвин, уни жўнатиб юборинг. У бизга тўғри келмайди», деган босиқ, аммо қатъий пичирлашлари эшитилар эди. Шу пайт тўсатдан Жефсон Клайдга мурожаат этиб қолди:

– Бошингизни кўтаринг, Клайд! Атрофингизга қаранг! У қадар қаддингизни букиб, эзилиб ўтираманг. Одамларнинг кўзига боқинг! Модомики, кулмоқчи экансиз, чинакамига кулинг. Уларнинг кўзига тўппа-тўғри қаранг. Улар сизни еб қўйишмайди. Булар шунчаки қизиқ томоша ишқибозлари бўлган фермерлар, холос.

Аммо Клайд бир неча муҳбирлар ва рассомларнинг уни синчиклаб, шоша-пиша расмини чизиб, нималарнидир ёзib олаётганларини ўша заҳотиёқ пайқади-ю, юзига қон тепиб кетди, чунки у уларнинг қаттиқ тикилиб турганларини сезар ва худди пероларининг ғижирлашига ўхшаш аччиқ-тиззиқ сўзларини ҳам эшитаётган эди. Шуларнинг бари газетада чиқади-я – унинг қалтираётган қўллари дейсизми, докадек оқарган юзи дейсизми – улардан бирон нарса қочиб қутулармиди... Клайд Олденларга қандай қарагани борми ва улар унга қандай қарашгани, у бунга дош беролмай қўзини олиб қочгани... буларни Денвердаги онаси ҳам, Ликургдаги барча халойиқ ҳам ўқийди, тасаввур

қилади... магзини чақади. Бирок шунда ҳам... шунда ҳам... ҳарқалай, у ўзини қўлга олиши, қаддини тик тутиб, атрофга қараши керак, акс ҳолда уни Жефсон ҳам ёмон кўриб қолади.

Клайд яна қайтадан ўзини қўлга олишга ва қўрқувни енгишга уринди; бошини кўтариб, атрофга разм солди.

Шу он у баланд дераза ёнида, девор олдида кўнглида сира кўришни истамагани – Трейси Трамбалга кўзи тушди; албатта, у бу ерга Клайдга ачинганидан ва ҳамдард бўлганидан эмас, чамаси, юрист сифатида бу ишга қизиқиб қолганидан, балки шунчаки қизиқсинганидан ёки бошқа бирор-бир сабаб билан келган бўлиши мумкин, ҳарқалай, қандай бўлишидан қатъи назар, бугун у суд залида эди; Клайднинг баҳтига у шу аснода унга эмас, балки бақалоқ маслаҳатчига қандайдир саволлар берәётган Мейсонга қараб турган экан. Трейсининг ёнида эса Фредди Сэлс; узоқни кўрмайдиган кўзлари қалин ойнали зўр кўзойнак остига яширган, у Клайд томонга қараб турса-да, чамаси уни кўрмаётган эди, шекилли, ҳар ҳолда, унинг кўраётгани сира сезилмас эди. Бундан ҳам оғир жазо борми, ахир!

Улардан беш қатор берида эса, нариги томонда, мистер ва миссис Гилпинлар ўтиришибди, уларни Мейсон қидириб топған бўлса керак. Аммо улар нимани айтиб беришлари мумкин? Робертага изжарага берган хоналарига Клайднинг келиб туришини айтишлари мумкин-да. Кейин, буни маҳфий қилишган, дейишар балки? Бу, албатта, ёмон. Ие, мистер ва миссис Ньютонлар нима қилиб ўтиришибди. Улар қай мақсадда гувоҳ қилиб чақиришганикин? Ҳойнаҳой, Клайд билан танишгунча Роберта қандай яшаганини ҳикоя қилиб беришсин, дея чақиришгандир? Анави Грэйс Марр-чи, Клайд уни шунчаки, унда-бунда тез-тез кўриб турарди-ю, аммо сирасини

айтганда, у билан фақат бир мартагина, Крам күлида гаплашган эди; Роберта уни мутлақо ёқтиirmас эди. Хүш, у нима деркин? Сўзсиз, у Роберта билан қандай танишганини сўзлаб берар, лекин бошқа яна нимани гапиради? Уларнинг орқасида эса – йўқ, мумкин эмас! – лекин, ҳарқалай... ҳа... худди ўша, анави Орин Шорт ўтирибди, Клайдга у Глен доктор ҳақида гапириб берган эди. Ана, холос! У, ҳойнаҳой, шуларни сўзлаб берса керак... шубҳасиз, сўйлайди. Одамларнинг бари ўша гапларни ёддан чиқармаганини қаранглар-а! Бундай бўлиши Клайднинг етти ухлаб тушига ҳам кирмаган эди.

Ҳа, ана, учинчи деразадан берироқда, лекин анави фарид Олденлар оиласидан нарироқда эса, йўлтўсарликка ўтиб кетган ўтмиш вақтлардаги квакер<sup>1</sup>ларга ўхшаш серсоқол бир баҳайбат киши ўтирибди: унинг исми Хейт эди. Клайд уни Учинчи миль Кўрфазида ва кейин эса зўрлаб Катта мушгир қўлига олиб борганларида кўрган эди. Ҳа, у гувоҳ. Унинг ёнида, ҳў бир пайтлар Клайдни келиб-кетувчилар рўйхатига ёзилишига мажбур қилган анави маҳаллий меҳмонхонанинг хўжайини. Кейин Клайдга ижарага қайиқ берган қайиқчи ҳам шу ерда эди. Унинг ёнида Роберта билан икковини Қуролсоз бекатидан Катта мушгир қўлига олиб борган новча, ориқ йўл кўрсатувчи – у қорачадан келган, чайир, қупол бир йигит эди; энди у митти, ичига тушган ёвуз кўзларини Клайддан узмас эди. У, ҳойнаҳой, Клайд билан Робертанинг кўлга қандай борганларини ипидан-игнасигача оқизмай-томизмай гапириб берса керак. Ўша куни Клайднинг асабийлашгани ва ярашмаган қиликлар қилгани унинг ёдидамикин, буни Клайднинг ўзи худди ҳозиргидай эслайди. Агар ёдида бўлса, унда Клайдда

<sup>1</sup> Квакерлар – XVII асрда Англияда юзага келган насрориий, протестант мазҳабларидан; бу мазҳаб, шунингдек, Шимолий Америкага ҳам ёйилган. (Таржимон.)

юз берган маънавий бурилиш тўғрисидаги уйдирма гапга бу қанчалик таъсир қиласкин-а? Жефсон билан яна бу ҳақда келишиб олсинмн?

Аммо анави Мейсон! Қанчалик қайсар-а у! Қанчалик эпчил! Клайдга қарши гувоқлик бера олиши мумкин бўлган шунча одамнинг ҳаммасини тўплаб ултурганини қаранглар, бунинг учун у озмунча ютурганмикин! Мана, ҳозир ҳам Клайд унга кўз ташлаган эди, у:

– Халқ рози! – деб хитоб қилаётган пайти экан, (бу унинг, эҳтимол, ўнинчи марта бекордан-бекор қилаётган хитоби бўлса керак, чунки маслаҳатчилар курсиси ҳамон бўш эди).

Жефсон унинг сўзларини эшитиши биланоқ, ҳар гал Белнеп томонга хиёл ўгирилиб, унга қарамай туриб:

– Элвин, бу сизга тўғри келмайди. Қуруқ ва ён бермайдиган одам экан, – дер эди.

Шундан кейин Белнеп юмшоқлик ва хушмуомалалик билан ва деярли ҳар гал муваффақиятли равишда маслаҳатчини рад этар эди.

Ниҳоят, охири – қанчалик одам енгил тортар экан-а! – клерк баланд, қулоқни тешгудек қаримсиқ овоз билан соат иккига қадар танаффус эълон қилди. Жефсон кулимсираганча:

– Ана, кўрдингизми, Клайд, бу биринчи беллашув, – деди. – У қадар чигал ва у қадар кўрқинчли эмас, тўғрими? Энди боринг-да, маза қилиб овқатланинг, хўпми? Танаффусдан кейин ҳам худди шунақсанги узундан-узоқ, зерикарли эзмагарчилик бўлади.

Бу орада Краут, Сиссел ва бошқа соқчилар ҳам Клайдга яқинлашиб, уни ўраб олишди. Шундан кейин яна оломон, бос-бос: «Ана, у! Ана, келяпти у! Ана, ана!» – деган овозлар... Бир семиз хотин Клайднинг нақ ёнгинасидан сирғалиб ўтди-ю, тўппа-тўғри юзига қараб: «Йўл беринглар, уни бир

кўрай! Мен сизни яхшилаб кўриб олмоқчиман, йигит! Менинг ҳам икки қизим бор!» деб қичқирди.

Лекин халойиқ ичида Клайднинг кўзига тушган ликурглик ва Ўн иккинчи кўлдаги танишларидан биронтаси ҳам унга яқин келишмади. Сондра-ку, шубҳасиз, ному нишонсиз эди. Белнеп билан Жефсон ҳам, у судга келмайди, деб қайта-қайта Клайдга уқтиришган эди. Агар иложи топилса, ҳатто унинг номи ҳам тилга олинмайди. Грифитслар ҳам, Финчлилар ҳам бунга қарши эдилар.

## ХХ БОБ

Белнеп билан Жефсон суд маслаҳатчиларини танлашга нақ беш кун сарфлашди. Аммо, ниҳоят, Клайдни суд қилиши лозим бўлган ўн икки киши қасамёд қилиб, ўз ўринларини эгаллашди. Уларнинг бари мўйсафи, соч-соқоли оқарган, офтобда қорайган серажин юзли одамлар бўлиб, асосан фермер ва дўкондорлар эдилар, ораларида Форд автомобиллари билан савдо қилувчи киши, Диксон кўлдаги меҳмонхонанинг эгаси, Брижбургдаги Гамбургер газмол дўконининг сотувчиси ва ўзи Ўтлоқзор кўли шимолидаги Нардэй деган жойда доимий яшаса ҳам, бироқ бориб-келиб ишлайдиган суурта агенти бор эди. Уларнинг ҳаммалари бир кишини мустасно қилганда, уйланган одамлар эдилар. Уларнинг ҳаммалари, фақат бир кишини мустасно қилганда, ўтакетган ахлоқди бўлмаса ҳам, ҳарқалай тақводор ва аввал-бошданоқ Клайдни гуноҳкор, деб кўнгилларига туғиб олган шахслар эдилар. Лекин деярли уларнинг бари ўзларини ҳалол ва бегараз одамлар, деб ҳисоблашар ва бунақангি ғалвали ишда суд маслаҳатчиси сифатида мажлисбозлиқ қилишни астойдил исташар, шунинг учун ҳам дикқат-эътиборларига ҳавола қилинадиган да-

лилларни адолат билан, бетараф туриб ҳал эта олишларига имонлари комил эди.

Шундай қилиб, уларнинг бари онт ичди.

Ўша ондаёқ Мейсон ўрнидан турди.

– Мистер суд маслаҳатчилари!.. – дея гап бошлиди у.

Клайд эса, Белнеп ва Жефсонга ўхшаб, маслаҳатчиларга тикилганча ўзига ўзи, Мейсоннинг кириш нутқи уларда қандай таассурот қолдиракин, деб савол берар, чунки бу ҳозирги ғалати шарт-шароитда Мейсондан кўра ғайратлироқ, ундан кўра завқ-шавқлироқ бирор-бир бошқа қораловчини топиш амри маҳол эди. Бу Мейсон учун бекиёс бир баҳтли фавқулод эди! Кўшма Штатларнинг бутун фуқароси, ахир, унга кўз тикиб турмаяптими ҳозир? Унинг назарида айни шундай бўлаётгандай эди. Гўё аллақайси бир режиссёр бирдан: «Ёруғлик берилсин! Съёмка бошланди!» – деб хитоб қилаётганга ўхшар эди.

– Шубҳасиз, – деб гап бошлиди Мейсон, – ўтган бир ҳафта мобайнида оқловчи ва қораловчи томонларнинг вакиллари, мана, ораларидан сиз сайланган ўша номзодларни нақадар батафсил кўриб чиққанлари кўпчилигингизни чарчатиб, баъзан эса ўйлатиб ҳам қўиди. Одамни ҳайратга соладиган бу ишнинг барча тафсилотларини кўриб чиқиши мумкин бўлган ўн икки кишини топиш анча қийин кўчди, чунки бу шундай тафсилотларки, буларни сизлар қонун талаб қилган даражада одиллик ва фаҳм-идрок билан тарозига солиб кўришингиз лозим бўлади. Менга келганда эса, жентельменлар, фақат бир истагим туфайлигина, яъни: адолат қарор топишини ўйлаганим туфайлигина бу қадар батафсил иш олиб боряпман! Бирорга менинг кек-адоватим ҳам йўқ, оддиндан ўйлаб қўйган ёмон ниятим ҳам йўқ. Шу йилнинг тўққизинчи июлига қадар, дунёда шундай айбдор

ва унинг қурбони борлигини, ҳозир унга тўнкала-ётган мана шундай жиноят мавжудлигини шахсан мен хаёлимга ҳам келтирмаган эдим. Аммо, жентельменлар, мен сизга айтсам, тарбия кўрган ва шундай таниш-билишлар ортирган ёшгина йигит шунақанги жиноятда айбланиб, гуноҳкор бир вазиятга тушиб қолганини эшитганимда дастлаб ниҳоят даражада таажжубланиб, шубҳаланган бўлсам-да, бироқ мен аста-секин ўз фикримни ўзгартиришга мажбур бўлдим. Аввалги шубҳаларимни бутунлай итқитиб ташлаб, қўлимга ўзидан ўзи ёғилиб келаётган сон-саноқсиз далиллар асосида, бу иш юзасидан қораловчи сифатида халқ номидан чиқиш менинг бурчимдир, деган холосага келдим.

Аммо, нима бўлишидан қатъи назар, далилларга ўтайлик. Бу ишга икки қиз аралашган. Бири оламдан кўз юмди. Иккincinnининг исми эса (у Клайд томонга ўгириди ва у билан ёнма-ён ўтирган Белнеп ва Жефсонга ҳам ишора қилди), қораловчи ва ҳимоя томонларининг ўзаро келишувига биноан бу ерда айтилмайдиган бўлди, чунки биз одамларга яна ортиқча жабру жафолар ортиришдан ўзимизни тийишимиз керак. Чиндан ҳам сизларни ишонтириб айтишим мумкинки, бу ерда гапирадиган ҳар бир сўзим ва келтирадиган ҳар бир далилм билан қораловчи томон фақат биргина мақсадни кўзда тутади: яъни, мақсадимиз – штатимиз қонуни ва судданувчига қўйилаётган жиноятга мувофиқ равишда чинакам аддия қарор топишига эришмоқдикдир. Чинакам аддия, жентельменлар, чинакам ваadolатли. Аммо сизлар борди-ю, вижданан ҳаракат қилмай, ушбу иш юзасидан тегишли ҳалол ҳукмни чиқармас экансизлар, унда Нью-Йорк штати ва Катараки округи фуқаросини қаттиқ ҳақорат этган бўласизлар. Чунки халқнинг умиди сизларда ва сизлардан ниҳоятда пухта ўйланган холоса кутяпти.

Шу ерда Мейсон бир оз нафасини ростлади ва аянчли бир қиёфага кирганча Клайдга юзланди, кейин ора-сира унга бармогини никтаб, давом этди:

– Нью-Йорк штати фуқароси бу ерда қора курсида ўтирган Клайд Грифитсни ёвуз ният билан қасдан одам ўлдирғанликда айблайди. (Мейсон бу сўзни шундай айтдики, гўё овози момақалдироқдай гумбурлаб чиқишини истаётгандай эди.) Уни халқ ёлғончилик йўлига ўтиб, қасдан, бемехрлик ва бағритошлиқ билан, бир неча йиллардан бери Маймико округидаги Бильц шаҳарчasi яқинида яшовчи фермернинг қизи Роберта Олденни ўлдирғанликда, кейин эса марҳуманинг жасадини одамлардан ва бу дунёдаги одил суддан умрбод яшириб кетмоқчи бўлғанликда айблайди. Номи зикр этилган Клайд Грифитсни халқ (шу ерда Клайд Жеффсоннинг пичирлаб айтган ундовига бўйсуниб, стул суюнчиғига иложи борича бемалолроқ суюниб олди-да, Мейсоннинг юзига қўлидан келганча вазминлик билан тикила бошлади. Мейсон ҳам унга тик қараб туар эди) ушбу жиноятга қўл уришидан аввал ҳафталар мобайнида ўзининг маккорона режаларини обдан ўйлаб олган, сўнгра эса шошилмай, совуққонлик билан уни амалга оширган, деб айблайди.

«Нью-Йорк штати фуқароси бу айбларни қўя туриб, сизларга уларнинг ҳар бири бўйича далилу ашёларни тақдим этишга ҳам тайёр. Далиллар сизларга маълум қилинади, бу далиллар устидан мен эмас, сизларгина ягона ҳукм чиқарувчи бўлмоғингиз даркор».

У тагин жим қолди, шошқалоқ тингловчилар сиқилишиб, прокурорнинг ҳар бир сўзига муштоқ бўлғанча олдинга интилишаётган бир пайтда, Мейсон ўз ҳолатини ўзгартирди, қўлини кўтариб, жингалак соchlарини артистлардек уста ҳаракат билан орқасига тараб қўйди-да, яна гап бошлади.

– Жентельменлар, мен узок гапириб ўтирмайман, бу ишни ўзларингиз эшишиб туриб, Катта мушгир сувлари қаърида мудҳиш бир тарзда паймонаси тўлган қиз бечоранинг қандайлигини дарров биласиз-кўясиз. Йигирма йиллик умри давомида (Мейсон Робертанинг йигирма учдалигини ва Клайддан икки ёш катталигини жуда яхши билар эди) уни билган одамларнинг биронтаси ҳам у ҳақда ҳатто бир оғиз ёмон сўз айтолмади. Аминманки, бу ерда, судда ҳам Роберта тўғрисида ҳеч қандай ёмон сўз бўлмайди. Бир йилдан сал ортиқроқ, яъни ўн тўққизинчи июлда у ўз билак қучи билан оиласига қарашиб туриш мақсадида Ликургга келади. (Шу ерда бутун зал Робертанинг ота-онасию сингимлари ва укаларининг хўнграб йиглаб юборганиларини эшилди.)

– Жентельменлар... – дея давом этди Мейсон ва Роберта ота уйини ташлаб чиқиб, Грейс Марр билан бирга ўрнашганидан бошлаб, Крам кўлида Клайд билан танишиб қолгани ва Клайднинг бегона одамлар орасида бир ўзинг яшайсан, деган талабига бўйсуниб ҳамда ҳомийлари бўлмиш Ньютонлардан алоқа узганигача ҳаммасини бирма-бир гапириб берди. Мейсон, мисс Олден бу шубҳали кўч-кўчнинг асосий сабабини ота-онасидан яширгани ва Клайднинг айёrona маслаҳатига охири қандай кўниб қолгани тўғрисида сўзлади. Робертанинг Бильцдан туриб Клайдга ёзган хатлари бу воқеаларни худди кузгудагидек равшан кўрсатиб берар эди. Кейин Мейсон шу қадар синчиклаб ва эринмасдан Клайд ҳақида, унинг Ликург «киборлар давраси»га ва айниқса, бадавлат ва гўзал мисс X га берилгани, мисс X ҳам соддалиги ва кўнгилчанлиги оқибатида Клайдга қизиқиб қолиб, уни ўзига етишиши мумкин, деган маънода умидвор қилиб қўйгани ва шу билан беихтиёр равища Клайдда эҳтирос уйғотгани, бу эҳтирос туфайли Клайднинг Робертага бўлган севгиси сўнгани тўғрисида сўй-

лади; натижада шу нарсалар жиноий мақсаднинг туғилишига (Мейсон, буни исботлаб бераман, деб таъкидлади) ва кейинчалик Робертанинг ўлимига олиб келган.

– Хўш, мен айб қўяётган бу кимса ўзи ким? – дея хитоб қилди тўсатдан Мейсон, ғоят фожеий бир оҳангда. – Ана у, рўпарангизда ўтирибди. Эҳтимол, у, тубанлашиб кетган бир ота-онанинг фарзандидир, шаҳар ҳаробаларидан чиққандир, кейин бурч, зиммадаги вазифа тўғрисида сабоқ оладиган жойи бўлмагандир, бундай бир тузукроқ, муносиброқ ҳаёт кечиришни шу бурч, шу вазифасиз тасаввур қилиб бўлмайди-ку, ахир?! Хўш, у шундай одамми? Аксинча! Унинг отаси Ликургда энг ийрик ва муҳим корхоналардан бири – «Грифитс ва Компания», ёқа ва кўйлаклар фирмасини яратган оиласа мансубдир. Ҳа, Клайд камбағал эди, шубҳасиз; аммо Роберта Олденчалик қашшоқ эмас эди, қашшоқлик мисс Олденнинг хулқига, ҳарқалай, ёмон таъсир кўрсатмабди-ку. Грифитснинг ота-онаси Канзас-Ситида, Денверда, ундан оддин эса Чикаго ва Грэнд-Репидсда, Мичиган штатида, гарчи мансаблари бўлмаса ҳам, афтидан жонларни бало-қазода асрорчилик бурчини ўтаб яшаганлар: улар диний ақидаларни тарғиб қилиб, хонақо бошқарганлар; мен тўплаган маълумотларга қараганда, улар чин маънодаги ҳақиқий тақводор ва ҳар жиҳатдан андишали одамлардир. Тўнғич ўғиллари эса, улардан намуна олиб, илҳомланиш ўрнига муштдек бошиданоқ уларнинг эътиқодидан юз ўгириб, анча-мунча енгилтак ҳаётга ўзини урган. У Канзас-Ситидаги машҳур «Грин-Дэвидсон» меҳмонхонасига дастёр бўлиб ишга кирган.

Мейсон Клайдни доимо шўртумшуқ, дайди бўлган, эҳтимол, бир ерда ўтиrolmasliginинг сабаби ҳам асли одати шундайлигидандир, деб уқтира бошлиди. Кейинчалик эса, – дея гапини давом эт-

тирди Мейсон, – Клайд амакисининг Ликурдаги ўша ҳамма биладиган фабрикасида бўлим мудири лавозимини эгаллайди. Аста-секин у амакисига ва амакисининг болаларига мансуб бўлган анави доирага кириш ҳуқуқини олади. Кейин шаҳарнинг энг зўр кўчаларидан бирида ўзига хона олса арзийдиган маош ҳам тушира бошлайди, ўзи ўлдирган анави қиз эса бу пайтда пастқам бир ерда, ҳароб бир кулбада яшар эди.

– Шу пайтгача, – деб давом этди Мейсон, – судланувчининг ёшлигини негадир жуда бўрттириб кўрсатишиди. (Шу ерда Мейсон нафрат билан ишшайиб қўйди.) Ҳимоячилари ҳам, газеталар ҳам қайта-қайта уни бола деб аташди. Лекин у бола эмас. У гунгурсдай эркак киши. Ижтимоий имкониятлар ва ижтимоий тарбия нуқтаи назаридан қараладиган бўлса, маслаҳатчилар курсисида ўтирган мана сизларнинг ҳар бирингиздан кўра у устунроқ шароитга эга. У саёқ эди. Меҳмонхона ва клубларда, ораларидан қил ҳам ўтмайдиган ўша ликурглик улфатлари ичида у обрўли, энг муносиб ва ҳатто – таниқли, ажойиб кишилар билан учрашар эди. Ахир, бундан икки ой муқаддам қамоқقا олинган пайтида ҳам у ниҳоятда нуфузли улфатлари, бизнинг жойларга ёзги таътил учун келган бадавлат ёшлар орасида юрган эди-ку. Шуни ёдда тутинглар! Унинг ақли, ҳуши жойида, бола эмас. Керак бўлса бирорвга ақд ўргатади ва нима яхши, нима ёмонлигини беш қўлдай билади.

«Жентельменлар, – дея давом этди у, – айбланувчи Ликургга келгандан сўнг орадан атиги тўрт ой ўтгач, унинг қурбонига айланган қиз фабриканинг у бошқараётган бўлимига кириб ишлай бошлаган, буни қораловчи томон тезда исботлаб ҳам беради. Ўртада фақат икки ой ўтгач, Грифитс қизни Ликурдаги ҳурматли ва художўй одамларни-кида турган иссиқ жойидан совутиб, унга мутлақо

номаълум бўлган хонадонга ўтишга кўндирган. Айбланувчининг нуқтаи назари билан қараганда, қиз яшаётган янги жойнинг энг қулай жиҳати шу бўлганки, у бу ерга пинҳона, бамайлихотир кириб-чиқиши, бировларнинг тергашидан қўрқмай, қизга нисбатан ўзининг разил мақсадларини бемалол амалга оширавериши мумкин бўлган».

«Грифитс компанияси фабрикасида – буни биз кейинроқ исботлаб берамиз – шу воқеанинг кўп жиҳатларини изоҳлаб берадиган бир тартиб-қоида бор: юқори мансабли хизматчилар ёки цех ва бўлим бошлиқларидан биронтаси ҳам ўз қўли остидаги қизлар ва умуман, фабрикадаги хизматчи аёллар билан на фабрика ичida ва на ундан ташқарида сал бўлса-да, гайриқонуний алоқа қилишга сира ҳақлари йўқ. Бундай алоқалар ажойиб бу корхона хизматчиларининг ахлоқи ва обрў-эътиборига ёмон таъсир этган бўлур эди, шу сабабли бу ман этилар эди. Мана бу йигит ҳам фабрикага келгандан сўнг тезда уни ўша қоидадан огоҳ қилишади. Лекин бу уни ёмон ишдан тийиб қола олдими? Ҳатто яқиндагина амакиси кўрсатган ҳомийлик ва меҳрибонлик ҳам уни хиёл бўлса-да тийиб туролдими? Қаёқда дейсиз! Мугомбирлиги оламга татийди! Бошиданоқ ичимдагини топ, деб туриб олган! Унинг бирдан-бир нияти – йўлдан уриш эди! Аввалдан ўйланиб, беадаблик ва файриқонуний бир тарзда қилинган ножӯя, жамият томонидан қораланган, муқаддас, серфа-зилат никоҳ тартибларини поймол этувчи пинҳоний бир дон олишув эди бу».

«Унинг мақсади шу эди, жентельменлар! Лекин уни Роберта Олден билан боғлаб турган шунақсанги муносабатлари мавжудлигини биронта одам на Ликургда ёки бошқа бирон исталган жойда билармиди? Йўқ, ҳеч ким билмасди! Ҳеч ким, қиз ҳалок бўлгунга қадар бу алоқа ҳақида ҳеч кимсада ҳатто оддий гумонсираш ҳам йўқ эди, мен қўлга кирит-

ган далиллар шуни исбот этяпти. Ҳеч кимсада! Қаранглар буни!»

«Мистер суд маслаҳатчилари! – Бу аснода Мейсон овозида деярли эҳтиром туйғуси янграёттандай эди, – Роберта Олден судланувчини бор вужуди билан севар эди. У, инсон ақли ва инсон қалбининг олий бир сиру асрори даражасига кўтарилиган муҳаббат билан севар эди уни, бундай севги ўз құдрати ва ўз ожизликлари билан ор-номус даҳшатини ва ҳатто худонинг қаҳрини ҳам писанд билмас эди. У самимий, камтар, сахий ва вафодор қиз эди, эҳтиросли ва чинакам маъшуқа эди. Фақат мурувватли, инонүвчан ва заҳматкаш қалбина шундай сева олар эди, мисс Олден худди шундай севар эди У севиб-севиб, охири аёл киши суюклисига бериши мумкин бўлган бутун бор бисотини унга ҳадя этган эди».

«Дўстларим, бунақанги воқеалар ер юзида миллион марталаб содир бўлган ва бундан кейин ҳам миллион марталаб яна содир бўлаверади. Бу янгилик ҳам эмас ва у ҳеч қачон эскирмайди ҳам».

«Лекин ҳозир лаҳадда ётган ана ўша қиз январь ёки февралда судланувчи Клайд Грифитс ҳузурига келиб, унга ўзининг она бўлажагини айтишга мажбур бўлган. У ўша пайтда ҳам, кейин ҳам Грифитсга: мен билан кетиб, никоҳдан ўтгин, деб ялиниб-ёлворганинни биз сизларга исботлаб берамиз».

«Аммо унинг илтимосини Грифитс қондирдими? Қондириш нияти бормиди ўзи? Э, йўқ! Чунки бу пайтда Клайд Грифитснинг орзу-ўйлари ва туйғуларида ўзгариш юз берган эди. Грифитс номининг ўзиёқ Ликургдаги энг сара доираларга йўл очиб беришини у дарров тушунди, Канзас-Сити ёки Чикагода арзимас одам бўлиб юрган Клайд бу ерда машҳур аслзодага айлангани ва Роберта Олден келиб чиққан муҳитдан мутлақо узоқ бўлган шароитларда айш қилиб юрувчи бадавлат ва

үқимишли қызлар билан бемалол таниша олишини ҳам тушунди.

Устига-устак, у шундай бир қыз топдики, у қыз ұсниси, давлати, ижтимоий мавқеи билан уни үзиға асир этди, унинг ёнида, Грифитснинг ўзи жойлаштириб құйған фақирона ёлғиз кулбасида турувчи камсуқумгина фабрика ишчиси, фермернинг қизи, албатта, аянчли бир қиёфада құринар эди! У ишқий ҳангомалар учун анча мос қыз эди-ю, бироқ хотинликка ярамас эди. Шуниңг учун ҳам унга уйланишни истамади».

Мейсон бир оз жим қолди-да, кейин яна давом этди:

– Бироқ мен Клайд Грифитс ҳәётіда зиғирдей ҳам үзгариш тополмадым, унинг киборларча кайф-сафога бўлган ҳирси тобора ортиб бораверган. Аксинча, январь ойидан то бешинчи июлгача ва ҳатто ундан кейин ҳам, – ҳа, мисс Олден охири бориб унга, агар сен келиб, мени олиб кетиб уйланмасанг, унда мени ва сени биладиган одамларнинг мурувватига орқа қилишга мажбурман, деб айтган вақтида ҳам, ҳатто у жони чиқиб, муздек қотганча Катта мушгир кўли тубида абадий уйқуда ётган пайтида ҳам, – танцалар, сайдр-томошалар, автомобиль саёҳатлари, зиёфатлар ва Ўн иккинчи кўлга, Айиқ кўлига қилинган кўнгил очиш сайилларидан у сира бўшамас эди... Менимча, мисс Олден тушиб қолган маънавий ва ижтимоий вазият Грифитсни ўз хулқини бир оз үзгартиришга мажбур этишини у хаёлига ҳам келтирмаган бўлса керак.

Мейсон гапидан тўхтаб, Белнеп ва Жефсон томонга қаради, улар бўлса пинакларини ҳам бузмай, у қадар ташвиш ҳам тортмай – аввал Мейсонга, сўнгра бир-бирларига қараб кулиб қўя қолиши; аммо Клайд бу нутқнинг разабнок эҳтирослилигидан қути учиб, хавотирга тушганча ундаги жуда қўп муболага ва ноҳақ гаплар хусусида бош қотира бошлади.

Мейсон унинг бўлиб юборди.

– Шундай қилиб, жентельменлар, – дея яна гап бошлади у, – мен бу ерда боя айтиб ўтганимдек, Роберта Олден Грифитснинг ўзига уйланишини қаттиқ туриб талаб қила бошлаган. Грифитс ҳам унга уйланишга ваъда берган. Аммо ўзларингиз ҳам кўрасизлар, – қўлимиздаги барча далиллар шуни исботлаб турибди, – у ўз ваъдасини бажаришни мутлақо ўйламаган. Аксинча, мисс Олденнинг аҳволи оғирлашиб, унинг нолишларига Грифитс ортиқ чидай олмай ва Робертанинг Ликургга келиши ўзига хавф туғдириши унга ёқмай қолган бир вақтда, у мисс Олденни уйига, ота-онасиникига жўнашга кўндиради, чамаси, У, мен бориб сени олиб кетгунимга қадар майда-чуйда кийимлар тиктиришинг керак, кейин мен олдингга келаман ва бирор узоқроқ шаҳарга олиб кетаман, у ерда бизни ҳеч ким танимайди ва сен менинг хотинимдай бўлиб тураверасан-у обрў-иззат билан боламизга жон ато қиласан, деб баҳона қилган бўлиши мумкин. Унинг Грифитсга ёзган хатларига қараганда – мен буни ҳали кўрсатаман – у Бильцга, уйига жўнаб кетгандан кейин орадан уч ҳафта ўтгач, уни олиб кетиш учун Грифитс бориши лозим эди. Аммо у ваъдасига биноан, бордими? Йўқ, у бундай қилмади.

«Охири бориб, – ҳеч бир иложи қолмагандан сўнг, фақат шу боисдангина, – ўлимидан роппа-роса икки кун олдин, олтинчи июлда Робертанинг ўз ҳузурига келишига рози бўлган. Лекин вақтини ҳам жуда топган... бу ҳақда кейинроқ гаплашамиз! Айни пайтда бешинчи июндан то олтинчи июлгача эса, у бечора қизни Маймико округидаги Бильцга яқин кўримсиз, хароб бир фермага ташлаб қўяверган, у бояқиши қон-зардблар ютиб, қўни-қўшниларининг кўмаги билан ўзига битта-яримта кўйлак ҳам тиккан, ҳатто ўшандада ҳам қиз

шүрлик бу күйлакларни сепим, деб айтолмаган. У, Клайд мени ташлаб кетса керак, деб шубхаланган ва бундан даҳшатга тушган. Қарабсизки, у ҳар куни, баъзан эса кунига икки мартараб унга мактуб ёза бошлигани. Диридаги ваҳималарини изҳор этган, унинг келиши ва ўзини олиб кетишини бир энлик хатми ёки бир оғиз сўз биланми тасдиқлашни сўраб, илтижолар қилган».

«Хўш, нима бўлди дейсиз, у мисс Олденнинг илтимосини бажо келтирдими? Битта ҳам хат ёзмagan. Битта ҳам! Э, узр, жентельменлар, узр! Бунинг ўрнига, у бир неча марта телефон орқали гаплашган: негаки телефондаги гапнинг изига тушиш ва ҳадеганда уни тушунавериш анча қийин-да. Лекин шу гаплар ҳам онда-сонда, чала-чулпа бўлганки, мисс Олден Грифитснинг ўзига аҳамият бермаётгани, ўша пайтда уни мутлақо унугиб қўйганидан зор-зор қақшаб, ҳасрат қилган. Бешинчи ҳафтанинг охирига бориб, тоқати тоқ бўлиб, сабр косаси тўлган қиз бечора ҳатто мана бундай деб ёзган (шу ерда Мейсон рўпарасидаги столда турган бир тўда хатдан бирини олди-да, ўқиб берди): «Сени огоҳлантириб қўйяпман, агар менга жума куни тушгача телефон қоқмасанг ёки ўшангача хатингни олмасам, унда Ликкуррга ўша оқшомдаёқ етиб бораман ва мени қай аҳволга согланингни одамлар бир билиб қўйисин». Шўрлик қиз пичноқ суюгига қадалиб, охири айтишга мажбур бўлган сўзлар мана шулар эди, жентельменлар».

«Аммо Клайд Грифитс Робертага нисбатан но-мардлик қилганини ҳамма билишини истардими? Албатта, йўқ! Шунда унинг миясида бир режа туғилади, у шу режа ёрдамида ўзини фош бўлишдан сақламоқчи ва Роберта Олденнинг эса умрбод овозини ўчирмоқчи бўлади. Жентельменлар, у чиндан ҳам қизнинг овозини ўчирганини қораловчи томон сизларга исботлаб беради».

Мейсон шу ерда Адирондак тоғларининг махсус тайёрланган харитасини ёзиб кўрсатди, унда Роберта ўлгунга қадар ва ундан кейин то Клайдни Айиқ кўлида қўлга туширгунларигача у босиб ўтган йўлнинг ҳаммаси қизил сиёҳ билан белгилаб чиқилган эди. Айни вақтда Мейсон, Клайд изни йўқотиш мақсадида аввалдан обдан тайёргарлик қўриб қўйганини ҳам тушунтира бошлади: меҳмонхонада сохта ном билан ёзилишгани, иккита шляпга ва шунингдек, Фондадан Утикағача, кейин эса Утикадан ўтлоқзор қўлигача Клайд билан Роберта бошқа-бошқа вагонларда кетишгани тўғрисида гапирди.

– Жентельменлар, мана бу нарсани унумаганлар, – деди сўнгра Мейсон. – Гарчи, Роберта билан илгари ҳам тўй саёҳати хусусида гаплашган бўлса-да, лекин у ўз қайлифи билан саёҳатга чиққанини бирор билишини истамаган – ҳатто улар Катта мушгирга келишганда ҳам у буни истамаган. Чунки у уйланмоқчи эмас эди, балки жонига теккан қизни гумдон қилиб қўя қолиш учун кўздан чет, кимсасиз бир жой излаётган эди, холос. Бироқ бу ишлар унинг қотиллигидан бир-икки кун олдин ўша қизни қучогида туттганча, ўзи бажаришини ақалли хаёлига ҳам келтирмаётган пуч ваъдларини яна такрорлашига халақит берганмиди? Хўш, халақит берганмиди? Мен сизларга иккита меҳмонхонадан олинган рўйхат қоғозларини кўрсатаман, уларда иккови ҳам бир хонада истиқомат қилган эканлар, негаки бугун бўлмаса эртага уйланишлари лозим эди. Лекин бу саёҳат бир кун эмас, икки кунга чўзилганининг сабаби шунда эдики, судланувчи ўтлоқзор қўлининг кимсасизлигига ишониб, янгилишган эди. Қараса, ҳамма ёқ гавжум, диний бир мазҳабнинг ёзги жамоаси шу ерда тўпланган экан, шунда у яна ҳам хилватроқ Катта мушгири қўлига жўнашга қарор қилади. Мана, жентельменлар, кўз ўнгингизда ақл бовар

этмайдиган, даҳшатли бир манзара: гүё қўй оғзидан чўп ҳам олмаган ва одамлар ноҳақдан-ноҳақ айбдор дейишаётган ўша йигитча ҳолдан тойган, дили хун бўлган қиз бечорани чўктириб юбориш учун хилват бир кўл қидириб, у жойдан-бу жойга судраб юрибди. Тағин бу воқеа унинг она бўлишига атиги тўрт ой вақт қолганда бўлаётганини айтмайсизми?

«Кейин, охири у хийлагина кимсасиз қўлга етиб боргач, қизни яна ўша сохта исм остида «Клифорд Голден рафиқаси билан» деб ёздирган меҳмонхонадан олиб чиқиб кетади-да, қайиқقا солиб ажалига қараб ҳайдаб боради. Қиз шўрлик тўй олдиндан Клайд айтган ўша ширингина сайд-томошага чиқдик, бу саёҳат муносабатимизни яхшилаб, унга фазилат баҳш этади, деб ўйлагандир ўшанда, ҳойнаҳой. Муносабатларимизни яхшилаб, унга фазилат баҳш этади, деб ўйлаган у!

Аммо бунинг ўрнига кўл тўлқинлари Роберта нинг азиз бошини яхшилаб қўмиб юбордилару, уни азоб-уқубатдан тинчгина халос этдилар, лекин унинг умидлари рўёбга чиқмади... рўёбга чиқмади! Грифитс бўлса, ҳатто туки ҳам лат емай, ўз ўлжасининг қонига тўйган йиртқич бўри сингари айёрлик билан қочиб қолди... у шу кетишда эркинлик сари, бошқа қиз билан бўладиган тўю томошалар сари, ижтимоий ва моддий роҳат-фарогат ҳамда севги ва баҳт чўққилари сари жадаллаб борар эди, ваҳоланки, бу пайтда Роберта жонсиз ва ному нишонсиз бир қиёфада сувдан бунёд бўлган ўз лаҳадида абадий уйқуга чўмиб ётар эди».

«Лекин, жентельменлар, бу дунёning ишлари ҳадсиз ва тубсиздир, бизнинг қисматимиз худонинг хоҳиш-иродаси-ю, унинг ёзмишига боғлиқдир, биз қанчалик уринмайлик, бари бир худонинг айтгани бўлади. Асл ҳақиқат шундаки, инсон ҳамиша интилади-ю, аммо ҳақ-ҳуқуқ эса биргина худонинг измидадир!»

«Ҳатто Катта мушгирдаги меҳмонхонадан кетаётганида ҳам мисс Олден яқин орада тўйимиз бўлади, деб ўйлаганини мен қаердан билганимга айбланувчи албатта ҳайрон! Аслида ҳам буни мен ҳар қандай йўл билан ҳам билолмаслигимни ўйлаб, у ўзини ўзи юпатяпти. Бироқ бутун фавқулод ва эҳтимолларни илгаридан билиш ва олдини олиш учун инсон ақди нақадар зийрак ва зўр бўлмоғи даркор! Ана, у бу ерда адвокатлари унинг шу аҳволдан эсон-омон қутулиб чиқишига ёрдам беришади, деб кўнгли тўқ бўлиб ўтирибди. (Бу сўзларни эшитганда Клайд асабий бир тарзда қаддини ростлаб кўйди, бошидаги соchlари ҳам тиккайиб стол остига яширинган қўллари қалтираб кетганини сезди.) Ўша қиз ўтлоқзор кўлидаги меҳмонхонада онасига хат ёзгани, лекин уни жўнатишга улгуролмагани ва у Катта мушгирдаги меҳмонхонада қолдирган пальтосининг чўнтағида турганидан Грифитснинг хабари йўқ, чунки ўша куни кун иссиқ эди, шу боисдан Роберта яна қайтиб келаман, деб ҳам ўйланган эди. Ўша хат мана бу ерда, столимда турибди».

Клайднинг тишлари такиллаб, худди иситмаси хуруж қилган одамдай дағ-дағ титрай бошлади. Ҳа, тўғри, у пальтосини меҳмонхонада қолдирган эди! Белнеп билан Жефсон ҳам энди буниси қандай бўлди, деб ўз-ўзларидан сўраб, хавотирлана бошлашди. Эҳтимол, айни шу машъум тасодиф улар ўйлаб чиққан ҳимоя режасига зарар келтирап ёки Клайдни бутунлай хароб қилар? Уларнинг фақат кутишдан бўлак иложлари қолмаган эди.

– Шу хатида, – дея давом этди Мейсон, – Роберта нима учун ўша ёққа борганини тушунтириб беради. Хўш, нимага борган экан денг, никоҳдан ўтиш учун борган экан. (Мейсон шу гапни айтганда Жефсон билан Белнеп ҳам худди Клайдга ўҳшаб елкаларидан оғир тоғ ағдарилгандай енгил тортиб, хўрсиниб қўйишидди, чунки бу уларга жуда ҳам қўл

келар эди.) Улар тезда, бир кун ёки икки кун ичида никохдан ўтишлари керак эди, – деб давом этди Мейсон, ҳамон, шу сўзларим билан Клайднинг нақ ўтакасини ёриб юбораман, деган умидда. – Бироқ Олбэними ёки Сирақузаданми, ё яна бошқа аллақайси гўрданми келган Голден ёки Грэхемнинг калласида эса мутлақо бошқача фикр юрар эди. У ўзининг қайтиб келмаслигини билар эди. Шунинг учун ҳам у бутун ашқол-дашқолларини ўзи билан бирга қайиққа солиб олган эди. Кейин у бутун кун бўйи, тушдан то қоронғигача ҳувиллаган кўлда қулайроқ жой ахтариб юрган – шундай жой бўлиши керак эдики, уни қирғоқдан туриб ҳеч ким кўролмаслиги лозим эди – буни сизларга биз исботлаб берамиз. Охири бориб гира-шира пайтда у шунаقا жойни топган. Сўнгра эса бошида янги похол шляпа, қўлида топ-тоза, қуруқ жомадони билан ўрмон оралаб жанубга қараб борар экан, ўзини бутунлай хавфсиз шароитда деб сезган. Клифорд Голден ҳам энди йўқ эди. Карл Грэхем ҳам энди йўқ эди, улар фарқ бўлиб кетишган эди, улар Катта мушгир кўли қаърида, Роберта Олден билан ёнма-ён ўлиб ётишар эди. Аммо Клайд Грифитс эса тирик ва озод эди, у Ўн иккинчи кўлга, ўзи шу қадар бошларига кўтарган ўша улфатлари томонга кетмоқда эди.

«Жентельменлар, Клайд Грифитс Роберта Олденни сувга чўктириб юборишидан олдинроқ ўлдирган эди. У Робертанинг боши ва юзларига зарба тушириб, буни ҳеч ким кўрмади, деб ўйлаган. Аммо Робертанинг ўлим талвасасидаги охирги қичқириғи Катта мушгир сувлари узра янграб кетган пайтда у ерда бир гувоҳ бўлган эди, қораловчи томон ўзининг сўнгги сўзини айтишидан олдин ўша гувоҳ сизларнинг олдингизга чиқади-да, ҳам масини гапириб бераdi».

Мейсон ихтиёрида ўша воқеани ўз кўзи билан кўрган гувоҳ-пувоҳ йўқ эди, лекин у душман то-

монда ваҳима кўтариш имкониятидан бир фойдаланиб қолмоқчи бўлган эди.

Дарҳақиқат, натижа у кутгандан ҳам зиёда бўлиб чиқди. Шу пайтгача Клайд, айниқса, Роберта хати тўғрисидаги одамни ларзага солувчи янгиликдан кейин ҳам пинагини бузмай, ўзини ноҳақдан-ноҳақ таҳқирланган одамдек тутиб ўтирган эди-ю, бироқ бу гапдан сўнг бирдан тошдай қотди – кейин бутун гавдаси гужанак бўлиб қолди. Гувоҳ! У ҳаммасини гапириб берармиш! Э, парвардигор! Демак, ўша гувоҳ ким бўлишидан қатъи назар, қаердадир кўлнинг кимсасиз бир соҳилида яшириниб ўтирган экан-да... у ўша бехосдан уриб юборилган зарбани ҳам кўрган, Робертанинг қичқиригини ҳам эшитган экан-да... Клайд унга ёрдамлашмаганини ҳам кўрган-да унда! Қирғоқча қандай сузиб чиққани, кейин дом-дараксиз йўқолгани... эҳтимол, у ўрмонда кийимини алмаштираётган вақтида ҳам уни кузатиб тургандир. Э, парвардигор! Клайд қўллари билан стулни чанглалаб олди, боши эса худди бирордан мушт егандай орқасига чиганиб кетди: ахир, бу ўлим дегани, уни шубҳасиз, қатол этишади! Э, худо! Бошқа энди ҳеч қандай нажот ҳам йўқ! Боши зўр-базўр қўйи эгилди, у ҳушини йўқотаётганга ўхшар эди.

Белнеп нималарнидир ёзиб олаётган эди, Мейсоннинг гапини эшитганда қўлидаги қалами аввалига тушиб кетди; кейин кўз қарашлари довдираған, гарангсиб қолган бир қиёфага кирди, чунки бу зарбани даф этишга ҳимоя томонининг ҳеч бир далили йўқ эди... Аммо у ўзини бундай тутиши – ўтакетган эҳтиётсизлик эканлигини ўша заҳотиёқ тушуниб етди-ю, ўзини ўнглаб олди. Наҳотки, шунча гапдан кейин ҳам Клайд уларни алдаса? Наҳотки, у мисс Олденни қасддан ўлдиргану, яна бунинг устига орада қандайдир ҳеч ким сезмай қолган гувоҳ ҳам бўлса? Агар шу гап рост чиқса, унда улар

бу бефойда, обрў-хурматлари учун хавфли ҳисобланган ишдан қандайдир бир йўлинни қилиб воз кечишилари лозим бўлади.

Жефсонга келганда эса, дастлаб у ҳам эсанкираб, боши қотди. Унинг унча-мунчани писанд билмайдиган бақувват миясида ҳам ҳар хил хаёллар кеза бошлиди: чиндан ҳам ўша гувоҳ бормикин, наҳотки?.. Демак, Клайд алдабди-да? Унда гап тамом, вассалом. Ахир, у Робертани урганини бўйнига олиб, буни уларга ҳам айтган эди-ку, ҳойнаҳой, ўша гувоҳ ҳам кўрган бўлса керак буни. Демак, тўсатдан рўй берган руҳий бурилиш тўғрисидаги анави олди-қочдилар ҳам энди шу билан тамом деган сўз. Ўша гувоҳнинг гапидан кейин ким ишонади бунга?

Лекин Жефсон табиатан ниҳоятда ўжар ва дадил одам бўлгани учун прокурорнинг қақшатқич зарбасидан кейиноқ дарров чекиниб қўя қолмас эди. У тарвузи қўлтиғидан тушиб кетган шерикларига ўтирилиб қаради-ю, Белнеп ва Клайднинг шахсий бўшанглигидан номус қилганча, шивирлади:

– Мен бунга ишонмайман. Менимча, у ёлғон гапиряпти ёки бизни қўрқитмоқчи бўляпти. Ҳарқалай, сабр қилсак, кўрамиз, Навбатимиз келишига анча бор. Қаранглар, ҳали қанча гувоҳлар турибди. Агар истасак, ҳафталар мобайнида қарши саволлар беравериб, унинг ваколат муддати ўтиб кетгунга қадар чўзаверишимиз мумкин. Бунга эса мингта баҳона топса бўлади, масалан, ўша гувоҳнинг кимлигини аниқлашнинг ўзига озмунча вақт кетмайдими? Бунинг устига ўз-ўзини ўлдирган, деган тахминимиз ҳам бор, аслида ҳам шундай бўлганлиги аниқ. Клайд қасам ичиб туриб, бунинг қандай юз берганини кўрсатади-кўяди: мияси карахтланиб, уни қутқаришга журъати етмай қолган бўлади. Буни беш юз фут наридаги масофадан бирор-бир кимса кўра олармиди, ахир... – у қовоғини очмай кулимсиради, кейин Клайдга эшилтирмай

туриб, қўшимча қилди. – Менимча, сира иложини тополмасак, у ҳолда уни йигирма йил билан қутулириб қолиш қўлимиздан келар, нима дедингиз?

## XXI БОБ

Кейин гувоҳдар, гувоҳлар, гувоҳлар – бир юз йиғирма етти киши сўроқ берди. Улар айтган гапларга, айниқса, врачлар, уч овчи ва Робертанинг сўнгги қичқиригини эшитган аёлнинг гапларига Жефсон билан Белнеп қайта-қайта эътиrozлар билдириб туришди, чунки дадиллик билан ўйланган Клайд ҳимоясининг ҳаққонийлиги ўша гаплардаги адвокатлар сезиб қолиши мумкин бўлган ноаниқлик ва хатоларга боғлиқ эди. Шу боисдан ҳам ушбу ишни кўриб чиқиши ноябргача чўзилиб кетди, ўшандада Мейсон ғоят кўпчилик овоз билан ўзи шу қадар ошиқиб кутган судьялик лавозимига ҳам сайланди. Суд иши шунчалик қизғин, кескин тортишувлар билан ўтгани туфайли бутун мамлакатдаги кенг омма диққатини ва эътиборини тобора кўпроқ ўзига жалб этган эди.

Мухбирларнинг суд залидан берган хабарларига кўра, Клайднинг гуноҳкорлиги кун сайин ойдинлашиб борди. Бироқ у Жефсоннинг қатъий талабига бўйсуниб, қораловчи томондан чиққан ҳар бир гувоҳнинг хуружларини хотиржам туриб ва ҳатто мардона қарши олди.

- Исмингиз нима?
- Тайтус Олден.
- Сиз Роберта Олденнинг отасимисиз?
- Ҳа, сэр.
- Хўш, мистер Олден, сизнинг қизингиз Роберта қандай қилиб ва қанақанги шароитларда Ликургга кетганини суд маслаҳатчиларига гапириб бермайсизми?

– Эътиroz билдираман. Бунинг ишга алоқаси йўқ, муҳим нарса ҳам эмас, бу қонунга хилоф, – дея гапни бўлди Белнеп.

– Мен буни ушбу иш билан боғлаб бераман, – деб гап қистирди Мейсон судьяга қараб туриб, шунда судья, Тайтус жавоб қайтариши мумкин, аммо бу жавоб борди-ю, «ишга алоқаси бўлмаса», уни чиқариб ташлаш ҳам мумкин, деган қарорга келди.

– Қизим Ликургга иш қидириб борган эди, – дея жавоб берди Тайтус.

– Нима учун у иш қидириб ўша ёққа борган эди?

Яна эътиroz билдирилиб, яна ҳамма расмиятчилик қоидалари бажо келтирилгандан кейингина чолга гал беришди.

– Ҳа, биласизми, Бильц яқинидаги бизнинг фермамиз бирон марта ҳам бундай бир тузукроқ даромад келтирмаган, шу сабабли болалар бизга кўмаклашишлари керак эди, Бобби эса тўнгич қизимиш...

– Буни қарордан чиқариб ташлашни илтимос қиласман!

– Чиқариб ташлансин.

– Бобби – бу тўнгич қизингиз Робертани эркалааб айтган исмингиздир, шундай эмасми?

– Эътиroz билдираман... – яна даҳанаки жанг бошланди.

– Ҳимоя томонининг эътирозини суд рад этади.

– Ҳа, сэр. Баъзан биз уни шундай ном билан атар эдик. Оддийгина қилиб Бобби деб қўя қолардик.

Клад диққат билан тингламоқда эди; у қишлоғи бу мўйсафиднинг қовоқ уйганча ёзигиргансимон хўмрайиб қарашидан пинагини ҳам бузмай унга чидаш берди-ю, аммо ҳайрон қолди: у ўз со-биқ суюклисининг эркалааб айтилган исмини биринчи марта эшитаётган эди. У уни Берта деб ҳам

атарди-ю, бироқ Роберта эса уйида ўзини Бобби дейишларини унга сира айтмаган эди.

Қарама-қарши эътиrozлар, тортишувлар, судья қарорлари довули остида Олден, Мейсон раҳбарлигига ўз ҳикоясини яна давом эттирди, Роберта Грейс Маррдан мактуб олгач, қандай қилиб Ликургга жўнамоқчи ҳамда мистер ва миссис Ньютонларницида жойлашмоқчи бўлгани, унинг Грифитслар фабрикасида қандай ишлай бошлагани, ўшандан кейин уни ота-онаси ниҳоятда кам кўргани, бешинчи июнда эса у бир оз ҳордиқ чиқариш ва ўзига бир-иккита кўйлак тикиб олиш мақсадида уйига қайтиб келгани – шулар тўгрисида гапириди.

– У эрга тегмоқчи бўлганини гапирмаган эдими?  
– Йўқ.

Лекин у узундан-узун хатлар ёзар эди – Тайтус ўшандада у хатларнинг кимга аталганини билмас эди – кейин у нимадандир кўнгли вайрон бўлиб юрар, соғлигининг ҳам мазаси кетган эди. Тайтус икки марта унинг йифлаб ўтирганини кўрган, бироқ индамай қўя қолган, чунки йифлаётганини бировга сездирмасликка ҳаракат қилаётганини у пайқаб қолган эди. Уни бир неча марта Ликургдан туриб телефонга чақиришган, охирги марта эса, у жўнаб кетишидан бир кун оддин, тўртингчими ёки бешинчи июлдами чақиришган эди, буни у худди ҳозиргидай эслайди.

– Жўнаб кетаётганида у ўзи билан нима олган эди?  
– Жомадон билан сандиқчасини.  
– Агар ўша жомадонини кўрсатсак, сиз уни танийсизми?  
– Ҳа, сэр.  
– Бу ўша жомадонми? (Мейсон ёрдамчиларидан бири жомадонни келтириб, столчага қўйди.)

Олден жомадонни күрди-ю, мушти билан күзла-  
рини артди ва:

– Ха, сэр, – деди.  
 – Шундан кейин, – Мейсон бутун ишнинг бори-  
 шини мана шунақанги ҳаяжонли таассуротлар түг-  
 дириувчи услубда давом эттириб боришга ҳаракат  
 қилди, – Робертанинг сандиқчасини олиб келишди,  
 уни кўрганда Тайтус Олден ҳам, хотини, қизлари  
 ва ўғиллари – ҳаммалари йиглаб юборишди. Тайтус  
 сандиқчани ҳам Робертаники, деб тасдиқлагандан  
 сўнг, жомадон билан сандиқчани очиб кўришди.  
 Роберта тиккан кўйлаклар, ички кийимлар, туфли,  
 шляпалар, Клайд совға қилган пардоз қути, онаси,  
 отаси, сингиллари ва укаларининг расмлари, эски-  
 риб кетган пазандалик китобчаси, қошиқ, вилка  
 ва пичоқлар, бувиси ҳадя этган туздан ва мурчдон  
 – Роберта уларни бўлажак оиласвий ҳаёт учун кўз қо-  
 ражигидек асраб келаётган эди – шуларнинг бари  
 қайта-қайта кўриб чиқилди ва булар Робертаники  
 эканлигини тасдиқлашди.

Мейсон буларнинг ҳаммасини асосий «иш» би-  
 лан боғлашга ваъда бергани учун бу ишлар Бел-  
 непнинг норозилигига ҳам қарамай қилинаётган  
 эди, бироқ Мейсон ўз сўзининг устидан чиқолма-  
 ди ва шунга яраша судья ҳам ўша гувоҳликлар-  
 ни қарордан чиқариб ташлашни буюрди. Аммо бу  
 ҳаяжонли манзара суд маслаҳатчиларининг ақли  
 ҳамда қалбида чукур из қолдириб улгурган эди.  
 Белнеп эса Мейсоннинг устамонлик билан олиб бо-  
 раётган ҳийла-найрангларини танқид қилаётгани-  
 да, фақат бу жентельменнинг дарғазаб бўлиб:

– Бу ерда ўзи ким қораловчи, шуни билишни  
 истар эдим? – дея бўкириб юборишигагина эриш-  
 ди, холос.

– Округимиздан судьялик лавозимига қўйилган  
 республикачилар номзоди – ҳозирча ўша қораловчи

бўлса керак, назаримда! – деб жавоб берди Белнеп, унинг бу жавобидан гуриллаб кулги кўтарилиди, Мейсон эса ўзини баттар йўқотиб, бақира кетди:

– Муҳтарам мистерлари! Мен норозилик билдираман! Бу ушбу ишга бутунлай алоқаси йўқ, сиёсий масалани беадабларча ва гайриқонуний бир тарзда унга аралаштириб юборишга уринишдир. Бу, гўё мен округ судьяси лавозимига республикачи партиянинг номзоди бўлганим учун ушбу иш юзасидан қораловни тегишинча бетарафлик билан олиб боролмаслигимга суд маслаҳатчилари ни инонтирмоқ мақсадида қилинган маккорона ва шум ниятли бир интилишдир. Мен кечирим сўрашларини талаб қиласман, акс ҳолда, бутун ишни худди шу ернинг ўзидаёт таққа тўхтатаман!

Шундан сўнг судья Оберуолцер суд тартиб-қоидалари жиддий равишида бузилганини тушуниб етди-ю, Мейсон билан Белнепни ўз ҳузурига чақириб олди ва Белнепнинг аслида нима демоқчи бўлгани хусусидаги вазмин ва майнингина изоҳларини тинглади-да, бундан кейин икковлари ҳам суд ҳайъатига ҳурматсизликда айбланишдан таҳдикага тушиб, қай йўсинда бўлмасин, сиёсий вазиятга ишора қилишга йўл қўймасликларини буюрди.

Шунга қарамай, Белнеп ва Жефсон ўзларини муваффақият билан табриклашди, уларнинг Мейсоннинг номзодлиги юзасидан ва юқори мансабга кўтарилишда Клайд ишидан фойдаланиб қолмоқчи бўлаётгани хусусида чиқарган хulosалари шу тарзда суд ва суд маслаҳатчиларининг эътиборига етказилган эди.

Кейин яна гувоҳлар кетидан гувоҳлар...

Грейс Марр Роберта билан қандай ва қаерда танишгани, у ўшанда қанақанги покиза, бегуноҳ ва художўй бир қиз бўлгани, Крам кўлида Клайд иккаласи учрашгандан сўнг эса у мутлақо ўзгариб

кетгани түгрисида бурро-бурро, лекин эзмаланиб гапириб берди. Роберта ичимдагини топ дейдиган, гапни чалғитадиган, сирли саргузашларини хаспұшлаш учун турли хил ёлғон-яшиқ баҳоналар ахтарадиган қызга айланиб қолибди, масалан, кечқурунлари у үйдан чиқиб кетар экан-да, алла-маҳалда қайтиб келар экан, шанба ва якшанбада фалон жойга бордим, дер экану, суриштириб келса у ерга мутлақо бормаган бўлиб чиқаркан ва ниҳоят, Грейс унга ўзининг норозилигини айтмоқчи бўлиб турган бир пайтида Роберта тўсатдан уларникидан кетиб қолибди-ю, ҳатто манзилини ҳам бермабди. Шуларнинг ҳаммасига бир эркак айбдор экан, ўша эркак Клайд Грийфитс экан. Бир гал тунда Грейс Робертанинг орқасидан пойлаб борибди – бу ўтган йилнинг сентябрь ёки октябрьда бўлган экан – қараса, Гилпинларнинг уйи яқинида Клайд иккаласини кўрибди. Улар дараҳт остида туришган экан, Клайд уни қучоқлаётган экан.

Шу ерда Жефсоннинг таклифига биноан, гувоҳни Белнеп сўроқ қила бошлади, у Грейсга макрли саволлар бериб, Роберта Ликургга келган вақтда, мисс Марр таърифлаётганидек, чиндан ҳам ўтакетган художўй ва серҳиммат қиз бўлганмиди ёки йўқми, шуни аниқлаб олишга уринарди. Лекин сўлғин, жizzаки мисс Марр эса, ҳарқалай, Роберта Клайд билан Крам қўлида учрашгунга қадар, мен уни ҳалоллик ва покликнинг рамзи сифатида билардим, деб қайта-қайта уқтиради.

Сўнгра бу гапни Ньютонлар ҳам қасам ичиб турриб тасдиқлашди.

Кейин Гилпинлар – хотини, эри ва қизлари – бунинг устига ҳар бири алоҳида-алоҳида қасам ичган ҳолда фақат ўзлари кўрган ва эшитганларини гапириб беришди. Миссис Гилпин, Роберта шу жомадони ва сандиқчасини кўтариб, уларникига

қандай кириб келгани, одамлардан қочиб, ёлғизликтада яшагани, ниҳоят миссис Гилпин Робертага ачин-ганидан бир оз унга қўнглини кўтариш имконини бериш мақсадида уни ўзиникига таклиф қила бошлигани, аммо Роберта эса ҳар гал буни рад этганларини эслаб гапирди. Лекин кейинроқ, ноябрнинг охирларига бориб, (тўғри, бунақсанги ёқимтой, кам-суқумгина қизга аччиқ сўз айтишга миссис Гилпиннинг бирон марта ҳам журъати етмаган эди) у ва иккала қизи, Роберта гоҳо-гоҳо соат ўн бирлардан ошганда ўз хонасида кимнидир қабул қилишини сезиб қолишган, бироқ унинг кимлигини эса миссис Гилпин билмаган. Белнеп тағин қайта саволлар бериб, Роберта уни гувоҳлар таърифлашаётгандай у қадар нуқсонсиз сипо қиз эмас эди, деган маъно чиқариб, шундай эътироф ва маълумотларни қўлга киритиб олишга тиришиб кўрди-ю, аммо бундан иш чиқмади. Миссис Гилпин ҳам, худди эрига ўхшаб Робертага ниҳоятда меҳр қўйган эди, фақат Мейсоннинг, кейин эса Белнепнинг зўрлови остидагина у Клайднинг бемаҳал келиб-кетишларини сўзлаб беришга мажбур бўлган эди.

Сўнгра уларнинг тўнгич қизлари Стелла гувоҳлик берди. Роберта уларникига қўчиб келгач, орадан сал ўтмай, октябрнинг охирими ёки ноябрнинг бошларидами, у (Стелла) уйига қайта туриб, Робертани қандайдир бир бегона киши билан бирга кўрибди, энди билсаки, ўша одам мана, Клайд экан; улар уйдан юз қадамча нарида туриб, афтидан жанжаллашаётган эканлар. Стелла қадамини секинлатиб, қулоқ солибди. Ҳамма гапни эшитмабди-ю, бироқ Мейсоннинг ёрдамчи саволлари кўмагида, у, Роберта ўз хонасига Клайднинг киришини истамаганлигини эслаб гапирди: «Бундай қилиш яхши эмас», деган экан Роберта. Клайд туриб-туриб, охири шарт бурилиб жўнаб кетибди,

Роберта эса худди «қайт, қайт» дегандай қўллари-ни чўзганча қолаверибди.

Клайд ҳайратга тушган кўйи кўзлари бақраярди, холос. Ахир, ўша кунлари, аслида эса Роберта билан танишганимдан бери ҳам бизни ҳеч ким кўрмаяпти, деб хаёл қилиб юрардида. Бу гувоҳликлар эса Мейсоннинг кириш нутқида айтиб ўтилган кўпгина айбларни, сўзсиз, тасдиқлаб берар эди: демак, у қасдан, ўз қилмишининг ҳақиқий моҳиятини тўла тушунган ҳолда Робертани истамаган ишига мажбурлаб қўндирган эканда?! Бунақангি гувоҳликлар, эҳтимол, судьяни ҳам, шунингдек, суд маслаҳатчиларини ҳам ва кўпчилиги қишлоқи бўлган қолоқ урф-одат ҳамда хуррофот-бидъатларга муккасидан кетган мана бу маҳаллий аҳолини ҳам Клайдга қарши гижгижлаб қўйса керак. Буни тушунган Белнеп Стеллани гапидан адаштириб, айни Клайднинг ўзини кўргани ё кўрмаганлигига уни иккилантиromoқчи бўлди. Лекин қош қўйман деб, кўз чиқарди. Стелла яна янги маълумотларни ҳам айтиб берди: бир марта ноябрдами ёки декабрнинг бошларида, боя айтиб ўтилган воқеадан кейин орадан сал ўтмай, Клайд қандайдир бир қутичани қўлтиғига қистириб олганча Роберта остонасида пайдо бўлибди-да, эшикни тиқирлатиб ичкарига кирибди. Ўшанда Стелла бу йигит ҳув авали ойдинли тунда Роберта билан уришиб турган кишининг худди ўзгинаси эканини аниқ танибди.

Стелладан сўнг Уигэм, унинг кетидан Лигет гувоҳлик бериб, Клайд ва Робертанинг қайси кунда иш бошлаганларини, шунингдек, бошлиқлар ва хизматчи аёллар ўртасидаги ўзаро алоқага оид қоиданинг мавжудлигини ҳам тасдиқлаб ўтишди. Уларнинг гувоҳлигига қараганда, Клайд билан Робертанинг хулқи ўша пайтда бутунлай нуқсонсиз бўлган: улар

ҳатто бир-бирларига назар ташламагандай күринишарди, сирасини айтганда, бошқаларга ҳам қайрилиб боқишимасди (бу сўзларни Лигет айтди).

Яна гувоҳларга сўз берилди. Миссис Пейтон ўз уйида Клайд яшаган вақтига доир нималарни билса – ҳаммасини ва унинг кибор дўстлари тўғрисида ҳам гапирди, чунки миссис Пейтон унинг ўша улфатларидан хабардор эди. Миссис Олден эса ўз сўзида ўтган йили рождество пайтида Роберта, бошлиғи, фабрика хўжайинининг жияни – Клайд Грифитс унинг қўнглини овламоқчи бўлиб юрганини, аммо ҳозирча буни сир тутиш лозимлигини бўйнига олганини айтди. Фрэнк Гарриэт, Харлей Бэгот, Трейси Трамбал ва Фредди Сэлслар ўтган йилнинг декабрида Клайдни ўзлари турли хил сара зиёфатлар ва кечаларга доимий равишда таклиф қиласкерганларини гапиришди, Скенэтедида яшовчи доричи Жон Ламберт, чамаси январда унга бир йигит мурожаат этиб – энди кўрса, у мана бу айланувчининг худди ўзгинаси экан – бола туширадиган бирор дори беришини илтимос қилганини сўзлади. Орин Шорт, январнинг охирларида Клайд ундан, эри бор ёш бир аёлга ёрдами тегадиган бирор-бир врачни билмайсизми, деб сўраганини айтди, у Грифитс фабрикасидаги хизматчилардан бирининг хотини экан; ўша хизматчи Клайдга маслаҳат солган экан, чунки у ва хотини ниҳоятда қашшоқ бўлганликлари учун бола кўришни истамаган эканлар. Кейин Глен доктор ўзиникига Робертанинг кириб боргани, уни газеталарда босилган расмидан танигани ҳақида сўзлаб берди ва шифокорлик қонунига кўра, унинг илтимосини қондиролмаганини ҳам қўшиб қўйди.

Сўнгра Олденларнинг қўшниси – фермер С. Б. Уилкокс ўз гувоҳлигига, тахминан йигирма тўқизинчи ёки ўттизинчи июнларда, айни у ошхона-

далик пайтида, Робертани шаҳарлараро телефон орқали Ликургдан бир одам чақиргани, у ўзини Бейкер деб танитгани, Роберта эса унга: «Лекин, Клайд, мен бунчалик узоқ кутолмайман. Ўзинг биласан-ку, иложим йўқ. Буни истамайман ҳам», деганини эшитиб қолганини гапириб берди. Робертанинг овози безовта ва ранжиган бир оҳангда эшитилибди. Мистер Уилкокс «Клайд» деган исмни жуда яхши эслаб қолган экан.

Айни шу Уилкокснинг қизи, пак-пакана, семиз ва «ш-ш»лаб гапирувчи Этел эса, шундан оддин унинг ўзи уч марта бошқа шаҳардан қилинган қўнғироққа жавоб бергани ва кейин Робертани чақириб келишга чопгани, ҳар гал Ликургдан Бейкер исмли киши телефон қоққанини қасам ича туриб тасдиқлаб ўтди. Бир марта Роберта уни Клайд деб атаганини ҳам у эшитган экан. Роберта яна, ҳар қандай шароитда ҳам бунчалик узоқ кутолмайман, деганини ҳам эшитибди, лекин у бу билан нимани назарда тутган – Этел буни тушунмаган экан.

Кейин қишлоқ почтасиси Рожер Бин гувоҳдик бериб, еттинчи ёки саккизинчи июнь билан тўртинчи ёки бешинчи июль ўрталарида у Робертанинг ўзидан ҳамда Олденлар фермаси яқинидаги чорраҳага ўрнатилган почта қутисидан ўн бештача хат олгани ва уларнинг кўпчилигига Клайд Грифитсга, Ликург, Баш почтамт, йўқлаб олувчига, деб йўлланганини гапирди.

Сўнгра Ликург баш почтамтининг хизматчиси Эймос Шоултер, эслашича, еттинчи ёки саккизинчи июнь билан тўртинчи ёки бешинчи июль ўрталарида Клайд ўз номига келган мактубларни суриштириди ва ўн беш ёки ўн олтитача хат олиб кетди, деб гувоҳдик берди.

Унинг кетидан Ликург бензин қуийиш бекатининг мудири Р. Т. Бигген сўзлаб, олтинчи июль

эрталаб, соат саккизларга яқин Филдинг авенюда кета туриб (шашарнинг гарбий четидаги Ли-кург-Фонда электр темир йўл бекатига олиб чиқадиган кўча), кулранг костюм ва похол шляпада Клайдни кўриб қолдим, деб айтди, қўлида жигар ранг жомадони ҳам бор экан; жомадонга ён томондан фотография аппаратининг сарғиш оёқчалари ва яна алланимадир, эҳтимол, соябонми, камар билан боғлаб қўйилган экан. Клайд яшайдиган жойни билгани учун, унинг шу ергача пиёда келаётганини кўриб, у ҳайрон бўлибди, чунки у уйининг шундоқ олдидаги Сентрал авенюдан поездга тушиб олиши ҳам мумкин экан. Белнеп қайта сўроқ жараёнида, тахминан икки юз қадамча нарида турган гувоҳ қандай қилиб нақ аппарат оёқчаларини кўрганига кафил бўла олади, деб суриштиришга уринган эди, аммо Бигген: ҳа, аппарат оёқчалари эди, мис мурватли сап-сариқ ёғоч оёқчалар эди, деб ўз айтганида туриб олди.

Ундан кейин Фонда бекатнинг бошлиғи Жон У. Трошер гувоҳлик бериб, олтинчи июлда эрталаб (у буни аниқ эслайди, чунки ўша пайтда у баъзи бир ишига доир ёзув-чизувларини саранжомлаб ўтирган экан) Роберта Олден келиб, ундан Утикагача чипта олганини гапирди. У мисс Олденни танир экан, негаки ўтган қишида ҳам уни уч-тўрт марта кўрган экан. У ҳолдан тойган, назарида деярли бетобдек туюлибди, бу ерда унга кўрсатишгани худди анавинга ўхшаш жигар ранг жомадон кўтариб олган экан. У судланувчини ҳам таниётган эмиш, унинг ҳам қўлида жомадони бор экан. Трошер ўшанда судланувчининг Робертага зифирдай эътибор берганини ёки у билан гаплашганини кўрмаган экан.

Сўнгра Фонда билан Утика ўртасида қатновчи поезднинг кондуктори Куинси Э. Дейл Клайдни

танигани, ўшанда уни кейинги вагонларнинг бирида кўрганини айтди. У Робертани ҳам кўрган экан, кейин уни газеталарда босилган расмидан танибди. Ўшанда Роберта унга қараб майин кулимсираб қўйган экан, кондуктор бўлса бу жомадонинг ҳарқалай сенга оғирлик қилса керак, мен тормозчи кондукторлардан биронтасига айтаман, Утикага борганингда сенга қарашиб юборар, дебди. Роберта эса унга ташаккур билдирибди. Кондуктор Робертанинг Утикада тушиб вокзал дарвосасидан кириб кетганини ҳам кўрибди, Клайдга эса у ерда кўзи тушмаган экан.

Шундан кейин, Робертанинг Утика бекати омборхонасида анча вақт қолиб кетган сандиқчаси кўриб чиқилди. Сўнгра, меҳмонхона бошқарувчиси Жерри Керносян томонидан Утика меҳмонхонасида тўхтаб ўтганларнинг рўйхати ёзилган дафтарча саҳифалари ҳам кўздан кечирилди; олтинчи июль куни рақами остида: «Клифорд Голден рафиқаси билан» деган ёзув турар эди. Мутахассислар шу ернинг ўзида бу ёзувни Ўтлоқзор кўли ва Катта мушгир кўлидаги меҳмонхоналарнинг рўйхат дафтарчаларидағи ёзувлар билан солиштириб кўришгач, учала дастхат ҳам битта одамга тегишилигини қасам ича туриб тасдиқлашди. Кейин бу дастхат Робертанинг пардоз қутисидан топилган бир энлик таклиф қофозига битилган ёзув билан ҳам қиёслаб кўрилди, бу белгилар барча суд маслаҳатчилари томонидан галма-галига синчиклаб қараб чиқилди, шунингдек, Белнеп ва Жефсон ҳам, гарчи улар таклиф қофозидаги ёзувдан бошқасини аввал кўрган бўлсалар-да, яна қайтадан қараб чиқишиди. Ашёвий далилларнинг яшириб қолингани, яъни прокурорнинг шу ножӯя, файриқонуний ва шармандали кирдикори муносабати билан Белнеп қайтадан эътиroz билдириди.

Бу масалада узундан-узоқ кескин тортишувлар бўлиб ўтди-ю, шу билан суд мухокамасининг ўнинчи куни ҳам тугади.

## XXII БОВ

Ундан кейин, ўн биринчи кунда, Утикадаги меҳмонхона клерки Фрэнк Шефер Клайд билан Роберта меҳмонхонага қандай кириб келишгани, айни пайтда улар ўзларини қандай тутишгани ва икковлари учун Клайд: «Сирақузалик мистер ва миссис Клифорд Голден» деб қўл қўйганини эслаб гапирди. Унинг кетидан Утикадаги газмол дўкони ишбошиларидан бири Уоллес Вандергоф похол шляпа сотиб олаётганда Клайднинг афт-ангори ва ўзини тутиши қандай бўлганлигини таърифлаб берди. Сўнгра, Утика билан Ўтлоқзор кўли ўртасида қатнайдиган поезд кондукторини сўзлатишиди. Ўтлоқзор кўлидаги меҳмонхона хўжайини ва меҳмонхона официанткаси Бланш Петинжил ҳам гувоҳлик бериб, Клайд тушлик таом вақтида Робертага бу ерда никоҳдан ўтишга рухсат йўқ экан, яхшиси, эртагача, яъни бошқа бирор жойга етиб боргунимизча кутайлик, деганини эшитиб қолганини айтди. Айниқса, шу гувоҳлик анча нохуш эди. Чунки Клайд, тузилган режага кўра, эртаси куниёқ Робертага ичидаги бор гапини айтиб берган бўлиши керак эди, лекин кейиннига Жефсон билан Белнеп, бу эътирофгача ҳам орада анча-мунча илк босқичлар бўлган эди, дейилса тўғри келар, деган қарорда тўхташди. Официаткадан сўнг, Клайд билан Роберта Куролсозгача тушиб боришган поезднинг кондуктори гапирди. Ундан кейин эса, йўл кўрсатувчи ва автобус ҳайдовчисига сўз тегди, у Клайднинг одам гавжумми, деб фалати савол бергани ва биз қайтиб келамиз, деб Робертанинг жо-

мадонини ташлагани ҳолда, ўзиникини эса олиб кетаверганини сўзлаб берди.

Сўнгра Катта мушгир кўлидан меҳмонхона хўжайини, қайиқчи, Клайдни ўрмонда учратиб қолган анави уч овчи ҳам гувоҳдик беришди, айниқса, ўшаларнинг гапи Клайдга оғир бўлди, чунки улар, дуч келганимизда у бутунлай ўзини йўқотиб қўйди, деб айтишди. Кейин эса қайиқ ва Робертанинг жасадини қандай топишганини, Хейтнинг етиб келгани ҳамда Роберта пальтосининг чўнтағидан қандай қилиб хат топиб олишгани тўғрисида гапирилди. Шуларнинг ҳаммасини ўнлаб гувоҳлар тасдиқлаб ўтишди. Сўнгра пароход капитани, қишлоқлик қиз, Крэнстонлар ҳайдовчиси; Клайднинг Крэнстонлар чорбоғига келиши ва ниҳоят (бунинг устига қасам ичилгандан кейингина ҳар бир босилган қадам хусусида гувоҳлик берилар), Клайднинг Айиқ кўлига саёҳатга кетиши, унинг изидан тушилиб, кўлга олиниши – шу босқичларнинг ҳаммаси ва Клайд ўша пайтда айтган гаплар бирин-сирин ўртага ташланда бошланди: шуларнинг бари Клайд учун анча-мунча ноқулайлик туғдирар эди, чунки бу унинг соҳтагарчилиги, носамимилиги ва даҳшатга тушаётганини фош этиб қўяётган эди.

Аммо Клайд учун энг хавфлиси ва энг ёмони, шубҳасиз, фотография аппаратига ва унинг оёқчаларига ҳамда улар қандай вазиятда топилганига оид гувоҳликлар бўлди. Бунга Мейсон катта умид боғлаб, айбини шу билан бўйнига қўйдира-ман, деб ўйлаётган эди. Биринчи галда у, Клайд, бу аппарат ва оёқчаси меники эмас, деб ёлғончиллик қилганини исботламоқчи бўлди. Шу мақсадда у аввалига Эрл Ньюкомни чақирди, у қасам ича туриб айтдики, у, Майсон, Хейт ва текширувнинг бошқа иштирокчилари билан Клайдни жиноят со-дир бўлган Катта мушгир кўлига олиб боришган

ўша куни, у, яъни Ньюком ва Билл Суортс деган ўша жойлик бир одам иккаласи (у ҳам бу ерда ҳали гувоҳлик беради) бута ва ағанааб ётган дарахтларнинг орасини титкилаб юришиб, соҳил ёқасидаги қулаган бир гўла остига қўйилган аппарат оёқчаларига дуч келиб қолишибди. Кейин Ньюком Майсоннинг сўроқларига жавоб қайтара туриб (Белнеп билан Жефсон эътиroz билдиришга уриниб кўришган эди, бироқ судья уларнинг эътирозини ҳар гал қайтариб ташлайверди). Клайддан фотография аппарати ёки аппарат оёқчаси бўлганмиди сизда, деб сўрашгани, у эса, йўқ, деб жавоб берганини ҳам қистириб ўтди. Ньюкомнинг гувоҳлигини эшитгач, Белнеп билан Жефсон ўзларининг ниҳоятда fazablanganliklariini bildirdilar.

Шундан сўнг ўша заҳотиёқ судга Хейт, Бэрлей, Слэк, Краут, Суэнк, Сиссел, Билл Суортс, ер ўлчовчи Руфус Форстер ва Ньюкомлар имзо чеккан қарорни тақдим этишди; бу ҳужжатда таъкидланишича, Клайдга аппарат оёқчаси кўрсатилиб, бу сизники эмасми, деб савол берилганда, у буни «кескин тарзда, қайта-қайта рад этган» экан. Хуллас, охири бориб-бориб, судья Оберуолцер бу гувоҳликни суд қароридан чиқариб ташлашни буюрганда ҳам, Майсон бунинг foilat муҳимлигини бор кучи билан таъкидлаш мақсадида дарров қўшимча қилди:

– Майли, муҳтарам мистерлари, лекин менда яна бошқа гувоҳлар ҳам бор, улар ушбу ҳужжатда ёзилган нарсаларни ва ҳатто ундан зўрларини ҳам қасам ичган ҳолда тасдиқлаб беришлари мумкин.  
– Ўша заҳотиёқ у: – Жозеф Фрейзер! – деб чақирди.

Гувоҳлар учун ажратилган жойда спорт анжомлари, фотография аппаратлари ва шунга ўхшаш ашқол-дашқоллар билан савдо қилувчи дўкондор пайдо бўлди-да, қасам ичди ва майнинг иккинчи ярмида айбланувчи Клайд Грифитс, (дўкондор уни

танир экан, исмини ҳам билар экан) Сэнк фирмасининг  $3^{1/2} \times 5^{1/2}$  ҳажмидағи фотография аппаратини оёқчаси билан бирга ундан қарзга олиб кетганини айтди. Кейин ҳозир қўлига беришган аппарат ва сарғиш аппарат оёқчасини диққат билан кўриб, ундаги рақамларни дафтарчасидаги белгиларга солишириб чиққач, мистер Фрейзер, айни шу нарсаларни у Клайдга сотганини тасдиқлади.

Клайд донг қотиб қолган эди. Демак, аппаратни ҳам, оёқчасини ҳам топишибди-да? Тағин бу, Клайднинг менда ҳеч қандай аппарат бўлган эмас, деган гапидан кейин-а! Энди бу ёлғончиликни суд маслаҳатчилари, судья ва бутун жамоат қандай баҳоларкин? Арзимаган мана шу аппарат устида алдамчилик қилгани ҳам очилиб ўтирибди-ю, унда руҳий бурилиш юз берганига энди ким ишонади? Яхшиси, у бошданоқ ҳаммасини бўйнига олиб қўя қолгани тузук эди.

Аммо у шу ҳақда бош қотириб турган пайтида, Мейсон Саймон Дожа деган ёшгина бир ўрмон кесувчини чақирди, у, сувдан Робертанинг жасадини олиб чиққан Жон Поль иккаласи, прокурорнинг илтимосига биноан, ўн олтинчи июль – шанба куни, марҳуманинг танаси топилган жойда бир неча марта сувга шўнғиб кўришганини ва охири бориб у фотография аппаратини топишга муваффақ бўлганини сўзлаб берди. Шу заҳотиёқ ўша аппаратни Дожага кўрсатишган эди, у таниди.

Шундан сўнг, дарров ўша топилган аппаратга алоқадор бўлган, бироқ шу пайтгача эслатилмай келинаётган плёнка масаласига кўчилди: у сувдан олиниб, дорига солиб ишловдан чиқарилгач, энди ашёвий далиллар қаторига қўшиб қўйилган эди; тўрттала расмда Робертага айнан ўҳшайдиган бир аёлнинг аксини кўриш мумкин эди, иккитасида эса Клайдни осонгина таниса бўлар эди. Белнеп

буларни на рад эта олди-ю ва на далилий исботлар қаторидан чиқаришга ҳам қурби етди.

Кейин ўн саккизинчи июнда Крэнстонларнинг Шейрондаги чорбоғида меҳмон бўлган (Клайд ҳам ўша ерга айни биринчи марта борган пайти эди) Флойд Тэрстон гувоҳлик бериб, ўша куни Клайд кўриниши ва катталиги тахминан бу ерда унга кўрсатгандарига ўхшаш аппарат билан бир неча марта расм олганини гапирди. Аммо у, ҳозир кўргани айнан ўша аппаратмиди ёки йўқми, буни аниқ айтмолмагани учун унинг гувоҳлиги қарордан чиқариб ташланди.

Ундан сўнг Ўтлоқзор кўлидаги меҳмонхона хизматчиси Эдна Пэттерсонга сўз тегди, у еттинчи июль куни кечқурун Клайд ва Робертага ажратилган хонага кирсам, Клайд қўлида аппарати билан турган экан, эслашимча, унинг катталиги ва кўриниши ҳам мана шу ҳозир олдимда турган аппаратга ўхшар эди, деди. Ўша пайтда у аппарат оёқчаларини ҳам мана шу ҳозир кўрган экан. Атрофида юз бераётган воқеаларни ғалати бир эсанкираш билан кузатаётган Клайд бу қизнинг ўшанда хонага қандай кириб келганини ҳам хотирлади. У оғир бир ажабланиш ҳисси билан ўйлади: кутилмаган, бир-бирини ҳатто тушида ҳам кўрмаган бу хилма-хил гувоҳлар, яна орадан шунча вақт ўтиб кетганига қарамай, шу қадар мустаҳкам ашёвий далиллар занжирини яратса олганлари чиндан ҳам қизиқ эди!

Кейинги кунларда, Робертанинг жасади Брижбургга олиб келинганда Мейсон томонидан чақирилган беш врачнинг гувоҳлиги тингланди, айни вақтда Белнеп билан Жефсон чарчаш нималигини билмай, қайта-қайта улар айтган фикрларга қаршилик билдириб туришди; врачлар эса ҳаммалари ҳам галма-галига қасам ичиб, Робертанинг юзи ва бошидаги жароҳатлар, агар бунга унинг жисмо-

ний аҳволи ҳам қўшилса, уни бемалол ҳушидан кетказган бўлиши мумкин, деб таъкидлаб ўтишди. Марҳума ўпкасининг ҳолати (уни сувга чўктириб синаб кўришди) шуни тасдиқлайдики, қайиқ рахидан сувга ағанаб тушаётган пайтида Роберта ҳали тирик эди, тўғри, у ўша вақтда ҳушини йўқотган бўлиши ҳам мумкин. Бу жароҳатларни келтириб чиқарган буюм масаласига келгандა эса, врачлар: у қандайдир қаттиқ нарса бўлган, дейишдан бўлак бирор-бир тузукроқ тахмин айтишга ҳам журъат этолмадилар. Белнеп билан Жефсон ўзларини ҳар қанча жиддий тутиб, анча-мунча инжиқдик қиласалар ҳам, бари бир туширилган зарбалар Робертани гарангситиб, ҳушини йўқотар даражада кучли бўлмагандир, деган фикрни врачларнинг бўйнига қўёлмадилар... афтидан, энг ёмони чаккасидан тепароқдаги жароҳат бўлса керак, у анча ичкарига ботиб кирган ва ўша жойда қон қўйилиб қолган эди. Бунга ашёвий далил сифатида фотография расмларини чиқариб кўрсатишди.

Ҳам жамоатни, ҳам суд маслаҳатчилари ни чукур, зилдай ҳаяжон қамраб олган мана шу сергулу пайтни пойлаб туриб, Робертанинг жасади Хейт, врачлар ва ака-ука Луцлар ихтиёрида бўлган вақтида олинган унинг жуда кўп расмларини намойиш қилишди. Юзидаги моматалоқ-яранинг катталиги фотография аппаратининг икки қиррасига teng келишини ҳам кўрсатиб беришди. Шундан кейин Бэртон Бэрлей қасам ичган ҳолда, аппарат объективи билан қопқоғи орасида Робертанинг сочига бутунлай ўхшаш (ҳарқалай ўхшашлигини Мейсон тўхтовсиз равищда таъкидлар эди) икки тола соч топиб олганини гапириб берди. Неча соатлаб чўзилган мажлис давомида бунақсанги далилу ашёлардан тоқати тоқ бўлиб, фазаби қайнаб ўтирган Белнеп гап шу ерга келганда энди уларни аччиқ истеҳзо билан рад этишга уриниб кўрди: ўзи-

нинг ҳурпайиб кетган оқиши сочидан бир толасини шарт юлди-ю, суд маслаҳатчилари ва Бэрдейдан, ҳар қандай одамнинг ҳам сочининг рангини биттагина толасидан билса бўлади, деб сизлар дадил тасдиқлайсизларми, акс ҳодда, бу тола ҳам нақ Робертанинг бошидан юлиб олинганига сизлар нега ишонмас экансизлар, дея савол ташлади.

Сўнгра Мейсон миссис Ратжер Донегью исмли гувоҳни чақирди, у ниҳоятда хотиржам ва текис бир оҳангда, саккизинчи июль куни кечқурун, соат беш ярим билан олти ўрталарида у ва эри Ҳилол кўрфази яқинида чодир қуришганини маълум қилди, кейин эса сайр этиб, балиқ тутиш мақсадида қайиқقا тушиб жўнаб кетишибди, улар соҳидалан тахминан ярим милча нарига, Ҳилол кўрфазини шимол тарафдан тўсиб турган сердараҳт бурундан чорак милча берига борганларида миссис Донегью қичқириқ эшитиб қолибди.

- Беш ярим билан олти ўртасида деяпсизми?
- Ҳа, сэр.
- Қайси куни эди ўзи?
- Саккизинчи июль.
- Ўша пайтда, анифини айтганда, қайси жойда эдингиз?
- Биз ўшанда...
- «Биз» эмас. Шахсан ўзингиз қаерда эдингиз?
- Мен эрим билан бирга қайиқда кўлнинг аниви, Қуий кўрфаз деб номланган томонидан сузиб ўтаётган эдик, шундай номланишини ҳам кейин билдим.
- Хўш. Энди айтинг-чи, кейинига нима бўлди?
- Биз кўрфазнинг ўртасига сузиб борганимизда кимдир қичқирганини эшитиб қолдим.
- Қандай қичқириқ?
- Юракни эзиб юборадиган, худди кимдир жони оғрибми... ёки даҳшатга тушибми, қичқираётганга

ўхшар эди... Бамисоли қулоқни тешгудек қичқириқ эди, кейин мен уни сира унтулмадим.

Шу ерда Белнеп ўрнидан туриб, сўнгги жумлани қарордан чиқариб ташлашни тавсия этди, кейин уни ўчириб ташлаш тўғрисида бўйруқ қилинди.

– Ўша қичқириқ қайси томондан эшитилди?

– Олисдан. Ўрмонданми ёки эҳтимол ундан ҳам узоқларданми...

– Ўшанда сиз туртиб чиққан буруннинг нариги ёғида ҳам кўрфазми ёки қўлтиқчами борлигини билармидингиз?

– Йўқ, сэр.

– Хўш, ўшанда соҳил бўйидаги ўрмонда қичқиришаётганини нима деб ўйладингиз?

(Суд ҳимоя томонининг эътирозини қабул қилди).

– Қани, энди бизга айтиб беринг-чи, ким қичқирган эди – эркак кишиими ёки аёлми? Кейин нима деб қичқирган эди?

– Аёл киши қичқирди. Қичқириқ, шубҳасиз, олисдан келса ҳам, аммо қулоқни тешгудек, аниқ эшитилди. У икки марта қичқирди – худди одамнинг жони қаттиқ оғригандаги каби: «Вой-вой!» ёки «О-оҳ!» дегандай бўлди назаримда.

– Эркак киши эмас, айни аёл қичқирди, деб мабодо янглишмаяпсизми, ишончингиз комилми шунга?

– Янглишаётганим йўқ, сэр. Бунга астойдил ишонаман. Аёл кишининг овози эди, эркак ёки ўғил бола бунақа қаттиқ қичқиролмайди. Фақат аёл кишигини шунақа қичқира олиши мумкин.

– Тушунарли. Миссис Донегью, энди айтинг-чи... харитадаги мана бу нуқта Роберта Олден жасади топилган жойни билдиради, кўряпсизми?

– Ҳа, сэр.

– Мана бу дараҳтлар орқасида турган иккинчи нуқтани ҳам кўряпсизми, у тахминан сизнинг қайиғингиз қаерда бўлганини кўрсатади?

– Күрятман, сэр.

– Ўша овоз манави белгилаб қўйилган Ҳилол кўрфазидан келгандай бўлиб туюлдими сизга?

(Эътиroz билдирилди. Эътиroz қабул қилинди.)

– Қичқириқ яна тақрорландими?

– Йўқ, сэр. Мен кутиб турдим. Бундан ташқари, мен ўша қичқириққа эримнинг ҳам диққатини жалб этдим, биз икковлашиб кутдик, аммо бошқа чурқ этган ҳам овоз чиқмади.

Сўнгра уни Белнеп сўроқ қила бошлади, у оғриқнинг зўридан эмас, балки даҳшатга тушишдан ҳам қичқириш мумкинлигини исботлашга ошиқар эди; у миссис Донегьюни яна бир бошдан сўроққа тутса ҳам, на унинг ўзини ва на гувоҳликка чақирилган унинг эрини ҳар қанча уринганда ҳам иккилантиrolmasligiga имони комил бўлди. Улар ўша аёлнинг қичқириғи ўзларида фоят чуқур, унучилмас таассурот қолдирганини таъкидлашар эди. Қичқириқ уларни сира тинч қўймабди, чодирга қайтиб келгандарида ҳам нуқул ўша ҳақда гаплашишибди. Қоронги тушгани учун эри овоз келган жойни қидирмай қўя қолибди, миссис Донегьюга эса худди ўрмонда аёл ёки қиз болани ўлдиришгандай бўлиб туюлаверибида ва шу боисдан бу ерда ортиқча қолишни исташмабди-да, эртаси куни эрталабоқ бошқа кўлга қараб йўл олишибди.

Дэм кўлидаги лагерда хизмат қилувчи адирондаклик йўл кўрсатувчи Томас Баррет эса мана бундай гувоҳлик берди: у миссис Донегью айтган вақтда қирғоқ бўйлаб Катта мушгир меҳмонхонасига кетаётган экан, тахминан аввалги гувоҳ айтган жойда у қайиқда сайр этиб юрган эркак киши билан аёлнигина эмас, балки қўлтиқнинг қўйироқ соҳилида ўша саёҳатчилар қурган чодирни ҳам кўрибди. Яна у, Ҳилол кўрфазидаги қайиқни четдан туриб, ҳеч қаердан кузатиб бўлмайди, мабодо, шундоқ кўрфазга

кираверишгача борилса, унда бошқа гап, деб қўшимча ҳам қилди. Қўлтиққа олиб кирадиган йўлак эса ниҳоятда тор, шу сабабли кўрфаз кўлдан қараганда мутлақо кўринмайди. Тағин бошқа айрим гувоҳлар ҳам бу фикрни тасдиқдаб чиқишиди.

Шу пайт (бу ҳаяжонли дақиқа аввалдан пишитилиб, атайлаб мўлжаллаб қўйилган эди), ботаётган қуёш нурлари баланд, тор суд зали пештоқдарида бирин-сирин ўчиб бораётган бир вақтда Мейсон кетма-кетига Робертанинг хатларини ўқишига тутинди, у оддийгина қилиб, зўр бермасдан, аммо ачиниб ва чуқур тўлқинланиб ўқий бошлади, у бу хатларни биринчи марта ўқиганида ҳам худди шундай ачинган ва ҳаяжонга тушган, эди. Ўшанда уни бу мактублар йиглатиб юборган эди.

У ўқишини саккизинчи июнда – Роберта Ликургдан кетганидан сўнг орадан атиги уч кун ўтганда – ёзилган хатдан бошлади ва кейин ҳаммасини, то ўн тўртинчи, ўн бешинчи, ўн олтинчи ва ўн еттинчида ёзилган хатларгача ўқиди.

Кўпчилик хатларнинг айрим жойларига ва у ербу ерда тилга олинниб ўтган воқеа ҳамда далилларга асосланиб туриб, Роберта билан Клайд ўртасидаги танишлик тарихини бемалол тикласа бўлар эди, то у уч ҳафтадан, кейин эса бир ойдан сўнг, кейин саккизинчи ёки тўққизинчи июлда келиб уни олиб кетиш ниятида юрганлигигача... сўнгра Роберта тўсатдан қилган дўқ-пўписа-ю, шундан кейин Клайднинг шошилинч равишда у билан Фондада учрашмоқчи бўлганлигигача... мана шуларни анча ойдинлаштириб олиш мумкин эди. Мейсон бу беҳад аламли мактубларни ўқир экан, одамларнинг кўзига ёш қалқиб чиқди, кўпчилик дастрўмолини олиб, йўталиб-йўталиб қўя бошлади, бу жамоат ва суд маслаҳатчиларига Роберта хатларининг фоят таъсир қилганлигидан дарак эди.

«Сен менга күп ташвиш тортавермаслигим, ўзимни қандай ҳис этаётганимни ўйлайвермаслигим ва вақтимни хушнуд ўтказишимни маслаҳат бердинг. Сен Ликургда, ўз улфатларинг орасидасан ва сени ҳамма ёқقا иззатлаб чақиришаверганлари учун сенга бундай дейиш осон. Менга эса Уилкоксларнинг телефонидан гаплашиш ҳам қиин: нима деганимни исталган пайтда эшитиб қолишилари мумкин, сен бўлсанг, ҳали уни-ҳали буни гапирма, деб тайинлаганинг-тайинлаган. Мен сендан жуда күп нарсаларни сўраб олмоқчи эдим, лекин телефонда бунинг иложини қилолмадим. Қачон қараса, сен, ҳаммаси жойига тушиб кетади, деб такрорлайсан. Бироқ сен 27-куни келсанми-йўқми, шуни ҳам очиқ-ойдин айтмадинг. Унчалик англаёлмадим – жуда ёмон эшитилади – аммо сен нима учундир яна ушланиб қолармишсан. Ахир, бу мумкин эмас, Клайд! Дадам билан ойим учинчida Гамильтонга, амакимникига кетишияпти. Том билан Эмилия эса ўша куниёқ опамникига жўнашади. Аммо мен уникига яна қайта боролмайман ва боришни истамайман ҳам. Бу ерда ҳам ёлғиз ўзим қололмайман. Шундай экан, ваъда берганингдай, келишинг, инсоф қилиб, ўзинг келишинг керак. Клайд, бу аҳволда мен энди бошқа қутолмайман, шунинг учун сен келиб, мени бу ердан олиб кетишинг шарт. Фақат, илтимос, ёлвораман сендан, яна кеч қолиб, мени баттар қийнаб ўтирма».

Тагин ўқий бошлади:

«Клайд, мен сенга ишонганим учун ҳам уйимга келган эдим. Сен ўшанда энг кечи билан уч ҳафтадан сўнг мени олиб кетмоқчи бўлган эдинг, бунга катта ваъдалар ҳам берган эдинг ва шу вақт ичida ҳамма ишларингни саранжомлаб, бирор-бир бошқа жойдан иш топгунинггача етиб турадиган

пул ҳам жамгаришингга ишонтирган эдинг. Лекин учинчи июлда мен бу ерга келганимга деярли бир ой түлади-ю, кеча бўлса сен, учинчида келиш-келмаслигингни аниқ айттолмадинг. Ахир, мен сенга ота-онам Гамильтонга ўн кунга кетаётганини айтган эдим-ку. Кейин, тўғри, сен келаман дединг, лекин фақат кўнглимни кўтариш учунгина бораман, дединг. Ана ўшандан бери еганим ҳам, ичганим ҳам татимай ўтирибман.

Клайд, тушунсанг-чи, мен бутунлай хастаман. Назаримда дақиқа сайин ҳушимни йўқотиб, ийқилиб тушаётганга ўхшайман, устига-устак, мабодо сен келмай қолсанг, унда нима қиласман, деб туну кун ич-этимни еяпман, бу мени ақдимдан оздириб қўйяпти».

«Клайд, мени энди бошқа севмаслигингни ва муносабатларимиз бутунлай бошқача бўлишини истаётганингни биламан. Лекин мен нима қилай, ахир? Ҳамма ишлар учун сен ҳам худди мен каби айборсан, дейишинг ҳам мумкин. Агар буни одамлар билишганда, ҳойнаҳой, улар ҳам шундай деб ўйлашган бўларди. Бироқ ўша кўнглим тортмаган ишни қилишга мени мажбурламагин, деб ялиниб-ёлворганларим эсингдами, ўшандаёқ охирривой бўлишини дилим сезган эди. Аммо мен сени бутун борлиғим билан севганим учун, кетиб қолишингни истамадим, хоҳишинг шу бўлса, дедиму...»

«Клайд, қани энди мени ажал олиб қўя қолса эди! Ўшанда ҳаммаси тинчирди-қўярди. Охирги пайтда мен ўзимга ўлим тилаб неча марталаб худога илтижолар қилдим – очифини айтсам, шунинг учун илтижо қилдимки, ҳаёт энди менга ўз қадрини йўқотди, у мен учун биз сен билан учрашганимиз ва сен мени севиб қолган вақтингдагидай қадрли эмас эди. Эҳ, ўша дамларимиз қанчалар ширин сониялар экан-а! Қани энди, бари тушга

айланиб қўя қолса-ю... Сен билан мутлақо учрашмаган бўлиб чиқсан! Ана шунда менга ҳам, ҳаммазига ҳам анча тузук бўлар эди. Лекин энди иложисизман, Клайд, ахир менинг бир чақа пулим ҳам, боламизга ном бериш учун бошқа бир имкониятим ҳам йўқ. Аммо мен онам ва отамга, ҳамма туғишиганларимга даҳшатли мусибат ва шармандагарчилик орттириб кетишимидан қўрқмаганимда эди, ишон, унда мен мутлақо бошқача йўл тутган бўлар эдим. Бу менинг чин лафзим».

Яна ўқиди:

«Эҳ, Клайд, Клайд, бултурдан бери ҳаётдаги нарсалар қанчалик ўзгариб кетди-я! Ўзинг бир ўйлаб кўр, ўшандা биз Крам кўлига ва Фонда, Гловерсвил, Литл-Фоллз яқиндаги бошқа кўлларга ҳам борар эдик, энди бўлса... энди бўлса... Ҳозиргина Том билан Эмилияни йўқлаб ўртоқлари ва дугоналари киришди, сўнгра улар маймунжон тергани кетишди. Мен кетларидан қараб қолдиму, улар билан бирга боролмаслигим ва энди ҳеч қачон улардек бўлолмаслигимни ўйлаб кетдим... кейин тўйиб-тўйиб йифладим».

Ниҳоят, шундай деб ўқиди:

«Бугун мен ўзим яхши кўрган жойларим билан хайрлашиб чиқдим. Биласанми, жоним, бу ерда шу қадар сўлим хилватгоҳларимиз қўпки, уларнинг бари юрагимга чуқур ўрнашиб қолган! Бу ерларда мен бутун умримни яшаганман, ахир. Биринчидан, бу ерда бизнинг бир қудугимиз бор, атрофини ям-яшил йўсин қоплаган, шу қудуқ билан хайрлашиб келдим, чунки энди яқин орада мен унинг тепасига келолмасам керак, эҳтимол, умрбод келолмасман. Кейин кекса бир олма дараҳти ҳам бор: кичкиналик вақтимизда Эмилия, Том, Гиффорд ва мен доимо ўшанинг тагида ўйнардик. Сўнгра боғимиз ичида «Имон» деб номланган их-

чамгина аломат шийпончамиз ҳам бор, гоҳо-гоҳо ўша ерда ҳам ўйнар эдик.

Эх, Клайд, шуларнинг бари мен учун қанчалар азизлигини тасаввур ҳам қилолмайсан! Бу гал уйдан мен ғалати бир түйфу билан чиқиб кетяпман, гүё низаримда энди сира қайтиб келмайдиганга ўхшайман. Бечора онамни айтмайсанми, онамни, мен уни шунчалар севаманки, мана энди уни алдаётганимдан азобланиб, ичимни ит тирнаб ётибди! Унинг жаҳали чиққан пайтини сира кўрмаганман, қачон қараса, менга қайишгани-қайишган. Баъзи пайларда унга ҳаммасини гапириб бергим келади-ю, лекин бундай қилолмайман. Менсиз ҳам унинг ташвишлари ўз бошидан ошиб ётибди, яна бунақангидан оғир зарбага дучор бўлишини истамайман. Йўқ, мен кетиб, охири бир кун қайтсан ҳам – эрга тегаманни ёки ўлигим келадими, бунинг менга деярли аҳамияти йўқ энди – бари бир онам ҳеч нарсани билмайди, мен унга зигирдай ҳам кулфатни раво кўрмайман, уни азобга қўйганимдан кўра ўлиб кетганим минг қатла афзал. Хуллас, кўришгунча хайр, Клайд, телефонда айтганинг бўйича учрамиз. Сени шунча безовта қилганим учун кечир.

*«Сенинг жабрдийда Робертанг».*

Хатларни ўқиётган вақтида Мейсон баъзан кўз ёшини тийиб туролмади, сўнгги саҳифани ёпганда эса, ҳолдан тойган, аммо далилларининг мукаммалиги ҳамда рад этиб бўлмаслигидан суюнгани ҳолда:

– Халқ ўз сўзини тутатди! – дея хитоб қилди.

Худди шу дақиқада, суд залида эри ва Эмилия билан бирга ўтирган ҳамда узундан-узоқ, серғалва бу суд жараёни ва айниқса, ўқилаётган хатлардан юрак-бағри хун бўлган миссис Олден кўксидан бамисоли дод-фарёдга ўхшаш бир нидо узилиб чиқди-ю, ҳушини йўқотди. Чарчаган ва обдан эзил-

ган Клайд ҳам миссис Олденнинг фарёдини эши-тиб, унинг қулаги тушганини кўриб, ўрнидан туриб кетди... Ўша заҳоти Жефсоннинг эҳтиёткор қўли унинг елкасидан босди ва шу орада суд ижрочилари ҳамда теварак-атрофда яқин турган одамлар мис-сис Олденни суюб, ўрнидан турғазищди-да, унга ва Тайтусга залдан чиқишиларида кўмаклашдилар. Бу манзара залда йигилганларни ҳаддан ташқари ҳа-яжонга солиб юборди, эҳтимол, Клайд мабодо шу ер-нинг ўзида яна бир жиноят қилган тақдидираша ҳам халойиқ бунчалик дарғазаб бўлмаслиги мумкин эди.

Секин-аста фала-ғавур, ҳаяжон ҳам босилди, аммо залга анча-мунча қоронги тушиб қолган эди, девор соатларининг мили бешни кўрсатар, ўтирганларнинг ҳаммаси чарчашган эди; шу боисдан судъя Оберуолцер эртага эрталабгача танаффус эълон қилишни лозим топди.

Барча журналистлар ва рассомлар ўша ондаёқ дув этиб ўринларидан туриб, эрталаб ҳимоя томони сўз олиши керак, қизиқ, уларнинг гувоҳлари кимлар экан, бунақанги ақл бовар қилмас дара-жада ошиб-тошиб ётган далилу ашёлар қаршисида Клайд ҳам сўзлаб, гувоҳ сифатида ўзини ҳимоя эта олишига улар имкон беришармикин ёки унинг ҳимоячилари ақлдан озганлик ва ахлоқий беқа-рорлик хусусидаги ҳақиқатсимон олди-қочдиларни гапириб, фақат шу билангина чегараланиб қўя қолишармикин? Хуллас, бу – Клайд учун умрбод қамоқ жазоси билан тугаши мумкин, холос, лекин ундан кам бўлмайди, деб ўзаро пиҷир-пиҷир сўйлаша бошладилар.

Клайд эса ҳуштаквозлик ва қарғиш садолари остида суд залидан чиқиб келар экан, эртага гувоҳ сифатида гапиришимга, гарчи ўзлари бунга ан-чадан бери, ҳар томонлама тайёрланган бўлсалар ҳам, журъатим етармикин, деб ўзидан ўзи сўрар

эди... Яна у (турмадан олиб чиқишида ва қайта олиб кетишида унинг қўлига кишин солишимасди): иложи йўқмикин-а, эртага кечқурун ҳамма ўрнидан туриб, оломон қўзгалган пайтда, унга ҳеч ким қарамай турганда, соқчилар унга томон келишаётганда... иложи йўқмикин-а... – деб ўйлар эди, лоақал чопиб кетолса ёки йўқ, бемалол, хотиржам бир тарзда, лекин тез-тез ва гўё ўзи билмагандай анави зинага яқинлашса, кейин пастга... қаёқдан чиқса ҳам майли эди... илгари у турма деразасидан кўрган ҳу анави катта зина олдидаги кичкинагина ён эшикками? У ақалли бирор-бир ўрмонга етиб олса – бўлди эди, кейин кетаверарди... кетаверарди... кетаверарди... ёки тўғридан-тўғри қочиб қоларди, ҳеч ерда тўхтамай, очиққанига ҳам қарамай, туну кун чарчамай... бирор-бир манзилга етгунча кетаверарди. Бир уриниб кўрса бўлади, албатта... Уни отиб ташлашлари, изидан итларни қўйиб юборишлари, одамларни чоптиришлари мумкин, лекин шунда ҳам таваккалига қочишига уриниб кўрса бўлар, шундай эмасми?

Чунки бу ерда унинг кутулишидан умиди йўқ. Суддаги шунчча борди-кељидан кейин унинг бегуноҳлигига ҳеч ким, ҳеч бир жойда ўлса ҳам ишонмайди. Клайд эса ит ҳасратда ўлиб кетаверишни истамайди. Йўқ, йўқ, бунақанги ўлимдан асрасин уни!

Мана, яна бир машаққатли, зим-зиё, азобли тун бошланди.

Унинг кетидан эса яна бир машаққатли, нурсиз ва совуқ тонг отади.

### **XIII БОБ**

Эртаси эрталаб соат саккизларда ҳамма йирик газеталарнинг кўзга ташланиб турувчи сарлавҳалири энг аниқ ва тушунарли иборалар билан барчани ва ҳар бир фуқарони қўйидагилардан воқиф этди:

«ГРИФИТС ИШИ ЮЗАСИДАН ҚҮЙИЛГАН АЙБНОМА  
ОДАМНИ ЛАРЗАГА СОЛУВЧИ СОН-САНОҚСИЗ  
ДАЛИЛЛАР БИЛАН ЯКУНЛАНДИ.  
ҚОТИЛЛИК САБАБЛАРИ ВА У ҚАНДАЙ АМАЛГА  
ОШИРИЛГАНИ РАД ҚИЛИБ БҮЛМАС ДАРАЖАДА  
ИСБОТЛАНДИ. ЮЗ ВА БОШИДАГИ ЖИДДИЙ  
ЖАРОХАТ ИЗЛАРИ ФОТОГРАФИЯ АППАРАТИ  
ҚИРРАЛАРИ БИЛАН ТЕНГ БҮЛИБ ЧИҚДИ.  
ҮЛДИРИЛГАН ҚИЗНИНГ ОНАСИ, ҚИЗИ ЁЗГАН  
ФОЖЕЙХ ХАТЛАР ЎҚИБ ТУГАТИЛГАНДА  
ХУШИНИ ЙҮҚОТДИ».

Мейсон тузган айбноманинг темирдек мустаҳкам мантиғи, худди шу каби унинг одамни ларзага со-лувчи чинакам ҳаяжонли нутқи ўша ондаёқ Белнеп билан Жефсонни, биринчи галда эса Клайдни шунга мажбур этдики, улар ўзларининг дабдала бўлганла-ри ва ҳеч бир ҳийла-найрангли уйдирмалар билан энди Клайднинг ўтакетган ёвузлигига ишониб бўл-ган суд маслаҳатчиларини бошқа бирор фикрга кўн-диролмасликларини аниқ тушуниб етдилар.

Ҳамма Мейсоннинг айбномани гоят моҳирона олиб боргани билан табриклади. Клайд эса кейинги кунларда юз берган барча воқеаларни энди онам ҳам ўқийди, деган фикрдан обдан адойи тамом бў-либ, маъюсланиб қолди. Жефсондан албатта илти-мос қилиш керак, у онамга телеграмма юбориб, бу гапларга ишониб ўтирмаслигини – ўзи ҳам, Фрэнк ҳам, Жулия ҳам, Эста ҳам ишониб ўтирмаслигини айтсин. Албатта, бугун буни Сондра ҳам ўқийди, аммо шунча кундан бери, шунча зим-зиё тунлар-дан бери ундан бир чурқ этган овоз ҳам чиқмади! Онда-сонда газеталарда «мисс X» деб ёзишга-ни кўзга чалиниб қолади-ю, бироқ у ҳақда мундай бир тузукроқ маълумот ҳам берилмайди. Бадавлат оиланинг қудрати ана, нималарга қодир экан! Бу-

гун эса ҳимоя томонининг навбати ва у қўлидан озми-қўпми иш келадиган ягона гувоҳ сифатида ўзини ҳимоя қилиб чиқишига мажбур. У ўзи бу ишни уddyалай олармикинман, деб савол берарди... Оломон-чи?.. Унинг дарғазаб кайфияти-чи?.. Оломоннинг шубҳаси ва нафрати асабларни қақшатишини айтмайсизми? Белнеп гапини тутатиши билан, ўша заҳоти Мейсон бошлайди. Белнеп билан Жефсонга яхши! Улар Клайднинг бошига ҳали албатта тушадиган азоб-уқубатлардан холи.

У шу азоб-уқубатларни кутиб, ўз камерасида Белнеп ва Жефсон ҳамроҳлигида бир соатча ўтириди-да, кейин уни суд залига олиб кетишиди, у яна суд маслаҳатчиларининг тасвирлаб бўлмас даражадаги синчков назарлари ҳамда йигилганларнинг одамни алам қилдирувчи томошаси остида қолди. Мана, Белнеп ўрнидан туриб, суд маслаҳатчиларига тантанавор бир қараб қўйди-ю, гапини бошлади:

– Жентельменлар! Бундан сал кам тўрт ҳафта бурун прокурор, ўзи йиққан ашёвий далилларга асосланиб туриб, сиз, мистер маслаҳатчилар, судланувчини ҳозир бўйнига қўйилаётган жиноятни қилганликда айбдор, деб топишларингизни талаб этажагини айтиб ўтган эди. Шундан кейин орада узундан-узоқ, толиқтираси расм-руслар ҳам бўлиб ўтди. Ўн беш-үн олти ёшли боланинг енгилтакларча ва бемаъни, лекин айни пайтда ўйламай ва бехосдан қилган ишлари бу ерда сизларга, жентельменлар, бамисоли ашаддий жиноятчининг хатти-ҳаракатидай бўрттириб кўрсатилди, аниғини айтганда айбланувчига нисбатан сизларни гижгижлаш мақсадидагина шундай қилинди. Лекин шу билан бирга Канзас-Ситида юз берган ва нотўғри баҳолангандан фақат биргина баҳтсиз ҳодисадан ташқари (бутун юридик фаолиятим даврида ҳақиқатни бу қадар дағал ва ваҳшиёна бузиб

изоҳдашларига бошқа бирон марта ҳам дуч келмаган эдим), дадил айтиш мумкинки, айланувчанинг ҳаёти ҳам худди шу ёшдаги бошқа болаларнинг ҳаёти каби покиза, серташвиш, бенуқсон ва бегуноҳ ўтган. Уни эркак киши – соқол-мўйловли росмана эркак киши, ёвуз, бутун фикру ҳаёли жинояткорона фисқу фасодлар билан тўлиб-тошган дўзахий малъун даражасига кўтариб қўйишгандарини эшитдингизлар. Ахир, у эндиғина йигрма бир ёшга тўлган-ку. Мана, у рўпараларингизда ўтирибди. Шундай дейишга журъят этаманки, мабодо мен ўз ҳимоям остидаги мана шу гумроҳ йигитча тўғрисида туғилган сон-саноқсиз машъум фикрлар ва туйғулар оқибатида кўзингизда пайдо бўлган хира пардани сўзнинг сеҳрли кучи билан олиб ташлай билганимда эди ва мен (бундай қилиш мумкин эмас, деб мени агар огоҳдантиришмагандан эди) қораловчи томоннинг алоҳида мақсадларни кўзда тутганини айта олганимда эди, унда сизлар айланувчига бундан буён мутлақо бошқача муносабатда қарап эдингизлар, ҳозирги фикрларингиз эса бамисоли ўринларингиздан туриб, ўзларингизни мана бу деразалардан пастга отганингиздай номувофиқ туюлган бўлур эди.

«Маслаҳатчи мистерлар, аввалдан обдан пишишиб танланган ва баъзан худди заҳарга булғаниб олингандай туюлган гувоҳликлар бўрони қаршисида ҳам, мен, менинг ҳамкасбим ва бизнинг ҳимоямиз остидаги гувоҳ шу қадар хотиржам туриб, ўзимизни яхши тутганимиз прокурор ва залда ўтирган бошқа кишилар сингари сизларни ҳам, шубҳасиз, ҳайрон қолдирган бўлса керак. (У иззатталаблик ва сертакаллуфлик билан ўзининг гапириш навбатини кутиб ўтирган шеригига ишора қилди.) Аммо ўзларингиз ҳам кўрдингизлар, биз зўрма-зўраки эмас, чинакамига руҳан хотиржам ўтиридик; бу – ўз ишининг

ҳақди ва адолатли эканлигини қонун қаршисида ҳар қандай баҳс чоғида ҳам исботлай олишини ҳис қиласидиган ва биладиган кишиларнинг хотиржамлигидир. Эвонлик шоир<sup>1</sup>нинг: «Ҳақиқат йўлида баҳслашаётган одам уч бора кучлидир», деган сўзлари, шубҳасиз, эсларингиздадир.

«Қиз бечоранинг фоят мусибатли, фожеий ҳалокатига олиб келган барча гаройиб ва тасодифий шарт-шароитлар бизга маълум, афсуски, бу қораловчи томонга маълум эмас экан. Ҳали буни сизлар ўзларингиз эшитасизлар, холисона фикрларингизни ҳам билдирасизлар. Ҳозирча эса сизларга тубандагиларни айтишимга ижозат бергайсизлар: иш бошланган дастлабки пайтданоқ, бу ачинарли фожиани ойдинлаштиromoқчи бўлганимиз – бизнинг хизматимизни бир четта суриб қўйган тақдиримизда ҳам, бу одамнинг бунчалик ёвуз ва ваҳшиёна жиноят қилган-қилмаганлигига, сиз, мистерлар, унчалик ишонмассизлар, деб ўйлаган эдим. Сизлар бунга ишонишларингиз мумкин эмас! Чунки муҳаббат савдоси қийин савдодир, муҳаббатнинг эҳтиросли ва ҳалокатли сўқмоқдарини, гап эркак киши устидами ёки аёл киши устида борадими, бунинг фарқи йўқ, одатдаги жиноят сўқмоқларидир, деб қарааш нотўғри бўлур эди. Эсланглар, ахир, ҳар биримиз ҳам бир вактлар навжувон эдик. Бу ерда ўтирган барча аёллар ҳам бўйи етган қизлар эдилар, ёшлик ҳаяжонлари ва азоблари эс кирганда пайдо бўладиган ҳаёттий ишбилиармонликка қанчалар ётлигини улар билишади, эҳ, шундай билишадики! «Бирорвга чоҳ қазимайлик – ўзимиз тушамиз, нима эксан – ўшани ўрамиз».

«Биз сирли мисс Х нинг борлигини тан оламиз; унинг мактублари (биз бу ерда уларни кўрсатолмаймиз), унинг латофати ва муҳаббати айбланувчи-

<sup>1</sup> Эвон дарёси бўйидаги Стратфордда туғилган Вильям Шекспирни шундай деб аташади.

нинг ақду ҳүшини олиб қўйган. Биз унинг мисс Х га нисбатан бўлган севгисига тан берамиз. Айбланувчи ҳийла ва беодоблик йўли билан, бу даражада аянчли ҳалок бўлган ўша гўзал зотни эзгулик йўлидан чалғитган, деб таҳмин қилишяпти, лекин биз бу мутлақо фавқулодда юз берганлигини исботлаб берамиз. Гувоҳларимиз ёрдамида, шунингдек, бу ерда сизлар эшитган айрим гувоҳликларни таҳдил этиш йўли билан биз айбланувчининг хатти-ҳаракатлари, ҳар ҳолда ўзи севган қизи – ҳаётга ниҳоятда тор қарайдиган, одатдаги жиҳдий ахлок-одоб доираларига кўмилиб қолган одамлар орасидалигини кўра-била турган бошқа ҳар қандай йигитчанинг хатти-ҳаракатларидан кўра айёрроқ ёки ахлоқсизроқ бўлмаганлигини исботлашга ҳаракат қиласиз. Мистерлар, прокурорнинг ўзи ҳам айтганидек, Роберта Олден Клайд Грифитсни севар эди. Кейинчалик фожиага айланган бу алоқанинг дастлабки кунларидан бошлабоқ марҳума қиз уни бор вужуди билан, чин юрагида севар эди, Клайд ҳам уни ўша пайтда худди шундай ҳарорат билан севадиганга ўхшаб туюлар эди. Бир-бирини чуқур ва чинакам севиб қолган одамларга эса бошқаларнинг гапи чўт эмас. Улар бир-бирларини севадилар – шунинг ўзи бас!

«Аммо, жентельменлар, биз сизларга айтмоқчи бўлган изоҳ бу эмас, шу боисдан бу ҳақда мен узоқ вақт тўхталиб ўтирмайман. Хўш, Клайд Грифитс, умуман, нима учун Фондага ёки Утикага, Ўтлоқзор кўлига ёки Катта мушгир кўлига борди? Унинг ўша ёқقا боргани, бунинг устига яна Роберта Олден билан бирга борганини рад этишга ёки қандайдир яшириб кетишга бизда бирор-бир сабаб ёки хоҳиш бор, деб ўйлайсизларми? Ёки мисс Олденнинг тўсатдан юз берган, ҳарқалай, жуда ғалати ва сирли ўлимидан сўнг унинг бирдан қочиб қолганини бер-

китишга бирор-бир важимиз борми? Агар сизлар ҳатто дақиқанинг юздан бир қисмига тенг вақт ичида ҳам, шундай бўлган эди, деб ўйласанглар, демак, унда мен бунақанги боплаб алданган ва йўлдан адаштирилган ўн икки суд маслаҳатчиси олдида гапириш шарафига ўзимнинг бутун йигрма етти йиллик иш фаолиятим даврида сираям эришмаган бўлиб чиқаман».

«Жентельменлар, мен сизларга Клайд Грифитс айборд эмас, деб айтдим, бу ҳаққоний гап. Эҳтимол, сизлар гўё биз ҳам кўнглимизда унинг айбордлигига ишонишимиз тўғрисида ўйлаётгандирсизлар. Лекин сизлар янгишасизлар. Ҳаётда шунақанги қизиқ, ҳайратомиз ишлар юз берадики, кўпинча мутлақо бегуноҳ одамлар ҳам айбиз айборд бўлиб қолаверадилар, яна бунинг устига бошдан-охир барча воқеалар гўё унинг айбини тасдиқлаётгандай кўринаверади. Суд фақат эгри далилларга асосланиб, нотўғри ҳукм чиқарган жуда кўп фожеий ва даҳшатли ҳодисалар ҳам маълум. Эҳтиёт бўлинглар, ниҳоятда эҳтиёт бўлинглар! Инсон хулқига оид бирор-бир назарияга ёки гирт маҳаллий, диний ёки ахлоқий тартибларга асосланган ҳар қандай хато фикрлар ҳам, кўринишидан гўё сира рад этиб бўлмас даражадаги далилларга асосланган фикрлар ҳам сизларни чалғитиб қўймаслиги керак! Эҳтиёт бўлинглар, энг соғ ва олимистер ниятлар тақозоси билан иш кўра туриб, беихтиёр равищда бу ердан жиноят ёки жиноий ниятни топиб қолманглар тағин, ваҳоланки, аслида айланувчининг фикру хаёлида ҳам ва хатти-ҳаракатида ҳам ҳеч қандай жиноят, ҳеч қандай жиноий ниятнинг ҳатто уруғи ҳам йўқ эди. Эҳ, эҳтиёт бўлинглар! Ниҳоятда, ниҳоятда эҳтиёт бўлинглар!»

Шу ерда у жим бўлиб қолди, бамисоли чуқур ва ҳатто аламли ўйларга шўнгигб кетгандай эди, Клайд эса бу моҳирона, дадил нутқдан далда олгани учун

бир оз рухи тетиклашди. Ана, Белнеп яна гап бошлиди, шу қадар жасорат бахш этувчи бу нутқнинг бир сўзини ҳам қолдирмай тинглаш керак.

– Роберта Олденнинг жасади Катта мушгир кўли тувидан чиқариб олиниши биланоқ, жентельменлар, ўша заҳоти уни бир врач кўрикдан ўтказган. У қизнинг чўкиб ўлганини тан олади. У бу ерда чиқиб, гувоҳдик ҳам беради. Бу нарса масалани айбланувчи фойдасига ҳал қиляпти, сизлар буни эътиборга олишларингиз лозим.

«Сизларга прокурор, Роберта Олден билан Клайд Грифитс унаштирилган эдилар, шу сабабли мисс Олден Клайд билан бирга никоҳ сайрига жўнаш учун олтинчи июлда Бильцдаги отасининг уйидан чиқиб кетган эди, деб айтди. Лекин, жентельменлар, очигини айтганда, бу муайян шарт-шароитларни хийла бузиб кўрсатиш, деган сўз. «Унаштирилган эдилар» – уларнинг олтинчи июлда жўнаб кетганларининг сабабини прокурор ана шундай таърифлади. Аслида эса Клайд Грифитснинг Роберта Олден билан қачонлардир расмий равишда ростдан ҳам унаштирилгани ҳеч қандай далил билан мутлақо исбот этилмади, мутлақо, мисс Олден хатларидаги бир неча сатрларни ҳисобга олмаганда, у Робертага уйланишга ҳеч қачон кўнмаган. Ушбу сатрлардан шу нарса маълум бўладики, жентельменлар, Клайд фақат мисс Олденнинг аҳволи тақозо этган маънавий ва моддий нуқтаи назар тазиикى остидагина унга уйланишга рози бўлган, Робертанинг бу аҳволига Клайд ҳам жавобгар эди, албатта, лекин шунга қарамай, бу аҳвол иккаловининг – йигирма бир ёшли йигитчя билан йигирма уч ёшли қизнинг хоҳиши туфайлигинага юзага келиб чиққан эди. Энди мен сизлардан сўрамоқчиман: наҳотки, шу нарса ҳақиқий ва очиқ унаштирув бўлса? Наҳотки, сизлар шу сўзларни мана шундай

маънода қабул қиласангизлар? Тушунинглар, мен бебаҳт марҳума қизни қалака қилаётганим, камситаётганим, ё шаънига доф тушираётганим йўқ, асло. Мен шунчаки, ҳақиқатни олиб қараганда, марҳума билан бу йигитча қонуний жиҳатдан ҳам, урф-одат нуқтаи назаридан ҳам расмий тарзда унаштирилмаган эди, демоқчиман. Мен сенга уйланаман, деб у олдиндан унга ваъда бермаган... Ҳеч қачон ваъда бермаган! Бунга ҳеч қандай далил ҳам йўқ. Бу нарсалар айбланувчи фойдасига бўлаётганини сизлар эътироф этишларингиз зарур. Фақат Робертанинг аҳволи оғирлиги учунгина, Клайднинг зиммасида бунинг жавобгарлиги борлигини биз тан оламиз, агарда... агарда... (Белнеп салмоқланиб, ургу бериб гапирди) Роберта уни тинч қўймаган экан, бу нарса унинг шу ерда ўқилган хатларидан ҳам маълум бўлди, айбланувчи ўзининг Ликургда фош этилиши ва гап-сўзга қолишидан қўрқиб, охири рози бўлган, мана шу розилиги эса прокурор тилида унаштирувга айланиб кетган, ваҳоланки, бунақанги муқаддас бурчдан фақат малъун, ўғри ва қотил одамгина тониб кетиши мумкин. Аммо жентельменлар, қонун ва дин нуқтаи назаридан анчагина тўғри ва анчагина муқаддас ҳисобланган бурчлар ҳам бу дунёда неча марталаб бузилган. Буни минг-минглаб эркаклар ва минг-минглаб аёллар ўз бошларидан кечирганлар: уларнинг туйгулари ўзгарган, қасамлари, ваъдалари ва онтлари эсдан чиққан ёки ҳақоратланган, кўплари эса ўз кулфат-азобларини дилларининг чуқур хилватхоналарига яширганлар ёки ҳатто жон-жон деб ўлимга ҳам тик борганлар – ўз қўллари билан ўзларини нобуд этганлар! Прокурор айтиб ўтганидек: бу гаплар янгилик ҳам эмас ва ҳеч қачон эскирмайди ҳам. Ҳеч қачон!»

«Сизларни огоҳлантириб қўйяпман, ҳозир ихтиёрларингизга айни шунаقا воқеа тақдим этил япти: марҳума қиз ҳам айбланувчи туйғуларида юз берган ўшандай ўзгаришнинг қурбони бўлган. Бу маънавий ва ижтимоий жиҳатдан қанчалик оғир жиноят бўлишига қарамай, аммо юридик томондан жиноят ҳисобланмайди. Қизнинг ўлими билан тасодифан, мураккаб ва деярли ақлага сифатидаги бўлган бир тарзда боғланиб кетган воқеалар оқими туфайлигина Клайд Грифитс сизларнинг рўпарангизда айбланувчи сифатида ўтирибди, бунинг устига бу воқеалар ҳали қаттиқ хатоларга олиб бориши турган гап. Мен буни тўла тасдиқлашм мумкин. Чунки бунинг чин ҳақиқатлигини мен биламан. Кўрилаётган ушбу иш тугаши олдидан сизларга бу масала хусусида ҳам ҳар томонлама ва етарли даражада қониқтиарли изоҳлар берилиши керак ва бундай изоҳлар берилади ҳам».

Бироқ мана шу фикр ўз кетидан бошқа бир фикрни ҳам эргаштириб келадики, у кейинги бўладиган ҳамма нарсаларга муқаддима сифатида хизмат қиласди».

«Маслаҳатчи мистерлар! Сизлар бу ерда суд қиласди ва тақдирни сизларнинг қўлингизга топшириб қўйилган одам – кўрқоқ, ақлий ва маънавий жиҳатдан журъатсиз бир шахсадир, хоҳ инонинглар, хоҳ инонманглар, бор-йўқ гап шу, аммо у мутлақо пиҳини ёрган бағритош жиноятчи эмас. Бошига оғир иш тушганда довдираб қоладиган кўпчилик одамлар сингари у ҳам ақлий ваҳима или маънавий ваҳиманинг ғалати бир мутаносиблигининг қурбонига айланган. Бу ҳодисанинг сабабларини эса ҳализгача ҳеч ким тузукроқ бир тушунтириб беролмаган. Ҳар биримизнинг ҳам ўзимизча қўрқиб юрадиган нарсаларимиз, инсу жинсларимиз бор. Табиатнинг фақат шу томонларигина

– асло бошқа нарса эмас – Клайдни шунақанги хавфли ақволга солиб қўйди. Жентельменлар, ўз амакиси фабрикасида ўрнатилган тартиб-қоидалардан қўрқиши, ваҳимага тушиши, худди шунингдек, фабрика бошлиқдариға берган лафзини бузишдан ҳадиксираши – мана шу сабаблар уни аввалига ўз бўлимидан ишлай бошлаган хушрўйгина қизга қизиқиб қолганини, кейинроқ эса у билан танишлигини яширишга мажбур этган эди».

«Аммо бу қонун кўзи олдида мутлақо жиноят ҳисобланмайди. Сизлар ҳар бирингиз ўзингизча қандай ўйлашингиздан қатъи назар, шу айби учунгина уни судлай олмас эдингизлар. Жентельменлар, у энди мисс Олден билан илгаригидай қадрдон муносабатда бўлолмаслигига кўзи етгач, айни ўша ақдий ва маънавий қўрқоқлиги – унинг тўғри Робертага бориб, бундан бу ёғига алоқамизни узамиз, уйланишимни-ку, ҳаёлингга ҳам келтирма, деб очиқ-ойдин айтишига йўл бермаган. Лекин бир одам ваҳимага қул бўлиб ўтирганда, сизлар унинг устидан қандай қилиб ҳукм чиқарасизлар, ахир? Хуллас, очиғини айтиганда, эркак киши, масалан, бир аёлни ўлгудек жини ёқтирумаса-да (ёки аёл киши эркакни ёқтирумаса), бирга туришлари бамисоли дўзахдай азобли бўлса, айтинглар-чи, ўша одам нима қилиши керак, ахир? Ўшанга уйланиши керакми? Нима учун? Бир-бирларини бир умр ёқтирумай, бир-бирларидан нафратланиб ва бир-бирларини азоблаб юришлари учунми? Мана шуни оқилона ҳаракат, оқилона одат ёки қонун деб эътироф этишингизни чин юракдан тасдиқлай оласизларми? Бироқ ҳимоя томонининг нуқтаи назарича, айбланувчи оқиллик билан иш тутишга уриниб кўрган ва мана шундай шароитда ҳам, асосан, вижданига қулоқ солган. У, албатта, сенга уйланаман, демагану, аммо бари бир кўнг-

лидагини гапириб кўрган, лекин афсуски, таклифи ерда қолиб кетган. У айрим-айрим яшашни таклиф этган, бироқ ўз маошидан унга ёрдам бериб туришни, мисс Олденнинг эса қаердадир Ликургдан ташқаридаги жойлашишини шарт қилиб қўйган. Робертанинг кеча бу ерда ўқилган хатларида ҳам шунга ўхшашроқ гапларга ишора бор. Аммо, минг афсуски, мисс Олден ўз талабида қаттиқ турган, ҳолбуки, кўпинча қилиниши ножоиз бўлган ишларни мажбуран қилдириш фожиага олиб келади. Кеийин эса, баҳслар билан ва бир-бирини кўндиришга уринишлар билан ўтказилган узундан-узоқ Утика, Ўтлоқзор кўли ва Катта мушгир кўли сафарларини айтинг. Шуларнинг баридан бир чақалик ҳам нафчиқмаган. Лекин Кладидда шундаям уни ўлдириш ёки уни ўлар ҳолатга етказиш нияти йўқ эди, бари бир. Бундай нияти сира йўқ эди унинг! Нима учунлигини эса биз сизларга далиллаб кўрсатамиз».

«Жентельменлар, мен яна бир бор таъкидлайманки, Роберта Олден иккаласи ҳозир мен тилга олиб ўтган жойларда ҳар хил сохта номлар билан саёҳат қилиб юришига Кладид Грифитсни мажбур этган нарса унинг бирор-бир жиноий режаси ёки мақсади бўлганлиги эмас, балки унинг ақдий ва маънавий қўрқоқлиги эди, холос, худди шу қўрқоқлиги туфайли у «мистер Карл Грэхэм рафиқаси билан», «мистер Клифорд Гольден рафиқаси билан» деб ёзишга мажбур бўлган. Кладид Робертани таъқиб этиб юрганида ва ниҳоят, Роберта билан гуноҳли ва гайриқонуний алоқа қила бошлаганида, у: оғир гуноҳга ботдим ва жамоатчилик кўзи олдида жиддий хатоликка йўл қўйдим, деб қўрққан, бу эса ақдий ва маънавий қўрқоқликнинг, бўлажак оқибатлардан даҳшатга тушишнинг худди ўзгинасиdir».

«Катта мушгирда ҳам, баҳтсиз ҳодиса туфайли кўл сувлари Робертани кўмиб кетгач, яна ўша

қўрқоқлиги оқибатида у меҳмонхонага қайтиб бориб, унинг ўлимини одамларга айтишга юраги бетламаган. Ақдий ва маънавий қўрқоқлик, ақл ва қалбнинг қўрқоқлиги – юз берган нарса мана шу, бошқа ҳеч нарса эмас, у ўзининг лиурглик бадавлат қариндошларини ўйлаган, ўша қиз билан кўлга бориб, фабрика тартибини бузганини, энди бу билиниб қолса, қариндошларининг алам ва но-мусга чидолмай, дарғазаб бўлишларини ўйлаган. Бундан ташқари, бу ёқда Клайднинг умид осмонида порлаб турган энг ёрқин юлдуз – мисс Х ҳам бор эди-ку, ахир».

«Биз шуларнинг барини эътироф этамиз, у нима деб ўйлаган ва нима деб ўйлаши лозимлигини ҳам чегаралаб ўтирасликка тайёрмиз. Қораловчи томон таъкидлаганидек (буни биз ҳам эътироф этамиз), у мисс X га ниҳоятда қизиқиб қолган эди ва бамисоли ақду ҳушидан айрилган эди, мисс X ҳам унга нисбатан шундай эди. Айланувчи янгисини топганда, ўзига ғоят содиқ бўлган биринчи суюклисини ташлаб кетишга ҳам тайёр турар эди, бунга ҳатто ошиқар эди, чунки гўзаллик ва бойлик унинг кўнглини янги қизга нисбатан эритиб қўйган эди, аслида Роберта Олденнинг кўзига ҳам Клайд айни шунақа бўлиб кўринар эди. Агар Роберта Олден уни танлаб янглишган бўлса, у чиндан ҳам янглишган эди, хўш, бунинг нимаси ажабла-нарли, Клайд ҳам ўзининг енгилтак ҳавасмандлиги билан алданиб қолган бўлиши мумкин-ку ахир, хуллас, ҳали суриштириб келганда, ким билади дейсиз, эҳтимол, мисс X унинг қадрига тузукроқ етолмас ҳам... Ҳарқалай, биз ҳимоячиларга Клайднинг ўзи айтиб, тан олганига қараганда, ўша пайтда уни ҳаммадан ҳам бир фикр кўпроқ азобга солган, агар мисс X, умрида ҳатто эшитмаган бир қиз билан мен кўлга сайр этгани чиққанимни би-

либ қолса, унда... ҳа, унда мендан юз ўгириб кетса керак, деб ваҳимага тушган».

«Биламан, жентельменлар, сизнинг фикрингизча, бундай хулқ-авторни оқлаб бўлмайди. Инсон ўз қалбидаги икки хил нолойиқ туйғу ўртасидаги ўзаро курашнинг ҳам қурбонига айланиши мумкин, аммо черков ва қонун назарида эса у ё гуноҳкор ёки жиноятчи бўлиши керак. Лекин, шунга қарамай, бу беш панжадай аниқ ҳақиқат, ахир, бунақсанги туйғулар қонундан мустақил равишда, диндан мустақил равишда яшайверадилар, юракка фулу солаверадилар ва кўп ҳолларда ўз ўлжаларининг хатти-ҳаракатларини айни шу туйғулар белгилаб берадилар. Биз ҳам Клайд Грифитснинг қилмишларини ўша туйғулар белгилаган, деб эътироф этамиз.

Бироқ у Роберта Олденни ўлдирдими, ахир?

Йўқ! Яна такрорлаймизки – йўқ!

Жуда бўлмагандаги қўрқа-писа, дудмаллик билан, Робертани ўша ерга олиб бориш, хилма-хил сохта номлар остида яшириниб, кейин, агар у уни эркин қўйишга рози бўлмаса, унда чўқтириб юборишни мўлжаллаган эмасмиди? Бемаъни гап! Мумкин эмас! Ақлсизлик бу! Унинг режаси мутлақо бошқача эди.

Лекин, жентельменлар, – шу ерда Белнеп худди миясига янги, кутилмаган бир фикр келгандай тўхталиб қолди, – эҳтимол, сизларни менинг изоҳларимнинг ўзи ҳам маълум даражада қониқтирас, аммо сизлар чиқаришингиз лозим бўлган узил-кесили хуолосадан олдин эса, Роберта Олден ўлимини ўз кўзи билан кўрган якка-ю ягона гувоҳнинг сўзини тинглашларингиз лозим, у гувоҳ фақат қичқириқни эшитибгина қўя қолмаган, балки ўзи ўша ерда бўлган, унинг ўлимини кўриб, демакки, қандай жони чиққанини ҳам бошдан-охир билган...»

У Жефсонга гүё: «Ана, Рубен, ниҳоят гапимни ҳам тутатдим!» дегандай қараб қўйди. Кейин Рубен бамайлихотир бир қиёфада Клайдга ўгирилди-да – бироқ унинг бу қиёфаси остида темир иродаси ҳам сезилиб туарди – шивирлади:

– Ана энди, Клайд, бу ёғи ўзингизга боғлиқ. Аммо мен сиз билан бирга бораман, тушунарлим? Мен сизни ўзим сўроқ қилмоқчиман. Сизни мен шу дарражада авра-астар қилиб ташладимки, менимча, саволларимга ўйнаб-ўйнаб жавоб қайтарсангиз керак, тўғрими?

У қувноқлик билан, далда бергансимон жилмайиб қўйди. Белнепнинг зўр нутқи ва Жефсоннинг бу янги ҳимматидан севиниб кетган Клайд деярли бегам бир қўринишида ўрнидан турди (бундан атиги тўрт соат илгари эса унинг кайфияти бутунлай бошқача эди) ва шивирлади:

– Жуда қойил-ку! Бу ишни ўзингиз қўлга олганингиздан мамнунман. Ўйлайманки, ҳамма гапларим энди кўнгилдагидек қовушиб кетаверса керак.

Халойиқ эса бу орада, ҳозир ҳақиқий гувоҳ чиқади, яна қораловчи томон эмас, ҳимоя томони тавсия этган гувоҳ чиқади, деб бирдан фивирлаб қолди; бир хиллар ўринларидан туриб, бўйинларини чўзиб, аланг-жаланг қарай бошладилар. Суд иши номуносиб бир шароитда, одатдаги жиддият ва тантанаворлик сақланмаган ҳолда ўтаётганидан фоят даражада хафа бўлган судъя Оберуолцер эса болгачасини тиқиллатди, ўша заҳоти клерк баланд овоз билан йиғилганларни интизомга чақирди:

– Тартиб сақлансин! Тартиб сақлансин! Тезда ўтиришларингизни илтимос қиласман, акс ҳолда суд зали одамлардан холи этилади! Суд ижрочиларидан тартибга кўз-қулоқ бўлиб туришларини сўрайман!

Сўнгра бу ҳаяжонли тинчликни бузиб, Белнепнинг овози янгради:

– Клайд Грифитс, гувоҳлар учун ажратилган жойга ўтинг.

Жефсонга эргашиб келаётган Клайднинг олдинга ўтганини кўриб ҳайрон бўлиб турган ҳалойиқ судья ва суд ижрочиларининг қаттиқ жеркишларига ҳам қарамай, ҳовлиққан қўйи шивир-шивир гаплаша бошладилар. Яқинлашиб келаётган Жефсонга кўзи тушганда ҳатто Белнеп ҳам бир оз ажабланди, чунки Клайдни ўзи сўроқ қилишига аввал улар келишиб олган эдилар. Клайдни онт ичириш билан овора бўлишганда Жефсон Белнепга яқин борди-ю, шивирлаб гапирди:

– Элвин, уни менга топширинг. Менимча, шундай бўлгани тузук. У ўзини сира бемалол қўёлмай қўрқиб турибди, уни бир амалларман, бунга ишончим комил.

Ҳалойиқ ҳам адвокатларнинг алмашиниб қолганига эътибор бериб, шу ҳақда ўзаро шивирлаша бошладилар, Клайд бўлса ташвиш тўла йирик кўзларини чор-атрофга олазарак тикканча, ўйлар эди: «Мана, ниҳоят, мен – гувоҳман, ҳамма менга қарайпти, албатта. Ўзимни бутунлай хотиржам, дунёни сув босса тўпифимга чиқмайдигандай қилиб кўрсатиш им керак, чунки мен уни ўлдирганим йўқ-ку. Ахир, мен уни ўлдирмадим-ку, тўғриси ҳам шу-да». Бироқ шунга қарамай, унинг ранги бўзариб, қовоқлари қизариб, шишиб кетган эди, қўллари эса, ўзи шунча тиришса ҳам, сезилар-сезилмас титраб турарди. Ана, Жефсоннинг баланд, бақувват ва новдадай келишган гавдаси у томонга ўгирилди-да, мовий кўзлари тўппа-тўғри Клайднинг қўй кўзларига синчиклаб тикилиб қолди ва алвокат гапини бошлади:

– Хўш, Клайд, аввало шунга келишиб олайликки, суд маслаҳатчилари ва залдаги барча кишилар менинг саволларим ва сизнинг жавобларингизни

аниқ әшитсиналар. Энди эса бир оз ўйлаб олинг-да, ўз ҳәётингизда «нималарни эсласангиз, ҳаммасини бизга шошилмасдан гапириб беринг: қаердансыз, қаерда туғилгансиз, отангиз ва онангизнинг касби нима ва ниҳоят, сиз ўз меҳнатингиз эвазига яшай бошлаганингиздан бери то ҳозирги вақтгача нима билан шуғуллангансиз. Эҳтимол, мен аҳён-аҳёнда баъзи бир саволларни ташлаб, сўзингизни бўлиб турарман, бироқ, асосан, ҳаммасини ўзингизга қўйиб бераман, чунки буни сиз ҳар қандай кишидан ҳам тузукроқ адо этишингизни яхши биламан.

Лекин Клайд хотиржам бўлиши керак эди, доимо ёнида турган ҳимоячи – бесабр, бетоқат, шубҳа ва душманлик назари билан қарайдиган халойик билан ўзи ўртасидаги бамисоли бир девор, қалъа эканлигини ҳис этиб туриши керак эди, шунинг учун ҳам Жефсон деярли тегиб кетар даражада унга яқинлашди, ҳатто шунчалик яқин бордики, истаса, у гувоҳ минбари зинасига оёғини ҳам қўйиши ёки Клайд томонга энгашиб, у ўтирган кресло суянчигига оғирлигини солиши ҳам мумкин эди. У нуқул: «Ҳа-ҳа-а... Хў-ўш... Кейин нима бўлди?.. Ундан кейин-чи?» деб такрорлар эди. Унинг дадил, файратлантирувчи, дўстона овози Клайдга сўзсиз, куч-қувват бағишлагани учун ҳам у ўзининг қисқагина умр достонини тутилмасдан, кесиб-кесиб, ча-лакам-чатти қилмай тузуккина гапириб берди.

– Мен Мичиган штатидаги Грэнд-Репидсда туғилганман. Ўша пайтда менинг ота-онам шаҳардаги диний хонақони бошқарар ва кўчаларда ваъзхонлик қилиб юрар эдилар...

## XXIV БОБ

Клайд ўз жавобида оиласининг Иллинойс штатидаги Куинсидан (ота-онаси бир вақтлар ўша ерда «Нажот Армияси»да хизмат қилган эдилар)

Канзас-Ситига кўчиб ўтгани ва ўн икки ёшдан бошлаб то ўн бешга киргунича қандай бўлмасин бирор-бир иш топишга уриниб юрган пайтларини гапириб берди, чунки мактабда ўқиб туриб, айни вақтда ота-онаси истаган художўлик ишларида қатнашиш унга анча малол келар эди.

- Мактабда тузук ўқирдингизми?
- Йўқ, сэр. Биз кўпинча у ёқдан-бу ёққа кўчиб юрардик.
- Ўн икки ёшдалигингида қайси синфда ўқир эдингиз?
- Биласизми, аслида еттинчига ўтишим керак эди, лекин мен олтинчига эдим. Шу сабабдан мактабни ёмон кўрардим.
- Ота-онангизнинг диний фаолиятига қандай қарапдингиз?
- Нима бўлибди, бу ёмон иш эмас... аммо кечалари кўчада хутба айтишни жиним ёқтирумасди.

Кейинги юз берган ишларни ҳам у худди шу тарзда гапириб бера бошлиди: то Канзас-Ситидаги ҳашаматли меҳмонхона – «Грин-Дэвидсон»га дастёр бўлиб киргунигача орада арzon-гаров ҳақ тўлайдиган дўконда сотувчи бўлиб ишлагани борми, содали сув сотиб, газета ташиб юрганлари борми – ҳаммасини сўйлаб берди.

- Биласизми, нима... – деди Жефсон. (У, Мейсоннинг Клайдга гувоҳ сифатида ишончсизлик туғдирмоқ ниятида Канзас-Ситидаги пачоқ бўлган автомобиль ва ўлган қизчага боғлиқ гапларни ҳадеб кавлаштириб, Клайд берган гувоҳдикнинг таъсирини пасайтириб юборишидан қўрқиб, рақибини доғда қолдирмоқчи бўлди. Чиндан ҳам агар савол-жавоб тўғри олиб борилса, бу воқеаларнинг бари ҳарқалай изоҳлаб берилиши ва юмшатилиши мумкин албатта, мабодо Мейсонга эрк берилса-чи, у сўзсиз, йўқ нарсадан пуфлаб, катта ваҳима чиқа-

риши турган гап эди.) Шу боисдан Жефсон сўзида давом этди:

- Сиз у ерда қанча вақт хизмат қилгансиз?
- Бир йилдан сал кўпроқ.
- Хўш, у ердан нега кетгансиз?
- Биласизми, орада бир баҳтсизлик рўй берган эди...
- Қандай баҳтсизлик?

Клайд аввалдан тайёр тургани ва айтадиган гапини сув қилиб ёдлаб олгани учун ҳаммасини, ҳатто қизчанинг ўлими-ю, ўзининг қочиб кетганиларигача қўшиб, ипидан-игнасигача сўзлаб берди, ваҳоланки, буларнинг барини Мейсоннинг ўзи суриштириб билмоқчи бўлиб юрган эди, албатта. Шу сабабдан энди Клайднинг сўзларини тинглаётганида фақат бошини қимирлатганча киноя аралаш:

- Ҳа, тузук, ўзи тан оляпти... ёмон эмас! – деб жаврашгагина кучи етди, холос.

Жефсон эса бўлаётган воқеаларнинг бутун аҳамиятини тушунгани ҳолда (у мистер Мейсон қўлидаги энг кучли қуроллардан бирини ишдан чиқарганга ўхшар эди чамаси!) давом этди:

- Яна қайтаринг, ўша пайтда неча ёшда эдингиз?  
 - Ўн саккизга қадам қўйган эдим.  
 - Демак, сиз айтмоқчисизки, – давом этди Жефсон, ўша ҳодисага оид ўйлаб топган барча саволларини бериб тутатгач, – уйга қайтиб боришингиз мумкинлигини билмагансиз, чунки машинани ахир, сиз олмагансиз-ку, очиғини айтиб берганингизда ота-онангиз сизга кафил бўлишларини ҳам билмагансиз?

- Эътиroz билдираман! – дея шовқин солди Мейсон. – Канзас-Ситига қайтиб бориши ва отонаси унга кафил бўлиши мумкинлигига ҳеч қандай исбот йўқ.

- Эътиroz қабул қилинди! – деди судья овози дўриллаб, баланд курсисидан туриб. – Савол-жа-

воб пайтида ҳимоя томони масалага яқинроқ бўлишини сўрайман.

– Саволни қайтариб оламан, – деди Белнеп ўтирган жойидан туриб.

Клайд эса бари бир:

– Йўқ, сэр, мен буни билмаган эдим, – деб жавоб қай тарди.

– Ҳарқалай, айни шу нарса сабаб бўлиб, Канзас-Ситидан кетганингиздан сўнг ўзингизни Тенет деб атай бошлагансиз, менга шундай дедингиз, тўғрими? – давом этди Жефсон.

– Ҳа, сэр.

– Айтгандай, Клайд, Тенет деган фамилия қаёқдан эсингизга келди?

– Куинсида мен билан бирга ўйнаб юрадиган бир боланинг фамилияси.

– Ўша бола яхши бола эдими?

– Эътиroz билдираман! – деди Мейсон ўтирган жойида шовқин солиб. – Нотўғри, аҳамиятсиз гаплар, ишга алоқаси «йўқ».

– Сиз суд маслаҳатчиларининг миясига қўймоқчи бўлган барча гапларга қарама-қарши ўла-роқ, у, яхши болалар билан дўстлашган бўлиши мумкин, шу жиҳатдан олиб қараганда, мен берган савол айни ишга алоқадор савол, – дея таъкидлади Жефсон мугомбirona бир тарзда.

– Эътиroz қабул қилинди! – деди дўриллаб судья Обер уолцер.

– Тенет номини олганингиз унга ёқмаслиги ва сиз яшириниб юришга мажбур бўлганингиз сабабли, бу унга зиён етказиши ҳақида ўша пайтда бош қотириб кўрмаганмисиз?

– Йўқ, сэр... мен Тенетлар жуда кўп бўлса керак, деб ўйлаган эдим...

Бу гапга тингловчилар мурувват билан жилмайиб қўйишлари ҳам мумкин эди-ю, лекин халқ

Клайдга нисбатан шу қадар душманлик кайфиятида, шу қадар дарғазаб муносабатда эдики, бу пайтда бунақанги енгил-елпиликни хаёлга келтириш ҳам қийин эди.

Жефсон оломоннинг кўнглини юмшатолмаганини сезди-ю:

– Кулоқ солинг, Клайд, – дея давом этди, – сиз онангизни яхши қўргансиз, шундай эмасми?

Яна эътиroz, ғиди-биди бошланди, охири бориб Жефсон берган савол ўринли ва қонуний деб топилди.

– Ҳа, сэр, яхши кўрардим, албатта, – деди Клайд жавоб қайтариб, аммо ўртада хиёлгина иккиланиб қўйди, буни ўтирганлар ҳам сезишди: нимадир томоғига тиқилиб, кўкраги бир кўтарилди-да, оғир хўрсинганида яна пастга тушди.

– Жудаямми?

– Ҳа, сэр... жудаям.

Энди у кўзларини кўтаролмай қолди.

– Онангиз қўлидан нима келса ва нимани тўғри деб ҳисоблаган бўлса, сиз учун ҳаммасини қилган, шундайми?

– Шундай, сэр.

– Хўш, унда қочиб кетганингиз ва шунча вақт она меҳридан узоқда бўлганингиздан бир оз бўлса-да афсусланиб, азоб чекдингизми? Унда нима учун сиз ўзингизнинг, бир хиллар айтгандек, у қадар гуноҳкор эмаслигингиз тўғрисида бир оғизгина айтиб ҳам қўймагансиз, яна ишлаётганингиз ва одобли йигитлардек юришга ҳаракат қилаётганингизни айтиб хабарлардан ташвиш тортманг, деб қўйсангиз бўлмасмиди?

– Мен ойимга ёзганман буларни, лекин тагида ўз номимни қўймасдан ёзганман.

– Тушунарли. Яна у-бу муносабат билан ўзингизни эслатиб турганмисиз?

– Ҳа, сэр. Бир марта озгина пул жўнатган эдим. Ўн доллар.

– Демак, сиз уйингизга қайтишни мутлақо ўй-ламагансиз?

– Йўқ, сэр. Қайтиб борсам, мени қамаб қўйишади, деб қўрқсанман.

– Бошқача қилиб айтганда, – Жефсон ўз сўзларини маънодор қилиб, кесиб-кесиб гапира бошлиди, – ҳамкасбим мистер Белнеп айтганидек, сиз ақлий ва маънавий қўрқоқ одам бўлгансиз.

– Мен айборнинг сўзларини суд маслаҳатчилигига сингдириш йўлида қилинаётган уринишларга қарши эътиroz билдираман! – дея гапни бўлди Мейсон.

– Очифини айтганда, айборнинг сўзларини бирвларга сингдириб ўтиришга ҳам ҳожат йўқ. Унинг сўзлари оддийгина ва тўғри, ҳамма тушунниб турибди, – деди Жефсон бидиллаб.

– Эътиroz қабул қилинди! – дея эълон қилди судья. – Давом этинг, давом этинг.

– Демак, Клайд, тушунишимча, сиз маънавий ва ақлий жиҳатдан қўрқоқ бўлганингиз учун ҳам шундай воқеа юз берган. Аммо мен бу масалада сизни зинҳор айблай олмайман, айбингиз йўқ бўлса, қандай қилиб сизни айбор дейман (сирасини айтганда, ахир сиз ўзингизни ўзингиз яратмаганлиз-ку, тўғрими?).

Бироқ Жефсон хийла ҳаддидан ошиб кетгани учун уни судья тартибга чақириб, эндиgi сўзларингизни ўйлаброқ гапиринг, деб огоҳлантирди. Жефсон давом этди:

– Демак, сиз аслида Канзас-Ситига, аввалги хизматингизга қайтиб боришингиз мумкин бўлгани ҳолда, у ёқдан-бу ёққа – ҳали Олтонга, Пеория, Блюмингтон, Милуоки, Чикаголарга ўтиб, чет-четдаги тор кулбаларда кун кечиргансиз, идиш товоқ ювиб, содали сув сотиб, ташкачилик қилиб, Тенет номи остида яшириниб юравергансиз?

— Эътиroz билдираман! Эътиroz билдираман!  
— деди Мейсон жазаваси тутиб. — Илгариги жойи-  
га қайтиб бориб, ишга кира олишига ҳеч қандай  
исбот йўқ.

Гарчи бу пайтда Жефсоннинг чўнтағида Клайд хизмат қилган вақтда «Грин-Дэвидсон» меҳмонхонаси дастёrlарининг бошлиғи вазифасида ишлаган Френсис Кс. Скуайрснинг хати турган бўлса-да ва бу хатда Скуайрс, бироннинг автомобилида сайрга боргандаридағи ўша ҳодисадан ташқари, Клайдда бошқа ҳеч қандай номаъқулчилик сезмагани: қайтага у оёқ-қўли енгилгина, ҳалол, одобли, чаққон ва хушмуомала йигит бўлганлигини ёзганига қарамай... Мистер Скуайрс шунга қаттиқ амин эканки, ўша баҳтсиз ҳодиса юз берган вақтда ҳам Клайд, ҳойнаҳой, унинг энг нофаол иштирокчиларидан бири бўлган ва агар у қайтиб келиб, рўй берган воқеани тузукроқ гапирганида уни меҳмонхонада олиб қолишлари ҳам мумкин эди, деб ёзган бўлса-да, судья Оберуолцер: — Эътиroz қабул қилинди! — деб ҳукм чиқарди. Хуллас, бу далилларни ҳам — ишга алоқаси йўқ, деб топишид!

Сўнгра Клайд Канзас-Ситида қўлга тушиб мушкул аҳволда қолишдан қўрқиб қочиб кетгани, икки йил давомида дуч келган жойларда дарбадар юриб, охири Чикагодан иш топгани, аввалига ташкачилик, кейин эса «Юнион-Лиг» клубида дастёrlчилик қилганлари; биринчи жойдаги ишидан турибоқ онасига хат ёзгани, сўнгра онасининг қистовига кўра амакисига хат йўлламоқчи бўлгани, шу орада уни тўсатдан клубда учратиб қолгани ва амакиси уни Ликургга келишга таклиф этгандарини гапирди. Кейин у қандай иш бошлагани, қандай қўтарилгани ва амакиваччаси ҳамда цех бошлиғи уни фабрикада жорий этилган қоида билан таништиргани ва ниҳоят, у Роберта, кейин-

чалик мисс Х билан танишиб қолгани – шуларнинг барини ипидан-игнаси гача бирма-бир ҳикоя қилди. Клайд Роберта Олденга кўнгли кетиб орқасидан юргани, унинг севгисини қозонгач эса, ўзини қанчалар баҳтили ҳис этиб, баҳтиёр ҳисоблагани, аммо орадан мисс Х чиққандан сўнг бу қизнинг мафтункор ҳусну жамоли Робертага нисбатан унинг муносабатини мутлақо ўзгартириб юборгани: у ҳамон Клайдга ёққани билан, бироқ энди илгаригидек унга уйланишни истамай қолганини ҳам оқизмай-томизмай сўйлаб берди.

Шунда Жефсон шоша-пиша орага тушди: чунки Клайднинг ўзи тан олаётган бекарорлик хусусияти савол-жавоб пайтида бирдан гапиравериш мумкин бўлмаган бир воқеа эди, шу сабабли Жефсон суд маслаҳатчиларининг диққатини чалфитишга уринди.

– Клайд, – дея гапни бўлди у, – сиз Роберта Олденни аввалига чиндан ҳам севиб қолган эдингизми?

– Ҳа, сэр.

– Унда сиз мисс Олденнинг фоят андишли, соғва художўй қиз эканлигини билишингиз ёки жуда бўлмаганда, унинг одобидан шуни дарров пайқашингиз лозим эди, шундайми?

– Ҳа, сэр, мен уни худди шундай қиз деб ҳисоблар эдим, – деди Клайд аввалдан ёдлаб олган жавобини такрорлаб.

– Унда сиз фоят умумий тарзда бўлса ҳам, икир-чикирларига берилемай, ҳаммамизни чуқур таассуфга solaётган (шу ерда Жефсон оломонга, кейин суд маслаҳатчиларига такаббурона, еб қўйгудек, совуқдан-совуқ тикилиб қўйди) воқеани, яъни, туйгуларингизнинг қандай қилиб, не сабабдан, қаерда ва қачон ўзгара бошлаганини, аввало, ўзингизга ва қолаверса, суд маслаҳатчиларига тушунтириб беролмайсизми? Модомики, дастлаб у қиз ҳақида шунчалик юксак фикрда экансиз, нега

унда орадан сал ўтмаёқ бу қадар номуносиб ишга ботиндингиз, хўш, бу қандай юз берди? Наҳотки, сиз барча эркаклар, шунингдек, барча аёллар назарида бу муносабатлар гуноҳди ва никоҳсиз бўлса кечирилмас иш эканлигини, бу жиноят эканлигини билмаган бўлсангиз?

Жефсоннинг дадил, заҳарханда пичинги нима қилишни билмай жим бўлиб қолган оломонни бесаранжом қилиб юборди, – буни сезган Мейсон билан судъя Оберуолцер хавотирга тушиб, хўмра-йиб қўйдилар. Сурбетлик, ҳаёсизлик ҳам шунчалик бўладими, тавба! Жиддий савол-жавоб баҳонаси билан нақ жамиятнинг негизига, диний ва маънавий пойdevорларга билдирамай болта урадиган фикрларга айёрларча шама қилишга у қандай журъят этяпти-я! Анавини қаранглар – адабсизларча, тошдай ҳиссиз, кибру ҳаво билан Клайднинг жавобини эшиятпти:

– Ҳа, сэр, назаримда мен буни билар эдим... албатта... лекин очигини айтсам, мен Робертани ҳеч қачон, аввал ҳам, кейин ҳам йўлдан уришга ҳаракат қилмаганман. Мен унга ошиқ бўлиб қолган эдим.

- Сиз унга ошиқ бўлиб қолган эдингизми?
- Ҳа, сэр.
- Жудаямми?
- Жудаям.
- У ҳам сизни қаттиқ севармиди?
- Ҳа, сэр.
- Биринчи кўришдан-а?
- Биринчи кўришдан.
- У бу ҳақда сизга айтганмиди?
- Ҳа, сэр.
- Мисс Олден Ньютоналарникидан кетган пайтида – бу ҳақдаги гувоҳларнинг гапини ўзингиз ҳам эшитдингиз-ку – уни кетишга сиз кўндирангизми, тури баҳоналар билан алдабми ёки қан-

дайдир бошқа асослар келтирибми, уларни издан күчіб кетиш лозим деб ишонтирғансызми?

– Йўқ, сэр. У ўз хоҳиши билан кўчган. Фақат у мендан жой топиб беришимни сўраган эди.

– Жой топиб беришингизни сўраган эдими?

– Ҳа, сэр.

– Хўш, нима учун?

– Чунки у шаҳарни унчалик яхши билмас эди ва мени, балки унга ҳаддан ташқари қиммат бўлмаган дурустроқ хонани тавсия қиласар деб ўйлаган эди.

– Кейин у ижарага олган ўша Гилпинларникидаги хонани унга сиз кўрсатдингизми?

– Йўқ, сэр. Мен унга ҳеч қандай хона кўрсатмаганман. Уни ўзи топган. (Бу – Клайднинг ёдлаб олган жавоби эди.)

– Хўш, нима учун сиз унга ёрдам бермадингиз?

– Чунки бутун кун бўйи, ҳатто тунда ҳам сира вақтим бўлмасди. Кейин мен, яхшиси, у ўз кўнглидагисини – дидига ёқсан одамлар орасидан жой топсин, бу ҳаммадан ҳам унга равшан-ку, деб ўйлаган эдим.

– Мисс Олден Гилпинларникига кўчиб ўтгунга қадар сиз у ерда ҳеч бўлганмидингиз?

– Йўқ, сэр.

– Кўчиб ўтишидан олдин унга айни қандай хонани ижарага олиш тўғрисида, яъни кириш-чиқишига қулай, четроқ ва шунга ўхшаш масалалар хусусида ораларингизда сира гап кетган эдими?

– Йўқ, сэр, мен у билан сира бу ҳақда гаплашмаганман.

– Масалан, сиз билинтирмайгина кириб, у ердан тунда ёки кундузи одамларнинг кўзига тушмай, лип этиб чиқиб кета оладиган хонани топиб ижарага ол, деб унга талаб қўйган эдингизми?

– Мутлақо. Бундан ташқари ўша уйга кириш ҳам, у ердан кўзни шамфалат қилиб кетиш ҳам жуда қийин эди.

– Нима учун?

– Чунки у турган хонанинг эшиги даҳлизга кирадиган асосий эшикнинг ёнгинасида эди, ҳамма ўша эшикдан кириб-чиқиб, бегона одам дарров кўзга ташланар эди. (Бу жавоб ҳам аввалдан ёдлаб олинган эди.)

– Лекин сиз бари бир билинтирмай уйга кириб юрар эдингиз-ку?

– Ҳа, сэр... яъни, биласизми, иккимиз ҳам аввал-бошданоқ бирга юрганимизни одамлар қанчалик камроқ кўришса, шунчалик яхшироқ бўлади, деган қарорга келган эдик.

– Анави фабрика қоидасидан қўрқибми?

– Ҳа, сэр, ўша қоидадан қўрқиб.

Шундан сўнг у ҳаётида, мисс Х га йўлиққач, орадан Роберта билан боғлиқ хилма-хил қийинчилклар чиққанини гапириб берди.

– Энди, Клайд, биз ўша мисс Х ҳақида бир оз гаплашиб олишимизга тўғри келади. Ҳимоя билан қораловчи томонларнинг ўзаро битимларига биноан – мистер суд маслаҳатчилари бунинг сабаби, шубҳасиз, сизларга ҳам тушунарли бўлса керак – биз бу масалани сал-палгина қўзғаб ўтмоқчимиз, чунки бу ерда гап мутлақо бегуноҳ бир қиз устида кетяпти, шу боисдан унинг ҳақиқий номини айтиб ўтиришга ҳеч қандай эҳтиёж йўқ. Аммо баъзи бир далилларни гарчи одоб билан ишлатсак-да, ҳар ҳолда бу далилларга мурожаат этишимизга тўғри келади, бу эҳтиёткорлигимиз, тирик юрган ва тирноқча ҳам айби бўлмаган хоним учун қанчалар зарур бўлса, марҳума учун ҳам шунчалик зарур. Ишончим комилки, агар мисс Олден тирик бўлганда у ҳам шунга кўнар эди. Ҳуллас, гап мисс Х хусусида, – дея давом этди Жефсон Клайдга ўгирилиб, – Иккала томон ҳам сизнинг у билан ўтган йилнинг ноябрь ёки декабрь ойида Ликургда танишганингизни тан оляпти. Шу тўғрими?

– Ҳа, сэр, түгри, – деб ғамгин жавоб қайтарди Клайд.

– Сиз ўша ондаёқ бутун ақду ҳушиңгизни йүқөтиб севиб қолдингизми уни?

– Ҳа, сэр. Бу ҳақиқат.

– У бадавлат қизмиди?

– Ҳа, сэр.

– Гүзалмиди? Унинг гўзаллигини ҳамма тан олса керак, деб ўйлайман, – қўшиб қўйди Жефсон, асосан судга мурожаат этиб, бироқ у Клайднинг жавобини кутмаган эди, Клайд бўлса бамисоли ўргатиб қўйилган тўтиқушдай бари бир:

– Ҳа, сэр, – деб жавоб қайтарди.

– Мисс Х билан биринчи бор учрашган пайтингизда, икковингиз, яъни, сиз ва мисс Олден демоқчиман, бу ерда тилга олинган ноқонуний алоқага ўтган эдиларингизми?

– Ҳа, сэр.

– Унда, шуларнинг барини эътиборга олган ҳолда... Йўқ, айтгандай, бир дақиқага, мен яна бир нарса тўгрисида сўрамоқчиман... ҳаҳ, тилимнинг учida турибди... Айтинг-чи, сиз мисс X билан танишган вақтингизда ҳам Роберта Олденни севардингизми?

– Ҳа, сэр, мен уни севардим.

– Ўшангача ўзингизга мисс Олден мабодо малол кела бошлаганини сира сезмаганмидингиз?

– Йўқ, сэр.

– Унинг муҳаббати ва яқинлиги сизга худди илгаригидай қадрли ва ёқимли бўлиб қолаверган-а?

– Ҳа, сэр.

Клайд шундай дея туриб, ўтмишини эслаб кетди ва у ўзини чин ҳақиқатни гапираётгандай ҳис қилди. Ҳа, дарвоқе, Сондра билан учрашишдан олдин чиндан ҳам унинг дили маҳкам эди ва у Роберта билан баҳтиёр эди.

– Айтинг-чи, мисс Х билан учрашгунга қадар мисс Олден иккалаларингизнинг келажак түғрисида бирор-бир режаларингиз бормиди ўзи? Ҳойнаҳой, шу ҳақда ҳам бош қотириб кўргандирсизлар, шундайми?

– У-унчалик эмас (Клайд ҳаяжондан қотиб қолган лабларини асабий тарзда ялаб-ялаб қўйди)... Биласизми, умуман мен аввалдан ҳеч нарса ўйламаганман... яъни, Робертага тирноқдай бўлса ҳам ёмонлик қиласман деб ўйламаганман... Бунақангি нарсаларни у ҳам хаёлига келтирмаган, албатта. Қўйингки, бизни аввал бошданоқ оқимнинг ўзи олиб кетаверди. Эҳтимол, шуларнинг бари икковимиз бутунлай ёлғиз бўлганлигимиз туфайли келиб чиққандир. Ликургда унинг ҳеч кими йўқ эди, менини ҳам йўқ эди. Аксига олгандай, орада анави қоида ҳам бор эди денг, ўша қоидани деб мен у билан қадам босиб ташқарига чиқолмасдим... яқинлашганимиздан кейин эса ҳаммаси ўз-ўзича кетаверди, биз – у ҳам, мен ҳам бу ҳақда тузукроқ бош қотириб ҳам кўрмабмиз.

– Бошингиз тақ этиб бир жойга тегмагани учун ҳам шунчаки оқимда сузиб кетавергансизлар, бир кун келиб бошга иш тушишини ҳам ўйламагансизлар? Шундайми?

– Йўқ, сэр. Кечирасиз, гапингиз тўғри, сэр. Худди ўшандай бўлган эди. – Клайд қайта-қайта машқ қилиб олинган бу муҳим жавобларни бехато қайтаришга жон-жаҳди билан уринарди.

– Лекин бирортангиз ёки икковингизми, мундай бир бошқотириб кўришингиз керак эди-да. Ахир сиз йигирма бирда, мисс Олден эса йигирма уч ўнда бўлсангизлар.

– Ҳа, сэр. Назаримда, биз... мен баъзан ўйлагандай бўлардим.

– Аниқроқ айтинг-чи, нима ҳақда ўйлар эдингиз? Эслаёлмайсизми?

– Ҳа, сэр, менимча эслаёлсам керак... Яъни, мен аниқ биламанки, агар ишларим юришиб кетиб, мўймай пул топа бошласам, Роберта ҳам бошқа ердан иш топса, унда у билан ҳамма жойда очиқчасига юраверардим, кейин эса, агар биз бир-биримизни худди бурунгидай севсак, унда турмуш қуришимиз ҳам мумкин бўлар эди, деб ўйлардим баъзан.

– Сиз ўша пайтда чиндан ҳам унга уйланаман, деб ўйлаган эдингизми?

– Ҳа, сэр. Худди ҳозир айтганимдек, аниқ фикр юритган эдим.

– Лекин мисс Х ни учратгунингизча шундай деб ўйлагансиз, тўғрими?

– Ҳа, сэр, ўшангача шундай деб ўйлаган эдим.

(Роса тўқишибди! – деди Мейсон пичинг қилиб, сенатор Редмонднинг қулоғига.

– Фирт артистлик-ку бу, – дея жавоб қайтарди Редмонд ҳам томошибинларга хос шивир-шивир билан.)

– Сиз унга бирор-бир аниқроқ гап айтмаганмидингиз? – давом этди Жефсон.

– Йўқ, сэр, эслаёлмаяпман... Назаримда ҳеч қандай аниқ гап айтмагандайман.

– Биттасини гапиринг – ё айтдим денг, ё йўқ. Хўш, қайси бири?

– Ростини айтсан, иккалови ҳам эмас. Мен кўпинча уни севишимни ва биз ҳамиша бирга бўлишимизни хоҳдашимни, кейин у ҳеч қачон мени ташлаб кетмаслигидан умидворлигимни айтардим.

– Лекин сиз унга уйланмоқчиман, демагансиз, шундайми?

– Йўқ, сэр, уйланмоқчиман, демаганман.

– Хўш, хўш, яхши... У-чи? У нима дер эди?

– Мендан умрбод ажралмаслигини гапирад эди,

– Клайд Робертанинг охирги қичқириғи ва охирги нигоҳини эслаб қолгани учун бу сўзларни зўр-

базур, қийналиб айтди. Кейин чүнтагидан дастрү-молчасини олиб, совуқ тер босган юз ва құлларини арта бошлади.

(– Ажойиб томоша! – дея түнғиллади Мейсон масхара қилиб.

– Анойи әмас, анойи әмас! – деди Редмонд бепарволик билан.)

– Лекин айтинг-чи, – дея давом этди Жефсон босиқ ва совуқ оқангда, – агар мисс Олденга нисбатан шунақанги түйғунгиз бор экан, унда қандай қилиб мисс Х ни учратишиңгиз билан бу даражада тез ўзгариб кетдингиз? Наҳотки, сиз шу қадар бекарор бўлсангиз, фикр-түйғуларингиз наҳотки ҳар куни ўзгариб турса?

– Бу ҳақда аввал сира бош қотириб кўрмаган эканман... Йўқ, сэр, мен ундейлардан әмасман!

– Мисс Олден билан танишгунингизча бошқа бирор қизни мундай бир жиiddийроқ севганимидингиз?

– Йўқ, сэр.

– Аммо мисс Х ни учратгунга қадар, мисс Олден билан бўлган муносабатларингизни жиiddий ва мустаҳкам муносабатлар, яъни чинакам севги, деб ҳисоблар эдингизми?

– Ха, сэр, шундай деб ҳисоблардим.

– Кейин-чи, мисс Х ни учратганингиздан сўнг нима бўлди?

– Кейинми... кейин ҳаммаси чаппасига айланаб кетди.

– Яъни, мисс Х ни бир ёки икки марта кўрганингиздан сўнг мисс Олден сизга бутунлай бегона бўлиб қолганини айтмоқчисиз-да, а?

Шу пайт Клайднинг эсига бир нарса тушиб:

– Йўқ, сэр, ундей әмас. Мутлақо ундей әмас, – деб эътиroz билдириди шоша-пиша ва астойдил. – Мен уни ўшанда ҳам севар эдим... жонимдан севар эдим, бу ҳақиқат гап! Лекин анави... анави...

мисс... мисс... туфайли ақду ҳұшимдан айрилди-  
му, калавамнинг учини тополмай қолдим.

– Ҳа, ҳа, ўша мисс Х туфайли шундай бўл-  
ган. Буни биз биламиз. Сиз ўйламай-нетмай унга  
ошиқу бекарор бўлиб қолгансиз, шундайми?

– Ҳа, сэр.

– Хўш, кейин-чи?

– Кейинми... кейин... фақат мен мисс Олденга  
илгариgidай муомала қилолмай қолдим.

Бу сўзларни айтаётганда Клайднинг пешонаси  
ва ёноқларидан яна тер чиқди.

– Тушунарли! Тушунарли! – деди Жефсон суд  
маслаҳатчилари ҳамда оломонга таъсир ўтказиш  
учун атайлаб овозини баландлатиб ва писанда қи-  
либ. – Шаҳризод эртагидаги сеҳргар қиз ва сеҳр-  
ланган ошиқ деб қўя қолинг.

– Нимани гапираётганингизни тушунмаяпман,  
– деди Клайд талмовсираб.

– Азизим, мен сеҳргарлик тўғрисида, гўзаллик,  
ишқ-муҳабbat, бойлик инсонни сеҳрлаб қўйиши  
тўғрисида гапиряпман – биз ана шу нарсалар-  
га чанқоқмизу, аммо қўлга киритолмаймиз – биз  
яшаётган дунёдаги ишқ-муҳабbat кўпинча ана  
шундай бўлади.

– Ҳа, сэр, – дея маъқуллади Клайд ҳам очиқ  
қўнгиллик билан, айни пайтда унинг: Жефсон бор-  
йўғи ўзининг гапга чечанлигини кўрсатмоқчи, деб  
ўйлагани ҳам тўғри эди.

– Лекин мен яна шуни билмоқчиман. Агар сиз  
мисс Олденни ўзингиз айтаётганингиздай яхши  
кўрган бўлсангиз ва алоқангиз никоҳ қилиб муқад-  
даслаштиришдек даражага етиб борган экан,  
наҳотки сиз зиммангиздаги мажбуриятларни,  
мисс Олден олдидағи бурчингизни бу қадар анг-  
лаб етмагансиз, наҳотки сизда мисс Х туфайлиги-  
на уни ташлаб кетиш фикри туғилса? Шу қандай

юз берганини билишни истар эдим, аминманки, бу мистер маслаңатчиларга ҳам қизиқарли туулса керак. Хүш, олимистер туйгуларингиз қаерда қолган эди? Ахлоқий бурчингиз-чи? Балки, айтарсиз, менда униси ҳам, буниси ҳам йўқ эди, деб? Биз шуни билишни истаймиз.

Бу чинакамига эҳтиросли сўроқ эди – ўз гувоҳига қилинганд ҳужум эди. Аммо Жефсон фақат айтишга ҳаққи бўлган нарсаларнигина сўрар, шу сабабли Мейсон гапга аралашмасди.

– Лекин мен...

Клайд уялганидан дудуқланиб қолди; гўё уни қандай жавоб қайтаришга олдиндан ўргатиб қўймаганлару, у худди хаёлида қандайдир бир тузукроқ изоҳ излаётгандай эди. Аслида ҳам шундай эди, гарчи у нима жавоб беришни ёдлаб олган бўлишига қарамай, бу савонни судда эшитгач ва ўзини Ликургда хижолатга солган, азоблаган бу муаммога яна юзма-юз келгач, ўзини нимага ўргатганларини ҳам ҳадеганда эслайвермади... У тортиниб, дудуқланиб, охири шундай деди:

– Гап шундаки, мен бу ҳақда деярли ўйламас эдим. Мисс X ни кўрдиму, шундан кейин ўйлаёлмай қолдим. Бир хил маҳалда бош қотирмоқчи бўлардиму, лекин бу уринишларим зое кетарди. Менга мисс Олден эмас, фақатгина ўша қиз кераклигини билардим. Мен бунинг ёмонлигини тушунардим... албатта... Робертага фоятда ачинардим... Аммо бари бир ноиложликдан қўлимдан ҳеч нарса келмасди. Мен фақат мисс X ни ўйлардим. Робертага эса, ҳар қанча ҳаракат қилсан ҳам, илгаригидай муомалада бўлолмасдим.

– Шу баҳонада виждонингиз зифирдай ҳам қийналмасди, шундай демоқчимисиз?

– Қийналар эди, сэр, – жавоб берди Клайд,  
– Ёмон иш қилаётганимни билардим, унга ҳам,

ўзимга ҳам нихоятда ачинардим; лекин бари бир бошқача иш тутолмасдим. (У ўзи учун Жефсон ёзидерган сўзларни такрорламоқда эди; қизифи шунда эдикни, ўша ёзилганларни биринчи бор ўқиганида бари чин ҳақиқат эканига у ишонган эди: ўша пайтда чиндан ҳам унинг виждони маълум даражада азоб чеккан эди.)

– Хўш, кейин-чи?

– Кейин Роберта, унинг ҳузурида мен илгаригидай тез-тез бўлмаслигимдан шикоят қила бошлади.

– Бошқача сўз билан айтганда, сиз уни назарга имлай қўя бошладингиз?

– Ҳа, сэр, қисман шундай бўлди... лекин бутунлаймас... йўқ, сэр.

– Хўп, яхши, X га ошику бекарорлигингишни пайқаганингиздан сўнг қандай иш тутдингиз? Мисс Олденга, уни энди севолмаслигингизни, бошқа қизни яхши кўриб қолганингизни айтдингизми?

– Йўқ, ўша пайтда айтмадим.

– Сабаб? Биратўласига иккита қизга: сени севаман дейиш, балки, сизнингча, айб ҳам эмасдир, ахлоқсизлик ҳам эмасдир?

– Йўқ, сэр, лекин, ахир бу жудаям унаقا бўлган эмас. Биласизми, мен унда мисс X билан эндиғина танишган эдим, унга ҳали ҳеч нарса айтмаган ҳам эдим. У гапиришимга йўл қўймас ҳам эди. Лекин бари бир, ўшандаёқ мисс Олденни энди бошқа ёқтиrolмаслигимга қўзим етган эди.

– Аммо мисс Олденнинг сизга нисбатан маълум ҳуқуқдари бор эди, ахир! Шу нарсанинг ўзиёқ, сизни ўзга қиз билан дон олишиб юришингизнинг олдини олиши керак эди, сиз шуни тушунмасмидингиз?

– Тушунардим, сэр.

– Унда нега шундай иш тутдингиз?

– Анави қиз олдида ўзимни қўлга ололмай қолдим.

- Сиз мисс Х ҳақида гапиряпсиз-да?
- Ҳа, сэр.
- Бундан чиқди, у қиз сизни яхши кўриб қолмагунча изидан чопиб юраверган экансиз-да?
- Йўқ, сэр, бу бутунлай бошқача бўлган.
- Ҳўш, қандай?
- Шунчаки мен у билан гоҳ бир жойда, гоҳ иккинчи жойда учрашиб юравердиму, охири уни деб ақду ҳушимдан айрилдим.
- Тушунарли. Лекин шунга қарамай, мисс Олден ҳузурига бориб, унга энди илгаригидай яқин бўйламаслигингизни айтмагансиз-да?
- Йўқ, сэр. У пайтда айтмаганман.
- Сабаб?
- Мен у хафа бўлиб қолади, деб ўйлаган эдим, унга азоб беришни истамаган эдим.
- Ҳа, тушунарли. Демак, унга очишини айтишга сизда маънавий ва ақдий жасорат етишмаган.
- Маънавий ва ақдий жасорат деган гапларга унчалик тушунмайман, – жавоб қайтарди Клайд ўзига берилган баҳо хиёл қаттиқ тегиб, дилини ранжитгани учун, – очишини айтсам, унга жудаям раҳмим келар эди. Йифлагани йифлаган эди, шу сабабли айтишга тилим бормасди.
- Тушунарли. Ҳа, майли, борингки, шундай ҳам дейлиқ. Лекин бошқа бир нарсани сўрамоқчиман. Сиз мисс Олденни ёқтирмаётганингизни тушунганингиздан кейин ҳам у билан алоқангиз ўша-ўша бурунгидай яхшилигича қолавердими?
- Й-йўқ, сэр... ҳарқалай, узоққа бормади, – дея минғиллади Клайд асабий ва хижолат тортган ҳолда.
- У, суд залидагиларнинг бари мени эшитишяпти... онам ҳам, Сондра ҳам ва кейин газеталар орқали бутун Америка бўйлаб бошқа одамлар ҳам нима деб жавоб берганимни билиб олишади, деб ўйлар эди! Бундан икки-уч ой муқаддам Жефсон

биринчи бор унга шу саволларни кўрсатганда, у: бўларнинг нима кераги бор, деб сўраган эди, ўшандада Жефсон қўйидагича жавоб қайтарган эди: «Тарбиявий таъсир ўтказиш учун керак. Баъзи бир ҳаётий масалаларни ўртага ташлаб, одамларни қанчалик кутилмаган, қанчалик кучли тарзда ҳайратга сола билсак, улар сизнинг олдингизда кўндаланг турган муаммоларни ақалли бир оз тушуниб етишларига шу даражада осонроқ эришган бўламиз. Лекин сиз бундан унчалик чўчиманг. Вақти соати келиб, сиз фақат саволларга жавоб қайтараверасизу, қолганини бизга қўйиб бераверасиз. Биз нима қилаётганимизни ўзимиз биламиз». Шу боисдан Клайд давом этди:

– Биласизми, мисс Х билан танишганимдан сўнг Робертани энди илгаригидай хоҳламай қолдим, шу сабабдан у билан камроқ бирга бўлишга ҳаракат қилдим. Аммо, қўйинг-чи, ўшандан кейин сал ўтмай... бошига бахтсизлик тушди... ундан у ёғига...

– Тушунарли. Тахминан бу қачон бўлган эди?

– Январнинг охирида.

Хўш, кейин-чи? Шу воқеа юз бергач, бунақанги вазиятда ўша қизга уйланиш сизнинг бурчингиз эканини тушунмадингизми?

– Лекин... йўқ, ўша вазиятда тушунмадим... яъни, айтмоқчиманки, оғир аҳволдан чиқиб кетишида қани энди унга кўмаклаша олганимда эди.

– Хўш, нима учун уйланана олмас эдингиз, сабаб? «Ўша вазиятда» деганингизни қандай тушунмоқ керак?

– Биласизми... ҳаммаси... худди сизга айтиб берганимдай юз берган. Мен энди уни бошқа севолмас эдим, унга уйланаман, деб ваъда ҳам бермаганман, ахир у буни биларди. Шу боисдан, агар ўша бахтсизликдан қутулишида унга ёрдамлашсам, ҳарқалай тўғри бўлар, севмаслигимни эса кейинроқ бориб айтарман деб ўйлаган эдим.

- Бары бир сиз унга күмаклашолмабсиз-ку?
- Йүк, сэр. Лекин ҳаракат қилдим.
- Сиз шу ерда гувоҳдик берган доричига мурожаат қилғанмидингиз?
- Ҳа, сэр.
- Яна бошқаларга-чи?
- Мурожаат қилғанман, сэр, охири, ишқилиб бирон нарса топмагунимча еттига дориҳонага кириб чиқдим.
- Лекин сиз топган нарса фойда бермаган?
- Бермади, сэр.
- Атторлик моллари билан савдо қилувчи ёш баққол унга мурожаат қилганингизни айтди, шундай бўлғанмиди?
- Ҳа, сэр.
- У сизга бирор-бир врачни тавсия этдими?
- Ҳ-ҳа... лекин... кимлигини айтгим келмаяпти.
- Ихтиёрингиз, айтмаслигингиз мумкин. Аммо сиз мисс Олденни врачга юбордингизми?
- Ҳа, сэр.
- У бир ўзи кетдими ёки сиз олиб бордингизми?
- Мен уни... яъни эшиккача кузатиб бордим.
- Нима учун фақат эшиккача?
- Чунки... биз ўйлаб-ўйлаб, – у ҳам, мен ҳам, – ҳарқалай шундай қилганимиз тузук, деган қарорга келдик. У пайтда менда пул кам эди. Иккаلامиз бошлишиб борганимиздан кўра, унинг бир ўзи кирса, эҳтимол доктор озроқ ҳақ эвазига ҳам ёрдамини аямас, деб ўйлаган эдим.

(«Уҳ, шайтон ургур-ей, бутун гурзи-тўқмоқларимни у нақ бурним тагидан олиб қўйяпти-ку! – деб ўйлади Мейсон шу топда. – Грифитснинг бошини айлантириб юборишга мўлжаллаган сўроқларимнинг кўпини у ўзиники қилиб олди». Мейсон талвасага тушганча гердайиб қўй-

ди. Бэрней Редмонд, Эрл Ньюком ҳаммалари Жефсоннинг мақсади нималигини энди аниқ билишган эди.)

– Тушунарли. Эҳтимол, гап яна бошқа ёқдадир, бу нарсаларни амакингиз ёки мисс Х эшитиб қолишидан қўрққандирсиз?

– Ҳа, албатта, мен... яъни биз иккаламиз бу ҳақда ўйлаб, гаплашиб ҳам олган эдик. Аҳволим ёмоналигини у тушунгандарсан.

– Лекин мисс Х тўғрисида гап бўлмаган эдими?

– Йўқ, бўлмаган эди.

– Сабаб?

– Чунки... Айни ўша пайтда унга бу ҳақда гапирмаслик керак, деб ўйлаган эдим. У ниҳоятда азобда қолган бўларди. Ишлари бир оз юришиб кетгунча кутиб туришни маъқул кўрдим.

– Кейин унга ҳаммасини айтиб, уни ташлаб кетардингиз – шуни назарда тутяпсизми, сиз?

– Ҳа... агар мен унга илгаригидай яхши муносабатда бўлолмаётганимни сезсан... Ҳа, сэр.

– Лекин иккиқат ҳолича ташлаб кетолмасдингиз, шундайми?

– Йўқ, сэр, у пайтда ташлаб кетолмасдим. Аммо, биласизми, у пайтда уни бу бахтсизликдан қутқаролсан керак, деб ўйлардим!

– Тушунарли. Хуллас, унинг иккиқатлиги унга сизнинг муносабатингизни ўзгартиролмади? Мисс Х дан воз кечиб, мисс Олденга уйланиш ва шу йўл билан ҳамма айбларингизни ювиб юбориш хоҳишини ҳам уйғотмаганмиди?

– Йўқ, сэр... ўшанда уйғотмаган эди... яъни ўша пайтнинг ўзида демоқчиман.

– «Ўша пайтнинг ўзида» деганингизни қандай тушунмоқ керак?

– Яъни, сизга айтганимдай, бу ҳақда мен кеинироқ ўйлай бошладим... лекин ўша пайтда эмас.

Бу кейинроқ... биз Адирондак тоғларига жүнаганимизда юз берди.

- Нима учун ўша пайтда эмас?
- Нима учунлигини айтиб бердим-ку. Мен мисс Х туфайли ақду ҳұшымдан айрилиб, бошқа ҳеч нарса ҳақида ўйлаёлмай қолдим.
- Сиз ҳатто ўшанды ҳам мисс Олденга нисбатан муносабатингизни ўзgartиролмадингизми?
- Йўқ, сэр. Унга жуда раҳмим келарди-ю, лекин бошқача иш тутолмасдим.
- Тушунарли. Майли, буни ҳозир бир четта қўйиб турай. Кейин мен бу масалага яна қайтиб келаман. Ҳозир, агар қўлингиздан келса, мисс Х нинг айни қай жиҳати сизни ўзига ром қилиб олганини суд маслаҳатчиларига тушунтириб беришга уриниб кўришингизни истардим, хўш, нима сабабдан у сизга мисс Олдендан кўра кўпроқ ёкиб қолди? Айни нимаси, хулқ-одобининг қайси жиҳатлари, ҳусну жамоли, табиати ёки эл орасидаги мавқеи сизни бу даражада ўзига мафтун этиб қўйдими? Сиз ўзингиз буни биларсиз, ахир?

Белнеп ҳам, Жефсон ҳам турли хил руҳий, адлияйи ви шахсий сабабларга кўра, Клайдга илгари ҳам бу саволни ҳар мақомга солиб бериб кўришган ва турли хил жавоблар олишган эди. Аввалига у Сондра тўғрисида бир оғиз ҳам гапиргиси келмади, чунки унинг номини тилга олсан, ўша заҳотиёқ судда ҳам, газеталарда ҳам уни рўкач қила бошлашади, деб қўрққан эди. Охири, барча газеталар Сондранинг ҳақиқий номини ёзишмагандан сўнг, эл-юрт орасида шарманда бўлиш хавфи йўқлиги маълум бўлди-ю, Клайд шундан кейингина у ҳақда анча-мунча ёйилироқ гапира бошлади. Лекин бу ерда, судда у яна эҳтиёткор ва камгап бўлди-қўйди.

- Э, буни тушунтириш мушкул иш... Менимча, у Робертага қараганда анча чиройли. У чинакам гўзал

қиз. Лекин асосий гап бунда эмас. У, шу пайтгача мен билган қызыларнинг ҳаммасидан ҳам мутлақо бошқача... у анча-мунча мустақил... У қылган ишга, у айтган гапга каттадан-кичикнинг бари шу қадар диққат билан қарапдик... Назаримда, у аввалдан билган ҳамма танишларимдан ҳам кўра кўпроқ нарса биладиганга ўхшарди. Кейин у ниҳоятда гўзал кийинар, жуда бадавлат эди, у киборлар доирасига мансуб бўлиб, газеталар у ҳақда тез-тез ёзиб, расмларини ҳам бериб туради. Мен уни кўрмай қолган вақтларимда ҳар куни у ҳақда газеталардан ўқир эдим, у доимо мен билан биргадай бўлиб туюларди. Кейин у жуда довюрак қиз эди, мисс Олденга ўхшаш содда ва бўшашган эмас эди... аввалига унинг менга қизиқиб қолганига ҳатто ишонгим ҳам келмади. Кейинчалик эса юрагимга бошқа ҳеч ким ва ҳеч нарса сифмай қолди, Роберта ҳам. Мен ноилож эдим, кўз ўнгимда ҳамиша мисс Х туради, ахир.

Жефсон гапни буриб, якунлаган сифатида:

– Ҳа, фикримча сиз чинакам ошиқу беқарор бўлиб қолиб сиз, гўё ақду ҳушингиздан айрилгандай, – деди кўз қири билан суд маслаҳатчиларини кузатиб. – Ишқ йўлида телба бўлишнинг худди ўзгинаси, менимча, бундан бошқа нарса эмас.

Лекин унинг бу сўзларини халойиқ ҳам, суд маслаҳатчилари ҳам пинакларини бузмай, тошдай қотиб тинглаб ўтиришарди.

Шундан сўнг бирданига гумон қилинаётган ёмон ният оқимининг тезкор, лойқа сувларида зудлик билан шўнғиб юришга тўғри келди, чунки бошқа гапларнинг бари фақат муқаддима эди, холос.

– Шундай қилиб, Клайд, кейин нима бўлди? Ниманики эслеёлсангиз, бизга ҳаммасини бир бошдан гапириб беринг. Ҳеч нарсани юмшатмай, аслида қандай бўлсангиз, худди ўшандай, ўзингизни

яхшиламай ҳам, ёмонламай ҳам гапириңг. Мисс Олден ўлган – агар мана бу ўн икки жентельмен охири бориб шундай қарорга келишса, сиз ҳам ўлишингиз мумкин. (Бу сўзлар айтилганда Клайд-нинг ҳам, суд залида ўтирган бошқа ҳамма одамларнинг ҳам вужуди музлаб кетгандай бўлди.) Аммо дилингиз хотиржам бўлиши учуноқ, яхшиси, ҳақиқатни гапириңг. (Жефсон шу ерда Мейсонни ўйлаб қўйди: қани, бунақангиз зарбани қайтариб кўрсин-чи!)

- Хўп, сэр, – деди Клайд жўнгина қилиб.
- Демак, бундан чиқди, у фожиага йўлиқибди-ю, сиз бўлсангиз унга ёрдамлашолмагансиз? Хўш, ундан кейин-чи? Ундан кейин нима қилдингиз? Ўзингизни қандай тутдингиз?.. Ҳа, дарвоқе, ўша пайтда сиз қанча маош олардингиз?
- Ҳафтасига йигирма беш доллар, – дея бўйнига олди Клайд.
- Бошқа даромад топадиган жойингиз йўқмиди?
- Кечирасиз, эшитмай қолдим.
- Ўша пайтда бир илож қилиб пул топса бўладиган бошқа жойингиз йўқмиди?
- Йўқ, сэр.
- Тураг жойингизнинг ижара ҳақи қанча эди?
- Ҳафтасига етти доллар.
- Егуликка қанча кетарди?
- Беш-олти доллар.
- Яна бошқа харажатларингиз бормиди?
- Ҳа, сэр: кийим-бош учун, уларни ювиш учун.
- Ҳойнаҳой, киборларга хос турли хил чиқимларга сиз ҳам ўз улушингизни қўшиб юрган бўлсангиз керак?
- Эътиroz билдираман, бу айбланувчини йўлга солувчи савол! – қичқирди Мейсон.
- Эътиroz қабул қилинди! – деди судья Оберуолцер.

– Яна бошқа чиқимларингиз бормиди, эслай оласизми?

– Ҳа, трамвай учун, темир йўлда қатнаш учун. Кейин мен турли ўйин-томушаларда иштирок этган пайтимда, ўз улушимни қўшар эдим.

– Айтмадимми! – ғазаби қайнаб қичқирди Мейсон. – Бу тўтиқушга шунча гап ўргатиб турганингиз етар, деб ҳисоблайман!

– Мен бўлсам, муҳтарам прокурор бирорларнинг ишига билар-билимас аралашавермасин, деб ҳисоблайман, – Жефсон ўзи учун ҳам, Клайд учун ҳам ҳимояга ўтиб, пиҳиллаб кулиб қўйди. У Клайднинг Мейсон олдидағи даҳшатини синдиримоқчи эди. – Мен айбланувчини сўроқ қиласман, тўтиқушлар масаласига келсак, биз кейинги пайтларда бу ерда шу қадар кўп тўти қуш кўрдикки, улар энг ашаддий қироатхон мактаб болаларига ўхшаб, ўргатилган гапларни сайраб туришар эди.

– Фирт туҳмат бу! – шовқин солди Мейсон, – Мен эътиroz билдираман ва кечирим сўрашингизни талаб қиласман!

– Муҳтарам мистерлари, мендан ва менинг ҳимоям остидаги одамдан кечирим сўралиши керак, агар муҳтарам мистерлари атиги бир неча дақиқа танаффус эълон қилишни лозим кўрганларида, кечиримни хийла олдинроқ сўратиб олардик. – Жефсон шаҳд билан Мейсонга яқин борди-да, қўшиб қўйди: – Мен суд ёрдамисиз ҳам кечирим сўратишни биламан.

Мейсон ҳужумни даф қилмоқчи бўлиб муштларини қисди. То судья Оберуолцер қаҳр-ғазаб билан столга болғачасини ургунига қадар суд залидаги назоратчилар, стенографистлар, газетачилар ва ҳатто клерк ҳам шоша-пиша иккала юристни ўраб, қўлларидан ушлаб олишди.

– Жентельменлар! Жентельменлар! Сизлар икковингиз ҳам судга ҳурматсизлик қиляпсизлар! Ҳозироқ суд олдида ва бир-бирларингиздан кечирим сўранглар, акс ҳолда суд йигилишини бекор қиласман, сизларни ўн кундан авахтага ташлаб, ҳар бирингизга беш юз доллардан жарима соламан.

Судья баланд курсисидан туриб шуларни гапирганча, иккала юристга хўмрайиб қараб қўйди. Жефсон ўша заҳотиёқ фоят назокатли ва тилёгла-ма оҳанг билан жавоб қайтарди:

– Гап шундай экан, муҳтарам мистерлари, мен сиздан, мистер прокурордан ва мистер маслаҳатчилардан кечирим сўрайман. Айбланувчига нисбатан прокурорнинг қилган ҳужуми менга ҳаддан ташқари адолатсиздай ва ўринсиздай бўлиб туюлган эди.

– Бунга аҳамият бериш керак эмас, – деди Оберуолцер.

– Гап шундай экан, муҳтарам мистерлари, мен сиздан ва мистер ҳимоячидан кечирим сўрайман. Эҳтимол, мен бир оз қизишиб кетгандирман. Ҳа, ростдан, айбланувчидан ҳам кечирим сўрайман, – дея масхараомиз қўшиб қўйди. Мейсон аввалига судья Оберуолцернинг ғазабнок ва ўткир нигоҳига, кейин эса Клайднинг кўзларига қаради, Клайд эса бир сесканиб, юзини четга олди.

– Давом этинг, – зарда қилиб шанғиллади Оберуолцер.

– Шундай қилиб, Клайд, – яна гап бошлади Жефсон, у хотиржам эди, гўё шунча шов-шув кўтариш унга худди гугурт чаққанчалик оддий бир нарса эди, гапингизга қараганда, маошингиз ҳафтасига йигирма беш долларни ташкил этган ва майда-чуйда харажатларингиз ҳам кўп бўлган. Мабодо ўша пайтда ёмон кунимга яраб

қолар деб, оз-оздан жамғарма йиққан әмасмидингиз?

– Йүқ, сэр... жуда оз қоларди... айтишга ҳам арзимайды.

– Хүш. Агар борди-ю, мисс Олден мурожаат қылған врач, масалан дейлик, юз доллар мукофот әвазига унга ёрдамлашишга күнганды, сиз шунча пулни тұлай олармидингиз?

– Йүқ, сэр... яъни бирдан түлолмасдим.

– Мисс Олденнинг озми-күпми йиққан пули йүқмиди, билмайсизми?

– Менинг билишимча, йүқ эди, сэр.

– Унда сиз унга қандай қилиб ёрдам бермоқчи бўлган эдингиз?

– Биласизми, агар уми ёки менми доктор топсак-да, у кутишга рози бўлса, эҳтимол, мен оз-оздан йигиб, секин-секин қарзимдан қутулагманми, деб ўйлаган эдим.

– Тушунарли. Чин күнгилдан шундай қилмоқчи эдингизми?

– Ҳа сэр, албатта-да.

– Сиз бу ҳақда унга айтганмидингиз?

– Ҳа, сэр. У буни биларди.

– Лекин унга ёрдам берадиган врачни сиз ҳам, у ҳам тополмагансизлар, хўш, кейин-чи? Шундан кейин нима қилдингиз?

– Кейин у менинг уйланишимни истаб қолди.

– Зудлик биланми?

– Ҳа, сэр, зудлик билан.

– Бунга сиз нима жавоб қилдингиз?

– Мен унга, бирданига сираям уйланолмайман, деб айтдим. Бунинг учун менда пул йүқ эди. Бундан ташқари, агар биз оила қурған тақдиримизда ҳам, ақалли бола туғилгунча бирон ёққа кетмасак, барі бир ҳаммаси ошкора бўлиб, мен ишимдан айрилардим. Унинг ўзи ҳам шу қунга тушарди.

- Нима сабабдан?
- Қариндошларим индамай қараб туришарканми? Улар, назаримда, фабрикадан мени ҳам, уни ҳам ҳайдаб юборишарди.
- Тушунарли. Улар, икковингизни ҳам бу ишга ярамайсизлар, деб ҳисоблашарди.
- Ҳарқалай, мен шундай деб ўйлаган эдим, – жавоб берди Клайд.
- Кейин нима бўлди?
- Гап шундаки, агар мен у билан бирга кетиб, никоҳдан ўтишни истаган тақдиримда ҳам, бари бир бунинг учун на менда ва на унда пул бор эди. Мен аввалига ўз жойимдан воз кечишим ва қаердандир бошқа ердан иш топишим, шундан кейингина у мен билан бирга туриши мумкин эди. Бундан ташқари, ўзга ҳеч бир жойда бунчалик пул ишлай олмаслигимни мен билардим.
- Меҳмонхона хизмати-чи? Ўша ишга қайтиб боролмасмидингиз?
- Ҳа, дарвоҷе... агар мени кимдир тавсия қилганда унда бошқа гап эди. Лекин тағин қайтиб боришини ўзимга эп кўрмадим.
- Нима сабабдан?
- Ўша ишга қайтадан уннашга қўлим бормади... унақангি ҳаёт жонимга тегиб кетган эди.
- Аммо сиз ҳамма нарсадан қўлимни уриб қўлтиғимга тикдим, демоқчи эмассиз-ку. Наҳотки, ниятингиз ўшандай эди?
- Йўқ, сэр! Мутлақо ундей эмас эди. Мен унга бошиданоқ, агар у вақтинчага – бола туғилгунча – бир ёқقا кетиб, менинг Ликургда қолишимга имкон берса, унда харж-харажатларимни камайтириб, у яна ўзи пул топадиган бўлгунча бир амаллаб йиққанимни юбориб турман, деб айтган эдим.
- Лекин унга уйланаман деб ўйламагансиз-да?

– Йўқ, сэр, у пайтда бундай қилиш қўлимдан келишига сира қўзим етмас эди.

– Хўш, бунга у нима деди?

– У рози бўлмади. Бундай аҳволда қололмаслиги ва қолишни истамаслиги, мен билан никоҳдан ўтиши зарурлигини айтди.

– Тушунарли. Шу ернинг ўзидаёқ, зудлик биланми?

– Ҳа-да... ҳарқалай, тезлатиш керак, деди. У бир оз кутишга қўнди-ю, лекин бошқа ёққа кетишга эса, агар мен унга уйланмасам, ўламан саттор, бормайман, деб оёқ тираб туриб олди.

– Сиз ортиқ уни севмаслигингизни ўзига айтдингизми?

– Ҳа, деярли... айтдим, сэр.

– «Деярли» деганингиз нимаси?

– Мен... уйланишни истамайман, дедим. Ҳа, кейин, энди севмаслигимни ўзи ҳам билар эди. Буни ўзи айтган эди.

– У сизга шуни айтганмиди? Ўша пайтда-я?

– Ҳа, сэр, қайта-қайта айтган эди.

– Дарвоқе, гапингиз тўғри. Бу – шу ерда ўқилган барча хатларидан ҳам маълум. Лекин у бошқа ёққа кетишдан қатъиян бош тортгандан сўнг сиз нима қилдингиз?

– Нима қилишни билмай бошим қотди... Бироқ, эҳтимол, бир оз вақтга бўлса ҳам уйига кетишга қўндиарман, ўшанда ўзим пул йиғишга ҳаракат қиласман... балки... уйланишни мутлақо хоҳламаётганимни... уйидалик пайтида тушуниб етар... деб ўйладим. (Клайд дудукланиб, индамай қолди. Бу нақанги ёлғон гапириш оғир эди.)

– Хўш, хўш, давом этинг. Эсингизда бўлсинким: ҳақиқат, гарчи сиз уни айтишдан ҳар қанча ор қилган тақдирингизда ҳам, ёлғондан кўра ҳамиша устунроқдир.

– У яна ҳам қўпроқ даҳшатга тушса, балки бунағанги ўжарлигини ташлармикин, деб ўйлаган эдим...

– Сиз ўзингиз қўрқмадингизми?

– Ҳа, сэр, қўрқдим.

– Майли, давом этинг.

– Хуллас... балки ўша вақтгача жамғаролган пулимнинг барини бераман, деб қўрсаммикин... тушуняпсизми, мен яна бирортасидан қарз олмоқчи ҳам бўлган эдим... ўшанда, эҳтимол, у кетишга кўнар ва мени ўзи билан никоҳдан ўтишга мажбур қилмас... шунчаки бошқа бир шаҳарда жойлашиб олса, мен унга кўмаклашиб турарман... деб ўйладим.

– Тушунарли. Лекин у бунга рози бўлмаган?

– Йўқ... Яъни, никоҳдан ўтмайман, десам рози бўлмади... Аммо у бир ойга уйига кетишга кўнди. Мендан умидини узишга эса, бари бир уни рози қилолмадим.

– Сиз ўша пайтдами ёки қачондир ундан аввалми ё кейинми, унга боришингизни ва у билан никоҳдан ўтишингизни айтганмидингиз?

– Йўқ, сэр. Ҳеч қачон айтмаганман.

– Ҳўш, унда нимани айтгансиз унга?

– Айтдимки... пул топишим биланоқ... – Клайд ҳаяжонга тушиб, уялганидан тили дудуқдана бошлиди, – тахминан бир ойлардан кейин ҳузурингга бораман, ҳозирча... ҳозирча... анави шов-шувлар босилгунча иккаламиз вақтинчага бирон ёқقا жўнаймиз-қўямиз, дедим.

– Лекин сиз унга уйланаман, демагансиз-да?

– Йўқ, сэр. Ундей демаганман.

– Бироқ у, сўзсиз шуни истар эди, шундайми?

– Ҳа, сэр.

– Ўша пайтда сизни у мажбур қилиши мумкинлигини ўйламаган эдингизми? Яъни, ўз хоҳишин-

гизга қарши бўлса ҳам, унга уйланишингизни на-  
зарда тутяпман.

– Йўқ, сэр, мен буни ўйламагандим. Бундай  
бўлишига бари бир тиш-тироғим билан қар-  
ши туардим. Режам шундай эди: иложи борича  
кўпроқ вақт ўтказиб, иложи борича кўпроқ пул  
жамғармоқчи бўлдим, сўнгра никоҳдан бош тор-  
тиб, бор пулимнинг барини унга бериб, кейин-  
чалик қўлимдан келганча кўмаклашиб турмоқни  
ният қилган эдим.

– Бироқ сизга маълумки, – Жефсон шу ерда ан-  
чагина мулоийим ва устамонлик билан гапира бош-  
лади, – мисс Олден сизга ёзган мана бу хатларда (у  
прокурорнинг столига қўлини чўзиб, Робертанинг  
ўз дастхати билан битилган бир тўп мактубни ол-  
дида, тантанавор тарзда уларни кафтида чамалаб  
кўрди) икковингиз чиққан саёҳатга алоқаси бўл-  
ган қандайдир бир ўзаро келишув хусусида тез-  
тез эслатиб ўтилади, ҳойнаҳой, мисс Олденнинг  
ўзи шундай деб ўйлаган бўлса керак. Хўш, қани  
айтинг-чи, қандай келишув эди ўша? Агар хоти-  
рам алдамаса, у очиқдан-очиқ «ҳаммасини кели-  
шиб олганмиз-ку», деб ёзган.

– Ҳа, биламан, – жавоб берди Клайд: улар бу ма-  
салани Белнеп ва Жефсон билан биргалиқда, ахир  
икки ой муҳокама этишган-ку. – Бироқ мен бил-  
ган биргина келишув (у бор кучи билан ўзини са-  
мимий тутишга ва ишонарли гапиришга тиришар  
эди) – бу мен унга қайта-қайта таклиф қилган ўша  
келишувнинг ўзи.

– Бу келишувнинг асосида қандай гаплар бор  
эди?

– Гапнинг лўндаси, у кетиши ва бирор жойдан  
кулба топиши, кейин ёрдамимга шукур қилиб ту-  
равериши керак эди, вақти-вақти билан эса мен  
унинг ҳолидан хабар олиб турган бўлардим.

– Э, йўқ, сиз қандайдир кераксиз нарсаларни гапиряпсиз, – деб эътиroz билдириди Жефсон, унинг эътирозида фаразгўйлик йўқ деб бўлмасди.

– У буни назарда тутиши мумкин эмас. Хатларидан бирида сиз бошқа ёқقا кетишингиз ва у билан анча вақтгача – то ўзига келиб олгунча – бирга туришингиз қийин бўлишини, лекин бу ишда ёрдам бериш мумкин эмаслигини айтиб ўтади.

– Ха, биламан, – деб жавоб берди Клайд шоша-пиша, илгаридан тайинлаб қўйилганидек аниқ қилиб. – Аммо бу менинг эмас, унинг режаси эди. У, шуни хоҳлаяпман, сен ҳам шундай қилишинг керак, деб такрорлагани такрорлаган эди. У бу ҳақда бир неча бор телефонда ҳам айтганида, эҳтимол, мен: «Майли, майли», деб жавоб қилган бўлишим ҳам мумкин, бироқ бу – мен унинг ҳамма гапига рози эдим, деган сўз эмас-ку, шунчаки, биз ҳали бу ҳақда гаплашамиз деганим эди, холос.

– Тушунарли. Демак, сиз «у бошқа нарсани ўйлаган, мен бошқа нарсани», демоқчисиз-да?

– Мен фақат шуни биламанки, бу масалада у билан гапимиз сира бир ердан чиқмаган. Яъни, ундан мен ҳамма вақт яна сабр қилишини ва етарли даражада пул йиғмагунимча жим туришини сўраганман; мен ҳузурига бориб, ҳамма гапни у билан яна қайтадан маслаҳатлашиб олмоқчи, кейин эса ўйлаб қўйганимдек, уни жўнаб кетишга кўндиromoқчи бўлган эдим.

– Аммо, мабодо у бунга кўнмагандачи, унда нима бўларди?

– Унда мен мисс X ҳақида гапириб бериб, мени тинч қўйишини айтмоқчи эдим.

– Бари бир шунда ҳам у мажбуrlаса-чи?

– Ха, унда, ҳарқалай, қочиб кетган бўлардим... лекин буни ҳатто хаёлимга ҳам келтиришни истамасдим.

— Ўзингизга сўзсиз маълумки, Клайд, бу ерда ўтирган айрим кишилар, тахминан худди ўша пайтда миянгизда жиноий ният туғилган: сиз гўё сохта ном остига яшириниб, кейин bemalol юриш ва мисс X га тинчгина уйланиб олиш мақсадида мисс Олденни Адирондак тоғларидағи хилват бир кўлга бошлаб бориб, ёвузлик билан уни ўлдириш ёки чўктириб юбориш режасини тузгансиз, деб ҳисобламоқдалар. Хўш, айтинг-чи, шу тўғрими? Суд маслаҳатчиларига ҳа ёки йўқ, деб жавоб беринг-чи?

Клайд ўтиртан креслосининг бандини қисганча, аввалдан ўргатиб қўйганлариdek, айтадиган сўзлари иложи борича ҳаяжонли ва таъсирчан чиқиши учун:

— Йўқ! Йўқ! Мен ҳеч қачон на уни ва на бошқа биронтасини ўлдиришни хаёл қилмаганман, — дея чинакамига даҳшатга тушиб эътиroz билдириди.

У хиёл ўрнидан туриб, ўзининг ҳақлигига тўла имони комиллигини кўрсатиш ва одамларда ишонч тугдиришга ўлиб-тирилиб ҳаракат қила бошлади, ваҳоланки, худди шу аснода бутун вужуди, аслида шундай ният қилган эдинг-ку, деган даҳшатли фикрдан ларзага тушаётган... шу машъум, азобга солувчи фикр уни бутунлай ҳолсизлантириб қўяётган эди. Залда ўтирган барча кишиларнинг нигоҳи унга қадалган эди. Судья ҳам, суд маслаҳатчилари ҳам, Мейсон ҳам, ҳамма журналистлар ҳам унга тикилиб қолишган эди. Пешонасини яна совуқ тер босди. Саросимага тушганча гезарган лабларини ялаб қўйди-да, зўрга ютинди, чунки томоги қуриб қолган эди.

Қарабисизки, Жефсон қадам-бақадам, Роберта-нинг отасиникига боргандан сўнг йўллаган дастлабки хатларидан тортиб, Клайддан мени олиб кетиши учун кел, деб талаб қилган, акс ҳолда Ли-кургга қайтиб бориб, шармандангни чиқараман,

деб пўписа тарзида ёзган мактубигача – хуллас, «эҳтимол тутилган» ёвуз ният ҳамда жиноятнинг барча икир-чикирларигача таҳдил этиш давомида Клайдга қарши гувоҳдик берувчи ҳамма нарсаларни сусайтиришга ва бутунлай рад қилишга бор кучи билан интилиб кўрди.

Клайднинг Робертага хат ёзмаганини шубҳали деб ҳисоблашяпти. Ваҳоланки, у қариндошлари туфайли, хизмати туфайли, дунёдан нимани кўрган бўлса, ўшаларни деб ишнинг чигаллашиб кетишидан кўркқан эди. Худди шу нарса Роберта билан келишиб олган Фондадаги учрашувга ҳам тааллуқди. Ўша пайтда унинг бирор-бир аниқроқ жойга бориш ҳақида режаси ҳам йўқ эди.Faқатгина у билан қаердадир – дуч келган бир жойда – учрашиб, уни иложи борича ажрашиб кетишга кўндириш тўғрисида мубҳамгина фикри бор эди, холос. Июль келишига қарамай, унинг режалари ҳамон мавҳум эди, лекин шу орада миясида шаҳардан ташқарироққа – арzon-гаров бир истироҳатбоп жойга чиқиб келишимиз мумкин-ку, деган фикр пайдо бўлади. Утикада эса Робертанинг ўзи шимолий кўлларнинг биронтасига боришни таклиф қилиб қолади. Вокзалда эмас, асло, балки ўша ерда, меҳмонхонада у бир неча харита ва йўл кўрсаткич китобчаларни сотиб олади (бу маълум маънода фалокатли фикр эди, чунки муқовасига «Ликург» меҳмонхонасининг муҳри туширилган ўша йўл кўрсаткич китобчалардан бири Мейсоннинг қўлида эди). Клайд ўз вақтида бу муҳрни кўрмай қолган эди, шу боисдан Мейсон берилаётган гувоҳдикни тинглай туриб, шу тўғрида ўйлаб қўйди). Клайд Ликургдан жимгина, хилват бир тарафдан чиққану жўнаган, хўш, нима бўпти, у Роберта иккаласи кетаётган саёҳатни сир тутишга интилган албатта, лекин бунда у фақат уни ва

үзини майда-чуйда гаплардан асраш учунгина шундай қилган. Бошқа-бошқа вагонларда кетиш, «мистер ва мисс Голден» деб ёздеришилар ва шунинг сингари кўзга ташланмаслик учун қилинган бу устма-уст ҳийла ва найрангларни ҳам айни шу нарса билангина изоҳлаш мумкин. Иккита шляппа масаласига келганда эса, биринчиси шунчаки лой-пой бўлгану, янгисини кўриб қолиб, ўшани сотиб олган. Кейин фожиа юз берган пайтда бунисини йўқотгану, табиийки, у иккинчисини кийган-қўйган. Ўз-ўзидан маълумки, қўлида фотография аппарати ҳам бўлган, уни Крэнстонларникига биринчи бор, ўн саккизинчи июнда меҳмондорчиликка борганда ўзи билан бирга олиб боргани ҳам рост. Фақат бир сабаб туфайлигина ушбу буюмидан у аввалига тонган: Робертанинг фавқулодда ўлимига сенинг алоқанг бордир, деб нотўғри тушунишади-ю, кейин ўзимни оқдай олмай қоламан, деб қўрқсан. Ўрмонда ҳибсга олишган дастлабки дақиқадан бошлабоқ янгишиб уни қотилликда айблашяпти – у бусиз ҳам ўша хосиятсиз саёҳат вақтида юз берган бутун воқеалардан ва ҳимоячиси ҳамда унинг тарафини олиб бир оғиз гапирадиган одамнинг йўқлигидан даҳшатга тушиб юрибди; энг яхшиси, умуман ҳеч нарса гапирмаслик, деб хаёл қилган ва шунинг учун шунчаки инкор этаверган. Аммо икки ҳимоячи беришлари биланоқ, у дарҳол уларга аслида содир бўлган воқеани сўйлаб берган.

Йўқолган костюм хусусида ҳам шуни айтиш мумкин: жиққа хўл ва ифлос бўлгани учун Клайд уни ўрмондаёқ тугун шаклида ўраган-да, Крэнстонларникига етиб боргач, кейинроқ олиб тозалишига берарман, деган мўлжал билан қаергадир тошларнинг орасига яшириб ташлаган, Мистер Белнеп ва мистер Жефсон билан танишганда, у

буни дарров айтган; шундан сүнг костюм топилиб, тозалатиб, ўзига қайтиб берилган.

– Клайд, сиз энди ўз режаларингиз ва ўша кўлга қилган саёҳатларингиз тўғрисида гапиринг-чи.

Шунда қачонлардир Жефсон Белнепга қандай сўйлаб берган бўлса, худди ўшандай тарзда, Клайд билан Робертанинг Утикага, кейин эса Ўтлоқзор кўлига борганлари хусусидаги ҳикоя бошланди. Илгаридан ҳеч қандай режа-пежа тузилмаган экан. Нари борганда, Клайд мисс Х ни бекиёс даражада севиб қолганини Робертага айтмоқчи ва уни ақл ҳамда инсофга чақириб, мени тинч қўй, деб илтимос қилмоқчи бўлган экан; айни пайтда у қўлидан келганча унга кўмаклашиш ва ҳолидан хабар олиб туришни кўнглига тугиб қўйган экан. Агар у кўнмаса, бутунлай орани очиқ қилмоқчи экан; лозим бўлса, ҳамма нарсадан кечиб, Ликургдан бош олиб чиқиб кетишга ҳам тайёр турган экан.

– Лекин мен уни Фондада, кейин Утикада ниҳоят даражада ҳоргин ва азобланган... қандайдир жуда заиф бир қиёфада кўрганимда (Клайд бирловлар обдан танлаб берган бу сўзларни юракдан айтишга фоятда тиришар эди), яна унга раҳмим кела бошлади.

– Кейин нима бўлди?

– Гапнинг очиши... агар мендан ажралмайман, деб туриб олса, чиндан ҳам уни ташлаб кетишимга кўзим етмай қолди.

– Хўш, ундей бўлса, қандай қарорга келдингиз?

– У пайтда ҳали ҳеч қандай қарорга келмаган эдим. Мен унинг гапларини эшитдим, кейин мабодо у билан бирга кетган тақдиримда ҳам, уни тўла-тўқис рози қилолмаслигимни тушунтиришга уриндим. Менда атиги эллик доллар бор эди, холос.

– Хўш.

– У йифлай бошлади, шунда мен у билан энди бу ҳақда гаплашиш ортиқча экан, деган хulosага келдим. У ҳаддан ташқари асабийлашган ва бутунлай азобда қолган, ҳолсизланган эди. Шунда мен, бир оз ҳордиқ чиқарип келиш учун бир-икки кунга у ёқ-бу ёққа боришни истамайсанми, деб сўрадим, – давом этди Клайд. (Шунда ўз сўзларининг гирт ёлғонлигини тушунганидан унинг томири тортишди, титраб-қақшаб ютинди; ниҳоятда оғир жисмоний машқми ёки ёлғон гапиришми – иш қилиб, қўлидан келмайдиган мушқул ишни бажармоқчи бўлганда ҳар доим унда мана шунақанги ошкора ожизлик юз берарди.) – У ҳа, қани энди Адирондак қўлларидан биронтасига борсак, қайсиниси бўлса ҳам майли, фақат пулимиз етса бас эди, деди. Асосан унинг ёмон аҳволига ачинганим сабабли, менимча, борса бўлади, деб айтган эдим, у бўлса...

– Хуллас, сиз ўша ёққа фақат уни деб борганимидингиз?

– Ҳа, сэр, фақат уни деб.

– Тушунарли. Давом этинг.

– ... шунда у айтдики, тезда меҳмонхонадан ёки бошқа бирор жойдан йўл кўрсаткич китобчилари ни топсангиз, бир-икки кун яшаса бўладиган арzon-гаровгина жой танлаймиз, деди.

– Кейин сиз ўша китобчаларни қидириб кетдингизми?

– Ҳа, сэр.

– Хўш, кейин-чи?

– Кейин уларни кўриб чиқиб, Ўтлоқзор кўлинни танладик.

– Очигини айтинг, ким танлади? Икковингизми ёки унинг ўзими?

– Битта китобчани шунчаки у қўлига олди, мен эсам бошқасини, кейин у ўзиникидан икки киши

учун ҳафтасига йигирма бир доллар ёки кунига беш доллардан тўланадиган меҳмонхона эълонини кўриб қолди. Сўнгра мен, ҳойнаҳой, ҳеч қаерда бунчалик арzon истироҳат жойи топилмаса керак, деб ўйладим.

– Сизлар у ерда атиги бир кунгина бўлмоқчи эдингизми?

– Йўқ, сэр, агар у хоҳлаганда биз узокроқ қолишмиз ҳам мумкин эди. Аввалига мен у ерда балки икки ёки уч кун бўлармиз, деб ўйлаган эдим. У билан обдан ёзилишиб гаплашиш ва ҳол-аҳволими ни унга тушунтириш учун қанча вақт кетишини билмас эдим.

– Тушунарли. Кейин-чи?

– Кейин биз эртасига эрталаб Ўтлоқзор кўлига қараб жўнадик.

– Яна бошқа-бошқа вагондами?

– Ҳа, сэр, бошқа-бошқа вагонда.

– Меҳмонхонага келгансизлару, кейин...

– Ҳа, кейин рўйхатдан ўтдик...

– Қандай қилиб?

– «Карл Грэхэм рафиқаси билан», деб.

– Ўшанда ҳам билиб қолишса-я, деб қўрқдингизми?

– Ҳа, сэр...

– Кейин сиз бир амаллаб дастхатингизни ҳам ўзгартироқчи бўлгансиз?

– Ҳа, сэр... озгина.

– Нега сиз ҳамма вақт К. Г. деб ҳақиқий исми шарифингизни қолдиравергансиз?

– Биласизми, исмимни сохталаштириб ёзайину, лекин бош ҳарфлари жомадонимдаги белгига тўғри келиши керак, деб ўйлаган эдим.

– Тушунарли. Бу ишингиз бир жиҳатдан ақллигу, бироқ иккинчи жиҳатдан анча-мунча хом... очиғини айтганда, чала иш, аслида бундан ёмони йўқ.

Мейсон бу гапларни эшитиб, худди эътироз билдирадигандай ўрнидан туриб кетди, бироқ кейин фикридан қайтди шекилли, яна секингина креслога чўкди. Жефсон тагин ўнгга, суд маслаҳатчилариға зимдан тез, синовчан назар ташлаб қўйди.

– Хўш, Хуллас, охири бориб, бу ишга бутунлай чек қўйишга аҳд қилганингизни сиз унга айтдингизми ёки айтмадингизми?

– Мен манзилга етиб боришимиз биланоқ ёки ақалли, эртаси куни эрталаб у билан гаплашмоқчи бўлдим. Бироқ етиб келиб, ўрнашиб улгурмасимиздан у тезда менга уйланасан, деб гап оча бошлади. Мен сен билан узоқ яшамайман, аммо фоят хасталигим, эзилганлигим ва ўзимни ёмон ҳис этаётганлигим туфайли биттагина нарсани – шу ишларга бутунлай барҳам берилишини ва болага ном қўйилишинигина истайман, холос, деди, кейин мен кетаман, сен озод бўласан, деди.

- Сўнгра нима бўлди?
- Сўнгра... сўнгра биз кўлга кетдик...
- Қайси кўлга, Клайд?
- Ҳа, ўша Ўтлоқзорга-да. Биз қайиқда сайр этмоқчи бўлдик.
- Бирдан-а? Кундузи-я?
- Ҳа, сэр. У шуни хоҳлади. Сайр қилиб юрган пайтимида ҳам... (У индамай қолди.)
- Хўш, нима демоқчисиз, давом этинг.
- У яна йиглай бошлади, шунда мен унинг ниҳоятда хаста ва озор чекканлигини, тақдирга сира тан беролмаётганини сездим... сирасини айтганда, у ҳақ-ку, мен ёмон иш қиляпман... бола туфайлиёқ ҳамда бошқа андишалар юзасидан ҳам унга уйланмасам инсофцизлик бўлар, деган қарорга келдим, тушуняпсизми... яхшиси, унга уйлана қолай, деб ўйладим.

– Тушунарли. Сизда руҳий бурилиш юз берган. Демак, сиз ўша заҳотиёқ буни унга айтгансиз-да?

– Йүқ, сэр.

– Нима учун? Сиз унга шунчалик ҳам керагидан ортиқроқ азоб берганингизни наҳотки сезмаган бўлсангиз?

– Сезардим, сэр. Биласизми, мен унга айтмоқчи бўлиб оғиз жуфтлаган ҳам эдиму, лекин бирдан у ерга боришдан аввал ўйлаган нарсаларим яна бир чеккадан ёдимга тушиб кетди.

– Нималар ёдингизга тушди, масалан?

– Ҳа, мана, мисс Х дейсизми, Ликургда кечирган кунларим дейсизми, мабодо никоҳдан ўтиб, бу ердан жўнаб кетсак, бизни нималар кутаётгани дейсизми.

– Ҳўш.

– Хуллас... мен... мен ўшандада... очифини айтсам, ўша қуни унга буни сира гапиролмадим.

– Унда нимани гапирдингиз унга?

– Қўй, бошқа энди йиғлама, дедим... Ўйлаб олишимга яна бир кун муҳлат берсанг дуруст бўлар эди, эҳтимол, шунда биз сих ҳам, кабоб ҳам куймайдиган бирор йўлини топармиз, дедим.

– Кейин-чи?

– Кейин, озгина вақт ўтгач, у Ўтлоқзор кўли менга ёқмаяпти, деди. Унинг кўлдан кетгиси келиб қолди.

– Унинг кетгиси келдими?

– Ҳа. Биз тағин йўл кўрсаткич китобчаларини олдик-да, мен меҳмонхонада юрган бир боладан, бу ерда қандай кўллар борлигини сўрадим. У, шу яқин ўртадаги энг чиройли кўл – Катта мушгир, деди. Мен Робертага бир марта йўлим тушиб, у ерда бўлганимни ва бояги боланинг гапларини айтган эдим, у, ўша жойга борсак яхши бўлар эди, деди.

– Фақат шунинг учунгина сизлар ўша ёқقا жўнаганмидингиз?

– Ҳа, сэр.

– Бошқа ҳеч қандай сабаб йўқмиди?

– Йўқ, сэр, бошқа ҳеч қандай сабаб йўқ эди... Дарвоқе, фақат битта томони бор эдикни, биз Ўтлоқзор кўлининг жанубига қараб кетишимиш керак эди, қайтишда ҳам бари бир шу йўлдан юришимизга тўғри келарди.

– Тушунарли. Бу воқеалар пайшанба куни, саккизинчи июлда бўлиб ўтди, шундайми?

– Ҳа, сэр.

– Мана, Клайд ўзингиз эшитдингиз: бу ерда сизни мисс Олденни ўша кўлга сиз фақат биргина, илгаридан ўйлаб қўйилган шум ният билан, ундан қутулиш учун, четдан қараганда қўзга ташланмайдиган, қандайдир овлоқ ерни топиб, ўша ерда ё фотография аппарати билан, ё эҳтимол, эшкак, таёқ ёки тош билан уриб ўлдиришда ва кейин чўктириб юборишда айблашяпти. Хўш, ўйинга сиз нима дейсиз? Шу тўғрими, ё йўқми?

– Йўқ, сэр! Бу нотўғри! – дея эътиroz билдириди Клайд дангалига ҳамда юрақдан сўйлаб. – Аввало, у жойга бориш фикри мендан чиқмаган, фақат унга Ўтлоқзор кўли ёқмагани учунгина ўша ёқча жўнадик.

(У шу пайтгача креслода ҳоргин бир қиёфада ўтирган эди, лекин энди қаддини тик тутди-ю – аввалдан ўргатиб қўйганларидек – суд маслаҳатчилари ва халойиқча қўлидан келганча очик чеҳра ва қатъият билан тикилди.)

– Мен унга қандайдир яхшилик қилишга бор кучим билан уриндим. Сал бўлса-да кўнглини кўтаришни қаттиқ истаган эдим.

– Ўша куни ҳам унга бир кун илгаригидек ачинганмидингиз?

– Ҳа, сэр... балки, ундан ҳам күпроқ ачинган бўлсам керак.

– Ўша пайтда сиз бу ёфига қандай йўл тутишинизни аниқ ҳал қилиб олган эдингизми?

– Ҳа, сэр.

– Ҳўш, қандай қарорда тўхтаган эдингиз?

– Биласизми, мен виҷҷон билан иш кўришга аҳд қилдим. Бутун тун бўйи бу ҳақда ўйлаб чиқдим ва унга нисбатан инсоф билан иш тутмасам, унга ҳам, ўзимга ҳам ёмон бўлишини англаб етдим... акс ҳолда ўзимни ўзим ўлдираман, деб бир неча бор айтган эди-да, ахир. Эртаси эрталаб: нима бўлса бўлар, ҳамма ишни шу бугун бир ёқдик қиласман, дея кўнглимга тугдим.

– Бу Ўтлоқзор кўлида бўлган эдими? Пайшанба куни эрталаб сизлар ҳали меҳмонхонада эдиларингизми?

– Ҳа, сэр,

– Ҳўш, сиз унга айнан нима демоқчи эдингиз?

– Масалан, унга нисбатан инсофсизлик қилганимни ўзим ҳам билишим ва фоятда ачинишими... яна у қўйган таклифларнинг адолатлилиги ва агар шунча гапдан сўнг ҳам – арзи ҳолимни айтганимдан кейин ҳам у менга турмушга чиқишини истаса, у ҳолда икковлашиб кетиб никоҳдан ўтишим... Аммо оддинига мен унга ҳақиқатни, у билан бошқача муносабатда бўлиб қолганимнинг асл сабабини гапириб беришим: ўзга бир қизни севиб қолганим ва ҳозир ҳам севишим, шу боисдан нима қилишни билмай бошим гаранглиги... унга уйланаманми, йўқми билмаслигим... шуларни сўйлаб бермоқчи эдим.

– Уйланаманми, йўқми, деганда мисс Олденни айтяпсиз-да?

– Ҳа, сэр... умрбод мен ўша, иккинчи қизни севишимни, чунки у доимо фикру хаёлимдан нари

кетмаслигини гапирмоқчи эдим. Мабодо бу нарса Роберта, сен учун аҳамиятсиз бўлса, унда, гарчи ўша қизни ҳамон бурунгидай севишимга қарамай, ҳарқалай, сенга уйланаман, деб айтмоқчи эдим. Бор гап шу, вассалом.

– Хўш, мисс X чи?

– Мен уни ҳам ўйлаганман албатта, лекин у бадавлат қиз, шу сабабли бу нарсани хийла осонроқ ўтказиб юборадиганга ўхшаб кўринди, назаримда. Бундан ташқари, балки Роберта мени ўз ҳолимга қўяр, кейин биз шунчаки дўст бўлиб қолаверармиз, мен нима қўлимдан келса, ҳаммаси билан унга ёрдамлашиб туарман, деб ўйлагандим.

– Айнан қаерда никоҳдан ўтишингларни ҳам ҳал қилиб олдингларми?

– Йўқ, сэр. Лекин мен Катта мушгир ва Ўтлоқзор кўлининг нариёғида шаҳарлар қўплигини билар эдим.

– Мисс X ни бир оғиз ҳам огоҳлантиrmай, шунча ишни қилмоқчи эдингизми, а?

– Й-йўқ, сэр, унчалик эмас... Агар Роберта мени ўз ҳолимга қўймайдиган бўлса, у ҳолда уч-тўрт кунга кетишимга рози бўлар, шунда мен мисс X нинг ҳузурига бориб, ҳамма гапни айтарман, сўнгра қайтиб келарман, деб умид боғлаган эдим. Агар Роберта бунга ҳам кўнмаса, унда нима ҳам дердим, ноилож мисс X га хат ёзардим, аҳвол шунаقا бўлиб қолди, деб тушунирардим, кейин Роберта икковимиз никоҳдан ўтардик.

– Тушунали. Аммо, Клайд, бу ерда бошқа ашёвий далиллар қаторида мисс Олден пальтосининг чўнтагидан топилган бир хат ҳам келтириб ўтилди, – у Ўтлоқзор кўли меҳмонхонасининг тамфаси туширилган қофозга битилган бўлиб, онасиға аталган экан, – ўша хатида мисс Олден ўзининг эрга тегмоқчи бўлаётганини ёзган. Сиз у билан никоҳ-

дан ўтмоқчи бўлганингизни ўша куни эрталабоқ, Ўтлоқзор кўлининг ўзида унга қатъий қилиб айтган эдингизми ҳали?

– Йўқ, сэр. Унчалик эмас. Лекин мен эрта тонгданоқ унга, бутун ҳал қилувчи кун, мен билан никоҳдан ўтишни истайсанми-йўқми, ўзинг ҳал этишинг керак, деб айтган эдим.

– Ҳа, тушундим! Демак, шундай денг-а! – Жефсон худди елкасидан тоғ ағдарилгандай, енгил тортиб жилмайди. (Айни пайтда бутун вужудларини қулоққа айлантирганча тинглаб ўтирган Мейсон, Ньюком, Бэрлей ва сенатор Редмондлар эса секингина, деярли бараварига: «Фирт ёлғон!» деб хитоб қилишди.)

– Хуллас, мана, биз саёҳат масаласига ҳам етиб келдик. Сиз бу ерда гувоҳлар гапирган гапларни, ҳар қадамда сизга қанчадан-қанча ёвуз ниятлар ва макр-ҳийлалар тўнкалганини ҳам эшитдингиз. Энди бўлса мен орада нима юз берган – ҳаммасини ўз оғзингиздан эшитишни истайман. Бу ерда, Катта мушгирга жўнатаётib, сиз иккала жомадонни – уникини ҳам, ўзингизникини ҳам олганингиз, лекин Қуролсозга боргач, унинг жомадонини ўша жойда қолдириб, ўзингизникини эса қайиққа олиб кетганингиз қайд этиб ўтилди. Нима сабабдан сиз шундай қилдингиз? Илтимос, қаттиқроқ гапиринг, сизни барча суд маслаҳатчилари эшитсинлар.

– Нима учун шундай бўлганини қаранг, – яна Клайднинг томоғи қуруқшаган, зўрға-зўрға гапиради, – биз Катта мушгирида нонушталик топа оламизми-йўқми, билмас эдик, шу боисдан ҳам Ўтлоқзорнинг ўзидан майда-чуйда фамлаб олишга ақд қилдик. Унинг жомадони лиқ тўла эди, меникида эса озроқ жой топилди. Бундан ташқари, меникида фотография аппарати ҳам бор эди, сирти-

га аппарат оёқчалари боғлаб қўйилган эди. Шу сабабдан унинг жомадонини қолдириб, ўзимникини олиб кетадиган бўлдим.

- Сиз ўзингиз шундай қарорга келдингизми?
- Яъни, мен ундан сўрадим, шунда у, менимча ҳам шундай бўлгани маъкул, деди.
- Буни сиз ундан қаерда сўрадингиз?
- Поездда, Қуролсозга кетаётганимизда.
- Демак, кўлдан Қуролсозга яна қайтиб келишларингизни билган экансиз-да?
- Ҳа, сэр, билардим. Биз изимиизга қайтишимиз керак эди. Бошқа йўл йўқ эди, Ўтлоқзор кўлида бизга шундай деб айтишган эди.
- Катта мушгир йўлида, эсингиздами, сизни ўша ёқقا олиб борган ҳайдовчи «анча-мунча асабийлигингиз» ва сиз ундан, бугун у жойда одам кўпми, деб сўраганингизни айтиб ўтди?
- Ҳа, сэр, эсимда, лекин мен ниҳоятда хотиржам эдим. Эҳтимол, у ерда одам кўплигини сўраган бўласам, сўрагандирман, аммо назаримда, унинг ҳеч бир ёмон жойи йўқ-ку. Менимча, бу саволни истаган киши ҳам бериши мумкин.
- Менимча ҳам шундай, – дея маъқуллади Жефсон. – Энди айтинг-чи, сизлар Катта мушгир меҳмонхонасида рўйхатдан ўтиб, қайиқ олиб, мисс Олден билан қўлга сайр этишга жўнаганларингиздан сўнг нималар бўлди? Сизми ёки уми, бирор нарсадан ташвишланаётгандай, ҳаяжонланаётгандай ё умуман, қайиқда сайрга чиққан бегам кишиларга ўхшамайдигандай бўлиб кўринган эмасмидингиз? Балки сиз одатдан ташқари қувноқроқ, ё одатдан ташқари хафароқ ёки ундан ҳам бошқачароқ кўрингандирсиз?
- Одатдан ташқари хафа эдим деёлмайман, йўқ, сэр. Унга айтмоқчи бўлаётган гапларимнинг барини, унинг хоҳишига қарам бўлиб, ип-

сиз боғланиб қолажагимни ўйлардим, албатта. Ҳарқалай, мен у қадар қувноқ ҳам эмасдим, лекин энди мен нима воқеа юз бермасин, ҳаммаси яхши бўлиб кетишини ўйлардим. Мен унга уйлашибатамом тайёр эдим.

- Хўш, у-чи? Унинг кайфияти яхшимиди?
- Умуман олганда, яхши эди, сэр. У нима учундир илгаригига қараганда анча-мунча қувноқроқ ва хотиржамроқ эди.
- У билан сиз нима ҳақда гаплашдингиз?
- Аввалига, кўлнинг гўзаллиги ва қорнимиз очса, қаерда нонушта қилиб олишимиз тўғрисида гаплашдик. Кейин биз ғарбий соҳил бўйлаб сузиб, сув нилуфарларини изладик. Кўринишидан у шунчалар хурсанд эдики, бу пайтда мен анави гапни бошлишни ҳатто хаёлимга ҳам келтирмадим, шу сабабдан биз шунчаки сайр қилиб юравердик, икки соатлардан сўнг эса овқатланиш учун қирроққа чиқдик.

- Яъни, қайси жойда? Харитага яқинроқ келинг-да, таёқча билан кўрсатинг, қандай сузгансизлар ва қайси ерда, қанча вақтга ва нима учун қирроққа келиб тушгансизлар?

Клайд қўлида таёқча ушлаганча, кўл ва унинг фожиага кўпроқ алоқадор бўлган қисмлари туширилган харита олдида туриб, соҳил ёқалаб юрилган ўша олис йўлни бир бошдан кўрсатиб чиқди: нонуштадан сўнг улар йўл олган ўша сўлим дарахтзор дейсизми, ҳамма ёқقا сочилиб ётган сув нилуфарларини териш учун бир оз ҳаяллаб қолинган кўркам хилватгоҳ дейсизми, хуллас, то соат бешларда Ҳилол кўрфазига етиб боргунларича тўхтаган ҳар бир манзиллари ўз нафосати билан уларни бир зумдаёқ шу қадар мафтун этганки, улар қайиқда лол қолиб ўтирганча узоқ вақт теваракка суқланиб-суқланиб тикилишган.

Кейин Клайд беш-олти марта расм олмоқчи бўлган ва улар ўша ернинг ўзида қалин ўрмонзор қирғоқча бориб тушишган. Бу орада Клайд нуқул Робертага мисс Х ҳақида гапирмоқчи ва ундан масалани очиқ қилиб беришни сўрамоқчи бўлиб юрган. Сўнгра, жомадонни қирғоқда қолдириб, қайиқдан туриб бир неча марта расм олиш мақсадида атиги икки-уч дақиқага яна сувга тушишган. Теварак-атроф шу қадар фусункор ва осойишта бўлганки, қайиқ сув юзасида жимгина сузиг борган, ниҳоят Клайд шу жойда ўзини бардамроқ тутади-да, кўнглидаги бор гапини тўкиб солади. Аввалига, деб ҳикоя қила бошлади у, Роберта афтидан қаттиқ қўрқиб кетди, хафа бўлиб, бундай баҳтсизликка учрагандан кўра, ўлганим яхши, деб юм-юм йифлай бошлади. Лекин охири бориб, Клайд ўзини чиндан ҳам гуноҳкор сезаётганини, ўз айбини ювишга астойдил тайёrlигини айтиб уни ишонтиргач, Роберта бирдан ўзгариб, қувноқлашиб кетибди-да, кейин севинчи ва миннатдорчилиги ичига сифмаганиданми, кутилмагандан ўрнидан иргиб туриб, унга яқин келмоқчи бўлибди. Гўё оёқлари остига йиқилмоқчидай ёки бўйнига осилиб олмоқчидай қўлинини олдинга чўзибди. Бироқ шу пайт оёфими, қўйлагими алланимага илиниб қоқилиб кетибди. Клайд ҳам қўлида аппарати билан (Жефсон буни охирги дақиқада яна бир эҳтиёт чора сифатида қўшиб қўйишга қарор қилган эди) Роберта қулаб тушишидан қўрқиб, уни ушлаб қолиш мақсадида беихтиёр ўрнидан турибди. Эҳтимол, шунда – Клайд бунга бари бир ишонмай қарапти – Робертанинг юзи ёки қўли аппаратга урилиб кетган бўлиши ҳам мумкин. Ҳарқалай, нима юз бергани ва нима қилиш зарурлигини на у ва на Роберта англаб етмаслариданоқ икковлари сувга қулаб

тушишибди; түнкарилаётган қайиқ, ҳойнаҳой, Робертага теккан шекилли, у бехуш кўринарди.

– Мен унга қайиққа яқинроқ бориб, уни ушлаб олишга ҳаракат қил, деб қичқирдим, бироқ қайиқлари кетиб қолди, Роберта бўлса мени эшитмагандай ё тушунмагандай эди. Аввалига унга яқинроқ боришга қўрқдим, чунки у жонҳолатда типирчилаб, сувни шапиллатарди, кейин яқинлаша бошладим. Ўн қулоч сузиб улгурмасимдан боши сув остига кириб, яна бир чиқиб, яна йўқолди. Бу орада қайиқ ўттиз футча нарига сурилиб кетди-ю, энди унга Робертани етказиб боролмаслигимга кўзим етди. Шундан сўнг қирғоққа сузиб чиқишига қарор қилдим, акс ҳолда ўзим ҳам нобуд бўлишим аниқ эди.

Қирғоққа чиқиб олганимдан сўнг, дея гапида давом этди Клайд, қандайдир фалати ва шубҳали аҳволга тушиб қолганим тўсатдан миямга урилди. Ноқулай бир вазият юз бергани ва бу саёҳат ўзи бошдан-охир файритабиий бўлиб туюлишини бирдан тушуниб етдим, деди у. Меҳмонхоналарда ҳам у сохта ном билан рўйхатдан ўтган. Ўзининг жоммадонини олиб, Робертаникни қолдириб кетган. Бундан ташқари, ҳозир изига қайтиб борса, ҳаммасини изоҳлаб беришга тўғри келади... унда Роберта билан алоқаси борлиги барчага маълум бўлади-ю, қарабисизки, бутун ҳаёти таназзулга юз тутади: у мисс Х дан ҳам, фабрикадаги ишидан ҳам, юрт ичида орттирган иззат-обрўидан ҳам – ҳамма ҳаммасидан бенасиб бўлади! Борди-ю, индамаса (у онт ичиб айтадики, бундай фикр унинг миясига фақат ҳозиргина, шу ерда келди), унда у ҳам чўкиб кетган, деган тахмин юзага келиши мумкин. Шу сабабли у ўзини ҳар қанча ўтга-чўққа урганда ҳам, энди Робертани ҳаётга қайтаролмаслиги ва воқеани ошкора айтиш эса ўзига кўпдан-кўп ташвиш орттириб бериши ҳамда Робертанинг хо-

тирасига дөф бўлиб тушишини англаб етгач, индамай қўя қолишга аҳд қилган. Шундан сўнг фош этиб қўйиши мумкин бўлган жамики белгиларни йўқотиш мақсадида ҳўл костюмини олган-да, сувини сиқиб, тугун қилиб ўраб, жомадонига яхшилаб тахлаб жойлаштирган. Кейин соҳилда жомадони билан бирга қолган аппарат оёқчалари ни яширмоқчи бўлган, яширган ҳам. Эски похол шляпаси эса, яъни ўша тамфаси йўқолган шляпаси (лекин ўзининг айтишича, қандай йўқолганидан у бехабар эмиш) қайиқ ағдарилиб, фожиа юз берган пайтда қаёқдадир қолиб кетибди, шу боисдан у бошқа янгисини кийиб олибди, яна унда шапкаси ҳам бор экан, ҳатто ўша шапкасини кийиб олиши ҳам мумкин экан. (Унинг доимо йўлга ортиқча бир шляпа кўтариб кетадиган одати бор экан: ахир, қачон қарасанг, шляпа билан нимадир бир ҳангома чиқиб туради-ку, аслида ҳам.) Кейин у ўрмон орқали жанубга, темир йўл томонга қараб юришга аҳд қилган, чунки унинг ҳисобича, ўша ердан темир йўл ўтиши керак бўлган. Аммо у жойда автомобиль шоссеси ҳам борлигини ўша пайтда у билмаган. Клайднинг бамайлихотир тан олишига қараганда, унинг тўғри Крэнстоңларникига қараб жўнаши ҳам табиий бир ҳол: улар Клайднинг дўстлари эдилар, шунинг учун у худди томдан тараша тушгандай тўсатдан оёғининг остидан чиқсан бу даҳшатли воқеаларни бир бошдан ўйлаб чиқиши учун бирор-бир осойиштароқ жойга етиб олишни жуда-жуда истаётган эди.

Клайднинг жавоблари шу ерга келиб тўхтагач, унинг ҳам, Жефсоннинг ҳам назарида айтадиган бошқа гап қолмагандай туюлди, шунда ҳимоячи бир оз нафасини ростлаб олди-да, кейин бирданига дона-дона қилиб, аллақандай ўта бир босиқлик билан деди:

– Эсингизда бўлсин, Клайд: мистер суд маслаҳатчилари олдида, судья, шу залда ўтирган ҳалойик олдида, авваламбор – тангри таоло олдида ҳақиқатни, бор ҳақиқатни ва фақат ҳақиқатни гапираман, деб тантана билан онт ичдингиз. Бунинг маъноси нималигини тушунсангиз керак, шундай эмасми?

– Ҳа, сэр, тушунаман.

– Роберта Олден билан қайиқда бирга ўтирган пайтингизда уни урмаганман, деб яратган эгам олдида онт ича оласизми?

– Онт ичаман. Мен уни урмаганман.

– Қайиқдан уни чиқариб ҳам ташламагансиз-а?

– Онт ичаман. Мен ундей қилмаганман.

– Қасддан, ёмон ният билан у ёки бу ҳолда қайиқни ағдариб юборишга ёки бирон иложини тошиб мисс Олденни нобуд этишга уриниб кўрмаганингиз?

– Онт ичаман, йўқ! – Клайд қизишиб, ҳаяжон билан хитоб қилди.

– Демак, бу воқеа сизнинг ақлингиз ва иродангиздан ташқарида юз берган фавқулодда ҳодисалигига онт ича оласизми?

– Ҳа, онт ича оламан, – дея алдади Клайд; у ўз ҳаёти учун кураша бориб, гоҳи-гоҳида ҳақиқатни гапириб қолаётганини сезди: чиндан ҳам бу воқеаларнинг бари аслида кутилмагандა, баҳтга қарши, Клайд ўйлаганига мутлақо тескари тарзда юз берди. Буларни тасдиқлаб, у онт ичиши ҳам мумкин.

Шу пайт Жефсон йирик, бақувват қўли билан юзини силади-ю, суд ва суд маслаҳатчиларига майингина ҳамда бепарво назар ташлаганча юпқа лабларини маънодор юмиб:

– Қораловчи томон гувоҳдан сўроқни бошлиши мумкин, – деб маълум қилди.

## XXV БОБ

Клайдни ҳимоячи сўроқ қилаётган бутун вақт давомида Мейсон ўзини гўё қуённи қувишга отилган учқур този итдай, мана ҳозир охирги сакраш билан ўлжасини тутадиган бўрибосардай ҳис қилиб ўтирди. У зўрға тилини тийганча, айтилаётган гапларнинг бари бошдан-охир фирт уйдирмадан иборатлигини исботлаб, ҳаммасини чилпарчин қилиб юборишга ошиқар, дарҳақиқат, айтилган гапларнинг бир қисми уйдирма эди. Шу боисдан ҳам Жефсон ҳали сўзини тугатмасиданоқ у иргиб ўрнидан турди-да, Клайднинг рўпарасига бориб тўхтади; прокурорнинг ҳап саними, еб ташлайман, дегандай важоҳатини кўрган Клайд гўё ҳозир роса калтакланадигандай ҳис этди ўзини.

– Грифитс, мисс Олден қайиқда ўрнидан туриб, сизга томон келаётганда қўлингизда фотография аппарати бормиди?

– Ҳа, сэр.

– У қоқилиб йиқилиб кетгач, сиз бехосдан аппарат билан уни уриб юбордингизми?

– Ҳа.

– Ўйлайманки, агар сиз ҳалол ва виждонли одам бўлсангиз, унда Катта мушгир соҳилидаги ўрмонда туриб айтган гапларингизни албатта эслайсиз, ўшанда сиз менга қўлимда ҳеч қандай аппарат йўқ эди, деган эдингиз шекилли?

– Ҳа, сэр, мен ўша гапларимни эслайман...

– Демак, ўшанда ёлғон гапирган экансиз-да?

– Ҳа, сэр.

– Ўша пайтда ҳам ҳозир яна бир ёлғонни дўндираётганингиздай шижаот ва ишонч билан алдаб гапирган эдингизми?

– Мен алдайтганим йўқ. Ўша гапимни ҳозир ҳам тушунтириб бердим.

– Ие-ҳа, ўша гапингизни тушунтириб бердингиз! Нима учун шундай деганингизни тушунтириб бердингиз! Сиз ўшанда ҳам ёлғон сўзлагансиз ва ҳозир ҳам гапимга ишонишар, деб мўлжаллаяпсиз, шундай эмасми?

Белнеп эътиroz билдиришга шайланиб ўрнидан турди, лекин Жефсон уни яна жойига ўтқазиб қўйди.

– Бари бир мен ҳақиқатни гапиряпман.

– Ҳа, албатта-да, бу ерда яна қайта ёлғон гапиришингизга дунёдаги ҳеч бир нарса, ҳатто ўлиб-тирилиб электр курсидан қутулиб қолмоқчи бўлаётганингиз ҳам, ўйламанг, сизга ёрдам беролмайди!

Клад ранги оқариб, билинар-билинмас сесканниб тушди, ҳоргинликдан қизариб кетган қовоқлари липиллаб учди.

– Эҳтимол, алдасам алдай оларман, бироқ онт ичганда алдамасам керак, деб ўйлайман.

– Шунаقا деб ўйлайсизми? Ҳа, тушунарли! Демак, истаган нарса ҳақида ва истаган жойда, кечаси ҳам, кундузи ҳам ва ҳар қандай шароитда ҳам хоҳлаганча ёлғон сўзлаш мумкину, фақат сени қотиллик учун судлашаётганда алдамасанг бас, демоқчисиз-да?

– Йўқ, сэр. Унчалик эмас. Ҳозир мен ҳақиқатни гапирдим.

– Сиз тавротга сифина туриб, кўнглимда маънавий бурилиш юз берди, деяпсиз-да, шундайми?

– Ҳа, сэр.

– Нима, мисс Олден жудаям ғамгин бўлгани учун дилингизда ўша маънавий бурилиш юз бердими?

– Ҳа, сэр. Чиндан ҳам шундай бўлди.

– Гап бундай, Грифитс: у отасининг фермасида туриб, сизни интизор кутганда, сизга мана бу мактубларни ёзган эди, шундайми?

– Ҳа, сэр.

– Ўртача ҳисоблаганда, кунора сиз биттадан хат олиб тургансиз, шундайми?

– Ҳа, сэр.

– Сиз, унинг у ёқда бир ўзи ёлғизлиги ва бебаҳтлигини ҳам билардингиз, шундайми?

– Ҳа, сэр... аммо мен тушунтиридим-ку...

– Ҳа-я, сиз тушунтирдингиз-а! Сиз учун адвокатларингиз тушунтириб берганини айтмоқчи бўляпсиз, шекилли! Балки улар кун сайин турмада қулогингизга қўйишмагандир? Вақти соати келиб, қандай жавоб беришингизни ҳам ўргатишмагандир?

Шу дақиқада ўзига Жефсон тикилиб турганини сезган Клайд:

– Йўқ, сэр, ўргатишмади! – дея жавоб қайтарди энса қотар бир оҳанг билан.

– Унда нима учун Айиқ кўлида сиздан, бу қиз қандай қилиб ҳалок бўлди, деб сўраганимда, ўша заҳотиёқ менга тўғрисини айтиб, ҳаммамизни бу ортиқча ташвиш, шубҳа ва терговлардан холи қилиб қўя қолмадингиз? Қайтага ўшанда одамлар хайриҳоҳ бўлиб тинглаб, гапингизга тезроқ ишонишларини ўйламаганмидингиз, ваҳоланки, сиз ҳозир нақ беш ой давомида икки адвокатнинг ҳайбаракалласи билан ҳар бир сўзингизгача ўйлаб чиққансиз?

– Адвокатлар ёрдамида ҳеч нарсани ўйлаб чиқмаганман, – ўжарлик қилишда давом этарди Клайд ора-сира Жефсонга кўз ташлаб қўйиб, Жефсон бўлса ўзининг бутун салобати билан ҳадеб унга далда беришга уринар эди. – Нима учун шундай қилганимни ҳозиргина тушунтиридим-ку.

– Ҳа, тушунтирдингиз! Тушунтирдингиз! – дея бақирди Мейсон. Бу сохта тушунтиришлар Клайд учун ишончли қалқон, девор эканлиги, сал уни боплаб, адабини бермоқчи бўлинса, дарров пана-га ўтиб олиши мумкинлиги Мейсонни ниҳоятда

газаблантираётган эди... Ярамас! У аламини зўрга босиб, дағ-дағ қалтираганча давом этди: – Хўш, унда саёҳатта чиқмасингиздан оддин, мисс Олден сизга бу хатларни ёзаётган пайтларида ҳам, сиз бу мактублар фамгин-ку, деб ўйладингизми ё йўқми?

– Албатта-да, сэр. Яъни... – Клайд эҳтиётсизлик қилиб тилидан тутилди. – Ҳарқалай, ҳаммаси бўлмаса ҳам, айрим жойлари...

– Э, ҳа, шундай денг! Энди айрим жойлари бўлиб қолдими? Назаримда ҳозиргина айтдингиз-ку, булар фам-ситам тўла хатлар эди, деб.

– Ҳа, мен шундай деб ҳисоблайман.

– Илгари ҳам шундай деб ўйлаганмидингиз?

– Ҳа, сэр, шундай деб ўйлаганман.

Клайд саросима билан Жефсон томонга қараб қўйди, унинг нигоҳи бамисоли проҗектор нури каби Клайднинг вужудига тўхтовсиз сингиб турар эди.

– У сизга шундай деб ёзгани эсингиздами... – Мейсон мактублардан бирини олди-да, очиб ўқий бошлиди: «Клайд, азизим, агар сен келмасанг, мен ўлсан керак. Мен шу даражада ёлғизман. Ақдимдан озай деяпман. Бош олиб кетиб, умрбод қайтмасликни ва энди сира жонингга тегмасликни шу қадар хоҳлайманки. Хат ёзишни-ку истамаяпсан, аммо кунора бир қўнгироқ қилиб турсанг ҳам майли эди! Сен бўлсанг менга шу қадар кераксанки, далда берувчи сўзларингга шу қадар муштоқманки!» – Мейсоннинг овози майин ва фамгин жаранглади. У гапирган сари анчагина сезиларли раҳмашафқат тўлқинлари фақат унинг ўзинигина эмас, балки шу баланд ва тор суд залида ўтирган ҳар бир кишини ҳам ўз таъсирига олаётган эди. – Бу сатрлар сизга хиёл бўлса ҳам фамгин туюлмаяптими?

– Ҳа, сэр, фамгин туюляпти.

– Ўша пайтда ҳам шундай туюлганмиди?

– Ҳа, сэр, шундай туюлган эди.

– Бу сатрларнинг самимийлигини билардингиз, шундайми?

– Ҳа, сэр. Билардим.

– Гапингизга қараганда, Катта мушгир кўлиниг қоқ ўртасида туриб мисс Олденга ниҳоятда ачиниб кетибсиз-у, аммо ўша раҳм-шафқатингиздан атиги бир томчигинаси нега энди Ликургда, миссис Пейтон уйидаги ўз хонангизда сизни шундоққина трубкани олишга ва ақалли: мен бораман, деган бир оғизгина сўз билан бечора қизни юпатиб қўйишга мажбур этмади? Балки кейинроқ, яъни сизга у пўписа билан хат ёза бошлаган вақтдаги га қараганда сиз унга у пайтда камроқ ачинган-дирсиз? Ёки сиз бошиданоқ жиноятни мўлжаллагансиз-да, у билан ҳадеб телефонда гаплашавериш кимнингдир диққатини жалб этиб қўйишидан қўрққандирсиз? Тавба, жуда қизиқ-ку, Катта мушгир кўлида унга нисбатан бирдан сизда шу қадар кучли ачиниш ҳисси уйғонибди-ю, лекин Ликургдалик пайтингизда эса ҳатто раҳм-шафқат нималигини ҳам унутгандай юраверибсиз-да? Ё сизнинг туйгуларингиз сув қувурига ўхшаб очса очилади-ю, ёпса ёпилаверадими?

– Мен мутлақо унга ачинмас эдим, деб ҳеч қа-  
чон айтмаганман, – деди Клайд қайсарлик билан,  
Жефсонга бир кўз ташлаб олгач.

– Лекин у даҳшатга тушиб, талваса ичида сизга дўқ урмагунча сиз уни интизорликда қийнаб кела-  
вергансиз.

– Унга нисбатан нолойиқ иш тутганимни мен бўйнимга олдим-ку, ахир.

– Ие-ҳа! Нолойиқ эмиш! Нолойиқ! Энди фақат шуни бўйнимга олдим деб, биз бу ерда эшитган бошқа ҳамма гувоҳдикларни, ҳатто ўзингизнинг шахсий гувоҳлигингизни ҳам назарга илмай, шундан-шунақасига тўппа-тўғри озод бўлиб чиқиб ке-

тавераман, деб ўйлаяпсизми? Хўш, шуми мақса-дингиз?

Белнепни энди ҳеч нарса тутиб туролмади. У эътироуз билдириди.

– Бу сиз учун шармандалик, муҳтарам мистерларн. Наҳотки, прокурорга ҳар бир савонни қоралов нутқига айлантиравериш ҳуқуқи бериб қўйилган бўлса? – деди у қизишиб ва таассуф билан судьяга мурожаат этди.

– Мен бирон марта эътироуз эшитганим йўқ, – дея судья ўзини оқлади. – Прокурордан ўз саволларини муайян қоидага асосан беришини илтимос қиласман.

Мейсон бу дашномни пинагини бузмайгина эшитди-да, яна Клайдга юзланди:

– Сиз бу ерда айтган гапингизга қараганда, Катта мушгири кўлининг ўртасида, қайиқда ўтирган вақтингизда, кўлингизда ўша фотография аппарати бўлган экан, ваҳоланк, бир вақтлар ундан тонган эдингиз-ку?

- Ҳа, сэр.
- Мисс Олден бурун томонда ўтирган эдими?
- Ҳа, сэр.
- Бэртон, қани, қайиқни бу ёққа олиб келинг-чи! – дея Мейсон Бэрлейга мурожаат этди.

Бэрлейнинг фармойишига биноан, унинг тўрт ёрдамчиси бир зумдаёқ суд курсиси орқасидаги эшикдан чиқиб кетиб, Клайд билан Роберта сайрга борганда тушган айни ўша қайиқни кўтарганча тезда кириб келишди ва уни суд маслаҳатчилари олдида полга қўйишди. Клайд, баданини муз босиб, унга бақрайганча тикилиб қолди. Ўша қайиқ! У шошганидан кўзлари пирпираб, даг-даг титрар; халойиқ эса ҳаяжонга тушиб, шов-шув кўтаргани кўйи диққат билан қайиқни кўздан кечираарди, бутун залдагиларнинг ичи қизиб ғивирлаб қолишган

эди. Шу пайт Мейсон аппаратни олди-да, қўлида ниқтаб-ниқтаб, хитоб қилди:

– Мана, марҳамат, Грифитс! Тасаввур этайликки, бу аппарат ҳеч қачон сизники бўлмаган. Қайиққа тушинг-да, бу аппаратни олинг ва суд маслаҳатчиларига сиз ва мисс Олден айни қаерда ўтирганларингизни кўрсатиб беринг. Кейин мисс Олденни қандай ва қаерига урганингизни, у қаерда ва тахминан қандай йиқилиб тушганини қўлингиздан келганча аникроқ қилиб кўрсатинг.

– Эътиroz билдираман! – деди Белнеп.

Юристлар ўртасида кишини толиқтирувчи, узундан-узоқ ади-бади бошланди; охири бориб сувдя гувоҳни шу усулда – жуда бўлмаганда маълум вақтгача – сўроқ қилишга ижозат берди. Ниҳоят, Клайд:

– Ҳарқалай, мен уни қасддан урмаганман, – деди.

Мейсон эса унга:

– Ҳа, бу ҳақдаги гапингизни биз аввал ҳам эшиздик, – дея жавоб қайтарди.

Сўнгра Клайд ўз жойидан тушди-да, юз хил ўйтит-насиҳатларни олиб бўлгач, ниҳоят қайиққа қараб юрди ва ўрта ўриндиққа бориб ўтирди; уч эркак эса қайиқни ушлаб, мувозанатини сақлаб турди.

– Энди гап бундай... Ньюком! Бери келинг, Грифитс айтганидек, қайиқда мисс Олден қаерда ўтирган бўлса, сиз ҳам ўша ерга ўтириング-да, ўзингизни у нима деса, худди ўшандай тутинг.

– Хўп бўлади, сэр, – деб жавоб қилди Ньюком ва қайиққа яқин келиб, бурун томонига ўтирди.

Клайд эса Жефсонга бир қараб олишга ҳадеб беҳуда уринар, чунки энди у ўз ҳимоячисига орқа ўгириб ўтириб қолган эди

– Энди, Грифитс, – дея давом этди Мейсон, – мисс Олден қандай ўрнидан тургани ва сизга то-

мон кела бошлаганини мистер Ньюкомга бир күрсатинг-чи. У нима қилиши керак, тушунтириңг.

Клайд ўз ожизлиги, ёлғончилigi ва одамларга ёқмаслигини ўйлаб ниҳоятда ўнгайсиз ақволга тушганидан асабий, бесўнақай ҳаракат билан яна ўрнидан қўзғалди-да (буларнинг бари сира ақдга сифмайдиган, уятли бир ҳол эди), Роберта қандай тургани ва галдир-салдир қадам ташлаб, деярли эмаклаганча унга томон келаётиб, қоқилиб йиқилиб кетганини Ньюкомга кўрсатмоқчи бўлди. Шундан сўнг у аппаратни қўтарганча, мутлақо бехосдан қўл силтаб, Робертани уриб юборганини эслашга ва иложи борича, буни аниқроқ қилиб кўрсатишга уриниб кўрди... қаे-рига, эҳтимол, иягигами ёки юзигами текканини у аниқ билмайди, ҳатто бунга ишонмайди ҳам, лекин, шубҳасиз, бу бехосдан бўлган ва бунинг устига ярадор қиласидиган даражада қаттиқ урмагандай туюлган эди унга ўшандা. Шу ерда Белнеп билан Мейсон, дарвоқе, Клайд кўп нарсаларни яхши эслаёлмаслигини айтиб ўтди, шундай экан, унинг гувоҳлиги ҳаққоний бўлармикин, деган масалада узундан-узоқ тортишиб кетишиди. Охири бориб, Оберуолцер, ҳозирги кўргазмали гувоҳлик оёқда «бўш» ёки «аранг» турган одамни йиқитиш учун секингина туртки кифоями ёки кучли зарба керакми – шуни анча-мунча яққол кўрсатиб беради, деган фикрга асосланиб, сўроқни давом эттиришга рухсат берди.

– Аммо, худо ҳақи, айтинглар-чи, мистер Ньюкомдек басавлат эркак киши ўйнаган бу барча қилиқлар жимитгина ва енгилгина қизча мисс Олден билан юз берган воқеани қандай қилиб исботлаб бериши мумкин, ахир? – гапида туриб олди Белнеп.

– Майли, унда бу ерга мисс Олденнинг бўйи басти ва вазнига мос тушадиган қизни ўтқазамиз!

Ўша заҳотиёқ Зилла Саундерс чақириб келинди-да, Ньюкомнинг ўрнига ўтқазилди. Лекин шунга қарамай, Белнеп бари бир ўз айтганида туриб олди:

– Хўш, нима бўпти? Шарт-шароити мутлақо бошқача. Қайиқ сувда эмас. Бундан ташқари, бехосдан тушган зарбаларни бир хилда қабул қила-диган ёки бир хилда унга қаршилик кўрсатадиган икки киши ҳам йўқ.

– Хуллас, сиз ушбу кўргазмали тажрибани ўтказса бўлади, деб ҳисоблай оласизми? – Мейсон Белнепга юзланиб, пичинг қилиб сўради.

– Э, марҳамат, ихтиёр ўзингизда, давом этти-раверинг. Бу тажрибаларингиз зифирча ҳам нарсанни исботлаб беролмаслиги ҳар қандай одамга ҳам равшан, – дея маънодор жавоб қайтарди Белнеп.

Шундай қилиб, Мейсоннинг буйруфига биноан Клайд Робертани бехосдан туртиб юборгани каби, «деярли ўшанча куч билан» (Мейсоннинг назарида) Зиллани ҳам итариб юбориши керак эди. Зилла хиёлгина гандираклаб кетди-ю, айни пайтда қайиқ четини икки қўллаб ушлаб олди ва демак, жон сақлаб қолди. Белнеп, Мейсоннинг бу тажрибаси менинг эътиrozларимни пучга чиқариб юборса керак, деб ўйлаган эди. Лекин суд маслаҳатчиларида шундай тасаввур пайдо бўлдики, Клайд гуноҳини сезиб тургани ва ўлимдан қўрққани учун ўз ҳаракатларини, ҳарқалай, анча-мунча юмшатиб кўрсатишга уринаётганга ўхшар эди, ваҳоланки, аслида унинг нияти ёвузлиги аниқ эди. Врачлар ҳам ўша зарба ва юқо-рироқдаги бошқасининг қучи қай даражада бўлиши мумкинлиги тўғрисида қасам ичиб туриб гувоҳдик беришди-ку, ахир? Бэртон Бэрлей эса фотография аппаратидан Робертанинг сочини топиб олганини айтди, хўш? Анави гувоҳ аёл

эшитган қичқириқ-чи? Уни қандай тушунмоқ керак?

Аммо суддаги томоша шу ерга келганды янаги кунгача танаффус эълон қилинди.

Эртаси куни эрталаб, судья болғачаси ҳали тақиллаб улгурмасиданоқ Мейсон ўрнидан турди, у одатдагидек бардам, серфайрат ва баджаҳ эди. Клайд эса бутун тун бўйи ўз камерасида минг хил азобда ўртаниб чиққан эди. Жефсон билан Белнеп уни жон-ҳолига қўймай пишиқлашар ва далда беришарди, шундан кейин у, ўзини сира айби йўқ одамдай вазмин ва маҳкам тутишга аҳд қилди, лекин бунинг уддасидан чиқишга эса унда чинакам мардлик ва ирода етишмас эди, чунки у атрофидаги барча кишиларни ўзига душман ҳисоблар ва улар мени гирт гуноҳкор деб ишонишади, деган фикр миясига қаттиқ ўрнашиб қолган эди. Мейсон бўлса қаҳр ва газаб билан гап бошлади:

– Демак, Грифитс, ҳали ҳам ўзингизда руҳий бурилиш юз берган эди, демоқчи бўласизми?

– Ҳа, сэр, шундай деб тасдиқлайман.

– Сиз сувга чўкиб кетиб, сўнгра ҳаётга қайтарилиган одамлар тўғрисида сира эшитганингиз борми?

– Гапингизга унчалик тушунмадим.

– Сиз, сувга ботиб, кейин бошқа ташқарига чиқа олмаган, яъни гарқ бўлди деб ҳисобланган одамларни ҳам баъзан тирилтириш мумкинлигини биларсиз, албатта? Уларга биринчи ёрдам берилади: сунъий нафас олдирилади ёки фўлалар ёхуд бочкаларнинг устида юмалатилиб, шу йўл билан жон киргизилади.

– Ҳа, сэр, назаримда эшитгандайман. Чўкиб кетгандарни қайта тирилтириш тўғрисида гапиришган эди-ю, лекин бу қандай қилинишини, менимча умримда сира эшитмаган эдим.

- Сира эшитмаганмидингиз?
- Йўқ, сэр.
- Одам сув остида қанча қолиб кетиши ва яна охири ўзига кела олиши тўғрисида-чи?
- Йўқ, сэр. Ҳеч қачон эшитмаганман.
- Масалан, нақ ўн беш дақиқа сув остида қолган одамни ҳам ҳаётга қайтариш мумкинлигини ҳеч қачон эшитмаганмидингиз?
- Йўқ, сэр.
- Демак, унда сиз соҳилга чиқиб олганингиздан сўнг ҳам, ҳали одамларни ёрдамга чақириб, оқибатда мисс Олденни қутқариб қолишингиз мумкиниги миянгизга келмабди-да?
- Йўқ, сэр, миямга бундай фикр келмади. Мен уни аллақачон ўлган, деб ўйлаган эдим.
- Тушунарли. Хўш, унда ҳали у тириклигида, сув устида турган пайтида нима воқеа юз берди? Сиз, ахир, сузишга устаси фаранг одамсиз-ку, шундайми?
- Ҳа, сэр, анча тузук сузаман.
- Масалан, шу даражада тузуксизки, беш юз футдан ортиқроқ масофани кийим ва бошмоқларингиз билан сузиб ўтиб, бемалол жонингизни сақлаб қолишингиз мумкин. Шу тўғрими?
- Мен ўшандада ҳам худди шунча масофани сузиб ўтгандим шекилли... ҳа, сэр.
- Сузиб ўтганингиз рост – анча тузук сувзансиз, аммо, мен сизга айтсан, ўттиз беш фут наридаги тўнкарилиб ётган қайиққача эса сузиб бормагансиз, – дея якун ясади Мейсон.
- Белнеп эътиroz билдириб, бунақанги ҳамлалар қарорга киритилмаслигини талаб қилмоқчи бўлган эди, бироқ Жефсон уни тўхтатиб қолди.
- Кейин Клайднинг эшкак эшиш ва сузиш бўйича ўтказган барча машқлари борми, байдаркадек хавфли қайиқчада кўлларда неча бор сувзани бор-

ми ва айни пайтда у ҳеч қачон баҳтсизликка йўлиқмагани борми – шулар ҳақида гапириб беришига тўғри келди.

– Биринчи марта Крам кўлида Робертани сиз байдаркада суздирган эдингиз, шундайми?

– Ҳа, сэр.

– Аммо ўшанда ҳеч қандай баҳтсиз ҳодиса юз бермаган эди?

– Йўқ, сэр.

– Ўша пайтда сиз уни чин юракдан севардингиз, тўғрими?

– Ҳа, сэр.

– Бироқ ихтиёрингизда қулай ва мустаҳкам қайиқ бўла туриб, Катта мушгир кўлида у чўкиб кетган куни эса, мисс Одденни сиз энди бутунлай севмас эдингиз?

– Ўша пайтда юрагимда нима гап бўлганлигини айтиб бердим-ку, ахир.

– Крам кўлида сиз уни яхши кўрганлигингиз, Катта мушгирда эса... бу далиллар ўртасида ҳеч қандай алоқа бўлиши мумкин эмас, албатта.

– Ўша пайтда юрагимда нима гап бўлганлигини айтиб бериб бўлдим.

– Лекин сиз ундан қутулишнинг пайига тушгансиз, шундайми? У дунёдан кўз юмиб улгурмасиданоқ бошқа қизга қараб чопгансиз. Ахир, сиз буни инкор этмайсиз-ку, тўғрими?

– Нима учун шундай қилганимни тушунтириб бердим, – дея такрорлади Клайд.

– Тушунтирдингиз! Тушунтирдингиз! Ҳалол, виждонини сотмаган, фахму фаросати бор ақалли биргина одам ҳам сизнинг бу тушунтирувларингизга ишонади, деб хаёл қиласиз, шундай эмасми?

Мейсон шу даражада дарғазаблигидан Клайд эътироуз билдиришга ботинолмади. Судья эса Жефсон томонидан эътироуз тушишини билиб, олдиндан:

«Эътиroz қабул қилинди!» – деди овози дўриллаб. Аммо Мейсон гапини давом эттираверди:

– Айтинг-чи, Грифитс, балки сиз қайиқни хиёл эҳтиётсиз ҳайдагандирсиз – салгина хато қилиб, ўзингиз ағдариб юборгандирсиз?

У Клайдга яна ҳам яқинроқ келиб, кўзини қисиб қўйди.

– Йўқ, сэр, мен эҳтиёт қилиб ҳайдаган эдим, бу бир баҳтсиз ҳодиса бўлди-ю, оддини ололмай қолдим.

Клайд гарчи ранги кетган ва чарчаган бўлса ҳам, лекин бутунлай хотиржам эди.

– Баҳтсиз ҳодиса. Тахминан Канзас-Ситидаги ҳодисага ўхшаш. Сиз, Грифитс, бунақангি баҳтсиз ҳодисаларни сувдай ичиб юборгансиз шекилли-а? – калака қилиб, узиб одди Мейсон.

– Қандай юз берганини мен тушунтиридим-ку, – дея жавоб қайтарди Клайд ҳоргин бир қиёфада.

– Ёш қизчалар ёки қизларнинг ўлими билан туғайдиган баҳтсиз ҳодисаларга сиз жуда ўрганиб олган экансиз, тўғрими? Кейин улардан биронтаси ўлиб қолса борми, сиз доим жуфтакни ростлар экансиз, а?

– Эътиroz билдираман! – деди қичқириб Белнеп, ўрнидан сакраб тураркан.

– Эътиroz қабул қилинди, – деди Оберуолцер кескинлик билан. – Бошқа ҳар қандай баҳтсиз ҳодисалар ушбу ишга аралаштирилмасин. Қоралов-чидан масалага яқинроқ бўлишини сўрайман.

– Грифитс, – дея давом этди Мейсон, у Канзас-Ситидаги воқеа муносабати билан аввал Жефсондан узр сўрашга мажбур бўлган эди, энди эса ундан аламини олганига ғоят мамнун эди, – бехосдан уриб юборишингиз оқибатида қайиқ ағдарилиб кетиб, сиз ва мисс Олден сувга қулаб тушган вақтларингизда ораларингиздаги масофа қанча эди?

- Очигини айтсам, эсимда йўқ.
- Анча яқин бўлган, шундайми? Бир-икки футдан ортиқмасдир ҳойнаҳой, тахминан, қайиқда бирга турганларингиздай-да?
- Билмайман... эсимда йўқ... балки шундайдир, сэр.
- Агар истасангиз, уни ушлаб олиб, кўтариб туришингиз ҳам мумкин эди-ю, лекин ораларингиз у қадар яқин бўлмагандан? Йиқилаётганини кўрганингизда сиз ахир уни ушлаб қолиш учунгина сакраб тургансиз-ку, шундайми?
- Ҳа, шунинг учун сакраб турганман, – зўрма-зўраки жавоб қайтарди Клайд, – бироқ мен уни ушлаб қолар даражада унга яқин эмас эдим. Эсимда, бирдан сувга кириб кетдиму, чиққанимда қарасам, у анча нарига бориб қолибди.
- Аниқроқ айтинг-чи, қанча жойга борибди? Мана шу ердан маслаҳатчилар ўтирган ўриндиқнинг бериги бошигачами? Ёки нариги бошигачами? Ёки ярмигачами ёки қандай?
- Очигини айтсам, сира эсимда йўқ. Назаримда, тахминан шу ердан нариги бошигача эди, шекилли, – деб алдади Клайд, орадаги масофани камида саккиз футча ошириб.
- Наҳотки! – хитоб қилди Мейсон, ўзини ҳаддан ташқари фазаблангандай кўрсатиб. – Мана бу қайиқ афдарилиб тушди дейлик, сизлар икковингиз сувга деярли ёнма-ён йиқилгансизлар, юқорига сузиб чиққанингизда эса бир-бирларингиздан салкам йигирма футча нарида бўлиб қолибсизлар? Шу гал хотирангиз хиёл янгишгандай туюлмаяптими, сизга?
- Ҳа, шўнғиб чиққанимда менга шундай кўринган эди.
- Ҳа, майли, қайиқ афдарилиб кетгач, иккowingиз ҳам сув юзасига шўнғиб чиққанларингиз-

дан сүнг, сиз қайиққа нисбатан қаерда эдингиз? Мана, қайиқ – сиз залнинг қаерида бўлишингиз керак – мен оралиқдаги масофа маъносида айтмоқчиман?

– Мен ахир, айтдим-ку, шўнгиб чиққан вақтимда буни дурустроқ чамалай олмадим, – деб тақрорлади Клайд, қаршисида ястаниб ётган залга хавотир ва шубҳа билан аланглаб. Мейсон унга тузоқ қўяётгани аниқ эди. – Назаримда, оралиқ тахминан мана шу ердан сизнинг столингиз орқасидаги тўсиққача эди шекилли.

– Демак, ўттиз-ўттиз беш футлар чамаси экан-да, – деб эсига содди Мейсон маккорона, пайт пойлаб.

– Ҳа, сэр. Тахминан, шунча эди. Лекин аниқ билмайман.

– Шундай қилиб, сиз ҳув анави жойда, қайиқ эса мана бу ерда бўлган, хўш, бу пайтда мисс Олден қаерда эди?

Мейсон хаёлида математик ёки геометрик ҳисоблар асосида қандайдир режа тузаётганини Клайд ҳам тушуниб етди, шу режа ёрдами билан у Клайднинг айбини бўйнига қўйиш ниятида эди. Клайд дарров ҳушёр тортди-да, Жефсон томонга кўз югуртирди. Айни пайтда у, Робертани ўзидан яна ҳам узоқроққа кетказишининг иложи йўқмикан, деб боши гаранг эди. Унда у Клайдга нисбатан қайиққа яқинроқ турган бўлсинми? Ҳа, албатта-да, шуниси маъқул! Кейин у, Роберта қайиққа икки ҳисса яқинроқ жойда эди, ҳарқалай, бундан каммас, деган фикрга ўйламай-нетмай, таваккалига ёпишиб олди-ю, шундай десам ютаман, деб ўйлади. У шундай деди ҳам.

– Демак, у сиздан ҳам, қайиқдан ҳам ўн беш футча нарида экан-да, ундан ортиқмас? – дея дарров гапни илиб олди Мейсон.

– Ҳа, сэр, тахминан шунча. Шунча эди, чамамда.

– Бундан чиқди, ўша арзимаган оралиқни ҳам сузиб ўтолмадим ва атиги ўн беш футча нарида турган қайиққа етиб олгунча унга сув юзасида туришига күмаклашолмадим, демоқчисиз-да?

– Аммо мен айтдым-ку, сувдан шўнгигиб чиқсан пайтимда ўзимни хийла йўқотиб қўйдим, у бўлса талвасага тушиб сувни шапиллатиб, додлаётган эди...

– Лекин шундоқ яқинингизда, ўзингиз айтганингиздай, атиги ўттиз беш футча нарида (дарров шунча олисга кетиб қолгани ҳам қизиқ, агар билсангиз!) қайиқ турган эди-ку. Охири сиз соҳилга чиқиб олгунингизча беш юз футча масофани сузиб ўтгансизу, шунга қарамай, ўша қайиққа бориб, жон сақлаб улгуриши учун уни Робертага шундоққина туртиб юборолмабсиз, хўш, шундай демоқчимисиз? Ахир, у юзада туриш учун жон ҳолатда сувни тапиллатаётган эди-ку, шундайми?

Суд маслаҳатчилари ва халойиқнинг синчковлик билан қаттиқ тикилаётганини сезган Клайд:

– Ҳа, сэр. Лекин мен аввалига жуда довдирраб қолган эдим, – деди қовоғини уйганча ўзини оқдаб, – кейин... кейин... (бутун залдан ёғилиб турган кучли шубҳа ва ишончсизлик туйғуси уни ҳаддан ташқари оғир юк бўлиб эзаётган, шу боисдан бояги мардлиги ҳам сусайиб бораётган эди; у гапидан адашиб, дудуқданиб қолди) кейин, эҳтимол, нима қилиш зарурлигини дарров ўйлаёлмадим шекилли. Бунинг устига қўрқдим, агар унга яқинлашсам...

– Ҳа-ҳа, биламан: ақдий ва маънавий қўрқоқ, – заҳарханда билан илжайиб қўйди Мейсон. – Устига-устак, сиз ўзингизга шошмаслик зарур бўлганда ақлингизни унчалик тез ишлатмасликка, шошилиш зарур бўлганда эса тез ишлатишга анча яхши ўрганганд экансиз. Шундайми, хўш?

– Йўқ, сэр.

– Майли, агар ундан бўлмаса, менга бошқа бир нарсани айтиб берингчи, Грифитс: нима учун сиз сувдан чиққанингиздан сўнг бир оз вақт ушланиб, ўрмонга кириб кетишдан аввал анави аппарат оёқчаларини беркитишгача иродангиз етибди-ю, аммо мисс Олденни қутқаришга келганда эса бирдан «довдираф» қолибсиз ва ҳатто бунга уриниб ҳам кўрмабсиз? Қирғоқча қадам қўйишингиз биланоқ қандай қилиб сиз бирданига бу даражада вазмин ва уддабуро бўлиб қолдингиз? Хўш, бунга нима дейсиз?

– Ҳа... мен... ахир, айтдим-ку... ҳеч нарса қўлимдан келмаслигини кейин пайқадим.

– Ҳа, буларнинг ҳаммасини биз биламиз. Лекин сиз, сувда юз берган шунчалик даҳшатли саросимадан сўнг, шунақанги нозик дақиқада фақат эҳтиёткорлик юзасидангина, шу бир аппарат оёқ-часини яшираман, деб ҳаяллаб қолиш учун ниҳоятда хушёр бош кераклигини тушунмаяпсизми? Хўш, қандай қилиб сиз аппарат оёқчаси тўғрисида бу қадар тўғри фикр юритибсиз-ку, лекин бундан бир неча дақиқа олдин эса қайиқ хусусида ҳатто бундай бир тузукроқ ўйлаёлмабсиз ҳам?

– Лекин... ахир...

– Гўё сизда юз берган ўша сохта руҳий бурилишга қарамай, сиз унинг тирик қолишини истамагансиз! Шундаймасми, ахир? – бақириб юборди Мейсон. – Қайгули, ачинарли ҳақиқат ҳам мана шу. У чўка бошлиған, сизга эса аслида худди шу нарса керак эди, шунинг учун ҳам сиз уни бамайлихотир чўқтириб юборгансиз! Шундай эмасми, ахир?

У бу гапларни айтиб бақираётганда гавдаси дағ-дағ қалтирап эди. Клайд қайиқقا тикилиб турарди; шу пайт унга Робертанинг кўзлари ва унинг жон талвасасида бақирган овози қўрқинчли ва кишини ларзага солар даражада яққол кўри-

ниб кетдики... У боши айланиб, гужанак бўлганча креслога ўтириб қолди: Мейсон ўз талқинида ҳаётда юз берган ҳақиқий воқеаларга шу қадар яқин келиб қолдики, бу нарса Клайдни даҳшатга солар эди. Ахир, у Роберта сувга йиқилгандан сўнг уни ўзи қутқаришни истамаганини бирон марта ҳатто Жефсон ва Белнепга ҳам айтмади-ку. Доимо ҳақиқатни яшириб, уни қутқармоқчи эдим, бироқ ҳаммаси кўз очиб юмгунчалик вақт ичида юз бердики, мен эсанкираб қолдим, унинг қичқириғи ва ҳаёт учун мардсиз курашаётганидан қўрқиб кетиб, фарқ бўлгунига қадар бирор-бир чора излаб тополмадим, деб таъкидлаб келяпти у.

– Мен... мен уни қутқармоқчи эдим, – деб тўнғиллади у; юзи эса қўкариб кетди, – лекин... лекин... айтдим-ку, мен довдираб қолган эдим... кейин... кейин...

– Гапларингизнинг бари ёлғонлигини ўзингиз ҳам биласиз-ку! – деб қичқирди Мейсон Клайдга томон яқинлашиб; у бақувват қўлларини кўтарди, бадбашара юзи эса ғазаб алангасида ёнар, бамисоли қасоскор Немезида<sup>1</sup>нинг хунук ниқобини ёки фуриялар<sup>2</sup>ни эслатар эди. – Бахти қаро, азоб-уқубатда ўрганган бу қиз бечоранинг ўлиб кетишига атайлаб, ёвуз бир совуққонлик билан йўл очиб берганингизни ўзингиз ҳам биласиз, ваҳоланки, сиз уни осонгина қутқариб қолишингиз ҳам мумкин эди, бунинг учун ўз жонингизни деб сузиб ўтганингиз ўша беш юз фут масофадан атиги эллик футини сузиб борсангиз кифоя эди! Шундайми ёки йўқми?

<sup>1</sup> Немезида – қадимги юонон мифологиясида Тун худосининг қизи, «немезида» юонончасига «адолатли нафрат» дегани. Инсон ҳақиқи-хуқуқини оёқости қилувчиларга нисбатан қаоскорлиги билан ном қозонган мифологик қаҳрамон. (*Мұхаррір*)

<sup>2</sup> Фуриялар – қадимги Рим мифологиясида уч опа-сингил, қасос худолари.

Энди Мейсон Робертани Клайд қандай ўлдирганини ўзи аниқ билишига шубҳа қилмай қолди – чунки Клайднинг юзи ва хулқидаги нималариdir унда шундай қатъий ишонч туғдирган эди – шу боисдан ҳам у қандай бўлмасин, буни айборнинг бўйнига қўйдириб олишга жазм этди. Аммо Белнеп аллақачоноқ ўрнидан туриб, эътиroz билдириган эди: менинг ҳимоям остидаги гувоҳга нисбатан суд маслаҳатчиарини чираб бўлмас даражада гижгижляяптилар, шунинг учун мен бу суд муҳокамасини бутунлай нотўғри ва бекор деб ҳисоблашларини талаб қилишга ҳаққим бор – ва талаб ҳам қиласман – деб мурожаат этган эди, унинг эътиrozини Оберуолцер кескин равишда қайтариб ташлади. Шунга қарамай, Клайд Мейсонга, гарчи ниҳоятда бўш ва аянчли оҳанг билан бўлса-да, ҳарқалай эътиroz билдириб улгурди:

– Йўқ, йўқ! Мен ундай қилмаганман! Мен уни кутқармоқчи бўлдим, лекин қўлимдан келмади!

Бироқ Клайднинг бутун хатти-ҳаракати унинг чиндан ҳам ёлғон гапираётгани, чиндан ҳам Белнеп оғиз кўпиртириб таърифлаётган ақлий ва маънавий қўрқоқ одам эканлигини исботлаб бераётган эди (буни ҳар бир суд маслаҳатчиси ҳам сезаётган эди), тагин энг ёмони шунда эдики, Робертанинг ўлимига ҳам аниқ у айбдор эди. Ҳақиқатан ҳам, деб сўрар эди ўз-ўзидан ҳар бир суд маслаҳатчиси Клайдни эшита туриб, мисс Олденни у нима учун кутқармаганикин-а, ўзи бақувват бўлса, соҳилга ҳам кейин бемалол сузиб чиқа олар эди? Ёки жуда бўлмагандга, қайиқقا етиб бориб, уни Робертага тутқазиб қўйса бўлмасмиди?

– Унинг оғирлиги бор-йўғи юз фунтча келар эди, шундайми? – қаттиқ ҳаяжонланганча давом этди Мейсон.

– Ҳа, ўшанчадир.

– Сиз-чи? Ўша вақтда сизнинг оғирлигингиз қанча эди?

– Бир юз қирқ фунт ё шунга яқин, – дея жавоб қайтарди Клайд.

– Бир юз қирқ фунт келадиган эркак одам, – Мейсон суд маслаҳатчилариға заҳарханда билан мурожаат этди, – ожизгина, касалманд, ушоқ ва қушдаккина бир қиз чўкиб кетаётган пайтда унга яқин боришига қўрқибди, менга ёпишиб олиб, сувга чўқтириб юборади, деб қўрқибди! Яна бунинг устига ундан ўн беш ёки йигирма фут нарида шундай бир ажойиб, уч ё тўрт кишини бемалол кўтарадиган пишиқ-пухта қайиқ ҳам турган экан! Хўш, сизларча, бу нима ўзи?

Айтганларини тағин бир таъкидлаш ва тингловичилар онгига чуқурроқ сингдириш мақсадида Мейсон гапидан тўхтади, чўнтағидан каттакон оқ дастрўмолини олди-да, руҳий ва жисмоний зўриқишдан жиққа ҳўл бўлиб қетган бўйни, юзи ва қўлларини артди. Кейин у Бэртон Бэрлейга юзланди:

– Бэртон, қайиқни бу ердан олиб чиқиб кетишларини буоришингиз мумкин. Ҳарқалай, у ҳозирча бизга бошқа керак эмас.

Тўрт ёрдамчи ўша заҳотиёқ қайиқни кўтариб чиқиб кетишиди.

Шундан сўнг Мейсон ўзини яна қўлга олиб, Клайдга мурожаат этди.

– Грифитс, – дея бошлади у, – Роберта Олден соchlарининг ранги ҳамда ушлаб кўрганда уларнинг қандайлиги, шубҳасиз, сизга маълумdir, а, шундайми? Сиз, ахир, у билан жудаям яқин алоқада бўлгансиз, буни билишингиз керак?

– Ранги қандайлигини биламан... менимча, биламан, – деб жавоб берди Клайд сесканиб.

Шу гапдан сўнг унинг бадани увишиб кетганини ҳатто чет кўзлар ҳам сезгандай бўлди.

– Ушлаганда қандайлигини ҳам биласизми, а? – Мейсон яна ўша гапини қайтарди. – Орадан мисс Х чиққунига қадар, сиз мисс Олденни қаттиқ севиб юрган пайтларингизда, ҳойнаҳой, соchlарини ҳам қайта-қайта силаб кўргандирсиз?

– Билмайман, эсимда йўқ, – деб жавоб берди Клайд, Жефсоннинг қараб турганини кўриб.

– Тахминан ҳам-а? Дағалмиди, қаттиқмиди ёки ипакдек майнингинамиди, буни билишингиз керак. Буни биласиз, тўғрими?

– Ҳа, соchlари майнин эди.

– Билсангиз, менда унинг бир тутам сочи бор,-деди Мейсон, асосан Клайдни қийнаш ва асабини ўйнаш мақсадида. У столдан конверт олди-да, ундан узунгина қўнғир соч тутамини чиқарди. – Ўхшайдими унинг сочига?

У, Клайдга яқин келтириб кўрсатди. Ларзага тушган ва қўрқиб кетган Клайд ҳудди ҳаром ёки хавфли бир нарсадан чўчигандай орқага тисарилди, лекин кейинги дақиқадаёқ ўзини қўлга олишга ҳаракат қилди, аммо шуни ҳам зийрак суд маслаҳатчилари сезиб улгуришган эди.

– Бас, қўрқманг, – уни Мейсон заҳарханда билан юпатган киши бўлди. – Бу бор-йўғи марҳума суюклигингизнинг бир тутам сочи, холос.

Ҳаяжонга тушган Клайд суд маслаҳатчилари ўзига синчилаб қараб турганинни сезиб, қўлини чўзиб, соч тутамини олди.

– Кўринишидан, силлиқлигидан унинг сочига ўхшайди, тўғрими? – яна қайтарди Мейсон.

– Ҳа, менимча ўхшайди, – деб жавоб берди Клайд бўшашган овоз билан.

– Энди гап бундай... – давом этди Мейсон; у тезлик билан столга томон борди-да, ўша заҳотиёқ Клайднинг олдига қайтиб келди, унга фотография аппаратини узатди: аппарат объекти билан қоп-

қоғи ўртасида бир вақтлар Бэрлэй суқиб қўйган Робертанинг икки тола сочи чувалашиб туради. – Ушланг-чи, буни. Гарчи илгари тонган бўлсангиз ҳам, бу аппарат сизники. Мана бу икки тола сочга қаранг. Кўряпсизми? – У аппаратни Клайднинг юзига худди уриб юборар даражада яқин келтириди. – Бу толалар мана бу ерга илашиб қолибди, ҳойнаҳой, бу сиз уни урган дақиқада илашган бўлса керак, шунчалик секин урибсизки, юзини ёриб юборибсиз. Хўш, энди суд маслаҳатчиларига бу соч уникими ёки йўқми, айтиб беролмайсизми?

– Мен билмайман, – деди Клайд зўрга, овози ичига тушиб.

– Нима, нима? Қаттиқроқ гапиринг. Унақанги маънавий ва ақлий қўрқоқ бўлманг. Бу соchlар уникими ёки йўқми?

– Билмайман, – деб такрорлади Клайд, айни пайтда у соч толаларига қайрилиб ҳам боқмади.

– Мана буларга қаранг, қаранг! Уларни бир-бираiga солиштириб кўринг. Бу мисс Олденнинг сочи – буни биз биламиз. Энди аппаратдаги толалар ҳам уникилиги сизга маълумдир-а, шундайми? Улардан жирканмасангиз ҳам бўлади. У тирик юрган пайтида шу соchlаридан қайта-қайта силагансиз. Энди у ўлиб ётиби. Кўрқманг, соchlари сизни тишлиб олмайди. Хўш, мана бу иккита тола, атайлаб келтирилган мана бу унинг соч тутамидан бирон жиҳати билан фарқ қиласдими, ушлаб кўрганда, рангида ва умуман, фарқи сезиладими ёки мутлақо тафовути йўқми? Қаранг! Жавоб беринг! Иккалови ҳам бир хил сочми ёки йўқми?

Шунақанги қисталанг остида, Белнепнинг эътиrozларига ҳам қарамай, Клайд ўша соchlарни кўриб чиқишига ва ҳатто қўлига олишга мажбур бўлди. Лекин эҳтиёткорлик билан жавоб қайтара бошлади:

– Бирон нарса деёлмайман. Күринишидан, ушлаб күрганда бир оз ўхшайды-ю, аммо аниқ айтолмасам керак.

– Эҳ-е, айтолмасам керак дөнг? Гарчи сиз ўша бешафқат, ёвузларча туширган зарбангиздан сүнг мана бу иккита тола аппаратта илашиб қолганини билсангиз ҳам айтмайсизми?

– Мен унга ҳеч қандай ёвузларча зарба туширганман, – дея эътиroz билдириди Клайд, Жефсоннинг қараб турганини кўриб, – кейин бу соchlар кимникилигини ҳам билмайман.

У ўзига ўзи, бу одам мени чалфитиб бўпти ва кўрқитолмайди ҳам, дер эди-ю, лекин ҳолдан тоийиб, кўнгли айниб бораётганини ҳам шундоқ сезиб турар эди. Қўли баланд келган Мейсон эса шу руҳий зарбанинг ўзиданоқ мамнун бўлиб, аппарат ва соч тутамини яна столга қўйди-да, деди:

– Майли, аппарат сувдан чиқариб олинганда, унда мана бу соч толалари борлиги ҳақида бу ерда етарли гувоҳликлар бериб ўтилди. Шахсан ўзингиз айтган гапга қараганда, сувга тушиб кетишдан оддин аппарат сизнинг қўлингизда бўлган.

У, Клайд учун тағин қандай азоб ўйлаб топсамикин, деб ўзига ўзи савол берганча бир оз жим қолди, сўнгра яна бошлади:

– Энди, Грифитс, ўрмондаги саёҳатингиз тўғрисида сўрамоқчиман: Учинчи миль Кўрфазига сиз қай пайтда етиб бордингиз?

– Менимча, аzonда соат тўртларда, айни тонготарда.

– Ўшандан кейин сиз то пароход жўнагунча нима иш қилдингиз?

– Шунчаки у ёқдан-бу ёқقا юриб турдим.

– Посёлканинг ўзидами?

– Йўқ, сэр, унга яқинроқ жойда.

– Ҳойнаҳой, ўрмондадир? Бемаҳал изғиб юрганингизга ғалати туюлмаслиги учун посёлканинг уйғонишини кутгансиз, шундайми?

– Шунчаки мен кун чиқишини кутдим. Бунинг устига چарчаган эдим, бир оз дам олишга ёнбошлиладим.

– Ҳа, яхши ухлаб, яхши тушлар кўргандирсиз?

– Ҳа, چарчаганимдан салгина қўзим илинибди.

– Пароход тўғрисида, унинг жўнаб кетиш вақти ва умуман, Учинчи миль Кўрфази тўғрисидаги аниқ маълумотларни қаердан олган эдингиз? Шуларниң ҳаммасини олдиндан билиб олишга ҳаракат қилганмидингиз?

– Ие, бу ерда Шейрон билан Учинчи миль Кўрфази ўргасида пароход қатнаши ҳаммага маълум-ку.

– Ўхӯ, шундайми, ҳаммага маълум денг? Фақат шунинг учун сиз буларни билардингизми?

– Кейин биз қаерда никоҳдан ўтсак экан, деб жой излаган пайтимиизда ҳам Учинчи миль Кўрфазига эътибор қилган эдик, – дея қувлик билан жавоб қайтарди Клайд. – Аммо у ёққа поездда бориб бўлмаслигини ҳам кўрган эдик: чунки темир йўл фақат Шейронгача борган экан.

– Аммо сиз бу жой Катта мушгирнинг жануборогидалигини сезган эдингизми?

– Ҳа, назаримда сезган эдим, – деди Клайд.

– Куролсоз бекатининг фарб томонидан ўтадиган йўл Катта мушгир кўлининг паст қисмини айланниб, Учинчи миль Кўрфазининг жанубига қараб кетишини ҳам билардингизми?

– Жанубий соҳијадаги ўрмонда бехосдан мен қандайдир йўлгами, ё сўқмоққами дуч келиб қолдим, холос, бироқ мен унинг айни тўғри йўллигини ҳатто ўйлаб ҳам кўрмаганман.

– Тушунарли. Нега унда сиз ўрмонда уч йўловчини учратган пайтингизда, улардан Учинчи миль Кўрфазигача ҳали олисми, деб сўрадингиз?

– Улардан сүраганим бу эмас эди, – деб жавоб берди Клайд, Жефсоннинг маслаҳатларига амал қилиб. – Мен улардан Учинчи миль Кўрфазига олиб борадиган бирор-бир йўлни билмайсизларми ва у йўл олисми, деб сўрадим. Мен айни ўша йўлда турганимни билмас эдим.

– Бироқ улар бу ерда мутлақо бошқача гапиришди-ку?

– Улар нима дейиши билан нима ишим бор, мен улардан фақат ўшандай деб сўрадим.

– Сизга қулоқ соладиган бўлсак, ҳамма гувоҳдар ёлғончи-ю, фақат биргина сиз ҳалол одамсиз, шундай демоқчимисиз? Хўш, Учинчи миль Кўрфазига етиб борганингиздан сўнг тамадди қилиш учун бирор-бир жойга кирмадингизми? Ҳарқалай, қорнингиз ҳам очгандир, шундайми?

– Йўқ, қорним оч эмасди, – деб жавоб берди Клайд пинагини бузмай.

– Ўша жойлардан иложи борича тезроқ чиқиб кетишни ўйлагансиз, тўғрими? Анави уч киши Катта мушгирга етиб бориб, мисс Олденнинг бошига тушган бахтсизликни эшитгач, сизни қандай учратганларини айтиб беришларидан қўрққансиз, шундайми?

– Йўқ, бу нотўғри. Аммо мен ўша ерларда юришини истамай қолдим, сабабини эса айтганман.

– Тушунарли. Бироқ Шейронда эса ўзингизни анча-мунча бехатар, анави жойлардан олисда сезганингиз учун вақтни бой бермай дарров овқатга ёпишгансиз, шундайми? У ерда роса иштаҳа билан овқатлангансиз, тўғрими?

– Очифини айтсам, билмайман. Мен бир финжон қаҳва ичдим ва сендвич едим.

– Бу ерда аниқлаганига кўра, бир кесим пирог ҳам егансиз, – деб қўшиб қўйди Мейсон. – Кейин худди ҳозиргина Олбэнидан келаётгандай вокзал-

дан чиққан одамларга қўшилиб олгансиз, сўнгра ҳаммага Олбэнидан келдим, деб айтгансиз. Шундай бўлганмиди?

– Ҳа, шундай бўлган эди.

– Айтинг-чи, кўнглида яқингинада нажотбахш бурилиш юз берган чинакам ҳассос одамга нисбатан сиз ўзингизни ниҳоятда тадбиркор ва эҳтиёткор тутганга ўхшаб кўринмаяпсизми? Ўрмонда яшириниб юргансиз, кун ёришишини пойлагансиз, ўзингизни Олбэнидан келаётгандай қилиб кўрсатгансиз...

– Мен буларнинг барини тушунтириб берганман, – деб жавоб қайтарди Клайд қайсараги тутиб.

Мейсон энди яна бир забт билан Клайднинг шармандали қилигини, яъни Роберта унга ўзини шу қадар фидо қилганига қарамай, уни файриқонуний тарзда қўпгина эркаклар билан яшаб юрган суюқ аёлга чиқармоқчи бўлганини фош этиб ташлаш ниятида эди, негаки, у саёҳат пайтида турли меҳмонхоналарда уни турли хил номлар билан рўйхатдан ўтказдирган эди.

– Нега сизлар алоҳида-алоҳида хона олмадингиз?

– Биласизми, у буни хоҳламади. Мен билан бирга бўлишни хоҳлади. Бунинг устига, пулим ҳам кам эди.

– Борди-ю, ўшандай бўлган тақдирда ҳам, жуда қизиқ-ку: илгари унга нисбатан ҳурматингиз анча-мунча суст эди, кейин, ўлгандан сўнг эса унинг номус ва шаъни сизни шу қадар ташвишга солиб қўйганки, гапингизга қараганда, ишқилиб унинг покиза номига доф тушмасин, деб қай аҳволда ўлганини ҳам дилингизга сир қилиб яширганча қочиб қолгансиз. Хўш, бу қанақаси бўлди?

– Муҳтарам мистерлари, – гапга аралашди Белнеп, – бу энди сўроқ эмас, катта бир нутқ-ку.

– Саволимни қайтариб оламан, – дея даф қилди Мейсон. – Айтгандай, Грифитс, – давом этди у, –

ақлий ва маънавий қўрқоқлигингизни сиз ўзингиз тан оласизми ёки йўқми?

– Йўқ, сэр. Тан олмайман.

– Тан олмайсизми?

– Йўқ, сэр.

– Демак, сиз ёлғон гапираётган пайтингизда, айниқса, қасам ичиб туриб ёлғон гапираётганингизда бошқа ҳар қандай кишидан, ақлий ва маънавий жиҳатдан қўрқоқ бўлган кишидан ҳам мутлақо фарқ қиласиз экансиз-да, шу сабабли ҳар бир қасамхўр ва сохта гувоҳлар лойиқ бўлган нафрат ва жазога сиз ҳам нолойиқ экансиз-да? Тўғрими?

– Ҳа, сэр. Ўйлашимча, тўғри.

– Гап бундай, агар сиз ақлий ва маънавий қўрқоқ бўлмасангиз, ўзингиз айтганингиздай, мисс Олденни бехосдан уриб юбориб, Катта мушгир кўли тубида ташлаб кетавергансиз, бу жудолик унинг түққанларига қанчалар мусибат келтиришини била туриб, бирон кишига бир оғиз ломмим ҳам демай, тўғридан-тўғри жўнайвергансиз, аппарат оёқчаларини буталар орасига яшириб, ҳақиқий қотиллардек пинҳона қочиб қолгансиз, – хўш, унда буни қандай тушунмоқ керак? Агар сизга бошқа бирор кимса тўғрисида шундай нарсани сўйлаб беришса, сиз нима деб ўйлар эдингиз? Сизнингча, нима бу ўзи: қотилликни ният қилиб, уни амалга оширган, кейин эса секингина яшириниб кетмоқчи бўлган одамнинг ишими ёки шов-шув кўтарила, ҳузур-ҳаловатига зиён етиши мумкинлигини ўйлаб, ўзи йўлдан урган қизнинг фавқулодда ўлимни туфайли жавобгарликка тортилишдан қочмоқчи бўлган ақлий ва маънавий қўрқоқ одамнинг анчайин разил ва айёrona ҳийла-найрангларими? Нима ўзи?

– Ҳар ҳолда уни мен ўлдирмаганман, – деб қайсарлик билан такрорлади Клайд.

- Саволга жавоб беринг! – деб бақирди Мейсон.
- Суддан, бунақанги саволга жавоб қайтармасликка гувоҳнинг ҳаққи борлигини унга тушунтиришини сўрайман, – гапга аралашди Жефсон, у ўрнидан туриб, аввал Клайдга, кейин Оберуолцерга диққат билан тикилиб турди. – Бу дабдабали қуруқ савол ушбу ишга у ёки бу жиҳатдан бевосита алоқадор эмас.
- Тўғри, – деб тасдиқлади Оберуолцер. – Гувоҳ жавоб бермаслиги мумкин.

Кутилмаган бу ёрдамдан бирдан руҳланиб кетган Клайд индамай ҳаммага қараб қўйди.

– Майли, давом эттирамиз, – деди Мейсон. У Белнеп ва Жефсондан ҳали ҳеч қачон бу қадар таъби хира тортиб, дарғазаб бўлмаган эди, чунки улар зийраклик қилиб, Мейсон олиб бораётган ҳар бир ҳужумнинг кучи ва моҳиятини йўққа чиқаришга интилаётган эдилар, шунинг учун ҳам Мейсон уларнинг фолиб келишига асло йўл қўймасликка ўзгача бир қатъият билан киришмоқчи бўлди,

– Демак, саёҳатга чиққунга қадар, агар иложи бўлса, мисс Олденга уйланмоқчи эмасдим, деяпсиз-а?

– Ҳа, сэр.

– У эса уйланишингизни истаган, лекин сиз ҳали бундай қарорга келмагансиз?

– Ҳа.

– У жомадонига солиб қўйган пазандалик ҳақидаги китобчадан, туздон, қалампир идиш, қошиқ, пичоқ ва бошқа майда-чуйдалардан хабарингиз бормиди?

– Ҳа, сэр, хабарим бор эди.

– Бильцдан кета туриб, шунча нарса ола кетган одам эрсиз қолиб, дуч келган жойда арzon-гаровгина хонада жойлашишни, сиз эса ҳафтада бир ёки ойда бир келиб туришингизни ўйлаши мумкинми?

Белнеп ҳали эътиroz билдириб улгурмасидан, Клайд айни айтилиши зарур бўлган гапини қистириб қолди:

- Бу ҳақда у нималарни ўйлагани менга қоронғи.
- Сиз фавқулодда телефон орқали сўзлашув пайтида, масалан, дейлик, сизга у: агар мени олиб кетиш учун Бильцга келмасанг, мен ўзим Ликургга бораман, деб ёзганидан сўнг, унга уйланишга ваъда бермаганимидингиз?
- Йўқ, сэр, ваъда бермаганман.
- Сиз у даражадаги ақлий ва маънавий қўрқоқ эмассизки, бирдан ваҳимага тушиб, шунақанги ваъдаларни бериб юборсангиз, тўғрими?
- Мен ҳеч қачон ақлий ва маънавий қўрқоқман, деб айтмаганман.
- Ўзингиз йўлдан урган қизга ҳам сизни қўрқитишига йўл қўймас эдингиз-а?
- Шунчаки мен у пайтда унга уйланишим зарурлигини тушунмаган эдим.
- Сиз уни ўзингизга мисс X чалик teng деб ўйламагансиз-да?
- Гарчи мен уни энди севмас эканман, унга уйланмаслигим керак, деб ўйлаган эдим.
- Ҳатто унинг номусини сақлаш ва ўзингиз ҳам ахлоқли одам сифатида қолишингиз учун ҳам, мабодо унга уйланмасмидингиз?
- Биласизми, мен у пайтда бирга туриб икковимиз ҳам баҳтли бўлолмаймиз, деб ўйлар эдим.
- Бу, албатта, юрагингизда юз берган буюк ўзаришгача бўлган воқеа-да?
- Ҳа, бу биз Утикага жўнашимиздан олдин эди.
- Ўша вақтдаёқ мисс X нинг дарди хаёлида ақлингиздан айрилган экансиз-да?
- Ҳа, мисс X ни севиб қолган эдим.
- Эсингиздами, мисс Олденнинг сизга юборган, сиз эса мутлақо жавоб қайтармаган хатлари-

дан бирида у қүйидагиларни ёзган эди (шу ерда Мейсон дастлабкы етти мактубдан бирини ажратиб олиб, ўқий бошлади): «Ахир, ҳамма ишларимиз энди ҳал бўлган ва ваъдангга биноан мени олиб кетиши учун келасан-ку, гарчи хавотир ва даҳшатли шубҳаларни ўзимдан нари ҳайдашга уринсам ҳам, бари бир улар мени азобга соляпти». Хўш, «ҳамма ишларимиз энди ҳал бўлган» деганда, у айни нимани назарда тутган эди?

– Билмайман, эҳтимол, мен унинг олдига бориб, вақтингчага қаёққадир олиб кетишимиғина назарда тутгандир.

– Аммо уйланиш эмас-да, албатта?

– Йўқ, мен ундан бермаганман унга.

– Бироқ ўшандан кейинок, бояги хатнинг ўзидаёқ у мана бундай деб ёзади: «Бу ерга келаётганимда, тўппа-тўғри уйга қараб юрмай йўл-йўлакай Гомерда тўхтаб, опам билан поччамни кўриб ўтмоқчи бўлдим. Яна биз қачон кўришамиз, ким билади, негаки мен уларга фақат номусли аёл сифатидагина йўлиқиши истайман – акс ҳолда умрбод кўришмаганим маъқул!» Сизнингча, у «номусли аёл» деб ёзганда нимани назарда тутган? Бола туғилгунча у эрга чиқмай, аллақайси бир олис жойда ҳаммадан йироқда яшайверади-ю, сиз бўлсангиз унга оз-моздан пул юбориб турасиз, балки кейинроқ бориб у ҳам қайтиб келар ва ўзини бегуноҳ бир ойимча-ю ёки ёш бева аёл қилиб кўрсатар, у шундай демоқчими ё бошқача дарди борми? У, назарингизда ўзгача режа тузганга ўхшаб туюлмаяптими: ақалли вақтингча сизга турмушга чиқиб, боланинг ҳам қонуний бўлишини ўйламаяптимикан? Унинг «ҳамма ишларимиз ҳал бўлган» деб эслатиб ўтиши ҳам бежизмасдир, тагида маъноси кўпдир дейман, шундай эмасми?

– Эҳтимол, у шундай деб ўйласа ўйлагандир, – чалғитиброқ жавоб берди Клайд. – Лекин мен унга уйланаман, деб сира ваъда бермаганман.

– Майли, биз буни бир четга қўя турамиз, – дея қайсарлик билан давом этди Мейсон. – Манави гап билан шуғулланайлик (у ўнинчи хатдан ўқий бошлади): «Азизим, ахир, сен уч-тўрт кун олдин келсанг ҳам бўлади-ку, фарқи нима? Майли, ҳечқиси йўқ, пулимиз бир оз камроқ бўла қолар. Кўрқма, бирга турар эканмиз, шундоқ ҳам яшаб кетишимизга инонаман, ҳойнаҳой, энг кўпи билан олти-саккиз ойга чидасак бас. Ўзинг биласан-ку, агар истамасанг, кейин сени тинч қўйишига ҳам розиман. Борини аяб, тежаб-тергаш қўлимдан келади... Акс ҳолда, гарчи сен учун бошқа бирор йўл топишни истаган тақдиримда ҳам, бари бир бунинг иложи йўқ». Сизнингча, бу қандай, «борини аяб, тежаб-тергаш» ва сизни саккиз ойдан кейингина тинч қўйиш, хўш, шуларнинг бари нимани англатади? Унинг қаердадир истиқомат қилиши-ю, сизнинг эса, ҳафтада бир бориб ундан хабар олиб туришингизни билдирадими? Ёки ўйлаганидек, сиз чиндан ҳам у билан бирга кетиб, никоҳдан ўтмоқчи бўлганингизними?

– Билмайман, у балки мени мажбуrlай оламан, деб ўйлагандир, – жавоб берди Клайд; суд маслаҳатчилари ва халойиқ – фермерлар ҳамда ўрмончилар, пастқам жойларда яшовчи мана шу кишиларнинг бари Клайднинг оғзидан бехосдан чиқиб кетган «мени мажбуrlай оламан, деб ўйлагандир» деган иборадан ғазабланиб, ундан нафратланганча, масхараомиз пишиқириб кулиб қўйишиди. – Мен унга уйланишига ҳеч қачон кўнган эмасман, – дея гапини тутатди Клайд.

– Ахир, у сизни мажбуrlай олармиди. Демак, бу масалага муносабатингиз шу экан-да, шундайми, Грифитс?

- Ҳа, сэр.
- Сиз бу масалада ҳам, истаган бошқа нарса ҳақида ҳам шу қадар осон қасам ича оласизми?
- Мен ахир қасам ичғанман-ку.

Йифилган одамларнинг деярли бари аввал бошданоқ айбланувчига қаттиқ жирканч ва газаб билан қараётган эди, энди эса Мейсон ўша жирканч ва газаб ақл бовар қиласа даражада ташқарига отилиб чиқаётганини ҳис этди, буни Белнеп ҳам, Жефсон ҳам, Клайднинг ўзи ҳам сезди. Суд залини нафрат ва газаб эгаллаб олган эди. Олдинда эса Клайдни хўрлаб, азоб ва қийноққа солиш учун уюм-уюм далиллар ва гувоҳликлардан таваккалига, дуч келганини танлаб олишга Мейсоннинг вақти жуда ҳам етарли эди. Шу боисдан у қофозларига бир қараб олди-да (кулай бўлсин учун Эрл Ньюком уларни стол устига елпифичга ўхшатиб ёйиб қўйган эди), яна гап бошлиди:

— Грифитс, кеча бу ерда сизни ҳимоячингиз мистер Жефсон сўроқ қилганда (шу ерда Жефсон истеҳзо билан таъзим қилиб қўйди), сиз, кўнглингиздаги анави бурилиш июлда, Роберта билан Фондада яна учрашган вақтингизда, яъни унинг учун ҳалокатли тугаган айни ўша саёҳатга икковингиз жўнаганингиздан сўнг юз берганини айтдингиз.

— Ҳа, сэр, — деди Клайд, Белнеп эътиroz билдириб улгурмасидан; аммо адвокат «унинг учун ҳалокатли тугаган ўша саёҳат» иборасини шунчаки «ўша саёҳат», деб ўзгартиришга муваффақ бўлди.

— У билан бирга кетган вақтингиздан буруноқ ундан кўнглингиз қолиб бўлган эди, тўғрими?

— Тўғри, сэр... илгаригидек қаттиқ севмас эдим.

— Қанча вақт давомида — аниги қай пайтдан қай пайтгача — сиз уни астойдил севгансиз, яъни кўнглингиз қолмай турди?

– Нима десам экан, мен уни биринчи бор учратганимдаёқ севганман, то мисс Х га дуч келгүнгача.

– Ундан кейин севмаганмисиз?

– Нима десам экан, бирданига уни ёмон кўриб қолдим, деб айтолмайман. У мен учун қадрли эди... ҳатто жудаям қадрли эди... аммо, бари бир, кўнглим бурунгидай эмас эди. Назаримда, асосан унга раҳмим келаётганга ўхшар эди.

– Демак... қани, бир ҳисоблаб олайлик-чи... тахминан биринчи декабрлардан апрель ёки майгача экан-да, шундайми?

– Ҳа, тахминан шундай, сэр.

– Бундан чиқди, шу вақт ичида, яъни биринчи декабрдан апрель ёки майгача у билан яқин алоқада бўлишни давом эттириб юраверибсиз-да, а?

– Ҳа, сэр.

– Уни энди бурунгидай севмасангиз ҳам-а?

– Яъни... ҳа, сэр, – деб жавоб берди Клайд тутилиб.

Гап шаҳвоний мавзуга кўчиши билан суд залини тўлдириб ўтирган бутун қишлоқ аҳли безовтагланганча, ичи қизиб олдинга чўзилди.

– Бу ерда ўзингиз ҳам тан олганингиздай, у бутун борлифи билан фақат сизга берилган экан, кечалари ўз кулбасида бир ўзи ўтиараркану, сиз бўлсангиз танца ва ўтиришларга, дабдабали зиёфатлару автомобиль саёҳатларига жўнар экансиз-да?

– Ҳа, лекин мен доим кетавермас эдим, ахир.

– Ўхў, доим кетавермас эдим, денг? Сиз бу ерда Трейси Трамбал, Фредерик Сэлс, Фрэнк Гарриэт ва Берчард Тэйлорлар нима дейишганини эшитдингизми ёки эҳтимол, эшитмай қолгандирсиз?

– Эшитдим, сэр.

– Хўш, бу ёфи қандоқ бўлди, улар бари ёлғон гапиришдими ё, балки, ҳақиқатни гапиришгандир?

– Назаримда, улар эслай олганларича ҳақиқатни гапиришди.

– Бироқ улар унчалик аниқ-равшан эслай олишмади, шундай демоқчимисиз?

– Очигини айтганда, доимий эмасди менинг кетишим. Тахминан, ҳафтада икки-уч марта... эҳтимол, баъзан тўрт мартадир, лекин ундан ортиқмас.

– Қолган кечаларни мисс Олден билан ўтказармидингиз?

– Ҳа, сэр.

– Демак, хатининг мана бу ерида у айни ўша нарсани айтмоқчи бўлган шекилли? – Мейсон Роберта мактублари таҳидан яна бирини олди-да, ўқий бошлади: «Сен мени ташлаб кетган ўша даҳшатли рождестводан сўнг, деярли доим бутун тунларни танҳо ўзим ўтказаман». Хўш, у ёлғон ёзганми? – газаби тошганидан бақириб берди Мейсон, шундан кейин Клайд Робертанн ёлғончиликда айлаш нақадар хавфли эканлигини тушуниб, қўрқа-писа, ўсал бўлиб жавоб қайтарди:

– Йўқ, у тўғри ёзяпти. Лекин, бари бир, кўпинча мен у билан бирга бўлардим.

– Аммо, ўзингиз ҳам эшитганингиздай, миссис Гилпин ва унинг эри, биринчи декабрдан бошлаб мисс Олден ҳар кечани ўз хонасида доимо ёлғиз ўтказгани, унга раҳмлари келиб, одамовилигини эса файритабиий ҳисоблаб, у билан яқинлашиш ва хиёл кўнглини кўтаришга ҳаракат қилганлари, лекин у буни истамаганини айтиб беришди. Шу гапларни сиз эшитдингизми?

– Ҳа, сэр.

– Шунга қарамай, кўпинча у билан бирга бўлар эдим, деб тасдиқлайверасизми?

– Ҳа, сэр.

– Айни пайтда сиз мисс X ни севардингиз ва у билан тез-тез учрашиб туришга интилардингиз?

- Ҳа, сэр.
- Унга уйланиб олишга ҳам ҳаракат қилардингиз, шундайми?
- Ҳа, унга уйланмоқчи эдим... тұғри, сэр.
- Бироқ орада, бошқасига хушомад қилиш билан банд бўлмаган кечаларингизда мисс Олден билан илгариги муносабатингизни давом эттириб юравергансиз?

– Яъни... ҳа, сэр, – яна дудуқланди Клайд.

Бор сирларининг бу тахлит ошкор этилишидан ноқулай аҳволга тушиб қолаётгани уни ғоят ранжитар, лекин ўзининг у қадар қабиҳ эмаслиги – ҳадегандა, Мейсон уни таърифлаётгандақа бўлишни истамаганлигини у билар эди. Бошқалар ҳам – ликурглик киборлар доирасига мансуб ўша ёш-яланглар ҳам фариштадек бенуқсон эмаслар-ку, ахир, гапларига қарабоқ буни пайқаб олиш қийин эмас-ку.

– Билимдон ҳимоячиларингиз сизни ақлий ва маънавий қўрқоқ деб атаб, сиз учун анчагина юмшоқ ибора топиб беришганга ўхшаб туюлмаяптими назарингизда? – деди Мейсон заҳарханда билан.

Шу пайт жимжитликни бузиб, узун ва тор суд залининг қайсиидир тўридан ғазабнок бир ўрмончининг қайгули, аламзада бақирифи янгради:

– Бу баттол, насли бузуқ билан ади-бади айтишиб ўтирилаверадими! Шарт даф қилиш керак уни – вассалом!

Ўша ондаёқ Белнеп қичқириб эътиroz билдириди. Оберуолцер эса тинчлик ўрнатиш мақсадида болғачасини тақиллатиб урдида, тартиб бузувчини қамоқقا олиш, шу баҳонада жой етмай тик туриб қолганларнинг барини залдан чиқариб юборишни буюрди, бу буйруқ дарров ижро этилди. Тартиб бузувчи ўша заҳотиёқ қамоқقا олинди: у энди эр-

талаб суд олдида жавоб бериши керак. Ҳамма ёқ тинчигандан сүнг Мейсон яна гап бошлади:

– Грифитс, сиз айтдингизки, Ликургдан чиқиб кетаётганингизда, агар қандай бўлмасин йўлини топиб буларни тинчта олсангиз, Роберта Олденга уйланмоқчи бўлмагансиз?

– Ҳа, сэр. Ўша пайтда ниятим шундай эди.

– Демак, сиз Ликургга қайтиб келишингизга қаттиқ ишонган экансиз-да?

– Ҳа, сэр, мўлжалимда қайтиб келишим керак эди.

– Унда нега сиз ҳамма буюмларингизни сандиқчага солиб, қулфлаб қўйган эдингиз?

– Бу... бу... шунчаки... – Клайд сўз тополмай қолди. Ҳужум шу қадар тўсатдан бўлган эдики, у илгари айтилган барча гапларга шу қадар кам боғланган эдики, Клайд ақдини йиғишириб улгу-ролмади. – Биласизми, мен жудаям ишонган эмасдим... истасам-истамасам, бундан қатъи назар, туйқусдан жўнаб кетишинга тўғри келиб қолар, деб ўйлаган эдим.

– Тушунарли. Бундан чиқди, сиз мисс Олден билан бирга жўнаб кетишга бирдан аҳд қилиб қолсангиз – аслида шундай бўлган ҳам (шу ерда Мейсон «гапимга ишонишди, деб ўйлаяпсизми?» дегандай Клайднинг юзига қараб пиқирлаб қулиб юборди) – уйингизга қайтиб келиб, саёҳат олдидан буюмларингизни бемалол йиғишириб олиш учун вақтингиз етмай қолиши ҳам мумкин эди-да, а?

– Й-Йўқ, сэр, бу ерда бошқа гап бор эди.

– Хўш, қандай гап?

– Биласизми... – аввал бу ҳақда ўйламагани ва дарровгинада ўринли, ҳақиқатнамороқ жавоб то-пишга фаросати етмагани учун Клайд яна гапини йўқотиб қўйди, буни ҳамма, биринчи галда Белнеп билан Жефсон ҳам сезди; кейин у давом этди: – Би-

ласизми, агар, гарчи қисқа вақтга бўлса-да, кетишимга тўғри келиб қолса, ҳойнаҳой, мен тезлик билан буюмларимни олиб чиқарман, деб ўйлаган эдим.

– Тушунарли. Лекин жўнаб кетишдан оддин бу қадар шошилишингизнинг сабаби Клифорд Голден ва Карл Грэхемнинг кимлигини полиция билиб қолишидан қўрққанингиздан бўлмаса керак-а? Сиз шунга аминмисиз?

– Йўқ, сэр, гап бунда эмас.

– Демак, сиз миссис Пейтонга хонани бўшатаётганингизни айтмагансиз?

– Йўқ, сэр.

– Кеча, шу ерда гапира туриб, пулингизнинг камлиги тўғрисида нимадир дедингиз. Гўё мисс Олденни олиб кетиш, унга уйланиш ва у билан ақалли маълум вақтгача, ҳеч бўлмагандан ҳатто ярим йил бирга туриш учун қўлингизда ҳеч вақоингиз йўқ экан.

– Ҳа, сэр.

– Ликургдан чиқиб, шу саёҳатга жўнаганларингизда қанча пулингиз бор эди?

– Салкам эллик доллар.

– «Салкам» эллик? Қанча пулингиз бўлганлигини аниқ билмайсизми?

– Биламан, сэр, эллик доллар эди.

– Утикада ва Ўтлоқзор қўлидалик пайтларингизда ва ундан кейин то Шейронга етиб боргунларингизча сиз қанча сарфладингиз?

– Назаримда, бу саёҳатга мендан йигирма долларча кетди.

– Аниқ қанчалигини билмайсизми?

– Анифиними... йўқ, сэр... лекин тахминан йигирма долларча эди шекилли.

– Майли, аниқ ҳисоблаб чиқишига ҳаракат қиласиз, – дея давом этди Мейсон, Клайд эса тузоқча илинаётганини пайқаб, яна асабийлаша бошлади: ахир, унда тағин Сондра берган пуллар ҳам бор

эди-ку, ўша пулларнинг ҳам бир қисмини ишлатган эди. – Фондадан Утикачча шахсан бир ўзингизга йўлкирага қанча кетди?

- Бир доллару чорак.
- Утикадаги меҳмонхонада Роберта икковингиз тўхтаган хона учун-чи?
- Тўрт доллар.
- Сизлар у ерда ўша куни кечқурун ва эртаси эрталаб овқатлангансизлар, албатта, хўш, шулар қанчага тушди сизларга?
- Ҳаммасини қўшиб ҳисоблагандা, уч долларга яқин.
- Кейин сиз Утикада бошқа ҳеч сарфламадингизми?

Мейсон ора-сира қандайдир рақамлар ва белгилар ёзилган қофозга кўз қирини ташлаб олар, аммо Клайд буни сезмас эди.

- Йўқ, сэр.
- Анави похол шляпа-чи, бу ерда аниқланишича, сиз уни Утикада сотиб олганмисиз?
- Ҳа, тўғри, сэр, уни ёдимдан чиқарибман! – бирдан эслаб қолди Клайд. – Ҳа, сэр, унга ҳам икки доллар.

У эҳтиётроқ бўлиш лозимлигини англади.

- Ўтлоқзор кўлигача сиз учун йўлкира, ҳойнаҳой, беш долларга тушган, тўғрими?
- Ҳа, сэр.
- Кейин Ўтлоқзор кўлида сиз ижарага қайиқ олганмисиз? У қанча эди?
- Соатига ўттиз беш центдан.
- Сизлар неча соат сайр қилдингизлар?
- Уч соат.
- Бу, бир доллару беш цент дегани.
- Ҳа, сэр.
- Кейин меҳмонхонада ётиб қолгансизлар, бунга қанча олишди сизлардан? Беш доллар, шундайми?

- Ҳа, сэр.
- Сүнгра, ўзларингиз билан Катта мушгир кўлига олиб кетган нонушталикни сотиб олгансиzlар?
- Ҳа, сэр. Унга олтмиш центча кетди.
- Катта мушгирга боргунча йўлларингизга қанчага сарфланди?
- Биз Қуролсозгача поездда бордик, бу – бир доллар. У ердан Катта мушгиргача автобусда – яна бир доллар.
- Кўриб турибман, барча рақамларни бинойидек эслаяпсиз, Ҳа, бу табиий нарса. Сизда пул йўқ эди, шунинг учун сарф-харажатларингизни ўйлаброқ қилишингиз керак эди. Кейин Учинчи миль Кўрфазидан Шейронгача боришингиз сизга қанчага тушди?
  - Етмиш беш центга.
  - Сиз ҳаммаси қанча бўлганини сира ҳисоблаб кўрмаганмидингиз?
  - Йўқ, сэр.
  - Ҳозир бир ҳисоблаб боқмайсизми?
  - Лекин сиз ўзингиз ҳисоблаб чиқдингиз шекилли?
  - Ҳа, сэр, ҳисоблаб чиқдим. Йигирма беш доллару олтмиш беш цент бўляпти. Сиз эса йигирма доллар сарфладим, деган эдингиз. Демак, тўрт доллару олтмиш беш цент ошиқ келяпти. Хўш, бунга нима дейсиз?
  - Ҳа, ниманидир у қадар аниқ эслаёлмаган бўлсам керакда, – деди Клайд, бунақанги майда-чуйда ҳисоб-китоблардан жаҳли чиқиб.

Лекин шу пайт Мейсон муғомбирлик билан майингина қилиб сўради:

- Ия, ростдан, Грифитс, мен ёдимдан чиқарибман. Катта мушгирда ижарага олган қайифингиэ қанчага тушган эди?

У эринмай, усталик билан бу қопқонни тайёрланган, энди эса Клайднинг жавобини бетоқат бўлиб кутмоқда эди.

– Э... ҳм-м... яъни... – дея дудуқланиб гап бошлади Клайд.

У Катта мушгир кўлида қайиқнинг нархини суриштирганини, чунки ўзи ҳам, Роберта ҳам қайтиб келмаслигини оддиндан билганлигини эслаб қолди. Бу савол ҳам ҳозир аслида биринчи марта берилиши эди.

Мейсон уни қўлга туширганини пайқаб, дарров қайта сўради:

– Хўш, нима дейсиз бунга?

Клайд ҳам таваккалига жавоб бераверди:

– Ие, ҳа, худди Ўтлоқзор кўлидагидек соатига ўттиз беш центдан, қайиқчи менга шундай деган эди.

Лекин у ҳаддан ташқари шошилган эди. Чунки Мейсоннинг ихтиёрида ўша қайиқчи турганини у билмас эди, у эса Клайд қийиқнинг нархини суриштирганини айтиб, гувоҳлик бериши керак эди; Мейсон давом этди:

– Э, шундай денг! Демак, қайиқчи айтганди денг?

– Ҳа, сэр.

– Сиз ҳатто бу ҳақда қайиқчидан сўрамаган ҳам эдингиз, шуни унутдингизми-а? Қайиқ соатига ўттиз беш центдан эмас, балки эллик центдан турар эди. Аммо, турган гап, буни билмайсиз, чунки сиз қайтиб келиб, қайиқ учун ҳақ тўлашни мутлақо ўйламаган эдингиз, ишқилиб тезроқ қирғоқдан нари кетимини ўйлаган эдингиз. Шунинг учун турган гапки, нархини суриштириб ўтиргансиз. Хўш, тушунарлими? Энди эслаяпсизми? – Шу ерда Мейсон қайиқчи берган ҳисобни қўлига олдида, нақ Клайднинг бурни остида силкитди. – Қайиқ соатига эллик центдан турган, – деб такрорлади. – Катта мушгирда Ўтлоқзордагига нисбатан қайиқ учун қимматроқ олишади. Бошқа ҳамма нархларни сувқилиб ичиб юборибсизу – буни ҳозирги гапларин-

гиз ҳам тасдиқлаб турибди – аммо бу нархдан мутлақо хабарингиз йўқ экан, қандай қилиб шундай бўлди экан-а, мен шуни билишни истайман? Қизик, мисс Олден билан кўлга жўнаётуб, тушдан то кечгача қайикда сайр этиш сизга қанчага тушишини ўйламадингизми?

Тўсатдан бўлган бу шиддатли ҳужум Клайдни шу заҳотиёқ довдиратиб қўйди. У ўзини қаерга қўйишини билмай қимтинар, талвасага тушиб ютинар, Жефсонга қарашга ботинолмай полга тикилар эди, Жефсон ҳам бунақангى савол тушиши мумкинлиги ни негадир сира хаёлига келтирмаган эди.

– Хўш, – овози борича бақирди Мейсон, – бу масалада сиздан бирор-бир изоҳ эшитамизми, йўқми? Барча, ҳа, барча сарф-харажатларингизни эслаб қолибсизу, фақат буниси ёдингиздан кўтарилибди-я, ўзингизга ҳам фалати туюлмаяптими бу?

Яна суд маслаҳатчилирининг бари олдинга чўзилиб, бетоқатлик билан кута бошладилар. Клайд ҳам уларнинг сабрсизликлари ва очиқчасига шубҳаланиб қараётганларини сезди-ю, ниҳоят шундай жавоб берди:

– Буни қаранг-а, қандай қилиб ёдимдан чиқарганман, ақлимга сифмаяпти.

– Оббо сиз-ей! Ақлингизга сифмайди-да, албатта! – Мейсон пиқирлаб кулди. – Пастқам бир кўлда қизни ўлдирмоқни ният қилган одам жуда кўп нарсаларни ўйлаб олиши керак, баъзиларини эсдан чиқарган бўлсангиз, бунинг ҳеч ажабланадиган жойи йўқ. Аммо сиз Учинчи миль Кўрфазига келганингиздан сўнг кассирдан Шейронгача патта қанча туришини сўрашни унутмагансиз, тўғрими?

– Сўраган-сўрамаганим эсимда йўқ.

– Энг муҳими, кассирнинг эсида бор. У бу тўғрида гувоҳлик ҳам берган. Сиз Ўтлоқзор кўлида ижарага олинадиган хонани суриштиришни

эсдан чиқармагансиз. У ерда қайиққа түланадиган ижара ҳақини ҳам сұрабсиз. Ҳатто Катта мушгиргача автобусда боришига қанча кетишини ҳам суриштиргансиз. Афсуски, Катта мушгирда қайиққа ижара ҳақи қанчалигини сұрашни эса үйлаб күрмабсиз! Унда шу арзимаган нарсани деб бунақа гангиб ўтирмасдингиз, түғрими?

Шу ерда Мейсон, гүё: «Күрәпсизлар-ку, ўзларингиз ҳам!» дегандай суд маслаҳатчиларига қараб қўйди.

– Балки мен бунга эътибор бермагандирман, – дея такрорлади Клайд.

– Менимча, жавобингиз жудаям мукаммал, – деди Мейсон пичинг қилиб, кейин гапини яна аввалги оҳангда давом эттириди: – Тўққизинчи июлда, яъни Роберта ўлган куннинг эртаси «Казино»да берган нонушта-зиёфатингизга ўн уч доллару йиғирма цент сарфлаганингизни ҳам эслабўлмассиз, шундайми?

Мейсон ҳаяжонга тушган, тезкор ва шиддатли эди, у Клайдга үйлаб олишга ҳам, бир оз нафасини ростлашга ҳам вақт қолдирмаётган эди. Бу саволни берган пайтида Клайд сал бўлмаса ўрнидан сапчиб тураёзди: чунки у ўша нонушта-зиёфатдан Мейсоннинг хабари борлигини ҳатто хаёлига ҳам келтирмаган эди.

– Қамоққа олинган вақтингизда, – дея давом этди Мейсон, – ёнингизда яна саксон доллардан ортиқроқ пул чиққанини ҳам эслабўлмайсизми?

– Ҳа, энди эслаяпман, – деб жавоб берди Клайд.

У ўша саксон долларни мутлақо унугиб қўйган эди. Лекин у ҳозир у ҳақда ҳеч нарса демади, чунки нима дейишни билмай қолган эди.

– Хўш, нима гап ўзи бу ерда? – эринмай ва аёвсиз суриштира бошлади Мейсон. – Ликургдан чиққанингизда фақат эллик долларингиз бор эди,

холос, қамоққа тушган пайтингизда эса саксондан ортиб кетибди, бунинг устига йигирма түрт доллару олтмиш беш центни ҳамда нонуштага ўн уч долларни сарфлагансиз. Сизга бу ортиқча пуллар қаердан келиб қолди?

– Бунга мен ҳозир жавоб беролмайман, – деди Клайд қовоини солиб, ўзини бурчакка қадаганлари ва ҳақорат қилғанларини сезиб. Бу пулларни у Сондрадан олган эди, шунинг учун буни ошкора айтишига уни дунёдаги ҳеч бир куч мажбур қила олмас эди.

– Нима учун жавоб беролмас экансиз? – деб ўшқирди Мейсон. – Хўш, сиз ўзи хәёлингизда қаерда турибсиз? Бу ердагиларнинг бари нима учун йиғилиб ўтирибди, сизнингча? Нимага жавоб берасизу нимага жавоб бермайсиз, шуни ўйлаб олишингиз учунми? Сиз суд олдида турибсиз, гап сизнинг ҳаётингиз устида кетяпти, унутманг! Илгари менга қанча ёлғон гапирган бўлсангиз ҳам, қонун билан мушук-сичқон ўйнаёлмайсиз. Сиз манави ўн икки суд маслаҳатчиси рўпарасида туриб сўроқ беряпсиз, улар эса сиздан ҳаққоний жавобни кутишаپти. Хўш, қалай энди? Ўша пулларни сиз қаердан олгансиз?

– Дўстимдан қарз олдим.

– Ким у дўстингиз? Исми нима?

– Бу менинг ишим.

– Ўхў, сизнинг ишингизми! Демак, Ликургдан чиқиб кетаётганда ёнингизда қанча пул бўлганлиги ҳақидаги гапингиз ҳам фирт ёлғонлиги аниқ. Яна қасам ичиб туриб, ёлғон гапиргансиз. Буни унутманг! Муқаддас деб ҳисоблаганингиз – ўша қасамни бузгансиз. Нима, ёлғонми?

– Ҳа, ёлғон, – деди ниҳоят Клайд, қўйилаётган айбларнинг зарбидан ўзига келиб. – Мен бу пулларни ўн иккинчи кўлга борганимдан сўнг қарзга олганман.

- Кимдан?
- Буни мен айтолмайман.
- Демак, гапингизнинг бир чақалик ҳам қиммати йўқ, – дея бўлиб ташлади Мейсон.

Клайднинг ҳам ўжарлиги тутиб кетди. У борган сари овозини пасайтирап, Мейсон эса унга ҳар гал, қаттиқроқ гапиринг ва суд маслаҳатчилари юзингизни кўриши учун бу томонга ўгирилинг, деб буюрар эди. Клайд унга ҳар гал итоат этар экан, бутун сиру асрорларини билиб олишга интилаётган бу одамга нисбатан аламзадалиги тобора кучайиб бораётган эди. Мейсон, Клайд учун ҳали ҳам ниҳоятда азиз бўлган Сондрага шундоққина яқинлашиб келган эди, Клайд эса унга доғ туширувчи бирор-бир гапни айтолмас эди. Шу боисдан ҳам унинг ўтириши-ю, суд маслаҳатчиларига қай тарзда тикилиб қолганнинг ўзи негадир кишининг фашига тегар эди. Бу орада Мейсон столдан қандайдир фоторасмларни олди.

– Булар сизга танишми? – деб сўради у, Клайдга Робертанинг беш-олтита хира, сувда ётиб бузилган расмини ҳамда Клайднинг ўзи тушган бир неча фото ва яна аллақанча бошқа суратларни кўрсата туриб (уларнинг биронтасида ҳам Сондра йўқ эди): Клайд бу расмларни Крэнстонларникига биринчи боргандা олган, тўртгасини эса кейинроқ Айик кўлида туширган, бунинг устига шу кейинги фотосуратларнинг бирида у ўзи банжо чалиб турган пайтида расмга олинган эди. – Булар қачон туширилганини эслайсизми? – деб сўради Мейсон, аввалига Робертанинг фотографиясини кўрсатиб.

- Ҳа, эслайман.
- Қаерда олинган эди?
- Катта мушгиригининг жанубий соҳилида, ўша борган кунимиз олинган эди.

Аппаратда бу плёнкалар борлигини Клайд билар эди, буни у Белнеп билан Жефсонга ҳам айтган

эди; бирок энди уни расм ҳолида чиқара олишганини күриб, бары бир ҳайратта тушди.

– Грифитс, – дея давом этди Мейсон, – ҳимоячиларингиз Катта мушгир суви остидан – сиз ўша онт ичиб тонган – фотография аппаратини чиқарыб олишга астойдил уринганларини сизга айтиб беришмадими? Аппарат менинг қўлимда эканлигини аниқлагунларича ҳамма ёқни обдан тит-пит қилиб қидиришганини гапиришмадими?

– Улар ҳеч қачон менга бу ҳақда ҳеч нарса айтмаганлар, – деб жавоб берди Клайд.

– Минг афсус. Мен уларни кўп оворагарчиликдан халос қилишим мумкин эди. Хуллас, аппаратдан то-пилган бу расмлар сизда юз берган руҳий бурилишдан кейиноқ олинган эдими, эслайлайсизми?

– Улар қачон олинганини эслайман, – деб жавоб берди Клайд қовоғини солиб.

– Ҳа-да, бу расмлар сиз икковингиз охирги марта соҳидалан сузиб кетишингиздан олдин, сиз, ниҳоят, унга айтмоқчи бўлган гапларингизнинг ҳаммасини тўкиб солишингиздан олдин, уни ўлдиришингиздан олдин, сиз берган гувоҳдикка қараганда, у фоятда фамгин бўлган пайтда олинган, шундайми?

– Йўқ, унинг фамгинлиги бир кун олдин эди, – дея эътиroz билдириди Клайд.

– Ҳа, тушунарли. Ҳарқалай, бу расмларда у қандайдир жудаям қувноқ, сиз ҳикоя қилганингиздай, ҳаддан ташқари эзилган ва кўнгли фаш одамга сира ҳам ўхшамайди.

– Лекин, ахир, бу пайтда у бир кун олдингидай эзилган эмасди, мутлақо, – тўрсиллатиб гапирди Клайд; аслида ҳам бу ҳақиқат эди, буни у жуда яхши эслайди.

– Тушунарли. Энди мана бу расмларга қаранг-чи. Ақалли мана бу учтасига. Булар қаерда олинган эди?

- Назаримда, йн иккинчи кўлда, Крэнстонлар чорбоғида эди шекилли.
- Тўғри. Йн саккизинчи ёки ўн тўққизинчи июнда, шундайми?
- Назаримда, ўн тўққизинчидা.
- Ўн тўққизинчи июнда Роберта сизга нима хат ёзганини эслай олмайсизми?
- Йўқ, сэр.
- Ўша хатларнинг биронтасини ҳам аниқроқ эслай олмайсизми?
- Йўқ, сэр.
- Лекин уларнинг ҳаммаси ниҳоятда ғамгин хатлар эди, деб айтгандингиз-ку?
- Ҳа, сэр, бу тўғри гап.
- Энди кулоқ солинг, бу хат шу расмлар олинган вақтда ёзилган! – Шу ерда Мейсон суд маслаҳатчиларига ўгирилди: – Мистер-суд маслаҳатчилари, сизлардан мана шу расмларни бир кўришни, кейин эса худди ўша куни айбордога мисс Олден ёзган хатдан бир парчасини тинглашингизни илтинос қиласман. У гарчи мисс Олденга раҳми келган бўлса ҳам, бироқ унга хат ёзмаслиги ва камроқ қўнфироқ қилишга уринганини тан олган, – Мейсон хатни олиб, суд маслаҳатчиларига ўгирилиб, Робертанинг узундан-узун, ғам-андуҳди ҳасратини ўқиб берди. – Мана, яна тўртта фотография, Грифитс, – дея давом этди у, Клайдга Айик кўлида туширилган суратларни узатиб. – Жуда ҳам қувноқ, сизнингча қандай? Кўпдан-кўп мудҳиш шубҳалар дан, хавотир ва ярамас қилиқлардан сўнг кўнглида буюк руҳий бурилиш юз берган одамнинг расмига – ўзи ниҳоятда бешафқат бўлиб, инсофсизлик қилгани ва бундан атиги салгина бурун унинг олдида ўз айбини юмшатишга интилгани – ўша аёлнинг бехос ўлимини кўрган одамнинг расмига мутлақо ўхшамайди бу. Бу суратларга қарадиган бўлса, сиз дунёдаги энг бегам одам экансиз, тўғрими?

— Лекин бунда ахир биз күпчилик тушганмиз-ку. Ҳамма расмга тушганда, мен тушмайман десам хунук бўлар эди.

— Унда мана бу, сувда турганингиз-чи? Роберта Олден Катта мушгири кўли тубида ўз лаҳадини топган бўлса-да, сиз шундан кейин орадан икки ёки уч кун ўтгач, bemalol сувга тушиб чўмилаверсангиз? Бунинг устига кўнглингизда юз берган ва унга нисбатан сизнинг муносабатингизни бутунлай ўзгартириб юборган ўшандай олимистер маънавий бурилишдан сўнг шундай қилибсиз-а?

— У ерда мен Роберта билан бирга бўлганимни кимдир билиб қолишидан қўрқкан эдим.

— Буларнинг ҳаммаси бизга маълум. Унда мана бу банжолик фотографияга нима дейсиз? Қани, бир қаранг-чи! – Мейсон унга фотографияни узатди. – Жудаям қувноқ, а? – ачитиб одди у.

Ўзини йўқотиб, қўрқиб кетган Клайд:

– Бари бир, мен хафа эдим! – деб жавоб берди.

– Ҳатто банжо чалиб турган пайтингизда ҳам-а?

У ўлган куннинг эртасига ёқ дўстларингиз билан гольф ва теннис ўйнаб вақтичоғлик қилған пайтингизда ҳам-а? Ўн уч долларлик зиёфатни пақкос тушираётган пайтингизда ҳам-а? Яна қайтадан мисс Х доирасига тушганингизда эса, ўз тилингиздан чиққан гапга қараганда, дунёдаги ҳар қандай нарсадан ҳам уни афзал кўриб кетгансиз-да, а?

Мейсон гапирмас эди, балки газаби тошиб, жоҳиллашиб қаҳри-заҳри билан пичинг отиб, бамисоли наъра тортар эди.

– Бари бир, айни ўша пайтда мен хурсанд эмасдим, сэр.

– «Айни ўша пайтда» деганингиз нимаси? Ўзингиз обдан интилиб юрган жойда эдингиз-ку, ахир?

– Биласизми, маълум маънода бу тўғри, албатта, – дея жавоб берди Клайд, ўзига-ўзи: бу эътироф-

ларимни Сондра ўқиса нима деб ўйларкин, деган саволни бериб. Сондра эса сўзсиз ўқииди.

Суд жараёнига оид барча ҳужжатлар ҳамма газеталарда кунма-кун бериб бориляпти. Клайд ўша пайтда мисс Х ҳузурида бўлгани ва унга интилганини инкор этолмайди, албатта. Лекин шунга қарамай, у баҳтли эмас эди, ахир. Қайтага шу қадар баҳтсиз эдики, оқибатда у ўзининг шармандали ва мудҳиш нияти исканжасида ўралашиб қолган эди! Сондра шуларни ўқишга тутинганда унга буни қандай тушунтируса бўларкин-а, мана бу суд маслаҳатчилариға қандай тушунтируса бўларкин?

У томоги қуриб қолгани учун зўр-базўр ютинди-да, караш боғлаган тили билан лабларини яланчча қўшимча қилди:

– Бари бир мен мисс Олденга жудаям ачинардим. Ўшанда ўзимни баҳтиёр сезолмаган эдим, сира ҳам сезолмасдим. Одамлар, мисс Олден чиққан ўша саёҳатга менинг ҳам қандайдир алоқам бор экан, деб ўйлашмасин дер эдим, холос, ўзимни фақат ўшандай тутишга ҳаракат қиласдим, бор-йўғи шу. Бошқача йўлини бўлса сира тополмасдим. Ўзим қиласдим иш учун мени қамоққа олишларини эса истамасдим.

– Ахир, буларнинг бари ёлғонлигини ўзингиз билмайсизми! Ёлғон гапираётганингизни ўзингиз биласиз-ку! – деб бақирди Мейсон, гўё бутун коинотни гувоҳликка чақираётгандай, Клайднинг ўтакетган ёлғончилигига суд маслаҳатчилари ва халойиқни ишонтириш учун Мейсоннинг шу жазаваси-ю, қизғинлик билан билдирган шубҳа ва нафратининг ўзиёқ кифоя қила қолди.

– Сизнинг улфатларинги билан биргаликда Айик кўлига борган кичик ошпаз Руфус Мартиннинг сўзларини эшийтдингизми?

– Ҳа, сэр.

– У қасам ичиб туриб, сизни мисс Х билан бирга Айк күли соҳилидаги пастроқ бир жойда кўргани ва сиз уни қучоқлаб, ўпаётганингизни гапирганини эшитдингиз. Шундай бўлганмиди?

– Ҳа, сэр.

– Бу Роберта Олден Катта мушгир кўли тубида қолиб кетгандан кейин, орадан роппа-роса тўрт кун ўтгандан сўнг бўлган воқеа-да?! Нима, сиз ўша пайтда ҳам қамоқдан қўрқсан эдингизми?

– Ҳа, сэр.

– Ҳатто мисс Х ни қучоқлаб, ўпиб турган вақтингизда ҳам-а?

– Ҳа, сэр, – деб такрорлади Клайд ғамгин ва умидсизлик билан.

– Э, биласизми! – бақирди Мейсон. – Агар бу ерда шуларни ўз қулоғимиз билан эшитмаганимизда бунақсанги бемаъни гапларни судга олиб чиқишилари мумкинлигига ҳар қандай одам ҳам ишонмаган бўлар эди! Сиз бир алданган қизни қучоқлаб, унга меҳр-муҳабbat изҳор қилсангиз-да, худди шу аснода сиз алдаган яна бошқа бир қиз сиздан юз миль нарида сув остида ётса, устига-устак, мана шу ерда ўтириб, қасам ича туриб, судга ўзимни бахтсиз сезардим ва виждоним азобланарди, деб айтяпсиз-а?

– Бари бир худди шундай бўлган, – жавоб қайтарди Клайд

– Жуда соз! Фоят гўзал! – қичқирди Мейсон.

У ҳоргинлик билан хўрсишиб қўйди-да, яна каттакон оқ дастрўмолини чиқарди, суд залига бир назар ташлади-ю, бутун қиёфаси билан: «Вазифам жуда оғир-да!» дегандай, юзини арта бошлади. Кейин аввалгига қараганда яна ҳам шиддатлироқ оҳангда давом этди:

– Грифитс, куни кеча, мана шу гувоҳлик жойида қасам ичиб айтдингизки, Ликургдан чиқаётга-

нингизда шахсан сиз, Катта мушгир кўлига қараб жўнаймиз, деб ўйламаган экансиз.

– Ҳа, сэр, ўйламаган эдим.

– Мисс Олден билан икковингиз Утикадаги меҳмонхонадан жой топиб ўрнашиб олганларингиздан сўнг эса, унинг чарчагани ва ҳолдан тойганини кўриб, қандайдир бир ҳордиқ чиқариш – кичкинагина ҳамёнларингизга лойиқ жўнгина бир саёҳатга бориш – унга фойда бериши тўғрисида фикр билдиргансиз. Шундай бўлганмиди?

– Ҳа, сэр, шундай, – жавоб берди Клайд.

– Аммо ўша дақиқагача айнан Адирондак тоғларидағи кўлларга бориш ҳатто хаёлингизга ҳам келмаган-да, а?

– Йўқ, сэр... яъни, мен аниқ бир кўл тўғрисида ўйламаган эдим. Ҳарқалай, қайсиdir бир дурустроқ хушманзара жойга борсак, деган фикрда эдиму – унақа жойлар бу ерда деярли ҳар бир кўл теварагида хоҳлаганча бор, ахир – лекин фалон кўл яхши, деб аниқ биттасини назарда тутмаганман.

– Тушунарли. Сиз шуларни мисс Олденга таклиф қилганингизда, қандайдир харита ва йўл кўрсаткич китобчалари топишингиз зарур, деб сизга унинг ўзи айтган эди, шундайми?

– Ҳа, сэр.

– Кейин сиз меҳмонхона даҳлизига тушиб, уларни топгансиз.

– Ҳа, сэр.

– Утикада, «Ренфру» меҳмонхонасидами?

– Ҳа, сэр.

– Эҳтимол, адашиб бирор-бир бошқа жойдан олгандирсиз?

– Йўқ, сэр.

– Кейин, ўша хариталарни кўздан кечира туриб, икковингиз Ўтлоқзор кўли ва Катта мушгирни кўриб қолгандирсизлар-да, ўша ёқقا боришга қарор қилгансизлар? Шундай бўлганмиди?

– Ҳа, биз шундай келишган эдик, – деди Клайд асаблари қақшаб. У, йўл кўрсаткич китобчаларни Утикадаги меҳмонхонадан олдим, деганига энди афсусланаётган эди. Чунки ким билади, бунда ҳам балки қандайдир тузоқ яширингандир?

– Сиз ва мисс Олден икковингиз келишдингизми?

– Ҳа, сэр.

– Кейин сиз энг қулай деб Ўтлоқзор кўлини танлагансиз, чунки у ерда ҳамма нарса жуда арzon, шундай бўлганмиди?

– Ҳа, сэр, шундай эди.

– Тушунарли. Мана буни эслай оласизми? – У столдан бир нечта йўл кўрсаткич китобчаларини олиб (уларнинг бари Клайд Айик кўлида қўлга тушган пайтда унинг жомадонидаги буюмлари ичидан чиққани тасдиқланган эди), Клайднинг қўлига берди. – Буларни бирма-бир кўздан кечиринг. Булар мен Айик кўлида сизнинг жомадонингиздан олган ҳу ўша китобчаларнинг ўзими?

– Ўша китобчаларга ўхшайди.

– «Ренфру» меҳмонхонаси дўконидан топиб, мисс Олденга кўрсатиш учун юқорига, хонага олиб чиққан китобчаларнингиз шумиди?

Мейсон йўл кўрсаткич китобчаларини роса эринмай сўраб-суринтираётганидан анча ваҳимага тушган Клайд, уларни қўлига олиб, орқа-ўнгини ағдариб кўрди. Аммо Ликург меҳмонхонасининг «Ликургдан салом – «Ликург» меҳмонхонаси. Нью-Йорк штати» деган қизил муҳри шу бетдаги бошқа қизил босма ҳарфли матндан деярли ажралмагани учун Клайд ҳатто ҳозир ҳам буни пайқамади. Китобчаларни қўлида айлантира-айлантира, кейин бу ерда ҳеч қандай ҳийла-найранг йўққа ўхшайди шекилли, деб ўйлаб:

– Ҳа, назаримда, бу ўша китобчаларга ўхшайди, – дея жавоб берди.

– Хўш, унда Ўтлоқзор кўлидаги меҳмонхона эълони ва ўша ердаги нархни шуларнинг қайси биррида кўрган эдингиз? – қувлик билан сўради Мейсон. – Мана бунисидами?

У Клайдга Ликург меҳмонасининг муҳри туширилган ўша китобчани яна қайта узатди-да, эълон босилган бир саҳифани кўрсатди, ўз вақтида Клайд бу эълонга Робертанинг дикқатини жалб этган эди. Ўртада Ўн иккинчи, Ўтлоқзор, Катта мушгир ва бошқа кўллар билан Ҳинд тоғларининг харитаси берилган, энг тагида эса Ўтлоқзор кўли ва Қуролсоз бекатидан чиқиб, Катта мушгир кўли ва Учинчи миль Кўрфазининг паст қисмидан айланиб ўтиб, жанубга қараб кетадиган йўл яққол чизиб кўрсатилган эди.

Орадан шунча вақт ўтгач, яна шу харитага кўзи тушган Клайд бирдан, ҳойнаҳой Мейсон ўша йўлни яхши билиш-бilmаслигимни аниқламоқчи чамамда, деб ўйлади-ю, бўшалиб, юраги дов бермайроқ жавоб қайтарди:

– Ҳа, эҳтимол. Худди ўшанга ўхшайди. Шу китоб ўша бўлса керак.

– Аниқроғини билмайсизми? – қовоғини уйиб, сўзида туриб олди Мейсон. – Сиз мана бу эълонни ўқиб кўриб, ўша китобчами ёки умасми, айтиб беролмайсизми?

– Ўшанга ўхшайди, – дея жавоб қайтарди Клайд иккиланиб, бир вақтлар ўзини Ўтлоқзор кўлинин танлашга мажбур этган ўша эълонни кўздан кечириб чиққач. – Ўйлашимча, бу ўшанинг ўзи.

– Ўйлайсиз! Ўйлайсиз! Гап сал аниқроқ томонга юрса, дарров ҳушёр тортиб қоласиз. Майли, мана шу харитага тағин бир қараб олинг-да, нима кўраётганингизни менга айтиб беринг. Ўтлоқзор кўлидан жанубга томон кетган йўлни кўрмаяпсизми унда?

Клайд тезда жавоб бермади, қовоғини уйганча:

– Ҳа, – деди сал қўрслик қилиб: тинкасини қуритишга қатъян аҳд қилган, қабрга тиқмоқчи бўлган бу одам уни шунчалик эзар ва азоблар эди.

Клайд харитани тимирскилаб, ўзига буюрганларига биноан уни қўздан кечириб чиқаётгандай кўринарди-ю, аммо у ҳў қачонлардир Роберта билан учрашиш учун Фондага жўнаб кетишидан сал олдин Ликургда кўрган нарсаларинигина кўра олди. Энди бўлса ўшани Клайднинг ўзига қарши ишлатишяпти.

– Илтимос, айтинг-чи, ўша йўл қандай ўтар экан? Қаердан бошланиб, қаёққа қараб кетар экан, марҳамат қилиб мистер суд маслаҳатчиларига айтиб беринг-чи?

Асабийлашган, даҳшатга тушган, жисмонан бутунлай ҳолдан тойган Клайд:

– Ўтлоқзор кўлидан Учинчи миль Кўрфазига қараб кетади, – деб жавоб берди.

– Қайси жойларнинг ёнидан ўтади, теварак-атрофида қандай ерлар бор?

– Куролсоз бекатининг ёнидан ўтади, бошқа жой йўқ.

– Катта мушгир кўли-чи? Йўл унинг жанубий қисми яқинидан ўтмайдими, ахир?

– Ҳа, сэр, ўтади.

– Утикадан Ўтлоқзор кўлига борганингиздан олдин ҳам қачонлардир сиз бу харитани кўриб, уни ўрганган эдингизми? – безовталаниб шиддат билан суриштира бошлади Мейсон.

– Йўқ, сэр, ҳеч қачон.

– Ўша ёқда мана шу йўл борлигини ҳам билмас эдингизми?

– Эҳтимол, мен уни кўргандирман, – дея жавоб берди Клайд, – аммо кўрган тақдиримда ҳам унга аҳамият бермаганман.

– Ундей бўлса, албатта, сиз Утикадан жўнаб кетмагунингизча бу китобча билан бу йўлни мутлақо кўрмаган ва ўрганиб ҳам чиқмагансиз-да?

– Йўқ, сэр. Мен бу китобчани илгари сира кўрмаганман.

– Тушунарли. Сиз бунга бутунлай ишонасизми?

– Ҳа, сэр, бутунлай ишонаман.

– Ундей бўлса, ўзингиз чуқур хурмат қиладиган тантанали қасамингизни эслай туриб, менга ёки мистер суд маслаҳатчиларига агар қўлингиздан келса, тушунтириб беринг-чи, бу йўл қўрсаткич китобчасида «Ликургдан салом – «Ликург» меҳмонхонаси, Нью-Йорк штати» деган муҳр қаёқдан келиб қолди?

Мейсон китобчани беркитди-да, Клайдга орқа муқовасини кўрсатди, бошқа қизил ҳарфлар орасида хирагина босилган қизил муҳр ҳам турар эди. Клайд уни биринчи марта кўриб, донг қотганча унга тикилиб қолди. Файритабиий кўринган рангсиз юзи яна кулранг тусга кирди, нозик бармоқлари талваса билан юмилиб-очилар, қизарип шишиб кетган ҳоргин қовоқлари эса тўхтовсиз учиб турар эди, гўё у шу туришида, кўз ўнгимда пайдо бўлган бу лаънати яққол далил мабодо йўқолиб кетармикин-а, деб кутаётганга ўхшар эди.

– Билмайман, – деди у овози ичига тушиб, бир оз индамай қолгандан сўнг. – Балки у «Ренфру» меҳмонхонаси дўконига қандайдир бир йўл билан тушиб қолгандир.

– Э, шундайми? Агар мен икки гувоҳни олиб кирсам-да, улар қасам ичиб туриб, учинчи июлда, яъни сиз Ликургдан Фондага жўнашингиздан уч кун олдин «Ликург» меҳмонхонасига кирганингиз ва у ердан тўрт ёки бешта йўл қўрсаткич китобчини олганингизни кўришганини айтиб беришса нима дейсиз? Ўшанда ҳам сиз, бу балки олтинчидар

июлда «Ренфру» меҳмонхонаси дўконига қандайдир йўл билан тушиб қолгандир, деб тақрорлайверасизми?

Мейсон индамай қолди ва атрофига голибона кўз югуртириб чиқди, гўё шу билан: «Хўш, қалай, бунга нима жавоб қиласан?» демоқчи бўлайтган-дек эди. Изтиробдан караҳт ҳолга келган, сиқилиб кетган Клайд асабини қўлга олиб, овозидан ҳам сездирмай:

– Ҳа, ҳарқалай, шундай. Мен уни Ликургдан олган эмасман, – деб жавоб қайтаргунча, орада анчагина ўзи билан ўзи курашди.

– Жуда яхши. Лекин ҳозирча буни мана бу жентельменларга берамиз, улар кўриб чиқишин.

– Кейин Мейсон китобчани суд маслаҳатчилари-нинг оқсоқолига узатди, у ҳам ўз навбатида ёнидаги қўшнисига узатди, шу йўсинда китобча бир маслаҳатчидан иккинчи маслаҳатчига ўта бошлади. Суд залида эса бу пайтда безовта шивир-шивир ва фала-ғовур кўтарилиди.

Суд маслаҳатчилари китобчани кўриб бўлишгач, янги-янги, тўхтовсиз ҳужумлар ҳамда фош этишларни кутган халойиқни ҳайратда қолдириб Мейсон:

– Мен сўзимни тугатдим, – деди.

Бирданига залда ўтирган кўпчилик бир-бирига: «Кўлга тушди-ку! Кўлга тушди-ку!» деб шивирлай бошлади. Судья Оберуолцер ўша заҳотиёқ вақт алламаҳал бўлиб қолгани ва шунингдек, олдинда ҳали ҳимоя томонидан қатор қўшимча гувоҳларни, қораловчи томондан ҳам бир неча гувоҳларни сўроқ қилиш зарурлигини ҳисобга олиб, суд ишини бугун якунлаган маъқул, дея билдириди. Белнеп ҳам, Мейсон ҳам бунга хурсандлик билан рози бўлишди. Кейин Клайдни майдон орқали турмага, ўз камерасига олиб ўтиб кетмагунларича, одамларни

залдан чиқармай туришди. Сиссел ва Краутнинг қўриқдоми остида у боя кирган эшигидан чиқди-да, ўша зинапоядан тушди, бундан анча кун один у шу зинапояни кўрганда кўнглида бир гулу пайдо бўлган эди... Клайдни олиб кетишгандан сўнг Белнеп билан Жефсон бир-бирларига қарашди-ю, лекин идораларига кириб, эшикни маҳкам беркитиб олмагунлари-ча бир оғиз ҳам гапиришмади.

– Иродаси етмади. Бундан тузукроқ ҳимоя системаси бўлиши мумкин эмас эди, бироқ журъати бўшроқ экан. Журъатли бўлиш эса унинг қўлидан келмайди, вассалом, – дея гап бошлади Белнеп.

Жефсон пальтоси ва шляпасини ҳам ечмай, ҳоргин бир қиёфада стулга чўкди.

– Йўқ, бу ерда, шубҳасиз, анча жиддий гап бор, – деди. – У чиндан ҳам қизни ўлдирган бўлиши керак. Аммо, менимча, биз энди аравасига тушдикми, ашуласини ҳам айтишимиз керак. Очигини тан олсам, хуллас, у ўзини мен кутганимдан ҳам зиёдроқ тута билди.

– Бўлганича бўлди, якунловчи нутқимда жоним борича тиришаман, – деб фикр билдириди Белнеп.

– Қўлимдан келадигани фақат шу.

Жефсон ҳам овозидан чарчаганини билдириб, жавоб қайтарди:

– Тўғри, Элвин, афсуски, энди бу асосан сизнинг гарданингизга тушади. Ҳозирча мен, яхшиси, турмага борай-да, бир оз унинг кўнглини кўтарай. Эртага сувга тушган мушукдай шумшайиб ўтиrsa, дуруст бўлmas. У хафалигини билдири маслиги керак. Одамлар нима деб ўйлашларидан қатъи назар, у ўзини гуноҳкор сезмаётганини суд маслаҳатчилари бир кўриб қўйишин.

У ўрнидан турди-да, этаги узун пальтосининг чўнтағига қўлларини суқди, қишининг совуқ зулматини ёриб хомуш кўчалардан Клайднинг ҳузурига қараб кетди.

## XXVI БОБ

Суд мұхокамасининг қолған қисми ўн бир гувоҳни: Мейсон томонидан түрт кишини, ҳимоя томонидан эса етти кишини сўроқ қилиш билан ўтди. Охирги гувоҳларнинг бири Риобетдан келган доктор А. К. Суорд бўлиб, Робертанинг жасадини қайиқлар қароргоҳига олиб боришган куни фавқулодда Катта мушгир кўлига унинг йўли тушиб қолған экан. У ўз гувоҳлигидаги, ўша пайтда жасадни қараб чиққани ва юзидағи моматалоқлар ўшандаги ҳолатига қараганда, худди Клайд ҳам бўйнига олган тасодифий зарбанинг изларига ўхшаб кўрингани, демак, мисс Одден, қораловчи томон суд маслаҳатчиларини ишонтираётганлариdek, гарантисиб эмас, балки ақди ҳушини йўқотмаган ҳолда чўкиб кетганини сўзлаб берди. Бу фикрни эшитгач, Мейсон мистер докторнинг касби корига оид таржимаи ҳолини суриштириб кўрган эди, афсуски, анча-мунча номуносиб чиқиб қолди: Суорд доктор бор-йўғи Оклахомадаги иккичи даражали тиббиёт мактабини тутатган экан ва ўшандан бери қаердадир чет бир жойда ишлар экан. Унинг кетидан гувоҳ Сэмюэл Ирсли чиқди, у Куролсоз атрофидаги фермерлардан экан, у доимо Робертанинг жасадини Катта мушгир кўлидан бекатгача олиб келишган ўша йўлдан юрар экан. У Клайдга қўйилган айб хусусида лом-мим ҳам демади-ю, лекин қатъият билан: жасадни олиб ўтишган куни эрталаб қарасам, йўл жудаям ёмон, ҳамма ёғи ўнқир-чўнқир бўлиб ётган экан, деб тасдиқлаб ўтди. Шундай қилиб, сўроқни олиб бораётган Белнеп, йўлнинг яроқсизлиги Роберта юзи ва бошидаги жароҳатларни қандайдир дараҷада ёмонлаштиргандир, деб таъкидлаб қўйиш имкониятига эга бўлди. Бироқ кейин роқ бу фикр-

ни Мейсон томонидан чиққан гувоҳ инкор этди, у ким эди денг, «Ака-ука Луцлар» фирмаси аравакашининг нақ ўзгинаси эди, у йўлнинг ҳеч бир ерида ўнқир-чўнқир ва паст-баланд жой кўрмагани хусусида қаттиқ туриб қасам ичди. Шундан кейин Лигет ва Унгэмлар, бизнинг билишимизча, Грифитслар фабрикасида ўзига юклатилган вазифаларни бажаришда Клайд ҳар доим тиришқоқ, саранжом-саришта ва чаққон бир йигит эди, деб гувоҳлик беришди. Улар, хизмат юзасидан олганда Клайдни нуқсонсиз, деб билишар экан. Сўнгра яна бир неча майда-чуйда гувоҳлар сўзлаб, бизнинг кузатувимиз бўйича Клайд ўзини жамоат ичида доимо жуда боодоб, эҳтиёткор ва вазмин тутар эди, деб айтишди. Улар Клайднинг бирор-бир бемаъни томонини сира билишмас экан. Бироқ, афсуски, қайта сўроқлов пайтида Мейсон тезда шуни аниқладики, улар Роберта Олден тўғрисида, унинг мусибати ёки ақалли бўлмаса у билан Клайднинг танишлиги тўғрисида ҳам ҳеч қачон эшитишмаган экан.

Ниҳоят, иккала томон жуда кўп хавфли ва мурракаб майдадарни иложи борича қувватлаб, исботлаб ёки рад этганларидан сўнг, Белнепнинг Клайдни ҳимоя қилиб охирги сўзини айтадиган вақти ҳам келди. У бунинг учун бир кунини сарфлади: у сўнгги сўзини ўзининг кириш нутқи асосида, ниҳоятда синчковлик билан тузиб чиқди, унда у Клайднинг аввалига соддалик, журъатсизлик, деярли ақдсизлик қилгани оқибатида ҳар икковлари учун фожиали тугаган ўша танишувига оид барча далилларни яна қайта таъкидлаб ўтди. Клайднинг болалик ва ўсмириликдаги турли хил ноқулай шароитлар таъсирида ривожланиб борган ақдий ва маънавий кўрқоқлиги, дея такрорлади Белнеп, унинг, ҳатто тушига ҳам

кирмаган янги умидбахш имкониятлари билан қўшилиб, катта кучга айланган, «эҳтимол, ҳаддан ташқари тутуруқсиз, таъсирчан, ишбilmас, хаёл-параст мижози»га ёмон таъсир этган нарса ҳам – мана шу бўлса керак. У мисс Олденга нисбатан, шубҳасиз, виждонсизлик қилган. Ҳа, виждонсизлик қилган. Лекин иккинчи томондан эса, аслини олиб қараганда у, ҳурматли суд маслаҳатчилари ва халойиққа қораловчи тавсифлаб кўрсатмоқчи бўлаётганидек, бағритош малъун ҳам эмас, бу уни ҳимоячи сўроқ қилган пайтда ўзи бўйнига олган эътирофларидан ҳам очиқ-оидин билиниб турибди. Қанча-қанча эркаклар севги бобида бундан ҳам мудҳишроқ ишларни қилгандар, ундан ишлар она сути оғзидан кетиб улгурмаган норасида бу йигитчанинг ҳатто тушига ҳам кирмаган бўлиши мумкин, ваҳоланки, ўшаларни ҳам ҳамма вақт дорга осишавермаган-ку. Бу бола ўзига қўйилаётган жиноятда айборми ёки йўқми, шу нарсани қонун нуқтаи назаридан ечаётганда, мистер суд маслаҳатчилари ниҳоятда эҳтиёт бўлишлари керак: баҳти қаро қизга, у қизнинг шу йигит билан ишқий муносабатлари туфайли кулфатларга дучор бўлганига олимистерларча ачиниш туйғуси мистер суд маслаҳатчиларини чалғитмасин тағин ва бу йигит айбномада кўрсатилган жиноятни чиндан ҳам қилган, деб ишониб, ўз қарорларида шундай деб юрмасинлар. Дарвоҷе, севги масаласида айрим вақтларда бир-бирларига раҳмсиз бўлмаган эркак ёки аёл топилармикин ўзи?

Шундан кейин Белнеп узундан-узоқ, ипидан-игнасигача таҳдил этиш йўли билан Клайдга қарши фақат эгри далилларгина мавжудлиги, гумон қилишаётган жиноятни на бирон киши кўргани ва на эшитгани, ваҳоланки, Клайднинг ўзи қандай қилиб бунақанги ёмон аҳволга тушиб қолганини

бутунлай изчиллик билан тушунтириб берганини исботлашга уринди. Йўл кўрсаткич китобчалар воқеаси, шунингдек, Клайд Катта мушгирда қайиқнинг нархини сўрашни унугани, аппарат оёқчаларини эҳтиёткорлик билан беркитгани ва ниҳоят, сувда Робертанинг шундоқ ёнгинасида туриб, унга кўмаклашишга бормагани – буларнинг барини Белнеп бир четга супуриб ташлади: унинг фикрича, булар ё гирт тасодиф ёки паришонхотирликнинг оқибати эди. Нима учун Клайд Робертани кутқариб қолишига уринмаган? Чунки у довдирааб, ўзини йўқотиб қўйган, қўрқиб кетган ва «ҳаётининг журъат талаб этиладиган бир дақиқасида қатъиятсизликка йўл қўйган, аммо бу жиноий бўлмаган қатъиятсизлик эди».

Белнепнинг ҳимоя нутқи анча-мунча чалкаш бўлса-да, аммо очиғини айтганда жуда зўр, маълум даражада қимматли ва аҳамиятга молик бир чиқиши бўлди.

Сўнгра Клайднинг қабиҳ ва пиҳини ёрган қотиллигига бутун вужуди билан ишонган Мейсон, мана шу «росмана эркакнинг» чиндан ҳам «жиноятчи ва қотил»лигини исботловчи фоят ишончли, қатъий ва асосли далиллардан суд маслаҳатчилалининг диққатини четга тортмоқчи бўлаётган ҳимоя томонининг «ёлғон яшиқ ва асоссиз фикрлари чигалини» ечишга бутун бир кунини сарфлади. Мейсон бир неча соат давомида турли гувоҳларнинг сўзларидаги фикрларни тағин бошқатдан териб чиқди. Яна бир неча соатини у Клайдни қоралаш, Роберта бошига тушган кулфат ва азобларни тағин бир бошдан гапириб беришга ҳам сарфладики, хуллас, суд маслаҳатчилари ва халойиқни яна қайтадан йиғлатиб юборишига сал қолди. Белнеп ва Жефсоннинг ўртасида ўтирган Клайд эса, фоят таъсири қилиб, усталик билан гапириб берилган

бу сон-саноқсиз далиллардан кейин суд маслаҳатчилари ўлганда ҳам мени оқлашмайди, деб ўйлаб қўйди ичида.

Кейин Оберуолцер тепадаги ўз креслосидан турбид суд маслаҳатчилариға қарата маъруза айтди:

– Жентельменлар! Аслида ҳар қандай жиноий далил – айбни очиб беришга оидми ёки гувоҳларнинг сўзига оидми – маълум даражада эгри бўлади. Гувоҳларнинг сўzlари ҳам муайян шароит билан боғлиқ-ку, ахир.

«Мабодо ушбу ишнинг бирор-бир муҳим далиллари айбланувчининг гумон тутилаётган айбдорлигига зид келса ва унинг фойдасига хизмат қиласа, жентельменлар, бу фактларни эътиборга олиш сизларнинг бурчингиздир.

«Шу нарса ёдда тутилсинки, жиноий далиллар фақат эгри бўлганлиги учунгина уларни шубҳа остига олиш ва рад этиш мумкин эмас. Кўпинча улар, тўғри далилларга қараганда ҳам асослироқ ва ҳам ишонарлироқ бўлиб чиқади».

«Бу ерда жиноят сабаблари ва уларнинг ушбу ишдаги аҳамияти тўғрисида жуда кўп гапирилди, лекин сизлар шуни эсда тутишларингиз лозимки, ўша сабабларни аниқлаш қоралов ҳукмини чиқаришда у қадар зарур ва муҳим нарса эмас. Бу сабаблар жиноят содир бўлганлигини аниқдашда ёрдамлашувчи шарт-шароит вазифасини ўташи мумкин, аммо бундай сабаблар бор бўлганлигини исботлашнинг умуман зарурлик жойи йўқ».

«Агар суд маслаҳатчилари, Роберта Олден қайиқ четидан бехосдан, беихтиёр йиқилиб тушган ва айбланувчи уни қутқаришга уриниб ҳам кўрмаган ва бу ҳали айбланувчининг гуноҳкорлигини билдиrmайди, деган холосага келсалар, у ҳолда уни айбсиз деб эътироф этиш керак. Иккинчи томондан эса, агар суд маслаҳатчилари, муайян

шароитда айбланувчи Роберта Олденни бирор-бир нарсада уриб ёки бошқа иш қилиб, у ёки бу йўл билан мана шу машъум тасодифни қасддан келтириб чиқарган ёки шундай бўлишига мойиллик билдирган, деган хulosага келсалар, у ҳолда уни айбдор деб эътироф этиш керак».

«Мен, бир овоздан қарор чиқаринглар, деб талаб қилмайман, лекин ҳар бирингизга, агар у баттафсил ўйлаб кўргач, адашган эканман, деган хulosага келса, у ҳолда ҳаддан ташқари ўжарлик ва тундлик қилмасликларингизни маслаҳат бераман».

Судья Оберуолцер баландликдаги ўз креслосидан туриб ана шундай тантанавор ва насиҳатомиз бир тарзда суд маслаҳатчиларига йўл-йўриқ берди.

У гапини тугатганда – бу пайтда соат беш эди – суд маслаҳатчилари ўринларидан туриб, мажлисга жўнашди. Ўша заҳотиёқ, аввалига суд залидан одамларни чиқаришди, сўнгра Клайдни яна турмага олиб кетишди, чунки шериф айбланувчига кимдир ҳужум қилиб қолишидан доим хавотирда эди. Худди йилдай туюлган беш соатлик фурсатни Клайд бетоқат бўлиб ўтказди: у гоҳ ўз камерасида тинимсиз юрар, гоҳ ўзини ўқиётгандай ёки дам олаётгандай қилиб кўрсатарди, Краут билан Сиссел эса Клайдга яқинроқ жойда туришга уриниб, оёқ учida келиб уни кузатишар, чунки хилма-хил муҳбирлар бу ишларнинг бари Клайдга қандай таъсир этаётгани хусусида маълумот олиш учун уларга «чойчақа» бериб қўйишган эди.

Бу пайтда судья Оберуолцер, Мейсон, Белнеп ва Жефсонлар Брижбургдаги «Сентрал» меҳмонхонасининг турли бурчакларида ўз ёрдамчилари ва дўстлари билан биргаликда овқатланиб ўтиришар, ҳозирча суд маслаҳатчилари бир қарорда тўхташга ўзаро келишиб олаётган вақтларида улар ўз сабрсизликларини босиш учун вино сипқоришар-

ди; уларнинг ҳаммаси ҳам қандай ҳукм бўлишидан қатъи назар, унинг тезроқ чиқарилишини чин кўнгилдан хоҳлашар эди.

Бу орада ўн икки киши – фермерлар, клерклар, савдогарлар виждонлари пок бўлиши учун, Мейсон, Белнеп ва Жефсон айтган ҳар бир майда-чуйдани яна қайтадан эслаб, муҳокама қила бошлидилар. Лекин ўн икки кишининг ичидан фақат бир киши – доричи Сэмюэл Апхемгина (у Мейсоннинг сиёсий рақиби ва бунинг устига Жефсон унда катта таассурот қолдирган эди) Белнеп билан Жефсоннинг ёнини олиб чиқди. Шунинг учун ҳам у, Мейсоннинг далиллари у қадар ишончли эмас, деган шамани айтиб ўтди, охири беш марта овозга қўйилганидан кейин ҳам яқдилликка эришилмагандан сўнг, қолганлар унга пўписа қилиб, агар ҳукмни чиқаришни кечиктириб юборадиган бўлсак, сиз ҳаммамизнинг қаҳримиз ва таъналаримиздан асло қутулмайсиз, деб дўқ уришди.

– Эсингизда бўлсин, ҳақиқий башарангизни очиб ташлаймиз! Осонликча қутуломайсиз. Сиз бу масалага қандай ёndoшганингизни халойиқ беш кўлдай билиб олади!

Шундан кейин, Шимолий Мэнсфилдда тузуккина бир дори магазинига эга бўлган Апхем Мейсонга қарши эътиrozини секингина чўнтағига яшириб, умумий фикрга қўшилиб қўя қолишни афзал кўрди.

Сўнгра мажлис ўтказиладиган хона билан суд зали ўртасидаги эшик тўрт марта гуп-гуп бўғиқ дукуллади. Суд маслаҳатчилирининг оқсоқоли, цемент ва оҳақ билан савдо қилувчи Фостер Ланд гурзидал муштини ишга солиб, эшикни дукуллатган эди. Тушлик таомдан кейин иссиқ, дим зални тўлдириб ўтирган юзлаб одамлар (дарвоҷе, кўплари овқатга ҳам бориshmади) жисмларини қамраб олган аллақандай лоқайдикни ҳайдашга тушдилар.

– Нима гап? Нима бўлибди? Суд маслаҳатчилари қуруқ чиқишимадими? Қандай ҳукмда тўхташибди?

Бутун халойик – эркаклару аёллар, болалар тўсиққа томон интилишарди. Остонада турган икки соқчи эшикнинг дукуллаганига:

– Сабр, сабр! Ҳозир суд келади! – дея жавоб қайтарди.

Бошқа соқчилар эса шерифни хабардор қилиш ва Клайдни судга олиб келиш учун майдон орқали шоша-пиша турмага қараб жўнашди, яна бошқалари бўлса, Оберуолцер ва тағин аллакимларни чақириш мақсадида «Сентрал» меҳмонхонасига кетишиди. Клайд ўзининг ёлғизлигидан ва жон олгувчи мубҳамлиқдан эсанкираб, довдираб қолган, қўлидаги кишланлари билан Краутга боғланган эди. У, Слэк, Сиссел ва бошқаларнинг қўриқлови остида судга олиб келинди. Оберуолцер, Мейсон, Белнеп ва Жефсон ҳамда сон-саноқсиз муҳбирлар, рассомлар, суратчилар залга кириб, бир неча ҳафта давомида ўзлари ўтирган аввалги ўринларига бориб жойлашдилар. Клайднинг кўзлари пирпираб, қисилиб кета бошлади, у бу гал илгаригидек Белнеп билан Жефсоннинг ўртасида эмас, балки уларнинг орқасида: Краутга гўё михлангандай унинг ёнида ўтириши керак эди. Оберуолцер ва клерк ўз жойларини эгаллашлари биланоқ суд маслаҳатчилари хонасининг эшиги ланг очилди, кейин ўн икки киши тантанавор тарзда кириб келди, уларнинг турли-туман катта-кичик гавдалари қўпoldан-қўпол, қўпчилиги кийилавериб эскириб кетган расмий костюмларда жуда ғалати кўринар эдилар. Ҳаммалари суд маслаҳатчилари курсисигача бориб ўтиришди, аммо клеркнинг саволини эшитиб, ўша заҳотиёқ яна ўринларидан туришди:

– Мистер суд маслаҳатчилари, қарорингиз тай-  
ёрми?

Суд маслаҳатчиларидан биронтаси ҳам Белнеп, Жефсон ва Клайд томонга кўз ташлашмади, бу-  
нинг машъум маъноси борлигини Белнеп дарров  
тушуниб етди.

– Барбод бўлибди, – дея шивирлади у Жефсон-  
га. – Бизнинг фойдамизга эмас. Ҳаммаси равшан.

Шу пайт Ланд эълон қилди:

– Ҳа, биз қарор чиқардик. Айбланувчини биз  
қасдан ўйланган ният билан одам ўлдирганликда  
айбдор деб топдик.

Клайд бутунлай эсанкираган, аммо шунда ҳам  
ўзини қўлга олишга, кўринишидан хотиржам бў-  
лишга уринар, бақрайган кўзларини рўпарасида-  
ги суд маслаҳатчиларига ёки тўғрироғи, уларнинг  
бошлари узра шифтга қадаганча турар эди. Ахир,  
кеча кечқурунгина Жефсон унинг турмада обдан  
эзилиб ўтирганини кўриб, мабодо бу суднинг ҳук-  
ми салбий бўлган тақдирда ҳам бунинг аҳамияти  
йўқ, деб айтган эди. Чунки муҳокама бошдан-  
охир ноҳақ йўл билан олиб борилди. Унинг ҳар  
бир босқичи нотўғри тушунчалар ва адолатсиз-  
ликларга тўлиб-тошиб ётибди. Ҳар қандай юқори  
идора ҳам Мейсоннинг судда сўкағонлик ва туҳ-  
мат қилганини, дўқ урганини нотўғри ва қонун-  
га хилоф деб топади. Норозилик билдирилгач эса,  
сўзсиз, ишни янгитдан кўриб чиқишга оширилади  
(Жефсон норозиликни айни ким билдириши хусу-  
сида, ҳарқалай, гапни кавлаштириб ўтирмади).

Мана, энди Жефсоннинг ўша гапларини эслаб  
Клайд, бу ҳукм, ҳарқалай, ростдан ҳам у қадар  
аҳамиятга эга бўлмаса керак, деб қўйди ўзига  
ўзи. Чиндан ҳам унинг аҳамияти йўқ. Ёки... Қа-  
ранглар-а, мабодо ишни қайта кўриб чиқишнинг  
иложи топилмаса-чи, унда анави сўзларнинг маъ-

носи даҳшат-ку! Ўлим! Агар суд маслаҳатчиларининг қарори қатъий бўлсами, бу нақ ўлим деган сўз... қатъий қарор, эҳтимол ўшадир. Унда Клайд анави курсига ўтиришга мажбур, бу хаёлий шарпа аслида Клайдни анчадан бери, неча куну тунлар давомида қоралаб юрибди, аммо у ўша шарпани ҳайдашта эса ўзида ҳеч куч-қувват тополмаяпти. Ўша мудҳиш, жирканч курси яна ҳозир кўзига кўриниб кетди, бироқ бу гал аввалгига қарагандা анча яқинроқ ва йирикроқ бўлиб кўринди: у шу ерда, Клайднинг рўпарасида, Клайд билан судъя Оберуолцернинг қоқ ўртасида турибди... Клайд уни аниқ кўряпти: баҳайбат, зўр тутқичли, япалоқ бақувват суюнчиғи ҳам бор, ёнидан ва тепага қараб чарм bogичлари чиққан... Э, худо-е! Унга агар ҳеч ким ёрдам беролмай қолса-чи, унда нима бўлади! Эҳтимол, Грифитслар янги чиқимларга кўнишмас. Ё тавба! Ёки Белнеп билан Жефсон айтган анави иккинчи суд ҳам унинг норозилигини рад этса-чи. Унда суд маслаҳатчиларининг қарори узил-кесил кучга киради. Унда тамом! Тамом! Ё худо! Клайднинг тишлари гижирааб кетди, бироқ у буни ўша заҳотиёқ сезди-ю, оғзини маҳкам юмиб олди. Худди шу дақиқада Белнеп ҳам ўрнидан туриб, қарорни суд маслаҳатчилари орасида алоҳида-алоҳида овозга қўйишини талаб қилди, Жефсон Клайдга юзланиб, шивирлади:

– Сиз ташвишланманг. Ҳукм қатъий эмас. Биз, шубҳасиз, ишнинг қайтадан кўрилишига эришсак керак.

Бу пайтда ҳар бир суд маслаҳатчиси навбат-ма-навбат ўзининг «Ҳа!» деган овозини айтиётган эди, шунинг учун Клайднинг қулоғи Жефсонда эмас, ўшаларда эди. Нима учун уларнинг бари «ҳа» деганда бунчалик бўрттириб айтишяпти-а? Наҳотки, уларнинг биронтаси Мейсоннинг нутқларига

қарама-қарши ўлароқ, Робертани Клайд бежосдан уриб юборган, деб ўйлашмаса-я? Наҳотки, уларнинг биттаси ҳам Клайд бошидан кечирган, Белнеп билан Жефсон таъкидлаган ҳўанави руҳий ўзгаришга ишонмаса-а? Клайд суд маслаҳатчиларига тикилиб қолган эди. Уларнинг ҳаммаси баланд бўйли ё кичкина, қорайиб кетган ёғоч ўйинчоқдарга ўхшашар, қўллари билан юзлари эски фил суюгидай қоп-қора ёки сарғиш эди. Кейин у онасини эслаб кетди. Энди у ҳам ҳаммасидан хабардор бўлади, ахир ҳукмни эшитиш умидида бу ерда озмунча мухбирлар, расомлар, фотосуратчилар уймаланишиб юришибдими. Грифитслар – амакиси билан Гилберт нима деб ўйлашаркин энди? Сондра-чи? Сондра! Унинг ҳатто нафаси ҳам эшитилмаяпти. Ваҳоланки, Клайд судда ҳамма вақт, – буни Белнеп билан Жефсон ҳам қўллаб-қувватлаб туришди – Сондрага нисбатан ўзининг кучли, енгилмас эҳтироси, ҳа, фақат шу эҳтироси туфайлигина мана шунақанги ҳодисалар келиб чиққанини баралла айтаверган эди! Ундан эса бир оғиз сўз ҳам йўқ. Бундан бу ёғига ҳатто бир энлик хат кутиш ҳам амримаҳол энди, ваҳоланки, у Клайдга турмушга чиқишига ва бутун борлигини ҳадя этишига ҳам тайёр эди!

Атрофдаги одамлар, гарчи уларда чуқур қониқиши ҳисси сезилиб турса-да, аммо хомушроқ кўринишарди ёки эҳтимол, айни шу қониқиши ҳиссининг ўзи ўзини хомушлантириб қўйган бўлиши ҳам мумкин. Шайтонвачча, ҳарқалай, қутулиб қололмади-ку! Руҳий бурилиш хусусидаги ёлғон-яшиқ уйдирмаси билан ақли расо ўн икки кишини, бутун округнинг вакилларини алдаб кетолмади-ку! Гапининг бемаънилигини қаранглар! Бу пайтда Жефсон ўз жойида қимир этмай олд томонга тикилиб ўтирап, Белнепнинг сергайрат юзида эса нафрат ва интиқом туйфулари акс этар, у

ҳамон янги-янги важ-баҳоналарни ўртага ташлар эди. Мейсон, Бэрлей, Ньюком ва Редмондлар ўзларининг фоят мамнунликларини бир амаллаб, зўр-ма-зўраки филоф остида зўрга яшириб ўтиришар эди. Белнеп ҳукмни эълон қилишни бир ҳафта кеийинга, янаги жумагача кечиктириб туришни сўради – шунда у шахсан бемалол иштирок эта олар экан – бироқ судья Оберуолцер, бунинг учун менга жиддий асослар тақдим этилмаса, мен бунга рози бўйламайман, деб жавоб қайтарди. Агар ҳимоячилар исташса, эртага уларнинг арзини эшитишга тайёrlигини айтди. Борди-ю, арзлари далилларга асосланган бўлса, унда ҳукмни ўқишини кечиктириб туради, борди-ю, аксинча чиқса, унда ҳукм шу келаётган душанбада эълон қилинади.

Лекин Клайдни ҳозир бунақангি тортишувлар қизиқтирмас эди. У онасини, бу ишларга унинг нима дейиши ва қандай қарашини ўйлар эди. Клайд шу давр ичида унга ёзган узлуксиз хатларида доимо ўзининг гуноҳсизлигини таъкидлаган эди: мен ҳақимда газеталарда чиққан нарсаларга асло ишонманг, уларнинг бари чўпчак, деб ёзган эди. У, сўзсиз, оқланиши керак. У, гувоҳ сифатида ўзини ўзи ҳимоя қилиб чиқади. Хўш, энди-чи... энди-чи... Энди у онасини шундай қўмсаяптики, шундай қўмсаяптики... Ҳамма, каттадан-кичикнинг бари уни ёлғиз ташлаб кетди. Тумшайганча, даҳшат ичида фақат бир ўзи қолди. У онасига тезда хат ёзиши керак. Ёзиши керак. Ёзиши керак. Сўнгра у Жефсондан бир варақ қофоз билан қалам олди-да: «Колорадо, Денвер, «Умид юлдузи» хонақоси, миссис Грифистга. Азиз онажоним, мени маҳкум қилишди. Клайд», деб ёзди. Қофозни Жефсонга узата туриб, шу телеграммани ҳозироқ жўнатишнинг иложи йўқмикин, деб сўради бетоқат бўлиб, эзилган бир кайфиятда.

– Ҳозироқ, сүзсиз, жүннатамиз-да, оғайни, – дея жавоб берди Жефсон Клайднинг аянчли аҳволига ачиниб, сүнгра ҳу нарида турган дастёрни имлаб чақирди-да, унга қофозчани ва телеграммани жүнатиш учун пул берди.

Кейин одамларни ташқарига чиқармай туриб, Клайдни суд залидан Краут ва Сиссел ҳамроҳлигида қачонлардир ўзи қочишни мўлжаллаган ён томондаги ўша таниш эшикдан олиб чиқиб кетишиди. Матбуот вакиллари, ҳалойиқ, суд маслаҳатчилари ўз жойларидан қимирламаганларича, ҳаммалари Клайдга анграйиб қолишиди, гўё улар шу пайтгача унга қараб тўймаганлару, у ҳукмни қандай қарши олганини аниқлаш учун албатта унинг юзига кўзларини лўқ қилиб тикилишлари зарурдек эди, Одамларнинг Клайдга ёмон кўз билан қарашини билган судья Оберуолцер, Слэкнинг илтимосига кўра, то Клайдни яна ўз камерасига қамаб қўйганларини келиб айтмагунларича, суд мажлисини ёпмай турди; фақат шундан кейингина суд залиниг эшиклари очилди. Ҳалойиқ ташқарига отилди-ю, аммо тарқалиб кетмай, Мейсоннинг чиқишини кута бошлиди, чунки бу ишга алоқадор бўлганларнинг ичида фақат шу Мейсонгина чинакам қаҳрамонлик кўрсатган эди: у Робертанинг қасосини олиб, боллаб Клайднинг жазосини берди. Лекин аввалига Мейсон эмас, Белнеп билан Жефсон чиқиб келди, улар руҳий эзилган одамга сира ўхшамас эдилар, аллақандай тунд ва дарғазаб кўринардилар, айниқса, Жефсон ўзини безбетларча гердайган бир қиёфада тутиб борар эди.

– Ҳарқалай, уни қутқариб қолиш қўлларингиздан келмади-ку! – деб қичқирди оломон ичидан кимдир.

Жефсон елкасини қисиб:

– Ҳозирча қутқаролмадик, бироқ бу округдан ташқарида ҳам қонун бор, – дея жавоб қайтарди.

Шу пайт бирдан Мейсон күринди; у қопга ўжашшы зилдай пальтосини елкасига ташлаб, кийила-вериб эскириб кетган юмшоқ шляпасини күзигача бостириб олган эди; кетидан худди қирол мулозимларига ўхшаб Бэрлей, Хейт, Ньюком ва бошқалар эргашган. Мейсон ўзини кутиб турган халойик-нинг самимий илтифотини гёё бутунлай сезмагандай одим отиб келар эди. Ахир у голиб чиқди, округ судьялигига сайланди! Табрик хитобларини айтиб қичқираётган безовта оломон бир зумда уни тор ҳалқадек ўраб олди; яқинроқ турган одамлар унинг қўлинни қисмоқчи ёки ўз миннатдорчилигини изҳор этиш маъносида унинг елкасига қоқиб-қоқиб қўймоқчи бўлар эдилар.

– Орвилга ура! Баракалла, судья! (Унинг бу янги мансаби ҳам тезда ўзига ярашиб кета қолди.) Орвил Мейсон, худо ҳақи, сиз бутун округнинг ҳурматини қозондингиз! Ура! Қойил! Орвил Мейсонга уч карра ура!

Улар Мейсонни айблов ҳукмини ўтказа олгани учун қутлашяпти. Мана шу сон-саноқсиз оломон ичида Клайдни бутунлай ва бошдан-охир гуноҳкор деб ҳисобламайдиган биронта ҳам одам йўқ. Роберта... унинг мактублари... Клайдни, сўзсиз, ўзим билан никоҳдан ўтишга мажбуrlайман, деган унинг қатъий аҳди... ўзгалар билиб қолади, деб Клайднинг ўлгудек қўрқканлари... худди шулар уни, мана, шу кунга солиб ўтирибди. Уни қоралашди. Эҳтимол, у ўлиб ҳам кетар. Ўзи зориқиб қутган, етишишни орзу-ҳавас қилган бутун нарсаларини энди у йўқотди. Сондрани ҳам! Сондра! Ҳатто нафаси ҳам эшитилмаяпти унинг! Нафаси ҳам! Клайд, балки Краутми, Сисселми ёки яна бошқа биронтасими мени кузатиб турган бўлмасин тағин, деган хавотирда – ахир, энди улар Клайднинг ҳар бир ҳаракатини ҳам довруғ қи-

лишга тайёр туришибди – ҳамда ўз умидсизлиги ва азоб-уқубати чиндан ҳам оғирлигини сездириб қўймаслик учун қўлига қандайдир бир журнални олди-да, ўзини ўқиётганга солди... аммо у саҳифалар оша аллақандай олисларга тикилиб ўтирас, кўз ўнгига ҳарфлар эмас, онаси, укаси ва опа-сингиллари, ўзи билган Грифитсларнинг барчаси на-моён бўлаётган эди... Охири, бу хаёлий шарпалар ҳам обдан жонига теккач, кийимини улоқтириб, темир каравотига бориб чўзили.

«Маҳкум! Маҳкум!» Демак, у ўлиши керак! Ё худо! Яхшиямки, юзни беркитиб олишга ёстиқ бор, одамлар нима бўлаётганини очиқ-ойдин сезиб турсалар ҳам, ҳарқалай, кўз ёшингни ҳеч ким кўрмайди!

## XXVII БОБ

Ашаддий кураш ва оғир мағлубиятларнинг оқибати кўнгилсиз бўлади: маҳаллий суд томонидан фожианинг бу қадар кескин талқин этилиши Клайд чиндан ҳам айбдор, ҳамма жойдаги газеталар таъкидлаганидек, у қилмишига яраша жазосини топди деган қатъий фикрни икки океан ораглигига яшовчи бутун фуқарога тезда сингдириб юборди. Ёвуз қотилликнинг қурбони бўлган бечора қиз! Хатларининг нақадар ғамгинлиги-чи! Не-не азобларни бошидан кечирмабди-я! Ҳимоячиларнинг бетайинлигини қаранглар! Ҳатто денверлик Грифистлар ҳам иш кўрилаётган пайтда жиноий далилларнинг кўплигидан ёқаларини ушлаб, газеталарни бир-бирларига очиқчасига ўқиб беришга ҳам ботинолмай, кўпинча чет-четда, ўзларича кўз юргутириб, кейин қотилликка оид бу селнинг, бу эгри далиллар тошқинининг даҳшати тўгрисида ўзаро шивир-шивир гаплашишар эдилар. Аммо кейинчалик, Белнепнинг нутқи ва Клайднинг гу-

воҳ сифатидаги сўзини ўқиб кўришгандан сўнг, узоқ вақтлар давомида бир хил туйфу ва бир хил фикру хаёл билан яшаб келган бу кичик оиланинг руҳи енгил тортди ва бирмунча вақт газеталарда нима ёзишганидан қатъи назар, ўз ўғли ва акасига ишониб қарай бошлишди. Шунинг учун ҳам бутун суд муҳокамаси вақтида, муҳокаманинг то охиригача ҳам улар Клайдга яхши ният билан ёзилган умидбахш хатлар йўллаб туришди (бу хатлар кўпинча Клайднинг мактубларига асосланиб битиларди, чунки у ҳар гал ўзининг begunoҳligini қайta-қайta такрорлар эди). Лекин Клайд айбдор топилиши биланоқ азоб-уқубат гирдобига ботиб, онасиға телеграмма юборганида – газеталар ҳам шу ҳукмни тасдиқлаб чиққанларидан сўнг – Грифитслар оиласини бекиёс бир даҳшат босди. Ахир, бу унинг гуноҳкорлигини билдирадиган далил-ку? Шундай эмасми, хўш? Афтидан, барча газеталарнинг фикри ҳам шу бўлса керак, миссис Грифитс ҳузурига муҳбирлар ёпирилиб кела бошлишди; у эса ўзининг кичиккина тўдаси билан ваъзхонлик фаолияти вақтида алоқа қилиши лозим бўлган у дунёдан бутунлай алоқасини узиб, Денвернинг бир чеккасида мудҳиш номдорлиқдан яширинишга уринарди. Аммо юк ташув фирмасининг бир бебурд хизматчиси унинг янги манзилини ҳам одамларга айтиб қўйди.

Шундай қилиб, дунё ишларини тангри бошқариб туришига бутун вужуди билан ишонган мана шу америкалик аёл ҳатто кун ўтказишга ҳам қўр-қути йўқ ҳолича, ўзининг ғарибона, қашшоқ кулбасида ўтирибди; аммо борлиқнинг аёвсиз кучлари, тақдирнинг кескин ва шафқатсиз зарбалари бу аёлни имконидан қайтара олмади.

– Ҳозир мен фикрлай олмайман, – дерди у. – Мен бамисоли қотиб қолгандайман, ҳамма нарса кўзимга чалкаш кўриняпти. Болагинамни қотил-

ликда айблашибди! Аммо, мен – унинг онасиман, гуноқкорлигига ўлсам ҳам ишонмайман! У, айбдор эмасман, деб ёзган, мен унга ишонаман. Бор ҳақиқатни менга ёрилиб айтмаса, бошқа кимга ҳам айтар эди? Гапига ишонадиган мендан ҳам тузукроқ бошқа кимни ҳам топар эди? Бироқ тепада парвардигор бор, у ҳаммасини кўриб турибди, ҳаммасидан воқиф.

Лекин бари бир сон-саноқсиз жиноий далилларнинг анчагинаси Клайднинг Канзас-Ситидаги анави биринчи бемаънигарчилиги билан қўшилиб, миссис Грифитсни эсанкирашга мажбур қиласар, даҳшатга солар эди. Йўл кўрсаткич китобчалари билан боғлиқ гапларни нима учун у тузукроқ тушунириб беролмади-а? Модомики, у сузишни яхши билар экан, нима сабабдан у қизга кўмаклашмади? Анави номаълум мисс X агар осмондан тушган ҳурилиқо бўлганда ҳам, мунчалар Клайд унга ошиқмаса? Йўқ, миссис Грифитсни ўз эътиқодига асло, асло тескари юритиша олмайди, унинг тўнгич ўғли, ҳамма болаларининг ичидаги энг беҳаловати, лекин айни пайтда энг иззаттаби ва энг умидлиси шунақсанги жиноят қилибди, деган гапга сира ишонтиришолмайди! Йўқ! Бу ма-салада ҳатто унинг ҳозир ҳам кўнгли тўқ. Яратганинг марҳамати кенг, она ўғлининг хатолари нақадар даҳшатли бўмасин, унинг ёмонлигига ишониб, ўзи ёмонликка йўл қўймасин тафин! Ҳангоматалаб ва хира кимсалар жонига тегиб хонақо-ни ташлаб, уни қўчиб кетишга мажбур қилмасла-ридан олдин у неча бора қандайдир фарид бир хонанинг ўртасида, супуриш-сидиришларини тўх-татар, кейин ёт кўзлардан ҳам ҳайиқмай, сукутга чўмар эди... У бошини орқага ташлаб, кўзларини юмиб қақайганча туриб қолар, серфайрат бу-дойранг юзидағи чизиқлар хунук бўлиб кўринар,

лекин унда аччиқ ҳақиқат ва чинакам эътиқод барқ уриб турар эди – қиёфа дунёдаги олти минг йилга қариган, олис таврот даврларидан қолган бир нусха эди – у бутун фикру зикрини жон-жаҳди билан хаёлий бир тахтга қаратган, бу тахтда, унинг тасаввурида, яратган парвардигорнинг улкандан-улкан жонли руҳи ва жисми ўтиради. У чорак соатлаб, ярим соатлаб тиловат ўқир, худодан куч-қувват ва раҳм-шашфқат тилар, ўғлининг гуноҳи борми ёки йўқдигидан дарак беришини илтижо қиласр эди. Агар унинг гуноҳи бўлмаса, унда ўғли ва ўзи ҳам, икковлари учун азиз ҳисобланган бошиқа ҳамма одамлар ҳам бу ўтли дўзах азобидан қутулиб чиқишлиари муқаррардир; агар гуноҳкор бўлса, эй, яратган эгам, унда ўзинг шафқатингни аямай, бандам де, бу кулфатлардан қутулиш йўлини кўрсат, Клайднинг эса шу қилган ёвуз гуноҳи учун умрбод дилини пок айла, агар жоиз бўлса, эй, парвардигор, у гумроҳнинг гуноҳидан кеч.

– Куч-қудратда тенги йўқ, э худойим, ўзинг барҳақсан, марҳаматинг, ироданг мисалсиз. Борки, тириклик сенинг мурувватингдандир. Шафқатингни аяма, парвардигор! Агар унинг гуноҳи чўғдай қизил бўлса, уни қордай оқ қил, қонга ўхшаса, уни сутга айлантири.

Аммо шу сифинаётган дақиқаларида ҳам, у Момо Ҳавонинг ўз қизларига муносабатидаги донолигини мужассамлаштириб турар эди. Гўё Клайд ўлдирган деб тўнкашаётган ўша қизнинг ўзи-чи? Ахир, у гуноҳ қилмаптими? Ахир у Клайддан каттароқ эмасмиди, хўш? Газеталарда шундай деб ёзишди-ку. Миссис Грифитс Роберта-нинг хатларини сатрма-сатр, диққат билан ўқиб чиққанида кўнгли вайрон бўлди, Олденларнинг бошига тушган бу мусибатдан юрак-бағри қонга тўлди. Лекин шунга қарамай, Момо Ҳавонинг

абадий доноликлари миясига чуқур сингиб кетган она ва аёл сиғатида, у бу гуноҳли ишга тахминан Робертанинг ўзи ҳам розилик берганлигини, Робертанинг ўзи ҳам йўлдан озганлигини, бу нарса Клайднинг иродасизлик қилишига ва юз тубан кетишига олиб келганлигини тушунарди. Чидамли, саховатли қиз бундай ишга ҳеч қачон кўнмаган бўлар эди, мутлақо кўнмас эди ҳам. У хонақодаги ва кўчалардаги ваъзхонлик пайтларида шунағанги гуноҳга ботганларнинг тавба-тазарруларини неча-неча марталаб эшитган-ку, ахир! Наҳотки, олам яралаётган пайтлари боғда Одам Ато: «Хотим мени йўлдан урди» деганидай, Клайдни ҳам ҳимоя қилиб бўлмаса?!

Чиндан ҳам шундай... демакки..?

«Чунки унинг марҳамати абадийдир», – дея ёд олди миссис Грифитс. Модомики, худонинг марҳамати чегарасиз экан, нима учун энди у, она бўла туриб, Клайдга бунчалик тошмехрлик қилиши керак?

«Агар зигирдек ишончингиз бўлган тақдирда ҳам», дея яна эслаб ўтди ичида у, кейин хонага бостириб кирган хира мухбирларга юзланди:

– Ўғлим ўша қизни ўлдиргани ростми? Ҳамма гап мана шунда. Яратганинг олдида фақат шу нарсагина масалани ё у ёқлик, ё бу ёқлик қиласди. – Сўнгра у худо бу бетаъсир, пиҳлари ёрилиб кетган тирранча газетачиларнинг ақдини равshan қилишига қатъий ишонган одам қиёфасида уларга қараб кўйди. Миссис Грифитснинг бу қадар самимияти ва эътиқоди ҳатто шу мухбирларни ҳам таъсирантириб юборди. – Суд маслаҳатчилари уни айбдор деб топишадими-йўқми, бу юлдузларни кўлида кўтариб турган парвардигорнинг назарида югор-югордан бошқа нарса эмас. Суд маслаҳатчилари ҳам худонинг бандалари, улар чиқарган ҳукм ҳам шу дунё каби, одамлар каби нуқсонлидир. Мен

ҳимоячининг нутқини ўқидим. Ўғлим менга ёзган хатларида, айбдор эмасман, деб ўз оғзи билан айтган. Мен ўғлимга ишонаман. Унинг бегуноҳлигига имоним комил.

Эйса бўлса, хонанинг ичкари бурчагига тиқи-либ олганча, деярли шунча вақтдан бери миқ этмас эди. Унинг ҳаётий билими етарли эмас эди, у эҳтироснинг қудратли ва енгиб бўлмас кучини тушунмас, шу сабабли юз берган воқеанинг ҳатто ундан бирини ҳам илғаб олишга ва тушунишга ноқобил эди. У Клайдни, унинг қўнгли кемтиклигини, тасаввури таъсирчанлигини тушунмаган, шунинг учун яхшиси, унинг қилмишларини муҳокама қилиб ўтирган ҳам маъқул, дер эди.

– Лекин мен Клайдни Роберта Олден олдидаги гуноҳи учун ҳеч қачон оқламайман, – деб давом этди миссис Грифитс. – У аҳмоқлик қилган, лекин айни пайтда Роберта ҳам аҳмоқона иш тутган, чунки у Клайдга қаршилик кўрсатмаган. Гуноҳкор ким бўлишидан қатъи назар, гуноҳни кечириб бўлмайди. Қиз шўрликнинг мусибатдан юрак-бағри қонга тўлган ота-онасига ачинаман албатта, уларга муҳаббатим чексиз. Аммо шунга қарамай, бу гуноҳда битта менинг ўғлим эмас, иккалови ҳам айбдорлигини унутмаслик зарур, одамлар шуни билиб, шунга яраша ҳукм чиқаришлари керак. Мен ўғлимни оқламоқчи эмасман, асло, – деб такрорлади у. – Ўғлим болалиқдан қандай таълим олган бўлса, ўзини ўшандай тутиши лозим эди. – Шу ерда миссис Грифитснинг лаблари алам билан, таъна билан юмилди. – Бироқ мен Робертанинг хатларини ҳам ўқидим. Агар ўша хатлар бўлмаганда, прокурор ўғлимни айблай олмаслигини ҳам биламан. У суд маслаҳатчиларининг раҳмини келтириш учун ўша хатлардан фойдаланиб қолди. – Миссис Грифитс гўё мислсиз қийноқ ўтида қоврилгандай ўрнидан

турди ва аллақандай бир сипо тўлғаниш ила хитоб қилди: – Ҳарна бўлганда ҳам у менинг ўғлим! Ўзи ҳақидаги ҳукмини у ҳозиргина эшитди. Мен эсам унинг онасиман, у қилган гуноҳга қандай қарашибидан қатъи назар, унга ёрдам бериш йўлини ўйлашим керак. – У изтироб чекиб қўлларини сиқди, шунда ҳатто муҳбирлар ҳам унинг азобидан таъсиrlандилар. – Мен унинг олдига боришим шарт! Нодон бўлмасам, аввалроқ бормайманми, мана энди кўзим очилиб ўтирибди...

У ўз қаршисида омманинг қулоғи-ю овози ҳисобланган одамлар, унинг сирли дил яралари, ситам ва хавотирларини мутлақо тушунмайдиган, уларга бутунлай бефарқ қарайдиган одамлар ўтирганини бирдан сезиб қолди-ю, тилини тишлади.

– Нима учун сиз суд муҳокамасида бўлмадингиз, – дея гаплашади иш билармон муҳбирлардан бири, у Клайдга tengдош, кўринишидан қаҳри қаттиқ йигитча эди, – кўпчиликни ажаблантираётган нарса шу. Боришга пулингиз йўқмиди?

– Ҳа, пулим йўқ эди, – деб оддийгина жавоб бериб қўя қолди у. – Ҳарқалай, жуда кам эди. Бундан ташқари, келинг, деб маслаҳат ҳам солишимади, сизнинг бу ерда керагингиз йўқ, деб айтишибди. Лекин энди... энди нима бўлса ҳам боришим, боришининг иложини ўйлаб топишим керак. – У бесўнақай столча олдида тўхтади, аслида хонадаги бошқа жиҳозлар ҳам худди шунга ўхшашибона, аянчли, нурсиз бир аҳволда эди. – Йигитлар, ҳозир сизлар шаҳарга тушасизлар-а, – деди у. – Бирортангиз, телеграмма жўнатсан, олиб кетолмайсизларми? Пулини ҳам бераман.

– Йе, бўлмасам-чи! – дея хитоб қилди, бояги ўтакетган ножӯя саволни берган муҳбир. – Телеграмманизни мен ола кетаман. Пулингиз керак эмас. Газета ҳисобидан жўнатаман уни.

У телеграммани кўчириб олиб, миссис Грифитс билан учрашауви тўғрисидаги ўз ҳисоботига қўшиб юборишни мўлжаллаётган эди.

Миссис Грифитс усти кўчиб, тирналиб кетган саргиш столга бориб ўтирди-да, қофоз ва ручка топиб, қуийдагиларни ёзди: «Клайд! Нима умид қилсанг – худодан қил, унинг даргоҳи кенг. Дарров суд ҳукмига норозилик билдири. 50-сурани ўқи. Янги суд худо хоҳласа, сени оқлаб чиқади. Биз ҳадемай етиб борамиз. Отанг ва онанг».

Миссис Грифитс, телеграмма ҳақини газетага тўлаттириш хунук бўлмасин тағин, деб ўзига ўзи савол берганча:

– Ҳарқалай, яхшиси, мендан пул ола қолинг, – деди безов таланиб ва айни пайтда у, ишни қайта кўришга кетадиган чиқим-харажатларни Клайднинг амакиси ўз бўйнига олармикин-а, деб ўйлай бошлади. Бунинг учун, ҳойнаҳой, катта пул керакдир. – Телеграмма жуда узайиб кетди, – дея қўшиб қўйди у.

– Э, сиз ташвиш тортманг! – деди бояги муҳбирнинг шериги (у телеграммани тезроқ ўқиб олиш илинжида турар эди). – Нимани хоҳласангиз ёзверинг, жўнатиш – бизнинг ишимиз.

Биринчи муҳбирнинг миссис Грифитсдан қоғозчани ола солиб, чўнтағига ураётганини кўрган яна бошқаси:

– Менга ҳам нусхаси керак, – деди такаббурлик билан гапни чўрт кесиб. – Бу хусусий телеграмма эмас. Мен ҳозироқ нусхасини ё сиздан, ё эгасидан олишим керак!

Бу гапни биринчи муҳбир эшитгач, жанжал чиқиб кетишидан кўрқиб (ҳатто буни миссис Грифитс ҳам сезди), чўнтағидан қоғозчани олди-ю, бошқаларга ҳам узатди, улар шоша-пиша нусха кўчира бошладилар.

Худди шу вақтда ликурглик Грифитслардан янги суд муҳокамасини қўзғаш сизларнинг фик-

рингизча қандай бўларкин, унда чиқим-харажатларни ким қўтаради, деб сўрашганда, улар норозилик билдириш умуман мақсадга мувофиқ эмас (очиғини айтганда, бизнинг ҳисобимизга!) ва гапнинг пўскалласи – бу масала бизни мутлақо қизиқтирумайди, деган жавобни беришди. Ахир бу ўлим-ку, бу нарса гарчи ишларимизга у қадар зарар етказмаганда ҳам, аммо эл-юрт орасидаги обрў-ҳурматимизни нақ пайҳон қиласан ўзингни! Гилберт билан Сэмюэлнинг ўзи шунчалар шармандаси чиққанини ҳисобга олмаганда ҳам, Бэлланинг келажаги-чи, у беҳудага хароб бўлди, қаноти синди. Шуларнинг бари ўз қондош-қариндошлари Клайднинг қасддан қылган жинояти очиб ташла ниши оқибатида юз берди-я! Сэмюэл Грифитс ва унинг хотини бу кутилмаган фалокатдан роса эзилиб кетишди, бу фалокат, гарчи ноқобил ва бемаъни бўлса ҳам, лекин ҳар ҳолда замира иде энг яхши тилаклар ётган меҳрли бир ишнинг оқибати тарзида юз берди. Ахир, неча йиллардан бери бошдан кечираётган ҳаётий кураш тажрибалари Сэмюэлга, туйғуларни ишга аралаштириш – телбалик эканлигини ўргатган эди-ку! У Клайдни учратгунига қадар умрида бирон марта ҳам ҳис-туйғуга берилмаган эди. Ўшанда, отам укамга нисбатан адолатсизлик қилган, деб ўйлаганини қаранглар-а! Мана, оқибати нима бўлиб чиқди! Энди хотини билан қизи ўзларининг энг баҳтиёр, энг осойишта умр ўтказган қадрдон маконларини ташлаб, худди қувфиндиларга ўхшаб, эҳтимол бутун умр, Бостон яқинидаги аллақайси бир жойдами ёки яна бошқа бирор-бир хилват ердами саргардон юришлари...

<sup>1</sup> Голгофа – арамей тилида «бош суюги» демакдир; Куддус шахри яқинидаги кичик бир топнинг номи. Инжилдаги ривоятга кўра, шу ерда Исо ўлдирилган. Ҳозир бу избора «азоб берувчи жой», «уқубат манбаи» маъносини билдиради. (*Мұхаррир*.)

ёки одамларнинг ачинганинамо, шилқим қарашла-  
рига доимо чидаш беришлари керак! Сэмюэлнинг  
ўзи эса ўша баҳтсизликдан кейин уззуккун Гил-  
берт билан суҳбатлашиб, корхонани акциядорлик<sup>1</sup>  
асосида Ликургдаги ё бошқа бирон шаҳардаги  
қайсиdir фирмага қўшиб юборсак ёки эҳтимол,  
ҳамма ишларни (аста-секин эмас, шошилинч ра-  
вишда), масалан, Рочестергами ёки Буффалогами,  
Бостон ёки Бруклингами ўтказиб, ўша ерда бош  
фабрикани қурсак бўлмасмикин, деб маслаҳат  
сўрар эди. Ахир, бу номусдан фақат Ликург ва у  
билан боғлиқ ҳамма нарсалардан воз кечиш орқа-  
лигина қутулиш мумкин, холос. Улар ҳаётларини  
янгидан бошлашлари, жуда бўлмагандан юрт ичи-  
да бошқатдан мавқе ортириб боришлари керак.  
Ўзи ва хотини учун бунинг унчалик аҳамияти  
йўқ, ахир улар ошларини ошаб, ёшлирини яшаб  
қўйганлар. Лекин Белла, Гилберт, Майралар-чи...  
уларнинг шанларини энди қаерда ва қандай қи-  
либ илгаригидай тиклаш мумкин?

Хуллас, ҳали суд муҳокамаси тугамасиданоқ, Сэмюэл билан Гилберт ёқа ва кўйлак тикиш корхонасини Жанубий Бостонга қўчиришга қарор қилдилар, улар мана шу баҳтсиз, шармандали воқеа ақалли бир оз эсдан чиқмагунча фақир киши па-  
нада бўлиб туришлари мумкин эди.

Шу боисдан ҳам, бундан буён Клайдга кўмак-  
лашишдан бош тортилди. Шунда Белнеп билан  
Жефсон гарангсиниб ўйланиб қолишиди. Шу пайт-  
гача улар Брижбургда анча муваффақиятли ишлаб  
келаётганлари учун ҳар бир соат вакълари бами-  
соли олтинга тенг бўлиб қолгани аниқ эди; Клайд  
ишининг фавқулодда зиқлиги натижасида бир

<sup>1</sup> Акциядорлик – буржуа мамлакатларида акция билан иш  
кўрувчи жамият аъзолари. Акция – қимматбаҳо қофоз дегани  
бўлиб, ана шу қофоз билан акциядор иш юзасидан тушган да-  
ромаднинг бир қисмини олиб туради. (*Мұхтаррір*.)

чеккага ташлаб қўйилган қўпгина масалалар энди уларнинг диққатига мунтазир турар эди, фақат шу туфайли иккала юрист ҳам хизматчилик юзасидан ёки бирорларга савоб иш қиласман деб, у бу муко-фотдан умидвор бўлмай туриб ҳам, Клайдга бундан буён ёрдам беравериш лозимлигига умуман қатъий ишонмаётган эдилар. Аслида норозилик билдиришнинг ўзига озмунча сарф-харажат кетмаслигини улар яхши тушунар эдилар. Суд қарорларининг ҳажми жуда катта эди. Улардан узун-узун, қимматга тушиб кетадиган парчалар ва сахифаларни қўчириб олишга тўғри келар эди, давлат томонидан ажратилган маблағлар эса бунга урвоқ ҳам бўлмас эди. Лекин, деди Жефсон, гарбдаги Грифитсларнинг қўлидан бир чақалик иш келмайди, деб ўйлаш бемаъниликдир. Ахир, гапиришляпти-ку, улар узоқ йиллардан бери ваъзхонлик ҳамда хайр-худойи йигиш билан шуғулланишар экан. Агар уларга Клайднинг аҳволи нақадар ёмонлиги айтилса, эҳтимол, турли хил хитбономалар воситаси билан фуқародан ёрдам сўраб, жуда бўлмагандар норозилик билдиришга кетадиган харажатларни қопладиган маблағни тўплашлари мумкиндир? Тўғри, улар ҳозиргача Клайдга сира кўмаклашишмади, лекин ўша вақтда онаси, сизнинг келишинингизга эҳтиёж йўқ, деб хабарланган эди-да, ахир. Энди – бошқа гап.

– Унга телеграмма юбориш керак, кесин, – дея таклиф киритди Жефсон ишбилармонлик билан.  
– Агар Оберуолцерга онаси келяпти, деб айтсак, ҳукмни ўқиб эшиттиришни ўнинчигача кечиктириб туришимиз ҳам мумкин. Гап мана бундай, аввалига шунчаки келаверинг, деб таклиф этамиз, агар у боролмайман деса, унда пул масаласини ўйлаб кўрамиз. Ҳарқалай, ўлдим деганда йўлкира учун ва балки, норозилик билдириш учун ҳам бир оз пул топа олар.

Шундан сүнг миссис Грифитсга телеграмма ва хат жўнатилиб, гарчи бу тўғрида ҳозирча Клайдга оғиз очилмаган бўлсада, аммо ликурглик қариндошлари бундан бўёнига унга ёрдам беришдан бутунлай бош тортишди, деб хабар берилди. Бунинг устига, ҳукм ўнинчигача эълон қилинади, шу сабабдан Клайднинг кўнгли учун ўша пайтда яқин кишиларидан биронтаси, яхшиси онаси келиб тургани маъқул. Яна норозилик билдиришга кетадиган сарф-харражатларни қоплаш учун маблағ топиш ёки жуда бўлмаса бу хусусда қандайдир кафилик берилиши зарурлиги ҳам қистириб ўтилди.

Ана, миссис Грифитс тиз чўкиб, худодан мадад сўраяпти. Ишқилиб, энди у ўз қудрати, ўзининг абадий меҳр-шафқатидан дариф тутмасин. Миссис Грифитсга аллақайдандир ёруғлик, ёрдам келмаса, унда йўлкирага пулни у қаердан топади, норозилик билдиришга кетадиган маблағ тўғрисида-ю, гап ҳам бўлиши мумкин эмас.

У тиззасида турганича худога сифинаётган эди, тўсатдан миясига бир фикр келиб қолди. Газеталар унинг суҳбатини оламан, деб роса жонига ҳам тегиб кетишиди. Мухбирлар-ку, ҳар қадамда уни пойлаб юришади. Нима учун у ўғлига мадад бермаяпти, унинг ҳузурига бормаяпти? Фалон нарса ҳақида у қандай фикрда, пистон нарса ҳақида-чи? Хўш, доим бўлмағур нарсаларни сўраб, уни тинчитмайдиган қайсиdir бир катта газетанинг муҳарририга бориб, ўзининг нақадар оғир аҳволга тушиб қолганини нима учун у айтолмас экан? Агар муҳаррир ҳукм ўқилаётган куни у ўғлининг ёнида бўлиши учун вақтида жўнаб кетишига ёрдамлашса, унда у, Клайднинг онаси, бор гапларнинг ҳаммасини газетага ўзи ёзиб беришга ваъда қиласарди. Ахир, мухбирларни истаган ёқقا, ҳатто судга ҳам жўнатишади-ку, бу ҳақда у газеталар-

дан ўқиган. Нима учун уни, Клайднинг онасини юбориш мумкин эмас? Ўша гапларни ҳикоя қилиш ва ёзib жўнатиш наҳотки унинг қўлидан келмаса? Ахир, у қанчадан-қанча дуою маъruzаларни ёзib ташлаган-ку?!

У ўрнидан турди, лекин дарров яна тиз чўкиб:

– Оҳ, нолишим сенга етди, парвардигор! – дея хитоб қилди.

Кейин яна ўрнидан туриб, ўзини диний ишларга бағишилаган кишиларнинг энгил-бош ҳақидаги аллақандай алоҳида тасаввурлари маҳсули бўлган кийимларини – жигар ранг пальтоси-ю ниҳоятда хунук, боғичли қўнғир шляпасини излаб топди-да, ўша заҳотиёқ энг йирик ва обрўли Денвер газетаси таҳририятига жўнади. Ўғлининг иши шу қадар ҳамма ёққа овоза бўлиб кетган эдики, уни дарров бош муҳаррир ҳузурига бошлиб киришди. Кутимаган бу аёл муҳаррирни жуда қизиқтириб қўйди ва унинг гапларини ачиниб туриб, хурмат билан тинглади. Аянчли аҳволини дарров тушунди ва газета манфаати нуқтаи назаридан унинг таклифига кўниш тўғрисида ўйлай бошлади. У чиқиб кетиб, бир неча дақиқадан кейин қайтиб кирди. Шундай қилиб, миссис Грифитс уч ҳафтага муҳбирликка қабул этилди, ундан кейинига эса, алоҳида ҳабар берадиган бўлишди. Боришига ҳам, келишига ҳам йўл харажатлари тўланади. Ҳозир миссис Грифитсни бир ёрдамчисига юборади, у мақолани қандай тайёрлаш ва қандай жўнатишни тушунириб қўяди. У озгина нақд пул ҳам беради. Агар истаса, у бугун кечқуреноқ йўлга тушиши мумкин: қанча тезроқ жўнаб кетса, шунча яхши. Кетишдан оддин газета учун иккита расмини қолдирса, тузук бўлар эди. Бироқ муҳаррир унга шуларни тушунираётуб, мундай бир қараса, миссис Грифитс бошини орқага ташлаб олганча, кўзларини юмиб

турган экан. У шу туришида оҳ-ноласини дарров қабул этган худога шукур қилаётган эди.

## XXVIII БОБ

Брижбург. 8 декабрь ярим кечада вокзал перронига почта поездидан ҳоргин ва паришон бир аёл тушиб келди. Ҳаво ғоятда совуқ, юлдузлар чараклар эди. Якка ўзи шўппайиб турган навбатчи унинг сўроғига жавобан Брижбургдаги «Сентрал» меҳмонхонасига борадиган йўлни кўрсатди: вокзалга туташган кўчадан тўппа-тўғри юриб, биринчи бурилишдаёқ чапга қараб кетилади, кейин яна икки квартал босиб ўтилади. Уйқу элитган тунги клерк ўша заҳотиёқ унга хона ажратиб берди, кимлигини билгандан кейин эса, шоша-пиша округ турмасига қандай боришини тушунтира кетди. Лекин миссис Грифитс сал ўйлаб кўриб, ҳозир вақти эмас деган қарорда тўхтади, эҳтимол ўғли ҳозир ухлаб ётгандир. Кейин ўзи ҳам ухлаб олади, тонг ёришар-ёришмас уйфонади. Ахир, у Клайдга қайта-қайта телеграмма юборган-ку. Унинг келишидан Клайднинг хабари бор-ку.

Миссис Грифитс эрталаб соат еттидаёқ ўрнидан турди, саккизда эса хатлари, телеграммалири, гувоҳномаларини қўлида ушлаганча округ турмасига кириб борди. Турма маъмурлари унинг ҳужжатларини текшириб кўришгач, онасининг келганлигидан хабардор қилиш учун Клайдга одам юборишиди. Руҳи тушиб, маъюсланиб қолган Клайд онаси билан бўладиган учрашувни ўйлаб қувониб кетди, ваҳоланки, бунақангич учрашувни ўиласа илгари уни ваҳима босар эди. Чунки энди кўп нарсалар ўзгарди. Мудҳиш қиссани эса ҳамма эшитди. Жефсон томонидан ўзи учун

усталик билан ишлаб чиқилган анави уйдирмага суюниб туриб, энди Клайд, ҳойнаҳой, онасининг кўзига бемалол қараши, иккиланмасдан бу чин ҳақиқат эди, дея олиши мумкин: Клайдда Робертани ўлдириш нияти йўқ эди, уни қасддан чўктириб ҳам юбормаган. Ана, у қабулхонага томон шошилиб боряпти, Слэкнинг муруввати тифайли у ерда онаси билан ёлғиз кўришишга имкон берилган эди.

Миссис Грифитс ўғлига пешвоз чиқиб ўрнидан турди, Клайд ҳам эзилган кўнгли баттар бўшашиб онасига отилди, айни пайтда у суюнчиғи, чинакам ҳамдарди ва эҳтимол, беминнат халоскори етиб келганидан кўнгли алланечук тўқ эди. Кейин худди томоғида нимадир тўхтаб қолгандай, овози зўрбазўр эшитилиб:

– Оҳ, ойижон! Келганингиздан шу қадар хурсандманки! – дея олди.

Лекин миссис Грифитснинг ҳаяжони шунчалик эдики, гапиришга ҳам мажоли йўқ эди, фақат ўғлини – қонун қоралаган мана шу болажонини бағрига босиб, бошини елкасига қўйганча, ўзи эса самога тикилиб турарди. Шуларнинг бари парваридигори оламнинг марҳамати. Балки, у яна бошқа мурувватларини ҳам ундан аямас. Зора ўғли озод этилса эди ёки ақалли уни оқдовчи ҳамма далилларни адолатли кўриб чиқадиган янги суд муҳокамаси белгиланса эди, аввалги судда бундай бўлмади-ку, ахир. Хуллас, у бир неча дақиқа қимир этмай қотиб турди.

Кейин уй ҳақида, қай йўл билан бу ерга келгани, зиммасидаги муҳбирлик вазифаси ҳақида сўйлай кетди: у Клайд билан суҳбатлашиб мақола ёзиши, ҳукм чиқарилаётган пайтда эса унинг ёнида туриши керак экан... (Бу гапларни эшитганда Клайд сесканиб тушди.) Сўнгра унинг эндиғи тақдири

бошдан-охир онасининг югуриб-елишига боғлиқ бўлиб қолганини ҳам у ҳозир билди. Ликурглик Грифитслар ўз манфаатларини ўйлаб, унга бошқа ёрдам бермайдиган бўлишибди. Лекин онаси – ишқилиб, у халойиқ олдида ўзининг ҳақ талабларини айтиб чиқақолса бас – ўғлига бемалол ёрдам бериши мумкин. Худога шукурки, мана шу пайтгача у худонинг ҳимматидан ҳали четда қолганича йўқ. Бироқ у, яратган парвардигор ва одамларга қўрқмай илтижо қилиши учун Клайд ҳозироқ, шу ернинг ўзидаёқ унга бор ҳақиқатни – у Робертани бехосдан уриб юборганми ёки қасданми, у тўсатдан чўкиб кетдими ёки атайлаб чўқтиридими, шуларни аниқ айтиб бериши керак. У ўғлининг гувоҳлигини ва хатларини ҳам ўқиб кўрди, юз берган воқеани ҳикоя қилган пайтида гапларидағи чалкаш жойларни ҳам белгилааб чиқди. Хўш, Мейсон айтган ўша фикрлар чиндан ҳам тўғрими ёки ёлғонми?

Клайд шу пайтгача ўзи сира тушунолмаган бу қадар мустаҳкам ва бенуқсон имон қаршисида худди илгаригидек яна даҳшатга тушди, бош кўтаролмай қолди, лекин шунда ҳам, аслида дили музлаб бораётган бўлса ҳам, қасам ичиб айтган ҳамма сўзларим – бошдан-охир ҳақиқат, деб иложи борича дадилроқ гапиришга уриниб кўрди. Унга тўнкашаётган айб мутлақо туҳмат. Туҳмат! Лекин миссис Грифитс ўғлини кузатар экан, кўзларида нимадир йилтираб кетганини уларда қандайдир сирли бир соя борлигини ўзича алам билан қайд қилиб қўйди.

У кўзларда миссис Грифитс кутган, учратарман деб умид қилган чинакам дадиллик, ўзининг ҳақлигига очиқ-ойдин ва сўзсиз ишониш туйфуси сезилмас эди. Йўқ, йўқ, унинг ҳамма хатти-ҳаракатида, гапирган гапларида қандайдир

билинар-билинмас носамимиийлик, аллақандай хавотирми ёки иккиланиш белгисими, ишиқилиб, бир нарса бор эдики, шуларни ўйлаганда миссис Грифитснинг бутун аъзойи бадани музлаб бораёт-ганга ўхшар эди.

Клайдга қатъият етишмас эди. Эҳтимол, миссис Грифитснинг дастлабки хавотирлари бежиз бўлмагандир, эҳтимол, у мана шу ёвуз ишни кўнглига туккан бўлса туккандир, эҳтимол ўша хилват, кимсасиз кўлда у қизни чиндан ҳам урган бўлса ургандир? Ким билади? Диљдаги шу гумоннинг жон зирқиратувчи, аламли қийноғига чидаш осонми, ахир! Ваҳоланки, у ўз гувоҳлигида мутлақо бошқа гапларни гапирган-ку, ахир.

«Бироқ, ўғлим ва ўзим мана шундай мудҳиш аҳволга тушиб қолган бир пайтимизда, болагинамнинг ҳақлигидан гумон қилиб ўтиришм ва шу гумоним билан унга тўнкалаётган ўлим ҳукмини тасдиқлаб қўйишимдан ўзинг асрагин, худойим! О, йўқ мени бундай кўйга солма. Йўқ, йўқ, раҳм қил, илоҳим!» У юзини тескари бурди; шубҳа илонининг йилтироқ бошини товони билан эзиб ташлагандай бўлди; миссис Грифитс учун бу нарса Клайд ўз айбини эслашидан ҳам баттарроқ қўрқинчли эди. «О, яратган эгам, о, олампаноҳим! Бас, бас, биз бундай хаёлга йўл бермаймиз. Буюк тангримнинг ўзи она қалбига жазо бермағусидир». Ахир, ана у – ўғли шу ерда, қаршисида туриб, бу ёвузликни қилмаганман, деб айтяпти. У ўғлига ишониши керак – у сўзсиз, инонади ҳам. Нотавон кўнглининг бир бурчагига шубҳа яшириниб олган бўлса-да, бари бир у инониши керак. Бас, бас, шу ҳамма машмашалар тўғрисида у, яъни Клайднинг онаси нима деб ўйлаётганини халойиқ бир эшитиб қўйсин. Улар ўғли билан икковлашиб бирор йўли-

ни топишади. Ўғли тоат-ибодат қилиши, худога сифиниши лозим. Унда таврот бормикин? Ўқиёт-ганмикин уни? Клайд турма назоратчиларидан бири аллақачаноқ таврот топиб берганини эслаб: ҳа, бор, уни ўқияпман, деб онасининг кўнглини тинчтишига шошилди.

Энди эса, миссис Грифитс йўлга тушиши, адвокатларга учрашиши, кейин биринчи мақоласини жўнатиши керак, сўнгра у яна қайтиб келади. Лекин у кўчага чиқиб улгурмасидан мухбирлар қуршовида қолди, улар миссис Грифитснинг нима мақсадда ва қандай ният билан келганини сўраб-суриштириб, уни саволга кўмиб ташлашиди. У ўғлининг бегуноҳдигига ишонадими? Унинг фикрича, суд мухокамасиadolатли ва холисона ўтдими? Нима учун у шу пайтгача келмаган эди? Миссис Гри фитс бўлса, ўзининг одатдаги тўғри сўзлиги, сиполиги ва оналик меҳри ила барча саволларга эринмай жавоб қайтарар, нима учун ҳозир келгани-ю, аввал нима учун келмаганига тушунтириб берар эди.

Модомики, у келган экан, энди ҳали-вери кетмайди. Ўғлини қандай қутқариб қолиш йўлини яратганинг ўзи кўрсатади, унинг гуноҳсизлиги-га эса у бир дақиқа ҳам иккиланмаган. Эҳтимол, кейин улар ҳам худодан ёрдам сўрашар? Миссис Грифитснинг иши ривож топишини тилаб ибодат қилишар? Бундан таъсирангган ва ҳаяжонга тушган мухбирлар бир-бирларига гал бермай, унинг учун тоат-ибодат қилишга онт ичишар, кейин эса миллионлаб газетхонларга ўша пайтда у қандай бўлса, айни ўшандайлигича – ўрта ёш, хунук, қатъият ва диний имони мустаҳкам, самимий, ўзи жиддий ва ўғлининг бегуноҳдигига бошдан-охир, бутунлай ишонган бир аёл сифатида тасвирлаб кўрсатар эдилар.

Бирок бу гапларни ликурглиг Грифитслар эшит-гандари сари таъблари тирриқ бўлар эди: чунки миссис Грифитс келганлиги уларни баттар ноқу-лай аҳволга солаётган эди! Клайд ҳам ўз камера-сида бир оз кечикиб бўлса ҳам газеталарни ўқиб чиқар, ишқилиб ўзи билан боғлиқ нарсаларнинг ҳаммаси ҳозир ғалати бир тарзда сийқалаштириб берилаётганига жаҳли чиқса ҳам, аммо онасининг шу ердалиги, ёнидалиги, унга далда бўлиб турганини ўйлашнинг ўзи ҳатто кўнглига хуш ёқиб, унга таскин берар эди. Ахир, унинг ожизликлари ва қўлдан бой берган имконлари қанча кўп бўлган тақдирда ҳам ҳар ҳолда Клайднинг онаси-ку! Келишидан мақсади ҳам, аслида Клайдга мадад бериш. Майли, одамлар нима деб ўйлашса ўйлай-веришин. Ҳарқалай, унга ўлим шарпаси ҳамла қилиб келганда, фақат шу онасигина уни унутма-ди, ундан воз кечмади. Кейин Денвер газетасига кириб, бунақсанги фавқулодда топқирлик қилгани мақтovга лойиқ эмасми, ахир?

Илгари у бу қадар эпчил аёлга ўхшаб кўрин-масди. Ким билади, балки у ўзининг бу даражада ўта қашшоқлигига ҳам қарамай, ишнинг иккин-чи марта суд муҳокамасига қўйилиши масаласи-ни ҳал этиб, унинг ҳаётини сақлаб қола олар?! Ким билади?! Ваҳоланки, Клайд айни замонда онасига нисбатан тошмехрларча шу қадар бе-парво муносабатда бўлмадими, унинг олдида шу қадар кўп, шу қадар чуқур гуноҳларга ботмади-ми?! Онаизорни қарангки, шунда ҳам мана энди югуриб келиб, унинг азоби-ю қийноғига чидаб, уни жонидан азиз кўриб, фақат Клайди туфай-лигина қандайдир бир маҳаллий газетага ёлла-ниб, унга берилаётган жазо тафсилотини ёзиб юбориш фамида юрибди. Онасининг эскирган пальтоси ва эскича шляпаси, беўшлов жиддий

юзи, қовушмаган, бесўнақай ҳаракатлари энди Клайднинг яқинги нарадаги каби жаҳлини чиқармас, булардан у ор ҳам қилмас эди. Чунки у Клайднинг онаизори эди, у ўғлини жонидан ҳам афзал кўриб, унга ишониб, уни қутқариб қолиш умидида курашиб юрган пайти эди.

Бироқ Белнеп ва Жефсон у билан биринчи бор учрашганларида хийла довдираб қолишиди. Гарчи бу аёл ўзининг ҳақлигига астойдил ишонса ҳам, аммо Белнеп билан Жефсон бари бир бунчалар қишлоқи ва бунчалар маданиятсиз одамга дуч келамиз, деб ўйлашмаган эди. Анави пошнасиз тўмтоқ бошмогини қаранглар. Анави шалвираган шляпаси-чи. Тўкилиб тушай деяётган жигар ранг пальтосини қаранглар. Бироқ орадан бир неча дақиқа ўтмай, миссис Грифитс сўзларидағи оддийлик ва сиполик, ундаги имон ва она меҳрининг кучи, тип-тиник мөвий кўзларининг тўппа-тўғри ва илтижоли боқиши иккала адвокатни ҳам сехрлаб қўйди, бу кўзларда миссис Грифитснинг мустаҳкам эътиқоди ва лозим бўлса, ширин жонини ҳам аямай тикиб юборишга шайлиги акс этиб турар эди.

Ўғлининг бегуноҳлигига, хўш, адвокатларнинг ўзлари ишонадиларми? Миссис Грифитс энг аввало, мана шуни билиб олишни истайди. Кўнгилларининг бир четида уни айбдор деб ўйлашдими? Бир-бирига зид гувоҳлардан оналик қалби адo бўлди ўзи. Парвардигори олам унинг ва яқин кишиларининг гарданига жудаям оғир синов хочини қўйди. Аммо тангрининг номи муқаддас бўлиб қолгусидир! Миссис Грифитснинг бу буюк хавотирини иккала адвокат ҳам кўриб ва сезиб, Клайднинг бегуноҳлигига сира шубҳамиз йўқ, деб шоша-пиша уни ишонтиришга тутинишиди. Мабодо, уни айбсиз айбдор қилиб қатл этишса, бу одил судлов ишини гирт масхаралаш бўлур эди.

Бироқ шунга қарамай, ушбу сұхбат пайтида иккала ҳимоячини ҳам масаланинг моддий томони күпроқ ташвишга солди, чунки миссис Грифитс Брижбургга қандай келганини ҳикоя қилиб бергач, унинг ҳамёни қуп-қуруқдиги аён бўлди-қўйди. Норозилик билдириш учун эса, кам деганда икки мингга яқин пул керак. Кўчирма ва нусхалар олиш, мажбурий хизмат сафарларига бориб келиш учун кетадиган турли чиқим-харажатларнинг барини улар миссис Грифитс билан биргаликда бир соат давомида чамалаб чиқишиди, у бўлса нуқул нима қилишга ҳайронман, деб такрорлар эди. Кейин у ҳам сұхбатдошларини бир оз ҳайрон қолдириб, аммо самимий ва ҳаяжонли бир ҳарорат билан хитоб қилди:

– Тангрим мени ёлғиз қолдирмайди. Мен биламан. У менга ўз иродасини аён этган. Мени Денвер газетасига мурожаат қилишга унинг нафаси ундади. Бу ерда ҳам умидим парвардигордан, унинг йўл-йўриқ кўрсатишига имоним комил.

Аммо Белнеп ва Жефсон худосизларга хос ихлоссизлик ҳамда ажабланиш билан бир-бirlарига қараб олишиди, холос. Имон ҳам шу қадар мустаҳкам бўладими-а! У гирт савдои шекили! Ёки шунчаки диний мутаассибмикин? Лекин Жефсоннинг миясига тўсатдан лоп этиб бир фикр келиб қолди. Одамларнинг диний туйфуси шундай бир омилики, у билан ҳисоблашмай ҳеч кимнинг иложи йўқ, шунинг учун динга бу қадар ихлосмандлик ҳамма вақт ҳалойиқнинг хайриҳоҳлигига сазовор бўлиши аниқ. Фараз қилайликки, ликурглик Грифитслар ўз айтганларида қатъий туриб олишиди деб – хўш, нима бўпти, модомики миссис Грифитс шу ерда экан, черковлар ва қанчадан-қанча художўйлар бор-ку, ахир. Шу кунгагча, айниқса, Клайдни қаттиқ қоралаб келаётган

ва мудҳиш ҳукм чиқарилишига сабабчи бўлган кимсаларнинг кўнглини юмшатишда айни шу аёлнинг жўшқинлиги-ю, бекиёс ихлосидан фойдаланиб, одамларнинг раҳмини келтириб, улардан хайру эҳсон йифиб қолишнинг иложи йўқмикин?

Фам-фуссага ботган она! У ўғлига жон-дилидан инонади!

Вақтни бой бермай, ҳаракат қилиш керак!

Оммавий лекция, унга кириш фалон пул, кейин онаизор эстрада минбарига чиқиб, ўзининг ҳаммага маълум фам-кулфатидан ўзи ларзага тушганча, душманлик кайфиятида ўтирган ҳалойиқни ўғлининг иши – ҳақ иш эканлигига ишонтиришга уринади, сўнг уларни фақат хайриҳоҳ этибина қолмай, балки анави икки минг долларни ундириб олишга ҳам тиришади, чунки ўша пулсиз норозилик билдириш тўғрисида гап ҳам бўлиши мумкин эмас.

Шу боисдан Жефсон унга ўз режасини айтиб, ҳимоя ҳужжатларидан – Клайд ишини чинакамига тўғри ёритиб берган ўша барча далиллардан – фойдаланган ҳолда маъруза текстини тузиб чиқиши маслаҳат қилди, миссис Грифитс эса бу далилларни бемалол ишлатиб, ҳалойиқقا ўзи хоҳлаганича тушунтириб бериши ҳам мумкин. Бирдан миссис Грифитснинг кўзлари ёниб, буғдой ранг юзларига қизиллик югурди: у рози. У ҳаракат қилиб кўради. У шундай қилишга мажбур. Чунки бу – худонинг унга қараб узатилган марҳаматли қўли эмасми ахир, зулмат азобида гангид юрган пайтида қаёқдандир келган унинг овози эмасми, ахир?

Эртаси куни эрталаб ҳукмни ўқиб эшиттириш учун Клайдни судга олиб келишди, миссис Грифитс эса қўлида қалам ва блокноти билан ўғли-

нинг ёнида турарди, чунки у ўзи учун ниҳоят даражада оғир бўлган шу манзарани тасвирлаб, мухбирлик қилиши керак эди, атрофида эса одамлар, ҳаммалари кўзларини лўқ қилиб унга тикилиб олишган. Мана шу аёл Клайднинг туққан онаси экан! Мухбир бўлиб келибди-я! Она-боланинг шу тақлид ёнма-ён бирга ўтиришида, умуман, бошдан-охир шу манзаранинг ўзида аллақандай ўта бемаънилик, тошбағирлик, ҳатто файритабийлик сезилиб турар эди. Буни қаранглар-а, ликурглик Грифитслар ҳам келиб-келиб шу кишилар билан қариндош-уруг эканлар-да, а?!

Лекин онасининг шу ердалиги Клайдга далда бериб, кўнглини кўтариб турар эди. Ахир, куни кечагина у яна турмада бўлиб, ўз режаси тўғрисида сўзлаб берди. Мана ҳозироқ – ҳукм эълон қилиниши биланоқ – ҳукм қандай бўлишидан қатъи назар, онаси яна ҳаракатини бошлаб юборади.

Ниҳоят, Клайднинг ҳаётидаги энг даҳшатли дақиқа ҳам етиб келди, у беихтиёр ўрнидан туриб, судья Оберуолцернинг бир маромдаги маърузасини тинглай бошлади, Оберуолцер айбноманинг мазмуни ва унингча, мутлақо одил ва холисона ўтказилган суд муҳокамасининг асосий жиҳатларини қисқагина гапириб берди. Шундан кейин у одатдаги саволини ташлади:

– Ҳозир сизга нисбатан эълон қилинаётган ўлим ҳукмининг қонунсизлигини кўрсатувчи бирор-бир асосингиз борми?

Бунга жавобан Клайд қатъий ва кескин овоз билан онаси ҳамда йиғилганларни ҳайратда қолдириб:

– Айбномада тилга олинган жиноятни қилишда мен айбдор эмасман, – деди. – Роберта Оденини ўлдирмаганман ва ўзимни бундай жазога лойик деб ҳисобламайман. – Унинг бу сўзидан фақат

Жефсонгина пинагини бузмади, чунки Клайд аслида шу Жефсоннинг маслаҳати ва йўл-йўриғига биноан шундай деган эди.

Сўнгра у бўшлиққа бепарво тикилганча, фақат ўзидан кўз узмайтган онасининг нигоҳидаги ҳайрат ва меҳр туйғусинигина сезиб турар эди, холос. Ана, ўғли ўзи учун машъум ҳисобланган шу дақиқада ҳам бутун одамлар олдида аниқ фикрини айтиб ўтди. Миссис Грифитс турмада ҳарна хаёлга борган бўлса бораверсину, аммо ҳозир айтилган сўзлар чин ҳақиқат бўлмай иложи йўқ. Демак – у айбдор эмас. Айбдор эмас. Энди илоҳим ўзи раҳм этсин! Миссис Грифитс худди шу нарсани ўз мақоласида (майли, ҳамма газеталар шундай деб ёзсин) ва маърузасида ҳам алоҳида таъкидлаб ўтмоқчи бўлди.

Бу орада Оберуолцер на ажабланмай ёки на шошилмай, ўз сўзини давом эттириди:

– Бошқа яна бирор-бир гапингиз борми?  
– Йўқ, – деб жавоб берди Клайд хиёл иккиланиб тургандан сўнг. Шунда Оберуолцер:

– Клайд Грифитс! – дея хulosасини чиқарди тантанавор бир тарзда. – Суд, сиз, яъни Клайд Грифитсни Роберта Одден исмли ожизани қасдан ўлдирганликда айбдор деб топади ва шу қарори билан сизни ўлим жазосига ҳукм қилади; суд яна шуни белгилайдики, ушбу суд мажлисидан кейин орадан ўн кун ўтгач, Катараки округининг шерифи сизни тегишли қоида асосида тасдиқланган суд қарори нусхаси билан биргаликда Нью-Йорк штатининг Оберн турмаси нозири ва маҳсус вакилига топширади, ўша турмада сиз 19... йилнинг 28 январи, ҳафтанинг душанба кунигача якка қамоқда сақласиз, шундан сўнг шу ҳафта ичидаги кунларнинг бирида Нью-Йорк штатининг Оберн турмаси нозири ва маҳсус вакили сиз, Клайд Грифитсни Нью-йорк

штатида амалда қўлланувчи қонун ва амри фармонларга асосланган ҳолда қатл этади.

Хукм ўқиб эшилтирилиши билан миссис Грифитс Клайдга қараб жилмайди, Клайд ҳам унга жавобан кулимсираб қўйди. Чунки Клайд шу ерда – ҳаммага эшилтириб туриб, мен айбдор эмасман, деганида миссис Грифитс ҳукмни ҳам писанд қилмай, рухи кўтарилиб кетди. У чиндан ҳам айбдор эмас – модомики, у ҳозир шундай дедими, демак, бошқача бўлиши мумкин эмас. Клайд эса онасининг жилмайганини кўриб: ҳа, у менга ишонади, деб қўйди ўзича. Жиноий далилларнинг шу даражада қалашиб ётганига ҳам қарамай, унинг ишончи сира сусаймади. Бу ишонч, гарчи хатолик орқасида келиб чиққан бўлса-да, аммо Клайдни тетиклантирап, у шу ишончга жуда зор эди. Энди эса ўзи айтган гаплари назарида ўзига чин ҳақиқатга ўхшаб кўрина бошлиди. Ахир, у Робертани урмаган-ку. Аслида ҳам шундай бўлган эди. Демак, у гуноҳкор эмас. Лекин Краут билан Слэк уни яна турмага қайтариб олиб кетишади.

Бу орада миссис Грифитс матбуот вакиллари учун ажратилган столга бориб ўтирди-да, атрофида уймалашган мухбирларга гуноҳкорона бир тарзда тушунтира кетди:

– Сиз, мистер журналистлар, мени койиманглар. Бу ишга аслида унчалик ақдим етмайди. Лекин шу ерга келиб, болагинамнинг олдида туришнинг бошқача йўли йўқ эди.

Шу пайт дароз бир мухбир орадан суқилиб ўтиб, унга яқинроқ келди-да:

– Ҳечқиси йўқ, ҳечқиси йўқ, аяжон! – деди. – Ё у-бу нарсада ёрдамлашиб юборайликми? Агар истасангиз, ҳозир ёзмоқчи бўлаётган нарсангизни кўриб берайми? Жоним билан кўриб бераман.

У миссис Грифитснинг ёнига ўтириб, таассу-ротларини қоғозга туширишида унга күмаклаша бошлади. У Денвер газетасига шу ҳам бўлаверади, деган фикрда ўзи маъқуллаган услубда ёздира бошлади. Қолган мухбирлар ҳам бири олиб-бири қўйиб холис хизмат таклиф этишар, ҳаммалари ҳаяжондан безовта эдилар.

Орадан икки кун ўтгач, бутун зарур қоғозлар таҳт бўлди – бу ҳақда миссис Грифитсни ҳам огоҳлантиришди-ю, аммо ўғлини кузатиб боришга рухсат беришмади. Клайдни эса Обернга, Нью-Йорк штатининг фарбий турмасига ўтқазиши; энди у шу ердаги «Ажал уйи» ёки «Қотиллар зин-дони»да ўтириб – йигирма икки камерадан иборат икки қаватли бу бинонинг номи шундай деб аталар эди – қийноғу азобига одам боласи чидолмайдиган туюловучи мана шундай мудҳиш дўзахда ё ишнинг қайта кўрилишини ёки ўлимини кутиб ётиши керак.

Клайдни Брижбургдан Обернга келтирган поезд ҳар бекатда эрмак ишқибозлари тўпига дуч келар эди; кексалар ҳам, ёшлар ҳам, эркаклару аёллар ҳам, болалар ҳам – барча йифилганлар шу фаройиб қотил йигитчани бир кўриб қолиш иштиёқида эдилар. Баъзан шундай ҳам бўлар эдики, ўзи Клайдга ачингандай кўринса ҳам, аслида мана шу бахтсиз, аммо довюрак хаёлпараст қаҳрамон билан бир дақиқагина дон олишиб қолишни орзу қилган аёллар ёки қизлар ҳам учраб турар эди, улар Клайдга гул ташлаб, узоқлашиб бораётган поезд орқасидан овозлари борича шўхлик қилиб: «Хэлло, Клайд! Биз ҳали кўришамиз», «Кўзингизни очинг, у ерда кўп ўтириб қолманг!», «Норозилик билдиринг, сизни сўзсиз оқлашади. Биз шундан умидвормиз», деб қичқиришар эди.

Клайд ҳам Брижбургдаги халойиқ кайфиятидан кейин кутилмаганда ёқимли туюлган бу жонсарак-безовта, аслида уятли хоҳишдан хийлагина ажабланиб, ҳатто қувониб, уларга таъзим қилар, кулиб қарап, баъзан эса қўл силкиб ҳам қўяр эди, Лекин шунга қарамай, бари бир: «Мен Ажал уйига томон кетяпману, улар бўлса мени қадр-донларча қутлаб қолишяпти. Улар бунга қандай журъат этишаётганикин-а?» деган фикр хаёлини сира тарк этмас эди. Краут билан Сиссел ва унинг соқчилари эса фурурдан димоғлари нақ осмонда эди, чунки бунақанги катта жиноятчини қўлга тушириш ҳамда уни қўриқлаб бориш шарафига айни ўшалар мушарраф бўлган эдилар, шунинг учун ҳам улар йўловчилар ва бекат перронларида йигилган одамларнинг бошқача қизиқиш билан қараётгандаридан мамнун эдилар.

Бироқ қамоққа олинган кунидан кейин босидан кечирган бу дастлабки қисқагина, тотли дақиқалари – беҳад кенгликлар, гавжум вокзаллар, қиши ќуёшида ярқираб турган дала ва қор тепалари ёнидан ўтиши Клайдга Ликургни, Сондруни, Робертани ва бир йил ичида юз берган қанчадан-қанча воқеалар тўфонини эсига солиб юборди, мана энди шуларнинг бари фожиали тугади, қархисида Оберн турмасининг одам яқинлашишга чўчийдиган кулранг деворлари турибди, у ердаги бадқовоқ котиб Клайднинг исми ва жиноят даражасини дафтарига ёзib олгач, уни икки назоратчига топширди, чўмилиб бўлганидан сўнг эса шу пайтгача унинг ҳуснию савлати ҳисобланиб келган жингалак соchlари ҳам сартарош қайчиси остида фарч-фарч кесиб ташланди; сўнгра унга йўл-йўл турма энгил-боши ва шу йўл-йўл матодан тикилган ифлос бир шапка, турма ички кийимию кулранг намат-

дан бичилган қалин бошмоқ келтириб беришди, бошмоқлари кигиздан бўлгани учун ҳам маҳбусларнинг гоҳи-гоҳида ўз камераларида жонсарак югуришлари сира эшитилмас эди – бир кун бориб Клайд ҳам худди шундай жонсарак бўлиб юргургилайди. Унга 77221 рақамини беришди.

Уни шу тарзда ясан-тусан қилиб, ўша заҳотиёқ нақ Ажал уйига олиб киришди-ю, пастки қаватдаги камералардан бирига қамаб қўйишиди, камера деярли тўртбурчак эди, эни саккиз, узунаси ўн фут, ёп-ёруғ, озода хона эди, халажойдан ташқари яна темир каравот, стол, стул ва кичкинагина китоб жавони ҳам бор эди. Клайд ўзининг ўнг ва чап томонида, узун йўлакнинг икки тарафида тағин шунга ўхшаш қатор камералар чўзилиб кетганини хиёл анлагандай бўлди-ю, аввалига қимир этмай туриб қолди, кейин стулга ўтириди-да, бу ерга нисбатан хийла гавжум, одамнинг кўнглига анча-мунча илиқ туюловчи Брижбург турмасида ўтказган кунлари худди йўл-йўлакай дуч келган гаройиб, шовқин-суронли учрашувлари каби ортда қолиб кетганини ўйлади.

Бу дақиқаларнинг жон зирқиратувчи, оғир ситамини айтинг! Ўлим ҳукми, йўл сафари ва бекатларда шовқин-сурон кўтарган анави оломон, пастдаги сартарошхона ва маҳбус сартарошнинг унинг сочини олиб ташлаши; унга кийгазиб қўйишиган ва энди ҳар куни эгнидан ечмайдиган ички ва сиртқи энгил-бош. Камерада ҳам, йўлакда ҳам қўзгу йўқ эди, аммо у ўз аҳволини шундоқ ҳам сезиб турар эди. Манави қопга ўхшаган камзул билан иштонга, манави ола-була қалпоқقا қаранглар-а. У жазаваси тутиб уни бoshидан юлиб олди-да, полга отиб ташлади. Ахир, бундан атиги бир соатгина олдин устида туппа-тузук костюми, кўйлак, галстуғи, ботинкаси

бор эди. Брижбургдан чиқаётганида бинойидек, ҳатто хушрўйгина кўринишга эга эди, ҳарқалай, ўзига шундай туюлган эди. Бироқ ҳозир-чи, кимга ўхшаб қолди энди у! Ахир эртага онаси, кейин эҳтимол Жефсон билан Белнеп ҳам келиши мумкин. Оҳ, парвардигор!

Лекин бу ҳали ҳолва эди. У рўпарасидаги камерада озиб тўзиб, тинкаси қуриган, Клайдга ўхшаш йўл-йўл кийим кийган, қўрқинчли бир хитой маҳбусга кўзи тушди, у панжарага шундай яқин келди-ю, ғилай кўзларини қадаб унга ғалатироқ тикилиб қолди ва ўша заҳоти юзини буриб, жон-жаҳди билан қичина кетди. «Балки, битдир?» деб ўйлади Клайд даҳшатга тушиб. Брижбургда, ахир, кана бор эди-ку.

Хитой йигит – қотил экан. Ахир, бу Ажал уйи-ку. Бу ерда уларнинг бир-бирларидан ортиқ-кам жойлари ҳам йўқ. Ҳатто кийимларигача бир хил. Худога шукурки, одам кам келар экан бу ерга. Онаси, маҳбусларга деярли ҳеч кимни қўйишимайди, ҳафтада бир марта фақат унинг ўзини, Белнеп ва Жефсонни, тағин Клайд хоҳиш билдирган попнигина киритишлари мумкин, деб айтган эди. Мана бу оқ бўёққа бўялган асабга тегувчи деворларни айтинг – кундузи, ҳойнаҳой, улар шиша билан ёпилган бино томидан тушаётган қуёш нурларидан қаттиқ ёришиб, тунда эса мана ҳозиргига ўхшаш, йўлакдаги электр чироқларидан чарақлаб кетса керак – Брижбургда эса мутлақо бошқача эди ҳаммаси: бу ерда нур ҳам, унинг ёруғлик кучи ҳам, азоби ҳам анча кўп экан. У ердаги турма эски, кулранг қорамтирик деворлари у қадар тоза ҳам эмас, камералари кенг, анча-мунча тузукроқ жиҳозланган эди, аҳён-аҳёнда дастурхон ёзилиб қолар, китоб-дафтар, шашка ва шахматлар ҳам бўлар эди, бу ерда

эса... бу ерда ҳеч нарса йўқ эди: фақат тор, со-  
вук деворлару зил-замбил, заранг шифтгача етиб  
борган темир панжаралар, худди Брижбургдаги  
каби овқат узатишга мўлжалланган жимитгина  
туйнукли оғир-баҳайбат пўлат эшикларгагина кўз  
тушар эди, холос.

Шу пайт қаердандир:

– Ҳой, йигитлар, бизга янги одам келибди! – де-  
ган овоз эшитилди. – Пастки қават, кунчиқар қа-  
тордаги иккинчи камерада.

– Худо урсин дегин-чи? Афти-ангори нимага ўх-  
шайди ўзи?

Ўша заҳоти яна бошқа овоз эшитилди:

– Ҳой, меҳмон, исминг нима? Кўрқма, биз ҳам-  
мамиз бир-бири миздан қолишимаймиз.

Бояги биринчи овоз иккинчисига жавоб қай-  
тарди:

– Ҳа, қанақадир найнов, эти суюгига ёпишиб  
ётибди. Афтидан, онасининг эркатойига ўхшай-  
ди, умуман ёмон эмас. Ҳей, сен, – эшитяпсанми!  
Исминг нима?

Клайд аввалига боши қотиб, эсанкираганидан  
индамай турди. Бунақанги ошналарга қандай  
муомала қилиши керак у? Нима деб жавоб бер-  
сину ўзини қандай тутсин? Шулар билан пачаки-  
лашиб ўтиришининг ўзи умуман тўғри бўларми-  
кин? Аммо қонига сингиб кетган хушмуомалиги  
Клайдни шу ерда ҳам тарқ этмади-да, шоша-пиша  
майингина жавоб бериб қўя қолди:

– Клайд Грифитс.

Савол бераётганларнинг бири дарров гапни  
илиб кетди:

– Ие, Грифитсми? Эшитганмиз, эшитганмиз.  
Хуш келибсиз, Грифитс! Биз ҳам, бир хиллар ўй-  
лагандек, у қадар қўрқинчли эмасмиз. Сенинг

Брижбургдаги ишларингни ўқиган эдик. Ўзимиз ҳам, ҳадемай учрашиб қолармиз, деб ўйловдик.

Яна бошқа овоз эшитилди:

– Бурнингни осаверма, оғайни! Бу ерда ҳам унчалик ёмон эмас. Танинг соғ бўлса, кунинг ўтиб тураверади.

Қаердандир кулги овози келди.

Аммо Клайднинг кўнглига ҳозир гап сифмас эди; юраги сиқилиб, ваҳимага тушганча деворларга, эшикка, кейин эса хитой маҳбусга қаради, у ҳам ўз эшигига ёпишиб олган кўйи яна индамай Клайдга тикилиб туарар эди. Даҳшат! Даҳшат! Маҳбуслар ўзаро бир-бирлари билан шу тариқа гаплашишар, янги келган ҳар бир одамни эса бетакаллуф қарши олишар эди. Унинг баҳтсизлиги-ю, янги, оғир шароит қаршисида меровсираб қолгани-ю, изтиробли афсус-надоматлари-ю – буларга улар заррача ҳам эътибор бермас эдилар. Дарвоҷе, қотил одамни ким ҳам баҳтсиз ва меров деб ҳисоблаши мумкин, ахир! Энг даҳшатлиси шу эдики, улар мана шу йигит қачон орамизга келиб қўшиларкин, деб аввалдан ўзларича унинг жигига тегишлари, жонидан тўйдириб юборишлари ҳам мумкиндир. Агар Сондрами ёки аввалги таниш-билишларидан биронтасими, Клайдни шу аҳволда кўргандами, ақалли мана шу воқеаларнинг барини тасаввур қила олгандами... Оҳ, парвардигор! Эртага эса шу ерга онаизори келади-я!

Орадан бир соат ўтиб, бутунлай қоронғи тушиб қолган пайтда маҳбусларникига қараганда бир оз кўзга тузукроқ кўринадиган энгил-бош кийиб олган новча, мурдага ўхшаш рангпар бир турма хизматчиси келди-ю, темир патнисга солинган

емишины эшик туйнугига қўйиб кетди. Бу кечки овқат эди! Буни у Клайдга олиб келган эди. Рўпарадаги арвоҳга ўхшаш анави хитой маҳбус эса аллақачоноқ таомини олиб, тушириб ётибди. У кимни ўлдирганикин-а? Қандай қилиб ўлдирганикин? Бир маҳал ҳар томондан темир патнисларнинг қитир-қитири эшитила бошлади! Гўё одамларни эмас, йиртқич ҳайвонларни овқатлантиришаётгандек туюлар эди. Аллақаёқдан ҳатто чап-чап овоз ва қошиқ-пошиқларнинг тақир-туқури орасида баъзи бир ўзаро гаплар ҳам эшитилиб қолар эди. Клайднинг кўнгли беҳузур бўла бошлади.

– Уҳ, шайтон! Совуқ ловия, қовурилган картошка ва кофедан бўлак ҳеч вақони билишмайди-я, ошхонадагиларнинг қўли синганми ўзи?

– Э, кофеларда маза-матра қолдими энди! Буффалодаги турмада ўтирган вақтимда, эҳ-ҳе...

– Бўлди, бўлди, оғзингни юм! – қичқиришди нариги бурчакдан туриб. – Буффалодаги турмангни ҳам, ўша ердаги ширин-шакар томоқларингни ҳам эшитавериб, жонимиз ҳалқумимизга келиб кетган обдан. Ҳарқалай, иштаҳангга қараганда бу жойдаги овқатлар ҳам тешиб чиқмаётганга ўхшайди.

– Йўқ, очигини айтсам, – деб давом этди ўша биринчи овоз, – ҳатто эслаш ҳам ширин кайфият беради. Ҳарқалай, ҳозир менга шундай туюляпти-да.

– Эҳ, Раферти, бўлди-да энди, – салмоқланиб гапирди бирор.

Раферти эса сира тийилмасди:

– Мана энди овқатдан кейин бир оз дам оламан-да, сўнгра ҳайдовчидан машинани олиб келишини сўрайман, айланиб келмасам бўлмайди. Бугун оқшом ёқимли.

Яна бир хириллаган овоз эшитилди:

– Э, сен бу валдирашларинг билан онангникига бор! Мана, масалан, биттагина чекиш учун жо-

нимни берардим. Ана ундан кейин қартабозлик қылсанг.

«Наҳотки, шу ерда ҳам қарта ўйнашса?» – деб ўйлади Клайд.

– Розенштейн ютқаза-ютқаза адо бўлди, ҳарқалай энди ўйнамаса керак.

– Шу гапингга ўзинг ишонасанми? – Бу, ҳойнаҳой, Розенштейннинг жавоби эди.

Клайднинг чап томонидаги камерадан кимдир секингина, аммо аниқ қилиб ўтиб кетаётган турма назоратчисидан сўради:

– Ҳой! Олбэнидан ҳалиям ҳеч гап йўқми?

– Ҳеч гап йўқ, Герман.

– Хат ҳам йўқми?

– Хат ҳам йўқ.

Бу саволлардан хавотир, асабий ожизлик ва соғинч оҳанглари сезилар эди. Кейин ҳаммаси тинчиди.

Бир неча дақиқадан, сўнг олис бурчакдан, худди дўзахнинг гирт ўзидан келаётгандек, тасвир этиб бўлмас даражада фоят тушкун бир овоз эшитилди:

– Э, худойим! Э, худойим!

Юқори қаватдаги бошқа бир маҳбус унга жавоб қилди:

– Оббо иблис-эй! Яна бошлади-ю анави фермер! Мен чидолмайман. Ҳой, назоратчи! Худо ҳақи, анавинга бирор-бир нарса ичиринглар.

Бурчакдаги овоз яна такрорланди:

– Э, худойим! Э, худойим!

Клайд қалтираганча бармоқларини фижимлаб сакраб турди. Асаблари худди салга узиладиган тордек таранглашиб кетган эди. Қотил! Энди ўзи ҳам ажалини кутаётган бўлиши керак. Худди Клайдники сингари аламли тақдирига ўзи мотам тутаётгандир. Инграяпти – Брижбургда Клайд ҳам

инграган эди, аммо у овозини чиқармай, ичида инграган эди. Йифлаяпти! Э, парвардигор! Балки бу ерда фақат унинг бир ўзи эмасдир бунақа одам, ахир!

Мана, энди туну кун унинг аҳволи ҳам шунақа бўлади... то иши қайта кўрилиб... балки ким билади... мабодо фақат анави...

Э, йўқ, йўқ! Клайд ундан бўлмайди... йўқ, уни қатл этишмайди. Йўқ, йўқ! Кам деганда орадан бир йил ўтиши керак, Жефсон шундай деган. Эҳтимол, икки йил ўтиб кетар. Лекин, шунда ҳам... икки йилдан сўнг!!! Икки йил, атиги икки йилдан кейин-а, деган фикрдан унинг аъзойи бадани титраб-қақшаб кетди...

Анави ҳужра! У ҳам қаердадир шу яқин орада. Унга мана шу бинодан тўппа-тўғри олиб чиқиб кетаверишади. Клайд буни билади, унга гапириб беришган. Ўша ерда эшик бор. Очасану қарасанг – курси. Анави курси.

Яна бояги:

– Э, худойим! Э, худойим! – деган овоз такрорланди.

Клайд ўзини ўринга ташлади-ю, қўллари билан қулоқларини беркитиб олди.

## XXIX БОБ

Оберн турмасидаги Ажал уйи инсоний тошибагирлик ва телбаликнинг даҳшатли тимсолларидан бири эди, бунақанги нарсаларнинг ҳақиқий айборларини топиш эса одатда жуда мушкул ишдир. Бу уйнинг тузилиши ва ундаги тартиб-қоидалар бир қатор маҳсус ҳукумат топшириқларининг натижаси бўлиб, кейинчалик эса уларга турили нозирларнинг фармойиши ва қарорлари ҳам бирин-сирин қўшилиб бораверган, бу фармойиш

ва қарорлар, маълумки, ўша нозирларнинг мижоз ва инжиқликларидан келиб чиқсан, албатта, аммо уларнинг биронтаси ҳам ўзларининг нима иш қилаётганлари ҳақида мундай бир жиддийроқ бош қотириб кўрмаганлар: охири бориб-бориб бу ерда шунағанги ақлга сифмайдиган кўпдан-кўп ортиқча, аслида эса қонунсиз бераҳмлик, бемаъни, чида бўлмас даражадаги қийноқлар ўйлаб топилганки, мана энди уларни амалда қўллаб келишяпти. Шуларнинг бари ўлимга маҳкум қилинган одам, суд ҳукми оддиндан белгилаган ўлими кунигача минг бора ўлим азобини бошидан кечирсин учун мўлжалланган эди. Чунки Ажал уйининг тузилиши, шунингдек, у ерда яшовчилар бўйсунадиган тартиб-қоидаларнинг ўзиёқ одамни беихтиёр равишда шунга олиб келар эди.

Бу тош, бетон ва пўлатдан қурилган иморат бўлиб, узунаси қирқ, эни эса ўттиз фут, шиша томининг баландлиги ҳам ўттиз фут келар эди. Уни ёнида турган эски, кўримсиз Ажал уйи билан солиштирганда, лойиҳаси бирмунча такомиллаштирилганроқ эди: узунасига кенг йўлак ўтган, йўлак четларида эса ҳар бири саккизу ўн футлик камералар ўрнашган эди; биринчи қаватда ўн иккита камера бўлиб: олтитаси ўнгда, олтитаси чапда, ҳаммаси бир-бирига қарама-қарши эди. Тепадан иккинчи қатор камералар чўзилиб борар, улар ҳам худди пастдагиларга ўхшаб жойлашгану, аммо бу ерда икки томонда бештадан камера бор эди.

Асосий йўлак ўртага борганда пастдаги камералар қаторини бўлиб турувчи бошқа торроқ йўлакча билан кесишиб ўтар эди; унинг бир томони эски Ажал уйига бориб тақалса (у бинони шундай деб аташар, у ерда энди фақат ўлимга маҳкум этилганларни қабул қилиб олишар эди), бир томонида эса электр курси жойлашган қатл бўлмаси бор эди.

Рўпарадаги иккитасидан эса тор йўлакнинг нариги боши ва эски Ажал уйига олиб кирадиган эшик кўриниб туарди, агар таъбир жоиз бўлса, уни жиноятчилар қабулхонаси, деб ҳам аташ мумкин эди, чунки у ерда маҳбуслар ҳафтасига икки марта энг яқин қариндош-урувлари ва адвокатлари билан учраша олар эдилар. Ўлимга маҳкум этилганлар қошига бошқа ҳеч ким қўйилмас эди.

Эски Ажал уйининг камералари (улар аввал қандай бўлса, худди ўшандай сақланиб қолган ва энди улардан ёрдамчи қабулхона сифатида фойдаланилади) бир қаторда йўлакнинг фақат бир томонидагина жойлашган; шу боисдан маҳбуслар бир-бирларини кўролмас эдилар; бундан ташқари, ҳар камеранинг олдини беркитиб қўйиш учун алоҳида яшил пардалар ҳам бўлар эди. Авваллари, маҳбусни олиб келиш, ё олиб кетишда ёки у ҳар куни айлангани чиққанда, ё ҳаммомга борганида, ёки уни кунботар томоннинг бир чеккасидаги ўша пайтда қатл бўлмаси жойлашган кичкинагина темир эшикка олиб боришганда, ҳамма пардалар ёпиб қўйилар эди. Бошқа маҳбуслар буни кўрмасликлари керак эди. Бироқ кейинчалик эса бу қадар эҳтиёткорлик оқибатида маҳбуслар жуда ҳам яккамохов бўлиб кетишиди-ю, натижада эски Ажал уйи файриинсоний муассасага айланиб қолди деган қарорга келинди, шундан сўнг мана шу янги уйни лойиҳалаштириб, қуриб битказиши, ғамхўр ва раҳмдил маъмурларнинг фикрича, бу энди анча мукаммаллаштирилган Ажал уйи эди.

Тўғри, бу ердаги камералар эски Уйдаги пастак-пастак, исқирт бўлмаларга ўхшаб тор ва совуқ ҳам эмас эди; бу уйининг шифтлари баланд, камера ва йўлаклари ёп-ёруғ, камералар

ҳам кенг-кенг эди. Лекин бу бинонинг эски Уйга қараганда катта бир нуқсони бор эдики, бу ерда маҳбуснинг бутун ҳаёти бошқаларнинг кўз ўнгиндан ўтар эди.

Бундан ташқари, икки қаватли биттагина йўлак атрофида камераларнинг бу қадар кўп жойлашганлиги натижасида ҳар бир маҳбус, истаса-истамаса, ўзгалар кайфиятига – ўзгалар ғазаби-ю жазаваси, умидсизлиги-ю қайфу-ҳасратига гувоҳ бўлиб, у ҳам азоб чекиши керак эди. Танҳо қолишнинг бу ерда сира иложи йўқ эди. Кундузи, шиша томдан тўппа-тўғри тушиб кўзни қамаштирувчи нур оқими одамни эзар эди. Тунда эса, қувватли, ёргу чироқлар камеранинг ҳар бир бурчаги, ҳар бир тешигигача чарақлатиб юборарди. Қарта ва шашкадан бошқа на бир тинчлик, на бир тузукроқ ўйин-кулги ҳам йўқ эди; маҳбуслар ўз камераларидан чиқмай туриб, фақат шу икки хил ўйиннингина ўйнашлари мумкин эди. Тўғри, китоб ўқий оладиган ва шунақсанги шароитда ҳам ўқишидан роҳат топа оладиганлар учун китоб ва газеталар ҳам бор эди, албатта. Яна диний аҳбоблар зиёратига кириш ҳам мумкин эди: чунки эрталаб ва кечқурун католик попи келар эди; яхудий ва протестант руҳонийлари эса, гарчи, доимий бўлмаса-да, ҳар ҳолда хоҳиш билдириган маҳбуслар ҳақига дуо ўқиш ва уларга тасалли бериш учун ора-сира келиб туришар эди.

Ажал уйини мукаммаллаштирмоқчи бўлганларнинг савобли ниятларига қарама-қарши ўлароқ, одамларнинг бу хилда доимий ва мажбурий ўзаро алоқа қилишлари бу жойни чинакам қарғиши теккан ерга айлантириб юборган эди, чунки маҳбусларнинг фикру хаёли бостириб келаётган ажал ваҳимасидан хирадашган ва айниброқ қолган эди, бу ажал уларнинг кўпларига чиндан ҳам ҳа-

демай етиб келар, улар ҳозирданоқ ўз елкаларида ўлимнинг совуқ панжаларини сезишар эди. Ҳар қанча маҳкам турган одам ҳам бу азоб-уқубатлар исканжасига тушгач, ўзини шахс сифатида у ёки бу даражада юз тубан кетишдан сира асраб қололмас эди. Тушкунлик, чорасизлик, юракни ёргудек қўрқув ва саросималар бутун Уй бўйлаб изгириндек кезиб юрар, ҳаммани ваҳима ва умидсизлик билан бирма-бир заҳарлаб чиқар эди. Шуларнинг бари мутлақо кутилмаган пайтларда сўкиниш, оҳ-воҳ чекиши, ҳатто кўз ёшларига айланган ҳолда барчага ошкора бўлар, қаёқдантир бехосдан дилни тирмалайдиган нола-фигонлар эшитилиб қолар – худо ҳақи, у-бу нарсани хиргойи қилишса ҳам гўрга эди! – ёки ўкириб йиғлаган ва инграган товушлар қулоқни қоматга келтирас эди.

Лекин энг чидаб бўлмас ташвишу азоблар, ҳарқалай, эски Ажал уйидан қатл бўлмасига бориб тақалувчи кўндаланг йўлак билан боғланган эди. Чунки бу йўлак (афсуски, ҳамма вақт!) шу бино ичида доимо юз бериб турадиган фожиаларнинг бири – ўлим фожиасига бамисоли саҳнадек хизмат қилиб борар эди.

Қатл арафасида маҳбусни янги бинонинг у бир ёки икки йил давомида димиқиб ётган саранжом камерасидан эски Ажал уйининг биронта бўлмасига олиб ўтишар, бу ерда у ўзининг ўлимолди дақиқаларини осойишта ва танҳоликда ўtkазиши мумкин эди; аммо охирги дақиқада у ҳамманинг кўзи ўнгида шу тор йўлак бўйлаб нариги томонда жойлашган қатл бўлмасига қайта юриб ўтиши керак эди.

Адвокат ёки қариндошлардан бирортаси билан учрашганда ҳам аввалига катта йўлакдан ўтиш, кейин эса кўндаланг тор йўлакдан юриб, эски Ажал уйининг эшигигача бориш зарур эди.

Үерда маҳбусни камерага олиб киришар, сўнгра у ўзини кўришга келган одами (хотини, онаси, қизи, ака-укаси, ҳимоячиси) билан ҳузур қилиб гаплашавериши мумкин эди, лекин суҳбат пайтидаги ҳар бир сўздан назоратчи хабардор бўлиши керак эди, чунки у камера панжараси билан ундан икки футча берига ўрнатилган сим тўсиқ орасида ўтирар эди. На қўл олиб кўришишлар, на ўпишишлар, суюб эркалашлар, на дилдаги сирларни айтишлар бу қўриқчиларнинг назаридан четда қололмас эди. Маҳбус пешонасидағи машъум соат етиб келган пайтда, бошقا ҳаммалари – бадқовоқларию хушчакчақлари ҳам, таъсирчанларию териси қаттиқлари ҳам, ҳатто ўзлари хоҳламасалар-да, шу ердаги шароитга бўйсуниб, охирги тайёргарликларнинг барини – маҳбуснинг эски Ажал уйи камераларидан бирига ўтказилишию, онаси, ўғли, қизи, отаси билан сўнгги бор видолашувигача бошдан-охир кузатиб ўтиришлари лозим эди.

Шу бинони лойиҳалаштириш ҳамда бу ердаги тартиб-қоидалар билан шуғулланган одамларнинг биронтаси ҳам олий суднинг қайта қарорини кутавериб, неча-неча ойларни шу ерда ўтказишга маҳкум бўлганларни қанчалар ортиқча, беҳуда азобларга солиб қўйишлари ҳақида ўйлашмаган эди.

Дастлабки дақиқаларда, шубҳасиз, буларни Клайд унчалик тушуниб етмади. Турмадаги биринчи кунида у чексиз азоб-уқубатлар косасидан бир қултумгина тотиб кўрди, холос. Эртаси куни эса унинг кулфатларини енгиллатишгами ёки оғирлатишгами, ишқилиб, онаси келди. Ўғлини кузатиб боришга рухсат ололмагандан сўнг, у Белнеп ва Жефсонга яна бир бор учрашиб, Клайднинг жўнаб кетиши билан боғлиқ шахсий таассуротларини тўлароқ ёзиб юбориши учун

бир оз ушланиб қолди. (Таассуротлари эса жонни зирқиратар даражада дарду ҳасратта түла эди!) Гарчи уни турмага яқынроқ жойдан бирорта кулба топиш масаласи анча-мунча ташвишга солса ҳам, ҳарқалай, шу ерга келиши биланоқ турма идорасига шошилди ва Клайд билан учрашишига рухсат берип түгрисидаги судья Оберуолцернинг фармойиши, шунингдек, Белнеп ва Жеффсоннинг илтимосномасини кўрсатди-да, ўғлини кўришга розилик олди, бунинг устига эски Ажал уйида эмас, бутунлай бошқа бинода учрашадиган бўлди. Гап шунда эдик, миссис Грифитснинг Клайдни ҳимоя қилиб, ўзини ўтга-чўққа уриб юрганини турма нозири ўқиган эди, шунинг учун ҳам у миссис Грифитсни ва Клайдни ўз кўзи билан кўришга қизиқиб қолган эди.

Бироқ Клайднинг ташқи кўринишидаги бу фавқулодда, ақлга сифмас даражадаги ўзгариш миссис Грифитсни шу қадар довдиратиб қўйдики, ўғлининг рангпар, бир ҳолатда бўлиб қолган юзлари, жонсарак аланталанаётган ўрадек кўзларини кўрганда бир нима дейишга ҳам ҳадеганда тили айланавермади. Тап-тақир бошини қаранглар-а! Анави ола-була камзули-чи! Темир дарвозали, оғир-баҳайбат қулфли манави кўрқинчли Уйни қаранглар, ҳар бурчагида турмача кийиниб олган соқчилар туришибди...

Миссис Грифитс Канзас-Сити, Чикаго, Денвердаги катта-кичик турмаларда бир неча мартараб бўлганига ҳам қарамай, билинар-билинмас сесканниб, гандираклаб кетди ва сал бўлмаса ҳушидан айрилаёзди; у ўша турмаларга худони ёд этиш ва гумроҳларни тавба қилдириш, хоҳиш билдирганлардан эса ўз хизматини аямаслик учун борар эди. Аммо бу ерда-чи... бу ерда! Оҳ, ўғилгинаси-я, жигарбанди! Миссис Грифитснинг бақувват, кенг

кўкраги кўтарилиб туша бошлади. У яна ўғлига қаради-ю, бир дақиқага юзини яшириш учун ўгирилиб олди. Лаблари ва ияги қалтирап эди. Дастрў-молини излаб, сумкачасини титкилай бошлади, шу орада эштилар-эштилмас овоз билан:

– Э, худо, не гуноҳим бор эдики, мендан юз ўгирдинг? – деб такрорлар эди.

Лекин ўша аснодаёқ бир фикр миясидан йилт этиб ўтди: йўқ, йўқ, ўғли уни бу аҳволда кўрмаслиги керак. Бундай қилиш ярамайди, ҳеч кимга бир чақалик ҳам нафи йўқ, унинг кўз ёшлари Клайд-нинг баттар кўнглини бузади фақат. Бироқ бирдан ўзини қўлга олишга унинг ҳатто кучли иродаси ҳам ожизлик қилди ва у унсизгина йиглашда давом этаверди.

Клайд буни кўриб, ўзини маҳкам тутмоқчи ва онасини юпатиш учун у-бу тасалли ва далда гап айтмоқчилигини ҳам унутиб, маъносиз бир тарзда фурданиб қўйди:

– Ие, ие, ойи, қўйинг йифламанг. Сизга қийинлигини биламан. Лекин ҳаммаси жойига тушиб кетади ҳали. Эҳтимол, тушиб кетар. Бу ер мен ўйлаганчалик у қадар ёмон ҳам эмас экан.

Ичиди эса: «Э, худо, бунчалик даҳшатли жой бормикин ўзи!» дея хитоб қилди.

Миссис Грифитс ҳам ўша заҳоти жавоб қайтара қолди:

– Бечора болам! Жондан азиз ўғлим! Майли, биз ноумид бўлмаслигимиз керак. Йўқ, йўқ. «Мен сени ёмонлик тўридан халос қилгайман». Тангри шу вақтгача биздан ҳали юз ўгирмади. Мен аниқ биламанки, бундан буён ҳам у марҳаматини аямайди. «У мени осуда сувларга етаклаб борғусидир». «У менинг руҳимни тоблағусидир». Бутун умидимиз яратган эгамдан. Сўнгра, – дея қўшиб қўйди у тез ва ишбилармонлик билан, фақат Клайдга-

гина эмас, бирийүла ўзига ҳам далда бериш мақсадида, – мен норозилик билдириш учун ҳамма нарсаларни тайёрлаб қўйдим, ахир. Норозиликни шу ҳафта ичида берамиз. Бу эса, сенинг ишининг камида бир йилдан кейингина кўрилади, деган сўз бўлади. Мен сени шунчаки мана шу аҳволда кўрарман, деб ўйламаган эдим. Шундан ўзимни йўқотиб қўйдим. – У елкасини тўғрилаб, бошини кўтарди ва ҳатто зўрма-зўраки бўлса ҳам хиёл жилмайди. – Турма нозири тузук одамга ўхшайди, менга жуда яхши муомала қилди, аммо сенга кўзим тушганда...

У фавқулодда ва мудҳиш зарбадан нам бўлган кўзларини артди, ўзи ва Клайднинг диққатини бўлиш учун олдинда турган долзарб ишлари ҳақида гап очди. Мистер Белнеп билан мистер Жефсон охирги учрашган пайтида миссис Грифитснинг кўнглини жуда ҳам кўтариб юборишиди. Миссис Грифитс бу ёқقا келишидан олдин уларнинг идорасига кирган эди, улар сиз ҳам, Клайд ҳам умидсизланмасликларингиз керак, деб айтишибди. Энди бўлса, у вақтни бой бермай, ўз маърузаларини ўқишига киришиши лозим ва бу тез орада унга зарур ўша даромадни бера бошлайди. Ҳамма нарса барбод бўлди, деб Клайд мутлақо ўйламаёқ қўя қолсин. Бемаъни гап бу! Биринчи ҳукмни, ҳойнаҳой, бекор қилишиб, ишни яна қайтадан кўриб чиқишига оширишса керак. Ахир ўша муҳокама бошдан-охир майнабозчилик бўлганини Клайднинг ўзи ҳам билади-ку.

Гап мана шундай, турмага яқинроқ жойдан ўзига бир бошпана топдим дегунча, Оберн руҳонийларининг энг йирик вакиллари ҳузурига бориб, бир эмас, бир неча черковда ўз маърузасини ўқишига улардан рухсат олишга уриниб кўради.

Мистер Жефсон икки-уч кундан сўнг аллақандай бир ҳужжатларни юбориши керак, миссис Грифитс ўшалардан ҳам фойдаланиши мумкин. Кейин у етарли миқдорда пул тўпламагунча Сиракузага, Рочестерга, Скенэктедига ва шарқдаги бошқа шаҳарларга ҳам бориб келади. Аммо у Клайдни ҳам ўз ҳолига ташлаб қўймайди. Камида ҳафтада бир марта келиб, кунора ёки иложини тополса, ҳар куни хат ёзиб туради. У турма нозири билан ҳам гаплашиб қўяди. Шунинг учун Клайд сира умидсизланмаслиги керак. Албатта, миссис Грифитсга анча қийин бўлади, лекин парвардигор барча ишларида уни асло ёлғизлаб қўймайди. Буни у очик-оидин билиб турибди. Шу пайтгача тангри ўзининг буюк, мўъжизакор ҳимоятидан уни доимо баҳраманд этиб келмаяптими, ахир?

Клайд эса онаси учун ҳам, ўзи учун ҳам ибодат қилаверсин. Исо пайғамбарнинг муқаддас китобини ўқисин. 23, 50 ва 91-сураларни ҳар куни канда этмай ёд олсин. Аввакум пайғамбарни ҳам. «Худонинг иродасига ҳам тўсиқ бор эканми?» Хуллас, охири, қайта-қайта кўз ёшлардан, одамни ларзага солувчи, юракни шикаста қилювчи ҳасрат-надоматлардан сўнг у хайрлашиб чиқиб кетди, Клайд эса онасининг бу оғир кулфатидан ўртанган қўйи яна ўз камерасига қайтиб келди. Она. Қариб букчайиб қолган бир пайтида, қашшоқ ҳолича, ёнида бир тийинсиз шаҳарма-шаҳар изғиб юриб, уни қутқариш учун пул йифиши керак. У бўлса гирт номаъқул фарзанд экан, буни энди ўзи ҳам тушуниб ўтирибди.

Клайд каравот четига омонатгина ўтирганча, бошини қўллари устига қўйди, миссис Грифитс эса бу пайтда турма дарвозасидан чиқиб тўхтади – зилдай темир дарвозалар залвор билан ёпилган-

дан сүнг миссис Грифитсни олдинда фақат совуқ ёт бир кулба-ю, ўзи ўйлаб топган сафар мушку-лотларигина кута бошлади... У Клайдни инонтирмоқчи бўлган гапларга аслида ўзи бутунлай ишонмас эди. Аммо, яратган парвардигор уни сира ора йўлда қолдирмаган. Ахир, шу пайтгача уни марҳаматидан дариф тутмай келяпти-ку. Наҳотки, энди ўзи ва ўғлиниңг бошига шунақсанги энг оғир синов дақиқаси тушган бир вақтда уни тарк этса? Наҳотки?

Миссис Грифитс шу яқин орадаги автомобиль бекатига етиб борди-да, тағин тўхтади, чунки у турмага, унинг баланд кулранг деворларига, турмача кийимда қуролланган соқчилар турган қоровул минораларига яна бир бор кўз югуртириб олмоқчи эди. Ажал турмаси бу. Унинг ўғли энди шу ерда – ёруғ дунёдан ажратиб қўйилган, диққинафас Ажал уйининг қоқ юрагида ўтирибди. Уни энди электр курсида қатл этиш кутмоқда. Агар борди-ю... агар борди-ю... Йўқ, йўқ, йўқ, бу мумкин эмас. Худо хоҳласа, ундей бўлмайди. Норозилик билдирилади. Бунга эса анча-мунча пул кепрак. Шунинг учун у умидсизлик ва фам-аламга ботиб ўтирмай, ҳозироқ ишга тушиши зарур. Йўқ, йўқ! «Менинг қалқоним ва менинг суюнган тоғим». «Менинг кўз нурим ва сўнмас мадорим». «Э, парвардигор, сен менинг қувватим ва халоскорим-дурсан. Умидим фақат ўзингдан». У яна кўз ёшлирини артди-ю:

– Имоним сенда, худойим! Имонсиз қолмай мен, мадад бер, – дея шивирлади.

Кейин у худога сифиниб йифлаганча йўлида давом этди.

### XXX БОБ

Клайд учун маҳбуслик кунлари чўзилиб кетди. Унинг ёлғизлиги онаси билан учрашганда ҳафта-да бир мартағина бўлинниб турар, чунки миссис Грифитс муккасидан кетган анави иш бундан ортиқча имкониятга йўл қўймас эди, икки ой ичида у Олбенидан то Буффалогача тиним билмай айланиб чиқди, ҳатто Нью-Йоркка ҳам борди, аммо натижаси эса мутлақо у кутгандай бўлмади. Чунки бирор-бир нарсага эришаман деб уч ҳафта давомида шиддат билан, мутаассибларча ҳаракат қилиши оқибатида ҳолдан тойиб, охири шундай фикрга келдики (буни Клайдга айтиб ўтирмади, ўзича ўйлади), насронийлар унга ҳар ҳолда анча-мунча эътиборсизлик билан қарадилар, насронийлик қилмадилар. Негаки, у мурожаат этган ўз қавмларининг фикру ўйларини баён этишда иложи борича эҳтиёткор ва собит бўлишга ўзларини масъул деб билган бутун маҳаллий диний аҳбоблар Клайд ишини фақат қуруқ шов-шувдангина ва фақат анча-мунча жанжалли суд муҳокамасидангина иборат масаладир, деб қарашга мойил эдилар, улар ақалли газеталардан холоса чиқарганда ҳам мамлакатдаги кўпчилик доно одамлар нуқтаи назаридан қарагандা, суд муҳокамаси бутунлай адолатли ҳукм чиқарган, деб ҳисоблар эдилар.

Биринчидан, сирасини айтганда, ўша одамнинг онаси – ўша аёл, хўш, ким ўзи? Асрлар давомида бунёд этилиб, тарихий таркиб топган, черков иродаси билан муқаддаслаштирилган барча ояту қонунларни (диний семинарияларни, расмий черков ва унинг шохобчалари ҳамда янги мазҳабларини, парвардигорнинг сўзларини тартиб ва эҳтиёткорлик билан анъанавий ҳамда

эскича усулда, демакки, қонуний тарзда таъбир этишларни) писанд қилмай, худонинг қаҳридан қўрқмай, таваккалига, ҳеч ким рухсат бермаган, даргумон бир хонақони бошқаришни ўйлаб топган қаллоб махфий ваъзгўй хотин-да. Иккинчиidan, агар у бошқа меҳрибон оналардек уйида тинчгина ўтириб, ўз умрини ўғли ва қолган болаларини тарбиялашга сарфлагандა эдими, балки унда мана шунағанги хунук воқеалар юз бермаган бўлиши ҳам мумкин эди.

Ҳа, бунинг устига яна – Клайд ўша қизни ўлдирганми ёки йўқми, бундан қатъи назар, ҳарқалай, ўша ожиза билан ҳаром алоқада бўлган, бу унинг судда айтган гапларидан ҳам яққол кўриниб турибди. Кўпчиликнинг назарида эса бу – қотилликдан камроқ гуноҳмас, ахир. Клайд мана шу айбини ўз бўйнига одди. Келиб-келиб энди шу бузуқ, эҳтимол, ким билади ҳали – қотил бир одамни ҳимоя қилиб, черковдан туриб ваъз айтишга умуман йўл қўйиб бўлармикин ўзи. Йўқ, йўқ, бошқача фикрдаги айрим насронийлар миссис Грифитсга ҳар қанча ачинмасинлар ёки ўғлининг иши кўрилаётган пайтда йўл қўйилган адлиявий нотўғриликлардан ҳар қанча ғазабланмасинлар, аммо насроний черкови суд муҳокамасини танқид қиладиган жой эмас-ку, ахир. Йўқ, йўқ! Бу билан қайтага маънавий негизларга болта уриш мумкин. Бу, ҳатто зарарли оқибатларга олиб келиши ҳам мумкин, чунки жиноятнинг барча икир-чикирлари ёшларнинг диққат-эътиборига етиб бориши турган гап.

Ниҳоят, миссис Грифитснинг Шарқقا келиш сабабларини ёритган газета хабарлари таъсири остида ҳамда унинг назардан қолган, букчайган қиёфасини ўз кўзлари билан кўрган кўпчилик клерикал маъмурлар на диний тариқату, на илмий ақоидни тан оладиган эси паст бир мутаассиб аёл-

га дуч келдик шекилли, шу боисдан унинг халойиқ олдига шундай бир чиқишининг ўзи муқаддас ва покиза динимизга кўланка бўлиб тушиши мумкин, деган қарорга келишди.

Миссис Грифитс мурожаат этган ҳар бир руҳо-ний шуларни ҳисобга олган ҳолда, унчалик жаҳди ҳам чиқмай, шунчаки яхшилаб ўйлаб кўргандан сўнг: йўқ, насронийлар учун у қадар қалтис бўлмаган бошқача йўлини топиш ҳам мумкин, масалан, шаҳардан бир бинони ижарага олиб, албатта матбуот орқали тегишли ташвиқий ишларни ўтказиш билан кўнгли сахий насронийлардан анча-мунчасини тўпласа бўлади, деб маслаҳат бера бошлар эди. Миссис Грифитс шу тахлит доимо рад жавобини эшитар ва бошқа жойга учрашиш тўғрисида маслаҳат олар эди. Католик диндорларидан ёрдам сўраш эса унинг хаёлига ҳам келмаган эди, чунки бу, бир жиҳатдан унинг нотўғри тушунчасининг, бир жиҳатдан эса уларга нисбатан маълум даражада асосли бўлган ўжар шубҳасининг ҳам оқибати эди. У парвардигорнинг ердаги ноибини тан олмаганлар тангрининг раҳм-шафқатини муқаддас Пётр соҳиблариdek тушуна олмаслигини билар эди.

Шундай қилиб, у анча кун ичида ҳали у эшикни, ҳали бу эшикни қоқиб, натижа чиқаролмагач, юрагини ҳовучлаганча Утигадаги фирт ўғрихона ҳисобланган энг катта кинотеатрнинг хўжайини бўлган бир яҳудийга бориб учрашиди. У, Клайдга қўйилган жазо тафсилотларини гапириб бериши учун миссис Грифитс ихтиёрига ўз залини текинга ажратиб берди. «Ўғлини ҳимоя қилувчи онанинг сўзи» – эълонларга шундай деб ёзилди ва кириш ҳақи учун олинган йигирма беш центдан йифилиб-йифилиб, миссис Грифитсга икки юз доллар анча тушди. Бу пул ҳали анча кам бўлишидан қатъи назар,

миссис Грифитс аввалига жуда қувониб кетди; бўлар-бўлмас тамойилларга кўр-кўрона амал қиливчи насронийларнинг нодўстона ишларига қарамай, норозилик билдириш учун етадиган пулни назарида, албатта, йифиб оладигандай бўлиб туюлди унга. Майли, бунинг учун анча-мунча вақт ҳам керакдир, аммо миссис Грифитс ўша ақчани, сўзсиз, йигади.

Бироқ тез орада шу нарса маълум бўлдики, ўртада эътиборга олиниши керак бўлган бошқа майдада-чуйда харажатлар ҳам бор экан: йўлкираси, Утика ва бошқа шаҳарларда яшашига кетадиган чиқимлари, Денверга, эрига юбориб туриши лозим бўлган пулларни-ку, айтмаса ҳам бўлади – эрининг кун ўтказишга ҳам ҳоли йўқ эди, бунинг устига оила елкасига тушган фожиали кулфатдан куйиб, у оғир дардга чалиниб қолди, шу сабабли Фрэнк ва Жулияларнинг хатлари кун сайин ваҳималироқ бўлиб келаётган эди. Афтидан, энди у бутунлай тузалмайдиганга ўхшайди, деган хавф ҳам бор эди. Уларга ёрдам бериш зарур эди.

Шундай қилиб, миссис Грифитс ўзининг ана шу ягона даромад манбаидан шахсий ишларига харжлашдан ташқари яна қайта-қайта олиб тураверишга мажбур бўлар эди. Клайднинг аҳволини ҳисобга олса, унда бу бир даҳшат эди, лекин охири бориб голиб чиқиши учун ўзининг бутун кун-қувватини аямаслик миссис Грифитснинг бурчи эмасми, ахир?! Бу ёқда Клайдни деб эрини бутунлай унутиб қўйиши ҳам унчалик тўғри эмас, албатта.

Лекин унинг маърузаларига борган сари камкам одам йиғилиб (орадан бир ҳафталар ўтгач, у атиги ўн-ўн беш киши олдида гапира бошлади), ўзи эса ейиш-ичишидан қирқиб, бир амал-

лаб кун ўтказса ҳам, аммо шунга қарамай, барча чиқимхаражатлардан орттириб, бир минг бир юз долларни жамғарип қўйишга муваффақ бўлди.

Айни шу, бошига энг қийин иш тушиб турган бир пайтда, у Фрэнк билан Жулиядан телеграмма олиб қолди, мабодо Эйсани у тирик қўришдан умиди бўлса, тезда уйга етиб бориши керак экан. Эрининг аҳволи жуда оғирлашган, афтидан саноқли кунлари қолганга ўхшар эмиш. Бахтсизликнинг бу қадар ҳар томондан ёпирилиб келаётганидан эсанкираб, нима қилишини билмай қолган миссис Грифитс маслаҳат учун Белнеп билан Жефсонга қараб югурди, у Клайднинг ҳузурига баъзан ҳафтада бир марта, имконияти бўлганда эса икки марта бориб турар, шу кунда ўғлига бера олган бирдан-бир қувончи ҳам аслида шу эди, шунинг учун уни ташлаб кетишига кўзи қиймас эди.

Ҳурматли адвокатлар эса, миссис Грифитс меҳнати билан йифилган бир минг бир юз доллар пул қўлларида нақд турганини кўришиб, бирдан одамгарчилклари тутиб кетди-ю, унга эрининг олдига боришини маслаҳат солишиди. Клайднинг аҳволи ҳозирча унчалик ёмон эмас, чунки ишни қайта кўрувчи идора зарур қофозлар ва ҳужжатларни сўрагунча орадан ўн ой ёки бир йилча вақт ўтиб кетади. Сўзсиз, янги қарор чиққунча эса яна бир йил ўтади. Шу давр ичида миссис Грифитс норозилик билдиришга кетадиган чиқим-харажатларни қоплаш учун зарур бўлган қолган ақчаларни ҳам йифиб улгуролса керак, ҳойнаҳой. Мабодо йифолмаса ҳам майли, ташвишланиб ўтирмасин, бари бир Мистер Белнеп билан мистер Жефсон (улар миссис Грифитснинг қай даражада қийналиб, азобланиб кетганини мана, кўриб турибдилар) кўкракларини қалқон қилиб, унинг ўғлини ёқлаб чиқадилар. Улар норозилик аризасини топшира-

дилар, ҳимоя учун ҳужжатлар тайёrlайдилар ва умуман, ишнинг ўз вақтида ҳамда холисона кўриб чиқилиши учун зарур бўлган барча имкониятларни ишга соладилар.

Шундай қилиб, гўё унинг елкасидан катта тоғ ағдарилгандай бўлди. Клайднинг ҳузурига яна икки марта бориб, уни тезда – Эйса тузалиши ва янгитдан пул топиши биланоқ – тагин келишига ишонтирди-ю, Денверга қараб жўнади, у ерда ҳатто ўзи етиб келган бўлса ҳам, аммо чоли ҳадеганда тузалмаслигига дарров қўзи етди.

Клайд эса ўзи тушган руҳий жаҳаннамда бир амаллаб кун кечиришга кўникмоқчи бўлиб, ўй ўйлаб, вақт ўтказар эди, у яшаётган уй тепасига ҳам Данте дўзахи пештоқига ёзилганидек: «Кимки бу ерга қадам босса, умидини узаверсин» деган сўзларни битиб қўйиш мумкин эди.

Бундан бўёнига шу кўргилик энди. Бемаъни, чи-даб бўлмас зулм бу. Жасурлар ва қўрқоқларни ҳам, майнабозчиликка мойиллар ва бутунлай сезгисизларни ҳам (ҳатто шундайлар ҳам бор эди), умуман, ўйлаш ва кутишга мажбур этилганларнинг барини, доимий равишида даҳшат ва фам-ҳасрат қаттиқ эзиз турагар эди. Чунки шу ғоят шафқатсиз, оғир турма шароитида Клайд турли хил мижозга эга ва турли миллатдан иборат бошқа йифирма маҳбус билан ҳарқалай юзма-юз бўлмаса-да, бироқ маънавий алоқа қилишга мажбур эди, уларнинг ҳар бири ҳам худди Клайд сингари ўзининг бирор-бир эҳтироси ё ожизлиги ёки қалтис вазият қаршисида ўзини тутиб тура олмаган одамлар эдилар. Пировард натижада улар зўриққан руҳий ва жисмоний жазавага қул бўлиб, қилган ишлари қотиллик билан тугаган эди, кейин қўлга тушиб, ҳибсга олиниб, не-не азоблар билан адлиявий ва маънавий томондан ўзларини қутқариб қолишга уриниб, бу

орада қанча-қанча босқичлардан ўтиб, охири ҳам-малари мана шу ерга келтириб ташланган ва йи-гирма иккита темир қафас ичига тиқиб қўйилган-ларича нимани ҳам кутишар эди, хўш? Эҳ, нимани кутаётганларини улар жуда ҳам яхши билишар эди, Клайд ҳам яхши билар эди. Бу ерда тутқаноқ тутиб қутуришлару, умидсизлик ва хурушга кириб ибодат қилишларни ҳам кўриш ва эшитиш мумкин эди. Баъзан эса, тана ва ҳолдан тойган юрак бечора бир оз ором олиши керак бўлган тун ярмида ҳам сўкиниш, қўпол ва уятсиз ҳазиллар, узундан-узоқ шангиллаб айтилган ҳикоялар, шаҳвоний кулги ёки оҳ-воҳу инграшлардан асаб таранглабишиб кетар эди.

Узун марказий йўлакнинг охирида сайр этишга мўлжалланган кичик бир майдонча бор эди, маҳбусларни оёқдарининг чигилини ёзиб, соф ҳаводан нафас олишлари, сал-пал бадантарбия қилиб ёки ҳатто кайфияти борлари эса хиёл чопиб, сакраб-сакраб қўйишлари учун беш-олти кишидан гуруҳ-гуруҳга бўлиб, кунига икки мартадан соат ўн ва беш ўрталарида ўша жойга чиқаришар эди. Лекин шуларнинг бари соқчиларнинг қаттиқ назорати остида олиб борилар, мабодо исён кўтариб қолингудек бўлса, дарров уни бир ёқлик қилиш учун атайлаб соқчилар кўпайтириб қўйилган эди. Клайдни ҳам турмага тушган иккинчи кунидан бошлаб ҳар куни бошқа-бошқа гуруҳга қўшиб, ўша ерга олиб чиқа бошлашди. Аммо дастлабки пайтларда у бунақанги бемаъни эрмак-овунчоқдарга сира қўшилмайман, деб ўйлар эди, қаёққа қарасанг, муқаррар ҳалокат сезилиб турган мана шундай шароитда ҳам, афтидан, бошқа маҳбусларга унча-мунча кўнгилхушликлар ёқадиганга ўхшаб кўринар эди.

Қоп-қора кўзли иккита италиялик ҳам бор эди; уларнинг бири ўзига тегишини истамаган қизни

сўйиб қўйган экан; иккинчиси эса қайнатасининг пуллари ўзи ва хотинини тинч қўймагани учун, чолнинг мол-дунёсини ўмариб, ўзини ўлдириб, сўнгра жасадни куйдириб юбормоқчи бўлган экан. Кейин калладор, елкалари чорпаҳил, қўл ва оёқлари бесўнақай, баҳайбат жуссали Лэрри Донехью деган киши ҳам бор эди, у жазо қўшиниларининг собиқ аскари экан, Бруклиндаги фабрикалардан бирининг қоровуллиги вазифасидан ҳайдалгандан сўнг ўзини бўшатган директорни тунда пойлаб туриб, ўлдирибди, лекин эҳтиётсизликка йўл қўйиб жиноят қилинган жойда ҳарбий медалини тушириб қолдирибди, сўнгра ўша медаль орқали уни топиб, тутиб олишибди. Шуларнинг барини Клайд иккита турма назоратчисидан эшитди, улар галма-галдан саккиз соатда бир алмашиниб қоровуллик қилишарди; маҳбусларга мутлақо бефарқ, лекин умуман олганда, анча-мунча рўйхушлик билан қарашарди. Яна маҳбуслар орасида Райордан исмли полиция офицери ҳам бор эди, у Рочестердан эди; Райордан, сен билан энди турмайман дегани учун хотинини ўлдирган экан, энди эса мана, ўзи ҳам ўлиши керак. Клайд биринчи келган тунда оҳ-воҳини эшитган анави «фермер» Томас Маурер эса, аслида фермада батрак бўлиб ишлаб, хўжайинига паншаха санчиб ўлдирган экан: унинг қатл этилишига саноқли кунларгина қолибди, Клайдга шундай деб айтишди, ташқарига айлангани чиққанда у бошини эгиб, қўлларини орқасига қўйганча деворнинг нақ остида у ёқдан-бу ёққа тинмай юрар, ўттиз ёшлардаги бақувват, бесўнақай, кўринишидан обдан эзилган ва юрак олдириб қўйган одамга ўхшардики, бир қарашда уни жоҳил ва қотил, деб ўйлаш ҳам ҳатто тасаввурга сифмас эди. Клайд унга қараб туриб: наҳотки, у чиндан ҳам гуноҳкор бўлса, деб ўйлар эди.

Сүнгра, қирқ ёшлар чамасидаги барваста қоматли, келишган, ташқи қиёфаси билан бошқалардан бутунлай ажралиб турадиган буффалолик адвокат Миллер Николсон ҳам шу ерда эди; у нозик дидди зиёли бўлиб, Клайд каби у ҳам сира қотилга ўхшамас эди, бироқ шунга қарамай, у бадавлат бир мўйсафидни заҳарлаб, кейин мол-дунёсига эга чиқмоқчи бўлганликда айбланиб, жазога тортилган эди. Кўринишига қараб туриб, унинг қўлидан шунчалар машъум ёвузлик келганига мутлақо ишониш қийин эди, ҳарқалай Клайднинг назарида шундай туюлди.

У хушмуомала, илтифотли киши эди. Клайдни кўриб, биринчи куни эрталаб олдига келган ва шу қадар меҳрибон хайриҳоҳ бир оҳанг билан: – Кўрқмаяпсизми? – деб сўраган эдики, Клайд гарчи даҳшатга тушиб бутунлай қотиб қолган, ҳатто қимирлашга, ҳатто ўйлашга қўрқиб турган бўлса ҳам, бу оҳангни сезмай қолмаганди.

Клайд бу қўрқув туйфусига таслим бўлиб ва энди тамом бўлишига ақди етиб:

– Ҳа, қўрқаётганга ўхшайман, – деб жавоб берди.

Кейин ўша заҳотиёқ ўзининг тубан эътирофидан ўзи ҳайратга тушиб, айни шу одамда кишига қандайдир далда берувчи бир меҳригиё борлигини тушунди-ю, айтган сўзидан афсусланди.

– Сизнинг фамилиянгиз – Грифитс, шундай эмасми?

– Ҳа.

– Менини эса – Николсон. Қўрқманг. Тезда ўрганиб кетасиз.

У сўник бир эркаловчи жилмайиш билан кулиб қўйди, аммо кўзларида эса кулгидан асар ҳам йўқ эди.

– Э, йўқ, унчалик кўрқаётганим йўқ, – деб эътиroz билдириди Клайд, шу билан ўйламай айтган,

биринчи жавобидан қолган таъсирни сийпалаб юбормоқчи эди.

– Ҳа, унда дуруст. Қовоғингизни уйманг. Биз ўзимизни бардамроқ тутишимиз керак, акс ҳолда бу ерда ақддан озиш ҳам ҳеч гапмас. Яхшиси, соғ ҳаводан кўпроқ фойдаланиб қолишга ҳаракат қилинг. Тез-тез юринг. Ўзингиз ҳам кўрасиз, бу жуда фойда беради.

Николсон уч-тўрт қадам нарига борди-да, қўлини ўйнатиб турли хил машқлар қила бошлади, Клайд эса ҳали ҳам эсанкираганча, турган жойида қотиб турар, деярли овозини чиқариб юборгудек бўлиб: «Биз ўзимизни бардамроқ тутишимиз керак, акс ҳолда бу ерда ақддан озиш ҳам ҳеч гапмас», деб такрорлар эди. Энг тўғриси ҳам шу, турмада ўтказган биринчи кечасидаёқ у буни сезмаганмиди, ахир? Чиндан ҳам нақ ақддан озиш мумкин. Ёки ўзгалар фожиасини доимо кузатиш, унинг даҳшатли, дилни кемирувчи азоби остида ўлгандан ҳам баттар аҳволга тушиш ҳам ҳеч гап эмас. Лекин бунга у қачонгача чидай олади, ахир? Ҳар қанча бўлганда ҳам кучи қаергача етарди?

Аммо орадан бир-икки кун ўтгач, Ажал уйида кўрганларининг бари ҳам, аввал ўйлаганидек, у қадар жирканч эмаслигига ишонч ҳосил қилди; бу ердаги кўп нарсалар – жуда бўлмагандан, сиртқи кўринишига қараганда унчалик мудҳиш эмас эди. Ҳақиқатан ҳам, ҳар бир маҳбус вужудини эзиб турган ўлим соатининг яқинлигига қарамай, бу ерда ҳам ҳазил-ҳузул қилишар, кулишиб, майна-возчиликка ўтишар, ўйнашар, ўлимдан тортиб ҳатто аёллару спортгача бориб тақалувчи ақлага сиққан барча мавзуларда ўзаро тортишишар, инсоний топқирлик ёки нодонликнинг турли соҳала-рида баҳслалиб кетишар, шуларнинг ҳаммаси ан-

ча-мунча ибтидоий бир тарзда, шу ердагиларнинг ақли ета олган даражада бўлар эди.

Наҳорги овқатдан кейин биринчи гуруҳга тушиб, ташқарини айланиб келганлар, одатда ўзларини шашка ёки қарта ўйинига уришар эди. Бунинг учун ўйинчилар камераларидан чиқиб, шашка атрофида икки кишилашиб ўтириб олишлари ёки рақибларга бир қўлдан қарта сузиб беришлири шарт эмас эди: йўқ, турма хизматчиси ҳар бир маҳбусга шунчаки биттадан шашка тахтачасини улашар эди-ю, аммо уларда шашка тошлари бўлмас эди, Чунки у тошларнинг кераги ҳам йўқ эди. Ўйинчилардан бири биринчи юришни эълон қиласр эди: f2 – e1. Катаклардаги ётиқ қаторларнинг бари рақамлар билан, тик қаторлар эса ҳарфлар билан белгилаб чиқилган эди. Юришларни қаламда ёзиб олишарди.

Иккинчи ўйинчи ўз тахтачасига рақибнинг юришини ёзиб, бу – вазиятга қандай таъсир этганини ўрганиб чиққач, ўз навбатида у ҳам: e7 – f5, деб эълон қиласр эди. Мабодо, у ёки бу томонда туриб ўйинда қатнашмоқчи бўлган ишқибозлар чиқиб қолса, ҳар бирига биттадан тахтача ва қалам берилаш эди. Ана шунда, масалан, «Голландиялик» Суигхортнинг ютишини истаган, ўзи эса ундан уч камера нарида ўтирган «Пакана» Бристолнинг:

– Ундей юрма, голландиялик. Сал сабр қил, бу ерда тузукроқ йўл топиш мумкин, – деган овозини эшитиш мумкин эди.

Ўйин қичқириқлар, бир-бирини масхаралаш, қаҳқаҳа уришлар, ҳар бир хато ёки тўғри юрилган йўл устида баҳсллашишлар билан ўтар эди. Қартани ҳам худди шундай ўйнашар эди. Бунда ҳам ўйинчилар ўз камераларидан чиқишишмас, лекин ўйинга қизиқишиш эса бари бир кучли эди.

Аммо Клайд қартани ёмон күрар, соатлаб давом этадиган қүпоп сафсаталарни жини ёқтиирмас эди. Фақат биргина Николсондан ташқари бу ердаги ҳамма маҳбуслар уятсиз ва ҳақоратомиз ибораларни қалаштириб ташлашар, бу эса Клайдни ниҳоятда азобга солар эди. У Николсон билан бирга бўлишга интиларди. Орадан хийла вақт ўтгач, Клайднинг назарида, ўзининг адвокатга яқинлиги, бир гуруҳда сайрга чиқсан пайтларидаги дўстона суҳбатлари шу қийинокларга чидаб кетишига ёрдам берадигандек бўлиб туюла бошлади. Турмада яшовчилар ичидаги энг зиёли, энг одамшаванда маҳбус шу Николсон эди. Қолганлар эса ундан осмон билан ерча фарқ қилишар: улар чурқ этмай қовоқларини осилтириб юришар ёки кўпинча гап сотишар, аммо уларнинг гаплари Клайдга жуда ҳам тушкун, дағал ёки маъносиз бўлиб туюлар эди.

Клайднинг бу турмага келганига ҳам икки ҳафтача бўлиб қолди ва Николсон туфайли ўзини анча-мунча бардамроқ тута бошлади, лекин бу орада Бруклинда яшаган италиялик Паскуале Кутроненинг қатл этиладиган куни етиб келди, у хотинини йўлдан урмоқчи бўлгани учун ўз акасини ўлдирган эди. Паскуале йўлкалар кесишган жойдаги камералардан бирини эгаллаган бўлиб, қўрққанидан бир-икки марта ақддан озиб ҳам қолганини Клайд эшитган эди. Ҳар ҳолда уни бошқаларга қўшиб ташқарига олиб чиқишимас эди. Аммо Клайд унинг юзини яхши эслаб қолди, у бир куни ёнидан ўтиб кетаётганида Паскуаленинг аянчли, ориқ қўзларидан оғзига қараб кетган икки чуқур из – турма азобларидан ортган ажинлар билан гўё учга бўлингандай туюлган юзини кўрган эди.

Ўша, Клайд турмага келтирилган куни кечқурун Паскуале бирдан кечаю кундуз тўхтовсиз ибодат

қилишга тушди. Кейин маълум бўлишича: унга янаги ҳафтада қатл этилишини айтишган экан. Шундан сўнг, у камерада эмаклаб юриб, ерни ўпид, кичкинагина бронза бутдаги Исонинг оёқларини ялай бошлади. Италиядан етиб келган укаси ва синглиси бир неча марта уни қўргани киришиди, шунда улар билан учрашиш учун Паскуалени эски Ажал уйига олиб чиқишиди. Бироқ ақддан озган Паскуале энди ўз жигарларини ҳам бутунлай танимай қолган эди, атрофдагиларнинг бари шу ҳақда шивир-шивир гаплашишар эди.

Шу учрашув соатларидан бошқа пайтларда у эртаю кеч, куну тун у ёқдан бу ёққа эмаклаб, фўлдир-ғўлдир дуо ўқир, ухлай олмай китоб ўқиб вақт ўтказаётган маҳбуслар эса унинг валдир-вулдур алжирашлари-ю, тўхтовсиз равишда «Ё, худо» ва «Биби Марям» деб тасбех ўгиришларини эшитавериб, жуда безор бўлиб кетишган эди.

Шунинг учун ҳамма вақт бўлмаса-да, аҳён-аҳёнда қаердандир: «Э, худо-ей, салгина ухласа нима қиласар экан-а!» деган бетоқат овоз эшитилиб қолар эди. Яна гуп этиб ерга бош уриш, яна дуо ўқиши, хуллас, шу аҳвол то қатл арафасигача давом этди, сўнгра Паскуалени эски Ажал уйига олиб ўтишиди, у ерда Клайд кейинроқ билса, видолашадиган кишилари бор маҳбуслар билан охирги видолашувлар бўлар экан. Бундан ташқари, ўз руҳини яратган парвардигорга ҳадя этишга тайёрланиши учун уни бир неча соатга тинч ва ёлғиз қолдиришар эди.

Лекин ўша кеча шу машъум уйда турувчиларнинг барини ваҳимали кайфият эгаллаб олди. Деярли ҳеч ким тушки овқатга қўл узатмади, патнисларни ўша ҳолича яна қайтариб ташиб кетишиди. Камералар гўристондек жимжит эди, фақат ўзининг қисмати ҳам яқин орада шу тариқа тугаши-

ни билган айрим маҳбусларгина минғиллаб дуо ўқишишарди. Кейин банк қоровулини ўлдирғанлиги учун жазога тортилган бир италияликнинг тутқанноғи тутиб қолди: у бўкириб, курси ва столини панжара темирига уриб синдириб ташлади, тўшагидаги чойшабни парча-парча қилиб йиртди, ҳатто ўзини бўғиб ўлдирмоқчи ҳам бўлган эди, уни боғлашиб, турманинг бошқа томонига қараб кўтариб кетишиди, у ерда врач кўриб, унинг ақли жойидамаслигини аниқлаши керак эди.

Қолганлар эса бу тўс-тўполон вақтида камераларида у ёқдан-бу ёққа югуриб, тинмай дуо ўқишишар, айримлари эса турма назоратчилари ни чақириб, тартиб ўрнатасизларми ёки йўқми, деб талаб қилишар эди. Клайд бўлса бунақангни нарсаларни умрида бошидан сира ўтказмагани ва тасаввур ҳам қилолмагани учун қўрқиб кетгани ва ижирғанганидан дағ-дағ титрар эди. Паскуале Кутроне ҳаётидаги мана шу охирги тунда, Клайд то эрталабгача ўз каравотида ётганча нуқул босинқираб чиқди. Бу ердаги ўлим, қарангки, қанчалар даҳшатли бўлар экан-а: одамлар бўкиради, дуо ўқийди, ақлдан озади, лекин мудҳиш қатл эса ҳеч нарсани писанд билмай, ўз мавриди билан давом этаверади. Соат ўнларда ҳозирги тирик қолганларни тинчтиш мақсадида енгил-елпигина емиш келтиришиди, аммо Клайднинг рўпарасидаги хитой маҳбусдан бошқа ҳеч ким тамадди қилмади.

Эртаси куни саҳарда, роппа-роса тўртда, турма хизматчилари ўзларининг ёвуз вазифаларини адо эта туриб, бош йўлакка секингина келишиди-да, эски Ажал уйидан чиқиб, қатл бўлмасигача ўтиб борадиган машъум маросимни ҳеч ким қўрмаслиги учун камера панжаралари олдидаги оғир

яшил пардаларни тортиб-тортиб қўйишиди. Лекин ҳар қанча эҳтиёткорлик қилишмасин, Клайд ҳам, бошқа маҳбуслар ҳам биринчи тиқ этган овоздан уйғониб кетишган эди.

Мана, қатл деганлари! Ажал соати занг урди. Бу бир ишора. Қўрқув ё афсус оқибатида ёки табиатан тақводор бўлган ва шунинг учун диндан мадад ҳамда далда излаган маҳбуслар тиз чўкканларича, худога сифинишар эди. Қолганлар эса – баъзилари шунчаки камерада айланиб юрар, баъзилари ўзларича нималарнидир алжирашар эди. Бошқалар бўлса даҳшатдан жонсарак аҳволга тушганларича бирдан додлаб юборар эдилар.

Клайд эса росмана меровлашиб, эсини йўқотиб қўйган эди. Ҳатто фикрлари ҳам қотиб қолгандай эди. Ҳозир анави, нариги хонада одам ўлдиришади. Курси, биринчи кундан бошлабоқ, кўз ўнгидан совуқ шарпадек сира нари кетмаган ўша курси худди шу ерда, ҳув анави ерда турибди. Лекин, ахир онаси ҳам, Жефсон ҳам Клайднинг муддати келишига ҳали анча борлигини айтишган-ку, шунда ҳам агар... ўша муддат умуман келадими-йўқми ҳали... агар... агар...

Аллақандай ғалати овозлар эшитилди. Йўлакда кимлардир у ёқдан-бу ёқقا юришар эди. Ҳў олисда камера эшиги гурсиллади. Эски Уйнинг эшиги очилган эди, ҳа, худди ўша эшик, чунки энди ана... аввалига олисдан келаётган гувуллашга ўхшаш... ғўнфир-ғўнфир овозлар қулоққа чалина бошланди. Ана, яна бир аниқроқ товуш, кимдир дуо ўқиётганга ўхшар эди. Таги кигиз пойабзалларнинг ваҳимали шип-шипи эшитилди – қатл моросими иштирокчилари йўлакдан юриб кела бошлаган эдилар.

– Худо, ўзинг раҳм эт! Исо, ўзинг раҳм эт!

– Биби Марям! Шафқатли ва марҳаматли биби Марям! Раҳмдил она, мени дуо қил! Паноҳ фариштаси, мени дуо қил!

– Авлиё Марям, мени дуо қил! Авлиё Юсуф, мени дуо қил!

– Авлиё Амвросий, мени дуо қил! Барча авлиё-ю анбиилар, мени дуо қилинглар!

– Авлиё Микоил, мени дуо қил! Паноҳ фариштаси, мени дуо қил!

Бу ўлимга ҳукм этилган маҳбусни кузатиб, унинг шаънига дуо ўқиб бораётган руҳонийнинг овози эди. Паскуале эса, айтишларича, бутунлай ақддан озиб қолибди. Йўқ, ана, унинг ҳам товуши келяпти. Ҳа, ўшанинг товуши. Клайд буни таниди. Чунки охирги кунларда у бу овозни жуда кўп эшитган эди. Ана, ҳозир анави, нариги эшик очилади. Ўлимга ҳукм этилган одам ҳадемай, ҳадемай... ичкарига киради-ю, анави темир қалпоқни... анави камар-богичларни кўради... ҳаммасини кўради. Оҳ, Клайд энди уларнинг қандайлигини яхши билади, эҳтимол, у ўша қалпоқни умрбод киймас... эҳтимол...

– Алвидо, Кутроне! – шу орадаги қайсиdir бир камерадан бўғиқ, ожиз бир овоз эшитилди. Аниқ қайси камераданлигини эса Клайд ажратолмади. – Жойинг жаннатда бўлсин!

Ўша заҳоти бошқалар ҳам қўшилишди:

– Алвидо, Кутроне! Инглиз тилида гапирмасанг ҳам, худо паноҳида асрасин сени!

Қатл маросими иштирокчилари йўлакдан ўтиб кетишди. Анави эшик ҳам қарсиллаб ёпилди. Паскуале энди ўша ерда. Балки уни ҳозир камар билан чирмаб боғлашаётгандир. Ўша жинни бўлиб қолган бечорадан, сўнгги бор айтадиган бирор-бир гапинг йўқми, деб сўрашаётгандир. Энди, ҳойнаҳой, камар bogичларини маҳкам тор-

тишган бўлса керак. Темир қалпоқни кийдиришгандир. Яна сал дақиқадан сўнг, сал дақиқадан сўнг, қарабсизки...

Шу пайт – гарчи буни Клайд ўша заҳоти сезмаган ёки тушунмаган бўлса-да – камералардаги, йўлаклардаги, бутун турмадаги чироқлар бирдан лип этди: кимнингдир аҳмоқлиги ёки калтафаҳмлиги оқибатида электр курсисига борадиган қувват ҳам умумий токка уланган эди. Ўша ондаёқ, кимдир:

– Мана у. Тайёр. Асфаласофилинга кетди бечора, – деди.

Бошқа биррови:

– Ҳа, энди бу ёруғ дунё билан ҳазиллашиб бўлди у, – деди.

Орадан бир дақиқа ўтгач, чироқлар яна лишиллади, ярим дақиқадан сўнг тагин икки марта лишиллади.

– Шунаقا. Мана тамом бўлди.

– Ҳа. Энди у нариги дунёда нималар бўлаётганини томоша қиляпти.

Кейин бамисоли гўристондагидек оғир жимжитлик чўқди. Фақат ҳар замон-ҳар замонда кимнингдир шивир-шивир дуо ўқиётгани қулоққа чалиниб қолар эди. Аммо Клайдки қандайдир ваҳимали, совуқ бир титроқ азоблар эди. У йиғлаш у ёқда турсин, ҳатто ўйлашга ҳам юраги дов бермас эди. Демак, шу қадар даҳшатли бўлар экан-да... Яшил пардалар беркитиб қўйилар экан. Кейин эса... кейин... Паскуаледан мана энди асар ҳам йўқ. Уч марта чироқ лишиллаб қўйди. Ўшанда ток юборишаётган пайти эди, бу аниқ билинди. У бўлса охирги тунлари ибодатдан сира бош кўтартмаган эди! Қанчалар инграган эди! Бошини ерга уриб, қанча-қанчалаб саждалар қилган эди! Атиги бир дақиқа илгари

у ҳам тирик эди – анави ердан, йўлакдан ўтиб бораётган эди. Энди бўлса ўлиб ётибди. Бир кун келиб Клайд ҳам... у ҳам... ахир, шундай бўлмас-лигининг кафиллигини ким ҳам олиши мумкин? Шу нарса юз бериши мумкин-ку, ахир!

У юзини ёстиққа буркаб олиб ётганча тинмай қалтирас эди. Кейин турма назоратчилари келиб, пардаларни очиб қўйишди – улар шу қадар хотиржам, дадил ва чаққон ҳаракат қилишар эдики, гўё дунёда ҳеч қандай ўлим ҳам бўлмагандай эди. Сўнгра Клайд йўлакда фўнгир-фўнгир овоз эшитди; ундан эмас – чунки у шу пайтгача ҳам ўзича тумшайиб, ҳадиксираб юрар эди – қўшниларидан биронтасидан ниманидир сўрашаётган эди.

Бечора Паскуале! Қани энди ўлим ҳукми бутунлай ман этиб ташланса эди. Турма бошлигининг ўзи ҳам шундай фикрда экан. Махбуслар ҳам. Турма бошлиғи ҳатто шу ҳақда у ёқ-бу ёққа учрашиб юрган ҳам эмиш.

Оҳ, шўрлиқ, Кутроне, Кутроне! Қанчалар худога сифинган эди-я! Энди бўлса, у йўқ. Камераси бўш турибди, тез кунда унга бошқа биронтасини келтириб тиқишишади, эртами ёки кечми у ҳам худди ўшандай йўқ бўлади. Шу ерда, айни мана шу камерада илгари ҳам бошқа одам турган... унга, Кутронега ўхшаш яна бошқалари ҳам шу ерда кун ўтказишган... улар ҳам нақ мана шу каравотларда ётишган. Клайд туриб, стулга бориб ўтирди. Лекин ўша олдингилар... ҳам мана шу стулда ўтиришган. У сапчиб туриб кетди-да, яна каравотга бориб ўзини отди. Э, худо! Э, худо! Э, худо! – у ичида шу сўзларни такрорлай бошлади ва бирдан уни биринчи марта ниҳоятда кўрқитиб юборган анави маҳбусни эслаб кетди. У ҳозирча тирик. Аммо, ҳадемай у ҳам кулга айланади. Қолганларнинг бари ҳам худди ўшандай

қисматга дучор бўлишади... Эҳтимол, Клайд ҳам, агар фақат... агар фақат...

Бу Клайднинг кўз ўнгидаги юз берган биринчи қатл эди.

### **XXXI БОБ**

Шу орада Эйса ҳадеганда тузалавермади, ҳатто туриб ўтирадиган ҳолга келгунича ҳам орадан тўрт ой ўтиб кетди, шундан кейин миссис Грифитс яна ўз маърузалари хусусида ўйлай бошлади. Лекин бу пайтда унга ва ўғлининг тақдирига бўлган одамларнинг қизиқиши анча сусайиб қолган эди. Денверда миссис Грифитснинг сафарини ўзига моддий жиҳатдан фойдали деб ҳисоблаган биронта ҳам газета топилмади. Жиноят содир бўлган райондаги аҳоли масаласига келганда эса, тўғри, улар ҳали ҳамма ишни бошдан-охир яхши эслашар, миссис Грифитснинг ўзига ачиниб қарашар, аммо ўғлини-чи, деярли ҳамма одамлар муносиб жазосини олган жиноятчи деб билишар, шунинг учун норозилик билдириб ўтиришнинг ҳам ҳожати йўқ, мабодо билдирилган тақдирда ҳам, у рад этилиши керак, деб ҳисоблашар эди. Вой, бу жиноятчилар-еёй, норозилик билдиришни намунча яхши кўришмаса-а!

Клайд яшаётган шу совуқ маконда эса қатл деган нарса кетма-кет давом этаверар, лекин бунга бари бир ҳеч ким кўниколмас эди, Клайд даҳшатга тушган кўйи ҳар гал шу ҳақда ўйлаб, сира ўйига етолмас эди. Хўжайинини ўлдирган батрак Маурер, хотинини ўлдирган офицер Райордан ҳам қатл этилдилар, Райондан жон беришига ҳатто бир дақиқа қолгунча ҳам ўзини шу қадар мардларча тутдик! Сўнгра ўша ой ичида иши негадир жуда ҳам чўзилиб кетган хитой маҳбуснинг навбати

етиб келди (у қатлга бораётганида ҳеч ким билан видолашмади ҳам, ваҳоланки, у беш-олти инглиз сўзини билишидан бошқалар хабардор эдилар). Унинг кетидан жазо армиясининг аскари Лэрри Донэхью қата этилди; у ичкарига киргач, эшик ёпилишидан оддин:

– Алвидо, йигитлар! Бахт тилайман! – деб қич-қирди жасурлик қилиб.

Кейин эса..: оҳ, бу Клайд учун энг даҳшатли ва энг оғир воқеа эди – бундан буён гўё бу аянчли турма бўйинтуруғини судраб юришга мадори ҳам етмайдигандай туюлди Клайднинг назарида – Миллер Николсоннинг навбати этиб келди. Шу беш ой ичида улар бирга юриб сайр этишга ўрганиб қолишган, баъзан камераларида ўтирганларича ўзаро гаплашишар, Николсон унга қандай китобларни ўқишини ҳам тавсия этар эди, яна у, агар иши қайта кўрилгудек ва иккинчи марта суд ўтказилгудек бўлса, Клайдга ниҳоятда қимматли бир маслаҳат ҳам берди, бу маслаҳат шундан иборат эдики, бор имкониятларни ишга солиб бўлса ҳам, Роберта хатларининг кўпчилик ичида очиқ ўқилишига қарши чиқиши керак экан, чунки уларнинг таъсиридан ҳаяжонланган ҳар қанақанги гуруҳ суд маслаҳатчилари ҳам ўша хатларда тилга олинган далилларга одиллик билан, холисона баҳо беролмас эканлар, шунинг учун хатларнинг барини бошдан-охир ўқиб бериш ўрнига асосий мағзини териб-териб чиқиб, фақат ўшаларнигина суд маслаҳатчилари эътиборига ҳавола этиш зарур экан.

– Агарда адвокатларингиз шу талабнинг ҳаққонийлигига юқори судни ишонтира олсалар, ютиб чиқдим деяверинг.

Клайд ўша заҳотиёқ Жефсон билан учраштиришларини талаб қилиб, бу фикрни унга гапириб берган эди, Жефсон уни бутунлай оқилона фикр

деб тан олди ва Белнеп иккалови норозилик шикоятини тузатаётгандаридан сўзсиз фойдаланажакларини айтди.

Лекин бир марта Клайд ташқарини айланиб келгандан сўнг, турма назоратчиси уни камерасига қамай туриб, Николсон камераси томонга бошини иргади-да:

– Эндиги навбат уники, – деб шивирлади. – У сизга айтдими? Уч кундан кейин.

Клайд сесканиб тушди – бу хабар худди қаҳратон аёздек баданини музлатди. Ҳозиргина улар ташқаридан бирга айланишиб, бугун келган янги маҳбус – утикалик венгер тўғрисида сўзлашишган эди, у ўйнашини печкада ёқиб юбориб, кейин ўзи тан олибди. У баҳайбат, нодон, дағал, турқи совуқ бир галварс йигит эди. Николсон унда одамдан кўра, ҳайвонлик хусусияти кўпроқ, деб айтди. Лекин ўзи ҳақида эса у лом-мим ҳам демади. Уч кундан кейин-а! У бўлса, гўё айтарли ҳеч нарса юз бермайдигандай бемалол айланиб, гаплашиб юрибди, ҳолбуки, турма назоратчисининг сўзига қараганда, уни шу орада огоҳлантириб ҳам қўйишган экан.

Эртаси куни ҳам у ўзини худди ўшандай тутди: майдончани айланиб, гўё ҳеч нарса бўлмагандай чақчақлашиб, осмонга тикилганча соф ҳаводан нафас олиб юраверди. Ўша шум фикрнинг ўзиданоқ бутун тун бўйи мижжа қоқмай чиққан Клайд эса у билан ёнма-ён борар экан, ўзини ниҳоятда эзилган ва хаста одамдек ҳис этар, бу ҳақда гап очишга эса юраги бетламаганидан, нуқул: «Яна бемалол айланиб юрибди-я! Қайси юрак билан ўзини бунчалик хотиржам туваётганикин? Қанақанги одам ўзи бу?» деб ўйлар ва эҳтиром аралаш қўрқувдан бутун вужуди қотиб қолаётгандай эди.

Эртаси куни эрталаб Николсон ташқарига чиқмади: у камерасида ўтириб, ўз номига турли томондан келган даста-даста хатларни йирта бошлади. Тушга яқин ўзидан икки камера берида ўтирадиган Клайдни ҳақири:

– Мен бу ерда сизга эсдалик учун у-бу нарсаларни жүннатяпман.

Үзини нима кутаётгани ҳақида эса бир оғиз ҳам чурқ этмади.

Назоратчи Клайдга «Робинзои Крузо» ва «Минг бир кеча» деган иккита китобни келтириб берди. Кечқурун Николсонни эски Ажал уйига олиб ўтишди, тонг саҳарда эса яна одатдаги маросим такрорланди: яшил пардалар, қатл маросими иштирокчиларининг ваҳимали қадамлари – буларнинг ҳаммаси Клайдга энди ёд бўлиб кетган эди. Аммо бу гал у шуларни кўргандা мутлақо бошқача, юрак-юрагидан кўйиб-ўртаниб кетди. Эшик ёпилиши олдидан яна овоз эшитилди:

– Ҳаммангизни худо паноҳида асрасин, дўстлар! Шу ердан эсон-омон чиқиб кетинглар, илойим.

Сўнгра ҳамма ёқни одатдагидек жимжитлик қоплади.

Клайд учун фоят оғир ёлғизлик онлари бошланди. Энди озми-кўпми унга яқин бўлган ҳеч кими, биронта кишиси ҳам қолмаган эди. У фақат ўй ўйлаши, ё ўқиши ёки ўзини атрофдагиларнинг гапига қизиқиб қараётгандай кўрсатиши мумкин эди, холос, аслида эса уларнинг гапига у ўлса ҳам қизиқмас эди. Клайднинг ақду фаросати шундай эдики, агар у ўзининг бахтсиз тақдирдан хаёлан бўлса ҳам сал чалғиса борми, уни ҳаётний муаммолардан кўра кўпроқ хаёлпарастлик эргаштириб кетар эди. У ўзича орзу қилган ҳавоий турмушни акс эттирувчи енгил романтик асарларни ҳақиқий ҳаётнинг аччиқ ситамла-

рини тасвиirlаб берувчи китоблардан кўра афзалроқ кўрар эди, ўзининг турмадаги ҳаётини тасвиirlовчи китоблар тўғрисида-ю, гап ҳам бўлиши мумкин эмас эди. Хўш, уни олдинда нима кутяпти ўзи? У шу қадар ёлғиз эдик! Фақат онаси, укаси ва сингиллари ёзган хатларгина бу ёлғизликни бўлиб туради. Аммо-лекин Денвердаги ишларнинг бари чатоқ эмиш: Эйсанинг соғлиғи ҳали ҳам ўша-ўша, шунинг учун онаси қайтиб келишни хаёлига ҳам келтиролмаётган эмиш. У ҳам касал боқиб, ҳам бирор-бир жойда ишласа бўладиган қўшимча юмуш топмоқчи, масалан, диний мактабдан дарс олмоқчи эмиш. Лекин у Сирақузада маъруза ўқиб юрган пайтида танишиб қолган ёш бир поп, ҳазрат Данкен Мак-Милланга мурожаат этиб, Клайднинг ҳузурига кириб туришни илтимос қилибди. У жуда ҳам меҳрибон, юраги кенг одам экан. Модомики, миссис Грифитснинг ўзи шу оғир кунларда ўғилгинасининг ёнида бўлолмаётган экан, аммо Клайд ўша ҳазратдан далда ва таянч топишига онаси қаттиқ ишонади.

Миссис Грифитс округ клерикал мўътабар зотларидан кўмак излаб юрган пайларида – ҳаракатлари бехуда кетганини айтган эдик – ҳазрат Данкен Мак-Миллан билан учрашиб қолган эди. Ҳазрат Мак-Миллан Сирақузадаги аниқ бир мазҳабга тааллуқди бўлмаган кичиккина мустақил черков жамоасини бошқарар эди. У навқирон ёшда эди, Эйса ва миссис Грифитснинг ўзига ўхшаб диний мартабаси бўлмаса ҳам кашишлик ишларини бажарап эди, бироқ унинг тақводорлик қуввати анча-мунча кучлироқ ва жозибалироқ эди. Миссис Грифитс бу ерларга келишидан олдиноқ, у Клайд билан Роберта ҳақида кўп ўқиган ва чиқарилган ҳукмни адолатли ва шубҳасиз тўғри, деб ҳисоблар

эди. Лекин миссис Грифитснинг бошига тушган кулфат ва унинг ёрдам излаб нақ ўзини ўтга, сувга ураётганини кўрганда юраги ортиқ чидолмади.

У ўзи ихлосманд одам эди. Юксак шоирона ва таъсирчан табиатига кўра, гарчи унинг шаҳвоний туйгулари сўник бўлсада, Клайдга қўйилган айб масаласидан чинакамига ҳаяжонга тушган шимолий ўлка фуқароларидан бири ҳам, айни мана шу Мак-Миллан эди. Эҳтирослар ва азоб-уқубатлар билан тўлиб-тошган Робертанинг хатларини қаранг-а! Унинг Ликург ва Бильцда кечирган аянчли ҳаётини айтинглар! У миссис Грифитс билан учрашгунча шулар ҳақида озмунча бош қотирганмиди, ахир! Кичкинагина шоирона сокин бир муҳитдан чиққан Роберта ва унинг яқинлари афтидан шунчалик оддий ҳамда юксак фазилатлар эгаси экан-да?! Клайднинг гуноҳкорлигига иккиланишнинг гўё ҳожати ҳам йўқдай эди. Аммо бехос орадан миссис Грифитс чиқиб қолди, у кулфатдан эзилиб адо бўлган эди, менинг ўғлимда гуноҳ йўқ, деб тасдиқлар эди. Қаердадир, турма камерасида эса ўлимга маҳкум этилганча Клайд ўтирибди. Бахтсизлик рўй берган шарт-шароитнинг ҳаддан ташқари мураккаблиги туфайли суд хатолигига йўл қўйилиши ва Клайднинг бегуноҳ маҳкум этилиши мумкинми?

Мак-Миллан ниҳоятда қизиққон – гапга кирмайдиган, муроса нималигини билмайдиган одам эди. У ҳозирги кунимизнинг бамисоли авлиё Бернари, Савонаролласи, авлиё Симеони, бугунги таркидунёчи Пётри эди. Ҳаёт, онг, тафаккурнинг ҳамма шакллари, ижтимоий муассасалар унинг учун худонинг сўзи, жумласи, нафаси эди. Фақатгина шундай, бошқача эмас. Бироқ унинг дунё ҳақидағи тасаввуридан жаннатдан ҳайдалган, иблисона қаҳр-фазабли шайтон – Люцифер ҳам ўрин олган

эди. У Олий хутба ҳақида, авлиё Иоанн ҳақида фикр юритишни яхши күрарди, авлиё Иоанн Исо-ни күрган бўлиб, унинг панд-насиҳатини қутида-гича тавсифлаган эди: «Ким мен билан юрмаса, у менга душмандир; кимки мен билан йигиб-тер-маса, у исрофгардир». Умуман олганда, ҳазрат Мак-Миллан ер юзида етишиб бўлмайдиган адолат учун жон фидо этишга ҳам тайёр турган ўзига хос бақувват, серфазилат, майин, меҳрибон, ўзгача бир нафис қалбли инсон эди.

Миссис Грифитс у билан сұхбатлашаёттанида, Робертанинг ҳам гуноҳи борлигини қайта-қайта эслатиб ўтган эди. Клайд билан теппа-тенг у ҳам гуноҳкор әмасми, ахир? Уни қандай қилиб сутдай оқ дейиши мумкин? Шу ерда катта адлиявий хатога йўл қўйилган. Унинг ўғли нотўғри жазоланган, шуларнинг бари ўша қизнинг, ҳарқалай, хаёлпастликдан иборат мунгли хатлари оқибатида юз берган, ваҳоланки, ўша хатларни суд маслаҳатчиларига мутлақо кўрсатмаслик керак эди. Ёш, гўзал қизнинг қайгу-ҳасратлари тўғрисида гап кетганда эркаклар холисона туриб, одиллик билан фикр юритолмайдилар, деб таъкидлар эди, миссис Грифитс, у ўзининг ваъзгўйлик фаолияти пайтида ҳам бундай ҳолга қайта-қайта дуч келиб, ишонч ҳосил қилган.

Бу фикр ҳазрат Данкенга жуда ҳам муҳим ва тўғридек бўлиб туюлди. Миссис Грифитс эса гапини яна давом эттираверди: агар парвардигори оламнинг бирор-бир мўътабар ва одил бандаларидан бири Клайднинг олдига бориб, ўз эътиқоди ва худонинг иродаси билан, шу пайтгача у тушунмай келаётган нарсаларни унинг миясига қуйса борми, Роберта иккаласининг гуноҳи нақадар оғирлиги ва уят-номуслигини, мана шу гуноҳи унинг абадий руҳига бу фоний дунёда ҳам, у дунёда ҳам завол

етказиши мумкинлигини тушунтиrsами, ўшанда у тангрининг марҳаматига илиниб, унга ихлос қўйиб ва уни дилига жо этса, зора шунда у қилган барча гуноҳлар ювилиб кетса, у, яъни миссис Грифитснинг ўзи эса кулфатдан дили хун бўлгани учун ўғлига бирон нарса айтишга ҳам ҳол-жони йўқ. Ахир, унга тўнкашаётган айбни у қилганми ё йўқми, бундан қатъи назар – миссис Грифитс бунинг ёлғонлигига астойдил ишонади! – ҳозир Клайдга электр курсиси хавф солиб турибди, бу дунёдан кўз юмиб, яратган эгам даргоҳига ўлимдан ҳам баттар айб ҳисобланган фаҳш ботқоғига ботган ҳолда бориш гуноҳи хавф солиб турибди, яна бунинг устига унинг фақат Робертага эмас, анави ликурглик бошқа қизга ҳам белафзлик ва мунофиқлик қилган айби тўғрисида-ю, гап очмаса ҳам бўлади. У ўз гуноҳларини бўйнига олиши ва тавба-тазарру қилиши билангина мана шу наҳс нарсалардан покизаланиши мумкин. Ишқилиб, унинг руҳи қутқариб қолинса бас, ана шунда миссис Грифитс ҳам, Клайднинг ўзи ҳам бу дунёдан хотиржам кўз юшилари мумкин.

Хуллас, миссис Грифитснинг Денвердан туриб, ялиниб-ёлвориб, Клайднинг ёлғизлигидан ўксиниб, унинг далда ва насиҳатга муҳтоҷлиги хусусида ёзган иккита хатидан сўнг ҳазрат Данкен Обернга жўнади. Турма бошлиғига ўзининг ташриф буюришидан асосий мақсади – Клайднинг ва онаси ning хотиржам кетиши учун тангри иродас билан унинг руҳини қутқариб қолмоқдиқдан иборатлигини тушунириб айтди-да, Ажал уйига ва Клайд камерасига киришга рухсат олди. Эшикка яқинлашганда, камера ичига ва қўлида китоб ушлаганча каравотида гужанак бўлиб ётган Клайднинг аянчли жуссасига бир разм солиб олиш мақсадида қадамини секинлатди. Сўнгра у новча, ориқ гавда-

си билан панжара темирига суюнди-да, дуохонлик жазаваси тутиб, түгридан-түгри ваъз бошлади:

– «Э, худо, ўзинг раҳм эт, марҳаматинг кенг, саҳоватинг кенг, ўзбошимчаликларимни авф эт.

Менинг танимдан ўзбошимчаликларни ювиб-ювиб ташла ва мени гуноҳларимдан халос эт.

Инчуин, ўзбошимчаликларимни бўйнимга оламан ва гуноҳим ҳар доим олдимда...

Ёлғиз сенинг олдингда гуноҳкорман ва мугомбирликни сенинг кўз ўнгингда қилдим, демакким, сенинг ҳукминг барҳақ ва сенинг изминг гардсизdir.

Мана, мен ўзбошимчалик ботқоғига қўмилганман, онамдан гуноҳкор банда бўлиб туғилганман.

Мана, сен ҳақиқатни юракдан севдинг ва менинг ичимда донишмандлигинг юз кўрсатди.

Мени савоб сувига пурка, шунда мен поки-за бўламан; мени юв, шунда мен қордан ҳам оқ бўламан.

Қувонч ва хушчақчақдикни менга рўшно қилки, сен парчинлаган устихонларимга яна жон кирсин.

Менинг гуноҳларимдан юзингни ўтирилган ва барча ўзбошимчаликларимни ўзинг текисла.

Эй, парвардигор, менда бир покиза юрак ярат, кейин ичимда ҳақиқат руҳини янгила.

Ўз меҳригиёингдан мени бенасиб этма ва мендан муқаддас руҳингни тортиб олма.

Нажотинг қувончини менга қайтариб бер ва улуғворлик руҳи билан мени омон сақла.

Ўзбошимчаларни сенинг йўрифингга соламан, кейин у гумроҳлар ҳам сендан паноҳ излагайлар.

Бир қошиқ қонимдану жонимдан кеч, э, худо, ўзинг раҳм эт, менинг нажотгўй танглим, кейин менинг тилим сенинг ҳақиқатингни улуғлагай.

Э, парвардигор! Тилимга жон бер, кейин шу тилим билан сенга ҳамду сано айтгайман.

Инчунин, мен қурбон бўлишга ҳам тайёрман, аммо сен раҳмдилсан, қурбон тиламайсан; ўзимни ёндириб ташлашимни сен раво кўрмайсан.

Худо йўлида қурбон бўлган банда – вайрон бўлган руҳdir; вайрон бўлган юракдан ва тавба қилган бандангдан ҳазар қилмагайсан, ё худойим».

У ўзининг ниҳоятда сероҳанг, гоят ёқимли овози билан 50-сурани охиригача ўқиб бўлиб, жимиб қолди. Бу пайтда Клайд бутунлай ҳайратга тушганча аввалига каравотига омонатгина ўтириди-да, кейин ёшларга ўхшаш хушқомат, гарчи ранги сўлғин бўлса ҳам, кўринишидан бақувват бу одамнинг жозибали қиёфаси уни ўзига жалб этди-ю, ўрнидан туриб, эшик яқинига борди, унинг меҳмонлигини сезиб бошини кўтарди, Мак-Миллан эса давом этди:

– Клайд, мен сизга худонинг марҳамати ва нажотини келтирдим. У мени шунга даъват этган эди, мана, мен шу ердаман. Парвардигор, агар гуноҳларингиз қондек қизил бўлса, қордек оқ бўлажагини айтишим учун мени сизга йўллади. Агар улар аргувондек қирмизи бўлсалар, марвариддек оқقا айланадирлар. Келинг, яратган эгамнинг кучи ва қудрати борасида бир ўйлашиб кўрайлик.

У Клайдга очиқ чеҳра билан тикилганча, индамай қолди. Лабларида эса қувноқ, ёшликка хос хиёл кулимсираш ўйноқлаб турар эди. Клайднинг навқиронлиги ва вазминлиги унга ёқиб тушган эди, Клайд ҳам ўз навбатида кутилмаган бу меҳмоннинг меҳригиёсига борган сари асир бўлаётган эди. Ҳали янги поп, албатта. Аммо у турмадаги протестант руҳонийсига қараганда мутлақо бошқача эди, турма руҳонийсида одамни ўзига тортадиган ё мойил қиладиган зифирдек ҳам фазилат йўқ эди.

— Менинг исмим Данкен Мак-Миллан, — деди у, — Сиракузаданман, ўша ерда худо йўлида қимирлаб юрган бир бандаман. Мени бу жойга тангри йўллади, онангизни ҳам менга ўша йўлиқтириди. Онангизнинг сўзларидан, у сизнинг ишингиз хусусида қандай фикрдалигини англаб олдим. Сиз ўзингиз нима деганингизни эса газеталардан билдим. Бу ерда нима сабабдан ўтирганингиз ҳам менга маълум. Лекин бу ерга мен сизга қувонч ва руҳий хушнудлик бахш этиш учунгина келганман.

Кейин у даб-дурустдан 12-суранинг учинчи оятини ўқий бошлади:

— Туну кун қалбимда мотаму, токайгача дилимда насиҳат тўқийман». Бу ўн иккинчи суранинг учинчи ояти. Яна ёдимга тушган мана бу сўзларни ҳам тингланг, бу сўзларни сизга мен албатта айтишим шарт. Бу ҳам тавротдан — тўққизинчи сура: «Юрагида шундай дер эди: иккиланмайман; бутун уруғ-аймоғим ёмонликдан нари турғай». Аммо сиз, мана, ёмонлик тузофига илинибсиз. Ҳаммамиз ҳам гуноҳкор бандалармиз, ҳаммамиз ҳам бундан холи туролмаймиз. Тағин мана бу сўзларни эшитсангиз, сизга нафи тегиб қолар, бу тўққизинчи суранинг ўттиз иккинчи ояти: «Юрагида шундай дер эди: «худо унутди, ўз юзини яширди, ҳеч қачон кўрмайди». Бироқ менга, худо сиздан юз ўғирмаганлиги ни айтиб қўйиш буюрилган. Менга яна сиз учун ўн еттинчи сурадан қўйидаги сўзларни келтириш ҳам буйруқ қилинган:

«Мусибатли кунимда улар менга қарши исён қилдилар, аммо парвардигор менинг мадорим бўлди.

У фалакдан қўлларини узатди ва мени олди ва мени кўпчиликнинг сувларидан тортиб чиқарди; у мени, менинг кучли душманимдан ва мендан қўли баланд ичи қоралардан халос этди.

У мени кенг жойга олиб чиқди ва мени қутқарди; инчунин, у мендан марҳаматини аямади».

Клайд, бу сўзлар айни сизга аталган сўзлардир. Улар шу ерда сиз билан сухбатлашиб ўтирган пайтимда, тўппа-тўғри тилимга келяпти, гўё уларни кимдир шивирлаб эсимга солаётгандай. Мен, бевосита сиз учун айтилган шу сўзларни сизга етказувчи бир воситачиман, холос. Яхшиси, ўз дилингиздан маслаҳат сўранг. Зулматдан туриб ёғдуга қараб илтижо қилинг. Келинг, қайғу ва ҳасрат кишанларини узиб ташлайлик; зулмат ва кўланкаларни нари ҳайдайлик. Сиз гуноҳ қилдингиз. Лекин тангри гуноҳингиздан кечиши мумкин ва кечади ҳам. Тавба денг. Бу фоний дунёни яратган ва уни ушлаб турган парвардигорга сажда қилинг. У сизнинг хутба-дуоларингизни рад этмагай ва имонингизга шак келтирмагай. Шу тор деворлар ичida туриб, яратган эгамга ялиниб-ёлворинг – дилингизда: «Э, худо, менга мадад бер! Э, худо, хутба-дуоларимга қулоқ сол! Э, худо, кўзларимга нур бафишла!» деб айтинг.

Ёки сиз худо йўқ, у сизга жавоб бермайди, деб ўйлайсизми? Сифининг. Бошингизга мушкул иш тушганда мендан ҳам, бошқа ҳеч кимдан ҳам эмас, фақат парвардигордан мадад сўранг. Яккаю ягона яратганга сажда қилинг. Сифининг. У билан мулоқотда бўлинг. Даргоҳига сўроқлаб боринг. Бор ҳақиқатни гапириб, ундан мадад сўранг. Агар ўзингиз қилган гуноҳни бўйнингизга олиб, чин дилингиздан тавба-тазарру этсангиз, сиз чиндан ҳам, чиндан ҳам худонинг нафасини эшитасиз, уни сезасиз, бу, худди ҳозир мен рўпрангизда турганимдек аниқ бир ҳодисага айланади. У қўлингиздан тутади. У шу камерага ҳам қадам ранжида қилиб, дилингизга киради. Сиз буни

ақлингиз ва юрагингизга қуиилиб бораётган нур ва оромдан сезиб турасиз. Сифининг. Мабодо сизга бирор-бир фойдам тегиб қолишига кўзингиз етса – биргалашиб дуо ўқишми, майда-чуйда хизматми, вақти-вақти билан ёлғизлигингизни билдиримай туришликми – атиги бир оғиз, жуда бўлмагандан почта открытиаси биланоқ мени йўқлатсангиз борми, ўша заҳоти ҳузурингизга етиб келаман. Мен онангизга сўз берганман ва имкониятим борича ҳамма ёрдамимни аямасликка ҳозирман. Турма нозирида манзилим ҳам бор.

У, охирги сўзларини айниқса қатъият билан дона-дона қилиб гапирди-да, тўхтади, чунки Клайднинг нигоҳида ҳали ҳам қизиқсиниш ва ҳайратдан бўлак бирор-бир жиддийроқ туйфуни учратиш қийин эди.

Аммо Клайднинг ёш, деярли болаларча қиёфаси ва онаси ташлаб кетгач ҳамда Николсон қатл этилгач, бир бечораҳол, ожиз аҳволга тушиб қолганини кўрган Мак-Миллан ўша ондаёқ яна қўшимча қилди:

– Эсингизда бўлсин, мен ҳамма вақт сизнинг ихтиёрингиздаман. Сирақузада ҳам юмушларим кўп, аммо нима биландир сизга ёрдамим тегишини билишим ҳамоно, ҳар қандай ишимни ҳам ийишистириб қўйишим мумкин.

Шу сўзларни айтгач, у худди кетмоқчилик изига бурилди. Бироқ Клайд унга мафтун бўлиб қолганидан, ўзини турмада тўхтовсиз азоблаб келаётган доимий вассваса, даҳшат ва ёлғизликни шу бир руҳоний ўзгача ҳаёт, ишонч ва меҳрибонлик билан алмаштириб юборгандек бўлди. Мак-Милланнинг орқасидан хитоб қилди:

– Кетмай туринг! Илтимос, кетманг. Мени кўргани келиб, шунчалик илтифот билдирибсизки, бунинг учун сиздан миннатдорман. Келиб қолишин-

гиз мумкинлиги ҳақида онамдан ҳам хат олган әдим. Бу ер, биласизми, жудаям зерикарли. Балки мен сиз ҳозир айтган нарсалар устида чиндан ҳам у қадар бош қотириб күрмагандирман, аммо бүннинг сабаби шундаки, менга тўнкашаётган айбда ўзимни сира ҳам гуноҳкор деб ҳисобламайман. Лекин мен кўп нарсалардан афсус қиласман. Кимки шу ерга тушибдими, шубҳасиз, оғир азобини ҳам тортади.

Унинг кўз қарашлари фамгин ва ташвишли эди.

Мак-Миллан шундагина юрак-юрагидан, чина-камига таъсирланиб кетди-ю, жавоб беришга шошилди:

– Фам чекманг, Клайд. Бир ҳафта ўтар-ўтмас ҳузурингизга яна келаман, кўриб турибманки, сизга керак эканман. Мен сиздан, Роберта Олденнинг ўлимидагуноҳкор бўлганингиз учун ибодат қилинг, деб сўраётганим йўқ. Мен буни билмайман. Сиз ҳали менга ҳеч нарсани гапириб бермадингиз. Барча гуноҳларингиз ва барча уқубатларингиз фақат ўзингизга-ю, фақат яратган эгамгагина маълум. Аммо сиз маънавий мададга муҳтож одамсиз, бу мадад эса сизга нақд турибди – менга ишонаверинг! «Шунда худо азобланувчига паноҳ, бошига мушкул иш тушган онида паноҳ бўлгай».

У худди Клайдни чиндан ҳам яхши кўриб қолгандай, майин кулимсиради. Клайд ҳам ўзи ҳайрон бўлгани ҳолда, ҳозирча унга ҳеч нарса керак эмаслиги, фақатгина соғ-саломат юрганини онасига хабарлаб қўйишини, агар иложи бўлса, у бечорага озгина далда беришини ҳам илтимос қилди. Ахир, онасидан ниҳоятда оғир хатлар келяпти. У Клайдни ўйлаб, жуда кўп азоб чекяпти. Очиги-ни айтадиган бўлса, кейинги кунларда Клайд ҳам ўзини анча ёмон ҳис этяпти – ҳамма вақт юраги

қисилиб, ваҳимада яшайди. Ишқилиб, бирон кор-ҳол бўлмаса гўрга эди. Худо ҳақи, агар дуо ўқиш билан юраги ақалли, салгина ором олса ҳам, у жонжон деб саждага бош уриши мумкин. Онаси ҳар доим унга хутба-дуоларни ўргатишга ҳаракат қилиб юрарди-ю, лекин у бу насиҳатларга қулоқ солмас эди, энди эса, Клайд шуларни ўйлашга ҳам уялади. Клайднинг кўриниши қайфули ва сўлғин эди – унинг юзи аллақачоноқ маҳбусларга хос заҳил тусга кирган эди.

Ҳазрат Данкен Мак-Миллан унинг гарифона аҳволидан жуда қаттиқ таъсирланиб кетди-ю, шундай жавоб қилди: – Ҳечқиси йўқ, Клайд, фам еманг. Мана кўрасиз, дилингизга осойишталик ва роҳат-фароғат ёғилиб киради. Бунга мен шубҳа қилмайман. Кўриб турибман, сизда таврот бор экан. Истаган сурангизни очингу ўқишга тутилинг – эллик биринчи сурани, тўқсон биринчи сурани, йигирма учинчи сурани ўқиб чиқинг. Иоанндан қолган инжилни очиб, бошидан охиригача мутолаа қилинг. Фикр юритинг ва худога сифининг, атрофингизда сизни ўраб турган нарсалар: юлдузлар ва қуёшу ой ҳақида, дараҳтлару денгизлар, дукиллаб уриб турган юрагингизу ўз танангиз, куч-қувватингиз ҳақида фикр юритинг ва ўзингизга савол беринг: шуларнинг барини, хўш, ким яратган? Ҳаммаси қаердан келиб қолган? Борди-ю, жавоб тополмасангиз, ўзингиздан яна қайта сўранг: шунча нарсаларни – шу жумладан, сизни ҳам яратган ўша куч – майли кимлигидан қатъи назар, қаердалигидан қатъи назар, сиз ёрдамга муҳтоҷ бўлган бир пайтингизда сизга ақд ва тоқат беришга, сизни юпатишга ва сизга тўғри йўл кўрсатишга наҳотки унда донишлигу раҳмашафқат ва қудрат етишмаса? Аввал ўзингиздан сўранг: кўз

олдингизда ястаниб турган шу оламнинг ижодкори ким ўзи? Кейин эса бутун бор нарсаларнинг ижодкорига мурожаат этинг ва қандай йўл тутиш ҳамда нима қилиш кераклиги хусусида яратгандан жавоб изланг. Шубҳаларга сира берилманг. Астойдил сўрасангиз, жавобини оласиз. Туну кун тинмай сўранг. Бошингизни саждага қўйиб дуо ўқинг ва кутинг. Сизни у асло ноумид қолдирмагай. Мен биламан, чунки мен ҳам дилимни худди шундай хотиржам айлаганман.

У Клайдга гўё ўз эътиқодини сингдирмоқчи бўлаётгандай қаттиқ тикилиб турди, сўнгра бир жилмайиб қўйди-ю, нари кетди. Клайд эса панжараага суянганча ўйга ботиб қолди, Яратган эгам! У, Клайдни ҳам яратиби! Оламни ҳам яратиби!.. Сўрасанг, жавобини оласан.

Лекин, ҳар ҳолда динга ва унинг оқибати бўлган – отаси билан онасининг доимий бенаф дуогўйлари ва ваъзхонликларига нисбатан ўша аввалги шубҳалари Клайдни ҳали ҳам тарк этмаган эди. Оғир ва даҳшатли кунга тушиб қолгани учунгина, наҳотки, у ҳам энди келиб-келиб диндан таскин излаши керак? Э, йўқ. Ҳарқалай, бутунлай берилиб кетиши даргумон унинг.

Аммо шунда ҳам, ҳазрат Данкен Мак-Миллан, унинг жўшкинлиги, имонининг илҳомбахш кучи, ёшларга хос хушбичим жуссаси, юзи, кўзлари – мана шуларнинг бари Клайдни ўзига ром этиб олган эди, шу пайтгача у ҳеч бир руҳоний ёки дин аҳбобидан бунчалик таъсиранмаган эди. Ҳазрат Мак-Милланнинг ишончи ва имони уни фоят қизиқтириб, ўзига асир этиб, гўё бутунлай ақлинни олиб қўйгандек эди, ваҳоланки, у қачонлардир ўзи ҳам шунақсанги эътиқодли бўла оладими ёки йўқми, буни билмас эди.

## XXXII БОБ

Бундан атиги бир ярим йиллар бурун Клайд-ни ҳазрат Мак-Милланга ўхшаш кимсалар руҳий тетиклиги ва диний эътиқоди билан енга олишига одамнинг сира кўзи етмас эди (чунки у болаликдан бу хил нарсаларга кўникиб кетган эди), аммо ҳозир эса у Клайдга мутлақо бошқача таъсир этди. Турмушдан ажралиб, қафасда ўтирган кўйи, чекланган турма ҳаёти туфайли у ўзи учун юпанч ва паноҳни энди ҳаёлидагина излашга, хоҳласа-хоҳламаса ўз ўтмиши, бугуни ёки эртаси ҳақида ўйлашга мажбур эди; бошқа ҳар қандай одам ҳам шундай аҳволга тушса, худди шу йўлни тутган бўлар эди. Бироқ ўтмишини эслаш ниҳоятда оғир эди. Эслаган сари юрак-бағри куйиб, ўртаниб борар эди. Бугуни (уни бевосита ўраб олган ҳозирги шароити) ва келажаги эса даҳшатли оқибатдан дарак берар, хиёл равшанлашиб бораётган онги норозилик аризасининг бенаф бўлиб чиқишидан саросимада эди.

Хуллас, хавотирга чўмган ақд-фаросат қайта уйғонгандан рўй берувчи воқеа юз берди. Қўрқув ёки нафрат оқибатида туғиладиган чорасизлик ҳолати зигирдаккина умидга ҳам ёки ёлғондакам юпанчга ҳам маҳкам ёпишиб олади. Аммо Клайд нимадан ҳам умид қилиши, нимани ҳам ўйлаши мумкин эди? Николсон айтган фикрга кўра, қутулишининг фақат биргина йўли бор эди, ишининг қайта кўрилиши ҳақида қарор чиқарилиши керак эди, агар иккинчи суд уни оқласа, унда у узоқ-узоқларга – Австралиягами, Африка ёки Мексикагами бош олиб кетиб, у ерда киборлар давраси билан боғлиқ бўлган ва Клайдни яқингинада ҳам ўзига жалб этиб келган шуҳратпарастлик даъволарининг барини бир четга йифиштириб қўйиб, бошқа ном

остида, ҳаётини «оч қорниму тинч қулоғим» қилиб янгитдан бошлаб юборар эди. Бироқ бу умидбахш хаёлларнинг йўлини даҳшатли кўланка тўсиб турар эди – олий суд ишнинг қайта кўрилишига эътиroz билдириши мумкин эди. Брижбургдаги суддан сўнг, буни бемалол кутса бўлар эди. Тўсатдан шу пайт, ҳў бир марта тушида кўргани – фуж-фуж илонлардан тисарилиб, шоҳдор бир маҳлуққа дуч келиб қолганидек, кўз ўнгида яна бир даҳшатли шарпа – йўлак охиридаги бўлмада турган курси намоён бўлиб кетди. Анави қурси! Ажал уйидаги чироқларни бир маромда липиллатган камар билан электр қувватини айтмайсизми. Қачонлардир, қачонлардир ўзи ҳам ўша хона остонасидан ичкарига ҳатлаб ўтиши зарурлигини ўйлаганида, нақ ақлидан озиб қолаёзди. Қанча уринишмасин – норозиликлари бари бир рад жавобини олса-я? Йўқ! Бу ҳақда ўйламагани ҳам маъқул.

Ҳа, шуни ўйламаса, бошқа нимани ўйлади, хўш? Клайдни худди мана шу нарса азоблаб турган бир пайтда ҳазрат Данкен Мак-Миллан кириб келди-ю, Клайдни тўғридан-тўғри бутун мавжудот ижодкори худога илтижо қилишга ундали, (унинг фикрича) худо унга, сўзсиз, жавоб қайтарар эмиш. Шу қадар оғир муаммо шу қадар осон ҳал бўлишини қаранг.

«Сизлар илоҳий оламни билишингиз мумкин», дея ташвиқ қилган эди Мак-Миллан, апостол Павелнинг сўзларини келтириб, кейин коринфликлар, галатлар, ефесликларга йўлланган номадан айрим парчаларни ўқиб бериб, агар Клайд унинг ҳамма талабларини адо этишга кўнса ва тангрига сифинса, унда у «ҳар қандай ақддан ҳам юқори турувчи илоҳий олам»ни осонгина тушуниб етгай ва ундан роҳат-фароғат олгай, деган эди. Чунки бу фоний дунё у биландир ва унинг атрофидадир. Фақат излаш лозимдир; қалбнинг заифликлари ва

адашувчанчиликларини ақд билан тан олиш ва тавба-тазарру қилмоқ лозимдир. «Сўранг, шунда сизга бериладур; изланг, шунда сиз топурсиз; тақиллатинг, шунда сизга эшикни очгайлар. Инчунин, ҳар қандай сўровчи сўраганини одур; изловчи топадур; тақиллатувчига эшик очиладур. Ораларингизда ўғли нон сўраганда, наҳотки, қўлига тош тутқазган бирор-бир кимса бўлса? Ёки балиқ сўраганда, илон тутқазганлар борми?» – шу зайдада у диққат ва илҳом билан муқаддас сўзларни такрорлади.

Лекин шунга қарамай, отаси ва онасининг ахволи Клайднинг кўз ўнгидан сира нари кетмас эди. Хўш, улар дунёдан нима орттиридилар ўзи? Художўйликлари ҳам унчалик ёрдам бермади-ку, ахир. Мана шу ерда ҳам дуогўйлик маҳбус биродарларига бирор-бир наф келтираётганини ҳозиргача у билаётгани йўқ, ваҳоланки, уларнинг кўплари ҳар куни турмага галма-галдан келадиган католик руҳонийси, яхудий руҳонийси ва протестант руҳонийсининг дуолари ва панд-насиҳатларини жон қулоқлари билан тинглаб ўтиришар эди. Бари бир, уларнинг ҳар бири ҳам вақти соати етиб келганда – бирори зор-зор қақшаб, бирори норозилик билдириб, бирори Кутронедек ақлидан озиб, бирори пинагини ҳам бузмай – ажалига томон бораверди. Клайд масаласига келганда эса, ҳали шу пайтгача у попларга сира аҳамият бермаган эди. Бемаънилик! Хаёлпарастлик! – деб қарап эди у. Хўш, нима учун? Бунинг сабабини айттолмаган бўлар эди. Лекин мана, ҳазрат Данкен Мак-Миллан. Унинг очиқ, беозор чеҳраси. Унинг мусиқий овози. Эътиқоди. Мана шу эътиқоди Клайдни ўзига жалб этди-ю, уни қизиқтириб қўйди. Эҳтимол... эҳтимол... У шу қадар ёлғиз, шу қадар баҳтсиз, шу қадар ёрдамга илҳақки...

Чиндан ҳам у (Мак-Милланнинг панд-насиҳатлари ҳалитданоқ таъсир этиб улгурган эди) ўз ҳаётини бошқачароқ, одоблироқ ўтказганда эди, онасининг гапларига, йўл-йўриқларига қўпроқ қулоқ солганда эди, Канзас-Ситидаги анави исловатхонага бормаган, Гортензия Бригснинг, кейинроқ эса Робертанинг кетидан чопиб, хиралик ҳам қилмаган бўлар эди, кўпчилик одамлар қатори фақат хизмати-ю бойлик ортириш ҳақида ўйлаб қўя қолар эди, ана унда Клайднинг ошиғи олчи эди. Аммо, иккинчи томондан эса, одамда ўзи енголмайдиган ўжар хоҳиш ва интилишлар борлигини ҳам инкор этиб бўлмас эди. Шу нарсалар уни ўйлашга мажбур этар эди. Лекин бундай туйфулар бошқа кўпгина одамларни, масалан, онаси, амакиси, амакиваччаси, анави попни ҳам ташвишга солмайди-ку, ахир. Ҳарқалай, гоҳо-гоҳо пайтларда у, уларга ҳам ўшандай эҳтирос ва хоҳишлар балки ошнодир, бироқ уларнинг руҳий ва маънавий иродалари кучли бўлгани учун ўз туйфуларини осонгина боса олсалар керак, деб ўйлар эди. Эҳтимол, Клайд ўша фикр ва туйфуларига ортиқча эрк бериб юборган бўлиши ҳам мумкин, онаси ҳам, Мак-Миллан ҳам, қамоққа тушганидан бери нутқини эшиштаётган барча кишилар ҳам, ҳойнаҳой, шундай деб ҳисоблашаётгандир.

Хўш, шуларнинг барини қандай тушунса бўларкин? Худо борми ўзи? У мистер Мак-Миллан айтганидек, одамларнинг иши ва қилмишларига аралашдими? Бошингга оғир иш тушганда, гарчи ўзинг авваллари сира ишонмаган бўлсанг-да, тангрига ёки бошқа қандайдир бир илоҳий кучга илтижо этиб, ундан ёрдам сўрашинг мумкинмикан? Ёлғизликда қолган, ҳамма унуган ва қонун исканжасига, одамларнинг эмас (чунки атрофингдаги кишиларнинг бари шу қонун хизматкорлари дидирлар),

балки қонун исканжасига тушган пайтингда ёрдамга ниҳоятда муҳтож бўласан. Аммо ўша илоҳий қудрат кўмаклашишни истармикин? У аслида ўзи бормикин, одамларнинг нола-фифонларини эшистармикин? Ҳазрат Мак-Милланнинг гапига қараганда, бор эмиш, эшитар эмиш. «У дер эди: худо унутди; ўз юзини яширди. Аммо худо унутмади. У ўз юзини яширмади». Бироқ чиндан ҳам шундаймикин? Шунга ишонса бўлармикин? Ўлим хавфидан эзилган, моддий жиҳатдан бўлмаса ҳам, маънавий жиҳатдан бир далдага чанқоқ бўлган Клайд бундай ҳолга тушган ҳар қандай киши ҳам шуғулланадиган иш билан машғул бўлди: у ўзига кўмак бера оладиган ва шуни истайдиган қандайдир ақалли файритабиий шахс ва қудрат белгиларини излар, излаганда ҳам орқаваротдан туриб, ўзини у ёқдан бу ёққа отганча деярли кўр-кўронада бир тарзда излар эди; шундан сўнг у, инсон хислатлари ва хусусиятлари илоҳиёт қўлидадир, деган фикрга мойил бўла бошлади, ваҳоланки, у илоҳиётни эса дин тавсиф этган шаклдагина билар эди, холос. «Фалакиёт тангрига мадҳия эълон қилади, кейин қаттиқ ер худонинг меҳнати билан мева пайдо қиласди». Клайд онаси бошқарган хонақо деразасига шу сўзлар ёзилган каттакон қофоз ёпиштириғлиқ туришини эслаб қолди. Яна бошқасини: «Инчунин, у сенинг ҳаётингдир ва кунларингнинг ўлчовидир», деганини ҳам хотирлади. Аммо, ҳарқалай, ҳатто ҳазрат Данкен Мак-Милланга бирдан мойиллашиб қолганига ҳам қарамай, наҳотки у, қайсиридир бир дин уни баҳтсизликдан қутқариб қола олишига чиндан ҳам ишонса?

Бироқ вақт ўтиб борар, ҳазрат Мак-Миллан ойида камида икки марта, баъзан эса ҳар ҳафтада Клайдни кўргани турмага келар, унинг ҳол-аҳволини суриштирас, арз-шикоятларини тинглар,

ўзини ҳам жисмоний, ҳам руҳий бардам тутиши учун ўгит-насиҳатлар берар эди. Клайд ҳам бу ҳамдардлик ва учрашувларни йўқотиб қўйищдан қўрқиб, тобора ҳазратнинг дўстона таъсирига берилиди. Бу одамнинг иродаси, руҳи баландлиги... Ажойиб овозини айтмайсизми. Сўнгра, у ҳамма вақт тўппа-тўғри юракка қўйиладиган сўзларни топар эди. «Биродарлар, биз ҳаммамиз – худонинг бандаларимиз. Охиратда ким бўлишимизни ҳам билмаймиз; фақат шуни биламизки, агар парвардигор инобатга олса, биз ҳам унга ўхшайдурмиз ва инчунин, у қандай бўлса, биз уни ўшандай кўргаймиз. Шундай умиди бўлган ҳар бир банда ўзини поклаши даркордур, негаки парвардигорнинг ўзи ҳам покиза».

«Биз – унда, у эса – биздалигини билурмиз ва инчунин, бизни у ўз нафасидан бунёд этгандир».

«Ва инчунин, бизнинг қадр-қимматимиз бордир».

«У ўз ихтиёрига кўра бизни ҳақиқат сўзи ила дунёга келтирди, кейин биз у яратган борлиқ тирик жонзот ичиндаги бамисоли дастлабки мевалярдирмиз. Кейин ҳар қандай яхшилик ва ҳар қандай етук қобилият осмондан ва бутун дунёларнинг отаси томонидан берилганки, булар на ўзгаришларни билади, на қиттай эскиришларни».

«Тангрига яқинлашинг, шунда у ҳам сизларга яқинлашади».

Клайд айрим пайтларда шу илоҳий кучга сифина туриб, осойишталик ва хотиржамликка, ҳатто – ким билади? – тўппа-тўғри ёрдамга ҳам эришиш мумкин, деган фикрга ишонгиси келиб кетар эди. Ҳазрат Мак-Милланнинг қатъияти, диққат-эътибори унга шу қадар таъсири ўтказиб юборган эди.

Аммо орада тавба-тазарру қилиш, яъни айбга иқрор бўлиш масаласи ҳам бор эди. Бироқ кимга

иқрор бўлиши керак? Кўриниб турибди, ҳазрат Мак-Милланга-да. Ҳазрат Мак-Миллан ўзига ёки ўзига ўхшаш бирорта руҳонийга, ишқилиб, худонинг чинакам ихлос қўйган умматига Клайд ўз кўнглидаги сирларини тўкиб солмоқчилигини ҳам сезгандай бўлди. Лекин мушқуллик ҳам айни шу ердан чиқди. Хўш, у судда айтган ва норозилик аризасининг асосий мағзини ташкил этган анави уйдирма гувоҳдиги нима бўлади унда? Норозилик шикоятини жўнатиб қўйишган ҳозирги кунда, энди у ўша гувоҳдигидан воз кечсинми? Яхиси, бир оз сабр қилиб, нима гап бўлишини пойлаб турган маъқул-ку.

Оҳ, у қанчалар ожиз иккюзламачи, бетайин, соxта одам-а! Парвардигори оlam энди мана шундай майдагап кимса билан ювора бўлиб ўтиармиди. Йўқ, йўқ! Бу ҳам адолатдан эмас. Агар унинг фикрларидан ҳазрат Мак-Миллан боҳабар бўлгандами, унда у нима деб ўйлаши мумкин эди?

Лекин миясида тағин қайтадан ваҳимали савол түғилар, гуноҳкорманни ёки йўқми, агар гуноҳкор бўлсан, қай даражада гуноҳкорман, дея бош қоти-рар эди. Аввалига Робертани ўлдиришни чиндан ҳам ният қилганини у яхши билар эди, албатта, бу ниятидан ҳозир ўзи қўрқиб кетди. Чунки энди у Сондра ишқида телбанамо юрган пайтларидағи бемаъни зиддиятлар ва эҳтирослар тӯфонидан анча-мунча қутулиб, бу ҳақда фикр юритиш қобилиятига ҳам эга бўлган эди, ваҳоланки, Сондра билан учрашган вақтларида жони чексиз азобда, ўзи эса савдоиiga ўхшаб қолган эди. Мана энди бўлса, ўша беҳалогат, даҳшатли кунларида, у ўз иродасидан ташқари, эҳтиросдан обдан куйиб-ёнган экан (буни у Белнеп нутқидан сўнг равшан тушуниб олди), аслида эҳтирос ҳаловатсизлиги ҳам қандайдир руҳий бир бетобликка ўхшар экан ўзи... Гўзал

Сондра! Танҳо Сондра! Унинг жилмайишларида қанчалар сеҳргар құдрат ва чүфдек олов бор эди ўшанда. Ҳатто ўша аланга Клайдда ҳали ҳам ўчганича йўқ – орада ўтган шунча даҳшатли воқеаларни ҳам писанд қилмай, ҳалигача мильтилаб чўғ олиб турибди у.

Шунинг учун ҳам очиқчасига тан бериш керакки, агар Клайдни ўша эҳтирос шайтон вассасасига ўхшаб чирмаб ташламаганда эди, унда ҳеч қачон, ҳеч қандай шароитда ҳам одам ўлдириш, яна қиз болани, тағин Робертадек қизни ўлдиришдек ёвуз ният ва фикр унда туғилмаган бўлур эди. Лекин Брижбургда бу баҳона билан ҳисоблашишмади-ку. Хўш, юқори суд қандай қарапкин бунга? Наҳотки, Клайд чиндан ҳам ҳамма нарсада айбдор бўлса? Ҳазрат Мак-Милланми ёки бошқа бирор одамми, содир бўлган барча воқеаларни Клайддан муқаммал эшигтгач, шу саволга жавоб берармикин? У ҳазрат Мак-Милланга бир ичини ёргиси – бор гапнинг барини бўйнига олиб, ҳақиқат қаерда-ю, ноҳақдик қаердалигини узил-кесил аниқлаб олгиси келар эди. У Сондра туфайли ёвуз бир жиноят қилмоқчи бўлди-ю, аммо оқибат-натижада уни амалга оширолмади ахир, майли, буни одамлар билмаса, худонинг ўзи билар. Судда эса бу тўғрида лом-мим дейилмади, чунки ҳимоя учун танланган сохта йўл ўша пайтда бутун ҳақиқатни очиқ айтишга имкон бермади, бу ерда эса айбни анча енгиллаштирадиган важ-баҳона турибди, лекин буни ҳазрат Мак-Миллан тушуниб етармикин? Жефсон Клайдни ёлғон гапиришга мажбуrlаган эди. Лекин ҳақиқат ҳақиқатлигича қолаверади-ку бари бир?!

Ўзининг ўша ваҳший, бераҳм ниятини ўйлар экан, орада ниҳоятда чалкаш ва зиддиятли шарт-шароитлар ҳам бўлганлигини аниқ эслаб

ди-ю, уларни шунчаки менсимай ўтиб кетиш нотүгри эканлигини ҳам тушунди. Ўша шарт-шароитлардан энг муҳими иккита эди: биринчидан, у Робертани анави кўлнинг олис, кимсасиз кўрфазига олиб борганида, бирдан ўйлаган ниятини амалга оширомаслигига кўзи етди-ю, ўзидан-ўзи шу қадар аламли ва чорасизларча нафратланиб кетдики, натижада Робертани қўрқитиб юборди ва шу қилмиши билан уни ўрнидан туриб, ўзи томонга қараб келишга мажбур этди. Ана шунда у Робертани тўсатдан уриб юборди, хулласи калом, қарабсизки, у мана шу зарбаси билан маълум даражада айбдордир – шундай эмасми, ахир? – шу жиҳатдан олиб қараганд, бу зарба жиноий ҳисобланса керак. Эҳтимол. Ҳазрат Мак-Миллан бунга нима деркин? Иккинчиси эса: модомики, Роберта Клайд урган зарбадан сувга қулаб тушган экан, демак, унинг йиқилишига Клайд айбдор бўлган. Ҳаммасидан ҳам кўра энди уни юз берган баҳтсизликдаги ўзининг мана шу ҳақиқий, ростакам гуноҳкорлиги хусусидаги фикр кўпроқ азобга солаётган эди. Тўғри, судда Оберуолцер (унинг Робертадан нарилаб сузиб кетгани ҳақида гап берган пайтда), агар марҳума сувга бехосдан қулаб тушган бўлса, айбланувчининг унга кўмаклашишни истамагани ҳали жиноят эмасдир, деб айтди, лекин энди Клайднинг ўзи Робертага нисбатан аввалги барча муносабатларини шу воқеа билан қиёслаб кўрди-ю, бари бир бу ерда жиноят бор эди, деган фикрга келди. Ахир, худо – ёки Мак-Миллан ҳам – шундай деб ўйламайдими, хўш? Мейсон суд муҳокамасида жуда тўғри кўрсатиб берди – у Робертани бемалол қутқара олиши мумкин эди. Бу воқеа Сондра билан ёки ўша Робертанинг ўзи билану, аммо ўтган ёзда юз берганда ҳам, шубҳасиз, у қутқариб қолган бўлар эди. Бунинг устига,

мени сув остига чўқтириб юбориши мумкин эди, деб қўрқиши йигит кишига сира ярашмайдиган гап! (Буларнинг барини Клайд Мак-Миллан уни тавба-тазарру қилишга ва парвардигор билан ярашишга ундаи бошлагандан сўнг, тун бўйи ўйлаб чиққан, ўзи билан ўзи баҳслашган эди.) Ҳа, у буни бўйнига олиши керак. Агар Сондра бўлганда-ю, ўша заҳотиёқ уни қутқаришга отилар эди. Демак, Клайд Мак-Миллан олдидами ёки одатда афв сўрадиган бошқа одамлар олдидами, тавба-тазарру қилишни ўйлаётган экан, бояги гапни барада тан олиши... эҳтимол, кўпчилик олдида очиқчасига тан олиши лозимдир? Лекин бунақанги тавба-тазарру, агар чиндан ҳам шундай қилинадиган бўлса, Клайдни узил-кесил ва бутунлай жиноятчига чиқариб қўйиши турган гап эди. Наҳотки, у ўзини шундай гуноҳкор ҳисоблаб, ўлиб кетаверишга рози бўлса?

Йўқ, йўқ, яна бир оз, ақалли юқори суд қарори чиққунгача сабр қилган маъқул. Таваккалнинг нима ҳожати бор? Бари бир худонинг ўзи ҳамма нарсани билиб турибди-ку. Клайд ўтган воқеаларнинг баридан ниҳоятда, ниҳоятда афсус чекар эди. Қилган ишининг қанчалар даҳшатлигини, Робертанинг ўлимини ҳисобга олмаган тақдирда ҳам, у ҳамма ёқقا қанчалар ғам-алам ва баҳтсизлик ёйиб юборганини энди яхши тушуниб етган эди. Аммо... ҳаёт шунчалар ширинки... Эҳ, қани энди бир амаллаб қутулиб қолса! Қани энди фақатгина шу ердан йўқолиб кетса-ю, тепасидан ҳозир эзиб турган даҳшат ва ваҳимани бундан бўёнига бир умр билмай, сезмай, эсламай ўтса! Аста-секин қош қораяди. Аста-секин тонг отади. Туннинг узоқлигини айтинг! Анави оҳ-воҳлар... анави инг-рашлар-чи! Шунақанги азоблар туну кун тўхтамай давом этаверганидан баъзи вақтларда: мана ҳо-

зир, шу ернинг ўзида у жинни бўлиб қоладигандай туюлар эди Клайдга; агар Мак-Миллан бўлмаганда, эҳтимол, чиндан ҳам ақддан озиши турган гап эди, ҳазрат эса тобора унга ўрганиб борар, уни эркалаш, юпатиш ва далда беришга ҳам уста эди. Қани энди шу ердами ёки бошқа жойдами, бир пайтини топиб, у билан ёнма-ён ўтириб олсанг-да, бошингдан ўтган воқеаларнинг барини гапириб берсанг, гуноҳкормисан ёки йўқми, агар гуноҳкор бўлсанг қанчалик гуноҳкорлигингни унинг ўз оғиздан эшитсанг, чиндан ҳам айбдорсанми, унда Мак-Миллан сенинг ҳақингда дуо ўқиса, қандай соз бўлар эди-я! Гоҳо-гоҳо Клайд онасининг ва ҳазрат Мак-Милланнинг унга шафқат сўраб ўқиган тиловатлари ўзидан кўра ўша илоҳий қудратга кўпроқ маъқул тушишини аниқ ҳис этар эди. У ҳали ҳам тиловат қилишни билмас эди. Баъзи пайтларда Мак-Милланнинг панжара орқасидан туриб майин, ёқимли овоз билан ўқиётган дуо сўзлари ёки галатлар, коринфликлар, фессалоникийларга аталган номадан ёд олаётган парчаларини тинглаётганида у, бу одамга ҳаммасини иложи борича тезроқ айтиб бериш керак, деган фикрга келар эди.

Аммо кунлар ўтиб борар, у эса ҳамон миқ этмас, ҳазрат Данкен ҳам энди қачонлардир уни тавба қилдира олиши ва руҳини қутқариб қолишига кўзи етмай турган бир пайтда, орадан бир ярим ой ўтганда, тўсатдан Сондрадан мактуб, тўғрироғи бир энлик қофоз келиб қолди. Уни турманинг протестант руҳонийси, ҳазрат Престон Гилфорд турма нозири идорасидан олиб, Клайдга келтириб берди. Тагида ҳеч қандай имзо йўқ эди, аммо қофози қимматбаҳо, яхши қофоз эди. Турма қоидасига биноан хатни очиб, ўқиб кўришибди. Нозир билан ҳазрат Гилфорд хат мазмунида ачиниш ва ёзфиришдан

бўлак ҳеч қандай маъно сезишмади, бунинг устига ушбу хатни ёзган шахс судда бир неча марталаб тилга олинган мисс Х лигига очик-оидин ишонишиди-ю, сал бош қотириб кўришгандан сўнг, Клайд бу мактубчани ўқиши мумкин, ҳатто ўқиши шарт, деган қарорда тўхтадилар. Бу қайтага унга фойдали бир мактаб бўлиши мумкин. «Ўзбошимчаларнинг йўли...» Шундай қилиб, зериктиарли узоқ ёз фасли ўрнини олган куз оқшомларининг бирида – Клайд турмада ётганига айни бир йил тўлай деб қолган вақтда – унга бояги мактубни келтириб беришди. У мактубни қўлига олди. Хат машинкада ёзилиб, вақти ҳам, кимданлиги ҳам кўрсатилмаган бўлса-да (фақат почта тамфаси Нью-Йоркники эди), Клайд бунинг Сондраданлигини беихтиёр равиша дарров пайқади. Бирдан уни ҳаяжон босди – конвертни ушлаб турган қўллари билинар-билинмас титраб кетди. Сўнгра сатрларга кўз юргутирди, кейинги кунларда ҳам у бир неча марталаб қайта-қайта ўқиб чиқди:

«Клайд! Ушбу сатрлар шунинг учун ёзиляптики, тағин сиз, қачонлардир қалбингизга яқин бўлган қиз Сизни бутунлай унутиб юборди, деб ўйламанг. У ҳам қанчадан-қанча азобларни бошидан кечирди. Гарчи у, ўша қилмишингизга Сиз қандай журъат этганингизни бир умр англаб етолмаса-да, ҳарқалай ҳозир ҳам, гарчи Сиз энди у билан ҳеч қачон кўришолмасангиз ҳам, у Сизга куйинади ва Сизга озодлик ҳамда баҳт тилайди».

Имзосиз – ҳатто бармоқларининг биронта изи ҳам йўқ. У исмини қўйишига ҳам қўрққан ва маънавий жиҳатдан Клайддан шунчалар бегоналашиб кетган эдики, ҳатто қаердалигини хабарлашни ҳам истамаган эди. Нью-Йорк! Лекин хат бошқа истаган жойда ёзилиб, фақат Нью-Йоркдангина жўнатилган бўлиши ҳам мумкин. Энди у ҳатто мана шу

чордевор орасида ўлиб кетса ҳам ҳеч қачон... ҳеч қачон... унинг қаердалигини билмайди, ўлиб кетиши эса оддийгина бир гап. Хуллас, унинг охирги умиди ҳам, ширин орзуларининг сўнгти шуъласи ҳам барбод бўлди. Тамом! Уфқдаги охирги ожиз нур шафағини қоронгилик ўчириб юборгандада ҳам худди шундай воқеа юз беради. Фира-шира пушти ранг ёлқин лип этади-ю, кейин бутунлай зулмат чўкади.

У каравотига омонатгина ўтирди. Ўзининг ола-була фариб уст-боши ва қулранг намат қавушларига тикилиб қолди. Жиноий жавобгар одам у. Манави йўл-йўл кийимлари. Қавушлари. Манави камера. Эсингга тушса, ҳамма вақт юрагинг орқангга тортиб кетадиган олдиндаги ноаниқ таҳдид. Энди бунга – мана бу хат ҳам қўшилди. Гапнинг қисқаси, унинг ширин туши туғади! Ўлиб-тирилиб Робертадан қутулмоқчи бўлганлари, ҳатто уни ўлдиришга ҳам шай турганларининг оқибати шуми энди! Шуми энди! Шуми! У ушлаб турган хотини айлантириб-айлантириб кўрди-да, кейин бўшашиб, қўллари осилиб тушди. Ҳозир қаерда ўша Сондра? Кимга ошиқ бўлиб юрганикин? Унинг туйгулари бу орада ўзгариб ҳам кетгандир. Эҳтимол, у ўшандәёқ Клайдга шунчаки кўнгилхушлик юзасидан қизиқиб қарагандир. Клайд тўғрисидағи мудҳиш хабарлар эса, ҳойнаҳой, кўнглида бор туйгуларини ҳам чилпарчин қилиб юборгандир. Сондра озод. У гўзал... бой-бадавлат. Балки, биронтаси билан..

У ўрнидан турди ва аламини босиши учун камера эшигигача юриб борди. Рўпарадаги илгари хитой маҳбус ётган камерада энди ҳабаш Уош Хиггинс ўтирибди. Айтишларича, у ресторон официантини овқат олиб келмай, устига-устак, уни ҳақорат этгани учун чавақлаб ташлаган экан. Ёнида эса ёш-

гина бир яхудий ўтирибди. У ўғрилик қилиш ниятида заргарлик дўконининг хўжайинини ўлдирган экан. Аммо у қатл этилишини кутиб, бу ерда ҳамма вақт маъюс ва эзилган қиёфада юрар, бошини қўллари орасига олганча неча кунлаб индамай ўтирар эди. Уларнинг икковини ҳам Клайд ўз камерасидан кўриб турибди. Яхудий одатдагидек бошини қўллари билан эзганча ўтирибди. Ҳабаш эса каравотида оёқларини бир-бирига чалиштириб, папирос чекиб, қўшиқ айтяпти:

*Ана, катта гилдирак гилдирайди – бум!  
Ана, катта гилдирак гилдирайди – бум!  
Ана, катта гилдирак гилдирайди – бум!  
Тўппа-тўгри мен-га-а қараб!*

Клайд ўз фикрларидан қочиб қутулишнинг иложини тополмай юзини ўғирди.

Олдинда қатл! У ўлиши керак! Манави мактуб эса унинг Сондрадан ҳам умрбод айрилганининг белгиси. Ҳаммаси равшан. Бу – видолашув. «Гарчи сиз энди у билан ҳеч қачон кўришолмасангиз ҳам...» Клайд йиглаш учун эмас, шунчаки нафасини ростлаб олиш учун ўзини каравотга муккасидан ташлади, у ниҳоятда чарчаган эди. Ликург. Ўн иккинчи кўл. Ўйин-кулги... Бўсалар... Табасумлар. Ўтган кузда у шу нарсаларга шунақсанги чанқоқ эдики... Мана энди – бир йил ўтгач...

Шу пайт яхудий йигитнинг овози эшитилди. Индамай ўтиравериб, ишдан чиққан асаблари охири шунга ҳам чидолмай қолгач, у дуога ўхшаш аллақандай хутбани қироат қилиб алжирашга ўтар, лекин унинг овози юракларни эзib юборар эди. Кўпчилик маҳбуслар бунга норозилик билдиришга уринар эдилар. Лекин ҳозир эса унинг мунгли дуоси унчалик ортиқча ҳам туюлмасди.

– Мен ёвуз эдим. Мен гуноҳ қилдим. Мен алдадим. О-о-оҳ! Мен лафзимда турмадим. Юрагимга ёмонлик уя қуриб олган эди. Мен ёмонларга қўшилиб, ёмон бўлдим. О-о-оҳ! Мен ўғрилик қилдим. Мен мунофиқлик қилдим. Мен бемехр эдим. О-о-оҳ!

Нариги бурчакдан Барзанги Том Рунининг овози янгради, у ўзига таниш аллақайси бир ахлоқсиз жувонни оғдириб олган Томас Тайс деган кишини ўлдиришда айбланган эди.

– Худо ҳақи, қулоқ солсанг-чи! Сенга қийинлигини биламан. Ахир, менга ҳам осон эмас-ку. Худо ҳақи, овозингни ўчир!

Клайд ўз каравотида ўтирган қўйи фикрлари яхудийнинг дуосига ҳамоҳанг келиб, ичида у ҳам яхудий билан бирга такрорлар эди: «Мен ёвуз эдим. Мен гуноҳ қилдим. Мен алдадим. О-о-оҳ! Мен лафзимда турмадим. Юрагимга ёмонлик уя қуриб олган эди. Мен ёмонларга қўшилиб, ёмон бўлдим. О-о-оҳ! Мен мунофиқлик қилдим. Мен бемехр эдим. Қотилликни ўйладим, О-о-оҳ! Нимага ҳам ўзимни шунчалик у ёқдан-бу ёққа урмасам? Амалга ошмайдиган, беҳуда бир орзу-ҳавас учун-а. О-о-оҳ! О-о-оҳ!»

Орадан бир соат ўтгач, турма хизматчиси эшик туйнуги тахтачасига кечки таомни келтириб қўйганда, Клайд ҳатто ўрнидан ҳам жилмади. Кечки таом эмиш! Яrim соатдан сўнг турма хизматчиси патнис қандай қўйилган бўлса, Клайдда ҳам, яхудийда ҳам худди ўшандайлигича турганини кўрди-ю, индамай қайтариб олиб кетди. Маҳбусларнинг кайфияти бузилган пайтда улардан овқат ўтмаслигини турма хизматчилари билишар эди. Баъзан шундай ҳам бўлар эдики, ҳатто турма хизматчиларининг ўзлари ҳам бир луқма овқат ейишолмас эди.

### XXXIII БОБ

Клайднинг тушкун аҳволини икки кун кейин ҳам Мак-Миллан сезди ва бунинг сабабини билмоқни истади. Кейинги учрашувлар пайтида Клайд ўз хатти-ҳаракатлари билан ҳазратнинг гарчи, ҳамма панд-насиҳатларини у истагандек қизғин-қизғин қабул этмаса-да, лекин ҳар ҳолда ўзига сингдирилмоқчи бўлинаётган диний foялардан озоз баҳраманд бўлаётгани тўғрисида ўйлашга имкон берди. Афтидан, у Клайднинг онгига фам-алам ва умидсизликка жуда ҳам берилиб кетмаслик керак, деган фикрни анча-мунча сингдириб юборганга ўхшар эди. «Ия! Ҳали сизга худонинг роҳатбахш йўли очилмадими? Кимки қидирган ва худони топган бўлса – излаган эса, топадур – унга фам-алам бегона, фақат қувончга ошно бўлгусидир. Биз – унда ва у – биздалигини, ҳаммамизни у ўз нафасидан бунёд этганлигидан билурмиз». – Унинг барча панд-насиҳатлари ва ёдаки хутбаларининг мазмuni шундан иборат эди, хулас, охири бориб, Сондра хатидан сўнг орадан икки ҳафта ўтгач, бу мактуб Клайдда ҳали ҳам foят оғир таассурот қолдириб келаётганига қарамай, у Мак-Милландан икковларини бирор камерада ёлғиз қўйишларига турма нозиридан руҳсат сўрашини илтимос қилди, ишқилиб, турманинг шу томонидан нарирофида бўлса бас эди, чунки Клайднинг назарида ҳатто бу ердаги деворлар ҳам мудҳиш фикрларга тўйиниб кетгандек туюлар, шунинг учун Клайд ҳазрат билан четроқда гаплашиб, ундан маслаҳат олмоқчи эди. Ҳойнаҳой, деди у Мак-Милланга, ҳайтимизда кейинги кезларда юз берган воқеаларга ўзим қайдаражада жавобгарлигимни аниқ айттолмасам керак, шу боисдан ҳам сиз ҳазратлари қайта-қайта такрорлаётганингиз, анави руҳий хотиржамлик-

ка сира етишолмаётганга ўхшайман. Эҳтимол... эҳтимол, мен бошқа бирор асосий масалада янглишаётгандирман. Хулласи калом, мени айблашаётган жиноятнинг барча икир-чикирларини сиз ҳазратлари билан биргаликда муҳокама этиб чиқмоқчиман, ўтган ҳодисаларни баҳолашда янгишиб қолмадиммикин, деб шуни ҳам аниқлаб олмоқчиман. Негаки, дилимда анча-мунча гумонларим ҳам бор. Мак-Миллан эса ҳаяжонланиб кетганидан – бу унинг маънавий ғалабаси, имон ва тавфиқи эвазига эришган мукофоти эди, ахир! – турма нозирига қараб чопди, нозир ҳам бу эзгу ишга кўмаклашаётганидан хурсанд бўлиб, ўша заҳотиёқ эски Ажал уйи камераларидан бирида Клайд иккаласининг истаган вақтгача, назоратчисиз учрашувларига рухсат этди, фақат йўлакдагина соқчи турадиган бўлди.

Сўнгра Клайд ўзининг Роберта ва Сондра билан танишлигининг барча тафсилотларини Мак-Милланга гапириб берди. Суд ҳисоботларидан маълум бўлган нарсалардан эса у фақат руҳий бурилиш ва шу сингариларни эслаб ўтди, айни пайтда у ҳимоя томонининг далил-даъволарига тил теккизмади; кейин у қайиқда юз берган машъум ҳодиса тўғрисида батафсилоқ тўхталди. Шу ерда у ҳазрат Мак-Милланнинг фикрини билмоқчи бўлди: ҳолбуки, Клайдда шунақангি ният, демакки, аввалига шунақангি мақсад мавжуд экан, хўш, унда у айбдор ҳисобланадими ёки йўқми? Яна бу орада унинг Сондра ишқида савдойидек меровсиб юришлари, у туфайли миясида туғилган келажак тўғрисидаги беқиёс орзулари... демак, уни чиндан ҳам қотил, деб ҳисоблаш керакми? Ҳамма гап аслида судда гувоҳлик берилганидек эмас, балки ҳудди мана шу тарзда, ҳа – ҳудди шу тарзда бўлгани учун ҳам Клайд шундай савол беряпти. Гўё унинг қалбида

маънавий бурилиш юз берган эмиш, бунинг бари ёлғон. Бу гапларни уни ҳимоя қилиш учун адвокатлари ўйлаб топишган, холос, чунки улар Клайдни бегуноҳ деб ҳисоблашган ва уни оқлашнинг бирдан-бир осон йўли шу, деб ўйлашган эди. Лекин бу ёлғон. Роберта ўрнидан туриб унга қараб юрганча қайиқда нималарни ўйлагани ва ҳис этгани ҳамда ундан кейинги воқеалар – шулар тўғрисида ҳам у ёлғон гапирди, тўғрироғи, гапининг кўпи ёлғон эди. Бехосдан уриб қолган анави зарбаси... У ўша зарбасига алоқадор сабабларни англаб етишга интилар эди, чунки худди шу нарсалар унинг диний жиҳатдан бегуноҳ бўлиш, яратган парвардигор даргоҳига покиза виждан билан бориш истагига халақит бераётган эди. Шу пайтгача у бу хусусда унчалик бош қотириб ўтирганини ҳам эслатмай қўя қолди. Лекин ҳализгача у ҳақиқат қаерда-ю, ноҳақдик қаерда, охиригача тузукроқ бир англаб етолмаган эди.

Ҳатто ҳозир ҳам унинг учун жуда кўп нарсалар шубҳали ва чалкаш кўринар эди. Судда у, Робертага адоватим йўқ эди, қалбимда руҳий бурилиш юз берган эди, деб айтди. Аммо ҳеч қандай бурилиш-мурилишдан асар ҳам йўқ эди. Аслида эса Роберта ўрнидан туриб, унга томон интилганидан бир дақиқача олдин Клайд қандайдир фалати, ноаниқ бир аҳволга тушди – мана энди ўйласа, худди мияси карахтлашгандай ё тош қотгандай бўлган эди – нима учун шундайлигини ўзи ҳам билмасди. Очигини айтганда, ўша пайтда билмаган эди, ке-йинчалик эса, балки, Робертага ачиниб кетгандирман ёки унга нисбатан ваҳшийлик қилаётганимдан виждоним қийналгандир, дея ўйлай бошлади. Иккинчи томондан, қаҳр-ғазаби ҳам, нафрати ҳам ошиб кетган эди, албатта, чунки Роберта у истамаётган ишни унга мажбурлаб қилдирмоқчи бўлаёт-

ган эди. Учинчидан эса, эҳтимол, ёвузык оқибатидан қўрққани учун ҳам шунақанги аҳволга тушгандир, тўғриси, у бунга унчалик ишонинқирамай қарайди (шу ҳақда у бир ўйлаган ҳам эди-ю, аммо, барни бир ҳозиргача бунга ишонмайди), ваҳоланки, ўша пайтда у ёвузык оқибатидаги қўрққанини эмас, балки ўзи режа қилган ишни ўзи бажара олмаслигини ўйлаб, шу ношудлиги учун ўзидан ўзи нафратланиб кетганга ўхшаб туюлади, ҳозир унинг назарида.

Аммо у Робертани ургани – яъни, у ўрнидан туриб Клайдга томон интилган пайтида уни бехосдан уриб юборганида – эҳтимол ўшанда, нега у менга қараб келяпти, деб беихтиёр равишда нафратланиб кетган бўлиши ҳам мумкин. Балки – у буни ҳатто ҳозир ҳам аниқ айтиб бериши даргумон – балки шунинг учун ҳам туширган зарбаси кучли бўлиб чиққандир. Ҳарқалай, у буни кейинроқ ўйлади. Лекин очигини айтганда, Робертага нисбатан нафрати ошиб кетганига ҳам қарамай, ўрнидан турганида унга чиндан ҳам кўмаклашмоқчи эди. Ўша дақиқада Робертани урганига ўзи ачинди. Бироқ қайиқ ағдарилиб, икковлари ҳам сувга тушгандарида ва Робертанинг нафаси қайта бошлагач, миясидан бирдан: «Майли, ўлаверсин», деган фикр йилт этиб ўтди. Чунки Робертадан кутулишнинг бирдан-бир йўли мана шу тасодиф эди. Ҳа, ўшанда Клайдда шундай фикр туғилган эди. Бироқ, шуни унутмаслик керакки, – айниқса, буни мистер Белнеп билан мистер Жефсон ҳам таъкидлаб ўтишди, бу пайтда Клайднинг бутун туйғу-эҳтирослари мисс Х билан банд эди, юз берган ҳодисанинг асосий сабаби ҳам аслида шу эди. Шундай экан, барча воқеаларни, бошдан-охири қандай бўлса, худди ўшандайлигича ҳисобга ола туриб, гарчи Робертани у тўсатдан бўлса

ҳам, аммо нафратланган ҳолда ургани – чунки Робертанинг ўжарлиги Клайднинг газабинн ошириб юборган эди, ҳа, чиндан ҳам унинг жаҳди чиққан эди – кейин эса уни қутқаришга ҳам уриниб қўрмагани (буни ҳозир Клайднинг ўзи холисона туриб бўйнига оляпти), шуларни назарда тутгандা, ҳарқалай, Клайдни қотилликда айбдор, у ўлимга арзирли гуноҳ ва қонали жиноят қилган, шунинг учун инсоф жиҳатидан ҳам, қонун жиҳатидан ҳам у ўлим жазосига лойиқ, деб ҳисоблаш мумкинми, ҳазрат Мак-Миллан бу ҳақда қандай фикрдалар? Хўш, у шунга лойиқми? Клайд буни кўнглининг хотиржамлиги учун ҳам, ақалли бўлмагандага худога сифиниши учум ҳам билиши зарур.

Ҳазрат Мак-Миллан шу гапларнинг барини чуқур изтироб билан эшилди, у умрида ҳали ҳеч қачон бунчалик мураккаб ва ғалати масалани ҳал этиш муаммосига дуч келмаган эди, бунинг устига Клайднинг умид ва ҳурмат билан қараётгани унга жуда катта масъулият ҳам юклар эди. У қимир этмай, оғир, ғамгин, деярли хаста бир ўйчаник билан ўтирап эди; ундан кутаётган жавоблари ниҳоятда жиддий ва муҳим жавоб эди, айни шу жавобдан Клайд ўзига ҳаётий ҳамда руҳий таскин олмоқчи эди. Ҳазрат Мак-Миллан эса бунга дарров жавоб топиб беришга қурби келмас эди, чунки у эсанкираб қолган эди.

– Клайд, демак, сиз у билан қайиққа ўтиргунингизча ҳам ниятингиз ўзгармаган, айтмоқчиманки, сиз уни... уни...

Ҳазрат Мак-Милланнинг юzlари чўкиб, оқариб кетди. Кўзлари ғамгин боқар эди. Ҳозиргина у аянчли ва даҳшатли воқеани эшилди – ўз-ўзини фош этиш қийноғига тўла, аёвсиз, хунук воқеани эшилди. Бу бола... демак, чиндан ҳам... Унинг эҳтиросли, тиниб-тинчимас қалби кўп нарсаларга

чанқоқлиги учун ҳам исён күтартган экан-да, бунаңын түйгулар ҳазрат Мак-Милланга эса ҳамма вақт ҳам бегона эди. Ўша қалб исён күтараман деб, катта гунохга ботган ва қатл этилишга ҳукм қилинганды.

– Йўқ, ўзгармаган эди.

– Ўйлаганингизни қилишга кучингиз етмагани учун, айтишингизча, ўзингиздан жаҳлингиз чиққан, шундайми?

– Ҳа, шундай ҳам бўлган. Лекин раҳмим ҳам келган, тушуняпсизми? Яна, эҳтимол, қўрққан бўлишим ҳам мумкиндири. Ўзим ҳозир анигини билмайман. Эҳтимол, қўрққандирман, эҳтимол, ундеймасдир.

Ҳазрат Мак-Миллан бошини чайқаб қўйди. Буларнинг бари шу қадар ғалатики! Шу қадар ноаниқки. Шу қадар аҳмоқонаки! Аммо шунга қарамай...

– Лекин айни пайтда гапингизни агар тўғри тушунган бўлсан, сиз ўзингизни шу аҳволга солиб қўйгани учунгина ҳам ундан жаҳлингиз чиққан, шундайми?

– Ҳа.

– Шу қадар кишига азоб берувчи муаммони ечасан, деб сизни мажбур қилгани учун, шундайми?

– Ҳа.

– Тц-тц-тц! Ана шунда сиз уни бир солиб юборгингиз келган?

– Ҳа, шундай.

– Лекин сиз уролмагансиз?

– Уролмадим.

– Илоё тавба, худо марҳаматини дариф тутмасин.

Аммо ўзингиз айтаётганингиздай, ожизани бехосдан уриб юборган пайтингизда, ҳарқалай, унга нисбатан разабингиз кучли бўлган. Шунинг учун зарбангиз

шунақа... шунақа кучли чиққан. У сизга яқинлашиб келишини истамагансиз, шундайми?

– Ҳа, истамадим. Ҳар ҳолда, ҳозир назаримда шундай туюляпти. Анигини айтишим бари бир қийин. Эҳтимол, ўзимни хиёл йўқотиб қўйгандирман. Яъни... шунақсанги ҳаяжонда эдимки... деярли касалга ўхшардим. Мен... мен...

Клайд унинг рўпарасида йўл-йўл турма кийимида, сочи машинкада тақир олинганча ўтириб, ҳалол ва холисона бир тарзда воқеалар қандай юз берган бўлса, худди ўшандайлигича тасвирлаб беришга уринар, ўзининг гуноҳкорми ёки йўқлигини аниқ билиб олиш ҳатто ўзининг ҳам қўлидан келмаётганидан ваҳимага тушар эди. Чиндан ҳам у гуноҳкорми ёки йўқми?

Ҳазрат Мак-Миллан ҳам ниҳоят даражада изтироб чекканидан, фақатгина:

– «Ажалга олиб борувчи дарвоза қўштавақа ва йўли кенгдур», – дея минғиллади. Аммо кейин қўшиб қўйди: – Лекин сиз унга қўмаклашиш учун ўрнингиздан тургансиз, шундайми?

– Ҳа, кейин ўрнимдан турдим. Кулаб тушаётганини кўришим билан уни ушлаб қолмоқчи бўлдим. Шунда қайиқ ағдарилиб кетди.

– Уни ушлаб қолмоқчи бўлганингиз ростми?

– Билмайман. Ўша дақиқада, менимча, ушлаб қолмоқчи бўлдим шекилли. Ҳарқалай, юз берган воқеага ачиндим.

– Юз берган воқеага ачинганингиз ва ўша дақиқада уни қутқармоқчи бўлганингизни яратган эгам олдида имонингизни қўшиб, қатъий турриб айта оласизми?

– Биласизми, ҳаммаси кўз очиб юмгунчалик вақт ичиди бўлди-ку, – дея гап бошлиди Клайд асабийлашиб, деярли умидсиз бир оҳангда, – бир нарса дейишга ҳам тилим бормайди. Йўқ, ҳойнаҳой, у

қадар қаттиқ ачинган бўлмасам керак. Йўқ. Худо ҳақи, ўзим ҳам тузук билмаяпман ҳозир. Баъзан ачинганга ўхшаб кўринаману, баъзан эса иккиланаман. Лекин у чўкиб кетиб, мен эсам соҳилга сузиб чиққанимда, ана шунда... бир оз ачиндим. Бироқ ичимда қувониб ҳам қўйдим – тушуняпсизми, ахир, мен озод бўлган эдим, шуни ўйлардим... кейин ваҳима ҳам босди... Сиз тушуняпсизми...

– Ҳа, ҳа, тушуняпман. Сиз анави мисс X ни ўйлардингиз. Лекин унинг чўкаётганини кўрганингиздан олдин-чи?..

– Йўқ, унда ўйламагандим.

– Сиз уни қутқазиб қолишни истамадингиз?

– Йўқ.

– Тиш-тиш-тиш! Бу сизни қийнамадими? Бундан уялмадингизми?

– Ҳа, ҳарқалай, уялдим. Балки қийналган бўлишим ҳам мумкин. Хуллас, шуларнинг бари даҳшатлигини тушунардим. Мен буни яхши билардим. Аммо шунда ҳам... биласизми...

– Ҳа, ҳа, албатта. Яна ўша мисс X. Бир амаллаб кутулишнинг пайида эдингиз...

– Ҳа... лекин очиғини айтсан, қўрқиб кетдим, кейин унга ёрдам бергим келмасди.

– Тушунарли, тушунарлн. Тц-тц-тц! Сиз, агар у чўкиб кетса, мисс X га бора оламан, деб ўйлагангиз. Шундай деб ўйлаганмидингиз?

Ҳазрат Мак-Милланнинг лаблари алам билан маҳкам жипслашди.

– Ҳа.

– Бўтам! Бўтам! Демак, сиз юрагингизда қотиллик қилган экансиз!

– Ҳа, сиз ҳақсиз, – деди Клайд ўйга ботиб. – Ўзим ҳам шундай бўлса керак, деган фикрга келган эдим.

Хазрат Мак-Миллан чорасиз оғир муаммо олдида ўзини бир тетиклаб олиш мақсадида гапни пайсалга солди, сўнгра овозини чиқармай, ичида дуо ўқий бошлади: «Парвардигори олам, самою кўкда агар борлигинг рост бўлса, марҳаматингдан бенасиб этма, илоё, еру осмонда сенинг қудратинг, сенинг ироданг мұҳаққақ бўлгай». Кейин сал жон киргандай ўзгарди.

– Гапимга қулоқ солинг, Клайд. Ҳар қандай гуноҳ ҳам худонинг марҳамати олдида ҳечdir. Мен буни аниқ биладурман. Тангри бандасини дунёдаги ёмонликни ўз ўлими билан ювиб туриши учун яратгандир. Агар сиз тавба қилсангиз, у сизнинг гуноҳингиздан кечади. Лекин анави ниятингиз! Анави ишингиз! Сиз ҳали, бўтам, жуда кўп нарсаларни бўйинга олишингиз керак, жуда кўп нарсаларни! Негаки, парвардигорнинг назарида, айтишга ҳам тилим бормаяпги... ҳа... Аммо шунга қарамай... Худо менга йўл кўрсатиши ва ўгит бериши учун эртаю кеч дуо қилавераман. Сиз менга айтиб берган гаплар жуда ғалати ва қўрқинчлидир. Буни, турлича тушунишлари мумкин. Эҳтимол... бироқ, ҳарқалай, имон келтирaverинг. Шу ерда, мен билан бирга, хира кўзларимизга худо нур бағишлишини сўраб, имон келтирaverинг.

У бошини эгди ва бир неча дақиқа миқ этмай ўтирди, Клайд ҳам иккиланган ва журъатсизларча бир қиёфада индамай унинг ёнида ўтирди. Кейин Мак-Миллан гап бошлади:

– Э, худо, мени қаҳру разабингга дучор этма ва азобу уқубатларинг ўтига ташлама, илоё. Раҳминг келсин, парвардигори олам ва инчунин, бир бандай ожизингман... Илоё, шарманда қилма ва мен фарибингни фам-андуҳларга ботирма, чунки шундай ҳам нигоҳинг қаршисида дилим тифлангандир ва қоронгидир. Ҳаром-хариш нимаики нарсам

бўлса, юрагимдан юлиб ташла. Ҳақиқатгўйлигинг билан менга соябон бўл, яратган эгам. Ҳаром-хариш нимаики нарсам бўлса, юрагимдан юлиб ташла ва уни унут.

Клайд бошини осилтирганча, жимгина, қимири этмай ўтиради. Энди у ҳам ларзага тушган ва кулфат қийногига ботиб қолган эди. Демак, кўриниб турибдики, у катта гуноқ қилган. Катта, оғир гуноҳ қилган! Лекин шунга қарамай... Шу ерда ҳазрат Мак-Милланнинг овози ўчди-ю, ўрнидан турди, Клайд ҳам шоша-пиша ўрнидан қўзгалди.

– Вақтим бўлди, – деди Мак-Миллан. – Дуо ўқишим... ўйлаб кўришим керак. Сиз айтган гапларнинг бари мени эсанкиратиб, юрагимни ўртаб юборди. Чиндан ҳам шундай бўлди, буни тангри кўриб турибди. Сиз бўлсангиз – сиз, бўтам, камерангизга қайтиб боринг-да, танҳо ўзингиз парвардигорга тўхтовсиз сифининг. Тавба-тазарру қилинг. Тиз чўкиб, худодан гуноҳингизни кечишини сўранг, шунда у нолангизни эшитгай. Ҳа, ҳа. Албатта, эшитгай. Эртага эса – ёки бўлмасам, ўзимни шунга тайёр сезишим биланоқ, – мен яна келурман. Лекин тушкунликка берилманг. Сифинаверинг, сифинаверинг, чунки нажот – фақат худога сифинишу тавба-тазарру қилишда. Бутун оламни милкида ушлаб турган парвардигори оламнинг қудратига маҳлиё бўлинг. Унинг тенгсиз кучи ва шафқати сизни афв этиши ва дилингизга хотиржамлик бағишлиши мумкин-дир. Тангри ҳақиқати шудир.

У қўлида ушлаб турган калит ҳалқаси билан панжарани уриб тиқирлатган эди, йўлакда юрган назоратчи ўша заҳотиёқ югуриб борди.

Ҳазрат Мак-Миллан Клайдни камерасигача кузатиб қўйдида, уни ўша тор қафасга яна қайта қамаб бўлгунларича қараб турди; кейин у хайрлашиб чиқиб кетди. Бугун эшитган барча тафсилотлари

худди кўксига қадалган тошдек уни азоблай бошлади. Клайд эса гапириб берган ҳамма гапларини ва улар Мак-Милланга ҳамда унинг ўзига энди қандай таъсир қилишини ўйлаганча қолаверди. Унинг янги биродари ниҳоятда эзилиб кетди. Клайднинг бутун гапларини у қанчалар даҳшаттга тушиб, алам билан тинглаб ўтирди! Наҳотки, энди у, Клайд, дарҳақиқат ва узил-кесил гуноҳкор бўлса? Шу гуноҳи учун дарҳақиқат ва узил-кесил ўлимга лойиқ деб топилса? Ҳазрат Мак-Миллан ҳам айни шундай деб ўйлаган бўлиши мумкинмикан? Щунчалик беозор ва раҳмдиллигига қарамай-а?

Орадан бир ҳафта ўтди, шу вақт ичида ҳазрат Мак-Миллан Клайднинг дангал эътирофи ва у айтиб ўтган барча чалкаш ҳамда айбни юмшатувчи омиллар таъсири остида ушбу ишнинг бутун ахлоқий томонларини диққат билан қайта-қайта ўйлаб чиқди, кейин у яна Клайд камераси осто-насида пайдо бўлди. Лекин у, Клайд охири бориб очиқчасига эътироф этган бари далилларни ҳар қанча юмшатиб кўрганда ҳам, аммо Клайддан на унинг бевосита ва на билвосита айбини соқит қила олмаслигини айтиш учунгина келган эди. У Робертани ўлдирмоқчи бўлган – шундай эмасми, ахир? Уни қутқариб қолиши мумкин эди-ю, бироқ шунга уриниб ҳам кўрмаган. Унга Робертанинг ўлими керак эди, шунинг учун ҳам виждони азобланмай юраверган. У қулочкашлаб урганда қайиқ афдарилиб кетган, шу зарбасида унинг нафрат-газаби ҳам ташқарига отилиб чиқсан. Ҳатто қасддан уришига халақит берган яхши туйфуларига ҳам нафрат-газаб аралашган. Файриқонуний алоқа қилганларидан сўнг, Роберта уни мени оласан, деб мажбурлаган ва у мисс Х нинг ҳусну жамоли ҳамда эл-юрт ичидаги обрўига маҳлиё бўлиб қолгани учун шу жиноятни қилмоқчи бўлдим дейиши Клайдни

оқладай олмайды; аксинча, бу қайтага унинг одамлар олдидаги гуноҳи ва жиноятини тасдиқловчи янги далиллардир. У худо олдида ҳам кўп нарсада гуноҳкор. Ўша даҳшатли дақиқаларда, афсуски, у апостол Павел қарғаган барча қусурлар – тамагирлик, ғайриқонуний истаклар, бузуқликнинг рамзига айланиб қолган эди. Уни то ҳибсга олмагунларича ҳаммаси шу хилда ўзгармай давом этаверган. У ҳатто Айик кўлида ҳам тавба қилмаган, ваҳоланки ўшандада кўп нарсаларга мундай бир ақл юритиб олишига вақти етарли эди. Ҳаммасидан ҳам ёмони: бошдан-охир, атайлаб, фирт ёлғон гапириб, ўз айбини баттар оғирлаштириб юборганини айтмайсизми, ахир. Афсуски, худди мана шундай бўлган.

Иккинчи томондан эса, уни ҳозир, энди у очиқ-часига тавба қилаётган, юз берган воқеанинг бутун даҳшатини аста-секин тушуниб бораётган бир пайтида электр курсига ўтқазиш, шубҳасиз бу жиноят устига яна бир жиноят қилиш деган сўз эмасми ахир, бунинг устига мазкур вазиятда жиноятчи давлатнинг ўзи бўлиб қолиши мумкин-ку? Турма нозири ва бошқа кўп кишилар сингари Мак-Миллан ҳам ўлим жазосининг душмани эди, у жиноятчиларни у ёки бу тарзда давлатга хизмат этишга мажбурлаш мақсадга мувофиқроқдир, деб ҳисоблар эди. Лекин бу деган сўз, Клайдни бегуноҳ жазолашди, деб ўйлаётгани эмас Мак-Милланнинг. У ҳар қанча бош қотирмасин, кўнглида минг хил важ-баҳоналарни изламасин, бари бир, Клайднинг гуноҳи беш панжадай аниқ кўриниб турибди-ку, ахир!

Мак-Миллан Клайдга, ахлоқий ва руҳий покланиш – ҳаёт ва фаолият учун сизни аввалгига қараганда янада мукаммалроқ, янада яроқлироқ этиб тарбиялайдур, деб бефойда насиҳат қилган

экан. Клайд ўзини ёлғиз ҳис қиласы. Дунёда унга ишонадиган одам йўқ эди. Ҳеч ким ишонмайди. Ҳалокат олдидан унинг ниҳоятда фалати, зиддиятли иш тутганини истаган одамдан сўрашса ҳам, уни фақат энг оғир жиноят, деб баҳолашдан асло нари ўтишмайди. Лекин шунга қарамай... шунга қарамай (у Сондрага ва ҳазрат Мак-Милланга, анави Мейсонни, Брижбургдаги суд маслаҳатчиларини ва уларнинг қарорини ўз кучида қолдириши мумкин бўлган ўша, Олбэнидаги юқори судни ҳам қўшиб ҳисоблагандга, бутун жаҳонга қарши бош кўтариб айтадики), Клайднинг қалб гўшаларида шундай бир ҳиссиётлари борки, ҳарқалай, у ҳамма ўйлаётгандек у қадар гуноҳкор эмас, ахир. Суриштириб келганда, уларнинг биронтаси ҳам Клайд Робертадан кўргандек азобни кўришмаган, уларга ҳеч ким хирадлик қилиб, менга уйланасан, деб туриб олмаган ва шундай йўл билан ҳаётини заҳарламаган. Уларни, Клайддек Сондрага нисбатан, афсонавий орзулар тимсолига нисбатан ўлмас эҳтирос ёндиримаган. Улар гариб болаликнинг бадбахт кулфатлари ва хорликларидан бегонадирлар, бутун қалбинг, бутун вужудинг билан бошқача, тузукроқ ҳаётга интилиб, номусдан ерга кирай деб кўчада ваъз айтиб, дуогўйлик қилмаганлар. Бу одамларнинг қайси бири ва шу жумладан, онаси ҳам, у бошидан кечирган маънавий, жисмоний ва руҳий азобларни билмай туриб, қандай қилиб уни айлашга ҳаддилари сифади? Ҳатто ҳозир ҳам, ўша кечинмаларни у хаёлан эсласа, бутун аъзойи бадани гўё ўтга тушгандек қоврилиб кетади. Гарчи бор далиллар унга қарши чиқса ҳам, гарчи уни айбсиз дейдиган биронта одам топилмаса ҳам, аммо ич-ичидан аллақандай бир овоз бунга қарши шунақангি қатъий норозилик билдирар эдики, ҳатто бунга ўзи ҳам ҳайрон бўлиб

кетар эди баъзан. Лекин мана, ҳазрат Мак-Миллан – у, ахир шунчалар одил, инсофли ва кўнгли пок одам. У юз берган воқеани Клайдга қараганди анча тузукроқ кўриб, анча тузукроқ баҳолайди, албатта... Бироқ Клайдга нисбатан ишончи мустаҳкам бўлган шу одамни ҳам гоҳи пайтларда оғир шубҳалар қамраб олар эди.

Эҳ, бу зиддиятли, чалкаш, азобли фикрлар-ей! Наҳотки, Клайд энди бир умр – ё у ёқди, ё бу ёқди бўлмай – анигини охиригача англаб етолмай юраверса?

Хуллас, шу қадар қалби тоза, меҳрибон киши бўлган ҳазрат Мак-Милланнинг ихлосмандлиги-ю, қадрдонлигидан ҳам, у даракчиси ҳисобланган қудратда тенгсиз, марҳаматда ягона худодан ҳам энди Клайд ҳақиқий юпанч тополмай қолди. Хўш, ҳарқалай нима қилиш керак? Таъсирчан, тоза, итоатгўй хутба дуолар учун тузукроқ сўзларни қаердан олсин? Клайднинг тавба-тазаррусида унинг тўла-тўқис худо йўлига кирганини кўрувчи ҳазрат Данкеннинг насиҳатларига амал қилиб, у яна қайтадан кўрсатилган саҳифаларни варақлаётир, ўқиётир, ўзига яхши таниш сураларни қайта мутолаа қилаётир ва тавбаси унга илҳом беришидан умидвор бўлаётир – бу нарса тинчлик ва хотиржамлик гарови эди – тинчлик-хотиржамликка эса шу зориқтиарли узоқ соатларда у ниҳоятда чанқоқ бўлиб кетган эди. Лекин илҳом қурмагур сира кела қолмас эди.

Шу йўсинда яна тўрут ой ўтиб кетди. Бу муҳлат тугагач, 19... йилнинг январида Кинкэйд, Бриггс, Трумэн ва Добшутерлардан иборат юқори суд ҳайъати ушбу ишни кўриб чиқиб (Белнеп билан Жефсоннинг ҳужжатларини Ж.Фулхэм хулосалаб, доклад қилди), Клайдни айбдор деб топди ва Катараки округи суд маслаҳатчиларининг ҳукмини ўз кучида

қолдириш ҳамда 23 февраль куни билан бошлана-диган ҳафта кунларининг бирида, яъни олти ҳафтадан сўнг ўша ҳукмни ижро этиш тўғрисида қарор чиқарди. Қарорда шундай дейилган эди:

«Биз қораловчи томон бошдан-охир эгри жиноий далилларга асослангани, кейин яккаю ягона гувоҳ ўлим жиноят туфайли юз берганини инкор этганини ҳисобга оламиз. Лекин қораловчи томон вакили шу хилдаги қораловга қўйиладиган фоят жиддий талабларга мувофиқ равишда зўр диққат-эътибор ва моҳирлик билан эгри жиноий далиллар ва гувоҳликлар кўринишидаги жуда кўп ҳужжатларни тўплаган ҳамда уларни айбланувчнинг гуноҳкорлиги масаласиниadolatli ҳал этиш мақсадида суд ихтиёрига ҳавола қилган.

Баъзи фактлар алоҳида-алоҳида олиб қаралса, жиноий далилларнинг камчиллиги ёки бир-бирига зидлиги жиҳатидан улар анчагина баҳсли туюлади ва айрим шарт-шароитларни айбланувчи фойдасига ҳам изоҳлаб берса бўлади. Ҳимоя томони хийла усталик билан шу нуқтаи назарни ўтказишга уриниб кўрган, деб ҳисоблаш ҳам мумкин.

Аммо, далиллар ўзаро узвий алоқада қараб чиқиладирган бўлса, унда айбланувчининг гуноҳкорлиги ниҳоят даражада ишонарли очиб берилиган, шу сабабли биз уни ҳеч ҳандай мантиқий фикр или рад этолмаймиз ва ушбу ҳукм тергов ва суд ҳужжатлари ҳамда улардан чиқариладирган холосаларга зиддиги у ёқда турсин, аксинча, у уларга бутунлан мос бўлиб тушаётганини кўрамиз. Қуйи суд маҳкамасининг қарори бир овоздан тасдиқланади».

Мак-Миллан буни Сиракузада эшитди-ю, норо-зилик шикояти натижасини расмий эълон қилишаётган пайтда Клайднинг ёнида бўлиш ва уни

руҳан күтариб туриш мақсадида унинг ҳузурига шошилди, ҳазратнинг эътиқодича, бу оғир зарбани енга оладиган куч-қувватни Клайдга фақат тангри – бошимизга мусибат тушганда доимий ва ҳамма жойда таянчимиз бўладиган парвардигоргина бера олар эди. Аммо бахтига Клайднинг ҳали ҳеч нарсадан хабари йўқ экан, чунки бунақанги пайтларда қарорни маҳбусларга фақат қатл тўғрисидаги фармойиш келгандан сўнггина эълон қилишар экан.

Самимий ва қизгин сұхбат давомида Мак-Миллан Матфей, Павел ва Иоаннларнинг бу фоний дунёнинг чириклиги-ю, истиқболнинг чинакам бахтиёрлиги хусусида айтган ҳикматларини келтириб ўтгач, Клайд дўстидан суд ўз ишини унинг фойдасига ҳал қилмагани ҳақидаги хабарни эшитиши лозим бўлди. Тўғри, Мак-Миллан ўша заҳотиёқ, у ва унинг таъсиридаги тағин бир қатор шахслар штат губернаторига арзнома билан мурожаат қиласжакларини эслатиб ўтди, лекин бу, агар губернатор аралашибни истамаса, Клайд олти ҳафтадан кейин ўлади, деган сўз эди. Нихоят машъум сўзлар айтиб ҳам бўлинди ва Мак-Миллан яна одамзот худонинг шафқати ва дониши туфайлигина етиша оладиган ўша сояи паноҳ – имон тўғрисидаги гапини давом эттира бошлади, Клайд эса унинг қаршисида қаддини тик тутиб турар, кўз қарашлари ўзининг қисқа, гуруллаб ўтган умри давомида биринчи марта мана шунақанги ўткир ва мардонавор эди.

«Демак, улар менга қарши чиқишибди. Демак, мен ҳам, ҳар ҳолда, ҳамма қатори ҳу анави эшикка кирар эканман. Камералар олдидаги пардаларни мен учун ҳам тушириб қўйишади. Мени ҳам эски Ажал уйига олиб боришади ва кейин тор

йўлакдан изимга қайтариб келишади, бўлмага киришдан олдин мен ҳам бошқаларга ўхшаб, видолашган бўлиб, бир-икки оғиз сўз айтаман. Сўнгра мендан ҳам ному нишон қолмайди». У, ўзи яхши билган қатл маросимининг барча тафсилотларини гўё миясида қайта тиклаётганга ўхшар эди, аммо энди у шуларни ўз танасида синаб кўришга мажбур бўлгани учун ҳам биринчи марта уни мутлақо бошқача, тўлалигича ҳис этди. Ҳозир қўрқинчли, ҳатто одамни ақддан оздириб қўйгудек кучга эга бўлган ўша мудҳиш хабарни эшитса ҳам, негадир ўзини эзилган ва ҳолдан тойгандай сезмади. Аксинча, у диққатини бир ерга йифиб, кўринишидан бамайлихотир турганича энди бу ёғига нима қилиш ва нима дейиш ҳақида ўйлар эди, бундан ҳатто ўзи ҳам ҳайратланаётган эди.

У ҳазрат Мак-Миллан қироат қилган хутбаларни яна такрорлаши керак. Ҳа, албатта. Қайтага суюниб-суюниб такрорлаши керак. Лекин, ҳарқалай...

Клайд бир дақиқагина эсанкираб қолгани сабабли ҳазрат Данкен шивирлаётган сўзларни эшитмади:

– Шу билан ҳаммаси тамом, деб ўйламанг тағин. Январда янги губернатор ишга тушади. Айтишларича, у жуда ҳам доно ва меҳрибон одам эмиш. Уни яхши биладиган танишларим бор, ўшалардан хат ёздириб олиб, шахсан ўзим унинг ҳузурига бормоқчиман, танишларга хатни ўзим айтиб туриб ёздираман.

Лекин Мак-Миллан Клайднинг кўзлари ва жавобидан унинг қулоқ солмаётганини пайқади.

– Онам... Кимдир унга телеграмма юбориши керак. Унга жуда ҳам қийин бўлди. – Кейин давом этди. – Ҳойнаҳой, анави хатларнинг тўла ўқилгани нотўғри бўлганига улар қўшилишмабди шекили-а? Мен қўшилишар, деб ўйлаган эдим.

У Николсонни эслади.

– Хафа бўлманг, Клайд, – дея жавоб берди обдан эзилган, қайфуга ботган Мак-Миллан; у ҳозир сира гапиргиси келмас, Клайдни бағрига босиб, уни эркалашни, юпатишнигина хоҳлар эди, холос.

– Онаизорингизга телеграмма бериб ултурганман. Қарор хусусида эса, ҳозироқ мен адвокатларингизга йўлиқаман. Сўнгра – буни сизга айтдим – губернаторга ўзим бораман. Муҳими шундаки, у янги одам.

Мак-Миллан аввалги гапларини яна такрорлар, Клайд эса умрида биринчи бор ҳеч нарсани эшитмаётган эди.

### **XXXIV БОБ**

Воқеа юз бераётган жой яқингинада сайланган Нью-Йорк штати губернаторининг кабинети эди, Мак-Миллан юқори суд қарорини Клайдга айтгандан сўнг ҳам орадан уч ҳафта ўтди. Белнеп билан Жефсон ўлим ҳукмини умрбод қамоқ жазосига айлантирмоқчи бўлиб югуриб-елиб қилган барча ҳаракатлари бенаф кетгач (бу афв сўрашнинг одатий бир йўли эди, кейин жиноий далилларнинг нотўғри талқин этилганлиги ва Роберта мактублари қонунсиз равишда ўқиб эшиттирилгани ҳақидаги гаплар ҳам, бари бир, ҳеч қандай фойда бермади, чунки губернатор Ўолтхэм – у собиқ округ прокурори эди в жанубий қисмида судьялик ҳам қилган эди – ўз томонидан ушбу ишга аралашишга ҳеч қандай зарурият йўқ, деб айтиб қўйишини лозим топди), губернатор Ўолтхэм ҳузурига ҳазрат Мак-Миллан ҳамроҳлигига миссис Грифитс кириб келди. Губернатор, қисман Клайд ишига халойиқнинг қизиқуви ҳамон зўрлиги сабабли, қисман эса битмас-туганмас оналик меҳри билан миссис

Грифитс юқори суд қароридан хабар топиши ҳамоно яна Обернга қараб юргуғани ва ўшандан бері ёзган мактубларида ҳамда матбуот орқали, у, прокурор сифатида ўғлиниң жиоятига оид айрим юмшатувчи омилларни текшириб кўришини қаттиқ туриб талаб қылгани, кейинроқ эса ушбу иш хусусида ўз нуқтаи назарини шахсан изҳор этиб бериш мақсадида у билан учрашишга рухсат сўрагани учун ҳам, охири шунга кўнглан эди. Губернатор, бу билан бари бир ҳеч нарса йўқотмайман, деб ўйлади. Она бечора балки бундан бир оз енгил ҳам тортар. Бундан ташқари, газеталарнинг хабарига қараганда, кайфияти салга ўзгариб турадиган ҳалойиқ ҳам – у ёки бу масала қандай фикрни қувватлашидан қатъи назар – Клайдни айбдор деб ҳисоблашга мойилроқ эди. Бироқ миссис Грифитс Клайд ва Роберта тўғрисида жуда кўп мушоҳада юритиб суд вақтида ва суддан кейин Клайд бошидан кечирган барча кечинмалар ва ниҳоят, ҳазрат Мак-Милланнинг айтишига қараганда, ўз гуноҳини бўйнига олиб, бутунлай худога сифина бошлигани хусусида ўйлаб кўрди-ю, инсонпарварлик ва ҳатто адолат қонунлари юзасидан ҳам айни ҳозирги пайтда унинг ҳаётини мутлақо сақдаб қолиш зарурдир, деган қатъий қарорда тўхтади. Ана у, баланд бўй, вазмин ва хийла қовоғи солиқ губернатор олдида ўтирибди, у Клайдни майиб қилган қизгин эҳтирослар нафасини умрида ҳатто бирон марта ҳам сезмаган бир одам эди, аммо чинакам ота ва эр сифатида миссис Грифитснинг азоб-уқубатларини чуқур ҳис этар эди. Хуллас, у ҳозир асабийлашар, чунки зиммасидаги юқ ғоят оғир эди, уни биринчидан, Клайд иши юзасидан пайдо бўлган муайян фикр-мулоҳазалар қийнаса, иккинчи томондан эса, қонун ва тартиботларга нисбатан одатдаги, сира букилмас ихлосмандлик одати уш-

лаб турар эди. У юқори судда тилга олиб ўтилган барча далиллар ва Белнеп билан Жефсон тақдим этган охирги ҳужжатларни ҳам бутун диққатини берип ўқиб чиқди. Лекин у, Дэвид Уолтхэм, ўз қўлида – фақат илгари муҳокамадан ўтган жиноий далилларни бошқача изоҳлашдан бошқа ҳеч қандай янги далилларга эга бўлмагани ҳолда – нимага асосланиб Клайднинг ўлим ҳукмини умрбод алмаштиришга журъат эта олади? Ахир, иккала суд ҳам, у ўлиши керак, деб қарор чиқариб қўйган-ку!

Шу боисдан миссис Грифитс овози титраганча, Клайднинг бутун ҳаётини бошдан-охиригача – қанақанги ажойиб бола бўлгани борми, мана шу воқеага қадар у ҳеч бир ёмон ёки ёвуз иш қилмагани борми (бу ерда эса Робертанинг ҳам айбдорлиги, мисс Х тўғрисида-ю, гап ҳам бўлиши мумкин эмаслиги), шулар ҳақида батафсил сўзлаб берар экан, губернатор унга фақат қаттиқ ачиниб тикилиб турар эди, холос. Ундаги оналик меҳрининг кучи ва қудратини қаранглар-а! У ҳозир қанчалар азоб чекяпти, ўғлининг ёвузлиқда айбдор эмаслигига қанчалар қатъий ишонади, ваҳоланки, ўғлининг гуноҳкорлигини фош этадиган фактларнинг бошдан-охир ҳаққонийлигидан Уолтхэм ҳам, бошқа истаган ҳар бир одам ҳам боҳабар.

– Оҳ, қимматли мистер губернатор, агар сиз ўғлимнинг ҳаётини, айни у ўз дилини гуноҳлардан халос этиб, умрини энди худо йўлига тикишга аҳд қилган бир пайтда қирқадиган бўлсангиз, шу билан сиз, ўша шўрлик қизнинг ўлимини, майли у нима сабабдан ўлганидан қатъи назар, яна давлатга қайтариб берармидингиз, хўш? Наҳотки, Нью-Йорк штатининг миллионлаб фуқароси орасидан битта ҳам раҳмдил одам топилмаса? Наҳотки, сиз, шу фуқаронинг бошида туриб, эҳтимол, кўпчилик одамлар қалбida

ниш уриб келаётган шафқат туйгуларини ростга айлантира олмасангиз?

Унинг овози узилиб қолди... гапини давом этти-ролмади. Юзини буриб, овоз чиқармай ўксиб-ўк-сиб йифлай бошлади, Уолтхэм эса ҳаяжонини зўрга босиб, нима қиласини билмай, унга тикилганча қолди. Бечора аёл! Шунчалик самимий ва покизалиги кўринишидан ҳам билиниб турибди. Шу пайт бошқалар жимиб қолганидан фойдаланган ҳазрат Мак-Миллан сўз бошлади. Клайд мутлақо ўзгариб, бошқача одам бўлиб кетган. Илгариги ҳаёти тўғрисида у бир нарса деёлмайди-ю, аммо қамалганидан бери, ҳарқалай, кейинги бир йил ичида, у ҳаётни, яратган парвардигор ва одамлар олдидаги ўз бурчи ва масъулиятини бошқача тушунишни ўрганди. Шу боисдан зораки, унинг ўлим ҳукмини умрбод қамоқ жазоси билан алмаштириб бўлса...

Губернатор виждонли ва сермулоҳаза одам бўлгани учун Мак-Милланнинг сўзларини гоят эътибор билан тинглади, назарида, Мак-Миллан юксак ахлоқий орзу-тилаклар соҳиби бўлган ўткир қобилиятили шахсга ўхшаб кўринди унга. Бу одам айтган ҳар бир сўз чиндан ҳам ҳақиқатлигига у бир дақиқа ҳам шубҳа қилмади, бунақангидан ҳаққонийликни эса аслида ҳамма ҳам тушуниб етавермас эди. Ниҳоят, губернатор:

– Лекин айтинг-чи, мистер Мак-Миллан, – деди зўрга, – сиз у билан турмада узоқ вақт мулоқотда бўлганингиздан сўнг, судда айтилмай қолгани ва у ёки бу гувоҳ сўзининг моҳиятини ўзгартириб юборадиган, ё рад этадиган бирор-бир аниқроқ далилни шахсан ўзингиз келтира олмайсизми? Тушунинглар, биз қонун билан муомала қиляпмиз, ахир. Мен, айниқса, икки хил суд шу бир қарорни яқдиллик билан қувватлаб турган пайтда, фақат

туйғу овозига қулоқ солибгина, ўз билгимча иш ту-  
толмайман.

У Мак-Милланнинг кўзларига тик боқди,  
Мак-Миллан ҳам ранги оқарган, хомушланган кўйи  
унинг кўзларига тикилди, чунки оғир масаланинг  
ечилиши унинг зиммасида қолган эди, Клайдни  
айбдор ҳисоблашадими ёки йўқми, энди у айти-  
диган сўзга боғлиқ эди. Аммо у нима ҳам дейди?  
Клайднинг тавба-тазаррулари устида обдан бош  
қотириб чиққандан сўнг, парвардигор ва одамлар  
олдида Клайд чиндан ҳам гуноҳкор, деган қарор-  
га келмаганмиди у, ахир? Энди фақат ачингани  
учун, наҳотки дил-дилидан ишонган мустаҳкам  
эътиқодини ўзгартириб ўтиrsa, ахир Клайдни қо-  
ралашга ҳам шу эътиқоди мажбур этган эди-ку?  
Хўш, бу – тангрининг назарида қанчалик тўғри,  
ҳаққоний ва рост бўлиб кўринаркин? Мак-Миллен  
ўша заҳотиёқ, ўзи Клайднинг маънавий устози бўл-  
гани учун, шу обрўимда туриб, маънавий жиҳат-  
дан ундан устунлигимча қолаверишим даркор, деб  
ўйлади. «Сиз ернинг тузидирсиз; агар туз ўз кучи-  
ни йўқотса, қандай қилиб уни шўр қила оласиз?»  
Шундан сўнг у губернаторга:

– Мен маънавий устоз сифатида фақат унинг  
маънавий ҳаёти билангина қизиқдим, – дея жавоб  
берди, – адлиявий жиҳатларига эса қараганим йўқ.

Лекин юзидағи хиёлгина бир ўзгариш ўша зум-  
даёқ Уолтхэмга Мак-Миллан ҳам ҳамма қатори  
Клайднинг гуноҳкорлигига ишонишини сездириб  
қўйди. Ниҳоят, ўзини қўлга олган губернатор мис-  
сис Грифитсга шундай деди:

– Ҳозирча менда аввалги икки суд ишининг қо-  
нунийлигига шубҳа келтирувчи мутлақо аниқ ва  
илгари маълум бўлмаган ҳеч қандай далиллар йўқ-  
лиги сабабли, миссис Грифитс, ҳукмни мен ҳеч бир  
йўл билан ўзгартира олмайман. Мен бундан чуқур

азиятдаман, юрак-юрагимдан азиятга ботмоқдаман. Аммо биз одамларнинг қонунни ҳурмат қилишларини истар эканмиз, ўша қонунарга асосланган қарорларни, агар бунга қонуний асосларимиз бўлмаса, асло ўзгартирмаслигимиз керак. Мен сизга бошқача жавоб беролганимда ўзимни баҳти ҳис этган бўлардим. Ишонинг, бу шунчаки қуруқ гаплар эмас. Сиз учун ва ўғлингиз учун дуои савоб ўқийман, албатта.

У тутгачани босди. Секретарь кирди. Бу, қабул тутаганини билдиради. Миссис Грифитс эса ҳамон бир калима ҳам сўз айтольмай қотиб турарди; губернатор Мак-Милланга – Клайднинг айборлиги ёки айби йўқлиги масаласидаги, – энг муҳим саволни бериб турган нозик дақиқада ҳазратнинг ғалати бир журъатсизлик қилгани миссис Грифитсни тириклайн гўрга тиққандек бўлди. Энди нима қиласди? Ўзини қаерга уради? Кимдан мадад излайди? Худодан – фақатгина худодан излаши мумкин. Бу дунёда кўрган азоблари, танасидан чиқиб кетган жони учун парзардигор уни ҳам, Клайдни ҳам ўз даргоҳида хушнуд этгай. Миссис Грифитс шу фикрлар миясини чулғаганча, ҳамон овоз чиқармай йиғлар эди; ҳазрат Мак-Миллан меҳрибонлик билан унинг қўлидан олди-ю, кабинетдан етаклаб чиқиб кетди.

Миссис Грифитс кўздан фойиб бўлгач, губернатор секретарига юзланди:

– Умримда ҳали бунчалик оғир вазифани ҳеч қачон адо этмаган эдим. То ҳаётимнинг охирги қунларигача сира эсдан чиқмайдиган иш бўлди бу.

У юзини бурди-да, деразага, қорли февраль манзараларига тикила бошлади.

Шундан кейин Клайднинг яшashi учун икки ҳафтагина вақт қолди. Бу сўнгги, тамомила қатъий қарорни ҳам унга тағин ўша Мак-Миллан ха-

барлади-ю, аммо бу гал ёнида онаси ҳам бор эди, онасининг юзига қараб турибоқ, ҳали Мак-Миллан гап бошламасдан, у ҳаммасини тушуниб етди, шунда онаси унга яна ўша: одамзотнинг халоскори бўлган тангридангина паноҳ излаши кераклигини такрорлади. Мана, у тор камерада у ёқдан бу ёққа юрмоқда, негаки энди тинчлик ва ҳаракатсизликка у асло чидолмас эди. Ҳозир, ўлимига саноқди кунлар қолгани аниқ ва узил-кесил ҳал бўлган бир пайтда, у ўзининг бутун омадсиз умрини яна бир бошдан эслаб чиққиси келиб қолди. Ёшлиги. Канзас-Сити. Чикаго, Ликург. Роберта ва Сондра. Шу икковлари билан боғлиқ воқеаларнинг бари унинг ақл уфқидан бир ондаёқ лишилаб ўтди-кетди. Ора-сира бўладиган, қисқа, тотли дақиқалар. Клайд шундай дақиқаларни узайтиromoқчи бўлди – ўшанды Ликургда, Сондра билан танишгандан сўнг бу хоҳиш уни бутунлай қамраб олган эди – кейин мана бу аҳвол юз берди, мана бу аҳвол! Энди шу ҳам ниҳоясига етяпти – шу ҳам... Ахир, Клайд аслида мундай бир тузукроқ яшай ҳам олмади-ку: икки йилдан бери турма чордеворлари орасида азобланиб ётибди. Лекин бу ерда ҳам унинг ўн тўрт, ўн уч, ўн икки, ўн бир, ўн, тўққиз, саккиз кунлик омонат, жонсарак умри қолди,олос. Кунлари зувиллаб ўтиб кетяпти... ўтиб кетяпти... Аммо ҳаёт... ҳаёт-чи... ёруғ кунлар, қуёш ва ёмғир, турмуш ташвишлари, муҳаббат, файрат-шижоат, орзу-истаклар нафосатидан иборат бўлган мана шу ҳаёт наҳотки энди ниҳоясига етса? Йўҳ, йўқ, у ўлишни истамайди. Итмайди. Худодан марҳамат тилаш ва фақат парвардигорни дилга жо этиш тўғрисида онаси ҳамда Мак-Миллан айтган қанча-қанча гапларнинг кимга кераги бор, энг муҳими ахир бугунги кун, ҳозирги сониянинг ўзи эмасми?! Мак-Миллан бўлса, фақат Исонинг оғу-

шида ва ўлгандан кейинги ҳаёт ҳақиқий ҳаётдир, деб уқтиради. Ҳа, ҳа... аммо шунга қарамай, наҳотки у губернаторга, Клайд айбдор эмас ёки айби унчалик оғир эмас, деб айтолмади... наҳотки айтолмади -шундай деганда-ю, ўша дақиқада унга бир қарар эди-да, эҳтимол, ўшанда... ўшанда... Клайдни қатл этишни у умрбод қамоқ жазосига алмаштириб юборармиди... эҳтимол... Клайд губернаторга ҳазрат Мак-Миллан нима деганини онасидан сўраганида, у Клайднинг худо олдида чин дилдан тавба қилганини айтиб, бироқ у айбдор эмас, демаганини (айни пайтда у ўз тавбаси тўғрисида индамаганини), сўзлаб берди. Шунда Клайд: қизик, менга бир яхшилик қилиб юборишга Мак-Миллан ўзини мажбурлай олмабди-да, деб ўйлади. Афсус, афсус! Қанчалар даҳшат бу! Наҳотки, ҳеч бир ердан Клайдни ҳам тушунадиган, унинг инсоний эҳтиросларини – майли аҳмоқонами, майли ўта инсонийми, ўша эҳтиросларини баҳолай биладиган биронта одам топилмаса-я, худди шу туйгулар Клайд сингари ўзгаларни ҳам қийнаб келяпти-ку, ахир.

Лекин энг ёмони бошқа ёқда эди: ҳазрат Мак-Миллан губернатор Уолтхэмнинг охирги саволига жавоб бера туриб айтган нарсасини (тўғриғи, айтолмаган нарсасини) кейинчалик миссис Грифитс сўраганда ҳам такрорлаган эди, шунда она бечора, балки Клайд нима бўлганда ҳам дарҳақиқат, ўзи гуноҳкор бўлса керак, даставвал ўзим ҳам шунисидан қўрқувдимку, деган фикрдан ларзага тушди. Шу боисдан у:

– Клайд, – дея сўз қотди, – агар бўйнингга олмаган бирор-бир гапинг бўлса, вақт борида тавба қилишинг керак.

– Мен парвардигор ва мистер Мак-Миллан олдида иқрор бўлганман, ойи. Шунинг ўзи, наҳотки, етарли бўлмаса?

– Йўқ, Клайд. Сен бутун дунёга жар солиб, гуноҳкор эмасман, дединг. Агар бу ёлғон бўлса, очиғини айтишинг керак.

– Аммо виждоним менга: сен ҳақсан, деса, шунинг ўзи бас эмасми, ахир?

– Йўқ, Клайд, агар худо бошқача гапириб турса, бўлмайди, – дея жавоб берди миссис Грифитс ҳаяжонланиб, оғир руҳий азобдан унинг юраги баттар пораланиб бораётган эди.

Лекин Клайд бу гал гапни чўзуб ўтирмади. Ҳатто Мак-Миллан қаршисида тавба-тазарру қилганидан сўнг ҳам, у билан кейинги суҳбатлари пайтида ҳам ўзи учун ноаниқ бўлиб қолган қўпгина туйфу ва ҳодисаларнинг айрим қирралари хусусида, у ахир, қандай қилиб онаси ёки бутун жаҳон билан баҳслаша олади? Бу ҳақда ўйлаб ўтиришнинг ўзи ҳам бемаънилик эди.

Ўғли унга ишонч билдиrmай қўйди! Миссис Грифитс бу зарбадан дин хизматкори сифатида ҳам, она сифатида ҳам баб-баравар қаттиқ азоб чекди. Ўз қорнидан тушган боласи ўлим остонасида, афтидан, Мак-Милланга айтган гапларини унга айтгиси келмади. Наҳотки, парвардигор миссис Грифитсни бир умр синовдан ўтказаверса? Лекин шунга қарамай, Мак-Миллан айтди-ку, унинг фикрича, Клайднинг илгариги гуноҳлари қанчалик оғирлигидан қатъи назар, у ҳозир тавба қилган ва худо олдида покиза бўлган, унда бу йигитча чиндан ҳам худо даргоҳига боришга тайёр, ахир; Мак-Милланнинг шу гапларини эслаганда, миссис Грифитс бир оз таскин топгандай бўлди. Худо буюк ва раҳмдил. Унинг оғушида оламни топиш мумкин. Қалби ва руҳи ҳамиша худо билан бирга бўлган инсон учун ўлим дегани, ҳаёт дегани нима бўпти? Ҳеч нарса! Яна орадан бир неча йил (атиги бир неча йил!) ўтади-ю, миссис Гри-

фитс ҳам, Эйса ҳам, кейинроқ Клайднинг укаси ва сингиллари ҳам у билан бир маконда учрашадилар ва ер юзида у чеккан бутун мусибатлар унут бўлиб кетади. Кимки агар худо йўлини тарк этса, унга худонинг мадади, меҳри, муруввати ва раҳм-шафқати бўлмайди... Айрим дақиқаларда онасининг диний хуруши тутиб, бир оз галатироқ бўлиб қолишини Клайд неча бора кўрган ва сезган эди. Бироқ айни пайтда у Клайднинг руҳий бардамлигини тилаб дуо ўқиган ва ташвишланган вақтларида ҳам, аслида Клайднинг ҳақиқий фикр ва интилишларини оз тушунишини кўрган эди. Хў бир вақтлар, Канзас-Ситида Клайд не-не нарсаларни ҳавас қилас әди-ю, аммо ҳеч вақоси йўқ эди. Ҳар бир нарса – ҳатто арзимаган нарса ҳам унга ғоятда қимматли эди, бунинг устига, Клайдни бошқа болаларнинг кўзи ўнгидага кўчаларда саргардан қилиб юришлари унга ниҳоят дараҷада оғир ботар эди, ваҳоланки, ўша болаларнинг кўпчилигида у етишолмай юрган нарсалар муҳайё эди... ўша пайтларда у жаҳаннамга десалар ҳам, жон-жон деб жўнарди-ю, аммо ишқилиб, уни анави кўчаларда судраб юриймаса бўлгани эди! Эҳ, бу онасига ажойиб бўлиб кўринган, Клайднинг эса юрагини тирмаловчи миссионерлик ҳаёти! Лекин, балки, у шундай деб нотўғри ўйлагандир? Шундай бўлиши ҳам мумкин-ку! Ҳойнаҳой, энди ундан худонинг қаҳри келаётганимикин бу? У ҳақда онаси ўйлаган фикр, эҳтимол, тўғридир. Агар унинг насиҳатларига қулоқ солганда-ю, у кўп нарсаларга эришиши ҳам аниқ эди. Бироқ шуниси галатики: онаси уни жонидан ҳам азиз кўриб, жигари куйиб, ўзидан кечиб, бор кучи билан унга ёрдамлашишга уриниб ётган бир пайтида, ҳатто Клайд дунёда фақат ҳамдардликка, ҳамдардлиги нимаси, чинакам ва ҳақиқий мададга муҳтож бўлган мана шу,

умрининг охирги дақиқаларида ҳам унга, ўзининг туққан онасига орада юз берган барча воқеаларни ишониб, бир бошдан гапириб беришни эса истамас эди. Уларни гўё ўзаро англашилмовчиликнинг баланд девори, мушкул бир гови ажратиб турган-дек эди – ҳамма гап мана шунда эди. Ўғли майший дабдаба ва ҳашаматга, гўзалликка, муҳаббатга, – муҳаббат бўлганда ҳам ҳашам, ҳузур-ҳаловат, бойлик, эл-юрт орасида шон-шуҳрат қозониши билан чамбарчас боғланиб кетган муҳаббатга қанчалар интизор бўлганларини – унинг эҳтиросли, ўжар хоҳиш ва интилишларини онаси мутлақо тушуниб етолмаса керак. У буларни тушунолмайди. У буларни бадфеъллик – гуноҳ ва худбинлик деб ҳисоблаган бўлар эди. Унинг Роберта ва Сондрага нисбатан машғум қилиқларини эса ахлоқсизлик, бузуқлик, ҳатто қотиллик деб баҳолаши аниқ эди. Энди у ўғлининг чуқур ва тўла-тўқис тавба қилишини астойдил кутяпти... Аслида, ҳатто ҳозир ҳам Клайд ҳазрат Мак-Милланга ва онасига айтган ҳамма гапларига қарамай, Клайднинг туйгулари бошқача бўлган-ку... Клайд худодан ва агар иложи бўлса, онасининг меҳридан ва ҳамма нарсани тушунувчи юрагидан бошпана топишни қанчалик ошиб-тошиб истамасин, бари бир бутунлай бошқача-ку... Агар қўлидан келса...

Оҳ, парвардигор, қанчалар даҳшатлики – шуларнинг бари! У ҳатто мана шу саноқли, кўз очиб юмгунча зумда ўтиб бораётган охирги кун ва соатларида ҳам (қанчалар тез ўтяптики вақт қурмагури ҳам...) бир ўзи ёлғизга ўхшайди, чунки онаси билан ҳазрат Мак-Миллан шу ерда-ю, бироқ на униси Клайдни тушунади, на буниси.

Энг асосийси (ҳаммадан ёмони ҳам шу эдикси), у бу ерга қамалган, уни бир қадам ҳам жилдиришмайди. У бу жойдаги тартиб мудҳишлигини ва бир

умрга абадий ўрнатилиб қолганини аллақачон тушуниб етган эди. Темир тартиб. Бу тартиб худди машинадек одамларнинг ёрдамисиз ёки инсон юрагининг иштирокисиз бир маромда ишлайвепар эди. Турма хизматчиликарини айтмайсизми! Уларнинг – қонуннинг нуқта, вергулигача ўлардай содиқликларига, бўлар-бўлмас талмовсирашларига, носамимий меҳрибонликларига, майда-чуйда хизматга шай туришларига, маҳбусларни айлантиришга олиб чиқишлигарига ёки ҳаммомга бошлаб боришларига қараганда, улар ҳам темирдан эдилар... улар ҳам – бор-йўғи машина, автомат эдилар, улар сени қаергадир ниқтаб... шу деворлар орасида ушлаб турар эдилар... улар сенга бир хилда хизмат ҳам қилишлари мумкин эди, мабодо қаршилик кўрсатгудек бўлсанг, ўлдиришлари ҳам мумкин эди... аммо энг асосийси – улар анави жойга, анави кичик эшикка қараб... ниқтайверишади, ниқтайверишади, тўхтовсиз ниқташади – у ерда эса ҳеч кимга нажот йўқ... нажот йўқ... охири, ўша эшикка итариб юбормагунларича... одинга... одинга ниқтайверишади... қарабсанки, шу билан тамом бўласан! Тамом бўласан!

Клайд ҳар гал шуни ўйлаганида ўрнидан туриб кетар ва камерада у ёқдан-бу ёқقا юра бошлар эди. Кейин одатда, тагин ўша мушкул муаммога: ўз гуноҳи масаласига қайтар эди. У Роберта тўғрисида, унга қилган ёмонлиги тўғрисида ўйлашга ҳаракат қиласар, тавротни ўқир ва ҳатто темир каравотга муккасидан тушганча, тўхтовсиз равишда қуидагиларни такрорлар эди: «Э, худо, дилимга хотиржамлик бер! Э, худо, ақлимни равшан қил! Э, худо мен бандангга номуносиб бўлган шум фикрларни енгишимда ўзинг мададкор бўл! Биламан, виждоним у қадар пок эмас. Оҳ, йўқ! Биламан, ёмонликни ният қилдим. Ҳа, ҳа, мен буни биламан.

Бўйнимга оламан. Лекин, наҳотки, мен ростдан ҳам ўлишим лозим бўлса? Наҳотки, ҳеч бир ердан нажот йўли чиқмаса? Наҳотки, сен мададкор бўлмасанг, парвардигор? Наҳотки, онам айтганидек, ўз қудратингни намойиш этмасанг? Ўлим ҳукмини умрбод қамоқ жазосига айлантиришни, охирги дақиқаларда бўлса ҳам, губернаторга буяуролмайсанми, ахир? Ҳазрат Мак-Милланга ўз фикрини ўзгартириб, губернаторга боришини буяуролмайсанми? Онам борса ҳам ёмон бўлмас эди... Мен эсам бутун гуноҳли фикрларни ҳаёлимдан ҳайдайман. Бошқача одам бўламан. Ҳа, ҳа, ишқилиб, мени қутқарсанг бас, мутлақо бошқача одам бўламан. Ёшгина умримни хазон этма. Ишқилиб, ҳозир жонимни олма. Сенга сифинаман, сифинаман. Тушуниб етишим, ихлос қўйишим... ва сифинишимга мададкор бўл. Мададкор бўл, парвардигор!»

Онаси билан ҳазрат Мак-Миллан губернатор ҳузуридаги ҳал қилувчи суҳбатдан қайтиб келишгандан сўнг, Клайд энди бу ёқда қолган даҳшатга тўла, саноқли кунларида шулар ҳақида ўйлар ва худога сифинар, ҳаётининг охирги соатларида ҳам... яқинлашиб келаётган муқаррар ўлимни ҳамда аллақандай нариги дунё ҳаётини ўйлаб, қалбини ваҳм босар ва мана шу ваҳима онаси ҳамда ҳазрат Мак-Милланнинг эътиқоди-ю хавотирларига қўшилиб кетгач (ҳазрат ҳар куни Клайд ҳузурига қатнар, унга худонинг марҳамати тўғрисида гапириб, бутун вужуд билан берилиб парвардигорга сажда қилиш зарурлигини уқтирас эди), охири Клайдда шундай фикр туғилдики, у ўзи нафақат имон ва ишончга эришиши лозимлигини, балки унга аллақачоноқ етишгани ва айни пайтда тўла ва мустаҳкам бир руҳий осойишталикка ҳам эга бўлганини ҳис эта бошлади. Шундай ҳолатда, у онаси ва ҳазрат Мак-Милланнинг илтимосига би-

ноан жаҳонга ва айниқса, ўз тенгқұрлари бўлган ёшларга қарата бир мактуб ёзди, дарвоҷе, ҳазрат шу ернинг ўзидаёқ, унга беминнат кўмаклашиб, йўл-йўриқлар кўрсатди ва кўзи олдида, ўзининг розилиги билан айрим ибораларини тузатиб ҳам чиқди. Мактуб қўйидагича эди:

«Ажал Водийси кўланкасига қадам қўяр эканман, халоскорим ва ҳамишалик биродарим Исо Христга этишганлигимга мабодо салгина ҳам шубҳам бўлса, уни дилимдан нари ҳайдашга бор кучим билан ҳаракат қилгайман. Мен ҳозир шунга афсусланаманки, худо йўлида хизмат этишга барча имкониятларим бўла туриб, ўз умримни унга бағишлай олмадим.

Агар мен сўзимнинг таъсири ила ёшларнинг эътиборини худога қарата олганимда эди, менга инъом этилган энг олий мукофот – шу, деб ҳисоблар эдим. Аммо энди эса фақат шундай дея олиш имкониятларим бўла туриб, ўз умримни унга ўргатган хутбаларнинг бири эди).

Агар мамлакатимиз ёшлари Христ оғушидаги ҳаётнинг лаззати ва ҳузур-ҳаловатини англағанларида эди, унда улар чинакам ва ҳалол насронийлар бўлиб этишиш, Христос айтганидек, яшашга интилиш учун бор кучларини аямай сарфлар эдилар, бунга ишончим комидир.

Худо даргоҳига киришим учун менга халал берадиган бирорта ҳам тўсиқ қолдирмадим. Била-ман, гуноҳдарим кечиб юборилган, чунки мен маънавий устозим билан вижданан ва очик муносабатда бўлдим ҳамда мен ҳақимдаги бутун ҳақиқат худонинг ўзига аёндир.

Мен ўз бурчимни адо этдим, болиб чиқдим.

*Клайд Грифитс»*

Клайд ушбу мактубни ёзиб, Мак-Милланга топширди-ю, аммо ўзи ҳайрон бўлиб қолди: бу ёзган фикрлари яқингинада уни қамраб олган исёнкор кайфиятига мутлақо ўхшамас эди. Мак-Миллан эса қувонганидан тантанавор бир тарзда хитоб қилди:

– Ҳа, Клайд, чинакам ғалаба қозонилди! «Охиратда мен билан бирга жаннатда бўлгайсан». Худо шуни сизга ваъда этди. Руҳингиз ва жисмингиз билан энди унинг ихтиёридасиз. Илоё унинг номига бир умр гард юқмасин!

У ўз зафаридан шу қадар безовта эдики, ҳатто Клайднинг қўлини кафтларига олиб ўпди, кейин уни бағрига босди.

– Ўғлим, ўғлим, менинг шоддикларим сендуурсан. Тангри ўз адолати ва халоскорлик қудратини айни сенда яққол намойиш этди. Мен буни кўриб турибман. Мен буни сезиб турибман. Сенинг жаҳонга қарата айтган мурожаатингда нақ парвардиғорнинг чинакам овози янграгай!

Сўнгра у мактубни яшириб қўйди; уни фақат Клайднинг ўлемидан кейингина матбуотда босишига қарор қилишди. Лекин Клайд шу мактубни ёзганига ҳам қарамай, айрим дақиқаларда бари бир уни шубҳа-гумон эзар эди. Унинг халос бўлганлиги ростмикин ўзи? Шунчалик қисқа муддат ичада-я? Мактубида айтганидек, у шу қадар қатъият билан ва шак-шубҳасиз бир тарзда худога сажда қила олармикин? Шу тўғримикин? Ҳаёт – ўзи хўп ғалати тилсимот. Келажак-чи, фақат зулматдан иборат. Хўш, нариги дунёдаги умрнинг, худонинг борлиги ростмикин, онаси ва ҳазрат Мак-Миллан таъкидлаганларидек, у Клайдни ўз меҳр-шафқати билан қаршилаб олармикин? Шу тўғримикин?

Бу орада, унинг ўлемига икки кун қолганда, миссис Грифитс беқиёс даҳшат ва умидсизлик

түлғоги остида муҳтарам Дэвид Уолтхэмга тубандагича телеграммани жүнатди:

«Сиз Клайднинг айбдорлигига шубҳа қилмасли-гинギзни парвардигор олдида дадил айта оласизми? Илтимос, жавоб беринг. Акс ҳолда, унингували сизнинг бошингизга тушади. Унинг о на с и».

Бунга губернатор котиби Роберт Феслер қуида-гича телеграмма билан жавоб қайтарди:

«Губернатор Уолтхэм ўзини юқори суд қарорини бекор қилишга қодир эмас, деб ҳисоблайди».

Ниҳоят, охирги қун... охирги соат... Клайдни эски Ажал уйига олиб ўтишди, соқол олиб ва чў-милиб бўлганидан сўнг эса, унга қора шим, ёқасиз оқ кўйлак (кейин бўйини ечиб қўйишлари керак эди), янги намат кавуш ва кулранг пайпоқ беришди. Шу кийимида унга яна бир марта онаси ва Мак-Миллан билан учрашишга рухсат этилган эди – улар қатл арафасидаги кечки соат олтидан то соат тўртгача – охирги саҳаргача Клайднинг ёнида қолиб, у билан худонинг шафқат ва марҳамати хусусида суҳбатлашиб ўтиришлари мумкин эди. Эрталаб соат тўртда турма нозири келди-ю, миссис Грифитс Клайдни Мак-Миллан ихтиёрига қолдириб, чиқиб кетиш пайти бўлганлигини айтди (бу қонун талаб қиласиган қайгули зарурат, дея тушунтирди у). Сўнгра Клайд онаси билан охирги марта видолашди; шу дақиқаларда у ора-сира овози ичига тушиб, юраги қаттиқ қисилиб бораётганини сезса ҳам, ҳарқалай, тили гапга зўр-базўр айланди:

– Ойи, мен итоаткорлик билан, хотиржам туриб ўлаётганимга ишонишингиз керак. Ўлимдан қўрқмайман. Арзу нолаларим худога етди. У руҳимга куч ва осойишталик бахш этди.

Аммо ичига у: «Наҳотки шундай?» – дея қўшиб ҳам қўйди?

Шунда миссис Грифитс бирдан ох урди:

– Ўглим! Ўглим! Биламан, биламан, мен бунга инонаман! Халоскорим тириклиги ва у сени ёлғиз ташламаслигини биламан. Ўлсак ўлаверамиз, аммо ҳаммамиз ҳам мангу яшагаймиз! – У азоб ўқидан яраланиб, самога тикилганча турар эди. Кейин түсатдан Клайдга юзланди-ю, уни маҳкам қучоқладаб олди, анча вақтгача бағрига қаттиқ босиб турди ва: – Ўғилгинам... болагинам... – дея шивирлай бошлади.

Унинг овози тинди, нафаси етмай қолди... гүё бутун қуввати ўғлига ўтиб кетгандек туюлар эди, ниҳоят, миссис Грифитс ҳушини йўқотиб ағдарилиб тушмаслик учун шу ердан чиқиб кетиши лозимлигини сезди... Чайқалиб, шашт билан турма нозирига қаради, у миссис Грифитсни Мак-Милланнинг Оберндаги биродарлари ҳузурига элтиб қўйиш мақсадида кутиб турган эди.

Сўнгра, қиши эртаси қоронфилигида, охирги дақиқалар ҳам ўта бошлади: турма хизматчилари келиб, оёққа темир тахтакач ёпишириш мумкин бўлсин учун Клайднинг ўнг почасидан андаккина тилиб қўйишиди, кейин камералар олдидаги пардаларни тушириш учун кетишиди.

– Афтидан, вақт етганга ўхшайди. Дадил бўл, ўглим! – бу сўзларни турма назоратчиларининг келаётганини кўрган ҳазрат Мак-Миллан айтди; Клайд ҳузурида энди у билан бирга ҳазрат Гилфорд ҳам бор эди.

Ана, Клайд каравотидан турди, у Мак-Миллан билан ёнма-ён туриб Иоанн инжилининг 14, 15 ва 16-сураларини тинглаётган эди: «Сизнинг руҳингиз йўлдан озмасин. Худога ишонинг ва менга ҳам ишонинг». Сўнгра – охирги йўл; ҳазрат Мак-Миллан Клайднинг ўнг қўли томонда, ҳазрат Гилфорд чап қўли томонда, турма назоратчилари эса – олдинда

ва орқада. Бироқ одатдаги сифинишлар ўрнига бу гал ҳазрат Мак-Миллан қўйидагиларни эълон қилди:

– Худонинг амрига бўйсунинг, вақти соати келганда у сизни ёрлақайди. Борки ташвишларингизни яратганга инонинг ва инчунин, сиз ҳақингизда қўйиб-пишиб қайфурувчи фақат удир. Дилингизга осоийшталик бир умр ҳамроҳ бўлғай. Қисқа муддатли изтиробларимиздан сўнг бизни ўз фарзанди Исо Христ орқали абадий шаън-шавкатта чорлаган парвардигорнинг йўли ҳамиша ойдин ва одил йўлдир. «Бу йўлим – ҳам ҳаққоний, ҳам ҳаётийдир. фақат мен орқалигина яратган худога етишгайсизлар».

Аммо Клайд орқасида электр курсиси кутиб турган ўша эшик томонга қараб бораётшиб, Ажал уйи йўлагини кесиб ўтаётганида:

– Алвидо, Клайд! – деган овозлар эшитилди.

Шу аҳволда ҳам, ҳарқалай, Клайдда инсоний фаросат ва куч етарли даражада эди:

– Ҳаммангизга алвидо! – деди у ҳам.

Лекин овози шунақанги ғалати, секин, худди олисдан келгандай эшитилдики, ҳатто Клайднинг ўзига ҳам у эмас, ёнида бораётганлардан биронтаси қичқиргандек бўлиб туюлди. Оёқлари ҳам назарида, қандайдир беихтиёр равишда кўтарилиб тушаётганга ўхшар эди. Уни тўхтовсиз олдинга, олдинга, анави эшик томонга бошлаб боришар экан, у юмшоқ кавушларнинг таниш шип-шипини яна эшитмоқда эди. Ана, ўша эшик, рўпарасида турибди... ана, ланг очилди. Ана, ниҳоят, нуқул тушларида кўриб... ўлгудай қўрқиб юрган электр курсини ҳам кўрди... энди уни шу курсига боришга мажбур этишади. Уни ўша курсига... ўшангага... олдинга... олдинга никташади... шунинг учун ҳам уни анави очилган эшикдан ичкарига киргазишиди-ю, яна шарт ёпиб олишди... ташқарида эса у мазасини кўриб улгуролган ёруғ дунё қолди-кетди.

Орадан чорак соат вақт ўтгач, ҳазрат Мак-Миллан ранги заҳиллашиб, руҳи эзилганча, дилтанг ва жисмонан чилпарчин бўлган одамдай зўрға оёқларини судраб турманинг совуқ дарвозаларидан чиқиб келди. Худди Мак-Милланнинг ўзига ўхшаш... қанчалар нурсиз, фариб кўринар эди мана шу булатли қишиш куни... У ўлди! У, яъни Клайд, бундан атиги бир неча дақиқагина олдин бутун вужуди қақшаб, аммо, ҳарқалай, нимагадир ишониб, ҳазратнинг ёнида бораётган эди, мана энди эса, у йўқ. Қонун! Мана шунақанги турмалар. Клайд сажда қилган жойларда энди яна бошқа кучли ва ёвуз одамлар таҳқирланиб ётишибди. Унинг тавба-тазаррулари-чи? Худонинг марҳамати ила оҳу фифонларим қабул бўлди, деб у тўғри ўйлаганмикин, парвардигор унинг гуноҳини қай даражада кечирди экан? Чиндан ҳам шундай бўлдимикан? Клайднинг кўзлари! Унинг бошига темир қалпоқ кийгазишиб... электр қуввати қўйишганда... ҳазрат Мак-Милланнинг ўзи ҳам хушидан айрилиб, Клайднинг оёқлари остига ағдарилиб тушишига сал қолди... бутун аъзойи бадани қалтираб, қайт қилгиси келди... кимнингдир ёрдами билан бир амаллаб шу хонадан чиқиб кетди, ваҳоланки. Клайднинг ишонган тоги ҳам мана шу ҳазрат бўлиб қолган эди. У худодан Клайдга сабр-бардоштилаган эди, сабр-бардош...

Ҳазрат Мак-Миллан ҳувиллаган кўча бўйлаб зўрға қадам ташлаб борар, аммо шу қиши мавсумида битта ҳам барги қолмаган, яйдоқ, мунғайган оғочларга суюнганча ора-сира тўхтаб, нафасини ростлашига ҳам тўғри келар эди... Клайднинг кўзлари! Анави даҳшатли курсига ҳолсизгина чўккан пайтидаги унинг нигоҳи... олазарак кўзлари, Мак-Милланнинг назарида, ҳам унга, ҳам атрофда

турганларнинг барига илтижоли ва таажжуб билан жавдирагандек бўлиб туюлди.

У ҳалол иш қилдими ўзи? Губернатор Уолтхэм билан сұхбатлашаётган пайтида кўнглига келган фикри чиндан ҳам тўғри, адолатли ва раҳм-шафқатли эдими, хўш? Ўшанда, эҳтимол... эҳтимол... губернаторга, Клайд анави, ёт таъсирларга берилиб кетган эди, деб жавоб қайтаргани маъқул бўлармиди?.. Наҳотки, энди унинг дилини ҳамма вақт ўқинч кемириб юрса?

«Биламан, халоскорим тирик ва уни охиратда қутқариб қолгай».

Мак-Миллан миссис Грифитс ҳузурига боргунча, ўзини хиёл қўлга олиш мақсадида яна анча соат давомида шаҳар кезиб юрди. Клайднинг онаси эса Оберндаги «Халоскорлик Армияси»нинг арбоблари ва ҳазрат Фрэнсис Голтнинг рафиқасиникида эрталаб соат тўрт яримдан бошлаб тиз чўкиб, ўғлининг руҳи учун сажда қиласи эди; у Клайд – яратган парвардигорнинг даргоҳидан паноҳ топганини сезиб қолиши умидида тинмай сифинар эди.

«Кимга инонганимни биламан», деб сажда қиласи эди у.

## ХОТИРА

Ёз оқшоми, кеч кира бошлаган пайт.

Сан-Францискодаги савдо марказининг баланд бинолари ва тик кулранг деворлари ҳам кечки фига-ширалика чўмган.

Фала-ғовурули кундан сўнг энди деярли жимиб қолган Маркет-стритдан жанубга қараб кетувчи катта кўчада беш кишидан иборат бир гурӯҳ боряпти: биринчиси олтмиш ёшлардаги пакана, семиз, безрайган юзли ва мурдаларники сингари сўник, нурсиз кўзли эркак киши – у ниҳоятда

ушоқ ва толиққан бир мүйсафид эди; қалин оппоқ сочлари доирасимон эски кигиз шляпаси остидан ёйилиб чиқиб ётибди; елкаси оша ўтказилган камар билан ихчамгина органчани бўйнига осиб олган, бунаقا асбоблардан одатда кўча дуогўйла-ри ва машшоқларигина фойдаланадилар. У билан бирга ундан атиги беш ёшлар чамаси кичикроқ, бўйи тикроқ, у қадар тўла бўлмаса ҳам, аммо зува-ласи пишиққина, сочлари худди қордек оппоқ бир аёл боряпти, у бошдан-оёқ қора кийинган – қора кўйлак, қора шляпа, қора бошмоқда эди. Унинг кенг юзи эриникига қараганда маънодорроқ кўри-нар, бироқ мусибат ва азоб-уқубатларнинг зўри-дан буришиб кетган эди. Ёнида эса, қўлида тав-рот ва бир тўп оятнома китобларини кўтарганча, чиққан бўлса энди етти-саккизга чиққан, эпчилиги-на, йирик-йирик кўзли бир бола кетягти, у унчалик яхши кийинмагану, лекин серҳаракат ва хушқад эди; кўринишидан бояги ёши улғайиб қолган аёлга у жуда ҳам ўргангандиги билиниб турад ва нуқул унга яқинроқ бўлишга интилар эди. Уларнинг кетидан эса сал орқароқда йигирма етти ёшлар чамасидаги сўлғин, хунук бир аёл ва эллик ёшлардаги яна бири келмоқда эди, улар жуда ҳам ўхшаш эдилар, афти-дан, она ва бола бўлсалар керак.

Кун иссиқ эди, аммо ҳавода тинч океан ёзининг ёқимли бир беҳоллиги сезилиб турад эди. Ҳали у томонга, ҳали бу томонга тинмай ўтаётган сон-са-ноқсиз автомобиллар ҳамда трамвайларга тўла кенг ва гавжум Маркет-стрит кўчаси бурчагига етиб боришганда, улар чорраҳадаги полициячи-нинг ишорасини кутиб, тўхтаб қолишиди.

– Менга яқинроқ тур, Рассел, – деди кекса аёл.  
– Қани, қўлингни бер-чи.

– Назаримда, бу ерда кўча ҳаракати кун сайин кучайиб бораётганга ўхшайди, – деди эри эшити-лар-эшитилмас, маънисиз бир оҳангда.

Трамвай овозлари жаранг-журунг қилас, автомобиллар тариллаб, гувиллар эди. Лекин кичик гурухнинг булар билан мутлақо иши йўқ, фақат кўчани тезроқ кесиб ўтиш пайида эди.

– Саёқ дуогўйлар, – деди сал наридан ўтиб бораётган банк клерки ҳамроҳи – кассир қизга қараб.

– Ҳа, уларни мен шу ерда деярли ҳар чоршанбада учратаман.

– Аммо, менимча, шундай болани кўчама-кўча судраб юриш – одам қиласидиган иш эмас. У бундай ишлар учун ҳаддан ташқари кичкиналий қиласи, тўғрими, Элла?

– Менимча ҳам шундай. Масалан, менинг укам шундай нарсалар билан шуғуланишини истамаган бўлардим. Бола учун ҳаётми шу, ахир? – деб қувватлади Элла.

Бояги гурух кўчани кесиб ўтиб, нариги чорраҳага етди-да, худди мақсадига эришгандай тўхтади; мўйсафид органчани ерга қўйди-ю, уни очиб, нота қўядиган ихчам бир курсича чиқарди. Хотини эса бу орада неварасининг қўлидан таврот ва бир тўп оятнома китобчаларини олиб, таврот билан битта китобчани эрига узатди, бирини нота курсичасига қўйди, яна бирини эса ўзида қолдириб, кейин бошқаларга ҳам битта-биттадан бўлиб берди. Эри паришонхотир тарзда, бироқ шунда ҳам қалбаки дадиллик билан у ёқ-бу ёққа кўз югуртирди-ю, эълон қилди:

– Бугун биз икки юз етмиш олтинчи: «Таянчимиз қанчалар мустаҳкамдур», деган сурадан бошлаймиз. Мисс Шуф, қани марҳамат.

Шундан сўнг аёллар ичдаги энг ёши, ниҳоятда озгин, қоқ суюк, тунд ва хунук хотин – тақдир унга сира кулиб боқмаган эди – сарфиш йифма курсига ўтирди-да, бармоқларини клавиш узра ўйнатиб ва ноталарни варақлаб, бояги айтилган сурани чала бошлади; қолганларнинг бари унга жўр бўлишди.

Бу орада уй-уйларига қайтаётган турли хил касб ва мансабдаги одамлар шаҳарнинг бош кўчаси биқинида қулайгина ўрнашиб олган бу кичик гуруҳни кўриб, мужмал кайфиятда қадамларини секинлатишар, ўтирилиб қараб ўтишар ёки нима бўлаётганини билиш мақсадида тўхтаб ҳам қолишар эди. Анавилар ҳадеб хониш қилишар экан, кўчадаги хилма-хил, лоқайд оломон эса умумий ишончсизлик ва совуққонликка қарши баралла овоз билан дуо ўқиётган мана шу кўримсиз гуруҳнинг ғалати аҳволига қизиқсиниб, ажабсизниб тикилиб ўтар эди. Эскирган, шалвираган кўк костюмдаги анави сочи оппоқ, фариб, ҳеч нарсага ярамайдиган чол бечорани қаранглар, нуроний сочли, бақувват, лекин бесўнақай ва толиққан анави аёл-чи; ранги қип-қизил, ўзи покиза, ҳали бузилмаган, норасида анави болакайни айтинглар... у бу ерда нима қилиб юрибди ўзи? Кейин анави кути ўчган ориқ қари қизни ва худди ўзига ўхшаш озгин, меровсиб турган онасини кўринглар... Йўловчилар, ўша гуруҳ орасидаги фақат оқ соч хотиндагина куч-кувват ва қатъият мавжудлигини ҳис этишар эди, шу куч-кувват ва қатъиятини у қанчалар кўр-кўrona, бенаф томонга сарфлаётганидан қатъи назар, ҳаётда у бахтга эришолмаса ҳам, ҳарқалай, ўз жонини сақлаб қолишга қурби етадиган аёллардан эди. Унда гарчи нодонликдан иборат бўлса-да, аммо ҳар ҳолда, кишида ҳурмат уйфота оладиган бир эътиқод борлиги бошқа шерикларига қараганде яққол кўзга ташланар эди. У оятномани осилган қўлида ушлаганча, олис бўшлиққа назар ташлаб қолган эди, шу ердан кетолмай турган кўпгина йўловчилар эса унга тикилиб, ҳар бири ўзича: «Ҳар қанча камчилигига ҳам қарамай, эътиқодига тўла амал қиласидиган дуогўй фақат шу бўлса керак, ҳойнаҳой», дея фикр юри-

та бошлашди. Ўзи мадҳ этаётган олий, қудратли ва зийрак илоҳий кучнинг донишмандлигига ва марҳамати кенглигига қатъий ҳамда мустаҳкам ишончи юзининг ҳар бир бичими-ю, ҳар бир ҳаракатида ҳам яққол муҳрланиб турар эди.

Сура хониши тутагандан сўнг, хотин узун бир дуони ўқиди; кейин эри панд-насиҳат қилиб ваъз айтди, қолганлар эса худо томонидан ҳар бирларининг пешоналарига ёзиб қўйилган ўз қисматлари тўғрисида гувоҳлик бериб ўтдилар. Сўнгра китобчалар йифилиб, орган қопқоғи ёпилиб, уни эри тасмасидан елкасига осиб олгач, улар яна изларига қайтдилар.

– Ажойиб оқшом бўлди бу. Назаримда, халойик одатдагидан кўра анча эътиборлироқ туюлди чаммада, – деди эри.

– Ҳа-я, – гапни илиб кетди орган чалган аёл. – Ҳар ҳолда, ўн бир киши китобчаларимиздан олди. Бир кекса жентельмен эса, хонақоларингиз қаерда жойлашган ва ибодат маросимларингиз қайси кунларда бўлади, деб ҳам сўради мендан.

– Худога шукур! – дея якунлади мўйсафид.

– Мана, ниҳоят, хонақонинг ўзига ҳам етиб келишди – «Умид юлдузи. Тақводорлар хонақоси. Ибодат йифинлари чоршанба ва шанба кунлари 8 дан кеч соат 10 гача давом этади; якшанба кунлари соат 11, 3 ва 8 да. Эшигимиз ҳамма учун очиқ». Шу лавҳа остида ҳар бир деразага: «Худо – бу меҳр-муҳаббатdir» деган бошқа лавҳа ёпиштириб қўйилган, тағин ҳам қуйироқда эса, майдароқ ҳарфлар билан битилган: «Сен онангга қанча вақтдан бери нома ёзмадинг?» деган лавҳа турибди.

– Бувижон, менга битта чақа беринг! Чопиб бориб ҳу муйилишдан музқаймоқ олиб келаман! – деб сўради болакай.

– Хўп, Рассел. Лекин тезда кел, эшитдингми?

– Ҳа, албатта, бувижон! Ҳавотир олманг!

– У, бувиси юбкасининг чуқур киссасидан чиқарип берган ўн центлик чақани олди-ю, музқаймоқчи томонга қараб югуриб кетди.

Унинг қадрли ўғли. Қариган чоғида кўзининг нури, қалбининг қувончи. У шу неварасига меҳрибон, мурувватли бўлиши, ҳадеб уни жеркиб, тергайвермаслиги керак, эҳтимол, у илгари ўз боласига... У чопиб кетаётган невараси орқасидан маъйингина ва хаёли бир оз паришонроқ бўлиб термулиб қолди. «Ўшанинг хотираси учун».

Кейин Расселдан бошқа кичик гуруҳнинг бари кўримсиз сарғиш дарвозадан кириб кетди-ю, кўздан фойиб бўлди.

*Адабий-бадиий нашр*

ТЕОДОР ДРАЙЗЕР

АМЕРИКА ФОЖИАСИ

*Иккинчи қисм*

Мұхаррір  
Маъмура ҚУТЛИЕВА

Бадиий мұхаррір  
Үйғун СОЛИХОВ

Мусаҳҳих  
Мадина МАҲМУДОВА

Саҳифаловчи  
Суннат МУСАМЕДОВ

Техник мұхаррір  
Сурайё АҲМЕДОВА

Лицензия рақами: АI № 252, 2014 йил 02.10.да берилган.

Босишига 2016 йил 25.03.да рухсат этилди.

Бичими 84x108 1\32.

Босма табоги 14,0 Шартли босма табоги 23,52

Гарнитура «Bookman Old Style». Офсет қофоз.

Адади 5000 нұсха. Буюртма № 64.

Баҳоси келишилган нархда.

«Янги аср авлоди» НММда тайёрланды.

100113. Тошкент, Чилонзор-8, Қатортол күчаси, 60.

**Мурожаат учун телефонлар:**

Нашр бўлими – 147-00-14; 129-09-72;

Маркетинг бўлими – 128-78-43; 397-10-87 факс – 273-00-14;

e-mail: yangiasravlodi@mail.ru